

Alkitab
Bahasa Gorontalo

Bahasa Sehari-hari 2006

Perjanjian Baru

Matius

1 ¹ Uti-utieelo daputali nenemoya li Isa, wali mai lei Dauda, wali mai lei Abraham. Monto olei Abraham demola olei Dauda, tataa-nggulaalo nenemoya li Isa odie mola:

² Abraham, Isihaka, Yako, Yehuda wau mongo wutatio, Peres wolei Jera (tiilo limongolio tanggulio ti Tamar), Hejron, Ram, Aminadab, Nahason, Salmon, Boas (tiilolio ti Rahab), Obed (tiilolio ti Rut), Isai, wau Olongia Dauda.

³ (1:2)

⁴ (1:2)

⁵ (1:2)

⁶ Monto olei Dauda demola maasa bangusa lo Isiraïlu piloyahu ode Babel tulatuladu tataa-nggulaalo odie mola: tei Salomo (tiilolio yito bakasi dile lei Uria), Rehabeam, Abia, Asa, Yosapat, Yoram, Ujia, Yotam, Ahasa, Hijikia, Manase, Amon, Yosia, Yekonya wau mongo wutatio.

⁷ (1:6)

⁸ (1:6)

⁹ (1:6)

¹⁰ (1:6)

¹¹ (1:6)

¹² Monto bangusa lo Isiráilu pilolayahu ode Babel demola pilotutua li Isa tulatuladu tataa-nggulaalo odie mola: Yekonya, Sealtiel, Jerubabel, Abihud, Eliyakim, Ajur, Jadok, Akhim, Eliud, Eleajar, Matan, Yako, Yusu dile li Maria. Wau monto oli Maria boi-boitolo pilotutulio mai ti Isa táiluntelio Almasi.

¹³ (1:12)

¹⁴ (1:12)

¹⁵ (1:12)

¹⁶ (1:12)

¹⁷ Oditolio monto olei Abraham demola olei Dauda, ngoáamila woluo mopulaa pato wali. Monto olei Dauda demola maasa bangusa lo Isiráilu pilolayahu ode Babel woluo mopulaa pato wali olo. Monto maasa bangusa lo Isiráilu pilolayahu ode Babel demola pilotutua li Isa woluo poli mopulaa pato wali.

¹⁸ Odie mola hikaayati pasali u pilotutua mai li Isa Almasi. Tiilo-Lio yito ti Maria titiilantahe wolei Yusu. Bo tou timongolio diipo lonika lopatatai ti Maria maílombodaá. Diila otaawa lei Yusu deú

ti Maria maĩlombodaá sababu kawasa lo Rohullah.

¹⁹ Tei Yusu, tilantahio boito, deúyito-yito ngotaalio talaito modungohe butoó lo agama. Oditolio patujulio mabuntoolio tilantahio boito wolo poó-poóoyo, alihu ti Maria diila moolito totalu lotaa dadaata.

²⁰ Tou tei Yusu donggo hemo timbangi mola suáli boito, tio maloó tohiilopo. Todelomo tohiilopio boito, tio loóonto malaíkati ngota lo Eeya lotahuda mai olio, "Yusu, wali lei Dauda diila oohe monika woli Maria; sababu taúkikiíá tabanta-bantala olio boito lowali tokawasa lo Rohullah.

²¹ Ti Maria mamotutu mai talolaí kikiíá ngota. Talolaí boito musi unteemu maó Isa, sababu Tio mamopoáahu umati-Lio monto duduú-sawaalo limongolio."

²² Ngoáamilalo boito motoduo mai odito alihu pohupohutu wolo u matilahuda mai lo Eeya lotimbulude tonabi-Lio, odie,

²³ "Tadulahu ngota maómbodaá wau mopotutu mai talolaí kikiíá ngota. Taúkikiíá boito maúnteelio 'Immanuel'." (Immanuel bahasa lo Ibrani u bolilio maó, "Allahu Taáala mai wolanto").

²⁴ Lapataó tei Yusu malobongu mola, pilohutulio maó wolo utilahuda Maláikati lo Eeya boito to olio. Tio malonika woli Maria.

²⁵ Bo ngotilonggadu ti Maria diipo lopotutu mai lo walaío boito, tei Yusu diila loúlauwa woli Maria. Wau tou walaó boito mapilo tutulio mai, tei Yusu longunte maó o–Lio Isa.

2 ¹ Ti Isa pilotutulio tokota Betlehemu tolipu lo Yudea tomaasa li Olongia Herodes hemomalanta. Tou boito dengolo lota ahali lopoliyama lonto tiimulu lonaó mai ode Yerusalemu.

² Timongolio helohintu ode utoonulalo maó, "Touútoonu Walaó boito, tamaa potutuolio mai mowali onlongia tau lo Yahudi? Ami maloóonto poliyama–Lio lobutu mai towimbihu tiimulu, wau ami lonaó mai molubo o–Lio."

³ Tou ti Olongia Herodes loódungohe suáli boito, tio iloohea daá, odito lo ngoáamila tau to Yerusalemu.

⁴ Yi tio maleínaó mai ngoáamila iimamu taúwa wau guguu–ruwaalo agama bangusa lo Yahudi lotiambu. Tulusi tio lohintu maó olimongolio, "Touútoonu u

mapotutualio mai li Olongia tadilanti lo Allahu Taáala?"

⁵ Timongolio lolametaó, "Tokota Betlehemu tolipu lo Yudea. Sababu odie mola u tiluladio mai ngotaalio lonabi,

⁶ 'Yiό Betlehemu, tolipu lo Yehuda, yiό sama-samaata diila pulito ukikiiό towolota lo kokoo-tawaalo upolohuna daá to Yehuda. Sababu monto olemu mamei dungga mai taúwa ngota tamamo titaúwa to umati-Ú Isiraílu."

⁷ Lapataó loótapu maó katalangani boito, tei Herodes maleí tiangai tahi ahalia lopoliama lonto tiimulu boito loú poó-poóoyo. Lapataó yilintulio maó olimongolio omolua patatio poliyama boito bohulo iloontonga.

⁸ Lapataó uito ilahulalio mola timongolio ode Betelehemu wau lolahuli maó utie, "ponaólo, mola lolohe mai Walaó boito wolo ulintapo. Wau wonu timongoli moódungga o-Lio, pohabaria mai olaú, alihu waú olo mamonaó mola molubo o-Lio."

⁹ Tulusi timongolio malonaó. Timongolio luli loóonto poliyama u iloontonga limongolio omoóomolu to ambahu tiimulu. Donggo boli wengahi mongolio

loóonto poliyama boito! Poliyama boito mulomulo limongolio wau malo huheli pasipasi toitaato tambati lo Walaó boito.

¹⁰ (2:9)

¹¹ Timongolio tilumuwoto ode bele boito wau loóonto Walaó boito woli Maria, tiilo-Lio. Timongolio malo sujudu wau lolubo Walaó boito, tulusi lomuó tambati lohalata limongolio wau lopodewo maó o-Lio hulawa, alama wau damahu moonu.

¹² Allahu Taála malo poéelai olimongolio todelomo tohiilopo alihu diila maó mohualinga mola odelei Herodes. Oditolio timongolio malo hualingo lolibaya dalalo wewo.

¹³ Toú tahi ahalia lopoliana boito malo monggato, maláikati lo Eeya luli lopo bilohei batanga odelei Yusu todelomo tohiilopo. Maláikati boito malo tahuda, "Tei Herodes omakasudu mololohe Walaó boito wau pateelio mate-mateelo maó. Sababu uito pobongulo, delowalo Walaó boito woliilo-Lio momonggata mola ode Masiri. Potibiluópo mola teto tunggula Waú mamuli motahuda mai olemu."

¹⁴ Tei Yusu malobongu, wau toú huilo boito tio lodelo Walaó boito woliilo-Lio lomonggata mola ode Masiri.

¹⁵ Timongolio malo tibiluloá mola teto tunggula tei Herodes yilate. Odi-odieelo mola malo toduo wolo u tilahuda lo Eeya lotimbulude tomongo nabii-Lio, odie, "Tio motianga Walaúu-Ú monto Masiri."

¹⁶ Toú ilotaawa lei Herodes tahi ahalia lopoliamama lonto tiimulu boito longaakali olio, maloingo daá tio. Tulusi tio maléi pate yila-yilateelo maó ngoáamila mongo lolai kekei taa umululio totibawa dulo taunu to Betelehemu wau topalitio. Uito lotuuúde wolo katalangani u lotapulio lonto tahi ahalia lo poliyama boito tomimbihu saaátilio poliyama boito iloontonga.

¹⁷ Odi-odieelo mola lotoduo mai lou wolo u mapeéenta yiloíya li Nabi Yeremia, odie,

¹⁸ "To Rama dungo-dungohei suala hilimuta yinggile wau hiyongo, Hiliyonga li Rahel mongo walaío; tio diila mohuto liyangolo sababu timongolio madiduú."

¹⁹ Lapataó tei Herodes yilate maó, wau tou tei Yusu donggo to Masiri malaíkati ngota lo Eeya luli lotibilohei to tohiilopio.

²⁰ Malaíkati boito malo tahuda, "Tau-tauwalo taóhila momate mateelo maó to Walaó boito mailate. Sababu

uito pobongulo, delowalo Walaó boito woliilo–Lio wau pohualingolo mola ode Isiraílu."

²¹ Tei Yusu malobongu, wau lodelo Walaó boito woli Maria luli lohualinga mola ode Isiraílu.

²² Bo lapataó tei Yusu loódungohe deú tei Arkelau, walaée Herodes talolaí malo buulota woliyamolio lowali onlongia tolipu lo Yudea. Oditolio tei Yusu mailoohe lonaó mola. Lapataó tio loótoduo mai potuhata lo Eeya u wumbutio mola todelomo tohiilopo, tio lonaó ode madala lo Galilea. Mota teto tio lotibiluloá tokota u ilunte Najaret.

²³ Louú odito malo toduo mai wolo uiloíya lomongo nabi pasali lo Walaó boito: "Tio maúnteelio Taulo Najaret."

3¹ Touú boito malonaó mai tei Yahya Tamopolihua ode huta hungayo u luasi daá to Yudea wau malo lumulo lohutuba.

² "Polilihulo monto duduu–sawaalo limongoli," ualio maó "sababu Allahu Taáala mahuáa momalenta odelo Olongia!"

³ Tei Yahya botieelo tamila–kusudu li Nabi Yesaya todelomo uiloíyaalio botie, "Woluo tawuwa–wuwaatiá to huta hungayo

u luasi daá, 'Podapato maó dalalo ode Eeya; poópayade maó dalalo o-Lio.'"

⁴Tei Yahya pakepake boó lolambuto unta. Bintolo lo wohutalio walito, wau uáalolio bulita wau hula lotiiá lo oáayua.

⁵Dadaata tau lonto Yerusalemu, lonto ngoilanggubu lipu lo Yudea wau lonto maaa-dalawaalo topalito Dutulaa Yordan lonaó mai odelei Yahya.

⁶Timongolio mai longaku duduu-sawaalo limongolio wau tei Yahya helo polihu olimongolio to Dutulaa Yordan.

⁷Dadaata olo taulo Parisi wau Saduki lonaó mai odelei Yahya mai léilihu. Bo touú tio loóonto olimongolio lonaó mai malo loíya tio olimongolio, "Timongoli tau moleeto! Tatoonu talo loíya deú timongoli moólahi monto hukuumaní lo Allahu Taáala u mamei dungga mai?

⁸Pobilohe maó wolo huhutuumu deú timongoli malo lilihu lonto duduu-sawaalo limongoli.

⁹Diila maó polantobu u timongoli moólahi monto hukuumaní wolo molóíya deú tei Abraham yito tinenemoya limongoli. Poótoloma maó, monto boboo-tuwaalo botie olo Allahu Taáala mambo mohutu mai wali odelei Abraham!

¹⁰ Bulingo malei dapato u poluwodela ayu demola wuwa-wuwaaátio lomaó. Timíidu ayu udiila momungo u mopiohe maluwodulo wau pomahulio ode delomo tulu.

¹¹ Watia mopolihi olimongoli wolo taluhu u mopo biloheó deú timongoli malo lilihi lonto duduu-sawaalo limongoli; bo tamamei dunga mai lapataó Watia, mamopolihi olimongoli wolo Rohullah wau tulu. Tio lebe udaá maó wolaatia. Penu bo modelo sapatu-Lio watia diila paatuti.

¹² To uluú-Lio otiitihe polaapalo ngoáamila pale-Lio tunggula belesi. Pale maimoó-Lio ode delomo yibungo, bo ngoáamila taapo lopale mapobuo-Lio todelomo tulu udiila mowali mate."

¹³ Toú boito ti Isa lonaó lonto Galilea ode Dutulaa Yordan. Mola teto Tio lonaó mai odelei Yahya wau léilihi.

¹⁴ Bo tei Yahya lohimontala diila lololimo hihiiile-Lio boito, wau loloiya maó, "wawaatiyalo tapatutilio lihua li Paaá. Botia tumbaó ti Paaá tamalonaó mai ode laatia."

¹⁵ Boti Isa lolametaó, "Huliaalo maó bo tosaaáti botie. Sababu louú odito ito mamohutu maó ngoáamila u kahandakio

lo Allahu Taáala." Oditolio mailihua lei Yahya ti Isa.

¹⁶Lapataó yilihualio, ti Isa huáa yilumualai lonto taluhu todutulaa boito. Debolo hulungo lohuóolo mola wau ti Isa loóonto Rohullah lotuhutai debo odelo bulungi poombo ode yitaa–Tio.

¹⁷Lapataó dungo–dungohei suala lo Allahu Taáala lotahuda mai, "Tabotieelo walaúu–Ú tapilonu–Ú. Tio moósanangi hilaa–Ú."

4¹ Lapataó ti Isa dilelo lo Rohullah ode huta datahu u luasi daá wau delita alihu mola yimontala lo Ibilisi.

²Wopato pulu hui ti Isa diila lolamela. Lapataó Tio mapilolango.

³Ibilisi lonaó mai ode o–Lio wau lolóiya maó, "Yió botie Walaó Allahu Taáala, diila odito? Nte ahuli maó boboo–tuwaalo botie mowali roti."

⁴Ti Isa lolametaó, "Todelomo Kitabi tulatulade: Manusia diila moótumulo bo wolo roti wambaó, bo olo monto motiïdu pilimani u pilotahuda mai lo Allahu Taáala."

⁵Lapataó uito ti Isa dilelo lo Ibilisi ode Yerusalemu, tokota mantali, wau pilopo tihulio Tio tobilinga Bele lo Eeya.

⁶ Lapataó Ibilisi lolóiya maó o-Lio, "Yió botie Walaó Allahu Taáala, diila odito? Wonu odito potidehulo mola ode walungo; sababu todelomo kitabi woluo tulatulade odie, 'Allahu Taáala mamopoáhu mai mamaa-láikati-Lio moduóla ole-Mu, timongolio mamó langgomo ole-Mu wolo uluú limongolio, alihu oáatu-Mu diila meiteduó tobotu."

⁷ Ti Isa lolametaó, "Bo todelomo Kitabi tulatulade olo, 'Diila mowali yió mohimontala Allahu Taáala Eeyaamu."

⁸ Lapataó Ibilisi luli lodelo mola li Isa ode huídee molanggato daá wau lopobilohe o-Lio ngoáamila bele biluloá saaha li olongia todunia wolo okokayalio.

⁹ Lapataó lolóiya maó Ibilisi odeli Isa, "Ngoáamila botie mawohiú mai ole-Mu, wonu Yió mosujudu molubo olaú."

¹⁰ Ti Isa lolametaó, "Pohinggi maó yió, wuu Tamoo-heingawa ode dusa! Todelomo Kitabi tulatulade: Tubowa mola Allahu Taáala Eeyaamu, wau pomayaalo to Eeya wambaó!"

¹¹ Mapulitio Ibilisi lololaa maó li Isa, wau mamaa-láikatiyalo lonaó mai lohinta li Isa.

¹² Toú loódungohe deú tei Yahya mapilo tuwotio ode delomo tutupa, ti Isa malolahi ode Galilea.

¹³ Tilolaa-Lio maó Najaret, tulusi mola lotibiluloá to Kapernaum tobiihu lo Bulalo Galilea tomadala Jebulon wau Naputali.

¹⁴ Sababu ti Isa lohutu maó suali boito, malo toduo wolo uiloíya li Nabi Yesaya:

¹⁵ "Huta lei Jebulon wau huta lei Naputali, todalalo ode bulalo, to ngotuwali lo Dutulaa Yordan, Galilea huta lotaa diila Yahudi!

¹⁶ Bangusa tatumu-tumula todelomo u modiólomo maloóonto tinelo ulaba-labaalo motinelo! Duólo tapoó-poóoyo todelomo lipu lomautu malobutu mai tinelo u mobaango!"

¹⁷ Tumulalo mai toú boito ti Isa lolumula lopo habari, "Polilihulo monto duduu-sawaalo limongoli, sababu Allahu Taáala mahuáa momalenta odelo Olongia!"

¹⁸ Toú ti Isa donggo naónaó topentadu lo Bulalo Galilea, Tio loóonto duulota tamoohalawa, deúito-yito tei Simon (táilunte olo Petrus) wolo wutatio, tei Andreas. Timongolio donggo hipoheúpa tola tobulalo boito wolo pajala.

¹⁹ Ti Isa lotahuda maó olimongolio, "Dulo duduí mai Waú. Waú mamó ngaajali mai olimongoli momajala tau."

²⁰ Tulusi timongolio malo lolaa maó pajala limongolio wau loduduó li Isa.

²¹ Ti Isa lonaó tulusi, lapataó loóonto poli taduulota mohutato wewo, deúito-yito tei Yakobus wolei Yahya, mongo walaée Jebedeus. Timongolio peé-peénta woliyamo limongolio donggo hemo poópiohe pajala todelomo bulotu. Ti Isa olo lotianga olimongolio,

²² wau timongolio huáa lololaa maó bulotu woliyamo limongolio, lapataó loduduó li Isa.

²³ To Galilea, ti Isa lomalito ngoilanggubu lipu wau helo ngaajali to bebee-leyaalo u potabiaalo. Tio helo pohabari Habari Mopiohe deú Allahu Taáala mamomalenta. Wau Tio olo helo poóluli tahi ngongota wau tahi o aibua.

²⁴ Habari pasali li Isa boito malo loladu to ngoilanggubu lipu lo Siria, tilinggula dadaata taa lonaó mai ode o-Lio. Timongolio lodelo mai tau-tauwalo tahi duutola totoonulalo ngongoto u hidala-dalaala wau tahi suusawa. Tau-tauwalo táilo tuanga lorohu u moleeto,

tahe dudeetolo, didu mowali monaó, ngoáamilalo piloóluli li Isa.

²⁵ Ngohuntua daá tau talo duduó li Isa tou boito. Woluo talonto Galilea, woluo talonto Mopuulo Kota, lonto Yudea, wau woluo olo talonto lipu to ngotuwali lo Yordan.

5 ¹ Tou ti Isa loóonto taa dadaata boito, Tio lotaódee mola ode huludu. Lapataó Tio malo tihuloáa, tahiduduá o–Lio lonaó mai ode o–Lio,

² tulusi Tio lolumulaó longajali olimongolio:

³ "Potisanangilo tutu tamolaasa diilalo okawasa wau bolo wambaó hemo tiwunela mola to Allahu Taáala; timongolio yito pongawaá umati lo Allahu Taáala!

⁴ Potisanangilo tutu taa hisuukalia lohilao; Allahu Taáala mamoliyango olimongolio!

⁵ Potisanangilo tutu taa hidupapawa lohilao; Allahu Taáala mamo poópolu mai danti–Lio ode limongolio!

⁶ Potisanangilo tutu taa mooloolo mohutu kahandaki lo Allahu Taáala; Allahu Taáala mamohutu molaasa sanangi hilaa limongolio!

⁷ Potisanangilo tutu taa u motoliángo taawewo; Allahu Taáala mamomonu mai olimongolio olo!

⁸ Potisanangilo tutu taa mantali hilaalio; Timongolio mamooónuhe Allahu Taáala.

⁹ Potisanangilo tutu tamopo toduo dame towolota lomanusia; Allahu Taáala mamomasisi mai olimongolio odelo mongo wala-ílo!

¹⁰ Potisanangilo tutu taa modutolo poloálinaya sababu hemohutu kahandaki lo Allahu Taáala; timongolio yito pongawaá umati lo Allahu Taáala!

¹¹ Potisanangilo tutu timongoli wonu henteólio, alinayalio wau pitanaalio domi Waú.

¹² Mongo nabi tahitumula tou dipo-dipolulio mai limongoli maa ilalinayalio olo debo odelo uito. Potiwengahulo wau potisanangilo, sababu udaá pahala tosologa upilopo dapato lo Allahu Taáala olimongoli."

¹³ "Timongoli watingo lodunia. Wonu watingo diilalo olamita, wolo donggo mowali poó panggelolo? Diduluo maó hunalio, bo mapomahulio wau podudutaá lotau.

¹⁴ Timongoli yito baango dunia. Kota toitaato huludu diila mowali tuuólo.

¹⁵ Diaaluo tamopo léiita tohe, lapataó molaúbe tohe boito wolo tombe. Tio tumbaá mamopodutu maó tohe boito totambati lotohe, alihu moóbaango motíidu tau todelomo bele.

¹⁶ Odito olo baangumu wajibu tinetinela totalu lotau, alihu timongolio moóonto totoonulalo huhutuumu u mopiohe, tulusi mamomuji mola Allahu Taáala limongoli tosologa."

¹⁷ "Diila maó ponganggapu deú Waú dungga-dungga mai moluluta butoée Musa wau pongaajali lomongo nabi. Waú dungga-dungga mai diila molulutaó uito, bo mai mopoílaalo maó bolilio u otutuulio maó.

¹⁸ Poótoloma maó! Ngotilonggadu hulungo wau dunia donggo woluo, boli hulupu ngotahe meaalo bontoó u pulito kikiió todelomo butoó boito, diila talulutolo, wonu ngoáamilalo diipo motoduo mai!

¹⁹ Masababu uito, titaalo tita tamo lambanga tala tuwau lo papaa-lentaalo boito, penu boli pulito ukikiió wau mongaajali maó taawewo mohutu olo u

odito, mamowali tapulito ukikiió towolota umati lo Allahu Taáala. Boliño maó, titaalo tita tamoponaó papaa-lentaalo boito wau mongaajali taawewo mohutu u odito olo, mamowali udaá towolota umati lo Allahu Taáala.

²⁰ Oditolio eelai maó: Timongoli diila pongalo aakali mowali umati lo Allahu Taáala, wonu diila mongilabotaó guguu-ruwaalo agama wau tau-tauwalo Parisi todelomo suáli moponaó kahandaki lo Allahu Taáala!"

²¹ "Otaawa limongoli deú toli nenemoyanto, woluo pongaajali debo odelo utie: Diila maó pomate mate-mateelo maó; titaalo tita tamomate mate-mateelo maó, musi adiliyolo.

²² Bo botia potahuda-Ú mai olimongoli, titaalo tita tamoingo taawewo, maa adiliyolo; wau titaalo tita tamomuayo taawewo, maa adiliyolo totalu lo Mahakama Agama. Wau titaalo tita moloíya taawewo, 'Mohulodu', paatuti tapilola ode delomo tulu lonalaka.

²³ Masababu uito, wonu tala ngota towolota limongoli donggo hemo podewo wowohilio ode Allahu Taáala, tulusi

loóéela mola deú woluo taa mongongoto hila a to olio,

²⁴ mamusi tolaaliopo dewolio boito totalu lotambati podewowalo, tulusi monaóopo mota modameya wolo tau boito. De lapatio maó uito, bolo tio mowali mohualingai mopodewo wowohilio ode Allahu Taáala.

²⁵ Humayaalio woluo taa mopodulohe olimongoli ode mahakama, podameyapo wolio ngotilonggadu timongoli donggo owakutu toú diipo meidungga mota ode mahakama. Wonu diila, tau boito mamohudu olimongoli ode hakimú, tamamohudu maó olimongoli ode pulisi. Lapataó pulisi mamopo tuwoto olimongoli ode delomo tutupa.

²⁶ Wau poótoloma maó: Tantu timongoli diila tamoó lualai monto tutupa boito, toú diipo moóbayali sama-samaata ngoáamila dintamu boito."

²⁷ "Otaawa limongoli deú woluo pongaajali debo odelo utie: Diila maó pojina.

²⁸ Bo botia Waú motahuda mai olemu: titaalo tita molontongo taabua ngota wau lohuó hilaalio, yi tau boito malojina wolo taabua boito todelomo hilaalio.

²⁹ Wonu matomu olowala moósababu olemu mohutu dusa, luóheelo wau tapilalo botu lomato boito! Lebe mopioheó oolia tala tuwau lo pongawaámu loú ngangaawaálo maó matapilo-Lio ode delomo nalaka.

³⁰ Wonu uluúmu olowala moósababu olemu mohutu dusa, putua maó tapilalo uluú boito! Lebe mopioheó oolia lo uluúmu ngotuwali loú ngangaawaálo maó tumuwoto ode nalaka."

³¹ "Woluo olo pongaajali debo odelo utie: motiídu taa u motalaki dilelio tabua, patuti mongohi maó tuladu talaki olio.

³² Bo botia potahuda-Ú mai olemu: titaalo tita tamo talaki dilelio lebe-lebe pomaó taabua boito diila lohama pipia, moósababu dilelio boito mojina, wonu dilelio boito muli monika. Wau titaalo tita tamonika wolo taabua tatilalaki boito, yi tio olo malojina."

³³ "Otaawa limongoli deú toli nenemoyanto woluo pongaajali debo odelo utie: diila maó pomalonga danti. Wolo u mapilo dantimu wolo tadia totalu lo Allahu Taáala, musi pohutuwomu maó.

³⁴ Bo botia potahuda-Ú mai olemu: diila maó potadia sama-samaata, mopio domi

hulungo, sababu hulungo yito tambati
huhuloá lo Allahu Taáala,

³⁵ meaalo domi dunia, sababu dunia yito
wapidu oáa-Tio; meaalo domi Yerusalemu,
sababu ui-uitolo kota li Olongia daá.

³⁶ Diila maó potadia olo domi
lunggongumu, sababu yió lohihilao diila
mowali mohutu huwoúmu mowali hula
meaalo mowali moitomo, penu boli
ngopata maó.

³⁷ Loíyaalo maó wambaó, 'Ooó' meaalo
'Diila' -- lebe maó leeto dudunggalio mai
monto ibilisi."

³⁸ "Otaawa limongoli deú woluo olo
pongaajali debo odelo utie: mato tuloáala
lomato, dungito tuloáala lodungito.

³⁹ Bo botia potahuda-U mai olimongoli:
diila maó poniyati totaau hipohutua u
moleeto to olemu. Boliio maó wonu woluo
tau molambali putongimu olowala polulia
maó tio molambali olo putongimu oloihi.

⁴⁰ Wau wonu woluo tau mopodulohe
olimongoli ode butoó wau mohile wolo
moóohuú boómu, wohia maó jumbamu
olo to olio.

⁴¹ Wonu ngotaalio takawa-kawasa
momakusa olimongoli momota balangilio

ngokilo lamingio, potaala maó tunggula dulo kilo lamingio.

⁴² Wonu tau mohile u hitua-tuawua to olemu, wohia maó tio. Wau diila maó potoulia olo taa motohilaa mobulota u hitua-tuawua monto olemu."

⁴³ "Otaawa limongoli deú woluo olo pongaajali debo odelo utie; toliánga maó mongo sahabatimu wau oingoi maó mongo satulumu.

⁴⁴ Bo botia potahuda-Ú mai olimongoli: toliánga maó mongo satulumu, wau duái mola tau-tauwalo tahipo ngalinayawa olimongoli,

⁴⁵ Alihu timongoli mowali mongo walaó Allahu Taáala limongoli tato sologa. Sababu Allahu Taáala mopobutu mai mato lodula-Hio ode taa u mopiohe wau ode taa u moleeto olo. Allahu Taáala mopo tuhutai didi ode taa hipohutua u otutu wau ode taa hipohutua umoleeta olo.

⁴⁶ Sababu wonu timongoli motoliángo bo taa motoliáangi mongoli wambaó, pongola Allahu Taáala musu molontuli mai huhutuumu boito? Diila odito olo u hepilohutu lo tahipo tagia beya?

⁴⁷ Wau wonu timongoli mongohi maó salamu bo tomongo sahabatimu wambaío,

wolo hebatilio? Tau-tauwalo tadiila hitotaawa to Allahu Taáala olo hipohutua odito!

⁴⁸ Allahu Taáala limongoli tosologa momonu mai ngoámila tau wolo wimu-wimumuto ngoáamilalo. Timongoli olo musi odito."

6 ¹ "Eelai maó, diila pohutua limongoli u pilopo wajibu lo agama totalu lotaa dadaata alihu oontonga lotau. Wonu timongoli mohutu u odito, yi timongoli diila tawohia lo Allahu Taáala limongoli wuupa monto sologa.

² Oditolio, wonu timongoli mongohi sadaka ode taa mosikini diila maó pololade suáli boito debo odelo u hepohutuo lotau-tauwalo tahi munapikia. Timongolio yinao mohutu u odito todelomo bele potabiaalo wau to dalala daá alihu pujio lotau. Eelai maó, timongolio malo lolimo wuupalio.

³ Bo timongoli, wonu timongoli mongohi sadaka, wohia maó wolo poó-poóoyo, tilinggula diaaluo tamotota.

⁴ Huliaalo maó huhutuumu boito diila otaawa boli lotatoonu, ngopohia Allahu Taáala limongoli tosologa. Allahu Taáala moóonto mai huhutuumu u tuutuó boito wau mamongohi mai wuupa olemu."

⁵ "Wonu timongoli moduá, diila maó potihutu debo odelo tahi munapikia. Timongolio motohilaa moduá hitihula tobele potabiaalo wau topotanga lodalalo alihu oontonga lotau. Eelai maó, ui-uitolo wuupa u matilolimo limongolio.

⁶ Bo wonu timongoli moduá, tuwotaó ode huwali wau heúti mai huhebu, wau poduáalo mola ode Allahu Taáala limongoli tadiila oontonga boito. Yi Allahu Taáala limongoli tamoóonto huhutuumu u tuutuó boito mamongohi mai wuupa olemu.

⁷ Wonu timongoli moduá, diila maó wulita wuwuulia tilinggula diaaluo bungolio wau huudio debo odelo tau-tauwalo tadiila hitooawa to Eeya. Timongolio hipo lantobua deú hihie limongolio madungohe-Lio sababu duá limongolio u hayahayaá boito.

⁸ Diila maó potihutu debo odelo timongolio. Maílotaawa lo Allahu Taáala limongoli wolo upalaluo limongoli, tou diipo pohile mola limongoli.

⁹ Oditolio poduáalo mola odie, 'Allahu Taáala lo mongowatotia to Sologa: Eeyaalo Allahu Taáala tabo Tuwa-tuwaulo.

Pohileaala duá Eeya tuboolo wau hulumatiolo.

¹⁰ Eeyaalo Olongia lo mongowatotia. Pohileaala duá Eeya momalenta todunia wau kahandaki lo Eeya dungohelio debo odelo tosologa.

¹¹ Wuduwalo mai todulahee botie uáalo u palaluo lo mongowatotia.

¹² Ambungua mai mongowatotia monto totala lo mongowatotia, debo odelo mongowatotia malo ngambungu taa u ototala to mongowatotia.

¹³ Diila maó polulia mai mongowatotia oolia lo palacaya tou mongowatotia yimontalalio bo lopatalo mai mongowatotia monto kawasa lo Ibilisi. [Eeyaalo Olongia taókawasa wau molamahu u ohiheo-hiheolo maó. Amien.]'

¹⁴ Wonu timongoli mongambungu taótotala tolimongoli, Allahu Taáala limongoli tosologa olo mamo ngambungu mai totalamu.

¹⁵ Bo wonu timongoli diila mongambungu totala lotaa wewo, Allahu Taáala limongoli tosologa olo diila mongambungu mai totalamu."

¹⁶ "Wonu timongoli mopuasa, diila maó potihutoó debo odelo tahi munapikia. Timongolio molomelo baya limongolio alihu ngoáamila tau motota deú timongolio hipuasawa. Eelai maó, ui-uitolo wuupa u matilolimo limongolio.

¹⁷ Bo wonu timongoli mopuasa, polimamutaó wau heidi mola huwoúmu,

¹⁸ alihu diaaluo tamotota deú timongoli hipuasawa, ngopohia Allahu Taáala limongoli tadiila oontonga boito wambaó. Allahu Taáala moóonto huhutuumu u tuutuó boito wau mamongohi mai wuupa olemu."

¹⁹ "Diila maó pohimoáa halata ode batangamu todunia, toutoonu wale wau taato mowali mopolusa wau tamootaówa monaó mai motaó maó.

²⁰ Bolíio maó, pohimoólo halata tosologa, toutoonu diaaluo wale wau taato u mopolusa wau tamootaówa diila monaó mai u motaó maó.

²¹ Sababu toutoonu halatamu teto olo hilaamu!"

²² "Mato yito tohe lobatanga. Wonu matomu mobaango, ngoáamila batangamu mobaango daá.

²³ Bo wonu matomu pulauwolo ngoáamila batangamu modióloma daá. Oditolio wonu tohe todelomo batangamu boito modiólomo, donggo boli tontoyoómo odióloma boito!"

²⁴ "Diaaluo penu boli ngota maó tamowali mokalaja ode tuani duulota. Sababu tio maalebe motoliángo ngotaalio wolo tawewo. Meaalo tio maalebe tatapu wau molotolo hilao toli tuani ngota wolo tawewo. Odito olo wolimongoli. Timongoli diila mowali mokalaja duólo Allahu Taáala wau duólo halata upango olo.

²⁵ Sababu uito poótoloma maó: diila maó polawalo pasali loú potumulumu, deúito-yito wolo uma polameli mongoli wau uilumolo, meaalo wolo u mapomake limongoli. Diila matutumulo boito mongilabotaó wolo uáalo wau batanga boito wolo boó?

²⁶ Pomilohe mola bulungi to dulente. Bubuu-lungiyalo boito diila hipomuloa, diila hipolipua, wau diila olo hipohimoá tilapula loú pilumulolio todelomo yibungo. Penu boli odito Allahu Taáala limongoli tosologa helo laalaó bubuu-lungiyalo boito! Wolo timongoli diila lebe ohalaga wolo bulungi?

²⁷ Tatoonu monto olimongoli tawolo ololawalio mowali mopohayaá tutumulio penu boli ngoídi maó?

²⁸ Yilongola timongoli molawalo pasali loú pomakemu? Poótuoti mota bubuu-ngawaalo baakungi u hibutua tohuta datahu wau luasi. Bubuu-ngawaalo boito diila hipo kalajawa wau diila hipo hewola;

²⁹ Boti Olongia Salomo penu boli odito kayalio, diila helomake boó debo odelo piohio lo bubuu-ngawaalo boito!

³⁰ Huóyoto tohuta datahu wau luasi mobutu mai todulahee botie wau loombulio mola pobuolio tunggula maahu. Bo Allahu Taáala helo podadai huóyoto boito odito piohio. Tidiyolo maó timongoli! Bo timongoli diila boti palacaya.

³¹ Diila maó polawalo wau moloíya, 'Wolo umaa lamelonto', meaalo 'wolo u mailumonto', meaalo 'wolo umaa pomakento'?

³² Susuu-aliyaalo boito laito heilapita lotaa diila hitooawa lo Allahu Taáala. Lebe-lebe pomaó Allahu Taáala limongoli tato sologa motota deú timongoli momalalu ngoáamilalo boito.

³³ Oditolio, potolo anipo meimulo alihu Allahu Taáala momalenta mai tutumulumu

wau pohutua maó kahandaki–Lio. Yi, ngoáamila u wewolio mawohi mai lo Allahu Taáala olo olemu.

³⁴ Masababu uito, diila maó polawalo pasali loú loombu. Sababu uloombu olo woluo ololawalio lohihilao. Dulahee otie malo tuuúde osuusalio, diilalo maó duhengi."

7 ¹ "Diila maó pomutoó taa wewo, alihu timongoli lohihilao olo diila butoó lo Allahu Taáala.

² Sababu woloololio mola timongoli momutoó taawewo, odito olo Allahu Taáala momutoái olimongoli. Wau tuuúdu u pomake limongoli ode taawewo, mapomake lo Allahu Taáala olo ode limongoli.

³ Yilongola timongoli moóonto pulingo ayu todelomo mato lo wutatumu, hiambola balaki todelomo matomu lohihilao diila poótuoti mongoli?

⁴ Woloolo mola timongoli mowali moloíya maó to wutatumu, 'Dulo mainggiloú mai pulingo ayu todelomo matomu', hiambola todelomo matomu lohihilao obaalaki?

⁵ Wuu munapiki! Yinggilapo baalaki monto matomu lohihilao, deúito yió mamooonto wolo mopatato, wau moó

poinggi maó pulingo ayu monto mato lo wutatumu.

⁶Diila maó wohia balangi u mantali ode apula, alihu apula boito diila tamobale mai wau moluhu olemu. Wau diila maó wohia mutiala ode boi, alihu boi boito diila maó molumbe-lumbetaá mutiala boito."

⁷"Pohile, yi timongoli mamólimo. Pololohu, yi timongoli mamóótapu. Pongokoó, yi huhebu mahuówalio olemu.

⁸Sababu taa u mohile mamólimo; taa u mololohu mamóótapu; wau taa u mongokoó, mahuówalio to huhebu.

⁹Towolota limongoli botie tingga woluo tiyamo ngota mongohi botu to walaío, wonu tio mohile roti?

¹⁰Meaalo mongohi tulidu, wonu tio mohile uponula?

¹¹Penu boli timongoli moleeto, timongoli debo motota olo mongohi maó u mopiohe ode mongo walaí mongoli. Tidiyolo maó Allahu Taáala limongoli tosologa! Eeya lebe maó leeto mamongohi mai u opiohe totaa u mohile mola to Eeya.

¹²Pohutua maó taawewo debo odelo u otohila limongoli u pohutuo mai limongolio. Ui-uitolo bungo lo butoée Musa wau pongaajali lomongo nabi."

¹³ "Tuwotolo moli huhebu u meepito, sababu huhebu wau dalalo udulu-ulunga ode nalaka udaá wau motanggalo, wau dadaata tau molibaya maó.

¹⁴ Bo meepito wau mototolo huhebu wau dalalo u modelo tau ode tutumulo. Wau bo ngoídi taa u moótapu maó."

¹⁵ "Poódaha-dahaalo maó tomongo nabi paluti. Timongolio monaó mai ode limongoli motihutu debo odelo himba, bo tutuulio tutu timongolio debo odelo saligala mongantau.

¹⁶ Timongoli mamooónuhe olimongolio monto huhutu limongolio. Diúto u oduhi diila mongohi mai hungo lo angguru wau diúto u oduhi diila mongohi mai hungo lo ar.

¹⁷ Monto bungo lo ayu u molomiodu poótapulalo hungo u mopiohe, wau monto bungo lo ayu udiila molomiodu hungo u moleeto.

¹⁸ Bungo lo ayu u molomiodu diila moówohi hungo u moleeto, wau bungo lo ayu udiila molomiodu diila moówohi hungo u mopiohe.

¹⁹ Timiídu bungo lo ayu udiila moówohi hungo u mopiohe, luwodulo wau pobuwolo.

²⁰ Odito olo mongo nabi paluti. Timongoli mamóonuhe olimongolio monto huhutu limongolio."

²¹ "Diila ngoáamila taa u mongibode ola-Ú, 'Eeya, Eeya,' mamowali pongawaá umati lo Allahu Taáala, bo wambaó taa u hipohutua kahandaki li Paapa-Ú tosologa.

²² Todulahu Kiama ngohuntua tau mamó loíya to ola-Ú, 'Eeya, Eeya, diila maawolo tanggulo Eeya mongowatotia helo potunggulaó tahuli lo Allahu Taáala? Wau diila maawolo tanggulo Eeya olo mongowatotia helo hinggi roroo-huwaalo moleeto wau helohutu dadaata moólinggolabu?'

²³ Bo Waú mamolametai, 'Waú diila moótaawa woli mongoli! Pohinggi maó monteea, timongoli tahi pohutua u moleeto!'"

²⁴ "Naa, taa u modungohe tahuda-Ú botie, wau moduduáaó, tutuuwauwa debo odelo taa molinepo momongu belelio toitaato botu.

²⁵ Toú modehu didi, wau taluhu modaá mai wau dupoto moóhuú molemba bele boito, bele boito diila molohubu sababu mabilongu toitaato botu.

²⁶Wau taa u modungohe tahuda–Ú botie, bo diila moduduáaó, tio tutuuwauwa debo odelo taa mohulodu momongu belelio to hungayo.

²⁷Toú modehu didi, wau taluhu modaá mai dupoto moóhuú molemba bele boito, bele boito molohubu. Wau antululio polu–polutuó!"

²⁸Pulitio ti Isa yilapato longaajali, wau tau–tauwalo tawoluo teto lolinggolabe daá loódungohe pongaajali–Lio.

²⁹Sababu Tio helo ngaajali wolo tilihula, diila debo odelo guguu–ruwaalo agama limongolio.

8¹ Ti Isa lotuhutai lonto huludu, wau dadaata tahelo duduá o–Lio.

²Toú boito lonaó mai ngotaalio taóngongoto lo alipo u moótihela hapato. Tio malo tibonggohuú totalu li Isa, tulusi lolóiya "Paaá, wonu ti Paaá mohuto, ti Paaá mowali mopoóluli mai olaatia."

³Ti Isa lodedeta tau boito wau lotahuda maó, "Waú mohuto. Poluliilo!" Toú boitolo ngongotio maloluli.

⁴Lapataó ti Isa lotahuda olio, "Eelai maó! Diila maó wunggulia penu boli olo tatoonu. Bo ponaólo mota odeli iimamu, wau pohilea maó olio u molantu mai deú

yió maloluli. Lapataó uito podewowalo bake upilo malentai lei Musa, odelo bukuti ode tau-tauwalo deú yió otu-otutuulo maó maloluli!"

⁵ Touú ti Isa tilumuwoto ode Kapernaum, ngotaalio polowila lo Roma lonaó mai lodunggaya wo-Lio, wau leí tulungi o-Lio.

⁶ "Paaá," ualo polowila boito, "wato lowatia mongongoto tobele. Tio balabalata didu mowali mobongu monto potulehelio wau sikisaa daá."

⁷ Tahuda maó li Isa, "Wau mamonaó mota mopoóluli olio."

⁸ "Sambelolo Paaá," tametaó lo polowila boito, "watia diila paatuti mololimo li Paaá tobele lowatia. Palentailo li Paaá. De wato lowatia boito mamoluli.

⁹ Sababu watia olo mamusi taáaluku topalenta lo tatoitaato lowatia. Wau totibawa lowatia woluo olo mongo pajule tamusi taáaluku topalenta lowatia. Wonu watia mopoáhu pajule ngota, 'Ponaó!' tio olo monaó. Watia moloíya maó ode tawewo, 'Odia mai!' tio olo monaó mai; wau wonu watia momalenta wato lowatia, 'Pohutua maó utie!' tio poli mamohutu uito."

¹⁰ Touú ti Isa loódungohe wolo uiloíya lo polowila boito, Tio lolinggolabe daá. Lapataó Tio malo tahuda ode tau-tauwalo tadonggo hiduduá o-Lio, "Hebati daá tau botie. Boli towolota tau lo Isiraílu diipo peéenta maó Waú loódongga iimani debo odelo utie udaálio!

¹¹ Otutu! Dadaata tau mamonaó mai monto tiimulu wau otolopa u motiwengahe peé-peéenta wolei Abraham, Isihaka, wau wolei Yako todelomo Dunia Bohu lo Allahu Taáala.

¹² Lebe-lebe pomaó tau-tauwalo tawajibulio mowali umati lo Allahu Taáala mapomahulo ode u modiólomo to bulemengio. Mota teto timongolio mahumoyongo wau modutolo."

¹³ Lapataó ti Isa lotahuda maó ode polowila boito, "Pohualingolo, wolo u pilalacayamu boito mamotoduo." Wau touú boitolo watolio maloluli.

¹⁴ Ti Isa lonaó mota ode bele lei Petrus. Mota teto Tio loóonto tiilo moluhengo lei Petrus donggo he polipitolo to potuluhelio.

¹⁵ Ti Isa lolontalaó uluúlio, tulusi polipitio yiloole. Tio malo bongu wau lohinta maó li Isa.

¹⁶ Tou malo laangai, hedilelo mai lotau odeli Isa dadaata tamaa ilotuanganga lorohu u moleeto. Wau bo wambaó lou ngotahe pilopo hinggi maó li Isa roroo-huwaalo u moleeta boito wau helo poóluli olo ngoáamila tahi ngongota.

¹⁷ Ti Isa lohutu maó ngoáamilalo boito, wau woleeto lotoduwolo mola wolo uiloíya li Nabi Yesaya, deúito-yito "Tio momanta dudutolonto wau mopoóluli ngongotonto."

¹⁸ Dadaata daá tau hipalita toli Isa. Tou ti Isa loóonto olimongolio ngoáamila, Tio malo poáhu tahiduduá o-Lio lotalango bulalo.

¹⁹ Lapataó ngotaalio guru lo agama lonaó mai ode o-Lio wau lolóíya, "Paaá Guru, watia ohilaa moduduá li Paaá boli ode utoonu!"

²⁰ Ti Isa lolametaó, "Saligala oliyango, wau bulungi obeelealio, bo Walaó Manusia diila otambati u poti balatalo."

²¹ Lapataó ngotaalio lomuri-Lio uwewo lolóíya, "Paaá, polulia mai watia mohualingopo mota molobunga oliyamo lowatia."

²² Boti Isa lolametaó, "Duduí mai Waú, wau hulía maó taamate molobungaó taa matelio lohíhilao."

²³ Ti Isa malo titaé tobulotu wau tahiduduá o-Lio loduduá peé-peéenta wo-Lio.

²⁴ Debolo dutala daá tutu lolemba mai bulalo tilinggula bulotu hepilo-pilomaílio lobuóolo. Tou boito ti Isa donggo tuutuluhu.

²⁵ Yi tahiduduá o-Lio malo himbideó o-Lio wau lopobungu maó o-Lio. "Paaá! Tulungi mai! Ito mamoaáhumo!" wuwaatíi mongolio.

²⁶ "Yilongola timongoli moohe?" tahuda maó li Isa. "Timongoli diila boti palacaya ola-Ú!" Lapataó ti Isa matilimihula mola wau longantinga dupoto wau bulalo boito. Tulusi bulalo mailoole daá.

²⁷ Tahiduduá li Isa hilinggolabe. Uali mongolio, "Tatoonu Tio botie, tunggula dupoto wau buóolo moduduó palentaa-Lio!"

²⁸ Ti Isa malei dungga mola ode ngotuwali lobulalo tomadala lo Gadara. Mola teto taduulota tamaa ilotuanga lorohu u moleeto lonaó mai ode o-Lio. Taduulota boito hileeta daá, tilinggula

diaaluo penu boli ngotaa maó tabuheli lumaodeó teto.

²⁹ Timongolio yilumualai lonto gowa lokuubulu wau hiwuwaatiá, "Walaó Allahu Taáala, mapongola-Mu ami? Wolo Yió ohilaa mai mopo sikisa olami penu boli diipo wakutuulio?"

³⁰ Diila molamingo monteeto, woluo boi dadaata daá donggo hipopeehuma uáalolio.

³¹ Roroo-huwaalo umoleeta boito lomolohone maó li Isa, "Wonu Yió mamopoáhu olami lumualaó, ahulilo mai ami tumuwoto mota ode delomo bobooiyaalo boito".

³² "Pohinggilo maó!" tahuda li Isa. Roroo-huwaalo umoleeta boito mailumualo lonto taduulota boito, tulusi tilumuwota mota ode delomo bobooiyaalo boito. Wau bobooiyaalo boito olo tilumeteó wau lotidehulo mola lonto biihu pangato ode delomo bulalo, tulusi yilumoduó.

³³ Tahipo dahawa boi boito tilumeteó ode kota, wau mota lohungguli ngoáamila u lotoduo boito, wau olo tomimbihu wolo u lotoduo to taduulota táilo tuanga lorohu u moleeto boito.

³⁴ Yi ngoáamila taa tokota boito olo malonaó mola lodunggayá woli Isa. Tou timongolio loóonto li Isa, timongolio lomolohone tióotutua alihu Tio mololaa maó lipu limongolio.

9¹ Ti Isa malo titaé tobulotu, tulusi lobalango bulalo, wau lohualingo ode tambati pilohuluta loduhu–Lio.

² Mota teto tau lodelo maó ode o–Lio ngotaalio tadidu mowali monaó balabalata to amongo. Tou ti Isa loóonto malo odito udaá iimani lotau–tauwalo boito, Tio malo tahuda ode tadidu mowali monaó boito, "Posabalilo, walaúu–Ú! Duduu–saamu maílambungu."

³ Dengolo lota guru lo agama tawoluo teto mahipo loíyawa todelomo hilaa limongolio, "Tau botie hemohina Allahu Taáala!"

⁴ Otaawa li Isa pikiilangi limongolio, oditolio Tio malo tahuda, "Yilongola pikiilangi limongoli malo odito leetio?"

⁵ Toonu ulebe gambangi: motahuda maó, 'Dusamu maílambungu', meaalo motahuda maó, 'Pobongulo wau ponaólo'?

⁶ Bo botia Waú mamopo bukuti mai olemu deú todunia botie Walaó Manusia okawasa mongambungu dusa." Lapataó ti Isa

lotahuda maó ode taa didu mowali monaó boito, "Pobongulo, bintaálo amongumu wau pohualingolo!"

⁷Taa didu wowali monaó boito malobongu wau lohualinga ode belelio.

⁸Toú tau-tauwalo loóonto maó ulotoduo boito, timongolio mailoohe wau helomuji Allahu Taáala, sababu Allahu Taáala malongohi mai kawasa u odito udaálio ode manusia.

⁹Lapataó ti Isa lololaa maó tambati boito. Toú donggo naónaó, Tio loóonto ngotaalio tamootagia beya, taílunte Matusi, donggo hulohuloáa tokantoli lobeyalio. Ti Isa lotahuda maó olio, "Dulo duduí mai Waú!" Yi tei Matusi matilimihulo wau loduduó li Isa.

¹⁰Toú ti Isa donggo hemo lamela tobele lei Matusi, malonaó mai ngohuntua tamootagia beya wau tau-tauwalo tahe anggapuo diila mopiohu lo ulipu, loduduá lolamela peé-peénta woli Isa wau tahiduduá o-Lio.

¹¹Woluo tau-tauwalo Parisi taloóonto maó suáli boito. Wau timongolio malohintu to tahiduduá li Isa, "Wolo sababuulio gurumu hemo lamela peé-peénta wolo

tamootagia beya wau tau–tauwalo tadiila hipiohe?"

¹² Ti Isa loódungohe yiyintu limongolio boito tulusi lolametaó, "Taa seehati diila momalalu dokuteli, bo taa u mongongoto wambaó.

¹³ Tuletea maó wolo boliilo ayati lokitabi botie: 'Waú mokahandaki odehu hilao, wau diila bake lo binatangi'. Sababu Waú dungga–dungga mai diila mai motianga taa u monganggapu batangalio malopiohe, bo totaaa anggapuolio hina."

¹⁴ Lapataó uito tahiduduá olei Yahya Tamopolihua lonaó mai odeli Isa. Tulusi timongolio malohintu, "Yilongola amiaatia wau tau–tauwalo Parisi hemo puasa hiambola tahiduduá li Paaá diila?"

¹⁵ Ti Isa lolametaó, "Woloolo mola huhama limongoli? Tingga mowali tahe tiloduo to potihunggu lonika boito motisuukali lohilao wonu tibulentiti laí donggo woluo peé–peéenta woli mongolio? Tantu diila! Bo mamei dungga wakutuulio tibulentiti laí boito mahamaalio monto olimongolio. Tou boito deúito timongolio mamu puasa.

¹⁶ Diaaluo tau u momambola boó u madeedelo wolo kaingi ngopita udonggo

bohu. Sababu kaingi pomambola boito mamowali umonggolongo wau mongedenga boó boito tilinggula mamoo sababu kaidingio lebe maó motanggalo.

¹⁷ Odito olo diaaluo taa u moluango angguru bohu todelomo bututu lowalito u deedelo. Sababu bututu boito mamobutaó wau molusa, tulusi anggurulio mamohuáyadu. Angguru bohu musi tuangola tobututu bohu olo, alihu duduluolo debo mopiohu."

¹⁸ Toú ti Isa donggo hemo tahuda ode tahiduduá olei Yahya Tamopolihua, malonaó mai taúwa ngota lobele potabiaalo. Tio malo tibonggohuú totalu li Isa wau lolóiya maó, "Walaó watia taabua boheli yilate mola. Bo, ambunguolo potala ti Paaá monaó mota modedeta olio alihu tio muli tumumulai."

¹⁹ Ti Isa lato tilimihulaó wau peé-peéenta wolo tahiduduá o-Lio malonaó mota wolo tau boito.

²⁰ Tohuungo dalaalo taabua ngota tamaa mopulaa dulo taunu hiheolio mongongoto hepobaáta loduhu u ááaita wolo dulahio, lohimbideó loli wulea li Isa. To pikiilangilio, "Asali waú bo moó dedeta

jumba-Lio, waú mamoluli." Tulusi tio malo dedeta biihu jumba li Isa.

²¹ (9:20)

²² Touú boito ti Isa loili maó wau loóonto taabua boito tulusi lotahuda olio, "Posabalilo, walaúu-Ú! Kalana yió walaúu-Ú palacaya ola-Ú, yió mamoluli!" Touú boitolo mola taabua boito loluli.

²³ Lapataó ti Isa leitungga mota ode taúwa lobele potabiaalo boito. Touú ti Isa loóonto tahi poitoheya muusiki polo tilimi wau dadaata tau hibuluhuta,

²⁴ yi ti Isa lotahuda maó olimongolio, "Lualaó timongoli ngoáamila! Walaó botie diila yilate; tio bo tuutuluhu." Ti Isa bo heilíiya limongolio ngoáamila.

²⁵ Touú tau-tauwalo boito mailumualo, ti Isa tilumuwoto ode delomo huwali lo walaó boito wau lodihu maó uluúlio. Tulusi walaó taabua boito malobongu.

²⁶ Habari boito lololadu lomola ode ngoilanggubu madala boito.

²⁷ Ti Isa malonaó lonteeto wau tohuungo dalalo tapitoó duulota loduduá o-Lio. Timongolio hiwaatiá, "Walaée Dauda, ponua mai amiaatia!"

²⁸ Touú ti Isa tilumuwoto ode delomo bele, tapitoó duulota boito lonaó mai ode

o-Lio. Ti Isa lohintu maó olimongolio, "Wolo timongoli palacaya deú Waú mowali mopoóluli maó olimongoli?" "Palacaya, Paaá!" tametaó limongolio.

²⁹ Lapataó ti Isa malo dedeta mato limongolio wau lotahuda maó, "Kalana timongoli palacaya, motoduwolo mai wolo u hehalapuo limongoli."

³⁰ Yi timongolio malowali loóonto. Ti Isa malo poéelaó olimongolio wolo pintalo, alihu timongolio diila mopoótaa suáli boito penu boli olo tatoonu.

³¹ Bo timongolio malonaó wau helo pololadu lomola habari pasali li Isa ode ngoilanggubu madala.

³² Toú taduulota boito malonaó, taabubu ngota takiluwasa lorohu u moleeto dilelolio mai odeli Isa.

³³ Ti Isa lopolahi maó rohu u moleeto boito wau tosaaátilo boito tau boito malowali lobisala. Taa dadaata boito malo linggolabe wau hipo loíyawa, "Diipo peéenta maó ami heloóonto ulotoduo mai debo odelo utie to Isiraílu!"

³⁴ Bo tau-tauwalo Parisi hipo loíyawa, "Tauúwa lo roroo-huwaalo u moleeto boitolo tahe longohi kawasa o-Lio u

mopolahi roroo–huwaalo u moleeto boito."

³⁵ Odi–odieelo mola ti Isa helo lontale lonto madala tuwau ode madala uwewo wau lonto kambungu tuwau ode kambungu uwewo. Tio helo ngaajali to bebee–leyaalo potabiaalo, wau helo pololadu Habari Mopiohe pasali loú woloolo mola Allahu Taáala momalenta odelo Olongia. Tio helo poóluli tau–tauwalo tahi duutola longongoto u hidala–dalaala wau taó aibu batanga.

³⁶ Tou ti Isa loóonto taa dadaata boito, malodehu hilaa–Lio olimongolio, sababu didu tantu hilaa limongolio wau didu olootolo, debo odelo himba u diilalo odiiti.

³⁷ Lapataó ti Isa lotahuda maó to tahiduduá o–Lio. "Tilapulio dadaata, bo taa u mongotolo maó bo ngoïdi.

³⁸ Sababu uito pohilea maó totaa ohuúwo lo ilengi boito alihu molao mai tamongotolo duólo tilapulio."

10¹ Todulahee tuwau ti Isa malo tiangai mopulaa duulota tahiduduá o–Lio lotiámbu. Lapataó Tio longohi máo kawasa olimongolio mopolahi roroo–huwaalo u moleeto wau mopoóluli

ngongoto u hidala–dalaala wau aibu lobatanga u hidala–dalaala.

² Tanggulo lo tamopulaa duulota rasulu boito yito: Bohulio, Simon (taílunte olo Petrus) wolo wutatio tei Andreas, tulusi tei Yakobus wolo wutatio tei Yahya, uitolo mongo walaée Jebedeus.

³ Lapataó tei Pilipus wau Bartolomeus, wolei Tomas, wau Matusi, tamootagia beya wolei Yakobus walaée Alpeus, wau Tadeus;

⁴ tulusi pulitio tei Simon Tamoo–duluwa huta pilohuluta loduhu wau tei Yudas Iskariot talo hiyanati li Isa.

⁵ Tamopulaa duulota rasulu boito lapataó yilao li Isa wolo loótapu popoo–tuhatawalo utie, "Diila maó ponaó ode madala lotau–tauwalo tadiila Yahudi. Diila maó olo ode kokoo–tawaalo taulo Samaria.

⁶ Bo ponaólo ode tau–tauwalo Isiraílu, tolomodu toli mongolio tamailapalo.

⁷ Pohabaria maó olimongolio deú Allahu Taáala mahuáa momalenta odelo Olongia.

⁸ Poólulia maó tau–tauwalo tahi ngongota; potumula maó tau–tauwalo tahelo poowate; poólulia maó tau–tauwalo taóngongoto lo alipo u moótihela hapato, wau yinggila maó roroo–huwaalo

u moleeto. Timongoli malo lolimo ngoáamilalo boito loú beebasi. Oditolio, pongohi maó olo wolo beebasi.

⁹Diila podelo doi hulawa, doi talaá, meaanto doi tambaha.

¹⁰Diila podelo olo bututu losadaka, meaanto dulo pata boó todelomo nonaómu, meaanto sapatu, meaanto tunggudu. Sababu taa u mokalaja mawajibulio powoluwolo u palaluolio.

¹¹Wonu timongoli meidungga tokota meaanto kambungu, lolohe maó ngotaalio tamohuto mololimo olimongoli. Poti biluloópo wolio tunggula timongoli muli momonggato.

¹²Toú timongoli tumuwoto ode bele, loíyawa maó, "Pohileaala duá Eeya mobalakati mai olimongoli."

¹³Wonu tau-tauwalo tobele boito mololimo olimongoli, hulialo maó salamu boito debo toli mongolio. Bo wonu timongolio diila mololimo olimongoli, muli pongulia mai salamu boito.

¹⁴Wonu woluo bele meaanto kota udiila mohuto mololimo olimongoli, meaanto diila mohuto modungohe olimongoli, tolailo tambati boito wau pongeéya maó peahuó monto paladu oáatumu.

¹⁵ Eelai maó! To Dulahu Kiama, tau-tauwala lokota Sodom wau Gomora malebe gambangi ambunguo lo Allahu Taáala, wonu pobandingiolo wolo tau-tauwala tokota boito!"

¹⁶ "Poótuoti maó utie: Waú molao olimongoli debo odelo himba udiila olootolo ode huungo saligala u mongantau. Timongoli musi mopoódaha maó debo odelo tulidu wau tulusi lohilao debo odelo bulungi poombo.

¹⁷ Poódaha-dahaalo maó, sababu timongoli mawaúpolio wau mapo taaluolio wolo mahakama. Timongoli masikisaalio to bebee-leyaalo potabiaalo.

¹⁸ Timongoli madeloolio mota motaalua wolo tahi kawasawa wau ode mongo olongia sababu timongoli muri-Ú. Wau ui-uitolo hiyangio olimongoli u mongohi sakusi pasali ola-Ú olimongolio wau totau-tauwalo tadiila hitootawa lo Allahu Taáala.

¹⁹ Bo wonu timongoli deloolio u adiliyolio, diila maó polawalo pasali wolo u musi loíya limongoli, meaalo woloolo mola timongoli musi mobisala. Sababu wolo umusi loíya limongoli boito mapoótaa mai olemu to wakutuulio.

²⁰ Sababu tamamo bisala towakutu boito diila timongoli, bo Rohullah tato sologa, motimbuludei olimongoli.

²¹ Mamotoduo mai deú tau mamohudu wutatio lohihilao pateelio mate–mateelo maó. Wau uitolo u mamotoduo towolota lotiyamo wolo walaío. Taúkekeéi mamoluwali tiilo tiyamolio wau mohudu maó olimongolio u pateelio mate–mateelo maó.

²² Timongoli malonuó lotaa ngoáamila sababu timongoli muri–Ú. Bo taa u moótaahangi tunggula pulitio mapo aahuwolo.

²³ Wonu timongoli alinayaalio tokota tuwau, teteólo ode kota uwewo. Poótaa–Ú mai olemu: Tou diipo ilonaówa limongoli ngoáamila kota to Isiraílu, Walaó Manusia malei dungga mai.

²⁴ Muri diila lebe udaá wolo gurulio, wau wato diila lebe udaá woli tuanilio.

²⁵ Malo tuuúde wonu muri ngota mowali debo odelo tigurulio, wau wato ngota debo odelo tituanilio. Wonu taúwa loú ngaalaá mailohialio tanggulo Beeljebul, tidiyolo maó ngotuango belelio. Timongolio mawohialio tanggulo ulebe moleetaó!"

²⁶ "Diila maó oohe tomanusia. Diaaluo utuutuó, udiila oontonga, wau diaaluo u hitua–tuawua u milakusudu hetuuólo diila tamo bonggali.

²⁷ Wolo upilo tahuda–Ú mai olemu todelomo modiólomo musí wulia maó limongoli toú mobaango lodulahu. Wau wolo u pilolohuma tobulonga, pomala–lumualo mota uito boli touútoonu.

²⁸ Diila maó oohe to limongolio tamomate batanga mate–mateelo maó, bo diila okawasa momate nyawa. Ooheelo Allahu Taáala taókawasa mopobinasa mai batanga wau nyawa todelomo nalaka.

²⁹ Dinggota mohelu duluo wowali taliyolo wolo mato lodoi ngopita upulito kikiió. Penu boli odito diaaluo maó penu tuwau modehu ode huta wonu diila kahandakio lo Allahu Taáala limongoli.

³⁰ Daata lohuwoó to lunggongumu olo mailiáapa ngoáamilalo.

³¹ Sababu uito, diila maó oohe! Timongoli lebe ohalaga wolo bulungi dinggota!"

³² "Titaalo tita tamo masisi totalu lo taa dadaata deú tio muri–Ú, Waú olo mamó masisi olio totalu li Paapa–Ú tosologa.

³³ Bo titaalo tita tamomahe totalu lotaa dadaata deú tio muri–Ú, Waú

olo mamomahe olio totalu li Paapa-Ú tosologa!"

³⁴ "Diila maó polantobu deú Waú modelo mai polodame ode dunia botie. Waú diila modelo mai polodame, bo pololawani.

³⁵ Waú dungga–dungga mai mamooó sababu walaó talolaí moluwali oliyamolio, walaó taabua moluwali oliilolio, wau walaó moluhengo bua moluwali oliilo moluhengio.

³⁶ Ooó, tamamo luwali musu upulito udaá, deúito–yito pongawaá ngalaálio lohihilao.

³⁷ Taa u motoliángo oliyamolio meaanto oliilolio lebe maó wola–Ú diila patuti mowali muri–Ú. Odito olo taa u motoliángo walaío talolai meaalo taabua lebe maó wola–Ú.

³⁸ Wau taa u diila mohuto momota salipulio wau moduduá ola–Ú diila patuti mowali muri–Ú.

³⁹ Taa u momintengi tutumulio, maóolia lo tutumulio, bo taóolia lo tutumulio sababu tatapu wau molotolo hilao to ola–Ú, mamooótapu tutumulio."

⁴⁰ "Taa u mololimo olimongoli, mamoo lolimo ola–Ú. Wau taa u mololimo ola–Ú, mamoo lolimo o–Lio talolao mai ola–Ú.

⁴¹ Taa u mololimo nabi sababu tio nabi, mamó lolimo wuupa odelo ngotaalio lonabi. Wau tatoonu tamo lolimo ngotaalio tamopiohu sababu tio mopiohu, mamó lolimo wuupa odelo ngotaalio lo tamopiohu.

⁴² Titaalo tita tamongohi uilumolo, penu bo taluhu mohuhulo ode tala ngota lotaa hehiinawa daá botie, sababu tio muri-Ú, pomalacayalo, deú tio maatantu mololimo wuupalio!"

1 1 ¹ Lapataó ti Isa longohi maó totoonulalo potuhata ode tamopulaa duulota muri-Lio, Tio lololaa maó tambati boito. Tio mota longajali wau lopo loladu tahuli lo Allahu Taáala to kokoo-tawaalo u totili maó leeto.

² Tei Yahya Tamopolihua tadonggo to tutupa maloó dungohe pasali lokalaja li Almasi. Tulusi tio lopoáhu dengolo lota tahiduduá olio odeli Isa mola lohintu,

³ "Ti Paaáalo tamamei dungga mai moduduá danti lo Allahu Taáala, meaanto amiaatia musi mohima mai taawewo?"

⁴ Ti Isa lolametaó, "Pohualingolo mola odelei Yahya wau polelea maó wolo u maílo dungohe wau iloontonga limongoli:

⁵ Taa pitoó maloóonto, taa didu mowali monaó malowali lonaó, taóngongoto lo alipo u moótihela hapato maloluli; taa bungolo maloó dungohu, taa yilate maa tilumumulai, wau Habari Mopiohe monto Allahu Taáala pilo habariilio ode tau-tauwalo tahi mosikinia.

⁶ Potisanangilo tutu taa diila o alaasani diila mololimo ola-Ú!"

⁷ Lapataó mongo utolia lei Yahya boito malonaó, ti Isa lolumulo lotahuda totaa dadaata pasali lei Yahya, tahuda-Lio, "Timongoli ode huta datahu u luasi daá wau delita mola loóonto wolo? Huóyoto ngopata upilo tomboto dupoto?"

⁸ Timongoli lonaó mola loóonto wolo? Ngotaalio tapake pake loú mopiohu? Tau-tauwalo tahirakea odito hibiluloáwa tobele biluloá saaha li olongia!

⁹ Oditolio yilongola timongoli monaó mola ode huta datahu u luasi daá wau delita? Mola momilohe nabi ngota? Otutu, tumbaó lebe udaá maó lonabi ngota.

¹⁰ Sababu tei Yahya boitolo tamila kusudu todelomo ayati lo Kitabi botie, 'Tabotieelo utoliya-Ú, tahuda lo Allahu Taáala, Waú lolao mai olio leimulo wole-Mu alihu tio momuó dalalo ole-Mu.'

¹¹ Poótoloma maó! Todunia botie diipo peéenta woluo taa lebe udaá maó wolei Yahya Tamopolihua. Penu boli odito, tapulito u kikiió towolota umati lo Allahu Taáala lebe udaá maó wolei Yahya.

¹² Tumulalo mai tei Yahya helo pohabari habariilio tunggula tosaaáti botie, umati lo Allahu Taáala hetilehengi lotau-tauwalo tahipo tolopania motolo kawasa olio wolo palangi.

¹³ Tunggula pilodungga mai lei Yahya, ngoáamila butoée Musa wau pongaajali lomongo nabi hipo nubuwatia susuu-aliyaalo umusi motoduo mai.

¹⁴ Wau wonu timongoli mohuto palacaya, matei Yahya boitolo tei Elia, u podunggaalio mai manilu-buwati.

¹⁵ Wonu obulonga, podungohulo!

¹⁶ Wolo tatoonu Waú musi mopo ngilaboto tau-tauwala tojamani botie? Timongolio debo odelo taúkekeeí tahi huloáa topaatali. Tangopo ambua hipo ngiibode ode taa wewo,

¹⁷ 'Ami hemo polahu mola lahu wengahe ode limongoli, bo timongoli diila mohuto mongelungo! Ami hemo polahu mola lahu ilopatea wau timongoli diila mohuto humoyongo!'

¹⁸ Tei Yahya leitungga mai -- tio helo puasa wau diila longilu angguru; wau tau-tauwalo hipo loiyawa, 'Tio maílo tuanga lolati!'

¹⁹ Botia Walaó Manusia, dungga-dungga mai -- Tio helo lamela wau longilu; tulusi tau-tauwala hipo loiyawa, 'Bilohe tau boito! Olaloa, tahe huwoáalo, waito lo tamootagia beya wau waito lotaa odusa.' Penu boli odito, tinepo lo Allahu Taála obukuti monto hahaa-siliilio."

²⁰ Lapataó ti Isa malo henteá kokoo-tawaalo, tambati toutoonun hepilo hutua-Lio dadaata daá u moólinggolabu. Sababu tau-tauwala to kokoo-tawaalo boito diila lohuto lolilihu lonto duduu-sawaalo limongolio.

²¹ "Matopotala timongoli, Korajim! Wau matopotala olo timongoli, Betsaida! Humayaalio totoonulalo moólinggolabu u pilohutu tohuungi mongoli mapilohutu to Tirus wau Sidon, yi tantu tau-tauwalo mola teto malohiheo lolilihu lonto duduu-sawaalo limongolio wau helomake boó lomilate wau helo podutu peahuó to lunggongi mongolio.

²² Poótoloma maó, to Dulahu Kiama, tau-tauwalo Tirus wau Sidon malebe

gambangi ambunguo lo Allahu Taáala wolimongoli.

²³Wau timongoli, Kapernaum! Wolo timongoli mapolaió–Lio demola sologa? Diila! Tumbaó timongoli matapiloolo ode nalaka! Sababu humayaalio totoonulalo moólinggolabe u pilohutu tohuungi mongoli boito mapilohutu to Sodom, Sodom boito donggo woluo tunggula botia!

²⁴Poótoloma maó, to Dulahu Kiama, taulo Sodom lebe gambangi ambunguo lo Allahu Taáala wolimongoli!"

²⁵Toú boito ti Isa Ioduá, "Paapa, Eeya tamotolo kawasa hulungo wau dunia! Watia mosukuru mola odeli Paapa sababu u ngoáamilalo boito hehuliyo li Paapa lonto tahi tootawa wau taó ilimi bo pilopo bilohei li Paapa to tau–tauwalo ode tadiila hióo sikolawa.

²⁶Ui–uitolo umoó sanangi hilaa li Paapa."

²⁷Lapataó ti Isa lobisala, "Totoonulalo u hitua–tuawua mailudu mai li Paapa ode laatia. Diaaluo penu boli ngotaa maó tamotota to Walaó ngopohia li Paapa. Diaaluo olo tamotota li Paapa ngopohia Walaó, wau tau–tauwala ode tatoonu Walaó boito mopoótaa maó pasali li Paapa.

²⁸ Ponaólo mai timongoli ngoáamila ode ola-Ú tahi woongola, wau tamolaasa mobuheto bantelio; waú mamopo nyamani mai hilaa limongoli.

²⁹ Duduí maó palentaa-Ú wau pobalaajali mai to ola-Ú. Sababu Waú botie ohilaa mopiohu wau dupadupapa lohilao, yi timongoli mamolaasa nyamani wau moheelo wawaó.

³⁰ Sababu totoonulalo palentaa-Ú moósanangi, wau banta u pilopo banta-Ú mai olimongoli moheelo."

12 ¹ Todulahu Saabati tuwau, toú ti Isa yilumaodeó to halabolu lopale ngopita, tahiduduá o-Lio malolipu pale, tulusi pilolamelio sababu hipolaanga.

² Toú tau-tauwalo Parisi loóonto maó uito, malo loíya timongolio odeli Isa, "Bilohi! tahiduduá ole-Mu malo lambanga butoó lo agamanto loú hipohutua u dinidini todulahu Saabati."

³ Ti Isa lolametaó, "Diipo peéenta pilobaca limongoli tomimbihu wolo u pilohutu lei Dauda toú tio wau taulio hipolaanga?"

⁴ Tio tilumuwoto ode delomo Bele lo Allahu Taáala; tulusi lolamela roti u mapilo dewolio ode Allahu Taáala. Lebe-lebe

pomaó moduduá butoó lo agamanto, tio boli taulio diila mowali molamela roti boito -- bo mongo iimamu wambaó tamowali.

⁵ Meaalo diipo peéenta timongoli lopobaca maó todelomo butoée Musa u timiídu dulahu Saabati mongo iimamu tahe otuugasia to Bele lo Eeya, hipo lambangawa wuúdu lodulahu Saabati, bo diila pilopo talalio?

⁶ Poótuota maó wolo u tilahuda-Ú botie: teea woluo talebe udaá maó wolo Bele lo Eeya.

⁷ Todelomo Kitabi tulatulade: Odehu hilaolo u kahandakiyo-Ú, diila bake lo binatangi. Wonu humayaalio timongoli otu-otutuulo maó mongalati tahuda-Ú boito, tantu timongoli diila tamo potala totau-tauwalo tadiila ototala.

⁸ Sababu Walaó Manusia okawasa todulahu Saabati."

⁹ Ti Isa lololaa maó tambati boito tulusi lonaó ode bele ngowale potabiaala.

¹⁰ Mota teto woluo tamailate uluúlio ngotuwali. Dengolo lota taóhilaa mololohe totala li Isa, lohintu maó o-Lio, "Wolo mowali mopoóluli tau todulahu Saabati?"

¹¹ Ti Isa lolametaó, "Humayaalio woluo ngotaalio towolota limongoli ohimba

tuwau, wau todulahu Saabati himba boito lodehu ode huango u modelomo; wolo taa ohuúwo lohimba boito diila motolopani momatulai himba boito monto huango boito?

¹² Naa, manusia lebe ohalaga wolo himba! Oditolio, wonu odito, mowali motulungi tau todulahu Saabati."

¹³ Lapataó ti Isa lotahuda maó ode tailate uluúlio ngotuwali boito, "Popotulude mai uluúmu." Tau boito malo potulide uluúlio, wau uluúlio boito maloluli debo odelo uluúlio ngotuwali.

¹⁴ Bo tau-tauwalo Parisi lololaa maó bele potabiaala boito, lapataó loheeluma u momate li Isa mate-mateelo maó.

¹⁵ Otaawa li Isa deú tau-tauwalo Parisi boito opatuju u moleeto to batanga-Lio. Oditolio Tio malo lolaa maó tambati boito wau dadaata tau loduduá o-Lio. Lapataó Tio malo poóluli ngoáamila tahi ngongota.

¹⁶ Bo Tio lodini olimongolio mopoótaa pasalii-Lio ode taawewo.

¹⁷ Louú odito malo toduo wolo upilo tahuda mai lo Allahu Taáala lotimbulude toli Nabi Yesaya,

¹⁸ "Tabotieelo utoliya-Ú Tatilulaotu-Ú, tapilonu-Ú wau tamotuuúde tohilaa-Ú.

Rohu–Ú mawohi–Ú maó o–Lio, oáadili–Ú mapo habario–Lio ode babaa–ngusawalo.

¹⁹Tio diila tamo buutola meaanto monguatió, meaanto mopidato todala–dalaalo daá.

²⁰Talilo u putuputuó diila tabolio–Lio, tohe u iyo–iyooopo diila tapatee–Lio. Tio mamohipate tunggula oáadili odungga;

²¹ngoáamila bangusa mamó tiwunela to o–Lio."

²²Lapataó dilelolio mai odeli Isa ngotaalio tapitoó wau bubu sababu makiluwasa lorohu u moleeto. Ti Isa lopoóluli maó tau boito tilinggula tio malowali loóonto wau lobisala.

²³Ngoáamila tau lolinggolabe wau hipo loíyawa, "Wolo maa Tio botie walaée Dauda tadilanti boito?"

²⁴Toú tau–tauwalo Parisi loódungohe uito, timongolio lolametaó, "Tau botie bo mowali mohinggi rohu moleeto, sababu Beeljebul, taúwa lo roroo–huwaalo moleeto boito malongohi kawasa boito o–Lio."

²⁵Ilotaawa li Isa pikiilangi lotau–tauwalo Parisi boito. Oditolio Tio malo tahuda ode limongolio, "Wonu lipu tuwau mopoó mowali hipole–polemboá wau mumuusua,

lipu boito diila tamoó taahangi. Wau kota tuwau meaanto ngaalaá u mopoo-pooó wau mumuusua ngota timongota mamóántulu.

²⁶ Odito olo todelomo bele biluloá saaha li onlongia lolati; wonu ungopo lemboá mopohinggi ungopo lemboá wewo, yi bele biluloá saaha li onlongia lolati boito malo poo-pooó wau mamóántulu.

²⁷ Timongoli hemoloíya deú Waú helo pohinggi rohu u moleeto sababu kawasa lo Beeljebul. Wonu odito wolo kawasa lotatoonu tahiduduá olemu mopohinggi rohu u moleeto. Tahiduduá olemu lohihilao boitolo talopo bukuti deú timongoli tilala!

²⁸ Bo Waú mopohinggi rohu u moleeto wolo kawasa lo Rohullah. Wau uito boliilio deú Allahu Taáala malo lumulo lomalanta tohuungi mongoli.

²⁹ Woloolo mola tau moó tuwotaó ode delomo bele ngotaalio tamolotolo molambata halataalio, wonu tio diila momungupo tamolotolo boito? Lapataó uito, deúito tio moó lambataó halataalio.

³⁰ Taa diila motiwambaó ode ola-Ú tutuulio tutu motehengi ola-Ú. Wau

taadiila momantu ola-Ú tutuulio tutu mongantulu kalajaa-Ú!

³¹ Masababu uito, ototai maó, wonu tau mohutu dusa wau moloíya u mohina, tio mowali ambunguolo! Bo wonu tio mohina Rohullah, tio diila mowali ambunguolo!

³² Wonu tau moloíya u hitua-tuawua motehengi Walaó Manusia, tio mowali ambunguolo, bo wonu tio mohina Rohullah, tio diila mowali ambunguolo, mopio botia boli mola to ahiilari!"

³³ "U moótapu maó hungo u mopiohu, bungolio musi molomiodu. Wonu bungolio diila molomiodu hungolio olo diila mopiohu. Molomiodu meaalo diila bungo lo ayu ngobungo maótaawa monto hungolio.

³⁴ Timongoli tau moleeto, diila pongalo aakali timongoli moó loíya susuu–aliyaalo u mopiohe, wonu timongoli moleeto? Wolo uiloíya lotunggilo ui–uitolo u molepatai monto hilao!

³⁵ Taa mopiohu mobisala susuu–aliyaalo u mopiohu, sababu tio polupolu loú mopiohu. Bo bolíio maó taa moleeto mobisala susuu–aliyaalo loú moleeto sababu tio polupolu loú moleeto.

³⁶ Oditolio, poótoloma maó: to Dulahu Kiama, ngota-ngota musí momanta timíidu uiloíyaalio udiila ohuna.

³⁷ Sababu loíyamu lohihilao boitolo u pomake u molantu wolo yíó ototala meaanto diila."

³⁸ Lapataó dengolo lota guru lo agama wau tau-tauwalo Parisi lolóíya maó, "Paaá Guru amiaatia ohilaa momilohe li Paaá mohutu u moólinggolabu."

³⁹ "Donggo boli leetio wau juluhakalio tau-tauwala tojamani botie!" tametaó li Isa, "Timongoli méihutu ola-Ú u moólinggolabu? Timongoli diila tawohiya-Ú penu boli tuwau maó u moólinggolabu, ngopohia u moólinggolabu li Nabi Yunu.

⁴⁰ Tei Yunu lotibiluloá dulahio totolu wau huilio totolu todelomo ombongo tola leidaá. Oditio olo Walaó Manusia mamotibiluloá huilio totolu wau dulahio totolu todelomo ombongo huta.

⁴¹ To Dulahu Kiama, tuango lipu lo Niniwe mamobongu mai peé-peéenta wolo tau-tauwalo tojamani botie wau mamopo tuludu olimongolio. Sababu tau-tauwalo Niniwe boito malo lilihu lonto dusa limongolio, toú tei Yunu lohutuba

to limongolio. Bo tea botia woluo talebe udaá maó wolei Yunu!

⁴² To Dulahu Kiama, ti olongia taabua monto lipu lo Hulialio mamobongu mai peé-peéenta wolo tau-tauwalo tojamani botie wau mamopo tuludu olimongolio. Sababu u modungoheó pongaajali lei Salomo tamolinepo, ti olongia taabua boito malo huwato ode u molaminga daá lonto huudu dunia. Bo tea botia woluo talebe udaá maó wolei Salomo!"

⁴³ "Wonu bolo rohu u moleeto mololaa maó tahingota-ngotaawa, rohu boito momalita tataa-mbatiyalo u mohengu mololohe tambati pohuhelialio, bo diila odunggaalio.

⁴⁴ Masababu uito tio moloíya, 'Wau mamuli mohualinga mola ode bele u matilolaaú mai.' Tou tio leidungga mola odito, bele boito madidu otua, belesi wau aátulu.

⁴⁵ Lapataó tio lonaó wau malodelo pitu rohu wewo ulebe moleetaó wolio. Lapataó timongolio tilumuwoto ode delomo tau boito, tulusi lotibiluloá teto. Wau pulitio maó owowoluwoa lotau boito lowali lebe loleetaó wolo u bohulio mai. Ui-uitolo olo

u mamotoduo mai totau–tauwalo hileeta tojamani botie."

⁴⁶ Tou ti Isa donggo hemo bisala wolo taa dadaata boito, malonaó mai tiilo wau mongo wuta–Tio. Timongolio tilimihulaó to bulemengio sambela hipo tolopania alihu moóbisala wo–Lio.

⁴⁷ Ngotaalio lotaa dadaata boito malo loíya maó odeli Isa. "Paaá, tiilo wau mongo wutati Paaá woluo to bulemengio. Timongolio ohilaa mobisala woli Paaá."

⁴⁸ Lapataó ti Isa lolametaó, "Tatoonu tiilaÚ? Tatoonu mongo wutatu–Ú?"

⁴⁹ Lapataó Tio malolunu to tahiduduá o–Lio wau lotahuda maó, "Tabotieelo tiila–Ú wau mongo wutatu–Ú.

⁵⁰ Taa moponaó kahandaki li Paapa–Ú tosologa, tio–tiolo wutatu–Ú talolaí, wau wutatu–Ú taabua, wau tiila–Ú."

13 ¹ To dulahulo boito ti Isa lololaa maó bele boito tulusi lonaó mota ode biihu lobulalo wau lotihuloáa mota teto.

² Ngohuntua daá tau lotiámbu topalito li Isa, sababu uito Tio mota lotihuloáa tobulotu, hiambola taa dadaata boito hitihula topentadu.

³ Lapataó ti Isa helo ngaajali maó dadaata suáli to limongolio wolo lomake pohumaya. "Tamoo-mengia ngota lonaó mota lomuáyade bili," odi-odieelo mola ti Isa lolumulaó wungguli-Lio.

⁴ "Toú donggo hemo muáyade, woluo bili u lobiihuto todalalo. Tulusi bulungi tilumombotai wau bili boito piloó pulitio.

⁵ Woluo olo u lobiihuto totambati u hibotu-botua, u hutalio ngoídi. Bili boito lato lobutu mola sababu bo ngoídi hutalio.

⁶ Bo toú mato lodulahu malo panggatai tutuu-mbuíyo boito lato lololante, lapataó lohengu wau yilate sababu waáatio diila tilumolodupo lodelomo.

⁷ Woluo olo bili u lobiihuto todelomo diúto oduhi. Diúto oduhi boito lobutu mola wau lohupetaa tutuu-mbuíyo tunggula yilate.

⁸ Bo woluo olo bili lobiihuto tohuta u molomiodu, tulusi lomungo; woluo u ngohetuto, woluo u wolomo pulu wau woluo olo u tolopulu piúwa."

⁹ Lapataó lohungguli maó lo pohumaya boito ti Isa malo tahuda, "Wonu obulonga, podungohu!"

¹⁰ Lapataó tahiduduá li Isa lonaó mai wau lohintu o-Lio, "Yilongola ti Paaá

momake pohumaya wonu mobisala wolo taa dadaata boito?"

¹¹ Ti Isa lolametaó, "Sababu timongoli mailohia ponu u motota maó hitua-tuawua u sangaja tiluuó alihu diila otaawa pasali loú woloolo mola Allahu Taáala momalenta, hiambola timongolio diila.

¹² Sababu taa u mailoluo, mawohiyalo poli, lebe dadaata maó, wau tio maólebealio. Bo taa diila owolo-wolo, yi ngoídi uwoluo to olio, tumbaó mahamaalo.

¹³ Uitolo sababuulio Waú momake pohumaya wonu mobisala wolo taa dadaata, sababu timongolio momilohu, bo debo odelo taa udiila moóonto; timongolio modungohu bo debo odelo taa udiila moódungohu wau diila mongalati.

¹⁴ Woleeto lowalilo mola u nilubuwati mai li Nabi Yesaya, 'Allahu Taáala lotahuda: Timongolio mamó dungohe tulusi bo diila mongalati; timongolio mamó poótuoto tulusi bo diila otaawa limongolio wolo u yilowali.

¹⁵ Sababu pikiilangi lotau-tauwalo botie malowali lopuntuwu, bulonga limongolio malowali bungolo wau mato limongolio maloheúto. Utie motoduo mai alihu mato limongolio diila maó moóonto,

bulonga limongolio diila maó modungohe, pikiilangi limongolio diila maó mongalati wau diila maó mohualingai ode ola-Ú, lapataó Waú mopoóluli maó olimongolio."

¹⁶"Bo donggo boli untungilio timongoli," tahuda maó li Isa ode tahiduduá o-Lio, "Sababu timongoli otutu moóonto wau modungohu.

¹⁷Poótoloma maó, dadaata nabi wau taa u modungohe to Allahu Taáala ohilaa momilohe u ilontonga limongoli masaatia botie, bo diila oontongalio. Timongolio ohilaa modungohe wolo u ilodungohe limongoli masaatia botie, bo timongolio diila moó dungoheó."

¹⁸"Dungohi maó wolo boliilo pohumaya pasali lo tamoo-muáyadea boito.

¹⁹Bili u lobiihuto todalalo debo odelo tau-tauwalo tahipo dungohe habari pasali woloolo mola Allahu Taáala momalenta, bo diila mongalati. Ibilisi boito lonaó mai wau lolambata wolo umaa pilomuáyadu todelomo hilaa limongolio.

²⁰Bili u lobiihuto totambati u hibotubotua, debo odelo tau-tauwalo tahi podungohe habari boito wau huáa lololimo wolo hilaa sanangi.

²¹ Bo habari boito diila longuwaáto todelomo hilaa limongolio. Odito timongolio ilodungga loú suusa meaanto ilalinayalio sababu habari boito, yi timongolio huáa lomaaha iimanilio.

²² Bili u lobiihuto tohuungo diúto oduhi debo odelo tau–tauwalao tahipo dungohe habari boito, bo lolawalo pasali lo tutumuli mongolio sababu ohilaa tumumulo dadaata ngoáamilalo. Sababu uito habari lonto Allahu Taáala leihupeto todelomo hilaa limongolio tilinggula diila lomungo.

²³ Wau bili u lobiihuto tohuta molomiodu debo odelo tau–tauwalo tahipo dungohe habari boito wau longalati daá. Timongolio lomungo ngohuntua, woluo uwolomo pulu, wau woluo olo utolo pulu piúwa tilapulio."

²⁴ Ti Isa luli lohungguli maó pohumaya tuwau totaa dadaata, tahuda–Lio, "Wonu bolo Allahu Taáala momalenta owowoluwoalio debo odelo pohumaya botie: Ngotaalio lo tamoo–mengia lomuáyade bili mopiohu to halabolulio.

²⁵ Toú huilio tuwau, toú ngoáamila tau donggo hituluhe, musu lo tamoo–mengia boito lonaó mai lomuáyadeó bili

lopadengo tohiyango pale boito, lapataó tio malonaó.

²⁶ Touú pipii–lomulowalo boito lobutu mola wau duduualio lotumbingai, maóontonga olo padengo boito.

²⁷ Lapataó tau–tauwalo tahe wuupa lo tamoo–mengia boito lonaó mai ode tamoo–mengia boito wau loloiya maó, 'Tuani, diila mati Tuani talo pomulo maó bili u mopiohe to halabolu li Tuani? Woloolo mola waliilio tunggula mapilo tumula lo papaa–dengowalo mola teto?'

²⁸ Tamoo–mengia boito lolametaó, 'Uito huhutu lomusu.' Lapataó tau–tauwalo tahe wuupa lo tamoo–mengia boito luli lohintu maó, 'Mohuto ti Tuani mola bungгато lamiaatia papaa–dengowalo boito?'

²⁹ 'Diila,' tametio maó, 'sababu wonu papaa–dengowalo boito bungгатоло, pale boito olo maóbungгata.

³⁰ Hulialo maó papaa–dengowalo boito tumumulo peé–peéenta tunggula meidungga pongotolalo. De mapoleleú maó ode tau–tauwalo tamongotolo; Yimoápo papaa–dengio boito, tihuta maó, tulusi pobuwolo. Lapataó yimoáalo palelio, tulusi tahua maó todelomo yibungo.'"

³¹ Ti Isa luli lohungguli maó pohumaya tuwau totaa dadaata, tahuda–Lio, "Wonu bolo Allahu Taáala momalenta owowoluwoalio debo odelo pohumaya botie: Sawi ngobotu hilama lo tahingota–ngotaawa, tulusi pilomulolio to halabolulio.

³² Bili losawi yito bili upulito kikiió. Bo wonu malobutu mai, bili boito mowali upulito udaá tohiyango lo pipii–lomuwaalo. Bili boito mowali bungo lo ayu, tilinggula bubuu–lungiyalo matumombotai motibeelea to tataa–ngolio."

³³ Woluo pohumaya tuwau uwewo yilungguli maó li Isa totaa dadaata. "Wonu bolo Allahu Taáala momalenta owowoluwoalio debo odelo rahi u hilama lotaabua ngota, tulusi ilulaulio wolo labu lotiligu wopato pulu loliiteli tunggula lolesi ngoáamilalo!"

³⁴ Ngoáamilalo hepilo ngaajali maó li Isa ode taa dadaata wolo lomake pohumaya.

³⁵ Louú odito lotoduwolo mola uiloíya lonabi, "Waú momake pohumaya wonu mobisala woli mongolio; Waú mamopo habari susuu–aliyaalo u tuutuó tumulalo mai dunia botie lowali!"

³⁶ Lapataó uito ti Isa lololaa maó taa dadaata boito, tulusi tilumuwoto ode bele. Tahiduduá o–Lio malonaó mai wau lolóiya, "Nte tombanga mai li Paaá to olamiaatia boli lo pohumaya pasali lo papaa–dengowalo tohiyango pale boito."

³⁷ Ti Isa lolametaó, "Taa u momuáyade bili umopiohe boito yito Walaó Manusia.

³⁸ Halabolu boito yito dunia botie. Bili u mopiohu boito yito tau–tauwalo tamalowali umati lo Allahu Taáala. Papaa–dengowalo boito yito tau–tauwalo tahelo tiwambaó to Ibilisi.

³⁹ Musu talomulo papaa dengowalo boito yito Ibilisi. Sembo lo pongotolo yito Dulahu Kiama, wau tau–tauwalo tahi pongotola boito yito maaaa–laíkatiyalo.

⁴⁰ Debo odelo papaa–dengowalo yimoólo wau tumbilalo todelomo tulu, de maódito olo to Dulahu Kiama.

⁴¹ Walaó Manusia mamopoáhu mai maaaa–laíkati–Lio mongambu maó monto wolota umati–Lio ngoáamila tamoó sababu tau mohutu dusa, wau ngoáamila taa wewolio tahelohutu u moleeto.

⁴² Timongolio ngoáamila mapo mahulo–Lio ode delomo tihengo tulu

uyinta–yintalabu; mota teto timongolio mahumoyongo wau modutolo.

⁴³Wau tahi pohutua kahandaki lo Allahu Taáala mamotineló debo odelo mato lodulahu todelomo Dunia Bohu lo Allahu Taáala, ti Paapa limongolio. Oditolio wonu obulonga, podungohu!"

⁴⁴"Wonu bolo Allahu Taáala momalenta, owowoluwoalio debo odelo pohumaya botie; woluo halata u tuutuó todelomo huta tulusi lotapulio lo tahingota–ngotaawa, wau luli pilopo tahulio maó todelomo huta. Lapataó kalana wengahio, tau boito mota lopotali ngoáamila milikiilio, tulusi luli lohualingai wau lotali huta boito."

⁴⁵"Wonu bolo Allahu Taáala momalenta, owowoluwoalio debo odelo pohumaya botie: Daahangi ngota hemo lolohe mumuu–tialaalo u ohalaga.

⁴⁶Toú tio loódungga mutiala ngobotu upolu–polutuó gaagalio, tio huáa lonaó wau mota lopotali ngoáamilalo milikiilio, tulusi lotali mutiala u ngobutu boito."

⁴⁷"Wonu bolo Allahu Taáala momalenta, owowoluwoalio pilohumaya wolo pajala upilo loladu tobulalo, lapataó loótapu mai tola u hidala–dalaala.

⁴⁸ Toú pajala boito malopolu, pajala boito bilintaái ode tudulio lo tahi pahalawa. Lapataó timongolio malo tihuloáa wau lopowiwi maó totoo–lawaalo boito: U mopiohe tilahu limongolio to bolinggo wau udiila mopiohe pilomahuli mongolio.

⁴⁹ Odito olo suáliilio to Dulahu Kiama, mamaa–laíkatiyalo mamonaó mai mopowiwi maó tau–tauwalo tahileeta, monto tau–tauwalo tahi pohutua kahandaki lo Allahu Taáala.

⁵⁰ Lapataó tau–tauwalo tahileeta boito mapo mahulolo ode delomo tihengo otulu. Mota teteetolo timongolio mahumoyongo wau modutolo."

⁵¹ "Wolo timongoli mongalati loú ngoáamilalo boito?" tahuda maó li Isa. "Mongalati Paaá!" uali mongolio.

⁵² Lapataó ti Isa lotahuda maó, "Uitolo sababuulio timiídu guru lo agama tamalowali pongawaá umati lo Allahu Taáala, deúito–yito debo odelo ngotaalio lituani lobele talo polualo monto tambati lo halataalio babaa–langiyalo bohu wau deedelo."

⁵³ Lapataó ti isa yilapato lohungguli maó popoo–humaayalo boito, Tio lololaa maó tambati boito,

⁵⁴ tulusi luli lohualinga mola ode kambungu pilohuluta loduhu–Lio, mola teto Tio lonaó helo ngaajali tobele potabiaalo, wau tahelo dungohe o–Lio teto, hilinggolabe daá. Timongolio hipoloíyawa, "Lonto utoonu tau botie loóto duo mai hikimati debo odelo uito? Wau lonto utoonu Tio loótapu kawasa u mohutu moólinggolabe?"

⁵⁵ Diila maa Tio botie walaó pani lo ayu? Diila mati Maria boito tiilo–Lio; wau mungo wuta–Tio yito tei Yakobus, tei Yusu, tei Simon, walei Yudas?

⁵⁶ Wau diila mamungo wuta–Tio tahi biluloáwa tewe olo? Lonto utoonu lotapu–Lio mai ngoáamilalo boito?"

⁵⁷ Yi timongolio diila lololimo li Isa. Lapataó ti Isa malo tahuda olimongolio, "Nabi ngota hulumatilio boli toútoonu, ngopohia to kambungu pilohuluta loduhulio wau tobelelio lohihilao."

⁵⁸ Masababu uito ti Isa diila helohutu dadaata u moólinggolabe mota teto sababu timongolio diila palacaya.

14 ¹ Toú boito tei Herodes, taókawasa tolipu lo Galilea, loódungohe pasali li Isa.

² Tei Herodes malo loíya ode tahidihima pantungo lipulio, "Tantu utieelo tei Yahya Tamopolihua tamaa luli tilumumulai! Uito sababuulio Tio okawasa helohutu u moólinggolabe."

³ Sababu tou dipo-dipolulio mai uito tei Herodes malei waupa olei Yahya wau lomungu olio wau lopotuwoto ode delomo tutupa. Tei Herodes lohutu maó odito kalana suáli li Herodias, dile lowutatio lohihilao, deúito-yito tei Pilipus.

⁴ Sababu peénta tei Yahya lolóya odie odelei Herodes, "Diila mowali yio monika woli Herodias!"

⁵ Otutuulio maó tei Herodes ohilaa momate olei yahya mate-mateelo maó, bo tio moohe totaa dadaata, sababu heánggapuo limongolio tei Yahya boito nabi.

⁶ Tou tei Herodes lopolame dulahe ilowaliilio mai, walaó taabua li Herodias longelungo totalu lotaa hetilo duwolio. Elungio boito loósanangi daá hilaa lei Herodes,

⁷ tilinggula tei Herodes lodanti maó olio wolo tadia deú penu boli wolo u pohileelio, mawohilio olio.

⁸Sababu pilopopatu maó liilolio, tadulahu boito malo bisala, "Pohile lowatia lunggongee Yahya Tamopolihua to saaátילו botia tanitani mai tobaki!"

⁹Loódungohe hihiile boito, tei Herodes masiluukali daá. Bo sababu tio malo tadia totalu lotaa hetilo duwolio, yi tio malo malentaó léi poópolu maó hihiile lo tadulahu boito.

¹⁰Tio lopoáhu tau ode tutupa mota lolimadei lunggongee Yahya.

¹¹Lapataó lunggongee Yahya boito dilelolio mai tobaki wau yilohilio maó ode tadulahu boito. Tulusi tadulahu boito poli lodelo ode liilolio.

¹²Lapataó uito tahiduduá olei Yahya lonaó mai lohama milate lei Yahya wau yilobungio. Tulusi timongolio malonaó lopoótaa ulotoduo boito toli Isa.

¹³Toú ti Isa loódungohe habari boito, Tio malo titaé tobulotu tutuuwau wau lololaa maó tambati boito, u lonaó mota ode tambati diila otau. Bo toú tau-tauwala loódungohe suáli boito, timongolio malo lolaa maó kota limongolio wau helo hunuhe li Isa loli tudulio.

¹⁴Toú ti Isa lolaaheó lonto bulotu wau loóonto taa dadaata boito, lodehu

hilaa-Lio olimongolio. Tulusi Tio malo poóluli tau-tauwalo tahi ngongota towolota limongolio.

¹⁵Toú lolaangio malo, tahiduduá li Isa lonaó mai wau loloíya o-Lio, "Dulahu malo laango wau tambati botie tihitihi mai. Lebe mopiohu ti Paaá mopoáhu mota tau-tauwalo botie monaó, alihu mota motali mai uáalo to kakaá-mbunguwalo."

¹⁶"Diila palalu timongolio monaó," tahuda li Isa, "Timongolilo tamongohi maó uáalo olimongolio."

¹⁷"Amiaatia bo wambaó oroti limo lobutu wau uponula dulo botu!" tametaó lo tahiduduá li Isa boito.

¹⁸"Deloa mai uito," tahuda maó li Isa.

¹⁹Lapataó Tio malo poáhu taa dadaata boito lotihuloó toitaato huóyoto. Tulusi Tio lohama roti limo lobotu wau uponula dulo botu boito, lapataó yilumanggela mola ode hulungo wau lolapali sukuru ode Allahu Taáala. Lapataó uito Tio lomita-mitangaó roti boito lo uluú-Lio wau lohudu maó ode tahiduduá o-Lio u lolaya-layade mota ode taa dadaata boito.

²⁰Timongolio ngoáamila lolamelo lobubuu-tuhulo maó. Lapataó uito

tahiduduá li Isa malo himoáa lebe loú aalo boito; woluo mopulaa dulo kalanji hipolua.

²¹ Talo lamelo toú boito tanu limo lolihu lota, diipo yileekeni mongobua wau taúkekeei.

²² Lapataó uito ti Isa lopoáhu tahiduduá o–Lio lotitaé tobulotu wau pileí muloa–Lio mola llobalango ode ngotuwali lobulalo, sambela Tio donggo hemeí walingopo totaa dadaata boito.

²³ Lapataó taa dadaata boito lonaó, ti Isa lotaóde mola huludu tuwau mola loduá tutuuwau. Toú mahui mai, debo donggo mota teto ti Isa tutuuwau.

²⁴ Toú boito bulotu u tilaéya lo tahiduduá li Isa, malo laminga mota tohuungo bulalo. Bulotu boito hepilo–pilomaí lobuóolo, sababu dupoto tutuuwalia dulungio wolo bulotu.

²⁵ Towolota loú jamu 3 wau jamu 6 didimodupo, ti Isa malonaó mai ode limongolio lonaó totudu lotaluhu.

²⁶ Toú tahiduduá o–Lio loóonto o–Lio lonaó totudu lotaluhu, iloohea daá timongolio. "Ponggo!" wuwaatíi mongolio mailoohe.

²⁷ Boti Isa lato lolametaó, "Poóoyo mola! Waú ti Isa. Diila oohe!"

²⁸ Lapataó tei Petrus malo loíya, "Wonu lto memangi ti Isa, palentai mai watia monaó totudu lotaluhu."

²⁹ "Odia mai," tahuda li Isa. Oditolio tei Petrus malolahe mola lonto bulotu, lonaó totudu lotaluhu odeli Isa.

³⁰ Bo touú tei Petrus loóonto deú malo odito udaálio dupoto tobulalo boito, mailoohe tio wau mahe lumoduáa mola, "Eeya bantu mai!" wuwaatíio.

³¹ Ti Isa huáa lohudu uluú–Lio wau loheúpa olio, wau lotahuda maó, "Petrus, Petrus, yió botie diila boti palacaya. Yilongola yió diila boti palacaya to ola–Ú?"

³² Tulusi duduulotalo malotitaé mola tobulotu boito, wau dupoto olo mailoole.

³³ Yi tahiduduá li Isa malo sujudu lolubo o–Lio. Timongolio malo loíya, "Otutu Eeya yito Walaó Allahu Taáala!"

³⁴ Touú timongolio leidungga mola ode ngotuwali lobulalo, timongolio lolaheó lonto bulotu to Genesaret.

³⁵ Wau touú tau–tauwalo mota teto loóonto deú talei dungga mai botie ti Isa, timongolio malo pololade mola habari boito ode ngoáamila madala totili lokota boito. Tulusi ngoáamila tahi ngongota dilelolio mai odeli Isa.

³⁶Wau timongolio lomolohone o–Lio alihu moó dedeto jumba–Lio, penu bo biihio. Lapataó ngoáamila taloó dedeto maloluli.

15 ¹Taulo Parisi ngopolemboá wau dengolo lota guru lo agama lonto Yerusalemu lonaó mai odeli Isa. Timongolio helo hintu o–Lio,

²"Yilongola tahiduduá ole–Mu diila moduduó uúdu linenemoyanto? Toú mamó lamelo, timongolio diila mohuwalo meimulo moduduó wuúdu!"

³Ti Isa lolametaó, "Wau yilongola olo timongoli molambanga palenta lo Allahu Taáala, bo kalana ohilaa moduduó uúdu linenemoyamu?"

⁴Sababu Allahu Taáala malo tahuda, 'Hulumatia maó tiyamamu woliilamu,' wau 'Titaalo tita tamoloí–loíya oliilolio wau oliyamolio, musi hukuu–maniyola mate–mateelo maó.'

⁵Bo timongoli helo ngaajali; wonu tamoloíya maó ode mongo dulaálio, 'Wolo uwajibulio wohi laatia odeli paapa woli maama, mapilopo dewo laatia ode Allahu Taáala,'

⁶yi tau boito diilalo powajibuwolo u mohulumati tomongo dulaálio. Oditolio,

kalana uúdu linenemoyamu, timongoli diila momandungi tahuda lo Allahu Taáala.

⁷ Timongoli tau munaapiki! Tiluhata daá wolo u nilubuwati mai lei Yesaya pasali limongoli, deúito-yito,

⁸ 'Odie mola tahuda lo Allahu Taáala: Tau-tauwala boito bo hipo lubowa ola-Ú wolo loíya, bo hilaa limongolio molaminga monto ola-Ú.

⁹ Diila ohunalio timongolio molubo ola-Ú, sababu wuúdu lomanusia u pilo ngaajali limongolio debo odelo uito wuúdu-Ú."

¹⁰ Lapataó ti Isa lotiangai tau-tauwalo wau lotahuda maó olimongolio, "Dungohi maó alihu mongalati!

¹¹ U tumuwoto ode ngangolio diila moó najisi tau boito; bo u lumualai monto ngango ui-uitolo umoó najisi olio."

¹² Lapataó tahiduduá li Isa lonaó mai wau lolóiya o-Lio, "Wolo otaawa li Paaá deú tau-tauwalo Parisi boito longongoto hilao tou loódungohe li Paaá lotahuda odito?"

¹³ Ti isa lolametaó, "Motíidu pilomulo udiila pilomulo li Paapa-Ú tosologa mabunggatolo.

¹⁴ Diila maó pandungia tau-tauwalo Parisi boito. Timongolio boito mongo taúwa

hipiitoá; wau wonu taa pitoó modedeá taa pitoó, duduulotalo mamodehu ode delomo huango."

¹⁵ Ualei Petrus, "Tulungia mai mopoó patato pohumaya boito olamiaatia Paaá!"

¹⁶ Ti Isa lolametaó olimongolio, "Wolo timongoli debo diipo mongalati?"

¹⁷ Diila otaawa limongoli deú u tumuwoto ode delomo ngango molahe mola ode delomo ombongo, wau lapataó muli lumualai?

¹⁸ Bo u lumualai monto ngango, asaliilio mai monto hilao; wau maúitolo umoó najisi totau.

¹⁹ Sababu monto hilao tumoodei totoonulalo pikiilangi moleeto, umoó sababu tau momate mateelo maó, mojina, mohutu u huloto, motaó, mosakusi paaluti wau mopitana.

²⁰ Ui-uitolo umoó sababu tau mowali najisi, wau diila molamela wolo uluú udiila huwa-huwalo."

²¹ Lapataó ti Isa lololaa maó tambati boito wau lonaó mola ode madala totili lokota Tirus wau Sidon.

²² Ngotaalio lotaabua Kanaán tomadala boito, lonaó mai odeli Isa sambela wuwa-wuwaatiá, "Walaée Dauda, ponua

mai watia! Walaó watia taabua ilotuanga lorohu u moleeto. Matiluhua daá tio!"

²³ Ti Isa diila lolameto sama-samaata ode taabua boito. Tulusi tahiduduá li Isa lonaó mai ode o-Lio wau lomolohone maó, "Paaá, péi walingalo mota taabua boito. Tio bo wambaó bulu-buluhuto to wuleyanto!"

²⁴ Ti Isa lotahuda maó, "Wau botie yilao-Lio mai bo wambaó ode bangusa lo Isiraílu, tolomodulio ode limongolio tamaa yilapalo."

²⁵ Taabua boito lonaó mai lapataó losujudu mola totalu li Isa wau lolóiya, "Tulungia mai watia, Tuani."

²⁶ Ti Isa lotahuda maó, "Diila mopiohu mohama uáalo lo taúkekeéi wau mopo mahula ode apula."

²⁷ "Otutu, Tuani," ualo taabua boito, "bo penu boli apula olo mongaa labito u mobiihuta mola monto meja lituanilio."

²⁸ Lapataó ti Isa lotahuda maó olio, "Ibu, otutu udaá iimanimu! Hulialo maó motoduo mai wolo u otohilaamu!" To saaátilo boito walaó taabua boito maloluli.

²⁹ Ti Isa lololaa maó tambati boito, tulusi lotiduluhe mota loli pentadu lo Bulalo

Galilea. Lapataó Tio lotaóde mola huludu tulusi lotihuloáa mota teto.

³⁰ Dadaata tau lonaó mai ode o–Lio hideloa tau–tauwalo tahi penggoa, tapitoó, tadidu mowali monaó, taabubu, wau donggo dadaata tahi ngongota wewolio. Timongolio lodepito tau–tauwala boito totalu li Isa, wau Tio helo poóluli totau–tauwala boito.

³¹ Dadaata tau tawoluo mota teto lolinggolabe daá, tou timongolio loóonto maó taa bubu malowali lobisala, taa penggo maloluli, tadidu mowali monaó malowali lonaó, wau taa pitoó maloóonto, tulusi timongolio malomuji–muji Allahu Taáala bangusa lo Isiraílu.

³² Lapataó ti Isa lotiangai tahiduduá o–Lio tulusi lotahuda maó, "Wau momonu totaa dadaata botie. Matolo hui hiheolio timongolio mai wola–Ú, wau botia timongolio didu o uáalo. Wau diila mongohi olimongolio mohuwalingo lou hipolaanga, tolongaó timongolio bolo meibanti todalalo."

³³ Lapataó tahiduduá li Isa malohintu o–Lio, "Tou toonu mowali poó tapulanto uáalo tomadala u tihitihi mai botie ode taa dadaata odie?"

³⁴ "Ngoolo botu maó roti tolimongoli?" yilintu li Isa olimongolio. "Pitu," tametaó limongolio, "wau uponula kekeeí dengolo botu."

³⁵ Yi ti Isa malo poáhu taa dadaata boito lotihuloáa tohuta.

³⁶ Lapataó Tio lohama roti pitu lobotu boito wau uponulalio, tulusi lolapali mola sukuru ode Allahu Taáala. Lapataó uito Tio lomita–mitangaó roti wau uponula boito wolo uluú–Lio tulusi yilohi–Lio ode tahiduduá o–Lio. Wau timongolio malo laya–layade mota totaa dadaata boito.

³⁷ Ngoáamila tau boito lolamelo tunggula lobutuhu. Lapataó uito tahiduduá li Isa malo himoáa lebelio loú aalo boito. Ngoáamilalo pitu lokalanji hipolua.

³⁸ Tingga bo mongo lolai wambaó tamalo lamelo tou boito wopato lihu lota diipo yiliáapo mongobua wau taúkekeei.

³⁹ Lapataó ti Isa maleí walinga mota taa dadaata boito. Tio lohihilao malo titaé tobulotu tuwau wau lobite ode madala lo Magadan.

16¹ Woluo dengolo lota tau lo Parisi wau tau lo Saduki lonaó mai odeli Isa ohilaa mopotala o–Lio. Timongolio méihutu o–Lio moólinggolabe umopo

bukuti maó deú Tio dungga-dungga mai monto Allahu Taáala.

² Ti Isa lolametaó, "Wonu mato lodulahu donggo titiipa mota, timongoli mamoloíya, 'Dulahu mopiohu, sababu hulungio meela.'

³ Wau wonu dumodupo timongoli mamoloíya, 'Dulahu botie madidiyalo, sababu hulungo meela wau duóduómo.' Naa, timongoli mowali molaamali dulahu loú momilohe mola hulungo, lebe-lebe pomaó totoonulalo tuoto lojamani diila olaamalia limongoli!"

⁴ "Mailaba leetio wau juluhakalio tau-tauwala tojamani botie. Timongoli méihutu ola-Ú u moólinggolabe. Timongoli diila tawohiyalo u moólinggolabe penu boli tuwau maó ngopohia u moólinggolabe li Nabi Yunu." Toú yilapato lotahuda odito, ti Isa lololaa maó olimongolio, tulusi malonaó.

⁵ Toú tahiduduá li Isa leidungga mota ode ngotuwali lobulalo, bolo ilotaawa limongolio deú timongolio loólipata lodelo roti.

⁶ Ti Isa lotahuda olimongolio, "Poódaha-dahaalo maó rahi tau-tauwalo Parisi wau Saduki."

⁷ Loódungohe tahuda li Isa odito, tahiduduá o-Lio malo loíya ngota timongota, "Tio lotahuda odito sababu ito diila lodelo mai roti."

⁸ Otaawa li Isa wolo u hebisalaa limongolio. Oditolio Tio malo tahuda maó, "Yilongola timongoli hemo susuuália lou diila oroti? Timongoli diila boti palacaya!

⁹ Debo diipo mongalati timongoli? Diila oéela mola limongoli u roti limo lobotu mapili-pilitanga-Ú ode taalimo lolihu lota? Ngoolo kalanji lebelio loroti u mailimoí mongoli?

¹⁰ Wau woloolo mola olo wolo roti pitu lobotu ode tawopato lihu lota boito? Ngoolo kalanji lebelio lou aalo u mailimoí mongoli?

¹¹ Yilongola dilumutu timongoli diila mongalati deú Waú diila hemobisala woli mongoli pasali loroti? Poódaha-dahaalo maó ragi tau-tauwalo Parisi wau Saduki!"

¹² Pulitio maó tahiduduá li Isa boito longalati deú ti Isa méi podaha-dahaalo maó olimongolio boito diila toragi u hepomake pohutu roti, bo to popoo-ngajaliyalo tau-tauwalo Parisi wau Saduki.

¹³ Ti Isa lonaó ode madala totili lokota Kaisarea Pilipi. Mota teto Tio lohintu to tahiduduá o–Lio, "Moduduá loíya lotau, Walaó Manusia boito tatoonu?"

¹⁴ Tahiduduá o–Lio malo lametaó, "Woluo talo loíya tei Yahya Tamopolihua. Woluo olo talo loíya tei Elia. Taawewo poli lolóiya tei Yeremia meaanto tala ngota lonabi."

¹⁵ "Bo moduduá olimongoli lohihilao, tatoonu Waú botie?"

¹⁶ Tei Simon Petrus lolametaó, "Ti Paaá yito Olongia Tamoo–poáahua Walaó Allahu Taáala Tatumu–tumulo."

¹⁷ "Maíluntungi daá yió, Simon walaée Yona!" tahuda li Isa. "Sababu diila manusia tamalo poótaa mai suáli boito to olemu, boti Paapa–Ú tosologa.

¹⁸ Sababu uito ototai maó, yió botie tei Petrus, botu u motoheeto. Wau toitaato wumbato botu botieelo Waú mamomongu maó galeja–Ú, udiila mowali olaahe; penu boli lomautu!

¹⁹ Waú mamongohi mai olemu uúnti Dunia Bohu lo Allahu Taáala. Wolo u diniyomu toitaato dunia, uito olo dididini tosologa. Wau wolo u banaliyamu toitaato dunia, uito olo banaliyalo tosologa."

²⁰ Lapataó ti Isa malo poéelaó to tahiduduá o–Lio alihu timongolio diila mopoótaa boli olo tatoonu deú Tio–tiolo Olongia Tamoo–poáhua.

²¹ Tumulalo mai tosaaáti boito, ti Isa lotahuda wolo juujulu ode tahiduduá o–Lio, deú Tio musi monaó ode Yerusalemu wau mola modutolo dadaata monto mongo taúwa, mongo iimamu taúwa wau guguu–ruwaalo agama. Tio mapateelio mate–mateelo maó, bo todulahu otolulio Tio mamuli mobongu mai.

²² Lapataó tei Petrus lomantangaó li Isa ode yintili wau lodini o–Lio, ualio maó, "Pohileaala duá Allahu Taáala mopo lamingaó suáli boito, oo Eeyaú! Diila bolo suáli boito motoduo mai to Eeya!"

²³ Ti Isa maloili maó tulusi lotahuda odelei Petrus, "Pohinggi maó monteea Tamoo–heingawa ode dusa! Yió mongabu–ngabuuto ola–Ú. Pikiilangimu boito pikiilangi lomanusia; diila pikiilangi lo Allahu Taáala!"

²⁴ Lapataó ti Isa lotahuda ode tahiduduá o–Lio, "Taa u mohuto moduduá ola–Ú, musi momalonga polohuna daá batangalio lohihilao wau momota salipulio, wau tulusi moduduá ola–Ú.

²⁵ Sababu taa u motohilaa momintengi tutumulio, maóolia lo tutumulio. Bo taa u mopobake tutumulio ode ola-Ú, mamooótapu tutumulio.

²⁶ Wolo untungilio ode tahingota-ngotaawa, wonu ngoilanggubu dunia botie mowali milikiilio, bo tio oolia lo tutumulio? Wolo mowali tutumulo boito tuloálo loú hitua-tuawua?

²⁷ Diilalo mohiheo Walaó Manusia, peé-peéenta wolo mamaa-laíikati-Lio, mamei dungga wolo kawasa li Paapa-Lio. Toú boito Tio mamolontuli mai timíidu tau motuuúde wolo huhutuulio.

²⁸ Ototai maó! Towolota limongoli teewe woluo tadiila mate, toú diipo moóonto Walaó Manusia meidungga mai odelo Olongia."

17 ¹ Wolonggui mola lapatio maó ti Isa malodelo olei Petrus wolei Yakobus wau wutatio tei Yahya, lotitihi mola tohuídee tuwau u molanggato.

² Totalu limongolio, lolomelo lomola baya li Isa: Baya-Lio malo tilango debo odelo mato lodulahu wau boó-Lio moputió híinta-intawa.

³ Lapataó tahiduduá o–Lio toulota boito maloóonto olei Musa wolei Elia hemobisala woli Isa.

⁴ Lapataó tei Petrus loloíya maó odeli Isa, "Eeya sanangi daá ito teea. Wonu otohila lo Eeya, Watotia mamopo tihulo kema tolo wale teea: tuwau ode Eeya, tuwau olei Musa, wau u tuwau poli olei Elia."

⁵ Tou tei Petrus donggo hemobisala, heengo u motilango daá malo henggubei olimongolio wau lonto heengo boito dungo–dungohei suala lotahuda mai, "Tabotieelo Walaúu–Ú tapilonu–Ú. Tio moósanangi hilaa–Ú. Podungoheó o–Lio!"

⁶ Tou tahiduduá li Isa loódungohe suala boito, timongolio mailoohe daá tilinggula leidambaólo mola tohuta.

⁷ Boti Isa malonaó mai wau lodedeta olimongolio. "Tihulolo mola," tahuda–Lio maó. "Diila oohe!"

⁸ Tou timongolio lomiloheó, diduluo maó taíloontonga limongolio, ngopohia boti Isa wambaó.

⁹ Tou timongolio lotuhuta mola lonto huídee boito ti Isa lopoéelaó olimongolio, "Diila maó polelea boli olo tatoonu wolo u iloontonga limongoli engonti, tou Walaó

Manusia diipo bongulo–Lio mai monto opopate."

¹⁰Tahiduduá li Isa lohintu maó o–Lio, "Yilongola guguu–ruwaalo agama hipo loíyawa deú tei Elia musi meimulopo mai?"

¹¹Ti Isa lotahuda maó, "Memangi tei Elia monaó mai wau tio mamó poóbelesi maó totoonulalo u hituwa–tuawua.

¹²Bo Waú motahuda mai olemu tei Elia malonaó mai, bo tau–tauwala diila loóonuhe olio; hepilohutu limongolio tio bolo totoonulalo u otohila limongolio. Wau odito olo u mapohutuo limongolio to Walaó Manusia."

¹³Lapataó tahiduduá o–Lio malo ngalati deú ti Isa lotahuda pasali lei Yahya Tamopolihua.

¹⁴Toú ti Isa wau toulota tahiduduá o–Lio luli lohualingo ode taa dadaata boito, talolaí ngota malonaó mai, wau losujudu mola totalu li Isa,

¹⁵wau lolóiya, "Paaá ponua mai walaó watotia. Ngongotio hedudeetolo. Ngongoto lodudeetio boito wonu meidungga malo laba–labaalo tilinggula tingga maito tio modehu ode delomo tulu wau tingga maito olo tio modehu ode delomo taluhu.

¹⁶ Watotia malodelo ode tahiduduá li Paaá, bo timongolio diila lowali lopoóluli maó olio."

¹⁷ Ti Isa lotahuda maó, "Mailaba timongoli botie! Timongoli tutuulio tutu tau-tauwalo tahelo halahu lonto dalalo u otutu wau diila palacaya. Tunggula omolua Waú musi motibiluloá woli mongoli wau mosabali woli mongoli? Deloa mai walaó boito!

¹⁸ Tulusi ti Isa lomalentaó rohu u moleeto todelomo walaó boito yilumualo. Wau rohu u moleeto boito mailumualo, tulusi walaó boito loluli to saaátilo boito.

¹⁹ Lapataó tahiduduá li Isa lonaó mai ode o-Lio lotiwiwi maó wau lohintu o-Lio, "Paaá, wolo sababuulio amiaatia diila mowali mopohinggi rohu umoleeta boito?"

²⁰ Ti Isa lolametaó, "Sababu timongoli diila boti palacaya. Eelai maó! Wonu timongoli o iimani penu bo odelo udaá bili losawi, timongoli mowali moloíya ode huludu botie, 'Limbatolo mola odito!' tantuulo maó huludu botie mamó limbato. Diaaluo penu boli tuwau maó udiila opohutuo limongoli!

²¹ [Bo rohu u moleeto debo odelo utie, bo mowali yinggilola loduá wau puasa.]"

²² Toú tahiduduá li Isa hiámbua to Galilea, ti Isa lotahuda maó ode limongolio, "Diilalo mohiheo, Walaó Manusia mawuduolio ode kawasa lomanusia.

²³ Tio mapateelio mate-mateelo maó, bo todulahu otolulio Tio mamuli bongulo-Lio mai." Yi tahiduduá o-Lio mahi suukalia daá.

²⁴ Toú ti Isa wau tahiduduá o-Lio leitungga mola ode Kapernaum, tahipo tagia beya Bele lo Eeya lonaó mai odelei Petrus wau lohintu maó, "Ti Gurumu hemomayali beya Bele lo Eeya meaanto diila?"

²⁵ Tei Petrus lolametaó, "Hemomayali!" Toú tei Petrus lohualingo, ti Isa lohimelu maó olio leimula, "Simon woloolo mola huhamamu? Tatoonu tamusi momayali maó beya meaalo haasili ode mongo olongia todunia botie? Ulipu meaalo taadeli?"

²⁶ "Taadeli," tametaó lei Petrus. "Wonu odito," tahuda maó li Isa ulipu diila palalu momayali.

²⁷ Bo diila mowali ito mopo ngongoto hilaa lotau-tauwalo boito. Oditolio, ponaólo ode bulalo mota pongailolo. Hamaawa mai bohulo tola u ohamaamu.

Todelomo ngangolio boito yió mamoo dungga mato lodoi u motuuheta wolo beyaanto duulota. Hamaawa doi boito wau bayalia maó olimongolio beyaanto ode Bele lo Eeya."

18¹ Tou boito tahiduduá li Isa lonaó mai ode o-Lio wau lohintu, "Tatoonu tahe anggapuolio pulito udaá towolota umati lo Allahu Taáala?"

² Ti Isa malo tiangai walaó talolai kikiiá ngota, wau lopotihulo olio totalu limongolio.

³ Lapataó ti Isa lotahuda maó, "Pomalacayalo! Bo wonu timongoli molomelo wau mowali debo odelo taúkekeei, timongoli mamowali pongawaá umati lo Allahu Taáala.

⁴ Taa u motidupapa lo batangalio wau mowali debo odelo taúkikiiá botie, tio-tiolo tapulito udaá towolota umati lo Allahu Taáala.

⁵ Wau taa u mololimo taúkikiiá tadebo odelo utie sababu Waú, boliilio maó mololimo ola-Ú."

⁶ "Tatoonu tamoó sababu tala ngota lotau-tauwalo biaasa botie diilalo palacaya ola-Ú, lebe mopiohe wonu botu

pohilingalo potihutolo to buloólio wau tio loduóolo ode delomo deheto u modelomo.

⁷ Donggo boli topotalalio dunia botie sababu susuu–aliyaalo u moósababu tau mohutu dusa. Memangi susuu–aliyaalo debo odelo uito malaito woluo, bo matopotala tamoó sababu maó!

⁸ Wonu uluúmu meaanto oáatumu moósababu olemu mohutu dusa, olota wau pomahula maó. Lebe mopiohe yió tumumulo wolo Allahu Taáala loú didu o uluú meaanto o oáato ngotuwali, bo yió mapomahu–Lio ode delomo tulu lonalaka wolo uluú wau oáatumu dulo tuwali.

⁹ Wau wonu matomu moósababu olemu mohutu dusa, luóheelo wau pomahula maó. Lebe mopiohe yió tumumula wolo Allahu Taáala didu omato ngotuwali loú mapomahu–Lio ode delomo tulu lonalaka wolo mato dulo tuwali."

¹⁰ "Poódahai! Diila maó pohina tala ngota monto tau–tauwalo ukikiio botie. Sababu poótoloma maó, mamaa–laíkatiyalo limongolio laito woluo totalu li Paapa–Ú tosologa.

¹¹ [Sababu Walaó Manusia dungga–dungga mai mopoahhu tailapalo!]

¹² Woloolo mola huhamaamu?

Humayaalio woluo ngotaalio taóhimba ngohetuto, tulusi tuwau towolota lo hihii-mbawaalo boito mooli, wolo u mapohutuo lotau boito? Tantu tio mamololaa maó himba u tio lopulaa tio boito tohuludu wau mota mololohei uilooli boito.

¹³ Wau wonu tio muli moódungga himba boito -- pomalacayalo ola-Ú -- tio malebe meengaheó tohimba u tuwau boito wolo u tio lopulaa tio wewolio boito udiila yilooli.

¹⁴ Odito olo Allahu Taáala limongoli tosologa diila mohuto tala ngota lotau-tauwalo taboheeli palacaya to ola-Ú botie lapalolo."

¹⁵ "Wonu wutatumu odusa olemu, ponaólo ode olio wau poótaa maó totalaalio. Pohutua maó uito wolo poó-poóoyo towolota limongoli duulota wambaío. Wonu tio modungohe loíyamu, yi maloáahu yió luli loótapu mai wutatumu boito.

¹⁶ Bo wonu diila, podelo mota ngota meaanto duulota poli. Sababu todelomo Kitabi tulatuladu, 'Pulito ngoídilio duulota meaalo toulota sakusi tapalaluwolo u mopoílaalo ngotaalio tapilo tulude boito ototala.'

¹⁷ Wonu tio diila mololimo nasehati lotau-tauwala boito, poótaa maó suáli boito ode jamaá. Wau pulitio maó, wonu tio diila mohuto mololimo nasehati lojamaá, anggapuwalo tio odelo tamootagia beya meaanto ngotaalio tadiila motota lo Allahu Taáala."

¹⁸ "Ototai maó: Wolo uдинio limongoli todunia, dinidini olo tosologa. Wau wolo u banalia limongoli todunia, banabanali olo tosologa.

¹⁹ Wau ototai maó olo: Wonu towolota limongoli todunia botie taduulota aáakolowa pasali lolo wambaío wau moduá mola uito, yi duá boito matolimo li Paapa-Ú tosologa.

²⁰ Sababu touútoonu duulota meaanto toulota motiámbu sababu Waú, Waú woluo tohuungi mongolio."

²¹ Lapataó tei Petrus malonaó mai odeli Isa wau lohintu, "Oo Eeya, wonu wutato lowatotia odusa towatotia, tunggula poóongolo watotia musi mongambungu olio? Tunggula poóopitu maó?"

²² Ti Isa lolametaó, "Diila, diila tunggula poóopitu, bo poóopitu lopulaa pitu piúwa!

²³ Sababu wonu bolo Allahu Taáala momalenta, owowoluwoalio debo odelo

pohumaya botie: Ngotaalio li Olongia motohilaa mopoó lapato bibii–loliyaalo lomongo watolio.

²⁴Toú tio lolumulo lomalakisaó, mapilopo taluwolio mai ode olio wato ngota taóbiloli heyuta–yutaawa,

²⁵wau diila loóbayali biloliilio. Oditolio ti olongia boito maléi potali maó wato boito peé–peéenta wolo walaío wau dilelio taabua, wau ngoáamila milikiilio u pomayali biloliilio.

²⁶Wato boito malo sujudu totalu li olongia boito, wau lomolohone maó, 'Tuani, posabalipo ode watotia. Watotia mamó poópolu mai ngoáamila biloli boito.'

²⁷Ti Olongia boito malo toliánga olio, tilinggula tio malo luluto ngoáamila biloliilio.

²⁸Toú wato boito yilumualaó, ilodunggaalio tio wolo sahabatilio, wato ngota olo, taóbiloli to olio dengolo lihu. Tio malo heúpa sahabatilio boito, tilingoloío, wau lolóiya maó, 'Bayalia mai ngoáamila bilolimú!'

²⁹Tulusi sahabatilio boito malo sujudu totalulio wau lohile, 'Posabalipo sahabati, ngoáamila mabayaliyaú mai!'

³⁰ Bo wato boito diila lohuto. Boliño maó, tio bo malo potuwoto olio ode delomo tutupa tunggula tio loó bayali biloliilio.

³¹ Touú mongo wato wewo loóonto maó wolo ulotoduo boito, timongolio masiluukali wau lopodulohe suáli boito odeli onlongia.

³² Yi ti onlongia boito maleí tianga wato tamoleeto boito wau loloíya olio, 'Wato tamoleeto! Ngoáamila bilolimu mailulutuú bo sababu yió malo molohone mai olaú.

³³ Wolo yió diila patutilio olo motoliánga sahabatimu debo odelo waú malo toliánga olemu?'

³⁴ Ti Onlongia boito maloingo daá. Wato tamoleeto boito mapilopo tuwotio ode tutupa tunggula ngoáamila biloliilio bilayalialio."

³⁵ Ti Isa lopoó pulitaó silitaa–Lio wolo tataa–heyaalo botie, "Odito olo ti Paapa–Ú tosologa mopohutu mai olimongoli ngota–ngota, wonu timongoli diila mongambungu wutatumu wolo ihilasi."

19¹ Lapataó ti Isa yilapato lotahuda maó ngoáamilalo boito, Tio lololaa maó Galilea tulusi lonaó ode madala lo Yudea to ngotuwali lo Dutulaa Yordan.

² Dadaata talo duduá o-Lio, wau Tio malo poóluli olimongolio mota teto.

³ Lapataó tau-tauwalo Parisi lonaó mai lopotala o-Lio. Timongolio helohintu, "Moduduá butoó lo agamanto, tingga mowali ngotaalio motalaki dilelio taabua penu boli alasani wolo wambaío?"

⁴ Ti Isa lolametaó, "Wolo diipo pilobaca limongoli todelomo Kitabi deú Allahu Taáala talo powali manusia, toú bohulio mai helo powali olimongolio talolaí wau taabua?"

⁵ Wau lapataó uito Tio lotahuda, 'Uito sababuulio talolaí mololaa maó oliilolio wau oliyamolio wau motituwau wolo dilelio, yi duduulotalo mowali tuwau.'

⁶ Oditolio timongolio diilalo duulota, bo ngota. Uito sababuulio wolo u mapilopo tuwau lo Allahu Taáala diila mowali talakia lomanusia."

⁷ Lapataó tau-tauwalo Parisi lohintu o-Lio, "Wonu odito yilongola tei Musa léiwohi totau tuladu talaki ode dile taabua taa tilalakilio boito?"

⁸ Ti Isa lolametaó, "Tei Musa mopoluasi olimongoli motalaki dilemu taabua sababu timongoli mototolo daá ajaliyolo. Bo tutuulio tutu diila odito toú bohulio mai.

⁹ Oditolio, dungohi maó utie: Titaalo tita tamotalaki dilelio -- lebe-lebe pomaó taabua boito diila lohama pipia -- lapataó monika poli wolo taabua wewo, yi tau boito malojina."

¹⁰ Yi tahiduduá li Isa malo loíya o-Lio, "Wonu suáli loú wumbuta lo motolo dilea yito debo odelo uito, lebe mopiohu diila ponika."

¹¹ Ti Isa lolametaó, "Diila ngoáamila tau moó tolimo tataa-heyalo boito, bo wambaó tau-tauwalo tamaa tilantu mai lo Allahu Taáala.

¹² Sababu woluo taa diila mowali monika, sababu timongolio memangi mapilo tutulio mai odito. Woluo olo taa diila mowali monika sababu tio pilohutu odito lotaa wewo. Wau woluo olo taa molulaoto lohihilao udiila monika, alihu mowali momaya to Allahu Taáala. Taa mambo mololimo pongaajali botie, huliilo maó tio mololimo uito."

¹³ Woluo tahe lodelo mai taúkekeeí odeli Isa alihu Tio mopodutu lo ulu-lo toitaato lunggongi mongolio wau moduá mola olimongolio. Bo tahiduduá li Isa maloingo totau-tauwala boito.

¹⁴ Yi ti Isa lotahuda maó ode tahiduduá o-Lio, "Hulii maó taúkekeeí boito monaó mai ode ola-Ú! Diila maó dinia timongolio, sababu tau-tauwalo debo odelo utieelo tamowali pongawaá umati lo Allahu Taáala."

¹⁵ Tulusi ti Isa helo podutu ulu-ío toitaato lunggongo lo taúkekeeí boito wau lobalakati maó olimongolio. Lapataó Tio lonaó lonteeto.

¹⁶ Todulahu tuwau talolaí ngota lonaó mai odeli Isa, "Paaá Guru," ualio maó, "huhutu mopiohe wolo umusi pohutuo lowatia alihu mowali mololimo tutumula ututuulio tutu wau ohiheo-hiheolo maó?"

¹⁷ Ti Isa lolametaó, "Yilongola yió mohintu ola-Ú tomimbihu wolo u mopiohe? Bo woluo Tuwau u mopiohe. Wonu yió mohuto tumumulo, yió musi modungohe totoonulalo palenta lo Allahu Taáala."

¹⁸ "Palenta utoonu uito?" yilintu maó lotau boito. Ti Isa lolametaó, "Diila maó pomate-mateelo maó, diila maó pojina, diila maó potaó, diila maó pongohi sakusi udiila otutu,

¹⁹ hulumatia maó tiilamu wau tiyamamu; wau toliánga maó ngota timongotamu

debo odelo yió motoliángo batangamu lohihilao."

²⁰ "Ngoáamila palenta boito madiluduá lowatia," tametaó lo taa bohulotau boito. "Donggo wolo poli upalalu?"

²¹ Ti Isa luli lotahuda olio, "Wonu yió motohilaa mowali wimu–wimumuto ngoáamilalo, ponaólo mota wau potalia maó ngoáamila milikimu. Wohia maó doilio ode taa mosikini, wau yió mamooótapu halata tosologa. Lapataó uito, ponaólo mai moduduá ola–Ú!"

²² Loódungohe tahuda boito, taa bohulotau boito malonaó wau hilaalio siluukali daá sababu tio kaya daá.

²³ Lapataó ti Isa lotahuda maó ode tahiduduá o–Lio, "Waú motahuda mai olemu, suukali daá taakaya mowali pongawaá umati lo Allahu Taáala.

²⁴ Wau utie olo utohilaa potahuda–Ú mai olemu; lebe gambangi unta tuwau tomuwoto ode huango dudetu wolo taakaya ngota tumuwoto ode Dunia Bohu lo Allahu Taáala."

²⁵ Toú tahiduduá li Isa loódungohe tahuda li Isa boito, timongolio lolinggolabe. "Wonu odito," uali mongolio, "tatoonu tamowali moáahu?"

²⁶ Ti Isa lomiloheó olimongolio tulusi lotahuda maó, "Duólo manushia, uito diila pongalo aakali! Bo duólo Allahu Taáala, ngoáamila pongalo aakali."

²⁷ Tulusi tei Petrus lolóiya maó, "Bilohilo, amiaatia malo lolaa mai totoonulalo u hitua–tuawua wau loduduá li Paaá. Wau wolo u matolimo lamiaatia?"

²⁸ Ti Isa lotahuda maó olimongolio, "Pomalacayalo: To Dunia u Bohu, Walaó Manushia mamó tihuloáa toitaato tambati huhuloá–Lio u lailaió. Toú boito timongoli tahiduduá ola–Ú mamó tihuloá toitaato lo mopulaa duluo tambati huhuloá li olongia wau mamomutoó tamopulaa duluo kaumu bangusa lo Isiráilu.

²⁹ Wau motiídu taa u malo lolaa maó bele, meaanto wutatio talolái meaanto taabua, meaanto oliilolio oliyamolio, meaanto mongo walaío, meaanto halabolu kalana Waú, tau boito mamuli mololimo poóhetuto piúwa. Wau tio mamó lolimo olo tutumulo ututuulio tutu wau ohiheo–hiheolo maó.

³⁰ Bo dadaata taa u masaatia botie tabohulio mamowali tapulitio wau tamasaatia botie tapulitio mamowali tabohulio."

20¹ "Wonu bolo Allahu Taáala momalenta, owowoluwoalio debo odelo pohumaya botie: Ngotaalio taa ohuúwo ilengi lo angguru yilumualo tou dimodupo mololohe taa u mokalaja to ilengi lo anggurulio.

² Lapataó tio akolo momayali olimongolio ngopita doi talaá dulahio tuwau, tio malo poáhu mota olimongolio helo kalaja to ilengi lo anggurulio.

³ Jamu sambila dimodupo, taa ohuúwo lo ilengi boito luli lonaó, wau loóonto dengolo lota tadiila okalaja topaatali.

⁴ Yi tio lolóiya maó ode limongolio, 'Ponaólo mola timongoli mokalaja to ilengi lo angguruú. Waú mamó mayali olimongoli wolo wuupa u patuti.'

⁵ Timongolio olo malonaó. Tou dulahe matotaú wau dulahe majamu tiga lolaango, taa ohuúwo lo ilengi boito luli yilumualo wau lohutu maó suáli u tutuuwauwa.

⁶ Wau tanu jamu lima lolaango, tio luli yilumualo wau loóonto debo donggo woluo tadiila okalaja. Tulusi tio malohintu olimongolio, 'Yilongola timongoli hitihula tulusi tewe lou diila hipohutua wolo-wolo?'

⁷ Tau-tauwala boito malo lametaó, 'Diaaluo tamongohi mai kalaja to olamiaatia.' 'Wonu odito,' ualo taa ohuúwo lo ilengi boito, 'ponaólo timongoli mola mokalaja to ilengi lo angguruú.'

⁸ Malo laangaó, taa ohuúwo lo ilengi boito lolóiya ode mandululio, 'Tianga mai tahi pokalajawa boito wau bayalia maó wuupa limongolio ngota-ngota, tumulalo maó taa u tilumuwoto pulitio tunggula ode taa u tilumuwotai bohulio.'

⁹ Tulusi malonaó mai tahi pokalajawa tumulalo maó tahelo kalaja lonto jamu lima lolaango. Timongolio ngota-ngota helo lolimo doi talaá ngopita.

¹⁰ Lapataó poli malonaó mai tahi pokalajawa tahe sileuwa tumulalo mai dimodupo. To pikiilangi limongolio timongolio mamo lolimo lebe-lebe. Lebe-lebe pomaó timongolio bo yilohialio doi talaá ngopita olo.

¹¹ Touú lololimo doi boito, timongolio maloingo totaa ohuúwo lo ilengi boito:

¹² 'Tahi pokalajawa talonaó mai pulitio boito bo helo kalaja ngojamu. Hiambola amiaatia helo kalaja dulahio tuwau topatu daá lodulahu, boti Tuani malo mayali olimongolio tutuuwauwa wolamiaatia!'

¹³Taa ohuúwo lo ilengi boito malo lametaó ode tala ngota limongolio, 'Sahabati, waú diila ototala olemu. Diila maílo akolowamu deú yió musi mololimo wuupa doi talaá ngopita duólo kalajamu dulahio tuwau?

¹⁴Boito, hamaalo wuupamu, wau ponaólo. Waú memangi motohilaa mongohi ode taa u tilumuwotai pulitio boito wuupa u tutuuwauwa loú yilohiú mai olemu.

¹⁵Wolo waú diila mowali mohutu maó totoonulalo u otohilaaú wolo milikiú? Meaalo yió mohiihia, sababu waú omuura lohilao?"

¹⁶Lapataó ti Isa luli lotahuda maó, "Odito olo tau–tauwalo tapulitio mamowali tabohulio, wau tau–tauwalo tabohulio mamowali tapulitio."

¹⁷Toú ti Isa dudu–dulunga ode Yerusalemu, tohuungo dalalo Tio lotiango tamopulaa duulota muri–Lio lotiámbu lotiwiwi. Tulusi Tio lotahuda maó olimongolio,

¹⁸"Dungohi! Ito botia dudu–dulunga ode Yerusalemu. Mola teto Walaó Manusia mawuduolio ode mongo iimamu taúwa

wau guguu–ruwaalo agama. Lapataó Tio mahukuu–maniyolio mate,

¹⁹ tulusi wuduolio ode tau–tauwala tadiila Yahudi. Timongolio mamo hente–henteá o–Lio, moposikisa o–Lio, wau moposalipu o–Lio. Bo todulahu otolulio, Tio mamuli bongulo–Lio mai."

²⁰ Lapataó dile lei Jebedeus lonaó mai wolo mongo walaío odeli Isa. Totalu li Isa tio malo sujudu u lohile hitua–tuawua.

²¹ "Wolo otohilaa li ibu?" Tahuda li Isa. Ti ibu boito lolametaó, "Otohilaa lowatia walaó watia duulota botie motihuloá to oloihi wau to olowala li Paaá wonu ti Paaá de mamowali Olongia."

²² "Timongoli diila motota wolo upohile limongoli," tahuda li Isa ode limongolio. "Wolo timongoli mambo mongilu monto hakati polodutolo umusi yilumo–Ú?" "Mambo" tametaó limongolio.

²³ Ti Isa lotahuda maó, "Memangi timongoli mamongilu olo monto hakati–Ú. Bo pasali lo tatoonu tamaa motihuloá to oloihi meaanto to olowala–Ú diila Waú taóhaku molantu. Tambati boito yito duólo tamaa tilantu maó li Paapa–Ú."

²⁴ Toú opulu lota tahiduduá wewolio loódungohe suáli boito, maloingo timongolio to tamohutato duulota boito.

²⁵ Sababu uito ti Isa malo tiangai olimongolio ngoáamila lapataó lotahuda maó, "Otaawa limongoli deú mongo taúwa lo bangusa tadiila motota lo Allahu Taáala helodeehe ulipulio. Wau taduduulaá lo ulipu limongolio boito hemo dutonga olimongolio.

²⁶ Bo timongoli diila mowali odito. Boliño maó, taa u motohilaa mowali udaá towolota limongoli, musi mowali tamomayawa olemu.

²⁷ Wau taa u motohilaa mowali tabohulio towolota limongoli, musi mowali watomu.

²⁸ Tutuuwauwa debo odelo Walaó Manusia boito olo; Tio dungga–dungga mai diila meíbaaya, bo mai momaya, wau mohudu nyawa–Lio u mopo lopato totaa dadaata."

²⁹ Toú timongolio lololaa maó Yerikho, ngohuntua tahelo duduá li Isa.

³⁰ Tapitoó duulota donggo hihuloá tobiihu dalalo. Toú timongolio loódungohe deú ti Isa yilumaodeó, timongolio malo nguatió, "Walaée Dauda, ponua mai mongowatotia!"

³¹ Taa dadaata tawaluo teto maloingo olimongolio wau leí poóoyo olimongolio. Bo timongolio lebe loóohuú mola longuatió. "Tuani, Walaée Dauda, ponua mai mongowatotia!"

³² Tulusi ti Isa malo huheli wau lotiangai olimongolio, "Wolo u otohilaa limongoli u mowali pohutuwo–Ú mai olimongoli?" Tahuda maó li Isa.

³³ Timongolio lolametaó, "Tuani, mongowatotia motohilaa moóonto!"

³⁴ Ti Isa lodehu hilaa–Lio olimongolio, tulusi malo leapu maó mato limongolio. To saaátilo boito timongolio malowali loóonto. Lapataó timongolio loduduó li Isa.

21 ¹ Touú malembide lo Yerusalemu, leidungga mota timongolio to Betpage to Huludu Zaitun. Mota teto ti Isa leí titimulo duulota tahiduduá o–Lio.

² "Ponaólo ode kambungu totalu mota limongoli boito," tahuli li Isa olimongolio. "Lolamemeto timongolio maloóonto kolodai tuwau tihutihuto peé–peéenta wolo walaío. Wuádi maó duduuluolo wau deloa mai odia.

³ Wonu woluo tau mohintu u hitua–tuawua, polelea maó ode taulio, 'Eeya

palalu leeto,' yi tau boito mahuáa mopoluli mai kolodai boito deloolo."

⁴ Suáli boito oditolo alihu mamotoduo mai wolo uiloíya lonabi odelo odie mola,

⁵ "Polelea maó ode Sion, Olongiyamu donggo dungga-dungga mai ode olemu. Tio dupadupapa lohilao wau taétaé mai to kolodai tuwau, walaó kolodai tuwau udonggo buboto."

⁶ Lapataó taduulota hiduduá o-Lio boito malonaó wau lopohutu maó debo odelo u pilo lahuli maó li Isa olimongolio.

⁷ Timongolio lodelo mai kolodai boito wolo walaío. Tulusi timongolio malo hepide wulea lo kokoo-lodaiyaala boito wolo jumba limongolio. Lapataó ti Isa malo titaé maó.

⁸ Ngohuntua tau mola teto helomuáde jumba limongolio todalalo, hiambola tau-tauwalo wewo helomutu tango lo ayu kekeéi wau pilomulepe limongolio tohuungo dalalo.

⁹ Taa dadaata u hinaówa totalu wau towulea li Isa hiwatiá, "Pomali-tutuóolo mola Walaée Dauda! Mabala-balakatilo Tio tadungga-dungga mai to tanggulo Eeya! Pomujilo mola Allahu Taáala Taa Laba-labaalo molanggato!"

¹⁰ Lapataó, tou ti Isa tilumuwoto ode Yerusalemu, ngoilanggubu kota boito lowali lame daá. "Tatoonu tau botie?" yilintu lotau–tauwalo tokota boito.

¹¹ "Tio Nabi Isa, lonto Najaret to Galilea," tametaó lotaa dadaata tahiduduá li Isa.

¹² Lapataó ti Isa tilimuwoto ode Bele lo Eeya, wau helo pohinggi ngoáamila tahipo tataalia mota teto. He bilantulele–Ngio memee–jawaalo lo tahipo tutuuloá lodoi, wau babaa–nggawalo lotahi podahangia poombo.

¹³ Lapataó Tio lotahuda maó ode tau–tauwalo boito, "Todelomo Kitabi tulatulade deú Allahu Taáala lopilimani mai, 'Bele–Ú maúnteelo bele tambati poduáalo.' Bo he pilohutu limongoli lowali beelea lopohehu!"

¹⁴ Tahipiitoá wau tadidu mowali monaó lonaó mai odeli Isa to Bele lo Eeya, wau Tio helo poóluli maó olimongolio.

¹⁵ Bo mongo iimamu taúwa wau guguu–ruwaalo agama loingo loóonto maó totoonulalo moólinggolabe u pilohutu li Isa. Wau timongolio loingo olo loódungohe taúkekeéi hiwuwa–wuwaatiá meengahu to Bele lo Eeya, "Pomali–tutuóolo mola Walaée Dauda!"

¹⁶ Timongolio loloiya maó odeli Isa, "Tingga máilo dungohe–Mu wolo u heloiya limongolio?" "Ooó, ilodungohe–Ú," tametaó li Isa. "Diipo peénta maó timongoli lopobaca ayati lo Kitabi botie: 'Taúkekeéi wau taúnge máilaajali–Ú u molapali póilaalo momuji uwimu–wimumuto ngoáamilalo?"

¹⁷ Lapataó ti Isa lololaa maó olimongolio, tulusi yilumualo lonto kota boito ode Betania wau lotitihui mola teto.

¹⁸ Didimodupo loloombulio mola, tou mahe walinga ode kota, ti Isa pilolaango.

¹⁹ Lapataó Tio maloóonto mota ayu ara ngobungo tobiihu dalalo. Tio lonaó mota ode bungo lo ara boito, bo diila loódungga penu boli ngobotu hungolio bo duungio wambaó. Lapataó ti Isa lotahuda maó ode bungo lo ayu boito, "Yió madiilalo momungo mai!" Tulusi bungo lo ayu ara boito huáa lololantelo mola.

²⁰ Tou táhiduduá li Isa loóonto u lotoduo mai boito, lolinggolabe daá timongolio. "Woloolo mola bungo lo ara boito maalato yilate ngoáamilalo?" yilintu limongolio.

²¹ "Otutu," tametaó li Isa, "Wonu timongoli palacaya wau diila molingu timongoli mowali mohutu maó wolo umaa

pilohutu-Ú tobungo lo ara botie. Wau diila bo wambaó uito, tumbaó timongoli mamowali moloíya ode huludu botie, 'Pohuwatolo wau polemaílo mola ode delomo deheto'; yi suáli boito mamotoduo.

²² Boli wolo u pohile limongoli todelomo duámu, timongoli mamó lolimo maó, asali timongoli palacaya."

²³ Lapataó ti Isa luli lohualinga mota ode Bele lo Eeya, tulusi tilumuwotaó wau helo ngaajali mota teto. Toú Tio donggo hemo ngaajali, mongo iimamu taúwa wau mongo taúwa lo Yahudi malonaó mai ode o-Lio wau helohintu, "Pato-patoáa tolo Yió helohutu ngoáamilalo boito? Tatoonu tahe longohi haku boito ole-Mu?"

²⁴ Ti Isa lolametaó, "Waú olo motohilaa mohintu olimongoli. Wau wonu timongoli moó tametai, mapolele-Ú mai olimongoli wolo haku lotatoonu Waú helohutu suáli boito.

²⁵ Tei Yahya helo polihu wolo haku lotatoonu? Lo Allahu Taáala meaanto lomanusia?" Tulusi mongo iimamu taúwa wau mongo taúwa lo Yahudi boito malo dulohupa towolota limongolio, "Wonu polelento maó, 'Wolo haku lo Allahu

Taáala,' Tio mamoloíya, 'Wonu odito yilongola timongoli diila palacaya o-Lio?'

²⁶ Bo wonu polelento maó, 'Wolo haku lomanusia,' ito moohe lotaa dadaata, sababu timongolio ngoáamila hemo nganggapu tei Yahya boito ngotaalio lonabi."

²⁷ Oditolio timongolio malo lametaó, "Diila otaawa lami." Lapataó ti Isa lotahuda maó ode limongolio, "Wonu odito Waú olo diila molele mai olimongoli wolo haku lotatoonu Waú helohutu ngoáamilalo botie."

²⁸ "Botia woloolo mola huhamaamu pasali losuáli botie?" tahuda maó li Isa wumbutio mola. "Woluo tiyamo ngota taówalaó duulota mongo lolái. Tau boito lonaó mota ode walaío tamohuhula wau lolóíya maó, 'Uuti, ponaólo yió mota pokalaja to ilengi lo angguru todulahee botie.'

²⁹ 'Watia diila mohuto,' tametaó lowalaío boito. Bo lapatio maó malo boliólo mola pikiilangilio wau malonaó ode ilengi lo angguru boito.

³⁰ Lapataó tau boito lonaó mota ode walaío taóluolio, wau lolóíya maó suáli u tutuuwauwa, 'Joo, Paapa,' tametaó lowalaó taóluolio boito. Bo tio diila lonaó.

³¹ Naa, towolota lowalaó duulota boito, tatoonu tamaa lohutu kahandaki liyamolio?" "Tamohuhula," tametaó lomongo iimamu taúwa wau mongo taúwa lo Yahudi boito. Yi ti Isa lotahuda maó olimongolio, "Pomalacayalo; Tahi potagia beya wau mongobua suuntali mameimulo mowali pongawaá umati lo Allahu Taáala wolimongoli.

³² Sababu tei Yahya Tamopolihua lonaó mai, wau mai lopotunu maó olimongoli dudelo lo tutumulo u kilahandaki lo Eeya, bo timongoli diila lohuto lomalacaya to pongaa–jaliilio; bo tahi potagia beya wau mongobua suuntali tamalo malacaya olio. Bo eleponu timongoli maloóonto ngoáamilalo boito, timongoli debo diila lolomela pikiilangimu wau diila lomalacaya to Eeya."

³³ "Dungohi maó pohumaya u tuwau botie poli," tahuda li Isa. "Ngotaalio taa ohuúwo lohuta lomulo ilengi lo angguru ngopita. Tio lohutu bala topalitia, wau longaúde huango ode pakaakasi pomitodelo angguru, lapataó malomongu monala podahaalo. Lapataó uito pilopo seuwalio ilengi boito to tahi pokalajawa ilengi, tulusi tio lonaó odelipu wewo.

³⁴ Toú malei dungga sembo polipuwalo hungo lo angguru, taa ohuúwo lohuta boito malolao tahi pomayalio to tahi pokalajawa ilengi boito mota mololimo tayadio.

³⁵ Bo tahi pokalajawa ilengi boito malo heúpai tahi pomayalio lotaa ohuúwo lohuta boito; Tangotalio pilatelio, tawewo pilatelio yila–yilateelo maó, wau tawewo poli hepilaílio wolo botu.

³⁶ Taa ohuúwo lohuta boito luli lolao mota tahi pomayalio wewo lebe ngohuntua wolo tabohulio. Bo timongolio debo hepilo hutulio tutuuwauwa debo odelo tabohulio.

³⁷ Mapulitio taa ohuúwo lohuta boito lolao mota walaío lohihilao ode limongolio. 'Matantu walaúuuú boito mahulumatio mai limongolio,' to pikiilangilio.

³⁸ Bo toú tahi pokalajawa boito loóonto walaó lotaa ohuúwo lohuta boito, timongolio malo loíya ngota timongota, 'Naa, botie tio, ahali lowalisilio. Dulo mapateento tio mate–mateelo maó, alihu mamó tapunto walisanilio!'

³⁹ Yi walaó boito mailaúpio, wau pilomahulio ode bulemengio, tulusi pilatelio yila–yilateelo maó."

⁴⁰ Ti Isa malohintu maó, "Naa, wonu taa ohuúwo ilengi lo angguru boito muli mohualingai wolo umaa pohutuolio to tahi pokalajawa ilengi boito?"

⁴¹ Timongolio lolametaó, "Tantu tio mamomate–mateelo maó tau–tauwalo hileeta boito, tulusi moposeuwa maó ilengi lo angguru boito ode taawewo tamohuto mongohi tayadu tilapulo huta boito ode olio to wakutuulio."

⁴² Yi ti Isa lotahuda maó olimongolio, "Diipo peénta maó timongoli lopobaca u tulatulade todelomo Kitabi? 'Botu udiila ilopomakea lotaa u opongotota mokalaja hudungu malowali botu ulaba–labaalo mopiohu. Uti–utieelo huhutu lo Eeya; donggo boli piohio!'"

⁴³ "Oditolio poótoloma maó," tahuda li Isa, "ngoámila haku odelo umati lo Allahu Taáala mapahuto–Lio monto olemu wau wohi–Lio ode bangusa tuwau tamaa moponaó ngoáamila palenta lo Allahu Taáala.

⁴⁴ [Taa u modehu tobotu boito, mamóántulu; wau taa odeehe lobotu boito, maólihita mowali peaahuó.]"

⁴⁵ Toú mongo iimamu taúwa wau tau–tauwalo Parisi loódungohe pohumaya

li Isa boito, otaawa limongolio deú ti Isa helo tahuda pasali olimongolio.

⁴⁶ Oditolio timongolio lotolopani moheúpa o–Lio. Bo timongolio moohe totaa dadaata, sababu taa dadaata boito hemo nganggapu li Isa ngotaalio lonabi.

22 ¹ Ti Isa luli lotahuda ode taa dadaata wolo lomake pohumaya, tahudaa–Lio,

² "Wonu Allahu Taáala momalenta, owowoluwoalio debo odelo pohumaya botie: Olongia ngota helohutu potihunggu lonika ode walaío talolaí.

³ Olongia boito lopoáhu tahi pomayalio mota lolutulai tau–tauwalo tahe tiloduo ode potihunggu boito. Bo tahe tiloduo boito diila lohuto lonaó mai.

⁴ Lapataó ti onlongia boito luli lopoáhu mota tahi pomayalio wewo. Loíyalio maó olimongolio: 'Potunggula maó ode tau–tauwalo tatiloduo boito: Upohinta to potihunggu malei dapato. Sapi, wau walaó sapiú u pulito mopiohe maíloloto. Ngoáamila malei dapato. Matoduwolo ode potihunggu lonika!'

⁵ Bo tataa–muwaalo tahe tiloduo boito diila lomaduli mai. Timongolio bo lonaó ode kalaja limongolio ngota–ngota

-- tangotaalio lonaó ode halabolulio, tawewolio ode kalaja umopeehu untungi daá;

⁶ wau tawewolio poli helo heúpa tahi pomaya li olongia boito, tulusi lomate olimongolio yila-yilateelo maó.

⁷ Tou ti olongia boito loódungohe suáli boito, tio maloingo daá. Tio malolao suludadulio mota lomate yila-yilateelo maó to tamoomatea mate-mateelo maó boito, wau malomobu kota limongolio.

⁸ Lapataó uito tio malo tiangai tahi pomayalio, tulusi loloíya maó, 'Potihunggu lonika malei dapato, bo tahe tiloduo diila paatuti.

⁹ Ponaólo mota ode dadaa-lalaala daá, wau toduwalo mai tau odaata-daatalo maó ode potihunggu lonika botie.'

¹⁰ Yi tahi pomayawa boito olo malonaó. Timongolio lonaó mota ode dadaa-lalaala daá tulusi longambu mai ngoáamila tahe lodunggaya woli mongolio mola teto, tamopiohe boli tamoleeto. Yi malopolu lomola bantayo lo potihunggu boito lo tahe tiloduo.

¹¹ Lapataó ti olongia boito tilumotaó lodunggaya wolo tahe tiloduwolio. Tio

maloóonto ngotaalio tadiila pakepake pakeyangi lo potihunggu.

¹² Lapataó tio lohintu maó totau boito, 'Sahabati, woloolo mola yió loó tuwotai loú diila pakepake boó lo potihunggu?' Tau boito diilalo lowali lolóíya wolo-wolo.

¹³ Lapataó ti olongia boito lolóíya ode tahi pomayalio, 'Pungua maó oáatio wau uluúlio wau pomahula mota ode bulemengio totambati u modiólomo. Mola teto mawoluo hiyongo wau dutolo.'

¹⁴ Lapataó ti Isa lopoó pulitaó pohumaya boito odie mola, "Ngohuntua tatiliyango, bo wambaó ngoídi táilo tulaota."

¹⁵ Lapataó tau-tauwalo Parisi lonaó lodulohupa peé-peéenta tomimbihu woloolo mola timongolio mowali mopotala li Isa wolo totoonulalo yiyintu.

¹⁶ Yi timongolio malolao to tahiduduá olimongolio odeli Isa peé-peéenta wolo dengolo lota pongawaá lopalatei lei Herodes. Tau-tauwalo boito lolóíya maó odeli Isa, "Paaá Guru, otaawa lami ti Paaá ohilaa motulidu. Ti Paaá malo ngaajali loú juujuru tomimbihu kahandaki lo Allahu Taáala ode manusia, loú diila momandungi boli huhaama lo tatoonu. Sababu ti Paaá diila momilohe tau.

¹⁷ Sababu uito, nte polelea mai li Paaá olami: Moduduá wuúdu lo agamanto, tingga mowali momayali beya odeli Kaisali meaanto diila?"

¹⁸ Otaawa li Isa makusudu limongolio u moleeto boito, touú odito Tio malo tahuda maó, "Wuu tahi munapikia! Yilongola timongoli ohilaa mopotala ola-U?"

¹⁹ Nte pobilohe mai ola-U mato lodoi u pomayali limongoli beya!" Lapataó timongolio longohi maó o-Lio doi talaá ngopita.

²⁰ Ti Isa malohintu olimongolio, "Gambali wau tanggulo tatoonu utie?"

²¹ "Li Kaisali," uali mongolio. Yi ti Isa lotahuda maó olimongolio, "Wonu odito, wohiyalo odeli Kaisali wolo u miliki li Kaisali, wau ode Allahu Taáala wolo u miliki lo Allahu Taáala."

²² Touú timongolio loódungohe tomba-Ngio boito, timongolio lolinggolabe. Yi timongolio malonaó lololaa maó li Isa.

²³ To dulahulo boito, dengolo lota taulo Saduki lonaó mai odeli Isa. Timongolio yito kaumu taóhuhama deú taa mate diilalo mobongu mai.

²⁴ "Paaá Guru," uali mongolio, "Tei Musa helo ngaajali odie: Wonu talolaí ngota

mate, wau tio diila loótapu walaó, wutatio boito mamusi monika wolo jandalio alihu mongohi mai wali ode taa mailate boito.

²⁵ Peéenta woluo tamohutato pitu lota tahi biluloáwa teewe. Tamohuhula lonika, tulusi yilate diila ilowalaó. Yi jandalio tilolaalio maó duólo wutatio.

²⁶ Wutatio boito lapataó yilate olo diila loótapu mai walaó. Suáli u tutuuwauwa boito lowali olo tomongo wutatio taótolulio wau demola taópitulio.

²⁷ Pulitio maó taabua boito olo yilate.

²⁸ Naa, to wakutu taa mate muli bongulo–Lio mai, dile lo tatoonu taabua boito? Sababu pitu–pitu lotaalo malonika wolio."

²⁹ Ti Isa lolametaó, "Timongoli matilala daá, sababu timongoli diila mongalati lo Kitabi, meaanto kawasa lo Allahu Taáala.

³⁰ Sababu wonu bolo taa mate de muli bongulo–Lio mai, diilalo monika timongolio, bo matumumulo odelo malaíkati tosologa.

³¹ Diipo peéenta maó timongoli lopobaca upilo tahuda lo Allahu Taáala pasali lotaa mate muli bongulo–Lio mai? Allahu Taáala lotahuda,

³² 'Waúlo Allahu Taáala lei Abraham, Allahu Taáala lei Isihaka wau Allahu Taáala

lei Yako.' Allahu Taáala boito diila Allahu Taáala lotaa mate. Tio Allahu Taáala lotaa tumutumulo!"

³³ Touú taa dadaata boito loódungohe tombango li Isa, timongolio lolinggolabe daá to pongaajali–Lio.

³⁴ Touú tau–tauwalo Parisi loódungohe deú ti Isa malohutu tau–tauwalo Saduki diilalo loó bisala lolo–lolo, yi malo ambua timongolio.

³⁵ Ngotaalio limongolio, deúito–yito ngotaalio guru lo agama, lohimontala mopotala li Isa lo yiyintu tuwau.

³⁶ "Paaá Guru," loíyaalio, "palenta toonu ulaba–labaalo mopiohu todelomo butoó lo agama?"

³⁷ Ti Isa lolametaó, "Toliánga mola Eeya Allahu Taáalamu wolo lealeaatu lohilaamu, wolo lealeaatu lojiwamu, wau wolo ngoilanggubu lo aakalimu.

³⁸ Ui–uitolo palenta ulaba–labaalo mopiohu wau polohuna daá!

³⁹ Palenta oluolio tutuuwauwa wolo u bohulio boito: Toliánga maó timongotamu debo odelo yió motoliánga batangamu lohihilao.

⁴⁰ Ngoáamila wuúdu lo agama uilohi mai lei Musa wau pongaajali lomongo nabi dadaasali to oluo lopalenta boito."

⁴¹ Touú tau-tauwalo Parisi donggo hiámbua mota teto, ti Isa malohintu olimongolio.

⁴² "Woloolo mola huhama limongoli pasali li Olongia Tamoo-poáhua? Wali mai lo tatoonu Tio?" "Wali mai lei Dauda," tametaó limongolio.

⁴³ "Wonu odito," yilintu maó li Isa, "wolo sababuulio Rohullah longohi potuhata todelomo hilaa lei Dauda molanggula Olongia Tamoo-poáhua boito 'Eeya'? Sababu tei Dauda lolóiya,

⁴⁴ 'Eeya lotahuda ode Eeyaú: potihuloólo to ambahu olowala-Ú, tunggula Waú mohutu maó ngoáamila lawani-Mu taáaluku to ole-Mu.'

⁴⁵ Oditolio wonu tei Dauda mongunte Olongia Tamoo-poáhua boito 'Eeya', yi diila pongalo aakali Tio wali mai lei Dauda."

⁴⁶ Diaaluo penu boli ngotaa maó taloo tameto li Isa. Wau tumulalo mai todulahu boito, diduú maó tabuheli mohintu wolo-wolo to o-Lio.

23 ¹ Lapataó ti Isa lotahuda maó ode taa dadaata wau tahiduduá o-Lio,

² "Guguu-ruwaalo agama, wau tau-tauwalo Parisi loótapu kawasa u motombango makusudu butoée Musa.

³ Sababu uito dungohi wau duduí maó ngoáamila u pilomalentai limongolio. Bo diila maó pohutua wolo u hepohutuo limongolio, sababu timongolio diila hemo ponaó wolo u hepo ngaajali limongolio.

⁴ Timongolio hemohile wolo moóohuú susuu-aliyaalo u mototolo wau hemongohi wuwuu-uduwaalo u hibuuheta, bo penu boli ngoídi maó timongolio diila hipo tulungia tahemo ponaó uito.

⁵ Ngoáamila u hepohutuo limongolio bo wambaó mopobibi totau. Timongolio sangaja momake tali lo potabiaalo u hitaanggala wau mopohayaó lumbai-lumbai lojumba limongolio.

⁶ Timongolio motohilaa tambati umopiohe daá to popoo-tihungguwalo, wau kadela ulaba-labaalo mopiohe to bebee-leyaalo potabiaalo.

⁷ Timongolio sanangi hulumatio lotau to papaa-taliyaalo, wau unteelo 'Paaá Guru'.

⁸ Bo timongoli, diila maó pohuto unteelo 'Paaá Guru' sababu Gurumu bo wambaó ngota wau timongoli ngoáamila mohutato.

⁹ Wau timongoli diila maó pongiibode boli ngota maó todunia botie 'Paapa', sababu ti Paapamu bo ngota, deúito-yito Allahu Taáala limongoli tato sologa.

¹⁰ Wau diila maó pohuto timongoli unteelo 'Taúwa', sababu taúwamu bo ngota, deúito-yito Olongia Tamoo-poahua u pilodanti mai lo Allahu Taáala.

¹¹ Taa u pulito udaá towolota limongoli wajibu mowali watomu.

¹² Taa u mopolaió batangalio mapo dupapalo, wau taa u motidupapa batangalio mapolaiólo."

¹³ "Matopotala timongoli guguu-ruwaalo agama wau tau-tauwalo Parisi! Timongoli wambaó motihutu diila otu-otutuulo maó. Timongoli hemo ngabuto taa u mowali pongawaá umati lo Allahu Taáala. Timongoli lohihilao diila mohuto mowali pongawaá umati lo Allahu Taáala, wau taawewo tamohuto, hetanggua limongoli.

¹⁴ [Matopotala timongoli guguu-ruwaalo agama wau tau-tauwalo Parisi; Timongoli wambaó tamoohutua udiila otu-otutuulo

maó. Timongoli hemo ngaakali tomongo janda wau hemohehu bele limongolio wau u modepuheó u moleeto boito timongoli hemoduá hayahaya. Uito sababuulio hukuumani limongoli de mamo buheetai!]

¹⁵ Matopotala timongoli guguu-ruwaalo agama wau tau-tauwalo Parisi. Timongoli wambaó tamoohutua udiila otu-otutuulo maó! Timongoli helonaó lolami-lamingolo maó lotalango deheto, wau lolontale datahu bo mopowali tau ngota tumuwoto agamamu. Wau lapataó tau boito tumuwoto agamamu, hepilohutu limongoli tio lowali pongowaá lonalaka u poóoluo lebe moleeto woli mongoli lohihilao!

¹⁶ Matopotala timongoli mongo tauwa pitoó! Timongoli hipo ngaajalia odie, 'Wonu tau motadia domi Bele lo Eeya, tau boito diila meitihuto to tadiaalio boito; bo wonu tio motadia domi hulawa todelomo Bele lo Eeya, yi tio meitihuto to tadiaalio boito.'

¹⁷ Timongoli tau-tauwalo mohulodu wau pitoó! Toonu ulebe polohuna daá; hulawalio, meaanto Bele lo Eeya u mopowali maó hulawa boito mantali?

¹⁸ Timongoli helo ngaajali maó utie olo, 'Wonu ngotaalio motadia domi mesba, tau boito diila meitihuto to tadiaalio; bo wonu tio motadia domi dewo toitaato mesba boito, tio meitihuto wolo tadiaalio boito.'

¹⁹ Mailaba pitoío limongoli! Toonu ulebe polohuna daá? Dewolio meaanto mesba u mopowali maó dewo boito mantali?

²⁰ Sababu uito, wonu ngotaalio motadia domi mesba, uito boliilio tio motadia domi mesba, wau domi ngoáamila dewo uwoluo toitaatio.

²¹ Wau wonu ngotaalio motadia domi Bele lo Eeya, uito boliilio deú tio motadia domi Bele lo Eeya boito, wau domi Allahu Taáala tabilu–biluloáa teto.

²² Wau wonu ngotaalio motadia domi sologa, uito boliilio tio motadia domi tambati biluloá lo Eeya, wau domi Allahu Taáala tahulo–huloáa tambati biluloá boito.

²³ Matopotala timongoli guguu–ruwaalo agama wau tau–tauwalo Parisi! Timongoli wambaó tamoohutua udiila otu–otutulo maó. Ramba–ramba debo odelo solasi, denggu–denggu, wau boli jinta, hewohi limongoli ngotayade mopululio ode Eeya. Lebe–lebe pomaó susuu–aliyaalo u

polohuna daá todelomo bubuu-toówaalo agama, debo odelo humayaalio: Uáadili, laasa toliángo wau otatapu wau molotolo hilao, diila padulio limongoli. Lebe-lebe pomaó ui-uitolo u patutilio pohutuo maó limongoli, loú diila momalongo uwewolio olo.

²⁴ Timongoli mongo taúwa pitoó! Lango todelomo minumani limongoli tapisio limongoli, lebe-lebe pomaó unta toloolo limongoli!

²⁵ Matopotala timongoli guguu-ruwaalo agama wau tau-tauwalo Parisi! Timongoli wambaó tamoohutua udiila otu-otutulo maó. Mamaa-nggowalo wau pipii-nggeyalo limongoli heiluheta limongoli lobebe-belesilo maó towimbihu bulemengio, hiambola towimbihu delomio mokootolo daá wolo susuu-aliyaalo uilotapu limongoli wolo pakusa wau langgamu.

²⁶ Parisi pitoó! Wuloipo mobebe-belesilo maó towimbihu delomio lo mamaa-nggowaalo wau pipii-nggeyaalo limongoli, alihu towimbihu bulemengio mowali belesi olo!

²⁷ Matopotala timongoli guguu-ruwaalo agama wau tau-tauwalo Parisi! Timongoli

wambaó tamoohutua udiila otu-otutuulo maó! Timongoli debo odelo kukuu-buluwaalo uilamahe loú moputió; to bulemengio oontonga mopiohu, bo todelomio polupolu lotulalo wau ngoáamilalo u hihuutode.

²⁸ Odito olo timongoli. Monto bulemengio timongoli oontonga lotau mopiohu; bo todelomio, timongoli polupolu loú paaluti wau hipo lambangawa wuúdu."

²⁹ "Matopotala timongoli guguu-ruwaalo agama wau tau-tauwalo Parisi! Timongoli wambaó tamoohutua udiila otu-otutuulo maó! Timongoli helomongu kukuu-buluwalo u mopiohe duólo mongo nabi, wau helo podadai tutuu-guwaalo poéela lotaa tutumulio mopiohe.

³⁰ Wau timongoli hipo loíyawa, 'Humayaalio ami tumutumulo tomaasa linenemoya lami muloololio mai, ami diila tamoduduá olimongolio helomate mongo nabi yila-yilatelo maó.'

³¹ Oditolio timongoli hipongakua lohihilao deú timongolilo wali mai lotau-tauwalo tahe lomate yila-yilaatelo maó tomongo nabi!

³² Wonu odito, potolongalo mola wau poólapatalo duduu–sawaalo u matilumula linenemoya limongoli boito

³³ Timongoli hileeta wau wali mai lotaa moleeto! Woloolo mola timongoli mowali mopoáahu batanga limongoli lohihilao monto hukuumani tonalaka?

³⁴ Dungohilo tióotutua: Waú mamolao mai olemu mongo nabi, tau–tauwalo molinepo, wau guguu–ruwaalo; ngatayadi mongolio mapatee limongoli mate–mateelo maó, wau ngotayade wewolio mapakua limongoli to ayu saalipu. Woluo taposikisa limongoli to bebee–leyaala potabiaalo, wau poheheenela limongoli monto kota tuwau ode kota uwewo.

³⁵ Sababu uito, timongoli mamooótapu hukuumani sababu polomatea yila–yilateelo maó u hepilohutu limongoli ode ngoáamila taadiila ototala tumulalo mai polomatea yila–yilateelo maó olei Habel tadiila ototala tunggula polomatea yila–yilateelo maó olei Jakaria walaée Berekhya, tapilate limongoli yila–yilateelo maó towolota Bele lo Eeya wau mesba.

³⁶ Pomalacayalo: ngoáamilalo boito mabantaa lotau–tauwalo tojamani botie!"

³⁷ "Yerusalemu, Yerusalemu! Mongo nabi pilatemu yila–yilateelo maó. Mongo utolia lo Allahu Taáala hepilaímu lobotu tunggula yilate. Demaa poóngolo Waú ohilaa momuduó ngoáamila tuango lipumu odelo tiilo maluó modaha walaño to walungo polipiño, bo timongoli diila mohuto!

³⁸ Sababu uito Allahu Taáala diilalo peé–peéenta wolemu.

³⁹ Ototai maó; tumulalo mai botia yió diilalo moóonto ola–Ú tunggula yió mamoloíya, 'Mabala–balakatilo Tio tadungga–dungga mai to tanggulo Eeya.'"

24 ¹ Toú ti Isa lololaa maó Bele lo Eeya, tahiduduá o–Lio lonaó mai ode o–Lio wau helolunu mota huhuu–dunguwaalo Bele lo Eeya boito.

² Ti Isa lotahuda maó ode limongolio, "Wolo timongoli moóonto mota ngoáamilalo boito? Ototai maó, diaaluo penu boli botu ngobotu monto huhuu–dunguwaalo boito mameitolaa susuusungi to tambatilio. Ngoáamilalo mapo lohubuwo." "

³ Lapataó ti Isa lonaó mola ode Huludu Jaitun, wau toú Tio donggo hulohuloáa, tahiduduá o–Lio lonaó mai lobiisalawa

tutuuwau bo wambaó wolo batanga-Lio. "Polelea mai ode mongowatia omolua ngoáamilalo boito mamotoduo," uali mongolio o-Lio. "Tutuuotio wolo umamo póilaalo podudungga mai li Paaá wau pulito lojamani?"

⁴ Ti Isa lolametaó, "Poódahai maó, diila bolo o aakalialio timongoli.

⁵ Sababu ngohuntua tau mamonaó mai loú momake tanggulu-Ú wau moloíya, 'Waúlo Olongia Tamoo-poáahua!' Timongolio mamongakali totaa dadaata.

⁶ Timongoli mamooó dungohe titii-ngoheyalo polotuuhua wau hahaa-baliyaalo lopopaatea, bo diila maó oohe. Sababu susuu-aliyaalo boito musi motoduo mai, bo uito diila oboliilio deú mawakutuulio kiama.

⁷ Bangusa u tuwau mamopaatea moluwali bangusa uwewo, wau lipu u tuwau mamoluhu lipu uwewo. Boli toútoonu maódungga lo polobiti wau liluhu.

⁸ Ngoáamilalo boito boheli bohulio, debo odelo ngongoto u olaasawa lo taabua ngota toú tio mamotutu mai.

⁹ Lapataó timongoli mawaúpolio wau wuduwolio u sikisaalo wau pateelio mate-mateelo maó. Ngoilanggubu dunia

mamo lonuí mongoli sababu timongoli muri-Ú.

¹⁰Toú boito ngohuntua tau momaahe iimani, wau mohiyanati wau mololoonuá ngota-timongota.

¹¹Dadaata mongo nabi paaluti malumenetai, wau mamo ngaakali taa dadaata.

¹²U moleeto mamoloópo boli touútoonu odito hebatilio tilinggula dadaata taa diilalo mototooliánga.

¹³Bo tamoó tahangi demola pulitio, mapo aahuwolo.

¹⁴Wau Habari Mopiohe pasali loú woloolo mola Allahu Taáala momalenta mapo habariyolo to ngoilanggubu dunia, alihu ngoáamila tau mamooó dungoheó. Lapataó uito deúito meidungga mai kiama."

¹⁵"Timongoli mamooónto 'Ololeeto u mongantulu', debo odelo uilóiya mai li Nabi Daniali, tihutihula totambati u mantali. (Toloéela ode tamopobaca: Poótuoti maó wolo boliilio!)

¹⁶Toú boito, taa u Yudea mamusi tumeteó mola ode hihuí-huídea.

¹⁷Taa u towatopo bele diila maó polaahe mola mohama u hitua-tuawua monto delomo bele.

¹⁸Taa u mota to halabolu diila maó pohualingai mohama jumbalio.

¹⁹Otutu moótihela hapato duduu–laheyaalo boito duólo taabua ombodaá, wau tiilo tadonggo hemo potutu lowalaó taúnge!

²⁰Poduáalo mola alihu timongoli diila bolo tumeteó to polodidi meaalo todulahu Saabati!

²¹To duduu–laheyaalo u moótihela hapato boito mawoluo mai sikisaa daá debo odelo diipo peéenta maó lowali tumulalo mai bohulo dunia tunggula tosaaáti botie, wau madiilalo motoduo mai poli.

²²Humayaalio Allahu Taáala diila mopolimbuó wakutuulio; yi diaaluo boli ngota maó tamoáahu. Bo sababu umati–Lio, Allahu Taáala mopolimbuó maasa boito.

²³Toú boito wonu woluo tahingota–ngotaawa molóiya olimongoli 'Bilohi, Olongia Tamoo–poáahua boito woluo teaa!' meaanto 'Tio woluo teto!' -- diila maó palacayai tau boito.

²⁴Sababu malumenetai tahi poáahua paaluti wau mongo nabi paluti. Timongolio mamokalaja maó totoonulalo

huhutu upolu–pulutuo wau momoo–linggolabewalo, wonu mowali, umati lo Allahu Taála olo.

²⁵ Oditolio, poótoloma maó! Waú malo poótaa mai olimongoli leimulo tou suáli boito diipo motoduo mai.

²⁶ Wonu tau moloíya olimongoli, 'Bilohi, Tio maito mola teto tohuta datahu u luasi daá wau delita!' -- timongoli diila maó ponaó mola odito. Meaalo wonu timongolio moloíya, 'Bilohi, Tio tuutuó tea todelomo huwali!' -- diila maó palacayai.

²⁷ Sababu podudungga mai lo Walaó Manusia debo odelo tinelo ilato puka–pukaái monto tiimulu, wau motinelo demola otolopa.

²⁸ Touútoonu opate, teto olo obulungi mongongaala patelio."

²⁹ "Diila mohiheo lapatio maó lou suusa tomaasa boito, mato lodulahu mamowali modiólomo, wau hulalo diilalo motinelo. Popoo–liyamaalo mamodulahu monto hulungo, wau tahi kawasawa mola tobaangio daá mamo aáa–mbulatia daá.

³⁰ Lapataó uito tuoto lo Walaó Manusia maóontonga mola tohulungo. Tou boito ngoáamila bangusa todunia

mahumoyongo. Timongolio mamoo'onto Walaó Manusia dungga–dungga mai toitaato heengo wolo kawasa wau omumulia uleidaá.

³¹ Tolompeti leidaá mapo tingohulio, wau Walaó Manusia mamopoáhu maaaa–laíikati–Lio mongambu umati–Lio monto opato dulungo dunia, monto huudu hulungo u tuwau demola huudu hulungo uwewo."

³² "Hamaa maó pongaajali monto bungo lo ayu ara. Wonu tangolio ukekeeí moidu wau moluóyo, wau mahi tumbinga mai, otaawa limongoli deú sembo lopolu dulahee malembidei.

³³ Odito olo wonu timongoli mamoo'onto susuu–aliyaalo boito motoduo mai, otaawa limongoli deú wakutuulio malembidei daá.

³⁴ Ototai maó! Susuu–aliyaalo boito mamotoduo mai tou diipo tau–tauwalo tahitumula masaatia botie mateepo ngoáamilalo.

³⁵ Hulungo wau dunia mamooli, bo tahuda–Ú debo ohiheo–hiheolo maó."

³⁶ "Diaaluo tamotota omolua dulahio wau jamulio, maaaa–laíikatiyalo tosologa olo diila motota, Walaó Allahu Taáala olo diila, bo wambaó Allahu Taáala tamotota.

³⁷ Wonu bolo Walaó Manusia demei dungga, owowoluwoalio debo odelo tomaasa lei Noho toú muloololio mai.

³⁸ To duduu–laheyaalo toú diipo taluhee daá boito tau–tauwalo hipolamela hipongiluma, wau hiponikawa. Odi–odieelo mola mololaalaaita tunggula todulahee tei Noho tilumuwoto ode delomo kapali.

³⁹ Toú taluhee daá boito helo lemba olimongolio ngoáamila, deúito timongolio longalati wolo udonggo todutoduo. Odi–odieelo mola olo owowoluwoalio de wonu Walaó Manusia meidungga mai.

⁴⁰ Toú boito, duulota tadonggo hemo kalaja to halabolu: Ngotaalio madeloolio, wau ngotaalio poli matolaalio maó.

⁴¹ Taabua duulota donggo hemo hilinga pale: Ngotaalio madeloolio, wau ngotaalio poli matolaalio maó.

⁴² Oditolio, poódahailo maó, sababu diila otaawa limongoli omolua Eeya limongoli mamei dungga.

⁴³ Poótoloma maó utie! Humayaalio otaawa lotaa ohuúwo lo Bele jamu ngoolo toú hui tamo taówa mamei dungga mai, tio diila tamotuluhu, alihu tamotaówa boito diila tumuwoto ode delomo belelio.

⁴⁴ Sababu uito, timongoli olo musi mopoódaha-dahaalo maó. Sababu Walaó Manusia mamei dungga mai tosaaáti udiila helantobu limongoli."

⁴⁵ Tahuda li Isa poli, "Wonu odito, tamoomayawa toonu utatapu wau molotolo hilao wau molinepo? Tio-tiolo tamaa puduó lituanilio mowali taúwa totahi pomayawa wewo, alihu tio mongohi maó uáalo olimongolio to wakutuulio.

⁴⁶ Donggo boli sanangi tutu tio tamoomayawa boito wonu bolo tituanilio muli mohualingai, wau moódungga olio donggo hemo ponaó lo tuugasilio.

⁴⁷ Pomalacayalo, tituani boito mamopo palacaya maó ngoáamila halataalio to tamoomayawa boito.

⁴⁸ Bo wonu tamoomayawa boito moleeto, tio mamoloiya todelomo hilaalio,

⁴⁹ 'Tuani watia donggo mohiheo bolo mohualingai,' tulusi tio mamomate tahi pomayawa wewo, wau molamela mongilu wolo tahi huwoáalo.

⁵⁰ Lapataó tituanilio mamuli mohualingai todulahee wau jamu udiila helanto-lantobulo.

⁵¹ Yi tamoomayawa boito mawumbadelio mongo-mongongotolo maó lituanilio,

wau mapo mahulolio ode tambati lotahi munapikia. Timongolio mahumoyongo wau modutolo mola teto."

25 ¹ "Wonu bolo Walaó Manusia meidungga mai odelo Eeya, owowoluwoalio debo odelo todelomo pohumaya botie: Mopulu lota mongo dulahu helo lunuhe libulentiti. Ngota-ngota helohama tohe, tulusi mota lolutulai bulentiti laí.

² Limo lota limongolio hihuulode, wau limo lota wewolio hitinepa.

³ Limo lota mongo dulahu tahi huulode boito malodelo mai tohe, bo diila lopo dapato yinulo.

⁴ Limo lota mongo dulahu tahi tiinepa lodelo mai tohe wau peé-peéenta lopo dapato yinulo.

⁵ Tibulentiti laí boito yilanggali mai, tou odito mongo dulahu boito malo diduto tulusi leituluhu.

⁶ Tomutaó louhui, bolo dungo-dungohei sua wuwaatiá 'Tibulentiti laí dungga-dungga mai! Dulo botulaa mai tio!'

⁷ Mongo dulahu mopolu lota boito malobongu, wau lopoléitaó tohe limongolio.

⁸ Mongo dulahu tahi huulode boito, malo loíya ode tahi tinepa boito, 'Wohia mai olami yinulomu ngoídi, sababu tohe lami mawimbideó mate.'

⁹ 'Diila mowali!' tametaó lomongo dulahu tahi tinepa boito, sababu ito ngoáamila bolo didu otuheeta loinulo. Ponaólo mota motali to toko.

¹⁰ Yi mongo dulahu tahi huulode boito malonaó mota lotali mai yinulo. Tou timongolio lopalutaó, malei dungga mai tibulentiti láí. Mongo dulahu limo lota tamaa hidapata boito tilumuwoto peé-peéenta woli bulentiti láí ode tambati lo potihunggu, wau huhebu mahileútio mai!

¹¹ Lapataó mongo dulahu wewolio boito malei dungga mai, Timongolio hipo ngiibode, 'Tuani, Tuani, huói mai huhebu olamiaatia'.

¹² Bo tibulentiti láí boito malo lametai, 'Wau diila moótaawa woli mongoli.'"

¹³ Tulusi ti Isa lopoó pulitaó pohumaya-Lio boito odie, "Masababu uito poódaha-dahaalo maó, sababu diila otaawa limongoli dulahio meaalo jamulio."

¹⁴ "Wonu bolo Walaó Manusia meidungga mai odelo Eeya, owowoluwoalio olo debo

odelo pahumaya botie. Talolaí ngota ohilaa monaó ode tambati u molamingo. Tio malo tiangai tahi pomayalio, tulusi pilo malacayalio maó halataalio to limongolio.

¹⁵ Ode timíidu tamoomayawa boito yilohialio moduduá u omamboa limongolio ngota-ngota. Ode ngotaalio yilohialio limo lolihu doi hulawa. Ode tawewo yilohialio dulo lihu doi hulawa. Wau ode tadonggo ngotaalio poli yilohialio ngoliu doi hulawa. Tulusi tio malo monggato.

¹⁶ Tamoomayawa u lololimo limo lolihu doi hulawa boito lato lonaó mota lodaahangi, lapataó luli ilopaéeda mai limo lolihu doi hulawa.

¹⁷ Odito olo tamoomayawa u lololimo dulo lihu doi hulawa boito luli ilopaéeda dulo lihu.

¹⁸ Bo tamomayawa u lololimo ngoliu doi hulawa boito mota longaliáa huango tohuta, tulusi doi lituanilio tiluuño teto.

¹⁹ Lohiheo daá lapatio maó, tituani lotahi pomayawa boito luli lohualingai, wau malo leekenia woli mongolio.

²⁰ Tamoomayawa u lololimo limo lolihu doi hulawa boito malonaó mai, wau lohudu maó mopulu lolihu. 'Tuani,' loíyaalio maó,

'Ti Tuani malohudu mai limo lolihu doi hulawa odelaatia. Bilohilo maó, watia maílo paeeda poli limo lolihu.'

²¹ 'Ooó,' uali tuani boito, 'Yió tamoomayawa mopiohe wau tatapu molotolo hilao. Sababu yió mowali palacayalo toú ngoídi, yi u dadaata olo debo mapo malacayaú mai olemu. Tuwotai wau dulo motisanangi wolaú!'

²² Lapataó tamoomayawa u lololimo dulo lihu doi hulawa boito malonaó mai, wau lolóiya maó, 'Tuani, ti Tuani malohudu mai dulo lihu doi hulawa olaatia, bilohilo maó, watia mailo paéeda dulo lihu poli.'

²³ 'Ooó,' uali tuani boito 'Yió tamoomayawa mopiohe wau tatapu molotolo hilao. Sababu yió mowali palacayalo toú ngoídi, u dadaata olo debo mapo malacayaú mai olemu. Tuwotai wau dulo motisanangi wolaú!'

²⁴ Lapataó tamoomayawa u lololimo doi hulawa ngolihi boito malonaó mai, wau lolóiya maó, 'Tuani, otaawa laatia ti Tuani ngotaalio lo taópiili diila gambangi mobolió. Ti Tuani hemolipu hungo diila totambati u pilomuloa li Tuani, wau hemo himoáa tilapulo totambati udiila pilo muáyade bili li Tuani.

²⁵ Watia moohe, oditolio watia maloluuó doi li Tuani todelomo huta. Utie doi li Tuani.'

²⁶ 'Yiό tamoomayawa u moleeto wau lantingalo!' Uali tuani boito. 'Tingga otaawamu deú waú hemolipu hungo diila totambati u pilomulowaú, wau hemohama tilapulo totambati udiila pilo muáyadeú?

²⁷ Wonu odito, patutilio tahuwomu maó doiú boito tobangi, alihu toú waú muli mohualingai, mamuli motapuú doiú boito wolo lentelio.

²⁸ Sababu uito, hamaawa mai doi boito monto olio, wau wohia maó ode taa u omopulu lihu doi hulawa boito.

²⁹ Sababu taa u mailoluo, mamooótapu lebe dadaata maó, wau tio maólebealio. Bo taa u odiaaá, ngoídi udonggo woluo to olio mahamaalo olo.

³⁰ Wau tamoomayawa tadiila ohuna boito, pomahulalo ode delomo u modiólomo to bulemengio. Mola teto tio mahumoyongo wau modutolo!"

³¹ "Wonu bolo Walaó Manusia meidungga odelo Olongia dedeelo mai wolo ngoáamila malaíkati-Lio, Tio mamo tihuloáa toitaato tambati huhuloaa-Lio u lailaió.

³² Ngoáamila bangusa maámbuo–Lio totalu–Lio. Lapataó Tio mamopo walaheó olimongolio mowali dulo polemboá debo odelo diti mopo walaheó himba monto batade.

³³ Tau–tauwalo tahi pohutua kahandaki lo Allahu Taáala maámbuo–Lio to ambahu olowala–Lio, wau tawewo to ambahu oloihi–Lio.

³⁴ Lapataó ti Olongia boito mamo tahuda ode tau–tauwala to ambahu olowala–Lio, 'Duloolo timongoli tabilaa–katia li Paapa–Ú. Tuwotolo mai ode delomo Yiladia u piloheetu olemu tumulalo mai tobohulo dunia.

³⁵ Sababu tou Waú pola–polango, timongoli longohi ola–Ú uáalo, wau tou Waú mototoángo timongoli longohi ola–Ú uilumolo. Waú tau deli ngota, timongoli lololimo ola–Ú tobele limongoli.

³⁶ Waú diila oboó, timongoli longohi ola–Ú boó. Waú mongongoto, timongoli lolaawati ola–Ú. Waú tilutupalio, timongoli lotulungi ola–Ú.'

³⁷ Lapataó tau–tauwala boito mamoloíya, 'Eeya, omolua mongowatotia peéenta loóonto to Eeya pola–polango tulusi mongowatotia longohi to Eeya uáalo

meaalo mototoángo tulusi mongowatotia longohi to Eeya uilumolo?

³⁸ Omolua mongowatotia peéenta loóonto to Eeya odelo tau deli, tulusi mongowatotia lololimo maó ode delomo bele lomongo watotia? Omolua Eeya peéenta diila oboó tulusi mongowatotia longohi to Eeya boó?

³⁹ Omolua mongowatotia peéenta loóonto to Eeya mongongoto meaalo tilutupalio, tulusi mongowatotia lotulungi to Eeya?'

⁴⁰ Ti Olongia boito mamó lametai, 'Ototai maó: toú timongoli mohutu maó suáli boito, eleponu ode tala ngota lomongo wutatu–Ú taahina daá, boliilio maó timongoli malohutu uito ode ola–Ú!'

⁴¹ Lapataó ti Olongia boito mamó tahuda maó ode tau–tauwala to ambahu oloihi–Lio, 'Pohinggilo maó monteea tamoleeto daá! Tuwotolo mota ode tulu udiilalo mate, u mapilohetu ode Ibilisi wau maaaa–laíkatilio!

⁴² Sababu toú Waú pola–polaango timongoli diila longohi ola–Ú uáalo; toú Waú mototoángo timongoli diila longohi ola–Ú uilumolo.

⁴³ Waú tau deli ngota, timongoli diila lololimo ola-Ú todelomo bele limongoli. Waú diila oboó, timongoli diila longohi ola-Ú boó. Waú mongongoto wau tilutupalio, timongoli diila lolaawati ola-Ú.'

⁴⁴ Lapataó timongolio mamolóiya o-Lio, 'Eeya, omolua mongowatotia loóonto to Eeya pola-polaango meaalo mototoángo, meaalo odelo tau deli ngota, meaalo diila oboó, meaalo mongongoto, meaalo tilutupalio, wau mongowatotia diila lotulungi to Eeya?'

⁴⁵ Ti Olongia boito mamó lametaó, 'Ototai maó: toú timongoli diila mohuto motulungi tala ngota taahina daá botie, uito boliilio timongoli diila mohuto motulungi ola-Ú.'

⁴⁶ Yi tau-tauwalo boito mahukuu-maniyolo wolo hukuumanu u ohiheo-hiheolo maó, hiambola tahi pohutua kahandaki lo Allahu Taála mamó toduo tutumulo ututulio tutu wau ohiheo-hiheolo maó."

26 ¹ Toú ti Isa yilapato longajali maó ngoáamila suáli boito, Tio malo tahuda ode tahiduduá o-Lio,

² "Maótaawa limongoli donggo duuhui mola Dulahu Buka Paska, wau Walaó Manusia mawuduolio u salipuolio!"

³ Touú boito mongo iimamu taúwa wau mongo taúwa lo Yahudi hiámbua totambati bele biluloá saaha li iimamu Daá Kayapas.

⁴ Timongolio loheeluma u moheúpa li Isa loú tutuuó wau momate o-Lio mate-mateelo maó.

⁵ "Bo," uali mongolio "Diila maó pohutuwole suáli boito touú olameyangi, sababu bolo tumoodei tolonggalo towolota lo ulipu."

⁶ Touú ti Isa to Betania, tobele lei Simon tamuloololio mai ongongoto lo alipo u moóti hela hapato,

⁷ taabua ngota lonaó mai odeli Isa. Tio lodelo buutulu lo puwalamu moputió, tuatunga yinulo moonu u mahale. Touú ti Isa donggo hulo-huloáa hemo lamela, taabua boito malo luwataó yinulo moonu boito to lunggongi Isa.

⁸ Tahiduduá li Isa loóonto u lotoduo boito maloingo. "Wolo hunalio ngoáamilalo botie poloo-yaliyolo?" loíya maó limongolio.

⁹ "Yinulo moonu boito mowali potali mota wolo halaga u molonggato, wau doilio wohi maó ode taa mosikini!"

¹⁰ Otaawa li Isa pikiilangi limongolio, tulusi Tio malo tahuda, "Yilongola timongoli mopoó suusa taabua botie? Tio malohutu tuwaulio u mopiohe wau pujipuji de ola-Ú.

¹¹ Taa mosikini laito woluo towolota limongoli, bo Waú diila laito woli mongoli.

¹² Louú moluwataó yinulo moonu boito ode batanga-Ú, tio mopo dapato u polobungalo ola-Ú.

¹³ Pomalacayalo! To ngoilanggubu dunia, boli touútoonu Habari Mopiohe monto Allahu Taáala pololadulo, wau huhutu lotaabua botie masilitaalio olo odelo poéela de olio."

¹⁴ Lapataó ngotaalio lo tamopulaa duulota tahiduduá li Isa, táilunte Yudas Iskariot, lonaó mola ode mongo iimamu taúwa.

¹⁵ Tio loloiya maó ode limongolio, "Wolo u mawohi limongoli olaatia wonu watia mamohudu mai li Isa ode limongoli?" Yi timongolio malo lekeni tolo pulu doi talaá, wau yilohilio maó doi boito olio.

¹⁶ Tumulalo mai toú boito tei Yudas helohima potaala ohiyango mopiohe u mohiyanati li Isa.

¹⁷ Tobohulo dulahu todelomo Lameyangi lo Roti Diila Oragi, tahiduduá li Isa lonaó mai ode o–Lio. Timongolio mai lohintu, "Toútoonu otohilaa li Paaá podapato maó lamiaatia uáalo Paska odeli Paaá?"

¹⁸ Ti Isa lolametaó, "Ponaólo mola ode tahingota–ngotaawa tokota wau loíya maó olio, 'Tahuda mai li Paaá Guru, malei dungga wakutuulio ola–Ú; Waú ohilaa mopolame maó Paska tobelemu peé–peéenta wolo tahiduduá ola–Ú.'"

¹⁹ Tahiduduá li Isa malohutu wolo upilo ahulaó li Isa olimongolio. Timongolio mola lopo dapato maó uáalo Paska boito.

²⁰ Toú mahui mai ti Isa wau tamopulaa duulota tahiduduá o–Lio malo tihuloáa lolamelo.

²¹ Toú timongolio donggo hipolamela, ti Isa lotahuda maó, "Dungohi: ngotaalio limongoli mamó hiyanati ola–Ú."

²² Loódungohe uito, tahiduduá li Isa mahi suukalia daá. Tulusi timongolio, ngota–ngota malohintu li Isa, "Tantu diila watia tahe makusuduo li Paaá?"

²³ Ti Isa lolametaó, "Tamo polomo roti todelomo manggo peé–peéenta wola–Ú, tio–tioolo tamamo hiyanati ola–Ú.

²⁴ Memangi Walaó Manusia maamate debo odelo u tulatulade todelomo Kitabi. Bo matopotala taa u mohiyanati Walaó Manusia! Lebe mopiohu tau boito wonu tio diila pilotutulio mai sama–samaata!"

²⁵ Lapataó tei Yudas tamoo–hiyanatia boito lolóiya, "Tantu diila watia tahe makusuduo li Paaá Guru?" Ti Isa lolametaó, "Odi–oditolo loíyamu!"

²⁶ Tou timongolio mamo lamelo, ti Isa lohama maó roti, lapataó lolapali mola duá sukuru. Lapataó Tio lomita–mitanga roti boito wolo uluú–Lio tulusi yilohi–Lio ode tahiduduá o–Lio wau lotahuda, "Hamaawa wau tamelalo; uti–utieelo batanga–Ú."

²⁷ Lapataó uito Tio malohama hakati tuwau lo angguru, tulusi lolapali mola sukuru ode Allahu Taáala. Lapataó yilohi–Lio hakati boito ode tahiduduá o–Lio, wau lotahuda, "Pongilulo, timongoli ngoáamila,

²⁸ Sababu uti–utieelo duhu–Ú u moposaaha daantia lo Allahu Taáala -- duhu u hiluwato duólo taa dadaata u pongambungualo dusa limongolio.

²⁹ Pomalacayalo; Waú diilalo mongilu angguru botie poli tunggula Waú mamongilu angguru bohu peé-peéenta woli mongoli to Dunia Bohu li Paapa-Ú."

³⁰ Lapataó timongolio lopolahu mola lahu tuwau póilaalo momuji. Wau lapataó uito timongolio lonaó mola ode Huludu Jaitun.

³¹ Lapataó ti Isa lotahuda maó ode tahiduduá o-Lio, "Toú huilo botie timongoli ngoáamila matumeteó mololaa maó ola-Ú; sababu todelomo Kitabi tulatulade: Allahu Taáala lotahuda, 'Waú mamomate-mateelo maó diti boito, wau himbala lohimbalió mamo bubuuálawa.'

³² Bo toú Waú mamuli bongulo-Lio mai, Waú mamo timulo woli mongoli ode Galilea."

³³ Tei Petrus malo loíya odeli Isa, "Penu ngoáamila tawewolio mololaa maó li Paaá, watia sama-samaata diila!"

³⁴ "Eelai maó," tahuda li Isa olio, "Toú huilo botie, toú maluó diipo mokukuyuú, yió mapoóotolu lomaaha ola-Ú."

³⁵ Tei Petrus lolametaó, "Eleponu watia musi mate peé-peéenta woli Paaá, watia diila tamoloíya deú watia diila moótaawa woli Paaá!" Wau ngoáamila tahiduduá wewolio helo loíya odito olo.

³⁶ Lapataó uito ti Isa lonaó wolo tahiduduá o–Lio ode tambati tuwau u ilunte Getsemani. Mola teto, Tio lotahuda maó olimongolio, "Potihuloópo tewe tou Waú donggo mota moduá."

³⁷ Tulusi Tio lotiango olei Petrus wau taduulota walaée Jebedeus lonaó peé–peéenta wo–Lio. Tio masiluukali wau balisa.

³⁸ Tio lotahuda maó ode tahiduduá o–Lio, "Hilaa–Ú suukali daá, lasaalo debo odelo maamate wambaó. Potitolapo tewe timongoli, wau poduduólo mopoódaha–dahaalo maó wola–Ú."

³⁹ Lapataó ti Isa lonaó mota lebe lolaminga ngopeé, tulusi Tio leidumulo lomola tohuta wau loduá. "Paapa," ua–Lio, "Wonu mowali, polaminga maó monto olaatia sikisa u musi dutola lowatia botie. Bo diila moduduó hilaa lowatia, bo moduduó u tohilaa li Paapa."

⁴⁰ Lapataó uito ti Isa luli lohualingai ode tahiduduá o–Lio toulota wau ilodungaa–Lio timongolio donggo hituluhe. Tio lotahuda maó odelei Petrus, "Bo ngojamu wambaó timongoli toulota diila lopoódaha peé–peéenta wola–Ú?"

⁴¹ Poódaha–dahaalo maó, wau poduálo mola alihu timongoli diila odungga lomalapo. Memangi rohumu ohilaa mohutu u otutu bo diila mambo timongoli, sababu píili lomanusia boito molulupuhu."

⁴² Peéentapo ti Isa mota loduá, loíyaa–Lio, "Paapa, wonu sikisaa botie musí dutola lowatia, wau diila mowali powalahulo, huliala maó utohilaa li Paapa u motoduo mai."

⁴³ Lapataó uito ti Isa luli lohualingai poli, wau ilodungga–Lio tahiduduá o–Lio donggo hituluhe, sababu timongolio modiduto daá.

⁴⁴ Donggo peéentapo ti Isa lololaa maó olimongolio wau u otolulio loduá lolapali tataa–heyaalo u tutuuwauwa.

⁴⁵ Lapataó uito Tio luli lohualingai ode tahiduduá o–Lio wau lotahuda, "Debo donggo hituluhe wau hihuheelia timongoli? Bilohi, malei dungga wakutuulio Walaó Manusia wuduolio ode kawasa lotahi oduusawa.

⁴⁶ Pobongulo, duloolo ito monaó. Bilohi! Taa u mohiyanati ola–Ú malei dungga mai!"

⁴⁷ Tou ti Isa donggo bisa–bisala, tei Yudas, ngotaalio lo tamopulaa duulota

muri–Lio boito lonaó mai. Peé–peéenta wolio, lonaó mai olo dadaata tau tahi delowa wamilo wau ayu pongokoó. Timongolio ilahula mai lomongo iimamu taúwa wau mongo taúwa lo Yahudi.

⁴⁸ Tamoo–hiyanatia malo poótaa olimongolio tuoto botie, "Taadilo lowatia, maa Tiolo taulio. Waúpa Tio!"

⁴⁹ Odito leidungga mota ode tambati boito, tei Yudas lato lonaó maó odeli Isa wau lolóiya, "Salamu, Paaá Guru!" Tulusi diliilio ti Isa.

⁵⁰ Ti Isa lolametaó, "Wutato, mai mongola wutato monaó mai odia?" Lapataó taa dadaata boito lodudulaó, wau loheúpa li Isa.

⁵¹ Tala ngota lomuri–Lio taamota teto woli Isa, lomahuta wamilio wau lolimade wato li iimamu daá tunggula loputu bulongalio.

⁵² Ti Isa lotahuda maó ode muri–Lio boito, "Muli potaúpa mola wamilumu to taúpio, sababu ngoáamila taa u mopohuna lo wamilio maamate wolo wamilo.

⁵³ To lantobumu Waú diila mowali méi tulungi mai li Paapa–Ú, wau Tio wolo molamemeto mamolao mai lebe

loú ngodusingi pasukani suludadu lo malaíkati?

⁵⁴ Bo wonu odito, diila pongalo aakali motoduo mai debo odelo umaa nilubuwati todelomo Kitabi deú memangi musu motoduo debo odelo u masaatia botie?"

⁵⁵ Lapataó ti Isa lotahuda maó ode taa dadaata boito, "Wolo Waú botie tamoleeto, tunggula timongoli lonaó mai hidelowa wamilo wau ayu pongokoó mai moheúpa ola-Ú? Ngohui-ngohui Waú hemo ngaajali to Bele lo Allahu Taáala, wau timongoli diila loheúpa ola-Ú.

⁵⁶ Bo memangi mapatutilio odito alihu mamotoduo wolo u tiluladei lomongo nabi todelomo Kitabi." Lapataó uito, ngoáamila tahiduduá o-Lio tilumeteó lololaa maó li Isa.

⁵⁷ Tahe loheúpa li Isa malodelo mola o-Lio ode bele li limamu Daá Kayapas. Mola teto guguu-ruwaalo agama wau mongo taúwa lo Yahudi mahiámbua.

⁵⁸ Tei Petrus loduduó li Isa lonto u molamingo demota paango lobele li iimamu daá. Lapataó tei Petrus tilumuwoto ode delomo paango boito wau lotihuloáa peé-peéenta wolo tahi pokawalia. Tio

ohilaa motota woloolo mola ngoáamilalo boito de pulitio maó.

⁵⁹ Mongo iimamu tauwa wau ngoáamila Mahakama lo Agama hipo tolopania moótapu sakusi paluti u mowali mopodehu hukuumaní mate odeli Isa.

⁶⁰ Bo diila lotapu limongolio bukuti boli bo tuwau maó eleponu ngohuntua talomaju lowali sakusi yimbulo. Mapulitio maó, woluo duulota talomaju mota ode talu.

⁶¹ Uali mongolio, "Tau botie lolóiya, 'Waú mowali mopo lohuhu Bele lo Allahu Taáala, wau todelomo u tolohui mola mowali muli bongulo–Ú maó'."

⁶² Lapataó ti iimamu daá matilimihulo, wau lolóiya maó odeli Isa, "Yilongola diila tilameta–Mu potuludu u pilotuludio ole–Mu boito?"

⁶³ Boti Isa wambaó lotipoóoyo. Donggo peéentapo ti iimamu daá lolóiya maó o–Lio, "Domi Allahu Taáala tatumu–tumulo, polelea mai olami wolo Yió botie Olongia Tamoo–poáhua, Walaó Allahu Taáala?"

⁶⁴ Ti Isa lolametaó, "Odi–oditolo loíyamu. Bo pomalacayalo: tumulalo mai tosaaáti botie, timongoli mamooóonto Walaó Manusia hulo–huloáa to ambahu olowala

lo Allahu Taáala Taa Laba–labaalo kawasa, wau meidungga mai toitaato heengo tohulungo."

⁶⁵ Yi ti iimamu daá boito malo ngai–ngaidingo boólio, wau lolóiya, "Tio hemomuayo Allahu Taáala! Didu palalu wolo sakusi. Timongoli ngoáamila maloó dungohe lohihilao lóiya u hemomuayo Allahu Taáala.

⁶⁶ Botia woloolo mola huhama limongoli?" Timongolio lolametaó, "Tio maílo totala, wau musu mate."

⁶⁷ Lapataó timongolio lonula maó loiyohu tobaya li Isa, wau lomate o–Lio. Woluo olo tahe lolambali o–Lio,

⁶⁸ wau lolóiya, "Nte lantobe wau polelea mai olami, wuu Olongia Tamoo–poáahua! Tatoonu talo lambali ole–Mu?"

⁶⁹ Tei Petrus donggo hulo–huloáa to bulemengio, topaango. Tala ngota lo tamoomayawa lonaó mai, wau lolóiya olei Petrus, "Diila maa yió olo tapeé–peéenta woli Isa taulo Galilea boito?"

⁷⁰ Bo tei Petrus malomaahe totalu limongolio ngoáamilalo, "Diila otaawaú wolo makusudumu," tametaó lei Petrus,

⁷¹ lapataó tio malonaó mota ode huhebu lopaango. Ngotaalio taabua tamoomayawa

wewo loóonto olei Petrus, wau loloíya maó ode tau–tauwalo mota teto, "Tau botie olo engonti peé–peéenta woli Isa lonto Najaret boito."

⁷² Lapataó tei Petrus luli lomaatheó, wau malotadia. "Otu–otutuulo maó diila otaawaú tau boito!" ualei Petrus.

⁷³ Diila lohiheo lapataó uito, tau–tauwalo tatihi–tihulaa teto malonaó mai odelei Petrus, wau loloíya, "Maatantu yió ngotaalio limongolio. Uito oonuhe daá monto lapalimu."

⁷⁴ Lapataó tei Petrus mahemo taditadia, wau loloíya, "Diila otaawaú tau boito!" To saaátilo boito maluó lokuukuyuú.

⁷⁵ Wau tei Petrus maloéela mola deú ti Isa malo tahuda olio, "Toú diipo maluó mokuukuyuú, yió mapoóotolu lomaathe ola–Ú." Tulusi tei Petrus mailumualaó, wau hilumoyongo loú suukali.

27 ¹ Donggo didimodupo daá, ngoáamila iimamu taúwa wau taúwa lo Yahudi lohutu maó putuusani u momate li Isa mate–mateelo maó.

² Timongolio malo mungu o–Lio, wau lodelo o–Lio, tulusi mola lohudu o–Lio odelei Pilaatu, gubolonulu pamalenta lo Roma.

³ Tou tei Yudas tamoo-hiyanatia boito loóonto deú ti Isa madilehua hukuumaní, maloleé tio. Tulusi tio malo powalingo tolo pulu doi talaá boito ode mongo iimamu taúwa wau mongo taúwa lo Yahudi.

⁴ Tio lolóiya maó, "Watia maílodusa lohiyanati taa diila ototala tunggula Tio hilukuumani yila-yilateelo maó!" Bo timongolio malo lameto, "Pongolaa lami? Uito ulusanimu!"

⁵ Tei Yudas lopo mahulo doi boito ode delomo Bele lo Eeya, tulusi mota lopontayungo batanga.

⁶ Mongo iimamu taúwa malo himoáa doi boito wau lolóiya, "Doi botie doi loduhu. Moduduá butoó lo agama, doi botie diila mowali potuwotolo ode delomo tambati podewowalo to Bele lo Eeya."

⁷ Lapataó tou timongolio malo heeluma, pilomake limongolio doi boito pilotali limongolio huta u ilunte Huta lo Tamoohutua Ulonggo. Huta boito pilomake u polobungalo tahideelia.

⁸ Uitolo sababuulio tunggula todulahee botia huta boito ilunte "Huta Duhu".

⁹ Woleeto, malo toduo wolo uiloíya li Nabi Yeremia, odie, "Timongolio lololimo tolo pulu doi talaá, deúito-yito halaga

u ilakoloa lobangusa Isiraïlu odelo u pilomayali de o-Lio.

¹⁰Wau doi boito pilomake limongolio u pilotali Huta lo Tamoohutua Ulonggo, debo odelo u piloáhu mai lo Eeya de olaú."

¹¹Toú ti Isa mota lotaalua wolei Pilaatu, Gubolonulu lolipu boito, tei Pilaatu malohintu, "Wolo Yió botie Olongia taulo Yahudi?" "Odi-oditolo loíyamu," tametaó li Isa.

¹²Bo toú mongo iimamu taúwa wau mongo taúwa lo Yahudi lopo dudulaó dadaata potuludu odeli Isa, Tio diila lolameto sama-samaata.

¹³Sababu uito tei Pilaatu malo loíya o-Lio, "Wolo diila ilodungohe-Mu ngoáamila u pilotuludi mongolio boito ole-Mu?"

¹⁴Boti Isa diila lolameto boli bo ngotahe maó tilinggula ti Gubolonulu boito lolinggolabe daá.

¹⁵To motíidu Lameyangi lo Paska, ti gubolonulu biasaalio hemo lopato ngotaalio lo tahuku-hukuumani moduduá tulaotio lotaa dadaata.

¹⁶Toú boito woluo ngotaalio tahuku-hukuumani taótaawa lotaa dadaata jahili daá. Tanggulio Isa Barabas.

¹⁷ Oditolio, tou taa dadaata mahiambua, tei Pilaatu lohintu maó olimongolio, "Tatoonu taótohilaa limongoli malopatoú mai olimongoli? Isa Baraabas meaanto Isa taílunte Almasi?"

¹⁸ Tei Pilaatu lolóiya odito sababu otaawalio, deú tahi kawasawa lo Yahudi malohudu mai li Isa olio sababu timongolio mohiihia.

¹⁹ Tou tei Pilaatu donggo hulo-huloáa tohudungu polomutoó, dilelio lolahuli maó utie olio, "Diila maó pouulambohe yió to palakala lotaa diila ototala boito, masababu Tio, waú loó tohiilopo u moótihela hapato todulahee botie."

²⁰ Bo mongo iimamu taúwa wau mongo taúwa lo Yahudi wambaó hemo popatu tulusi totaa dadaata boito u lohile olei Pilaatu alihu tei Barabas lopatolo wau ti Isa hukuumaniyolo mate.

²¹ Lapataó ti gubolonulu boito luli lohintu olimongolio, "To taduulota boito, tatoonu taótohilaa limongoli lopatoú mai olimongoli?" "Tei Barabas," uali mongolio.

²² "Wonu odito, wolo u musi pohutuwoú woli Isa taílunte Almasi?" yilintu lei Pilaatu olimongolio. "Salipuwalo Tio!" uali mongolio ngoáamila.

²³ "Bo ololeeto wolo u pilohutu–Lio?" yilintu lei Pilaatu. Lapataó timongolio tilonggo watió lebe udaá maó, "Salipua Tio!"

²⁴ Pulitio maó tei Pilaatu malongalati deú tio diilalo mowali mohutu wolo–wolo wau deú tau–tauwalo boito tanu mamó malakala. Oditolio tio malohama mai taluhu, tulusi totalu lotaa dadaata boito yilulowalio uluúlio wau loloíya, "Wau diila momanta tau botie mate! Uito uluusani limongoli!"

²⁵ Ngoáamila tau–tauwala boito malo lameto, "Joo, hulilo mai amiaatia wau mongo walaó lamiaatia tamomanta hukuumani to opopate–Lio!"

²⁶ Lapataó tei Barabas yilopatio lei Pilaatu ode limongolio, wau lopoáhu tau lomuboá li Isa; wau lohudu maó o–Lio mota silalipulio.

²⁷ Lapataó mongo pajule lei Pilaatu malodelo mota li Isa tilumuwoto ode bele biluloá li gubolonulu, wau ngoáamila pasukani lotiámbu to palito li Isa.

²⁸ Timongolio malo hinggi boó li Isa, wau lopopake maó o–Lio jumba lailoumu.

²⁹ Timongolio lohutu maó makuta tuwau lonto tango kekeéi oduhi, wau pilopo

hulilio to lunggongi Isa. Lapataó pilopo dihu limongolio tunggudu ngoputu ti Isa to uluú–Lio olowala, tulusi timongolio malo tibonggohu totalu–Lio wau lohenteá o–Lio. "Salamu Olongia Taulo Yahudi!" uali mongolio.

³⁰ Timongolio lonula maó loiyohu o–Lio, tulusi lohama tunggudu boito, lapataó pilo mobohio tolunggo–Ngio.

³¹ Touú mailapato piloitoi mongolio Tio, timongolio malo hinggi jumba lailoumu boito tulusi luli pilopo pake limongolio boó–Lio lohihilao. Lapataó Tio dilelo limongolio ode bulemengio mota silalipulio.

³² Tohuungo dalalo, timongolio lodunggaya wolo ngotaalio lonto Kirene táilunte Simon. Timongolio lomakusa tau boito lomota ayu salipu li Isa.

³³ Lapataó timongolio malei dungga mola ode tambati tuwau u ilunte Golgota, u boliilio, "Tambati lo Bakakau."

³⁴ Mota teto timongolio lopeelu li Isa angguru ula–ulau wolo polu. Bo touú ti Isa lolamitaó angguru boito Tio diila lohuto longilu.

³⁵ Lapataó silalipulio Tio, timongolio malo laya–layade boó–Lio wolo undi.

³⁶ Lapataó uito timongolio malo tihuloáa lodaha o–Lio mota teto.

³⁷ Toitaato lunggo–Ngio tiluladi mongolio potuludu tomimbihu o–Lio odie: "Tabotieelo ti Isa, Olongia Taulo Yahudi."

³⁸ Peé–peéenta wo–Lio silalipu limongolio olo duulota pohehu; ngotaalio to ambahu olowala, ngotaalio poli to ambahu oloihi–Lio.

³⁹ Tahilaode teto hitahalilia, wau hipohinawa li Isa.

⁴⁰ Timongolio hipo loíyawa, "Yió tamamo polohubu Bele lo Allahu Taáala, wau momongu maó todelomo utolo hui! Wonu Yió Walaó Allahu Taáala, polaahulo monto salipu boito wau poáahuwalo lohihilao batanga–Mu!"

⁴¹ Odito olo mongo iimamu taúwa wau guguu–ruwaalo agama wolo mongo taúwa lo Yahudi helo henteá li Isa. Timongolio hipo loíyawa,

⁴² "Tio helo poáahu taawewo, lebe–lebe pomaó batanga–Lio lohihilao diila mowali poáahuwo–Lio! Wonu Tio onlongia lo Isiraílu, opio–piohelio Tio molaabei botia monto ayu salipu boito, deúito ami mapalacaya o–Lio.

⁴³ Tio palacaya to Allahu Taáala, wau hemoloíya deú Tio Walaó Allahu Taáala. Nte, dulo bilohento wolo Allahu Taáala mamopoáahu mai o–Lio botia."

⁴⁴ Mongo pohehu tasilaalipu peé–peéenta wo–Lio boito olo tumbaó helohina o–Lio debo odelo uito.

⁴⁵ Tou dulahee totaú, ngotilonggadu tolo jamu mola, ngoilanggubu lipu boito malo diólomai.

⁴⁶ Jamu tiga lolaango, ti Isa malo nguatiá wolo suala daá–daáalo maó, "Eli, Eli Lama Sabakhtani?" u boliilio, "oo Allahu Taáala, oo Allahu Taáala, yilongola matilolaa lo Allahu Taáala Watotia?"

⁴⁷ Dengolo lota taamota teto loódungohe hunggalaá boito wau hipo loíyawa, "Tio hemo ngiibode olei Elia!"

⁴⁸ Ngotaalio limongolio lolamemeta mota lohama mai bunga patihu, wau pilolomolio todelomo angguru molotingo. Lapataó pilo wunggoío tohuudu lo ayu ngoputu, wau yiludulio mola ode biihu li Isa.

⁴⁹ Bo tau–tauwalo wewo malo loíya, "Yimaipo, dulo bilohento wolo tei Elia monaó mai mopoáahu o–Lio!"

⁵⁰ Lapataó ti Isa luli longuatió wolo suala daá–daáalo maó, tulusi lopulitolo mola napasii–Lio.

⁵¹ Lalante u ntaya–ntayanga todelomo Bele lo Eeya lokaidinga duluo lonto yitaato demola tibawa. Huta hilumuhelo wau huhuu–ideyaalo botu lobutaó.

⁵² Kukuu–buluwaalo lohuó, wau dadaata umati lo Allahu Taáala tamalo poowate luli bilongu–Lio mai.

⁵³ Timongolio lumualai monto kukuu–buluwalo lapatio maó ti Isa mobongu mai monto opopate, wau timongolio tumuwoto mola ode Yerusalemu. Wau mola teto dadaata taa moóonto olimongolio.

⁵⁴ Taúwa lo pasukani peé–peéenta wolo mongo pajule tadonggo hidahawa li Isa mailoohe daá tou loóonto liluhu, wau ngoáamila u lotoduo mai boito. Timongolio hipo loiyawa, "Otutu, Tio botie Walaó Allahu Taáala!"

⁵⁵ Teto woluo olo dadaata mongobua tadonggo hibilohe mai lonto u molamingo. Timongoliolo tahe loduduá li Isa wau lotulungi o–Lio tumulalo mai lonto Galilea.

⁵⁶ To wolotalio yito ti Maria Mahadalena, tiilo lei Yakobus wau tei Yusu, wau tiilo lomongo walaée Jebedeus.

⁵⁷ Toú hui boito malonaó mai takaya ngota lonto Arimatea, tailunte Yusu. Tio olo muri li Isa.

⁵⁸ Tio lonaó mota odelei Pilaatu, wau lohile milate li Isa. Lapataó tei Pilaatu lomalantaó alihu milate li Isa wuduo maó odelei Yusu.

⁵⁹ Yi tei Yusu malohama milate boito, wau lolaputo lowatu lenani u bohu.

⁶⁰ Lapataó pilopo balatio milate li Isa todelomo kuubulu milikiilio lohihilao u pilohutu todelomo huludu botu tuwau. Lapataó uito tio lopo lilideó botudaá tuwau pilo heútio wangopa lokuubulu boito, lapataó lonaólo.

⁶¹ Ti Maria Mahadalena wau ti Maria wewolio bolo hulo-huloáa mota teto tataalua wolo kuubulu boito.

⁶² Loloombulio mola, todulahu Saabati, mongo iimamu taúwa wau tau-tauwalo Parisi lonaó peé-peéenta mola lotaalua wolei Pilaatu,

⁶³ wau lolóíya, "Tuani, maílo eela mola lamiaatia toú tamoo-himbuloa boito donggo tumutumulo, Tio mapeéenta lolóíya, 'Lapatio maó tolo hui mola Waú mamuli mobongu mai.'

⁶⁴ Sababu uito, ahulilo maó tau mola modaha kuubulu boito tióotutua tunggula dulahu otolulio, alihu tahiduduá o–Lio diila mowali motaó milate–Lio lapataó mamó poótaa ode tau–tauwalo deú Tio mabilongu–Lio mai lonto opopate. Wau polo wimbulo u pulitio botie malebe moleetaó wolo ubohulio mai."

⁶⁵ "Timongoli o suludadu tamoo–kawalia," ualei Pilaatu olimongolio, "ponaólo mola dahai maó kuubulu boito tióotutua."

⁶⁶ Lapataó timongolio malonaó mola ode kuubulu, wau loseeheli botu poheúto boito wau pilopo tambatilio maó tamodaha totalulio, alihu diaaluo tamomuyu kuubulu boito.

28 ¹ Toú malo paluto dulahu Saabati, todulahu Ahadi donggo molaliyonu, ti Maria Mahadalena wau ti Maria wewolio boito lonaó mola lomilohe kuubulu boito.

² Debolo lotoduwolo mola liluhu ulaba–labaalo tutu. Malaíkati ngota lo Eeya lotuhutai lonto sologa tulusi lopo lilideó heúto botu boito wau lotihuloáa totudulio.

³ Baya lo malaíkati boito debo odelo ilato, wau boólio moputió daá.

⁴ Suludadu tamoo-kawalia tahemodaha teto mailoohe daá tilinggula timongolio hulu-huluhelio, wau lotambuti debo odelo milate.

⁵ Maláikati boito loloíya maó ode mongobua boito, "Diila oohe! Otaawaú timongoli hemo lolohe li Isa tamaa silalipulio boito.

⁶ Ti Isa diaaluo teea. Ti Isa malobongu debo odelo upilo tahuda-Lio muloololio mai. Dulo mai bilohi tambati u pilopo wulide o-Lio.

⁷ Botia, huáa ponaólo, mola polelea to tahiduduá o-Lio, 'Tio malobongu, wau masaatia Tio maleimulo mola woli mongoli ode Galilea. Mola teto timongoli mamooóonto o-Lio!' Poótoloma maó wolo umaa piloleleú mai olimongoli."

⁸ Mahi alihe mongobua boito lololaa maó kuubulu boito. Lou laasa duiduito uúulambohe wolo wengahu, timongolio mahiteteá mola lopo habari umalo todoo boito to tahiduduá li Isa.

⁹ Debolo ti Isa mai lodunggaya wolo mongobua boito, wau lotahuda maó, "Salamu!" Lapataó timongolio malo himbideó o-Lio, tulusi longoóde oáa-Tio wau lolubo o-Lio.

¹⁰ "Diila oohe," tahuda li Isa ode limongolio, "ponaólo mola polelea maó tomongo wutatu-Ú alihu timongolio ode Galilea; mola teto timongolio mamooóonto ola-Ú."

¹¹ Touú mongobua boito malonaó, dengolo lota suludadu tamoo-kawalia tahemodaha kuubulu boito luli lohualinga ode kota wau lopodulohe tomongo iimamu taúwa ngoáamila u lotoduo boito.

¹² Mongo iimamu taúwa boito malo dulohupa wolo mongo taúwa lo Yahudi, tulusi longohi maó ngojumula daá doi ode suludadu tamoo-kawalia boito,

¹³ wau loloíya, "Timongoli musí moloíya maó deú tahiduduá li Isa malonaó mai touú hui wau mai lotaó milate li Isa touú timongoli donggo hituluhe.

¹⁴ Wau wonu tigubolonulu moódungohe suáli boito, mapiyoo lami tio alihu timongoli diila moótapu totolo wolo-wolo."

¹⁵ Yi suludadu tamoo-kawalia boito malohama doi boito, wau lohutu debo odelo u pilolahuli maó olimongolio. Masababu uito wungguli boito donggo lolaloladu towolota taulo Yahudi tunggula todulahee botie.

¹⁶ Tamopulaa tuwau lota muri li Isa boito lonaó mola ode huludu to Galilea lotuuúde loú pilomalanta li Isa olimongolio.

¹⁷ Tou timongolio loóonto li Isa mola teto, timongolio malo sujudu lolubo o-Lio. Bo woluo towolota limongolio tadiila boti palacaya.

¹⁸ Ti Isa lohimbideó olimongolio wau lotahuda maó, "Ngoáamila kawasa tosologa wau todunia mailudu-Lio mai ola-Ú.

¹⁹ Sababu uito ponaólo ode ngoáamilalo bangusa to ngoilanggubu dunia, pohutua maó timongolio mowali muri-Ú. Wau lihua maó timongolio loú molanggula tangguli Paapa, wau Walaó, wau Rohullah.

²⁰ Ajaalia maó timongolio modungohe ngoáamila u mapilo malenta-Ú mai olimongoli. Wau eelai maó Waú malaito peé-peéenta woli mongoli demola pulito lojamani."

Markus

1 ¹ Uti-utieelo Habari Mopiohe pasali li Isa Almasi, Walaó Allahu Taáala.

² Habari Mopiohe boito tumulio debo odelo u tiluladei li Nabi Yesaya odie mola, "'Utieelo utoliya-Ú,' tahuda lo Allahu Taáala; 'Wau lolao mai olio leimulo wole-Mu, alihu tio momuó dalalo ole-Mu.'

³ Woluo tawuwa-wuwaatió tohuta hungayo u luasi daá, 'Podapato maó dalalo ode Eeya; popayade maó dadaa-lalaalo u polibayaa-Lio.'

⁴ Debo odelo u tulatulade boito, oditolo olo yilumenetai tei Yahya lonto huta datahu u luasi daá wau delita. Tio helo polihu tau wau lopo tunggulo habari lonto Allahu Taáala. "Timongoli musi molilihu monto duduu-sawaalo limongoli, wau musi lihualo, alihu Allahu Taáala mongambungu mai olimongoli," odito loíya maó lei Yahya.

⁵ Ngoáamila taa lonto madala lo Yudea wau kota lo Yerusalemu lonaó mota lodungohe olei Yahya. Timongolio longaku duduu-sawaalo limongolio, wau

tei Yahya helo polihu olimongolio to Dutulaa Yordan.

⁶ Tei Yahya pakepake boó lonto lambuto unta. Bintolo wohutalio lonto walito, wau uáalolio bulita wau hula lotiiá lo oáayua.

⁷ Tio lopohabari maó habari botie, "De lapatio maó lowatia, mamei dungga mai taa ulebe udaá lowatia. Hiambola motidungu momuó tali losapatu-Lio, watia diila patuti.

⁸ Watia mopolihi olimongoli wolo taluhu, bo Tio mamo polihu olimongoli wolo Rohullah."

⁹ Touú boito ti Isa leidungga mai lonto Najaret tomadala lo Galilea, wau tei Yahya lopolihu maó o-Lio to Dutulaa Yordan.

¹⁰ Odito ti Isa yilumualai lonto dutula boito, Tio loóonto mola hulungo lohuó wau Rohullah lotuhutai debo odelo bulungi poombo ode yitaa-Tio.

¹¹ Lapataó dungo-dungohei suala lo Allahu Taáala lotahuda mai, "Yióolo Walaúu-Ú tapilonu-Ú. Yió moósanangi hilaa-Ú."

¹² Lolamemeto lapataó uito Rohullah malodelo mola li Isa ode huta datahu u luasi daá wau delita.

¹³Wopato pulu hui Tio mota teto, heilimontala lo Ibilisi. Bibii–natangiyalo u molinggelo woluo olo mota teto peé–peéenta wo–Lio, wau mamaa–laíkatiyalo helohinta o–Lio.

¹⁴Lapataó tei Yahya tilutupaalio, ti Isa malonaó mola ode Galilea, wau lopohabari Habari Mopiohe lonto Allahu Taáala mola teto.

¹⁵Tahuda–Lio maó, "Allahu Taáala mahuáa molumula momalenta. Polilihulo monto duduusaamu, wau pomalacayalo to Habari Mopiohe u monto Allahu Taáala!"

¹⁶Touú ti Isa donggo naónaó topentadu lo Bulalo Galilea, Tio loóonto mota duulota tamoohalawa, deúito–yito tei Simon wau tawaliyali lei Andreas. Timongolio donggo hipoheúpa tola tobulalo boito wolo pajala.

¹⁷Ti Isa lotahuda maó olimongolio, "Duduí mai Waú. Waú mamo ngaajali mai olimongoli momajala tau."

¹⁸Lolamemeto timongolio lololaa maó pajala limongolio lapataó loduduó li Isa.

¹⁹Ti Isa lonaó tulusi, lapataó loóonto mota poli tamohutato duulota wewolio, deúito–yito tei Yakobus wolei Yahya, mongo walaée Jebedeus. Timongolio

todelomo bulotu, wau donggo hemo poópiohe pajala limongolio.

²⁰ Ti Isa huáa lotianga olimongolio. Wau timongolio lololaa maó oliyamo limongolio todelomo bulotu peé–peéenta wolo tahe wuupaalio. Lapataó timongolio malo duduá li Isa.

²¹ Ti Isa wau tahiduduá o–Lio leidungga mola ode kota Kapernaum. Todulahu Saabati u wumbutio mola, ti Isa tilumuwoto ode delomo bele potabiaalo, wau lolumula longajali.

²² Tau–tauwalo talo dungohe o–Lio hilinggolabe to dudelo–Lio helo ngajali. Sababu, Tio helo ngajali wolo tilihula diila debo odelo guguu–ruwaalo agama.

²³ Toú boito ngotaalio lo tamáilo tuanga lorohu u moleeto boito tilumuwotai ode delomo bele potabiaalo, wau longuatió,

²⁴ "Wuu Isa, taulo Najaret, wolo umaa pohutuwo–Mu olami? Yió mai mopobinasa olami? Otaawa lami tatoonu Yió: Yióolo tamantali lonto Allahu Taáala!"

²⁵ "Poóoyo mola!" antingaó li Isa to rohu boito, "Pohinggi maó monto tau botie!"

²⁶ Yi rohu u moleeto boito malopo lota–lotaúula daá totau boito, lapataó

yilumulaó lonto tau boito sambela wuwa–wuwaatió.

²⁷ Ngoáamila tau hilinggolabe daá, tilinggula timongolio malo loíya ngota timongota, "Wei, wolo utie? Tuwaulio lo pongaajali u bohu! Wolo tilihula wau kawasa Tio helo malenta roroo–huwaalo u moleeto yilumualaó, wau timongolio olo lodungohe o–Lio!"

²⁸ Yi habari pasali li Isa huáa loloópolo mola to ngoilanggubu madala lo Galilea.

²⁹ Ti Isa wau tahiduduá o–Lio lololaa maó bele potabiaala boito, wau lonaó mota ode bele lei Simon wolei Andreas. Tei Yakobus wolei Yahya lonaó olo woli mongolio.

³⁰ Tiilo moluhengee Simon donggo mongongoto he huhulolio to potuluhelio. Oditolio tou ti Isa wau tahiduduá o–Lio tilumuwotaó ode bele boito, ti Isa pilolelealio pasali losuáli boito.

³¹ Yi ti Isa malo himbideó ode tiilo moluhengee Simon, wau lodihu maó uluúlio, lapataó lotulungi olio lobongu. Huhuulio mailoole lomola, wau tio malohinta olimongolio.

³² Lolaangio mola, tou dulahee matumolopo mota, tau–tauwalo helodelo

mai odeli Isa ngoáamila tahi ngongota wau taílo tuanga lorohu u moleeto.

³³ Ngoáamila tuango kota boito helo ambua mai totalu lobele boito.

³⁴ Lapataó ti Isa helo poóluli dadaata tahi duutola ngongoto hidala–dalaala ngongoto, wau helo pohinggi olo ngohuntua rohu u moleeto. Diila yiluasia–Lio roroo–huwaalo u moleeto boito mobisala, sababu otaawa limongolio tatoonu Tio.

³⁵ Loloombulio mola, tou donggo molaliyonu daá, ti Isa lobongu tulusi lololaa maó bele. Tio lonaó mola ode tambati udiila otau to bulemengo kota, wau loduá mola teto.

³⁶ Bo tei Simon wau mongo sahabatilio lonaó mola mololohe o–Lio.

³⁷ Wau tou timongolio loódungga o–Lio, timongolio lolóiya maó, "Ngoáamila tau donggo hemo lolohe li Paaá."

³⁸ Bo ti Isa lolametaó, "Dulo ito mopotolonga mola lo nonaóonto ode kokoo–tawaalo uwewo totili maó leewe. Waú musí mohutuba mola teto olo, sababu maa ui–uitolo makusudulio Waú odia mai."

³⁹ Sababu uito ti Isa lonaó ode utoonulalo maó to ngoilanggubu lo Galilea, wau helo

hutuba to bebee–leyaalo potabiaalo wau lopohinggi roroo–huwaalo u moleeto.

⁴⁰ Ngotaalio taóngongoto lo alipo u moótihela hapato lonaó mai odeli Isa. Tau boito lotibonggohuú mola, wau loloíya maó, "Wonu ti Paaá mohuto, ti Paaá mowali mopoóluli mai olaatia."

⁴¹ Lodehu hilaa li Isa totau boito. Oditolio, tileapu–Lio tau boito, wau lotahuda maó, "Waú mohuto, polulilo mola!"

⁴² To saaátilo boito ngongotio yilooli wau tio maloluli.

⁴³ Lapataó ti Isa léinaó olio wolo tahuli odie,

⁴⁴ "Poódahai diila maó wunggulia penu boli olita, bo ponaólo odeli iimamu, wau pohilea maó olio u molantu mai u yió maloluli. Lapataó duólo uiloóluli maó olemu boito, podewowa mola bake moduduá u pilomalantaó lei Musa, odelo bukuti totau–tauwalo deú yió tutuulio tutu maloluli."

⁴⁵ Bo tau boito lonaó, wau mololaalaaita helo hungguli ulotoduo boito ode utoonulalo maó tunggula ti Isa diila lowali tilumuwoto ode kota wolo nanaasa. Tio bo lotibiluloá to bulemengo kota to

tataa–mbatiyalo udiila otau. Bo tau tulusi hiponaówa mai lonto utoonulalo maó.

2¹ Dengolo hui mola lapatio maó ti Isa luli lohualinga ode Kapernaum. Yi malo loladulo mola habari deú Tio woluo tobele.

² Lapataó dadaata tau lonaó mai. Timongolio helo tiámbu mola teto tunggula diilalo otambati. Tohuhebu olo huhuutoyoá tau. Lapataó ti Isa lopo tunggulaó habari lonto Allahu Taáala ode limongolio.

³ Touú Tio donggo hemo tahuda, tawopatota lohuluhei ngotaalio tadidu mowali monaó dilelolio odeli Isa.

⁴ Bo sababu tau mailaba huntualio, timongolio diila lowali lohimbideó o–Lio. Oditolio, timongolio malo longgala watopo pasipasi toitaato tambati ti Isa woluo. Lapataó uito, timongolio malo polaahe mola tadidu mowali monaó boito wolo amongio.

⁵ Touú ti Isa lomiloheó malo odito udaá iimani limongolio, Tio lotahuda maó ode tadidu mowali monaó boito, "Walaúu–Ú, duduusaamu maa ilambungu."

⁶ Dengolo lota guru lo agama tadonggo hihuloáa teto mahipo hihintua todelomo hilao.

⁷ "Buheli tutu tau botie mobisala odito! Tio hemohina Allahu Taáala. Tita tamowali mongambungu dusa, Tatoonu ngopohia Allahu Taáala lohihilao?"

⁸ Toú boito olo ilotaawa li Isa pikiilangi limongolio. Lapataó Tio lotahuda maó, "Yilongola timongoli hipo hihintua odito todelomo hilaa limongoli?"

⁹ Toonu ulebe gambangi; molanggula, 'Duduusaamu maa ilambungu,' meaalo molanggula 'Bongulo, bintaálo amongumu wau ponaólo'?

¹⁰ Bo botia Waú mamopo bukuti mai olemu deú tutuulio tutu toitaato dunia botie Walaó Manusia okawasa mongambungu dusa." Lapataó ti Isa lotahuda maó to tadidu mowali monaó boito,

¹¹ "Bongulo, bintaálo amongumu wau pohualingolo!"

¹² Tio malobongu wau huáa lohama amongio lapataó yilumualaó silakusia limongolio ngoáamila. Tau-tauwala boito hilinggolabe tulusi lomuji mola Allahu Taáala. Uali mongolio, "Diipo peéenta maó ito heloóonto ulotoduo mai debo odelo utie!"

¹³ Ti Isa luli lohualinga mota ode Pentadu lo Bulalo Galilea. Ngohuntua tau lonaó mai ode o-Lio, wau Tio helo ngaajali olimongolio.

¹⁴ Touú ti Isa donggo ntale-ntalenga teto, iloontonga-Lio ngotaalio tamootagia beya tanggulio Lewi, walaée Alpeus, donggo hulo-huloáa tokantoli lobeya. "Duduí mai Waú," tahuda maó li Isa olio. Yi tei Lewi maa tilimihulo wau loduduó li Isa.

¹⁵ Touú ti Isa donggo hemo lamela tobele lei Lewi, ngohuntua tamootagia beya lonaó mai, wau tau-tauwalo tahe anggapuolo diila mopiohu lotuango lipu lolamela peé-peéenta woli Isa wau tahiduduá o-Lio. Sababu ngohuntua towolota limongolio loduduái li Isa.

¹⁶ Dengolo lota guru lo agama kaumu lo Parisi loóonto maó li Isa hemo lamela peé-peéenta wolo tahi potagia beya wau tahe anggapuolo diila mopiohu boito. Oditolio timongolio lohintu maó to tahiduduá li Isa, "Yilongola gurumu helo lamela wolo tahi potagia beya wau tau-tauwalo tadiila hipiohe boito?"

¹⁷ Ti Isa loódungohe yiyintu limongolio boito, tulusi lolametaó, "Taa seehati diila momalalu dokuteli; bo taa u

mongongoto. Waú dungga-dungga mai diila mai motianga totaa hipo nganggapua batangalio malo piohu, bo tahe anggapuolo hina."

¹⁸Towakutu tuwau tahiduduá olei Yahya Tamopolihua wau tau-tauwalo Parisi donggo hipuasawa. Lapataó woluo tau lonaó mai odeli Isa wau malohintu, "Yilongola tahiduduá olei Yahya Tamopolihua wau tahiduduá totaulo Parisi hemo puasa, hiambola tahiduduá li Paaá diila?"

¹⁹Ti Isa lolametaó, "To potihunggu Ionika, wolo tahe tiloduo diila molamelo? Wonu bulentiti laí donggo peé-peéenta woli mongolio, maatantu timongolio molamelo.

²⁰Bo mamei dungga mai wakutuulio bulentiti laí boito hamaalo monto olimongolio. Tou boito deúito timongolio diila molamelo.

²¹Diaaluo taa u momambola boó deedelo wolo kaingi ngopita u bohu. Sababu kaingi pomambola boito mamowali umonggolongo wau mongedenga boó boito, tunggula moósababu kedengio lebe udaá maó.

²² Odito olo diaaluo taa u moluango angguru bohu todelomo bututu lowalito u madeedelo. Sababu angguru bohu boito mamooó sababu bututu boito mobutaó. Pulitio maó duuduluolo mohuáyadu. Angguru u bohu mamusi tuangolo ode delomo bututu lowalito u bohu olo."

²³ Todulahu Saabati tuwau toú ti Isa yilumaodeó to halabolu lopale ngopita tahiduduá o–Lio malolipu pale.

²⁴ Lapataó tau–tauwalo Parisi malo loíya odeli Isa, "Yilongola tahiduduá ole–Mu diila moduduá butooó lo agamanto wau hipohutua u dinidini todulahu Saabati?"

²⁵ Ti Isa lolametaó, "Diipo peéenta timongoli lopobaca u pilohutu lei Dauda, toú tei Abyatar donggo hemo kalaja lowali iimamu daá. Toú tei Dauda wau wolo taulio mapilolango, wau diila o uáalo, tio tilumuwoto ode Bele lo Eeya, wau lolamela roti u mapilo dewolio ode Allahu Taáala. Wau roti boito yilohilio olo ode taulio. Lebe–lebe pomaó moduduá agamanto, bo wambaó mongo iimamu tamowali molamelo roti boito."

²⁶ (2:25)

²⁷ Lapataó ti Isa luli lotahuda maó,
"Dulahu Saabati pilohutu duólo manushia;
diila manushia duólo dulahu Saabati.

²⁸ Oditolio, Walaó Manushia okawasa,
tumbaó todulahu Saabati."

3 ¹ Ti Isa luli lohualinga mota ode bele
potabiaalo. Mota teto woluo ngotaalio
taa uluúlio mailate ngotuwali.

² Mota teto woluo tahipo lolohe totala li
Isa, alihu mowali moó poduloheó o-Lio.
Oditolio timongolio tulusi hemo poótuoto
o-Lio wolo Tio mamó poóluli tau todulahu
Saabati.

³ Ti Isa lotahuda maó ode taa uluúlio
yilate ngotuwali boito, "Dulo tihulai teea,
totalu."

⁴ Tulusi Tio lohintu maó totau-tauwalo
teto, "Moduduáaó to agama, ito mowali
mohutu wolo todulahu Saabati? Mohutu
umopiohu meaalo u moleeto? Mopoáahu
tau meaalo momate-mateelo maó?"
Timongolio bo lotipoóoyo.

⁵ Wolo nahutu ti Isa lomilohe mota
topali-Tio, bo Tio olo siluukali, sababu
mailaba baaáangi limongolio. Tulusi Tio
lotahuda maó ode tau boito, "Wudua mai
uluúmu." Tau boito lohudu maó uluúlio,
wau uluúlio loluli lomola.

⁶ Yi tau–tauwalo Parisi malololaa maó bele potabiaalo boito, lapataó huáa lodulohupa wolo dengolo lota tahiduduá olei Herodes, u momate li Isa mate–mateelo maó.

⁷ Ti Isa wau tahiduduá o–Lio lonaó tilumouli mota ode Bulalo Galilea. Yi dadaata daá tau lonto Galilea lonaó loduduó li Isa. Dadaata olo talonaó mai lonto Yudea,

⁸ lonto Yerusalemu, lonto madala Idumea, wau lonto lipu to ambahu tiimulu lo Yordan, wau lonto tili lo kokoo–tawaalo to Tirus wau Sidon. Timongolio ngoáamila lonaó mai odeli Isa, sababu timongolio maloó dungohe pasali u mapilohutu–Lio.

⁹ Tau–tauwala boito malo odito huntualio, tilinggula ti Isa lopoáhu maó tahiduduá o–Lio lopo dapato bulotu pomake–Lio, sababu de Tio diila bolo poduduupeá lotau–tauwalo boito.

¹⁰ Odito huntualio tahe piloóluli–Lio, tilinggula ngoáamila tahi ngongota bolo hipo huhuuntula lomaó motolopani mohimbideó o–Lio alihu moó dedeta o–Lio.

¹¹ Wau tahe ilotuanga lorohu u moleeto, timiídu moóonto o–Lio, tulusi wambaó

hemo sujudu mola totalu–Lio wau hemo nguatiá, "Yióolo Walaó Allahu Taáala!"

¹² Boti Isa helodini daá roroo–huwaalo u moleeto boito mopoótaa maó tatoonu Tio.

¹³ Lapataó ti Isa lotaóde mola ode huludu tuwau, wau lotiangaó tahe kilahandaki–Lio. Tau–tauwala boito lonaó mai,

¹⁴ tulusi Tio lolulaoto towolota limongolio mopulaa duulota. Tahuda–Lio maó, "Wau molulaotaó olimongoli alihu timongoli moduduá ola–Ú wau timongoli laolo–Ú u mopololade Habari Mopiohe monto Allahu Taáala,

¹⁵ wau timongoli mamooótapu kawasa u mopohinggi roroo–huwaalo u moleeto."

¹⁶ Uti–utieelo tanggulo lo tamopulaa duulota boito; Simon (taíluntelio olo Petrus),

¹⁷ Tei Yakobus wolei Yahya wutatio, deúito–yito mongo walaée Jebedeus (timongolio botie ilunte–Lio tanggulo Boanerges boliilio maó "walaó bulonggodu"),

¹⁸ Tei Andreas, Piliipus, Bartolomeus, Matusi, Tomas, Yakobus walaée Alpeus, Tadeus, Simon si Patriot,

¹⁹ wau Yudas Iskariot talo hiyanati li Isa.

²⁰ Lapataó ti Isa lohualinga ode bele. Bo ngohuntua tau debo hiponaowa mai lotiámbu, tilinggula ti Isa wau tahiduduá o–Lio diila owakutu molamelo.

²¹ Tau–tauwalo hipo loíyawa deú, "Tio mabiliyongo!" Wau toú ngaalaá–Lio loódungohe suáli boito, malonaó mota timongolio lohama o–Lio.

²² Guguu–ruwaala agama talonaó mai lonto Yerusalemu helo loíya deú, "Tio maílo tuanga lo Beeljebul! Taúwa lo roroo–huwaalo u moleeto boitolo talongohi kawasa o–Lio helo pohinggi rohu u moleeto."

²³ Yi ti Isa lotiangai taa ngohuntua boito, wau lohungguli maó olimongolio demohelu ngoolo pohumaya. "Diila pongalo aakali rohu u moleeto mopohinggi rohu u moleeto," tahuda li Isa.

²⁴ Wonu lipu tuwau mopoó hipole–polemboá wau tinggai mumuusua, lipu boito diila moó tahangi.

²⁵ Wau wonu todelomo ngaalaá tuwau diila áakolowa wau popoo–ngawaáalio tinggai mumuusua, ngaalaá boito mamóántulu.

²⁶ Wonu todelomo bele biluloá saaha li olongia lo Ibilisi motoduo owowoluwoa lobubuu–alaawa wau polomusa, bele biluloá saaha li olongia boito diila moó tahangi mohiheo wau tantulo maó mamooli.

²⁷ Diaaluo penu boli ngotaa maó tamoó tuwoto ode delomo bele lo ngotaalio tamolotolo wau molambata halataalio wonu tio diila momungupo meimulo tamolotolo boito. Lapataó uito, bolo tio mowali molambato halataalio.

²⁸ Ototai maó! Wonu bolo tau mohutu dusa wau moloíya u mohina, yi tio mowali ambunguolo.

²⁹ Bo wonu bolo tio mohina Rohullah, tio diila mowali ambunguolo! Sababu umohina boito yito dusa u ohiheo–hiheolo maó."

³⁰ (Ti Isa lotahuda odito sababu woluo taa loloiya deú ti Isa maílo tuanga lorohu u moleeto.)

³¹ Lapataó uito tiilo li Isa wau mongo wuta–Tio lonaó mai. Timongolio hiwimawa to bulemengio wau mota léitoduo mai li Isa.

³² Tou boito ngohuntua tau donggo hihuloáa topalito li Isa. Timongolio

loloíya maó o-Lio, "Paaá, tiilo li Paaá wau mongo wutati Paaá woluo to bulemengio. Timongolio hemo lolohe li Paaá."

³³ Ti Isa lolametaó, "Tatoonu tiila-Ú? Tatoonu mongo wutatu-Ú?"

³⁴ Lapataó Tio lomilohe ode tau-tauwalo tahi huloáa topali-Tio tulusi lotahuda maó, "Tabotieelo tiila-Ú wau mongo wutatu-Ú!"

³⁵ Taa u mohutu kahandaki lo Allahu Taáala tiolo wutatu-Ú talolaí, wutatu-Ú taabua, wau tiila-Ú."

4 ¹ Ti Isa luli longaajali topentadu lo Bulalo Galilea. Dadaata daá taa helo tiámbu mai to o-Lio. Sababu uito Tio mota lotihuloáa todelomo bulotu totudu lotaluhu, wau taa ngohuntua boito hitihula tobiihu bulalo.

² Lapataó ti Isa helo ngaajali loú dadaata suáli olimongolio lomake pohumaya. Odie mola Tio helo ngaajali olimongolio.

³ "Dungohilo mai! Woluo ngotaalio tamomengia mota lomuáyade bili.

⁴ Toú tio donggo hemo muáyade, woluo bili u lobiihuto todalalo. Tulusi bulungi tilumombotai wau bili boito ililaalio lopuli-pulitolo maó.

⁵ Woluo olo bili u lobiihuto totambati u hibotu-botua u hutalio bo ngoídi. Bibii-liyaalo boito ngoínta lobutu sababu hutalio bo ngoídi,

⁶ Bo toú dulahe lobotulai, tumbingio boito malo lolante tulusi lohengu wau yilate sababu waáatio diila boti modelomo.

⁷ Woluo olo bili u lobiihuto tohuungo lo diúto oduhi. Diúto oduhi boito lobutu wau lohupeto tutuu-mbingiyalo boito tilinggula diila lomungo.

⁸ Bo woluo olo bili u lobiihuto tohuta u molomiodu. Bili boito lobutu, lapataó lowali iludaá mola tulusi lomungo, woluo utolo pulu, woluo uwolomo pulu wau woluo u ngohetuto piúwa."

⁹ Lapataó lohungguli maó lo pohumaya boito, ti Isa lotahuda, "Timongoli obulonga, podungohulo!"

¹⁰ Toú ti Isa bo tutuuwau, tau-tauwalo tamaloó dungohe pongaajali-Lio lonaó mai ode o-Lio peé-peéenta wolo tamopulaa duulota tahiduduá o-Lio. Timongolio léi patataó o-Lio boli lo pohumaya boito.

¹¹ Yi ti Isa lotahuda maó olimongolio. "Timongoli mailohia mai ponu lo Eeya u motota maó hitua-hituawua u milakusudu

hetuuólo tomimbihu woloolo mola Allahu Taáala momalenta. Bo tau-tauwalo bulemengio héílaajali wolo pohumaya, ¹² alihu 'Timongolio mamolo laalaaita mopoótuoto bo diila motota wolo umotoduo, timongolio mamolo laalaaita modungohe, bo diila mongalati, utie motoduo mai alihu timongolio diila maó moóonto wau mongalati wau diila maó monaó mai ode Allahu Taáala wau Allahu Taáala mongambungu olimongolio."

¹³ Lapataó ti Isa lotahuda maó ode limongolio, "Wonu timongoli diila mongalati lo pohumaya boito, woloolo mola timongoli mowali mongalati lo popoo-humayaalo uwewo?

¹⁴ Tamoo-muáyadea boito yito tamopo loladu habari monto Allahu Taáala.

¹⁵ Bili u lobiihuto todalalo debo odelo tau-tauwalo hipo dungohe habari pasali loú woloolo mola Allahu Taáala momalenta. Odito loódungohe, Ibilisi lonaó mai wau lohama wolo u mapilo muáyadu todelomo hilaa limongolio.

¹⁶ Bili u lobiihuto totambati u hibotubotua debo odelo tau-tauwalo hipo dungohe habari boito, wau lato lololimo wolo hilaa sanangi.

¹⁷ Bo habari boito diila longuaáto todelomo hilaa limongolio, tilinggula diila loó tahangi lohiheo. Odito timongolio ilodungga loú suusa meaalo ilalinayalio sababu habari boito, timongolio lato lomaathe iimanilio.

¹⁸ Bili u lobiihuto tohuungo diúto oduhi boito debo odelo tau-tauwalo hipo dungohe habari boito,

¹⁹ bo molawalo pasali loú tutumuli mongolio wau ohilaa tumumula wimu-wimumuto ngoáamilalo. Napusu duólo tilolahepalo suáli maa tilumuwoto ode delomo hilaa limongolio. Sababu uito habari lonto Allahu Taáala leihupeto todelomo hilaa limongolio, tilinggula diila lomungo.

²⁰ Wau bili u lobiihuto tohuta u molomiodu boito debo odelo tau-tauwalo hipo dungohe habari boito wau tilolimolio, timongolio helomungo dadaata, woluo utolo pulu, woluo uwolomo pulu, wau woluo u ngohetuto piúwa tilapulio."

²¹ Wumbutio mola ti Isa luli lotahuda, "Tingga woluo tamopo léiita tohe lapataó taúbelio wolo tombe, meaalo podutuolio towalungo lo potuluhelo? Wolo tio diila mopodutu tohe boito to oáato tohe?"

²² Diaaluo u tuutuó udiila taóontonga; wau diaaluo u hitua-tuawua umilakusudu hetuuólo diila tamo bonggali.

²³ Sababu uito, wonu obulonga, podungohulo!"

²⁴ Lapataó ti Isa luli lotahuda, "Poótuota maó wolo u ilodungohe limongoli botie. Tuuúdu upomake limongoli ode taawewo uito olo u mapomake lo Allahu Taáala ode limongoli -- wau tumbaó lebe dadaata maó poli.

²⁵ Sababu tamailoluo, mawohia-Lio lebe dadaata maó poli; bo taa u ilodiaaluo, ungoídi woluo to olio mamuli hamaalo olo."

²⁶ Ti Isa luli lohumbuta mola tahuda-Lio, "Wonu Allahu Taáala momalenta odelo Olongia, owowoluwoalio mowali pohumayaalo debo odelo ngotaalio lotamo muáyade bili to halabolulio.

²⁷ Hui tio motuluhu; dulahu tio mobongu. Wau sambela uito bibii-liyaalo boito hipobutua mola tulusi wau lowali iludaá. Bo woloolo mola dudelolio lo bibii-liyaalo boito mobutu mowali udaá, diila otaawa lotau boito.

²⁸ Huta boitolo uwolo hilaalio mongohi tilapulo: bohu–bohulio tango kekeeí, lapataó panggeyangío, tulusi hungolio.

²⁹ Wau wonu pale boito malo lalahu, tau boito olo molumula molotobu sababu matonggadio u mongotolo."

³⁰ "Wonu bolo Allahu Taáala momalenta, wolo tatoonu ito mowali mopo ngilabotaó uito?" yilintu maó li Isa. "Lumadu wolo umowali pomakento u motombangaó?

³¹ Wonu bolo Allahu Taáala momalenta, owowoluwoalio debo odelo pohumaya botie: Bili losawi ngobotu hilama lo tahingota–ngotaawa lapataó pilomulolio tohuta. Bili losawi yito bili u pulito kikiío todunia.

³² Bo wonu malobutu mai, mamowali u pulito udaá towolota lo tilolahepe pilomulo. Tataa–ngolio mohimbungo daá tilinggula bubuu–lungiyalo tumombotai, wau mohutu beelea towalungo lo wolungalio."

³³ Odi–odieelo mola ti Isa helo ngaajali tau wolo lopohuna dadaata pohumaya debo odelo uito, ngotilonggadu mowali opahamua limongolio.

³⁴ Ti Isa laito hemomake pohumaya wonu Tio mongaajali tau–tauwala boito.

Bo wonu Tio lohihilao wolo tahiduduá o–Lio, Tio mopoó patataó ngoáamilalo to olimongolio.

³⁵ Toú lolaangio boitolo, ti Isa lotahuda maó ode tahiduduá o–Lio, "Duloolo ito mobite ode ngotuwali lobulalo."

³⁶ Yi ti Isa malo titaé tobulotu, wau tahiduduá o–Lio lololaa maó taa ngohuntua tobiihu bulalo, lapataó lotitaé tobulotu u tutuuwauwa. Bubuú–lotuwaalo wewo woluo olo teto. Lapataó ti Isa wau tahiduduá o–Lio malobite.

³⁷ Diila lohiheo lapatio maó lotoduo mai dupoto moóhuú. Bulotu mahe pomáilio lobuóolo wau taluhu tilumuwoto ode delomo bulotu, tilinggula bulotu boito ngopeé lopolu lotaluhu.

³⁸ Tokamudi lobulotu boito, ti Isa donggo tuutuluhu wolo lunggo–Ngio toitaato alangulua. Tahiduduá o–Lio malo mongu o–Lio. Uali mongolio, "Paaá Guru, diila paduli li Paaá ito botie matopotala?"

³⁹ Ti Isa malo bongu, tulusi longantinga dupoto boito, wau lotahuda ode bulalo, "Poóoyo, potiduótolo!" Dupoto olo mailoole lomola, wau bulalo loliilo daá.

⁴⁰ Lapataó ti Isa lotahuda maó ode tahiduduá o–Lio, "Yilongola timongoli

moöhe? Yilongola timongoli diila palacaya ola-Ú?"

⁴¹ Yi timongolio mailoohe wau hipo loíyawa ngota timongota, "Tutuulio-tutu tatoonu tau botie, tunggula dupoto wau buóola olo modungohe o-Lio."

5 ¹ Lapataó ti Isa wau tahiduduá o-Lio leitungga mola ode ngotuwali lo Bulalo Galilea, tomadala lo Gerasa.

² Tou ti Isa lolaheó tobulotu, Tio nilaó mai lo talolaí ngota tailumualai lonto gogoo-waalo kuubulu.

³ Tau boito makiluwasa lorohu u moleeto wau bilubiluloá to kukuu-buluwaalo. Tio madiilalo mowali punguwolo; penu boli wolo lante.

⁴ Malaito oáato wau uluúlio hepunguwolo, bo laito lalaa-nteyaalo boito hebuntoolio, wau wate to oáatio heboliyolio. Malo odito lotolio tilinggula diaaluo penu boli ngotaa maó tamowali molahangi olio.

⁵ Hui wau dulahu tio naó mota naó mai tokuubulu wau to huhuu-luduwaalo, sambela wuwa-wuwaatió wau hemolonto palia wawaáio wolo botu.

⁶ Tou lonto u molamingo iloontongalio ti Isa dulu-dulungai, yi tilumeteá mota tio tulusi losujudu mola totalu li Isa.

⁷Wolo suala daá tio longuatió, "Isa Walaó Allahu Taáala Taa Laba-labaalo molanggato! Mapongola-Mu watia botie? Domi Allahu Taáala, watia momolohone diila maó sikisai watia!"

⁸(Tau boito lolóiya odito sababu ti Isa lotahuda maó olio, "Rohu u moleeto, pohinggilo maó monto tau botie!")

⁹Lapataó ti Isa lohintu olio, "Tatoonu tanggulumu?" Tau boito lolametaó, "Tanggulo watia 'Legiun' -- sababu amiaatia botie ngohuntua daá!"

¹⁰Wuwuulia tio helo molohone louú tióotutua alihu ti Isa diila maó mopoáhu roroo-huwaalo u moleeto boito lumualaó monto lipu boito.

¹¹Membideó lo tambati boito woluo ngohuntua daá boi udonggo hipololohe uáalo tobinggi lohuludu.

¹²Roroo-huwaalo u moleeta boito lomolohone maó li Isa, "Ahulilo mai ami tumuwota mota ode delomo bobooiyaalo boito."

¹³Wau ti Isa akolo. Oditolio, maa tilumuwota mota roroo-huwaalo boito ode bobooiyaalo boito. Ngoáamilalo himbala lobi boito tilumeteó wau lotidehulo mola lonto binggi lopangato ode delomo bulalo

tulusi yilumoduó -- ngoáamilalo diila motala dulo lihu boi.

¹⁴Tahi podahawa boito tilumeteó, wau lopololadu habari boito tokota wau kambungu topalitio. Tulusi tau-tauwalo yilumualai mai lomilohe wolo u malo toduo.

¹⁵Timongolio lonaó mai odeli Isa, tulusi maloóonto taa u engontielio ilotuanga lorohu u moleeto boito, donggo hulohuloáa teto. Tio malomake boó, wau pikiilangilio olo masileehati. Yi timongolio ngoáamila mailoohe.

¹⁶Tau-tauwalo tahelo sakusi lohihilao u lotoduo pasali lotau boito wau bobooiyaalo boito helo hungguli wolo u malo toduo.

¹⁷Lapataó tuango lipu lomadala boito lomolohone alihu ti Isa mololaa maó lipu boito.

¹⁸Toú ti Isa malo titaé tobulotu, taa u engontielio kiluwaasa lorohu umoleeta boito lamolohone li Isa, alihu tio mowali moduduó.

¹⁹Boti Isa diila akolo, tahudaa-Lio maó, "Pohualingolo wau polelea maó tomongo ilaatamu, wolo u mapilohutu lo Eeya to olemu, wau odito piohio lo Eeya to olemu!"

²⁰ Tau boito olo malonaó, wau helosilita tomadala Mopuulo Kota wolo u mapilohutu li Isa to olio. Ngoáamila tau hilinggolabe loódungoheó.

²¹ Ti Isa luli lohualinga mota ode ngotuwali lobulalo. Tobiihu bulalo boito, ngohuntua tau mai lotiámbu topalito li Isa.

²² Malonaó mai ngotaalio táilunte Yairus. Tio yito ngotaalio lo taúwa bele potabiaalo tokota boito. Touú tio loóonto li Isa, tio malo sujudu totalu li Isa.

²³ Wau lomolohone tióotutua, "Paaá, walaó watia taabua mongongoto daá. Wonu mowali toduwolo ti Paaá mota modedeta olio, alihu tio moluli wau diila mate!"

²⁴ Yi oditolio ti Isa olo malonaó peé-peéenta wolei Yairus. Ngohuntua talo duduó o–Lio wau helo huntula o–Lio lonto totoonulalo tutulio.

²⁵ To wolotalio woluo olo taabua ngota tamaa mopulaa dulo taunu mongongoto pilobaáta loduhu u ááaita wolo hulalio.

²⁶ Ngoáamila okokayalio malo pulito hepilo makelio lomayali oli dokuteli, bo diaaluo penu boli ngotaa maó talo poóluli olio, tumbaó ngongotio bo lebe tilihua.

²⁷ Taabua boito maloó dungohe dadaata pasali li Isa. Yi to huungo lotaa dadaata, tio lohimbideó li Isa loli wulea,

²⁸ sababu to pikiilangilio, "Asalipo waú moódedeto jumba-Lio, waú mamoluli!"

²⁹ Tio malo dedeta jumba li Isa, wau tou boitolo mola duhulio tilumonggodu. Tio loólaasa deú tio maloluli.

³⁰ Tou boitolo ti Isa loólaasa deú woluo lotolo u yilumualai lonto batanga-Lio. Yi Tio malo milohe ode taa dadaata boito wau lohintu maó, "Tatoonu talo dedeta jumba-Ú?"

³¹ Tahiduduá o-Lio lolóiya maó, "Bilohilo li Paaá lohihilao odito huntualio lo tahipo huhuuntude. Wau ti Paaá donggo hemohintu, tatoonu talo dedeta jumba li Paaá?"

³² Boti Isa debo tulusi hemo milohe mota topali-Tio u mololohe tamalo dedeta o-Lio.

³³ Taabua boito tamotota wolo u mailowali to batangalio, yi wolo hulu-huluhelio wau yiloohe tio losujudu mola totalu li Isa wau longaku ngoáamilalo.

³⁴ Lapataó ti Isa lotahuda maó ode taabua boito, "Walaúu-Ú, sababu yió palacaya

ola-Ú, yió maloluli! Ponaólo wolo loáahu. Yió masileehati sama-samaata!"

³⁵ Touú ti Isa donggo hemo tahuda, dengolo lota tamoomayawa lonaó mai lonto bele lei Yairus. "Pusili li Tuani mailate," uali mongolio odelei Yairus. "Diilalo maó poósuusawa li Tuani ti Paaá Guru."

³⁶ Louú diila lomandungi wolo uiloíya lotau-tauwalo boito, ti Isa malo tahuda odelei Yairus, "Diila oohe, pomalacayalo wambaó!"

³⁷ Lapataó ti Isa lonaó tulusi, bo diila yiluasía-Lio penu boli ngotaa maó talo duduá o-Lio, ngopohia tei Petrus wolei Yakobus wau tei Yahya mohutato.

³⁸ Touú timongolio leidungga mola ode bele lei Yairus, ti Isa loóonto owowoluwoa lo laba-labaalo buluhuta, wau loódungohe tahe hiyonga wau hihunggalaá daá.

³⁹ Lapataó ti Isa tilumuwotaó wau lotahuda ode limongolio, "Yilongola hibuluhuta wau hehiyonga? Walaó boito diila yilate; tio bo tuutuluhu!"

⁴⁰ Ti Isa bo hepilo iíiya limongolio. Yi Tio maléí lualaó olimongolio ngoáamila. Lapataó Tio lodelo tilumuwota mongo

dulaá lowalaó boito wau toulota tahiduduá o–Lio ode delomo huwali lowalaó boito.

⁴¹ Ti Isa lodihu uluú lowalaó boito lapataó lotahuda maó olio, "Talita kumi," uboliilio maó, "Walaó taabua, Waú motahuda mai olemu: pobongulo!"

⁴² Walaó tadulahu boito lato lobongu mola, wau lodiambango. (Umululio mamopulaa dulo taunu). Ngoáamila tahi sakusia u lotoduo boito lolinggolabe daá.

⁴³ Boti Isa lodini wolo loóohuú olimongolio alihu timongolio diila mopohabari suáli boito boli olo tatoonu. Lapataó tahuda–Lio, "Potamela maó walaó boito."

6¹ Lonto tambati boito, ti Isa lohualingo peé–peéenta wolo tahiduduá o–Lio ode kambungu pilohuluta loduhu–Lio.

² Todulahu Saabati Tio malo lumulo longaajali tobele potabiaalo. Woluo taa ngohuntua teto. Tou tau–tauwala boito loódungohe pongaajali li Isa timongolio lolinggolabe daá. Timongolio malo loíya, "Lonto utoonu tau botie loótapu ngoáamilalo boito? Tinepo odelo wolo utie uwoluo to o–Lio? Woloolo mola Tio mowali mohutu moólinggolabe?"

³ Diila maa Tio botie walaó pani lo ayu, walaí Maria, wau wutatee Yakobus, Yoses, Yudas, wau Simon? Ooó, mongo wuta–Tio taabua woluo olo hibiluloáwa tewe." Sababu uito timongolio diila lololimo o–Lio.

⁴ Tulusi ti Isa lotahuda maó ode limongolio, "Nabi ngota hulumatiolo boli touótonu, ngopohia to kambungu pilohuluta loduhulio, wau towolota lomongo ilaatolio wau ngaalaálio."

⁵ To tambati boito ti Isa diila loóhutu penu boli tuwau maó u moólinggolabe, ngopohia lopoóluli dengolo lota tahi ngongota wolo lopodutu uluú–Lio toimbupulu limongolio.

⁶ Tio lolinggolabe deú timongolio diila palacaya. Lapataó ti Isa lonaó mola ode kakaa–mbunguwalo topalitio boito wau helo ngaajali.

⁷ Tio lotiangai mopulaa duulota tahiduduá o–Lio, tulusi lolao olimongolio duduulota wau longohi kawasa olimongolio u mopohinggi roroo–huwaalo u moleeto.

⁸ Tio longohi potuhata odie olimongolio, "Diila maó podelo wolo–wolo tononaó limongoli, ngopohia tunggudu. Diila maó

podelo uáalo meaalo bututu losadaka, meaalo doi.

⁹ Pomake maó sapatu, bo diila podelo boó dulopita."

¹⁰ Tio olo lotahuda, "Wonu timongoli tumuwoto ode bele ngowale, poti biluloópo teto tunggula timongoli mololaa maó kota boito.

¹¹ Bo wonu timongoli meidungga totambati tuwau, wau tau-tauwalo teto diila mololimo wau diila mohuto modungohe olimongoli, tolai maó tambati boito. Wau pongeéya maó peahuó monto paladu oáatumu odelo poéela olimongolio!"

¹² Yi mopulaa duulota tahiduduá li Isa boito malo monggato. Timongolio lonaó lopo loladu habari deú manusia musi molilihu monto duduu-sawaalo.

¹³ Tahiduduá li Isa boito lopohinggi ngohuntua rohu u moleeto, lomadeta yinulo jaitun totahi ngongota wau helo poóluli olimongolio.

¹⁴ Habari pasali lo ngoáamila u lotoduo boito debo leidungga mola olo toli Olongia Herodes, sababu tangguli Isa maílotaawa lotaa dadaata boli toútoonuu. Woluo taa u hipo loiyawa, "Tei Yahya Tamopolihua

maluli tilumumulai! Uitolo sababuulio Tio okawasa helohutu u moólinggolabe boito."

¹⁵ Bo tau–tauwala wewo hipo loíyawa, "Tio Elia." Woluo olo talo loíya, "Tio nabi, debo odelo tala ngota lonabi tojamani muloololio mai."

¹⁶ Toú tei Herodes loódungohe uito, tio malo loíya, "Tantu utieelo tei Yahya Tamopolihua u muloololio mai mapileí timadeú lunggongio. Botia tio maluli tilumumulai!"

¹⁷ Sababu toú diipo uito tei Herodes maleí waúpo olei Yahya, wau lopotuwoto olio ode delomo tutupa. Tei Herodes lohutu odito sababu pasali li Herodias, dile lowutatio lohihilao, deúito–yito tei Pilipus. Sababu tei Herodes malonika woli Herodias,

¹⁸ wau pasali losuáli boito tei Yahya mapipiiúwa helodini olei Herodes odie mola, "Diila mowali yió monika wolo dile lo wutatumu boito."

¹⁹ Uitolo sababuulio ti Herodias loniyati olei Yahya wau ohilaa momate olei Yahya mate–mateelo maó, bo tio diila mowali mohutu suáli boito, sababu laito helabuto lei Herodes.

²⁰ Sababu tei Herodes malo poáhu tau lodaha olei Yahya tióotutua alihu tio moáahu to tutupa, sababu tio moohe olei Yahya. Otaawalio tei Yahya tau ngota mopiohe tailao mai lo Allahu Taáala. Wau memangi wonu tei Yahya mobisala, tei Herodes motohilaa olo modungohe olio, penu boli tio mowali balisa daá sababu tio.

²¹ Pulitio maó ti Herodias i lohiyango todulahu ilowali mai lei Herodes. Tou boito tei Herodes lohutu potihunggu ode ngoáamila tahi opanggatia molanggato to bele biluloá saaha li olongia, mongo polowila wau tahi o tanggulawa to Galilea.

²² To potihunggu boito walái Herodias tadulahu helo ngelungo, wau elungio boito loósanangi daá hilaa lei Herodes wolo tahe tiloduwolio. Yi tei Herodes malo loíya ode tadulahu boito, "Yió motohilaa wolo, bolo pohileaalo. Mawohiú mai olemu wolo u otohilaamu!"

²³ Lapataó tei Herodes malodanti ode tadulahu boito wolo tadia. Tei Herodes lolóya maó, "Penu boli wolo u pohilemu mawohiú mai, penu boli ngotayadu lo yilaidiyaú peéntalo maó!"

²⁴ Yi tadulahu boito mailumualo wau lohintu oli maamalio, "Maama wolo

pulito u mopiohe u musi pohile lowatia?"
Timaamalio lolametaó, "Pohilea maó
lunggongee Yahya Tamopolihua."

²⁵ Tadulahu boito huáa lohualingai odelei
Herodes wau loloíya maó, "Watia mohile
lunggongee Yahya Tamopolihua wohia
mai olaatia to saaátilo botie tanitani mai
tobaki tuwau!"

²⁶ Loódungohe hihile boito tei Herodes
masiluukali daá. Bo tio didu mowali
mopotouli hihile boito sababu tio malo
tadia totalu lo tahe tiloduwolio.

²⁷ Oditolio tio lato lomalentaó ngotaalio
lo tamoo–kawalia olio mota lohama mai
lunggongee Yahya Tamopolihua boito. Yi
pajule boito malonaó mota ode tutupa,
lapataó malo limadei lunggongee Yahya.

²⁸ Lapataó dilelolio mai lunggongo boito
tanitani tobaki wau yiludulio ode tadulahu
boito. Wau tadulahu boito longohi maó
odeli maamalio.

²⁹ Touú tahiduduá olei Yahya loódungohe
suáli boito, timongolio malonaó mola
lohama milate lei Yahya boito, tulusi
yilobungio.

³⁰ Mongo rasulu taheilao li Isa boito
lapataó luli lohualingai, wau lotiámbu woli
Isa. Timongolio mai lopodulohu o–Lio

ngoáamila u mapilohutu wau pilo ngaajali limongolio.

³¹ Dadaata daá tahi ponaówa mai wau tahipo hualinga, tilinggula didu otembo penu bo ngoídi maó ti Isa wau tahiduduá o–Lio molamelo. Sababu uito ti Isa lotahuda ode tahiduduá o–Lio, "Duloolo ito monaó ode tambati udiila otau, touútoonu bo ito–itoolo wambaío wau timongoli mowali mohuheli ngopeé mola."

³² Yi timongolio olo malo monggato wolo bulotu hitalua ode tambati udiila otau.

³³ Bo dadaata tau maloóonto olimongolio touú lololaa maó tambati boito, wau helotota tatoonu timongolio. Oditolio, lonto ngoáamila kota tomadala boito, tau–tauwalo hiteteá loli tudulio lotimulo mota woli Isa wau tahiduduá o–Lio.

³⁴ Touú ti Isa lolaaheó lonto bulotu, Tio loóonto taa dadaata. Lodehu hilaa–Lio olimongolio, sababu timongolio debo odelo himba u diilalo oditilio. Yi Tio malo lumulo helo ngaajali dadaata suáli olimongolio.

³⁵ Touú malo laangio mola, tahiduduá li Isa lolóiya maó o–Lio, "Bolo ngopeé mai maahui wau tambati botie tihitihi.

³⁶ Lebe mopiohe ti Paaá mopoáhu mota tau-tauwalo botie monaó, alihu timongolio mota motali mai uáalo to kakaa-mbunguwalo wau to dedee-sawaalo totili maó lewe."

³⁷ Boti Isa lolametaó, "Timongolilo tamongohi maó olimongolio uáalo." "Waa, wolo amiaatia musu mota motali mai roti ngohalaga dulo hetuto doi talaá wau mopo tamela olimongolio botie?" odito ualo tahiduduá li Isa boito.

³⁸ Lapataó yilintu maó li Isa, "Ngoolo roti tolimongoli? Nte mota bilohi mai." Lapataó mota bililohei limongolio, malo loíya timongolio, "Woluo roti limo lobutu wau woluo olo dulo botu uponula."

³⁹ Lapataó ti Isa malo poáhu ngoáamila tau boito lotihuloá ngopo-ngopolemboá tohuóyoto u moidu.

⁴⁰ Tau-tauwala boito olo lotihuloá wolo hiáatulua, ngopo-ngopolemboá. Woluo u ngohetuto lota ngopolemboá, wau woluo olo limo lopulu lota ngopolemboá.

⁴¹ Lapataó ti Isa lohama maó limo lobotu roti wau dulo botu uponula boito, tulusi yilumanggela mola ode hulungo wau lolapali sukuru ode Allahu Taáala. Lapataó uito, Tio malo mita-mitangaó roti boito

wolo uluú–Lio wau longohi maó ode tahiduduá o–Lio u taya–tayadulo ode taa dadaata boito. Wau uponula dulo botu tila–tilayadio olo ode limongolio ngoáamila.

⁴² Timongolio malo lamela tunggula lobutuhu.

⁴³ Lapataó lebelio loú aalo boito yilimoó lo tahiduduá li Isa, ngoáamilalo woluo mopulaa dulo kalanji hipolua.

⁴⁴ Mongo loláí talo lamela roti boito woluo otanu limo lolihu lota.

⁴⁵ Lapataó uito ti Isa huáa lopoáhu to tahiduduá o–Lio lomonggato wolo bulotu leimulo wo–Lio ode Betsaida to ngotuwali lobulalo, wau Tio donggo hemeí walinga mota taa dadaata boito.

⁴⁶ Lapataó leí walinga mota taa dadaata boito, ti Isa lonaó ode huludu mola loduá.

⁴⁷ Tou maahui mai, bulotu lo tahiduduá o–Lio maamota tohuungio lobulalo, hiambola ti Isa donggo totudulio.

⁴⁸ Tio loóonto mota olimongolio malo tióopatea hipobiteya bulotu boito sababu dupoto boito lalaawania dulungio wolo bulotu. Sababu uito, tanu towolota jamu 3 wau jamu 6 dimodupo, Tio lonaó mai ode limongolio loli tudu lotaluhu. Wau Tio

Ionaó tulusi debo odelo malumaodeó to limongolio.

⁴⁹Toú iloontonga limongolio deú Tio Ionaó totudu lotaluhu, yi yilantobi mongolio Tio ponggo,

⁵⁰tilinggula timongolio hiwatiá mailoohe daá. Sababu timongolio ngoáamilalo loóonto o–Lio wau timongolio iloohea daá. Boti Isa lato lotahuda maó olimongolio, "Potiduóotolo mola! Waú Isa. Diila oohe!"

⁵¹Lapataó Tio lobotulaó ode bulotu limongolio, yi dupoto olo mailoole lomola. Tahiduduá li Isa malo linggolabe daá.

⁵²Olinggolabe wolo roti limo lobotu boito debo diipo ilopahamua limongolio. Mototolo olimongolio u mongalati.

⁵³Toú leidungga mola ode ngotuwali lobulalo, timongolio lotilabua topentadu lo Genesaret.

⁵⁴Toú timongolio yilumualai lonto bulotu, tau–tauwala loóonto deú talei dungga mai boito ti Isa.

⁵⁵Lapataó timongolio bolo hitete–teteéá ode utoonulalo maó to ngoilanggubu madala boito, wau malodelo mai tau–tauwalo tahi ngongota boito to amongo odeli Isa. Wonu timongolio moódungohe deú ti Isa woluo totambati tuwau, hedeloo

limongolio tau–tauwalo tahi ngongota boito odito mola.

⁵⁶ Boli touútoonu ti Isa meidungga -- mopio to kambungu, tokota meaalo todesa -- teto olo tau laito hiponaówa mai wau mopo balataó tau–tauwalo tahi ngongota limongolio boito to tanalapa. Lapataó timongolio méi poluasi wolo tióotutua alihu tau–tauwalo tahi ngongota boito moódedeta jumba li Isa penu bo biihio. Ngoáamila tahe loódedeta jumba boito, maloluli.

7¹ Ngopolemoá tau lo Parisi wau dengolo lota guru lo agama lonto Yerusalemu, lonaó mai odeli Isa.

² Timongolio loóonto dengolo lota tahiduduá li Isa hipo lamelawa wolo uluú udiila belesi odelo dudelo lo agama, deúito–yito loú diila hiwulowa uluú leimulo loduduá wuúdu lo agama.

³ Tau–tauwalo Parisi, odito olo ngoáamila tau lo Yahudi, tatapu wau molotolo hilao hipo duduáawa uúdu linenemoya limongolio. Timongolio diila tamo lamelo, touú diipo mongulo uluú moduduó dudelo utantu–tantu.

⁴ Wolo u taliyolo topaatali diila tamelolo, touú diipo wulowalo meimulo.

Wau ngohuntua wuúdu wewo monto linenemoya limongolio u tióotutua hedihuma limongolio; debo odelo humayaalio wuúdu mongulo halati, mango, wau pakaa–kasiyaalo tombaha.

⁵ Sababu uito tau–tauwalo Parisi wau guguu–ruwaalo agama boito helohintu li Isa, "Yilongola tahiduduá ole–Mu boito hemo lamela wolo uluú udiila hiwulowa? Wolo sababuulio timongolio diila moduduó uúdu linenemoyanto?"

⁶ Ti Isa lolametaó, "Timongoli tau–tauwalo munapiki! Tiluhata tutu wolo upilo nubuwati mai lei Yesaya pasali limongoli, deúito–yito, 'Odie mola tahuda lo Allahu Taáala, Tau–tauwala boito bo molubo ola–Ú wolo loíya, bo hilaa limongolio molamingo monto ola–Ú,

⁷ Diila ohunalio timongolio molubo ola–Ú, sababu wuúdu lomanusia u hepo ngaajali limongolio odelo hamahama uito wuúdu–Ú!"

⁸ Papaa–lentawalo Allahu Taáala hepalongo limongoli, wau wuwuu–uduwaalo manusia hedihuma limongoli tióotutua."

⁹ Lapataó ti Isa luli lotahuda maó, "Timongoli motoloáa daá diila mololimo

palenta lo Allahu Taáala alihu mowali mopoó tohetaó pongaajali limongoli lohihilao.

¹⁰ Tei Musa malongohi mai palenta botie, 'Hulumatia maó tiyamamu wau tiilamu,' wau 'Titaalo tita tamolo-moloíya oliyamolio wau oliilolio, mamusi hukuu-maniyola mate-mateelo maó.'

¹¹ Bo timongoli helo ngaajali: Wonu tamoloíya tomongo dulaálio, 'Wolo u patutilio wohi lowatia odeli paapa woli maama, mapilodewo lowatia ode Allahu Taáala,'

¹² yi timongoli molopato tau boito monto uwajibu olio u motulungi olipaapa woli maamalio.

¹³ Oditolio wolo pongaajalimu lohihilao uilohi limongoli ode tau-tauwala, timongoli hemo podiaalu tahuda lo Allahu Taáala. Donggo ngohuntua suáli debo odelo utie u hepohutuo limongoli."

¹⁴ Lapataó ti Isa peéentapo lotiangai taa dadaata boito wau lotahuda maó olimongolio, "Podungohulo alihu mongalati!

¹⁵ Diaaluo u hitua-tuawua monto bulemengio tumuwoto ode delomo tau umoó najisi olio. Boliño maó, u lumualai

monto tahingota-ngotaawa, ui-uitolo umoó najisi olio.

¹⁶ [Oditolio, wonu obulonga podungohulo.]"

¹⁷ Tou ti Isa lololaa maó taa dadaata boito wau tilumuwoto ode delomo bele, tahiduduá o-Lio lohintu o-Lio pasali makusudu lo pohumaya boito.

¹⁸ Yi ti Isa lotahuda maó olimongolio, "Wolo timongoli debo diipo mongalati? Wolo diila opahamua limongoli deú u tumuwoto ode delomo tahingota-ngotaawa diila moóhutu tau boito najisi?

¹⁹ Sababu u tumuwoto boito diila moli hilao bo moli ombongo, wau lapataó muli lumualai." Wolo tahuda boito ti Isa lopoó patataó deú ngoáamila uáalo halale.

²⁰ Lapataó ti Isa luli lotahuda maó, "U lumualai monto tau, ui-uitolo u mopo najisi olio.

²¹ Sababu monto delomio, deúito-yito monto delomo hilao, tumoodei pipii-kilangiyalo moleeto u moósababu tau boito mohutu u huloto, motaó, momate mate-mateelo maó,

²² mojina, mohimbulo, mopitana, wau mohutu totoonulalo u moleeto, mowali

tamaá, diila o adabu, mohiihia, sombongi, wau mototolo ajaliiyolo.

²³ Ngoáamila umoleeta boito tumoodei monto delomio, wau ui–uitolo umoó najisi tau."

²⁴ Lapataó ti Isa lololaa maó tambati boito, wau lonaó mola ode madala totili lokota Tirus. Tio tilumuwoto ode delomo bele ngowale wau diila mohuto otaawa lotau deú Tio woluo teto. Bo Tio diila lowali lotituuó.

²⁵ Ti ibu ngota, tawalaío taabua maílo tuanga lorohu u moleeto, loódungohe pasali li Isa. Tio lonaó mai odeli Isa wau malo sujudu totalu–Lio,

²⁶ sambela lomolohone alihu ti Isa mopohinggi rohu u moleeto boito monto walaío. Taabua boito diila taulo Yahudi, pilotutulio tomadala lo Penesia to Siria.

²⁷ Ti Isa lotahuda maó olio, "Taúkekeéi musi wohiyalo uáalo meimulo. Diila mopiohu mohama uáalo lo taúkekeéi wau pomahulola ode apula."

²⁸ "Tuani," tametaó lotaabua boito, "aáapulaalo to walungo meja olo hemongaa lalaa–bitowaalo u hetapilo mola lo taúkekeéi!"

²⁹ Lapataó ti Isa lotahuda maó olio, "Sababu totametumu boito, pohualingolo; rohu u moleeto mailumualo lonto walaúmu!"

³⁰ Ti Ibu boito malo hualingo. Tobele, ilodunggaalio walaío donggo balabalata to potuluhe, wau rohu u moleeto tutuulio–tutu mailumualo lonto walaío boito.

³¹ Lapataó ti Isa lololaa maó lipu Tirus, wau lopo tolonga mola lononaó–Lio loli Sidon ode Bulalo Galilea. Tio lohama dalalo lolibaya tomadala Mopuulo Kota.

³² Mota teto tau lodelo mai ode o–Lio ngotaalio tabuubu wau bungolo. Timongolio lomolohone li Isa alihu mopodutu uluú–Lio toimbupulu lotau boito.

³³ Ti Isa lodelo tau boito lotitihi mota lonto taa dadaata, lapataó lopodutu tingongoa lo uluú–Lio ode delomo oluo bulonga lotau boito. Tulusi ti Isa lonula maó loiyohu, wau lodedeta dila lotau boito.

³⁴ Lapataó uito Tio yilumanggela mola ode hulungo, tulusi lohilao daá wau lotahuda ode tau boito, "Epata," uboliilio maó, "Weáweáalo!"

³⁵ Bulonga lotau boito lotiweá wau dilalio luli loluóyo, wau tio malo bisala louú gambangi.

³⁶ Lapataó ti Isa lodini olimongolio ngoáamila alihu timongolio diila tamosilita suáli boito penu boli olo tatoonu. Bo lebe hedinio li Isa, timongolio bo lebe hepilo loladio habari boito.

³⁷ Wau ngoáamila taloó dungohe uito hilinggolabe daá. Timongolio hipo loíyawa, "Ngoáamilalo hepilohutu–Lio louú mopiohu! Tumbaó Tio lohutu taa bungolo loódungohe wau taa buubu loóbisala!"

8¹ Diila lohiheo lapatio maó woluo poli taa ngopo lemboá dadaata lonaó mai lotiámbu. Sababu timongolio diila o uáalo, ti Isa malo tiangai tahiduduá o–Lio wau lotahuda maó,

² "Lodehu hilaa–Ú totaa dadaata botie. Matolohui hiheolio timongolio wola–Ú, wau botia timongolio maílo pulita louú aalo.

³ Wonu Waú mopowalinga mota olimongolio wolo ombongo hipolaanga, timongolio maóleeta lohilao tohuungo dalalo. Tidiyolo maó towolota limongolio woluo talonto u molamingo."

⁴ Tahiduduá li Isa lolametaó, "Totambati u tihitihi mai botie, touútoonu mowali

poótapulalo uáalo mowali moótuheo totaa ngoáamila botie?"

⁵ "Ngoolo maó daatalio roti to limongoli?" yilintu li Isa. "Pitu lobotu," tametaó limongolio.

⁶ Yi ti Isa lopoáhu totaa dadaata boito lotihuloá tohuta, tulusi Tio lohama roti pitu lobotu boito wau lolapali mola sukuru ode Allahu Taáala. Lapataó Tio lomita-mitangaó roti boito wolo uluú-Lio wau yilohi-Lio ode tahiduduá o-Lio alihu taya-tayadulio mota ode tau-tauwalo. Yi tahiduduá o-Lio malohutu odito.

⁷ Timongolio olo o uponula kekeéi dengolo botu. Ti Isa lolapali mola sukuru ode Allahu Taáala to uúu-ponulaalo boito, lapataó lopoáhu to tahiduduá o-Lio helo laya-layadeó olo uúu-ponulaalo boito olo.

⁸ Timongolio lolamelo tunggula lobutuhu -- woluo tanu wopato lihu lota talo lamelo. Lapataó tahiduduá li Isa lohimoá lebelio loú aalo -- pitu lokalanji hipolua. Tulusi ti Isa helo poáhu totau-tauwalo boito lohualingo,

⁹ (8:8)

¹⁰ wau Tio wolo tahiduduá o-Lio lato lotitaé tobulotu wau lonaó ode madala Dalmanuta.

¹¹ Dengolo lota taulo Parisi lonaó mai odeli Isa, wau helo hahaamawa wo-Lio u mohentabu olio. Timongolio meíhutu li Isa u moólinggolabe odelo tuoto deú Tio lonto Allahu Taáala.

¹² Ti Isa lopoílaalo suusa tulusi lolametaó, "Wolo sababuulio tau-tauwala tojamani botie meíhutu ola-Ú u moólinggolabe? Diila! Waú diila tamongohi tuoto odelo uito ode limongolio!"

¹³ Lapataó ti Isa lololaa maó olimongolio, wau tilumuwoto ode delomo bulotu; tulusi lobite ode ngotuwali lobulalo boito.

¹⁴ Tahiduduá li Isa loólipato lodelo roti u tutuúde. Timongolio bo wambaó oroti ngobotu tobulotu.

¹⁵ "Poódaha-dahaalo maó toragi tau-tauwalo Parisi wau rahi lei Herodes," tahuda maó li Isa ode limongolio.

¹⁶ Yi tahiduduá li Isa boito mahipo bisalawa losuáli boito. Timongolio hipo loíyawa, "Tio loloiya odito, sababu ito diila oroti,"

¹⁷ Otaawa li Isa wolo u heposuália limongolio. Sababu uito Tio lohintu maó olimongolio. "Yilongola timongoli hemopo suáli pasali diila oroti? Wolo diila otaawa

limongoli wau debo diipo mongalati olo?
Odito puntuhu pikiilangimu?

¹⁸Timongoli omato -- yilongola diila moóonto? Timongoli obulonga -- yilongola diila modungohu? Madiila iloéela mola limongoli

¹⁹toroti limo lobotu boito u mapili-pilitangu-Ú ode talimo lolihu lota? Ngoolo kalanji lebe loú aalo uilimoí mongoli?" "Mopulaa duluo," tametaó limongolio.

²⁰"Wau tou Wau helo mita-mitango roti pitu lobotu ode tawopato lihu lota," yilintu maó li Isa poli, "ngoolo kalanji lebelio loú aalo u mailimoí mongoli?" "Pitu," tametaó limongolio.

²¹"Naa, debo diipo olo mongalati timongoli?" tehuda maó li Isa poli.

²²Timongolio malei dungga mota ode Betsaida. Mota teto tau lodelo mai taa pitoó ngota odeli Isa, wau lohile alihu ti Isa modedeto mato lotaa pitoó boito u mopoóluli olio.

²³Yi ti Isa malodihu uluú lotaa pitoó boito wau lodedeá olio ode bulemengo kota boito. Lapataó ti Isa lonula loiyohu tomato lotaa pitoó boito. Tio lopodutu uluú-Lio tomato lotaa pitoó boito, tulusi

lohintu maó olio, "Mamowali moóonto yió u hitua-tuawua masaatia?"

²⁴ Tau boito lomilohe mota ode talulio, tulusi lolóiya, "Joo, watia maloóonto tau hinaó-naówa; bo timongolio oontonga debo odelo batango ayu."

²⁵ Ti Isa luli lopodutu uluú-Lio tomato lotau boito. Peéenta botie tau boito malo tolopani lomilohe wolo otu-otutuulo maó. Matolio loluli, wau tio maloóonto ngoáamilalo loú mopatato daá.

²⁶ Lapataó ti Isa lotahuda maó olio, "Pohualingolo, wau diilalo pohualinga mota ode kota boito."

²⁷ Ti Isa wau tahiduduá o-Lio lonaó mota ode kaka-mbunguwalo totili lo Kaisarea Pilipi. Tohuungo dalalo ti Isa lohintu olimongolio, "Moduduá loíya lotau, tatoonu Waú botie?"

²⁸ Timongolio lolametaó, "Woluo talo loíya: Tei Yahya Tamopolihua; woluo olo talo loíya tei Elia, wau tawewo poli lolóiya: tala ngota lonabi."

²⁹ "Bo moduduá olimongoli lohihilao, Waú botie tatoonu?" yilintu maó li Isa. Tei Petrus lolametaó, "Ti Paaá yito Olongia Tamoo-poáhua!"

³⁰ Tulusi ti Isa lopoéelaó olimongolio, alihi diila mopoótaa penu boli olo tatoonu pasali lo batanga–Lio.

³¹ Lapataó uito ti Isa malo lumula longajali to tahiduduá o–Lio deú Walaó Manusia mamusi modutolo sikisa dadaata wau tuwalia lomongo taúwa, mongo iimamu taúwa, wau guguu–ruwaalo agama. Tio mapateelio mate–mateelo maó, bo toótolu dulahu Tio mamuli bongulo–Lio mai.

³² Wolo lopatato daá ti Isa lopoótaa suáli boito ode tahiduduá o–Lio. Yi tei Petrus lomantanga li Isa ode ngotuwali, wau lodini o–Lio.

³³ Boti Isa loili wau lomiloheó to tahiduduá o–Lio, tulusi longentela olei Petrus, "Pohinggi maó monteea, Tamoo–heingawa ode dusa! Pikiilangimu boito pikiilangi lomanusia; diila pikiilangi lo Allahu Taáala!"

³⁴ Lapataó ti Isa lotiangai taa dadaata tawoluo teto peé–peéenta wolo tahiduduá o–Lio. Tulusi Tio lotahuda maó ode limongolio, "Taa motohilaa moduduá ola–Ú, mamusi molipataó u polohuna daáalio lohihilao, lapataó momota salipulio, wau tulusi moduduá ola–Ú.

³⁵ Sababu taa umotohilaa momintengi tutumulio, maóolia lo tutumulio. Bo taa u mopobake tutumulio ode ola–Ú wau ode Habari Mopiohe monto Allahu Taáala mapo aahuwolio.

³⁶ Wolo paédaalio ode tahingota–ngotaawa, wonu ngoilanggubu dunia botie mowali milikiilio, bo tio maóolia lo tutumulio?

³⁷ Tingga mowali tutumulo boito tuloáalo wolo u hitua–tuawua?

³⁸ Wonu tahingota–ngotaawa moolito momasisi ola–Ú wau pongaajali–Ú tojamani diila moéelo to palenta wau u moleeto botie, Walaó Manusia olo mamoolito mongaku totau boito, tou Tio demei dungga wolo kawasa li Paapa–Lio diluduá lo mamaa–líkatiyalo tamantali."

9¹ "Ototai maó!" tahuda li Isa, "Towolota limongoli tewe woluo tadiila mate tou diipo moóonto Allahu Taáala momalenta wolo kawasa!"

² Wolonggui mola lapatio maó ti Isa lodelo olei Petrus wolei Yakobus wau wutatio tei Yahya, lotitahi mola ode huídee tuwau u molanggato. Totalu lomato limongolio ti Isa loboliólo mola lakulio.

³ Pakeyangi–Lio malowali loputiío heĩnta–
intaawa. Diaaluo penu boli ngotaa maó
todunia botie tamoó buboáa debo odelo
putiío leeto.

⁴ Lapataó tahiduduá o–Lio toulota
loóonto li Isa hemo bisala wolei Elia wau
lei Musa.

⁵ Yi tei Petrus loloíya maó odeli Isa, "Paaá
Guru, mopiohe tutu ito teaa botie. Lebe
mopiohe mongo watotia momongu maó
kema mohelu totolu: tuwau uwoli Paaá,
tuwau uwolei Musa, wau tuwau uwolei
Elia."

⁶ Otutuulio maó diila otaawa lei Petrus
wolo u musi loíyaalio, sababu tio wolo
taduulota tamanilio donggo hiwoohea
daá.

⁷ Lapataó heengo lohenggubei
olimongolio wau lonto heengo boito
dungo–dungohei suala lotahuda mai,
"Tabotieelo walaúu–Ú tapilonu–Ú.
Podungohulo o–Lio!"

⁸ Lolamemeto timongolio lomilohe mota
topalito limongolio, wau diilalo loóonto
penu boli tatoonu teto peé–peéenta woli
mongolio, ngopohia boti Isa.

⁹ Touú timongolio hilaahe mola lonto
huídee boito, ti Isa lopoéelaó olimongolio,

"Diila maó polelea boli olo tatoonu wolo u iloontonga limongoli engonti toú Walaó Manusia diipo bongulo-Lio mai monto opopate."

¹⁰ Timongolio lodungoheó tahuli boito, bo towolota limongolio lohihilao mahi poloíyawa wolo makusudu li Isa loú "Muli tumumulai monto opopate".

¹¹ Yi timongolio malohintu o-Lio, "Yilongola guguu-ruwaalo agama hemoloíya deú tei Elia musi meidungga mai meimulo?"

¹² Ti Isa lolametaó, "Tei Elia memangi meidungga mai meimulo u mopobelesi maó totoonulalo u hitua-tuawua. Bo woloolo mola suáliilio wolo Walaó Manusia? Wolo sababuulio todelomo Kitabi tulatulade deú Tio mamodutolo sikisaa dadaata wau hinaa lotau?"

¹³ Bo Waú motahuda mai olemu; Tei Elia malei dungga mai, wau tau-tauwalo helohutu olio totoonulalo u otohilaa limongolio. Uito lutuuúde loú malei tulade todelomo Kitabi pasali lo batangalio."

¹⁴ Toú ti Isa wau toulota tahiduduá o-Lio mailoluo poli peé-peéenta wolo tahiduduá o-Lio wewolio, timongolio loóonto dadaata taa teto. Dengolo lota

guru lo agama donggo hemo haamawa wolo tahiduduá li Isa boito.

¹⁵ Odito tau-tauwala boito loóonto li Isa, timongolio malei tontongo, tulusi hiteteá lolutulai o-Lio.

¹⁶ "Wolo u hepo susuuália limongoli wolo guguu-ruwaalo agama boito?" yilintu maó li Isa ode tahiduduá o-Lio.

¹⁷ Ngotaalio lotaa dadaata boito lolametaó, "Paaá Guru, watia lodelo mai walaó watia odeli Paaá. Tio buubu sababu ilotuangá lorohu u moleeto.

¹⁸ Wonu rohu umeleeto boito moluhu olio, wawaío hepo banti-bantilio tohuta, ngangolio lombu-lombula loiyohu, dungitio polo-polotolio wau ngoáamila wawaío mobualodu didu moóonema. Mapilohile lowatia to tahiduduá li Paaá u mopolahi rohu u moleeto boito, bo diila lowali limongolio."

¹⁹ Yi ti Isa lotahuda maó ode limongolio, "Mailaba timongoli botie! Timongoli tutuulio tutu taa diila palacaya. Tunggula omolua Waú musi motibiluloá peé-peéenta woli mongoli wau mosabali toli mongoli? Deloa mai walaó boito odia mai!"

²⁰ Timongolio olo malodelo mai walaó boito odeli Isa. Odito rohu umoleeta

boito loóonto li Isa, hepilo hutulio wawaó lowalaó boito hemo pohelu–heluto tilinggula walaó boito lodehu lo liliilide tohuta. Ngangolio lombu–lombula loiyohu.

²¹ Lapataó ti Isa malohintu toliyamo lowalaó boito, "Mangoolo maó hiheolio tio odie?" "Anggadu tio donggo ukikiiái!" tametaó liyamolio.

²² "Matingga maito rohu u moleeto boito hemo tolopani momate olio mate–mateelo maó wolo mopodehu olio ode tulu meaalo ode delomo taluhu. Bo wonu ti Paaá mowali motulungi maó, ambunguolo ti Paaá momonu wau motulungi mai olamiaatia!"

²³ "Wolo heloíyamu? Wonu ti Paaá mowali?" tametaó li Isa. "Ngoáamilalo mowali, asali tau palacaya!"

²⁴ Lolamemeto tiyamo boito longuatió, "Eeya, watotia palacaya, bo iimani lowatotia iíilangi. Ambunguolo tulungia mai watotia alihu watotia lebe palacaya maó!"

²⁵ Touú ti Isa loóonto deú taa dadaata mahi ponaówa mai lotiámbu, yi Tio lomalantaó rohu umoleeta boito wolo lotahuda maó, "Rohu bungolo wau rohu

buubu, Waú momalenta olemu luwalaó monto walaó botie wau sama–samaata diilalo potuwotai to olio!"

²⁶ Rohu u moleeto boito malo nguatió, tulusi lohutu wawaó lowalaó boito hemo pohelu–heluto, lapataó tio mailumualo lonto walaó boito. Walaó boito oontonga debo odelo milate tilinggula ngoáamila tau hipo loíyawa, "Tio mailate!"

²⁷ Boti Isa lodihu uluúlio wau lotulungi olio lobongu. Walaó boito olo malobongu.

²⁸ Tou ti Isa maatobele, tahiduduá o–Lio lonaó mai ngota–ngota ode o–Lio wau lohintu, "Wolo sababuulio amiaatia diila lowali lopolahi rohu u moleeto boito?"

²⁹ Ti Isa lolametaó, "Rohu u moleeto debo odelo uito diila mowali polahiyola penu boli loolo, ngopohia wolo duá."

³⁰ Ti Isa wolo tahiduduá o–Lio lololaa maó tambati boito wau lopo tolona mola lononaó woli mongolio loli Galilea. Ti Isa diila mohuto otaawa lotau toutoonu Tio woluo,

³¹ sababu Tio donggo hemo ngaajali to tahiduduá o–Lio. "Walaó Manusia mawuduolio ode kawasa lomanusia," odito tahuda li Isa, "Wau Tio mapateelio

mate–mateelo maó, bo todulahu otolulio Tio mamobongu mai!"

³² Tahiduduá o–Lio diila mongalati u pilo ngaajali li Isa, bo timongolio moohe mohintu o–Lio.

³³ Timongolio leidungga mola ode Kapernaum. Toú maatobele, ti Isa lohintu maó to tahiduduá o–Lio, "Wolo uhepo susuuália limongoli toú donggo hinaówa tohuungo dalalo engontie?"

³⁴ Timongolio diila lolameto, sababu tohuungo dalalo timongolio helo buutola pasali lotatoonu tapulito udaá.

³⁵ Ti Isa malo tihuloó, tulusi lotiangai tamopulaa duulota tahiduduá o–Lio boito. Tio lotahuda olimongolio, "Taa mohuto mowali tanomoro bohulio, tio musi mowali tapulitio wau musi mowali tamoomayawa ode ngoáamila tau."

³⁶ Lapataó ti Isa lotiangai taúkikiiá ngota, wau lopo tihulaó taúkikiiá boito totalu limongolio ngoáamila lapataó Tio lomuduá taúkikiiá boito wau lotahuda maó ode limongolio:

³⁷ "Taa mololimo taúkikiiá ngota debo odelo utie sababu Waú, boliilio maó mololimo ola–Ú. Wau taa mololimo ola–Ú,

tio diila bo wambaó mololimo ola-Ú, bo mololimo olo o-Lio talo poáhu mai ola-Ú."

³⁸ Lapataó tei Yahya lolóiya maó odeli Isa, "Paaá Guru, amiaatia maloóonto tahingota-ngotaawa lopolahi lati totangguli Paaá. Wau amiaatia malodini olio sababu tio diila lonto olanto."

³⁹ Boti Isa lotahuda, "Diila maó podini olio, sababu, diaaluo penu boli ngotaa maó tamoóhutu moólinggolabe to tanggulu-Ú, mowali tulusi mopoóleeta ola-Ú.

⁴⁰ Sababu taadiila moluwali olanto boliilio maó mamó tiwambaó ode olanto.

⁴¹ Poótoloma maó! Taa mongohi uilumolo olimongoli masababu timongoli hiduduá Olongia Tamoo-poáhua, tio tantu mamó lolimo wuupalio."

⁴² "Tatoonu tamoó sababu tala ngota lotau-tauwalo táimani diila molotolo botie diilalo momalacaya ola-Ú, lebe mopiohe wonu botu pohilingalo poáwadulo to buloólio, wau tio pomahulolo ode delomo deheto.

⁴³ Wonu uluúmu moósababu olemu ilodusa, putua maó uluú boito! Lebe mopiohe yió tumumulo wolo Allahu Taáala didu oúluú ngotuwali bo yió wolo uluú

dulo tuwali matumuwoto ode nalaka, deúito–yito tulu u ohiheo–hiheolo maó.

⁴⁴ [Mola teto tulu diila mowali mate, wau wulodu diila mowali mate.]

⁴⁵ Wau wonu oáatumu moósababu olemu ilodusa, putua maó oáato boito. Lebe mopiohe yió tumumulo wolo Allahu Taáala didu o oáatumu ngotuwali, loú yió wolo oáatumu dulo tuwali pomahulolo ode delomo nalaka.

⁴⁶ [Mola teto tulu diila mowali mate, wau wulodu diila mowali mate.]

⁴⁷ Wonu matomu moósababu olemu ilodusa, luóohe maó mato boito! Lebe mopiohe yió tumuwoto ode Dunia Bohu lo Allahu Taáala didu omato ngotuwali, loú yió wolo matomu dulo tuwali pomahulolo ode delomo nalaka.

⁴⁸ Mola teto tulu diila mowali mate wau wulodu diila mowali mate.

⁴⁹ Timíidu tau mapo belesiyolo wolo tulu, debo odelo bake pobelesiyolo wolo watingo.

⁵⁰ Watingo boito mopiohu, bo wonu didu olamita, tingga donggo mowali muli poó panggelolo? Oditolio mamusi timongoli mowali debo odelo watingo --

poti tumulolo peé–peéenta wolo mopiohe wau dame."

10¹ Lapataó ti Isa lololaa maó tambati boito, wau lonaó ode lipu lo Yudea wau lipu to ngotuwali lo Dutulaa Yordan. Taa dadaata luli lonaó mai lotiámbu topalito li Isa. Wau debo odelo biaasa ti Isa helo ngaajali olimongolio.

² Dengolo lota taulo Parisi olo lonaó mai lohentobu o–Lio. Timongolio malohintu, "Moduduá butoó lo agamanto, tingga mowali tau motalaki dilelio taabua?"

³ Ti Isa lolametaó, "Tei Musa lomalentai wolo olimongoli?"

⁴ "Tei Musa mopoluasi tau motalaki dilelio taabua, asali tio moluladupo tulade talaki mulomulo," tametaó limongolio.

⁵ "Tei Musa loluladei palenta boito sababu timongoli mototolo daá ajaliyolo," tahuda maó li Isa olimongolio.

⁶ "Bo tou bohulio mai tou Allahu Taáala lopowali manusia, tilahuda–Lio deú Allahu Taáala lopowali olimongolio talolaí wau taabua.

⁷ Uito sababuulio talolaí mamololaa maó tiilo tiyamolio wau motituwau wolo dilelio,

⁸ yi duuduluolo mowali tuwau.' Oditolio, timongolio diilalo duulota, bo ngota.

⁹ Uito sababuulio, wolo u mapilopo tuwau mai lo Allahu Taáala, diila mowali talakio lomanusia!"

¹⁰ Tou timongolio tilumuwoto ode bele, tahiduduá o–Lio lohintu o–Lio pasali losuáli boito.

¹¹ Ti Isa lotahuda maó olimongolio, "Tatoonu tamotalaki dilelio lapataó monika wolo taabua wewo, tau boito malojina wolo dilelio tabohulio boito.

¹² Odito olo taabua tamotalaki dilelio lapataó monika wolo talolaí wewo, tio olo malojina."

¹³ Woluo tau helodelo mai taúkekeéi odeli Isa alihu Tio modedeta wau mobalakati olimongolio. Bo tahiduduá li Isa loingo ode tau–tauwalo boito.

¹⁴ Loóonto maó suáli boito, ti Isa maloingo lapataó Tio lotahuda ode tahiduduá o–Lio. "Hulia maó taúkekeéi boito monaó mai ode ola–Ú! Diila maó dinia timongolio, sababu taa debo odelo utieelo tamowali pongawaá umati lo Allahu Taáala.

¹⁵ Poótoloma maó utie! Titaalo tita tadiila motaalua wolo Allahu Taáala debo odelo taúkikiiá ngota, diila tamowali pongawaá umati lo Allahu Taáala."

¹⁶ Lapataó lotahuda odito, ti Isa lomuduó taúkikiíá boito, tulusi Tio lopodutu uluú-Lio toitaati mongolio ngota-ngota wau helo balakati olimongolio.

¹⁷ Touú ti Isa luli lopo tolonga mola lo nonaó-Lio, ngotaalio maa tilumeteái odeli Isa. Tau boito losujudu mola totalu li Isa wau lohintu maó, "Guru tamopiohu, wolo u musi pohutuo lowatia alihu moótapu tutumulo ututuulio tutu wau ohiheo-hiheolo maó?"

¹⁸ "Yilongola heloíyamu Waú mopiohu?" yilintu li Isa. "Diaaluo tamopiohe, ngopohia Allahu Taáala lohihilao.

¹⁹ Maílo taawamu papaa-lentewalo Allahu Taáala, 'Diila pomate mate-mateelo maó, diila maó pojina, diila maó potaó, diila maó posakusi yimbulo, diila maó pongaakali, hulumatia maó tiyamo wau tiilamu."

²⁰ "Paaá Guru," ualo tau boito, "ngoáamila palenta boito madiluduá lowatia tumulalo mai watia donggo muda,"

²¹ Ti Isa lomiloheó tau boito wolo ponu tulusi lotahuda maó, "Bolo tuwau suáli poli u palaluwomu. Ponaólo mota potalia maó ngoáamila milikiimu; wohia maó doili ode taa mosikini, wau yió mamooótapu halata

tosologa. Lapataó uito ponaólo mai wau duduí Waú."

²² Loódungohe tahuda li Isa odito, tau boito diila sanangi, tulusi tio lololaa maó tambati boito wolo suusa lohilao sababu tio kaya daá.

²³ Yi ti Isa lomiloheó to tahiduduá o-Lio tulusi lotahuda maó olimongolio, "Mototolo daá taakaya mowali pongawaá umati lo Allahu Taáala!"

²⁴ Tahiduduá o-Lio lolinggolabe loódungohe tahuda li Isa boito. Boti Isa luli lotahuda maó, "Mongo walaúu-Ú, memangi mototolo u mowali pongawaá umati lo Allahu Taáala!"

²⁵ Lebe gambangi unta tuwau tumuwoto ode huango dudetu wolo taakaya ngota tumuwoto ode Dunia Bohu lo Allahu Taáala."

²⁶ Tahuda li Isa boito heloóhutu to tahiduduá o-Lio lolinggolabe, tilinggula timongolio mahipo hintua ngota timongota, "Wonu odito, tatoonu tamowali moáahu?"

²⁷ Ti Isa lomiloheó olimongolio wau lolameto, "To manusia uito pongalo aakali, boto Allahu Taáala uito diila pongalo

aakali; ngoáamila mowali duólo Allahu Taáala."

²⁸Lapataó tei Petrus malo loíya, "Bilohilo, amiaatia malo lolaa mai totoonulalo u hitua–tuawua wau loduduá li Paaá."

²⁹Tahuda maó li Isa, "Pomalacayalo; taa u malo lolaa maó ngaalaálio, meaalo wutatio talolaí meaalo taabua, meaalo tiilolio, meaalo tiyamolio, meaalo mongo walaío, meaalo pangimba wau halabolulio sababu Waú wau sababu Habari Mopiohe monto Allahu Taáala,

³⁰tau boito mamó lolimo lebe ngohuntua to masaatia botie. Tio mamóótapu ngohetuto piúwa lebe dadaata maó bele, wutato talolaí, wutato taabua, tiilo, taúkekeéi, pangimba wau halabolu, -- wau polosikisa olo. Wau de tojamani u mamei dungga mai, tau boito mamó lolimo tutumulo ututuulio tutu wau ohiheo–hiheolo maó.

³¹Bo dadaata taa u masaatia botie tabohulio mamowali tapulitio wau dadaata taa u masaatia botie tapulitio mamowali tabohulio."

³²Ti Isa wau tahiduduá o–Lio donggo hidulunga mola ode Yerusalemu. Ti Isa lonaó totalu, wau tahiduduá o–Lio

hilawalo ngoáamilalo. Wau tau–tauwalo talo duduó olimongoli lonto wulea olo hiwoohea. Lapataó ti Isa luli lotiangai to tahiduduá o–Lio wiwi–wiwi u lopoótaa olimongolio wolo u demaa motoduo mai to batanga–Lio.

³³ "Dungohilo mai," tahuda–Lio maó, "Ito botia donggo dulu–dulunga ode Yerusalemu. Mola teto Walaó Manusia mawuduolio ode mongo iimamu taúwa wau guguu–ruwaalo agama. Tio mahukuu–maniyolo mate, lapataó wuduolio ode tau–tauwalo tadiila Yahudi.

³⁴ Timongolio mamó hente–henteó o–Lio, monula loiyohu o–Lio, moposikisa o–Lio, wau moposalipu o–Lio. Bo todulahe otolulio Tio mamuli mobongu mai."

³⁵ Lapataó tei Yakobus wolei Yahya, deúito–yito mongo walaée Jebedeus, lonaó mai odeli Isa. 'Paaá Guru,' uali mongolio "wولو suáli tuwau u otohilaa lamiaatia pohutuo mai li Paaá ode lamiaatia."

³⁶ "Wolo u otohilaa limongoli pohutuwo–Ú mai olimongoli?" yilintu maó li Isa.

³⁷ Tametaó limongolio, "Amiaatia motohilaa motihuloá to ambahu olowala wau oloihi li Paaá, wonu bolo ti Paaá malo tihuloá totambati u lailaió."

³⁸ "Diila otaawa limongoli wolo upohile limongoli," tahuda li Isa olimongolio. "Mambo timongoli mongilu tohakati polodutolo u mailumo-Ú wau tumuwoto ode delomo polodutolo umaa tuwoto-Ú?"

³⁹ "Mambo," tametaó limongolio: yi ti Isa luli lotahuda olimongolio: "Memangi, timongoli mamongilu monto hakati polodutolo u mailumo-Ú wau matumuwoto ode delomo polodutolo umaa tuwoto-Ú.

⁴⁰ Bo pasali lo tatoonu tamaa motihuloá to olowala-Ú meaalo to oloihi-Ú uito diila hakuu-Ú u molantu, Allahu Taáala tamolantu tatoonu tamaa motihuloá totambati boito."

⁴¹ Tou tamopulu lota tahiduduá li Isa wewolio boito loódungohe suáli boito, timongolio maloingo olei Yakobus wolei Yahya.

⁴² Oditolio ti Isa malo tiangai olimongolio ngoáamila, tulusi lotahuda maó, "Otaawa limongoli deú mongo taúwa lo bangusa tadiila motota lo Allahu Taáala hipodeehea ulipulio, wau taduduulaá lo ulipu limongolio hipo dutonga olimongolio.

⁴³ Bo timongoli diila mowali odito! Bolíio maó, taa u motohilaa mowali udaá

towolota limongoli, tio musí mowali tamoomayawa olemu.

⁴⁴Wau taa u motohilaa mowali tabohulio towolota limongoli, musí mowali wato ode tangoáamila.

⁴⁵Sababu Walaó Manusia olo dungga-dungga mai diila méibaaya. Tio dungga-dungga mai u momaya wau mohudu nyawa-Lio u molopata taa dadaata."

⁴⁶Timongolio malei dungga mola to Yerikho. Wau tou ti Isa wolo tahiduduá o-Lio wau taa dadaata lololaa maó kota boito, taa pitoó ngota donggo hulohuloá hemohile-hile tobiihu dalalo. Tanggulio Bartimeus, walaée Timeus.

⁴⁷Tou tio loódungohe deú tadonggo laolaode boito ti Isa taulo Najaret, tio malo nguatiá, "Isa, Walaée Dauda, Ponua mai watia!"

⁴⁸Tio ilingowa lotaa dadaata wau pilei poóyongalio maó. Bo tio longuatió lebe heúdaá mola, "Walaée Dauda, ponua mai watia!"

⁴⁹Yi ti Isa malo huheli tulusi lotahuda maó, "Tianga mai tio." Oditolio tiliyangai limongolio taa pitoó boito. Loíya maó

limongolio olio, "Poóyolo mola! Yió tiliyango li Isa, tihulolo mai!"

⁵⁰Taa pitoó boito olo malo pomahulo jumbalio, tulusi ngoínta tilimihulo wau lonaó mota odeli Isa.

⁵¹"Wolo u otohilaamu pohutuwo-Ú mai olemu?" yilintu li Isa olio, Taa pitoó boito lolametaó, "Paaá Guru, watia motohilaa moóonto."

⁵²"Ponaólo," tahuda maó li Isa, "Sababu yió palacaya ola-Ú, yió maloluli." Tou boitolo tau boito maloóonto. Lapataó tio malo duduá li Isa todalalo.

11 ¹Tou lembideó lo Yerusalemu, timongolio leidungga mota tokota Betpage wau Betania, tobinggi lo Huludu Jaitun. Mota teto duulota tahiduduá o-Lio yilao leimulo woli Isa.

²"Ponaólo mota ode kambungu u totalu boito," tahuda li Isa ode limongolio. "Odito timongoli tumuwotaó kambungu boito, oontonga limongoli walaó kolodai tuwau donggo tihu-tihuto, udiipo peéenta maó hetilaéya lotau. Hulia maó kolodai boito wau delowa mai odia.

³Wau wonu woluo tau mohintu olimongoli wolo sababuulio timongoli lomuli kolodai boito, polelea maó, 'Eeya

palalu leeto, wau Tio mahuáa mopo walingai."

⁴ Duulota tahiduduá li Isa boito poli malonaó, wau loódungga walaó kolodai tuwau donggo tihu-tihuto tohuhebu lobele tobiihu dalalo. Yi timongolio malo nguáde walaó kolodai boito.

⁵ Tau-tauwalo tahitihula teto malohintu olimongolio, "Wuu, donggo hipongolawa timongoli? Yilongola timongoli malo nguáde walaó kolodai boito?"

⁶ Timongolio lolametaó debo odelo u pilotahuda li Isa olimongolio. Yi tau-tauwala boito malo poluli olimongolio lodelo kolodai boito.

⁷ Toú leidungga mota odeli Isa, wulea lokolodai boito mailapide limongolio wolo jumba limongolio, tulusi ti Isa lotitaé to kolodai boito.

⁸ Dadaata tahelo powumbato jumba limongolio todalalo, woluo poli tahelo populepe tango lo ayu kekeíngo tohuungo dalalo u hilama mai limongolio to halabolu.

⁹ Tahinaówa totalu wau tahiduduá mai to wulea, ngoáamilalo hetingalaá mengahu,

¹⁰ "Pujiaalo mola Allahu Taáala! Mabala-balakatilo Tio tadungga-dungga mai

to tanggulo Eeya! Pomali-tutuóolo mola pamalenta-Lio u mamei dungga mai -- pomalenta lei Dauda tinene moyanto! Pujiaalo mola Allahu Taáala Taa Laba-labaalo molanggato!"

¹¹ Pulitio maó ti Isa leidungga mota ode Yerusalemu, tulusi tilumuwoto ode Bele lo Eeya. Mota teto Tio lopoó tuotaó topali-Tio. Bo sababu mabolo ngopeé mai modiólomo, tulusi Tio malo monggato ode Betania peé-peéenta wolo tamopula duulota tahiduduá o-Lio.

¹² Loloombulio mola, toú timongolio donggo hinaówa yilumualaó lonto Betania, ti Isa mapilolango.

¹³ Lonto u molamingo Tio loóonto mota bungo lo ayu ara u duungio mohumbuyungo. Oditolio Tio lonaó mota ode bungo lo ayu ara boito mota lomilohe bolo woluo hungolio. Bo toú Tio leidungga mota ode bungo lo ayu ara boito, diaaluo maó ilodungga-Lio, ngopohia bo wambaó duungio, sababu toú boito diipo sembo loú momungo.

¹⁴ Tulusi ti Isa lotahuda ode bungo lo ayu ara boito, "Tumulalo mai botia diaaluo penu boli ngotaa maó tamaa molamela

monto hungomu botie!" Tahiduduá li Isa loódungohe upilo tahuda–Lio boito.

¹⁵ Lapataó timongolio leidungga mola ode Yerusalemu, wau ti Isa luli lonaó ode Bele lo Eeya. Mota teto Tio malopo hinggi ngoáamila tahipo taalia totambati boito. Tio helopo babaan–tulelengaó memee–jawalo lotaa hipo tutuuloá lodoi, wau babaa–nggawalo lotaa hemo potaalia bulungi poombo.

¹⁶ Wau diaaluo penu boli ngota maó tailuasia–Lio modelo wolo–wolo lumaode topaango Bele lo Eeya boito.

¹⁷ Lapataó ti Isa helo ngaajali totau–tauwalo mota teto. Tio lotahuda maó, "Todelomo Kitabi tulatulade odie mola: Allahu Taáala lopilimani mai, 'Bele–Ú maúnteelo bele tambati poduáalo duólo totoonulalo bangusa.' Bo timongoli lopowali maó beelea lopoheehu!"

¹⁸ Mongo iimamu taúwa wau guguu–ruwaalo agama loódungohe tahuda boito. Yi timongolio malo lolohe dalalo u momate li Isa mate–mateelo maó. Timongolio moohe o–Lio, sababu ngoáamila tau helo linggolabu loódungohe pongaajali–Lio.

¹⁹Toú hui dungga–dungga mai ti Isa wolo tahiduduá o–Lio lololaa maó kota boito.

²⁰Donggo dimodupo loombulio mola, toú timongolio yilumaodeó tobungo lo ayu ara boito, iloontonga limongolio bungo lo ayu ara boito mailate demola waáatio.

²¹Lapataó iloéela mola lei Petrus poloútia ngohui toú dipolulio mai. Yi tei Petrus malo loíya odeli Isa, "Paaá Guru, nte bilohi! Bungo lo ayu ara u tiladia li Paaá boito mailate!"

²²Ti Isa lolametaó, "Pomalacayalo to Allahu Taáala.

²³Tutuulio tutu timongoli mowali moloíya maó ode huludu botie, 'Pohuwatolo wau polemaílo mola ode delomo deheto!' Yi suáli boito mapohutuo–Lio mai olimongoli; asali timongoli diila molingu, wau timongoli palacaya deú uiloíya limongoli boito otu–otutuulo maó mamotoduo mai.

²⁴Sababu uito eelai maó utie: Wonu bolo timongoli moduá wau momolohone u hitua–tuawua, pomalacayalo deú Allahu Taáala malongohi mai olimongoli wolo u pilolohone limongoli, yi timongoli mamololimo maó.

²⁵Wau wonu timongoli moduá, bo hilaamu diila sanangi ode tahingota-ngotaawa, ambunguwapo tau boito, alihu Allahu Taáala limongoli tosologa mongambungu mai olo duduu-sawaalo limongoli.

²⁶[Wonu timongoli diila mongambungu taawewo, Allahu Taáala limongoli tosologa olo diila tamo ngambungu mai duduu-sawaalo limongoli.]"

²⁷Timongolio luli lohualinga mola ode Yerusalemu. Wau tou ti Isa lojalena lomalito todelomo Bele lo Eeya, mongo iimamu taúwa, guguu-ruwaalo agama wau mongo taúwa lo Yahudi lonaó mai ode o-Lio.

²⁸Timongolio lohintu maó, "Huta-hutaáa tolo Yió helohutu ngoáamilalo botie? Tatoonu talongohi haku boito to ole-Mu?"

²⁹Ti Isa lolametaó, "Waú olo ohilaa mohintu olimongoli. Tameti mai wau Waú mamolele mai olemu, wolo haku lo tatoonu Waú malohutu susuu-aliyaalo botie.

³⁰Tei Yahya helo polihu wolo haku lo tatoonu, Allahu Taáala meaalo manusia?"

³¹Lapataó mongo iimamu taúwa wau mongo taúwa lo Yahudi malo dulohupa

towolota limongolio. Timongolio loloiya, "Wonu polelento maó, wolo haku lo Allahu Taáala,' Tio mamoloiya mai, 'Yilongola timongoli diila lomalacaya olei Yahya?

³² Bo mototola olo u molele maó, 'Wolo haku lomanusia.'" Sababu timongolio moohe lotaa dadaata, sababu ngoáamila tau hipo nganggapua olei Yahya ngotaalio lonabi.

³³ Oditolio, timongolio malo lameto, "Diila otaawa lami." Tulusi ti Isa lotahuda maó olimongolio, "Wonu odito, Waú olo diila mohuto molele mai olimongoli wolo haku lo tatoonu Waú helohutu ngoáamilalo botie."

12¹ Lapataó ti Isa lolumula helo bisala wolo pohumaya ode mongo iimamu taúwa, guguu-ruwaalo agama wau mongo taúwa lo Yahudi boito. Ti Isa lotahuda, "Woluo ngotaalio lomulo ilengi ngopita lo angguru, wau bilalaalio palipalito. Lapataó uito tio malo ngaúde huango duólo pakaakasi pomitodelo angguru, tulusi tio lomongu maó monala tuwau olo. Lapataó uito tio loposeuwa ilengi lo angguru boito ode ngoolo lota tahi pokalajawa ilengi boito tulusi lonaó odelipu wewo.

² Toú mawakutuulio sembo loú molipu hungo lo angguru, tau boito lolao mota tamoomayawa ngota ode tahi pokalajawa ilengi boito, mota mololimo tayadio.

³ Bo tahi pokalajawa ilengi boito lohéupai tamoomayawa boito. Lapataó pilate limongolio tio, tulusi pilolontuli mongolio tio lohualingo wolo uluú laulau.

⁴ Tulusi taa ohuúwo lo ilengi boito lolao mota poli ngotaalio tamoomayawa wewo. Bo tahi pokalajawa ilengi boito lomate lunggongio lo tamoomayawa boito, tulusi pilolontulio boli hepilu-piluwayolio.

⁵ Taa ohuúwo lo ilengi boito lolao mota poli ngotaalio tamoomayawa wewo. Bo timongolio malomate tamoomayawa boito yila-yilateelo maó. Wau molo laalaaita mola odito u hepilohutu limongolio to ngohuntua tamoomayawa wewolio olo; woluo tabilobohio wau woluo olo tapilatelio yila-yilateelo maó.

⁶ Donggo tatoonu poli tamowali laololio botia lotaa ohuúwo lo ilengi boito? Bolo ngota wambaó, deúito-yito walaío lohihilao taa otoliángio. Oditolio pulitio maó tio malo poáhu mota walaío boito ode tahi pokalajawa ilengi boito. 'To

pikilangilio tantu walaño mahulumatio mai limongolio.'

⁷Bo tahi pokalajawa ilengi boito maloloíya ngota timongota, 'Botie tio taáhali lo walisilio. Dulo pateento tio mate–mateelo maó, alihu ito tamoótapu tayadio boito!'

⁸Yi walaó boito mailaúpio, tulusi pilate limongolio yila–yilateelo maó. Milatelio pilomahuli mongolio ode bulemengo ilengi boito."

⁹Lapataó ti Isa malohintu, "Wolo u mapohutuo lotaa ohuúwo lo ilengi boito? Tantulo maó tio mamonaó mai wau momate mateelo maó tahi pokalajawa ilengi boito, lapataó mohudu ilengi boito ode tahi pokalajawa wewo!

¹⁰Timongoli tantuulio malo pobaca ayati odie todelomo Kitabi, 'Botu udiila ilopomakea lo papaa–niyaalo hudungu malowali botu ulaba–labaalo mopiohu.

¹¹Uti–utieelo huhutu lo Eeya; donggo boli piohio!'"

¹²Yi tahimuloa lo ulipu bangusa lo Yahudi taloó dungohe pohumaya boito, mahipo tolopania moheúpa li Isa, sababu otaawa limongolio pohumaya boito pilopo dungga li Isa ode limongolio. Bo

timongolio moohe lotaa dadaata. Oditolio, timongolio malonaó lololaa maó li Isa.

¹³ Dengolo lota taulo Parisi wau dengolo lota pongawaá palatei lei Herodes ilahulalio mopeehu totala li Isa wolo yiyintu.

¹⁴ Timongolio lonaó mai odeli Isa wau loloiya, "Paaá Guru, otaawa lamiaatia deú ti Paaá juujulu wau diila paduli boli huhama lo tatoonu. Ti Paaá helo ngaajali wolo juujulu pasali kahandaki lo Allahu Taáala ode manusia, sababu ti Paaá diila momilohe tau. Naa, nte polelea mai li Paaá olamiaatia, 'Moduduá wuúdu lo agamanto, tingga mowali momayali beya odeli Kaisali meaalo diila? Wolo ito musi momayali beya boito, meaalo diila?'"

¹⁵ Ti Isa malotota omunapiki limongolio. Tio lolametaó, "Wolo sababuulio timongoli motohilaa mopeehu totala to ola-Ú? Nte pobilohe mai ola-Ú doi talaá ngopita."

¹⁶ Yi timongolio longohi maó li Isa doi talaá ngopita. Tulusi ti Isa malohintu, "Gambali wau tanggulo tatoonu utie?" "Kaisali," tametaó limongolio.

¹⁷ "Naa, wonu odito," tahuda li Isa, "Wohia mota odeli Kaisali wolo miliki li Kaisali, wau ode Allahu Taáala wolo miliki lo

Allahu Taáala." Timongolio lolinggolabe lodungohe o-Lio.

¹⁸ Dengolo lota talonto palatei lo Saduki lonaó mai odeli Isa. (Timongolio yito palatei lotaa ohuhama deú tamalo poowate diilalo mobongu mai).

¹⁹ "Paaá Guru," loíya limongolio odeli Isa, "Tei Musa loluladei butoó botie ode olanto: 'Wonu talolaí ngota mate wau tio diila owalaó, yi wutatio musi monika wolo jandalio alihu mongohi mai wali ode taa u mailate boito.

²⁰ Peéenta woluo tamohutato pitulota. Tamohuhula daá lonika, lapataó yilate diila loótapu walaó.'

²¹ Lapataó taóluolio lonika wolo jandalio, bo tio poli yilate diila loótapu walaó. Suáli tutuuwauwa lowali olo wolo wutatio taótolulio,

²² wau tulutulusi demola taópitulio. Mapulitio maó taabua boito olo yilate.

²³ Todulahu lotaa lopoowate muli mobongu mai, dile lotatoonu taabua boito? Sababu pitupitu lotaalo malonika wolio!"

²⁴ Ti Isa lolametaó, "Matilala daá huhama limongoli. Sababu timongoli diila

mongalati lo Kitabi meaalo kawasa lo Allahu Taáala.

²⁵ Sababu wonu bolo tahe lopowate muli mobongu mai, timongolio diilalo monika, bo timongolio matumumulo debo odelo malaíkati tosologa.

²⁶ Wau pasali lotaamate muli bongulo-Lio mai, diipo peénta timongoli lopobaca todelomo Kitabi lei Musa pasali lodiúto ulei-leíita boito? Todelomo aáa-yatiyaalo boito leituladei deú Allahu Taáala lotahuda odelei Musa, 'Wau Allahu Taáala lei Abraham, Allahu Taáala lei Isihaka wau Allahu Taáala lei Yako.'

²⁷ Allahu Taáala boito diila Allahu Taáala lotaa yilate. Tio Allahu Taáala lotaa tumutumulo. Matilala daá huhama limongoli!"

²⁸ Lapataó malonaó mai guru agama ngota lodungohe bibiisalawa towolota li Isa wolo tau-tauwalo lonto palatei lo Saduki boito. Guru agama boito loóonto deú ti Isa malo lameto tau-tauwala boito loú mopiohu. Yi tio malohintu li Isa, "Palenta toonu ulebe polohuna daá monto ngoáamila palenta?"

²⁹ Ti Isa lolametaó, "Palenta ubohulio, deúito-yito: 'Dungohilo maó, wuu bangusa

lo Isiraïlu! Eeya Allahu Taáalanto, Eeya boito tatuwa–tuwaulo.

³⁰Toliángilo Eeya Allahu Taáalamu wolo lealeaatu lohilaamu, wolo lealeaatu lojiwamu, wolo lealeaatu lo aakalimu, wau wolo totoonulalo lotolumu.'

³¹Palenta oluolio yito: 'Toliángilo maó ngota timongotamu, debo odelo yió motoliángo batangamu lohihilao.' Diduuluo palenta wewo ulebe polohuna daá wolo dulo palenta boito."

³²Lapataó guru agama boito loloíya odeli Isa, "Tiluhata daá, Paaá Guru! Memangi otutu wolo upilo tahuda li Paaá: Eeyaalo Allahu Taáala tatuwa–tuwaulo, wau diduuluo maó Allahu Taáala wewo.

³³Wau manusia musi motoliángo to Allahu Taáala wolo lealeaatu lohilaalio, wau wolo lealeaatu lo aakalilio, wau wolo totoonulalo lotolio. Wau tio olo musi motoliángo timongotalio debo odelo batangalio lohihilao. Uito lebe mopiohe wolo mopodewo bake yilalango wau babaa–keyaalo wewolio ode Allahu Taáala."

³⁴Ti Isa loóonto maó deú guru agama boito malo lameto loú mopiohe daá. Wau ti Isa luli lotahuda maó olio, "Yió mabolo

ngoilambango mowali pongawaá umati lo Allahu Taáala." Lapataó uito diduú penu boli ngotaa maó tabuheli helo podudulaó lo yiyintu odeli Isa.

³⁵ Touú donggo hemo ngaajali to Bele lo Eeya, ti Isa lohintu maó, "Woloolo mola guguu–ruwaalo agama mowali moloíya deú Olongia Tamoo–poáahua boito, wali mai lei Dauda?

³⁶ Lebe–lebe pomaó tei Dauda lohihilao -- sababu ililhami mai lo Rohullah -- lolóiya, 'Eeya lotahuda ode Eeyaaú: huloóolo to ambahu olowala–Ú tunggula Waú mohutu mumuu–suumu taáaluku to ole–Mu.'

³⁷ Oditolio wonu tei Dauda molanggula Olongia Tamoo–poáahua boito 'Eeya', diila pongalo aakali Tio wali mai lei Dauda?" Taa dadaata tawoluo to Bele lo Eeya boito hisanangia loódungohe li Isa hemo ngaajali.

³⁸ Tio lotahuda ode limongolio, "Poódaha–dahaalo maó to guguu–ruwaalo agama. Timongolio motohilaa monaó wolo jumba u dahu–dahuhi wau motohilaa hulumatiolio to papaa–taliyaalo.

³⁹ Timongolio motohilaa lotambati u hulu-hulumati todelomo bele potabiaala wau to popoo-tihungguwalo.

⁴⁰ Timongolio hipo ngakalia tomongo janda wau hemo lambata bele limongolio. Wau u modepuheó ololeeti mongolio boito, timongolio hemoduá huhuulayaá. Hukuumani limongolio de mobuheetaó!"

⁴¹ Toú hulohuloáa bubuu-lemenga wolo bulua lodewo to Bele lo Eeya, ti Isa hemo poótuoto tau-tauwalo tahi poluanga doi limongolio ode delomo bulua boito. Dadaata tahi kaayawa helo luangaó doi dadaata;

⁴² Lapataó janda ngota tamosikini lonaó mai olo. Tio loluangaó dulo pita doi tombaha, deúito-yito doi u pulito kikiíó halagaalio.

⁴³ Yi ti Isa malo tiangai tahiduduá o-Lio tulusi lotahuda olimongolio, "Poótuota maó utie: Janda tamosikini boito loluango ode delomo bulua boito lebe dadaata loú tiluangio lo ngoáamila tau-tauwalo wewolio.

⁴⁴ Sababu timongolio ngoáamila helongohi ololebe lohalata limongolio. Bo janda boito penu boli mosikini tutu

longohi maó ngoáamila uwoluo to olio -- tumbaó u palaluolio u potumulo."

13 ¹ Toú ti Isa lololaa maó Bele lo Eeya, ngotaalio lo tahiduduá o-Lio loloiya, "Paaá Guru, nte bilohinto mota huhuu-dunguwalo boito. Poótuoti mota totoonula botulio. Donggo boli piohio!"

² Ti Isa lolametaó, "Yió moóonto mota huhuu-dunguwalo uleidaá boito, diila odito? Diaaluo penu boli ngobotu maó tohudungu boito debo susuusungi to dutualio. Ngoáamila maloloo-hubuolio."

³ Lapataó ti Isa lonaó mola ode Huludu Jaitun, wau lotihuloá totambati u tataalua wolo Bele lo Eeya. Tulusi tei Petrus, Yakobus, Yahya wolei Andreas lonaó mai ode o-Lio mai lobisala wo-Lio tutuuwau.

⁴ "Nte polelea mai li Paaá olamiaatia," uali mongolio ode o-Lio, "Omolua ngoáamilalo botie mamotoduo mai? Wau tutuuotalo wolo u mopoilaalo mai deú mawakutuulio?"

⁵ "Poódahailo maó," tametaó li Isa, "diila bolo o aakalialio timongoli.

⁶ Ngohuntua tamamonaó mai louú momake tanggulu-Ú wau moloiya, 'Waúlo Tio!' tulusi mohimbulo totaa dadaata.

⁷ Wonu timongoli moódungohe titii–ngoheyalo lo polotuhua wau hahaa–baliyaalo lo popaatea, diila maó oohe. Susuu–aliyaalo boito musí motoduo mai, bo uito diila boliilio deú malei dungga wakutuulio loú kiama.

⁸ Bangusa tuwau mamó paatea moluwali bangusa wewo. Lipu tuwau mamó lambata lipu uwewo. Boli touútoonu mamotoduo liluhu wau polobiti. Ngoáamilalo boito boheli tumulio wambaó, debo odelo ngongoto u olaasawa lotaabua ngota tamo tohilaa motutu.

⁹ Timongoli musí mopoódaha–dahaalo maó, sababu timongoli mawaúpolio, wau dedeólio ode mamaa–hakamawalo. Timongoli mapateelio to bebee–leyaalo potabiaalo. Timongoli madeloolio mota motaalua wolo tahi kawasawa wau mongo olongia sababu timongoli muri–Ú. Wau ui–uitolo hiyangi mongoli mongohi sakusi pasali–Ú ode limongolio.

¹⁰ Habari Mopiohe monto Allahu Taáala boito musí popo loladupo meimulo ode ngoáamila bangusa.

¹¹ Wau wonu timongoli waúpolio wau deloolio ode bubutoó, diila maó polawalo pasali wolo umusi loíya limongoli. Wonu

malei dungga wakutuulio u mobisala, loíyaalo maó wolo u poótaa-Ú mai olimongoli to wakutuulio. Sababu loíya u malapalia maó limongoli diila loíyamu lohihilao bo monto Rohullah wambaó.

¹² Tau mamó hiyanati wutatio lohihilao u pateelio mate-mateelo maó. Uito olo u mamotoduo towolota lotiyamo wau walaío. Mongo walaío mamó luwali oliilolio wau oliyamolio, wau mohudu olimongolio u pateelio mate-mateelo maó.

¹³ Timongoli malonuó lotaa ngoáamila sababu timongoli muri-Ú. Bo tamoó tahangi demola pulitio, mapo aahuwolo."

¹⁴ "Timongoli mamóóonto 'Olóleeto u Mongantulu' tihutihula totambati u dinidini olio. (Poéela to tamopobaca: Poótuota maó wolo boliilio!) Toú boito tato Yudea musi tumetaá ode hihuí-huídee.

¹⁵ Taa toitaato watopo bele diila maó polaahu wau tumuwoto ode delomo bele u mohama hitua-tuawua.

¹⁶ Taa woluo to halabolu diila maó pohualingi u mohama jumbalio.

¹⁷ Malo moótihela hapato duduu-laheyaalo boito ode taabua ombodaá wau tiilo tadonggo hemo potutu mai lo taúnge!

¹⁸ Poduáalo mola alihu susuu–aliyaalo boito diila maó motoduo mai tosembo lo polodidi.

¹⁹ To duduu–laheyaalo u moótihela hapato boito mawoluo mai tuwaulio osuusa udiipo peéenta maó lotoduo, tumulalo mai Allahu Taáala lopowali dunia tunggula botia, wau diilalo motoduo mai poli.

²⁰ Humayaalio Allahu Taáala diila mopolimbuó maasa boito, yi diaaluo penu boli ngotaa maó tamoáahu. Bo kalana umati–Lio, Allahu Taáala mopolimbuó maasa boito.

²¹ Tou boito wonu tahingota–ngotaawa moloíya olimongoli, 'Bilohi, Olongia Tamoo–poáahua boito woluo tea!' meaalo 'Bilohi, Tio mota teto!' -- diila maó palacayai tau boito.

²² Sababu tahi poáahua paluti wau mongo nabi paluti mamei dungga mai. Timongolio mamó kalaja mai huhuu–tuwaalo upolu–polutuó wau momoó–linggolabeyalo u mohimbulo wonu potala mowali, umati lo Allahu Taáala olo.

²³ Oditolio, poódahailo maó! Ngoáamilalo boito mapiloótaa–Ú olimongoli tou dipolulio mai suáli boito motoduo."

²⁴ "Lapatio maó loú suusa boito, mato lodulahu mamowali modiólomai, wau hulalo diilalo motinelo.

²⁵ Popoo–liyamalo mamobiihuto monto hulungo, wau tahi kawasawa todulente daá toitaato mamowali ambulati daá.

²⁶ Toú boito Walaó Manusia maóontonga motuhutai monto heengo wolo kawasa leidaá wau odudaá.

²⁷ Tio mamopoáhu mai mamaa–laíkatiyalo u mongambu umati tatilulao–Tio monto opato tutulo aalamu, monto huhuudu lodunia ode huhuudu lohulungo."

²⁸ "Hamaawa maó pongaajali monto bungo lo ayu ara. Wonu tangolio kekeéi moidu wau moluóyo, wau malo tumbingai, otaawa limongoli deú sembo lo polodulahu malembidei.

²⁹ Odito olo wonu timongoli moóonto susuu–aliyaalo boito motoduo mai, otaawa limongoli deú wakutuulio malembidei daá.

³⁰ Ototai maó! Ngoáamila poloútia botie mamotoduo toú dipolulio mai tau–tauwala tahitumula masaatia botie matepo ngoáamilalo.

³¹ Hulungo wau dunia mamooli, bo tahuda–Ú debo ohiheo–hiheolo maó."

³² "Eleponu odito, diaaluo penu boli ngotaa maó tamotota omolua dulahio meaalo omolua jamulio. Mamaa–laíkatiyalo tosologa diila motota boli Walaó olo diila motota, bo wambaó Allahu Taáala tamotota.

³³ Oditolio timongoli musí mopoó daha–dahaalo maó wau eelailo mola, sababu diila otaawa limongoli omolua wakutuulio.

³⁴ Owowoluwoalio debo odelo ngotaalio tamololaa maó belelio tulusi lonaó ode tambati u molamingo. Tio lopoáhu maó tahi pomayaalio longulusi belelio, wau longohi kalaja ode limongolio ngota–ngota. To tamoodahawa huhebu, tio lolahuli maó alihu mopoódaha tíóotutua.

³⁵ Sababu uito timongoli musí mopoódaha–dahaalo maó, sababu diila otaawa limongoli omolua taa ohuúwo lobele boito mamuli mohualingai -- mowaliilio toú lolaango, mowaliilio to tomutaá loú hui, mowaliilio toú molaliyonu, meaalo mowaliilio toú mato lodulahu mobutu mai.

³⁶ Wonu tio debolo meidunggalo mai, diila bolo tio moódungga olimongoli donggo hituluhe.

³⁷Wolo upilo tahuda–Ú mai olemu botie, potahuda–Ú olo ode taa ngoáamila; poódaha–dahaalo maó!"

14¹ Donggo duuhui mola Dulahu Paska, wau Lameyangi lo Roti Diila Oragi. Mongo iimamu taúwa wau guguu–ruwaalo agama donggo hipololohe dalalo u moheúpa li Isa loú poópoóyo, wau momate o–Lio mate–mateelo maó.

²"Bo diila maó pohutuwonto uito towakutu lameyangi," uali mongolio, "Sababu demaa tumoodei tolonggalo."

³Toú ti Isa to Betania, tobele lei Simon taómoóomolu ongongoto lo alipo u moótihela hapato, taabua ngota lonaó mai ode o–Lio. Tio lodelo mai butulu puwalamu moputió tuwau tuatuanga yinulo moonu u mahale, pilohutulio lonto waáato u moonu. Toú ti Isa donggo hulo–huloáa hemo lamelo, taabua boito lomoó butulu boito wau loluwataó winulo moonu boito odeitaato lunggongi Isa.

⁴Dengolo lota tawoluo teto maloingo wau hipo loíyawa ngota timongota, "Wolo hunalio yinulo moonu boito hepo loyali?"

⁵Yinulo moonu boito mowali potali maó wolo halaga lebe loú tolo hetuto doi talaá,

wau doilio wohi mota ode taa mosikini!" Yi maílingoa limongolio taabua boito.

⁶ Boti Isa lotahuda maó, "Hulii maó tio! Yilongola timongoli moposuusa olio? Tio lohutu hitua–tuawua u mopiohu wau mailaba mopiohu ode ola–Ú.

⁷ Taa mosikini laito woluo towolota limongoli. Motíidu wakutu wonu timongoli mohuto, timongoli mowali motulungi olimongolio. Bo Waú diila laito peé–peéenta wolimongoli.

⁸ Taabua botie malohutu wolo u mowali pohutuolio. Tio malo podapato ola–Ú wolo yinulo moonu u polobungalo ola–Ú tou diipo wakutuulio.

⁹ Pomalacayalo! To ngoilanggubu dunia, boli toutoonu Habari Mopiohe monto Allahu Taáala pololadulo, wau huhutu lotaabua botie masilitaalio olo odelo poéela olio."

¹⁰ Lapataó tei Yudas Iskariot, ngotaalio lo tamopulaa duulota muri li Isa, malonaó mola ode mongo iimamu taúwa wolo makusudu mohiyanati li Isa duólo olimongolio.

¹¹ Timongolio sanangi daá loódungohe hihiile boito, wau lodanti mamongohi

maó doi odelei Yudas. Yi tei Yudas olo malopeehu dalalo u lohiyanati li Isa.

¹²Tobohulo dulahu todelomo Lameyangi Roti Diila Oragi -- touú tau hipongolota himba lo Paska -- tahiduduá li Isa malohintu o-Lio, "Touútoonu otohila li Paaá podapato maó lamiaatia uáalo Paska li Paaá?"

¹³Yi ti Isa malo poáhu taduulota limongolio, "Ponaólo ode kota, mola teto talolaí ngota tadonggo delodelo ginti tuwau tuatuanga taluhu, mamo dunggaya woli mongoli. Duduú maó tio,

¹⁴ode bele u potuwotalio, wau loíyai maó ode taa ohuúwo lobebo boito, 'Ti Paaá Guru mohintu, touútoonu tambati lo tahiduduá o-Lio wau Tio mamolamela uáalo Paska.'

¹⁵Tau boito mamopo bilohei olemu huwali leidaá tuwau toitaato. Huwali leidaá boito malei aatulu, wimu-wimumuto wolo pakaakasilio. Podapato maó ngoáamilalo mola teto de olanto."

¹⁶Lapataó taduulota tahiduduá li Isa boito malonaó ode kota. Mola teto timongolio loódungga mola ngoáamilalo lutuuúde debo odelo u mapilo tahuda li Isa. Lapataó timongolio olo malo podapato uáalo Paska.

¹⁷ Mahuilio mola, ti Isa lonaó mai wolo tamopulaa duulota tahiduduá o-Lio.

¹⁸ Wau tou timongolio donggo hihuloáa hipolamela, Ti Isa lotahuda maó, "Dungohi mai: ngotaalio towolota limongoli, u masaatia botie hemo lamela peé-peéenta wola-Ú mamó hiyanati ola-Ú."

¹⁹ Loódungohe uito, tahiduduá li Isa mahi suukalia daá. Tulusi ngota-ngota malohintu maó li Isa, "Tantu diila watia tamilakusudu li Paaá?"

²⁰ Ti Isa lolametaó, "Tio tala ngota limongoli tamopulaa duulota botie tahemo lamela ngopingge wola-Ú."

²¹ Memangi Walaó Manusia maamate debo odelo u tulatulade todelomo Kitabi. Bo donggo boli topotalalio taa u mohiyanati Walaó Manusia boito! Lebe mopiohu tio boito wonu diila pilotutulio mai sama-samaata!"

²² Tou timongolio donggo hipo lamela, ti Isa malohama roti wau loduá losukuru mola ode Allahu Taáala. Lapataó hepili-pilita-Ngio roti boito wolo uluú-Lio, tulusi yilohi-Lio ode tahiduduá o-Lio wau lotahuda maó, "Hamaawa wau tamelalo, uti-utieelo batanga-Ú."

²³ Lapataó uito Tio malohama hakati tuwau o angguru. Tio loduá losukuru mola ode Allahu Taáala, tulusi lohudu maó hakati boito ode tahiduduá o–Lio. Lapataó timongolio ngoáamila malongilu angguru boito.

²⁴ Lapataó uito ti Isa lotahuda maó, "Uti–utieelo duhu–Ú u moposaaha daantia lo Allahu Taáala, duhu u tiluwato ode taa dadaata.

²⁵ Pomalacayalo: Waú diilalo mongilu angguru botie poli, tunggula toú Waú mamongilu angguru u bohu peé–peéenta woli mongoli to Dunia Bohu lo Allahu Taáala li Paapa–Ú."

²⁶ Lapataó timongolio lopolahu mola lahu lopoilaalo momuji tuwau. Wau lapataó uito timongolio malonaó mola ode Huludu Jaitun.

²⁷ Lapataó ti Isa lotahuda maó olimongolio, "Timongoli ngoáamila matumetaó mololaa maó ola–Ú. Sababu todelomo Kitabi tulatulade, 'Allahu Taáala mamomate mateelo maó ditilio, wau himbala lohimbalió mamo bubuuálawa.'

²⁸ Bo lapataó Waú muli bongulo–Lio mai, Waú mamonaó motitimulo woli mongoli ode Galilea."

²⁹ "Diila," tametaó lei Petrus, "huliilo maó timongolio ngoámila mololaa maó li Paaá, bo watia diila sama–samaata."

³⁰ "Eelai maó," tahuda li Isa, tohui botieelo, toú maluó diipo mokukuyuú poóluo, yió mapoótolu lomahe ola–Ú."

³¹ Tei Petrus lolametaó wolo mopatato wau moilaalo tutu, "Penu boli watia musi mate peé–peéenta woli Paaá, sama–samaata watia diila tamoloíya deú watia diila moótaawa li Paaá!" Wau tahiduduá o–Lio uwewo loloíya maó odito olo.

³² Timongolio malei dungga mota ode tambati tuwau u ilunte Getsemani, wau ti Isa lotahuda maó ode tahiduduá o–Lio, "Potihuloópo tewe Waú donggo mota moduá."

³³ Lapataó ti Isa malo tiango olei Petrus, Yakobus, wau lei Yahya lonaó peé–peéenta wo–Lio. Tio masiluukali wau balisa.

³⁴ "Hilaa–Ú siluukali daá," tahuda maó li Isa olimongolio, "lasaaliao debo odelo maamate wambaño. Potitolaapo tewe wau poódaha–dahaalo maó!"

³⁵ Ti Isa malonaó lebe lolaminga ngopeé tulusi leidumulo lomola tohuta wau loduá. Todelomo duá–Lio pilohile–Lio wonu

mowali Tio sambelolo moólaasa maó saaáti polodutolo boito.

³⁶ "Paapa, oo Paapa," ua–Lio maó, "diaaluo penu boli hitua–tuawua udiila pongalo aakali odeli Paapa. Bintaáalo mola polodutolo botie monto Olaatia. Bo diila moduduó u otohilaa lo Watia bo wambaó u otohilaa li Paapa."

³⁷ Lapataó uito ti Isa luli lohualingai wau loódungga tahiduduá o–Lio donggo hituluhe. Tio malo tahuda odelei Petrus, "Simon, tuutuluhu yió? Bo ngojamu wambaó yió diila lopoódaha–dahaalo maó?"

³⁸ Lapataó ti Isa lotahuda ode limongolio, "Poódaha–dahaalo maó, wau poduáalo mola alihu timongoli diila moótoduo mai malapo. Memangi rohumu ohilaa mohutu ubanali, bo timongoli diila mambo sababu píili lomanusia boito molulupuhu."

³⁹ Peéentapo ti Isa lonaó mota loduá wolo lohulitaó tataa–heyaalo u tutuuwauwa.

⁴⁰ Lapataó uito Tio luli lohualingai poli ode tahiduduá o–Lio wau loódungga olimongolio debo donggo hituluhe, sababu timongolio modiduto daá. Yi didu otaawa limongolio wolo umusi loíya limongolio odeli Isa.

41 Toú ti Isa luli lohualingai ode limongolio umaa otolulio, Tio lotahuda maó, "Debo donggo hituluhe wau hihuheelia timongoli? Malo tuuúde! Malei dungga wakutuulio Walaó Manusia mawuduolio ode uluú lotau–tauwalo odusa.

42 Pobongulo, dulo ito monaó. Bilohi! Tau u mohiyantati ola–Ú malei dungga mai!"

43 Toú ti Isa donggo hemobisala, malonaó mai tei Yudas, ngotaalio lo tamopulaa duulota muri–Lio boito. Peé–peéenta wolio lonaó mai olo ngohuntua tahidelo wamilo wau ayu ngoputu pongokoó. Timongolio ilahula lomongo iimamu taúwa, guguu–ruwaalo agama wau mongo taúwa lo Yahudi.

44 Tamoo–hiyanatia malolantu maó tuoto tuwau olimongolio. Taa u diilo lowatia, loíyaalio maó olimongolio, "maa Tiolo taulio. Waúpa Tio wau deloa maó Tio wolo dudaha u tióotutua."

45 Toú tei Yudas leitungga mai, tulusi tio lonaó mota odeli Isa wau lolóíya, "Paaá Guru!" Lapataó tio lodiilaó li Isa.

46 Tulusi tau–tauwalo talonaó mai peé–peéenta wolei Yudas boito malo heúpa li Isa wau lomungu o–Lio.

⁴⁷ Bo tala ngota tawoluo teto lomahuta wamilio wau lolimade wato li iimamu daá tunggula lopitango bulongalio.

⁴⁸ Lapataó ti Isa lotahuda maó ode limongolio, "Wolo Waú botie tamoleeto, tilinggula timongoli lonaó mai louú hiánunga wamilo wau hideloa ayu pongokoó mai moheúpa ola-Ú?

⁴⁹ Timíidu dulahe Waú hemo ngaajali to Bele lo Eeya totalu limongoli, wau timongoli diila loheúpa ola-Ú. Bo memangi mawajibulio odito, alihu motoduo mai wolo u tulatulade todelomo Kitabi."

⁵⁰ Ngoáamila tahiduduá o-Lio tilumeteó lololaa maó li Isa.

⁵¹ Taamuda ngota, tabo wambaó pakepake kaingi ngopita u pilolanggu batangalio, loduduá li Isa. Tau-tauwalo ohilaa moheúpa olio,

⁵² bo tio lohinggi kaingilio boito, tulusi tilumeteó louú laalaala.

⁵³ Ti Isa dilelolio ode bele li iimamu daá. Mola teto ngoáamila iimamu taúwa, taúwa lo Yahudi, wau guru lo agama donggo hiámbua.

⁵⁴ Tei Petrus loduduó li Isa lonto u molamingo tunggula tilumuwoto ode delomo paango lobebe li iimamu daá. Mola

teto tio lotihuloáa lomatu wawaío totili lotulu peé–peéenta wolo tahi–pokawalia.

⁵⁵ Mongo iimamu taúwa wau ngoáamila Mahakama Agama hipo tolopania bolo moótapu maó bukuti u mopotala li Isa alihu mowali mopodehu hukuumaní mate to o–Lio. Bo timongolio diila loótapu bukuti boli tuwau maó.

⁵⁶ Ngohuntua sakusi tatiliangio mai longohi sakusi paluti toli Isa, bo ososakusi limongolio bubuu–lemenga ngota timongota.

⁵⁷ Lapataó dengolo lota sakusi matilimihulo wau longohi maó sakusi paluti odie pasali li Isa.

⁵⁸ "Amiaatia loódungohe tau botie lolóiya, 'Waú mamopo lohuhu Bele lo Allahu Taáala botie u pilohutu lomanusia, wau lapataó todelomo utolo hui mola, Waú mamuli momongu uwewo udiila pilohutu lomanusia.'"

⁵⁹ Bo u silakusia lotau–tauwala boito olo bubuu–lemenga ngota timongota."

⁶⁰ Yi ti iimamu daá matilimihulo totalu limongolio ngoáamila wau lohintu li Isa, "Wolo Yió diila molameto potuludu u pilotuludi mongolio ole–Mu?"

⁶¹ Boti Isa wambaó lotipoóyo. Tio diila lolameto sama–samaata. Tulusi ti iimamu daá boito peéntapo lohintu o–Lio, "Wolo maa Yíóolo Olongia Tamoo–poáahua, Walaó Allahu Taáala Taa Laba–labaalo mantali?"

⁶² "Waúlo Tio," tametaó li Isa, "wau timongoli ngoáamila mamooónto Walaó Manusia motihuloáa to ambahu olowala lo Allahu Taáala Taa Laba–labaalo kawasa wau dungga–dungga mai todelomo heengo monto hulungo!"

⁶³ Yi ti iimamu daá malo ngai–ngaidingo boólio wau lolóiya, "Diilalo palalu sakusi!

⁶⁴ Timongoli malo dungohe lohihilao uiloíya–Lio u hemomuayo Allahu Taáala. Botia wolo putusanimu?" Timongolio ngoáamilalo malo mutusani maó deú ti Isa ototala wau patuti hukuu–maniyolo mate.

⁶⁵ Lapataó dengolo lota malonula loiyohu li Isa, wau timongolio lolaúbe mato–Lio wau lomate o–Lio, lapataó lolóiya, "Nte lolohe tatoonu talomate ole–Mu?" Tahí–pokawalia olo loduduó helo laambali li Isa.

⁶⁶ Tou tei Petrus donggo woluo topaango, tala ngota lotaabua tamoomayawa li iimamu daá lonaó mola odito.

⁶⁷ Toú loóonto olei Petrus hemomatu wawaío totili lotulu, hepiloó tuotio tióotutua baya lei Petrus wau lolóiya maó, "Diila maayiío olo tapeé–peéenta woli Isa taulo Najaret boito?"

⁶⁸ Bo tei Petrus lomaahu. "Diila otaawaú wau waú diila mongalati wolo makusudumu," ualio ode tamoomayawa boito. Lapataó tei Petrus malonaó mota ode huhebu hulubangi bele li iimamu daá boito. [Toú boito olo, maluó malo kuukuyuú.]

⁶⁹ Taabua tamoomayawa boito luli lomiloheó olei Petrus, wau lolóiya poli ode tau–tauwalo teto, "Tio memangi tala ngota limongolio!"

⁷⁰ Bo tei Petrus luli lomaheó. Diila lohiheo lapatio maó, tau–tauwalo teto luli lolóiya odelei Petrus, "Diilalo mowali paahulo deú yió memangi tala ngota limongolio, sababu yió lonto Galilea!"

⁷¹ Tulusi tei Petrus mahelo taditadia wau lolóiya, "Diila otaawa lowatia tahe makusuduo limongoli boito!"

⁷² Toú boito olo maluó malo kuukuyuú u oluolio. Wau tei Petrus maloéela mola deú ti Isa lotahuda olio, "Toú diipo maluó mokuukuyuú poóoluo, yió mapoóotolu

lomaaha ola-Ú." Yi oóodito tei Petrus mahilu moyongo hemo potide-tideó.

15¹ Donggo didimodupo daá, ngoáamila Mahakama Agama tuotuoto mongo iimamu taúwa, mongo taúwa lo Yahudi wau guguu-ruwaalo agama huáa lodulohupa. Timongolio malomungu li Isa, lapataó lodelo o-Lio wau lohudu o-Lio odelei Pilaatu.

² Tei Pilaatu malohintu li Isa, "Otutu yió Olongia taulo Yahudi?" "Odi-oditolo loíyamu," tametaó li Isa.

³ Mongo iimamu taúwa lopo dudulaó dadaata potuludu odeli Isa.

⁴ Lapataó tei Pilaatu luli lohintu maó li Isa, "Diila mohuto Yió molameto? Nte bilohi ngoolo maó daatalio u hepilo tuludi mongolio ole-Mu!"

⁵ Boti Isa sama-samaata diilalo lolameto, tilinggula tei Pilaatu lolinggolabu.

⁶ To motiídu lameyangi lo Paska biasaalio tei Pilaatu hemo lopato ngotaalio lotaa hitahangia moduduó otohilaa lotaa dadaata.

⁷ Todelomo tutupa, towolota lo tahipo malakalawa wau tahi pomatea mate-mateelo maó tou otolonggalo, woluo ngotaalio taílunte Barabas.

⁸Taa dadaata hiámbua wau helohile olei Pilaatu alihu tio molopataó ngotaalio lotahi tahangia debo odelo ubiaasa.

⁹Tei Pilaatu malohintu olimongolio, "Mohuto timongoli, malopatoú mai olongia taulo Yahudi boito ode limongoli?"

¹⁰Sababu tei Pilaatu mongalati deú mongo iimamu taúwa lohudu mai li Isa ode olio kalana mohiihia.

¹¹Bo mongo iimamu taúwa helo popatu totaa dadaata alihu mohile maó olei Pilaatu molopataó olei Barabas ode limongolio.

¹²Yi tei Pilaatu luli loloíya ode taa dadaata boito, "Wonu odito, wolo umusi pohutuwoú totaa heúntee limongoli Olongia taulo Yahudi boito?"

¹³Timongolio malo nguatió, "Salipuwalo Tio!"

¹⁴"Bo wolo ololee–Tio?" ualei Pilaatu, Tulusi timongolio longuatió lebe uda–udaáalo maó, "Salipuwalo Tio!"

¹⁵Tei Pilaatu ohilaa moposanangi totaa dadaata boito, yi mailopatio tei Barabas boito ode limongolio. Lapataó tio lopoáhu tau lomuboáa li Isa, lapataó yiludulio maó mota silalipulio.

¹⁶Ti Isa dilelolio mota lomongo pajule ode hudungu lo bubutoó tobele biluloá

saaha li gubolonulu. Lapataó ngoáamila pasukani ilambulio mai.

¹⁷Tulusi timongolio lopopake maó jumba lailoumu odeli Isa wau lohutu makuta lonto tango kekeéi oduhi, lapataó pilopopake limongolio to lunggongi Isa.

¹⁸Lapataó uito timongolio malo salamu o-Lio, "Salamu Olongia tauho Yahudi!" loíya maó limongolio.

¹⁹Timongolio lomubohe lunggongi Isa wolo tunggudu, tulusi lonula loiyohu wau helo sujudu totalu-Lio.

²⁰Lapataó piloitoi mongolio ti Isa, yilinggi limongolio jumba-Lio lailoumu boito tulusi luli pilopopake limongolio boó-Lio lohihilao. Lapataó dilelo limongolio Tio ode bulemengio mota silalipulio.

²¹Tohuungo dalalo timongolio helo makusa ngotaalio lomoota ayu salipu li Isa. Tau boito leitaahua boheli lonto kambungu matumuwoto ode kota (Tanggulio Simon, -- asaliilio mai lonto Kirene -- tiyamo lei Aleksander wolei Ropus.)

²²Ti Isa dilelolio mola ode tambati tuwau u ilunte Golgota, boliilio maó "Tambati lo Bakakau".

²³ Mota teto timongolio ohilaa mongohi o–Lio angguru ula–ulau lodamahu moonu, boti Isa diila lohuto longilu angguru boito.

²⁴ Lapataó timongolio malomaku o–Lio to ayu salipu, wau helo laya–layadeó kaingi–Lio wolo undi u lolantu tayadio ngota–ngota.

²⁵ Pilopo salipua o–Lio boito lotoduo tou jamu sambila dimodupo.

²⁶ Toitaato salipu–Lio tiluladi mongolio olo tuladee tomimbihu potuludu ode o–Lio, deúito–yito: "Olongia Taulo Yahudi".

²⁷ Peé–peéenta woli Isa hesilaalipu limongolio olo pohehu duulota; ngotaalio to ambahu olowala wau ngotaalio poli to ambahu olohi–Lio.

²⁸ [Louú odito malotoduo mai u tulatulade todelomo Kitabi; deúito–yito: "Tio ilanggapu limongolio leituoto totau–tauwalo tahileeta."]

²⁹ Tau–tauwalo tahilaode teto hitahalilia wau hipohinawa li Isa. Timongolio hipoloíyawa, "Wuu, Yió taóhilaa mopolohubu Bele lo Allahu Taáala wau muli momongu maó todelomo utolo hui mola.

³⁰ Ntali polaahei monto ayu salipu boito wau poáahuwalo lohihilao batanga–Mu!"

³¹ Odito olo mongo iimamu taúwa wau guguu–ruwaalo agama helo henteá li Isa. Timongolio malo loíya ngota timongota, "Tio helo poáahu taa wewo, bo batanga–Lio lohihilao diila mowali poáahuo–Lio!

³² Wonu Tio olongia taulo Isiraílu, Olongia Tamoo–poáhua, opiohelio Tio botia molaabei monto ayu salipu boito, alihu oontonga lami wau ami mapalacaya o–Lio!" Tau–tauwalo tahe silaalipu peé–peéenta woli Isa boito olo helohina li Isa.

³³ Touú mangoputu lodulahu, ngotilonggadu tolo jamu mola hiheolio ngoilanggubu lipu boito malo diólomai.

³⁴ Wau touú jamu tiga lolaango, ti Isa malo nguatió wolo suala daá, "Eloi, Eloi, lama sabakhtani?" u boliilio, "Oo Allahu Taáalaa–Ú, oo Allahu Taáalaa–Ú yilongola Allahu Taáala lololaa maó olaa–Tia?"

³⁵ Dengolo lota tawoluo teto loódungohe wuwati–lo boito, wau hipo loíyawa, "Dungohilo, Tio hemo tianga olei Elia!"

³⁶ Ngotaalio limongolio huáa lonaó mota lohama bunga lopatihu, lapataó pilolomolio todelomo angguru molotingo. Lapataó bunga lopatihu boito yilunggoío

to ayu ngoputu, tulusi yiludulio mola ode biihu li Isa, wau loloíya, "Wimai maó, demaa bilohento wolo tei Elia mai mopolaheó o-Lio monto ayu salipu boito."

³⁷ Lapataó ti Isa longuatiá mola, tulusi yilate.

³⁸ Lalante untaya-ntayanga todelomo Bele lo Eeya lokaidingo lobutaó duluo monto yitaato demola walungo.

³⁹ Polowila tatihu-tihula totalu lo ayu salipu boito, loóonto maó woloolo mola ti Isa yilate. Polowila boito malo loíya, "Memangi otutu tau botie Walaó Allahu Taáala!"

⁴⁰ Mota teto woluo olo dengolo lota mongobua tadonggo hemo milohei ngoáamilalo boito monto u molamingo. To wolotalio woluo ti Salome, ti Maria Mahadalena, wau ti Maria tiilo lei Yakobus tamuuda wau ti Yoses.

⁴¹ Timongoliolo mongobua talo duduái wau tahelo tulungi li Isa tou Tio to Galilea. Wau woluo ngohuntua olo mongobua wewo teto tamaa lonaó mai ode Yerusalemu peé-peénta woli Isa.

⁴² Dulahu mahemo diólomo tou tei Yusu lonto Arimatea lonaó mai. Tio pongawaá

lo Mahakama Agama tahe hulumatio lotau. Tio olo donggo hemohima wakutuulio lo Allahu Taáala molumulo momalenta odelo Olongia. Dulahu boito dulahu polo dapato (deúito–yito dulahu toú diipo dulahu Saabati). Sababu uito wolo buheli tei Yusu mota lotaalua wolei Pilaatu wau malohile milate li Isa.

⁴³ (15:42)

⁴⁴ Tei Pilaatu lolinggolabe daá loódungohe deú ti Isa mailate.

⁴⁵ Toú loódungohe dudulohio lo polowila boito, tei Pilaatu lopoluasi maó olei Yusu mota lohama milate li Isa.

⁴⁶ Lapataó tei Yusu malotali watu lenani u moáaluti wau toú pilopo laahio mai milate li Isa, matilaputio lokaingi boito. Lapataó tio lopo wulideó milate boito tokuubulu tuwau u pilohutu todelomo huludu botu. Lapataó uito tio lopo lilideó botu leidaá tuwau pilopo heútio tongango kuubulu boito.

⁴⁷ Sambela uito ti Maria Mahadalena woli Maria tiilo li Yoses helo poótuoto toútoonu ti Isa pilopo wulidio.

16 ¹ Toú dulahu Saabati malo paluto, ti Maria Mahadalena, ti Maria tiilo lei Yakobus, wau ti Salome lonaó mota

lotali mai pipii-delowaalo u polamahulo tomilate li Isa.

² Donggo didimodupo daá toú mato lodulahu lobutu mai, tobohulo dulahu to diminggu boito, timongolio lonaó mota ode kuubulu.

³ Tohuungo dalalo malo loíya timongolio ngota timongota, "Tatoonu tamowali motulungi olanto mopohei botu poheúto tongango kuubulu boito?" Sababu botu boito leidaá tutu. Bo toú timongolio leitungga mota odito, iloontonga limongolio botu boito malo lilidu.

⁴ (16:3)

⁵ Lapataó timongolio tilumuwota mola ode delomo kuubulu boito. Todelomio to ambahu olowala, timongolio maloóonto taamuda ngota pakepake jumba moputió donggo hulo-huloáa, tunggula timongolio iloohea.

⁶ Taamuda boito loloíya, "Diila oohe! Otaawaú timongoli hemo lolohe li Isa taulo Najaret tamaa silalipulio. Tio diaaluo teea. Tio malobongu! Bilohilo maó, utie tambati u pilopo wulide limongolio o-Lio.

⁷ Botia ponaólo, potunggula maó habari botie ode tahiduduá o-Lio, leituoto tei Petrus. Polelea maó, 'Tio monaó meimulo

mola woli mongoli ode Galilea. Mola teto timongoli mamooónto o-Lio debo odelo u mapilo tahuda-Lio olemu."

⁸Yi timongolio mailumualai lonto kuubulu boito tulusi hiteteá, sababu iloohea wau diluito. Timongolio diila loloíya wolo-wolo boli olo tatoonu, sababu mailoohe.

⁹[Mongobua boito lonaó mota odelei Petrus wau mongo sahabatilio, tulusi helo hungguli maó wolo limbulimbu ngoáamila u mapiloótaa mai lo taamuda boito ode limongolio.

¹⁰Lapataó uito, ti Isa lohihilao lotimbulude to tahiduduá o-Lio helo pohabari lonto tiimulu demola otolopa habari u mantali wau bakaa tomimbihu oáahu u ohiheo-hiheolo maó.]

¹¹Bo toú timongolio loódungohe deú ti Isa tumutumulo, wau deú ti Maria maloónto o-Lio timongolio diila palacaya.

¹²Lapataó uito ti Isa lopobilohe batanga-Lio ode taduulota muri-Lio wolo dudelo uwewo. Uito lotoduo toú taduulota boito donggo hinaówa ode kambungu tuwau.

¹³Oditolio timongolio luli lohualingai wau helo poótaa suáli boito ode

tawewo-wewolio. Bo timongolio diila palacaya.

¹⁴Mapulitio, ti Isa lopobilohe batanga-Lio ode tamopulaa tuwau lota muri-Lio, toú timongolio donggo hipolamela. Tio lohimelu maó olimongolio sababu timongolio diila boti o iimani wau baaángiolo daá tilinggula diila palacaya totaa mahelo oonto lohihilao deú ti Isa tumutumulo.

¹⁵Lapataó ti Isa lotahuda ode limongolio, "Ponaólo ode ngoilanggubu dunia wau pololadelo mola Habari Mopiohe monto Allahu Taáala boito ode ngoáamila umati lomanusia.

¹⁶Taa diila palacaya mamooótapu hukuumani. Bo taa palacaya wau lihualio, mamooáahu.

¹⁷Odelo bukuti deú timongolio boito palacaya, tau-tauwala boito mamopo hinggi rohu u moleeto to tanggulu-Ú; timongolio mamobisala todelomo bahasa udiila otaawa limongolio.

¹⁸Wonu timongolio modihu tulidu meaalo mongilu peedi, timongolio diila tatopotala. Wonu timongolio mopodutu lo uluú toitaato tau-tauwalo tahi ngongota, tau-tauwalo boito mamoluli."

¹⁹Lapataó ti Isa Eeya helo bisala woli mongolio, Tio bilinta-ílo, mola ode sologa. Mola teto Tio momalenta peé-peéenta wolo Allahu Taáala.

²⁰Yi tahiduduá o-Lio malonaó wau lopo loladu habari lonto Allahu Taáala penu boli touútoonu. Wau Eeya olo loduduá lokalaja peé-peéenta woli mongolio wau lopo bukuti maó lotimbulude to momoóo-linggolabeyalo deú polo habari limongolio otutu.

Lukas

1 ¹ Teopiilus taa u obudi, Dadaata tau malo tolopani loluladei wolo aáatulu tomimbihu popoo–loútiyalo u mailowali mai to huungonto.

² Timongolio loluladu lotuuúde loú u sililitalio mai ode olanto lotau–tauwala taloóonto lohihilao popoo–loútiyalo boito monto bohulio, wau lapataó helo pololadu habarilio.

³ Touú watia wolo ulintapo lotulete maó ngoáamilalo boito lonto bohulio, ilanggapu lowatia mopiohu u moluladei podulohu tuwau u aáatulu odeli Tuani.

⁴ Pilohutu lowatia uito, alihu otaawa maó li Tuani deú wolo u mapilo ngaajali odeli Tuani memangi otutu.

⁵ Touú tei Herodes lowali olongia tolipu lo Yudea, woluo iimamu ngota tanggulio Jakaria. Tio tuotuoto topalatei lomongo iimamu Abia. Dilelio tanggulio Elisabet, olo wali mai li iimamu.

⁶ Tutumulo lo motolodile boito moósangi hilaa lo Allahu Taáala. Duduulota

modungohe palenta wau butoó lo Eeya wolo lealeaatu lohilao.

⁷Timongolio diila owalaó sababu ti Elisabet hunusa wau duduulotalo mapanggola.

⁸Toú dulahe tuwau, toú palatei lei Abia loótapu tayadu, tei Jakaria loponaó tuugasi debo odelo iimamu totalu lo Allahu Taáala.

⁹Wolo undiyani, u biasaalio hepohutuo maó lomongo iimamu, tei Jakaria tilunulio u tumuwoto ode delomo Bele lo Eeya wau molapo alama.

¹⁰Toú upacala pomobuwalo alama donggo naónaó, dadaata tahi poduáawa to bulemengio.

¹¹Toú boito malaíkati lo Eeya lopo bilohei lobatanga odelei Jakaria. Malaíkati boito tilimihulo to ambahu olowala lomeja tambati hepo lapowalo alama.

¹²Toú tei Jakaria loóonto malaíkati boito, tio lolingu wau yiloohe.

¹³Bo malaíkati boito loloíya maó, "Diila oohe, Jakaria! Allahu Taáala malo dungohe duámu. Dilemu ti Elisabet mamopotutu mai walaó talolaí ngota. Yió musí mongohi maó tanggula olio Yahya.

¹⁴Yió mameengahe tutu wau dadaata tamaa motiwengahe wonu walaó boito de mapotutulio mai!

¹⁵Tio mamowali tau daá moduduó bibilohu lo Eeya, wau tio diila tamongilu angguru meaalo minumani u mototoheto. Anggadu potutuolio mai tio makawasaa lo Rohullah.

¹⁶Dadaata taulo Isiráilu mamuli podulungolio ode Allahu Taáala, Eeya limongolio.

¹⁷Tio mamowali utolia lo Eeya tamolotolo wau okawasa debo odelo tei Elia. Tio mamopo damea tiyamo wau walaó, wau taadiila modungohe mamuli podulungolio ode dalalo pikiilangi u otutu. Louú odito tio mopo dapato umati tuwau tomalei dapato ode Eeya."

¹⁸"Woloolo mola pongotaawa lowatia deú suáli boito mamowali mai?" yilintu lei Jakaria ode malaíkati boito. "Watia mapanggola, wau dile lowatotia olo mapanggola."

¹⁹Malaíkati boito lolametaó, "Waú botie Jibraíilu. Waú hemomaya to Allahu Taáala wau Tiolo talo poáhu mai olaú u mopo tunggulai habari mopiohu botie ode olemu.

²⁰Wolo u mailoíyaú mai, mamowali to wakutuulio. Bo sababu yió diila palacaya, yió de diila moó bisala; yió mamowali bubu tunggula wolo uiloíyaú boito motoduo mai."

²¹Sambela uito, tau-tauwalo tulusi hemohima olei Jakaria. Timongolio lolinggolabe yilongola tio odito hiheolio todelomo Bele lo Eeya.

²²Wau tou yilumualai, tio diila loó bisala ode limongolio. Tio tulusi wambaó hemongohi isalati wolo uluúlio, wau debo buubu. Yi tau-tauwala olo lotota maó deú tio maloóonto tuwaulio lo bibilohu todelomo Bele lo Eeya.

²³Lapataó lopulito maasa lo tuugasilio to Bele lo Eeya, tei Jakaria olo lohualinga ode bele.

²⁴Diila lohiheo lapatio maó, ti Elisabet dilelio maa ilombodaá mai, tulusi lotiúlungo todelomo bele limo lohula mola hiheolio.

²⁵Tio loloíya, "Pulitio maó Eeya malo tulungi mai olaatia wau lolulutaó ohihina laatia."

²⁶Tou ti Elisabet maa ilombodaá mai wolomo hula, Allahu Taáala lopoáhu

Malaíkati Jibráilu ode Najaret, kota tuwau tomadala lo Galilea.

²⁷ Jibráilu yilao mota lo Allahu Taáala ode tadulahu ngota, taílunte Maria. Tadulahu boito matitii-lantahe wolo talolaí ngota taílunte Yusu, wali li Olongia Dauda.

²⁸ Malaíkati boito lonaó mai odeli Maria wau lotahuda maó, "Salamu, yió tabilalakati lo Eeya wolo polu-polutuó! Eeya peé-peéenta wolemu!"

²⁹ Loódungohe tahuda lo malaíkati boito ti Maria iloohea, tilinggula mahemo hintu-hintu todelomo hilao wolo makusudu lo salamu boito.

³⁰ Yi malaíkati boito lotahuda olio, "Diila oohe, Maria, sababu yió motuuúde wolo hilaa lo Allahu Taáala.

³¹ Yió maómbodaá mai wau mamopotutu mai taúnge ngota, umusi wohiyamu maó tanggulo Isa.

³² Tio mamowali udaá wau maunteelo Walaó Allahu Taáala Taa Laba-labaalo molanggato. Eeya Allahu Taáala mamopowali o-Lio olongia debo odelo ti Olongia Dauda, nene moyalio.

³³ Wau Tio mamomalanta debo odelo olongia to wali mai lei Yako ohiheo-hiheolo maó. Yilaidia-Lio diila taópulitio."

³⁴ "Bo watia donggo tadulahu," uali Maria ode malaíkati boito, "woloolo mola suáli boito mamowali mai?"

³⁵ Malaíkati boito malo lametaó, "Rohullah mamei dungga mai ode olemu, wau kawasa lo Allahu Taáala mamo henggubei olemu. Uitolo sababuulio walaó tapotutumu mai boito maúnteelo Mantali, Walaó Allahu Taáala.

³⁶ Eelai maó: ti Elisabet, ilaatamu boito maa ilombodaá wolomo hula, eleponu tio mapanggola wau tau hipoloíyawa deú tio hunusa.

³⁷ Sababu ode Allahu Taáala diaaluo u diila pongalo aakali."

³⁸ Lapataó ti Maria lolóiya maó, "Watia botie wato lo Eeya; hulialo mai motoduo to olaatia debo odelo uiloíyamu." Lapataó malaíkati boito malonaó lololaa maó oli Maria.

³⁹ Lolamemeto lapatio maó uito, ti Maria lonaó mola ode kota tuwau to Yudea tomadala hihuí-huída.

⁴⁰ Tio lonaó ode bele lei Jakaria, wau tou tilumuwotaó, tio longohi salamu odeli Elisabet.

⁴¹ Wau odito ti Elisabet loódungohe salamu li Maria, walaó tato delomo talomo

li Elisabet boito ilumoliyoó. Yi ti Elisabet kiluwasa mai lo Rohullah,

⁴² tulusi longibode, "Yióló talaba-labaalo bilalakati mai towolota lo ngoáamila mongobua! Babaa-kakatilo walaó tamaa potutumu mai boito!

⁴³ Tatoonu watia botie tilinggula ti Ibu lo Eeya lonaó mai ode laatia?

⁴⁴ Odito watia loódungohe salamunto, walaó todelomo talomo lowatia ilumoliyoó yileengahe.

⁴⁵ Potisangilo tutu yió, sababu palacaya deú wolo u tilahuda lo Eeya olemu boito mamotoduo mai!"

⁴⁶ Ti Maria lolóiya, "Hilaa lowatotia momuji mola to Eeya,

⁴⁷ wau jiwa lowatotia meengahu sababu Allahu Taáala Tamoo-poáhua lowatotia.

⁴⁸ Tio loéelai watotia, Wato-Lio taahina! Tumulalo mai botia ngoáamila bangusa hemolóiya watotia sanangi tutu.

⁴⁹ Sababu Allahu Taáala Taa Laba-labaalo kawasa lohutu mai susuu-aliyaalo udaá olo watotia. Mantalilo mola tanggu-Lio.

⁵⁰ Wali domi wali Eeya lodehu hilao totaa moohe to o-Lio.

⁵¹ Wolo uluú–Lio u molotolo wau buheli Tio lopo bubuuáyawa tahi sombongia, wau lopo ambulati patuju limongolio.

⁵² Mongo olongia yilaa–Hio lonto tambati huhuloá li olongia wau taahina pilopolaió.

⁵³ Taa pola–polaango pilopotolu–Lio wolo totoonulalo u mopiohu, taakaya pilopolahi wolo laulau.

⁵⁴ Tio lotulungi Isiraílu wato–Lio, loduduó danti u pilohutu–Lio woli nenemoyanto.

⁵⁵ Eeya diila lolipata danti–Lio, Tio ilomura lohilao odelei Abraham wau walilio mola tunggula ohiheo–hiheolo maó."

⁵⁶ Otanu tolo hula mola hiheolio ti Maria lotibiluloá woli Elisabet, bolo tio lohualinga ode belelio.

⁵⁷ Malei dungga wakutuulio ti Elisabet u motutu mai. Tio lopotutu mai walaó talolaí ngota.

⁵⁸ Mongo tiheedio wau mongo pohutatalio loódungohe malo odito piohio Eeya toli Elisabet, wau timongolio olo loduduá lotiwengahe wolio.

⁵⁹ Toú taúnge boito o umulu walu hui, timongolio lonaó mai loluuna olio. Timongolio motohilaa mongunte maó taúnge boito Jakaria moduduá tangguli

paapalio, bo timaamalio lolóiya maó,
"Diila!

⁶⁰Tio musí wohiyalo tanggula Yahya."

⁶¹"Diaaluo penu boli ngotaa maó monto
mongo pohutatamu otanggula odito," uali
mongolio olio.

⁶²Tulusi wolo isalati, timongolio lohintu
maó odelei Jakaria tanggula wolo u
mawohi maó to walaío.

⁶³Tei Jakaria malohile botulei tuwau
tulusi loluladeó, "Tanggulio Yahya."
Timongolio ngoámila lolinggolabe.

⁶⁴Toú boito olo tei Jakaria luli lowali
lobisala wau lomuji mola Allahu Taáala.

⁶⁵Mongo tiheedio ngoámila mailoohe,
wau habari boito lololadulo mola ode
ngoilanggubu madala to hihuí-huída lo
Yudea.

⁶⁶Ngoámila taloó dungohe suáli
boito helo hintu todelomo hilao, "De
mowali wolo walaó boito?" Sababu Eeya
peé-peéenta wolio.

⁶⁷Tei Jakaria, tiyamo lowalaó boito,
kiluwasa mai lo Rohullah tilinggula tio
lopo tunggulo tahuli lonto Eeya. Tio lolóiya
maó,

⁶⁸"Dulo ito momuji mola to Eeya, Allahu
Taáala bangusa lo Isiráilu! Tio malei

dungga mai lotulungi umati-Lio wau lopobebasi olimongolio.

⁶⁹ Tio longohi mai olanto tamoo-poáahua tamolotolo boli buheli, wali lei Dauda, wato-Lio.

⁷⁰ Muloololio mai daá lotimbuludu tomongo nabi tatilulao-Tio, Eeya malongohi danti-Lio.

⁷¹ u mopoáahu olanto monto musunto wau monto kawasa lotau-tauwalo tamolonuó olanto.

⁷² U mopobilohei omura lohilaa-Lio ode loluhulunto, danti-Lio u mantali boito mapomataa-Lio mai.

⁷³ Tio lotadia tolei Abraham tipaapanto, wau lodanti u mopoáahu olanto monto musunto, alihu ito diila moohe momaya o-Lio,

⁷⁴ (1:73)

⁷⁵ Iaito taáluku wau hulumati o-Lio wau moposanangi hilaa-Lio ngotupa lo tutumulunto.

⁷⁶ Yió, wuu walaúuú maúnteelo nabi Allahu Taáala Taa Laba-labaalo molanggato. Yió yilao leimulo wolo Eeya mai momuó dalalo o-Lio,

⁷⁷ u mopololadu ode umati-Lio deú timongolio mapoáahuwolo wonu Allahu

Taáala malo ngambungu duduu–sawaalo limongolio.

⁷⁸Eeyanto mura lohilao wau boli moomonua; huna mopoáahu olanto Tio dungga–dungga mai. Debo odelo mato lodulahu mobutu mai toú dimodupo,

⁷⁹odieelo mola Tio mongohi mai baangio to ngoáamila tau tahitumula todelomo u modiólomo wau hiwoohea. Tio modelo olanto ode dalalo udulu–dulunga ode odudame."

⁸⁰Walaée Jakaria boito he oduhenga mola udaá wau he oduhenga mola lotolo rohulio. Tio lotibiluloá to huta datahu u luasi daá wau delita, tunggula leidungga wakutuulio tio lopobilohe batangalio to bangusa lo Isiráilu.

2¹Towakutu boito ti Kaisali Agustus lomalenta alihu ngoáamila tuango lipu bele biluloá saaha li olongia lo Roma modaputali batanga duólo pololeekeni jumula ulipu.

²Pololeekeni jumula ulipu ubohulio botie pilopo naólio towakutu tei Kirenius lowali gubolonulu tolipu lo Siria.

³Ngoáamila tau toú boito lotinaó–naó mota leí daputali to motíidu kotalio.

⁴ Tei Yusu olo lomonggato lonto Najaret to Galilea, ode Betlehemu to Yudea, tambati pilotutua li Olongia Dauda; sababu tei Yusu wali mai lei Dauda.

⁵ Tei Yusu léi daputali woli Maria tilantahio, tadonggo ombodaá.

⁶ Tou timongolio to Betlehemu malei dungga wakutuulio li Maria u motutu.

⁷ Tio lopotutu mai walaó talolaí kikiiá ngota walaío tamohuhula daá. Walaó boito dilumumulio wolo kaingi, lapataó pilopo wulidio totambati pongongala lo binatangi u tuatua laato; sababu timongolio diila loótapu tambati u pohepita limongolio.

⁸ Tohui boito woluo mongo diti tahipo dahawa hihii-mbaalio to huta luasi u pilobutua huóyoto to madala boito.

⁹ Debolu malaíkati lo Eeya lopobilohei batanga olimongolio wau tinela u mobaango lonto Eeya tinetinela loóbaangai olimongolio, wau timongolio mailoohe daá.

¹⁰ Bo malaíkati boito loloíya maó, "Diila oohe! sababu waú lonaó mai modelo habari u mopiohu ode limongoli-habari umoó wengahe daá totaa ngoáamila.

¹¹ Todulahe botie tokota lei Dauda mapilo tutulio mai Olongia Tamoo-

poáahua olemu deúito-yito ti Isa Almasi, Eeya.

¹² Utieelo tuotio; timongoli mamoo dungga taunge ngota dilumumulio lokaingi, wau wuliwulide to tambati pongongala lo binatangi."

¹³ Debolo malaikati boito diluduá lo malaikati dadaata wewolio, tahi pomujia Allahu Taála. Timongolio loloíya,

¹⁴ "Ilopujialo mola Allahu Taála tohulungo u pulito molanggato! Wau toitaato dunia, salaamatilo mola manusia tamopo sanangi hilaa lo Eeya!"

¹⁵ Lapataó mamaa-laikatiyalo boito lololaa maó olimongolio wau lohualinga mola ode sologa, mongo diti mahipo loíyawa ngota timongota, "Dulo ito ode Betlehemu mola momilohe u mailowali boito upilo tahuda mai lo Eeya olanto."

¹⁶ Timongolio huáa lonaó, lapataó maloó dungga oli Maria wolei Yusu wau taunge boito wuliwulide totambati pongongala lo binatangi.

¹⁷ Touú mongo diti boito loóonto taunge boito, timongolio losilita maó wolo u mapilolele mai lo mamaa-laikatiyalo boito pasali lo taunge boito.

¹⁸Wau ngoáamila tau hilinggolabe loódungohe silita lomongo diti boito.

¹⁹Boti Maria malolahu ngoáamilalo boito todelomo hilaalio wau lo toloéelaó.

²⁰Mongo diti boito luli lohualinga mota ode huta luasi pilobutua huóyoto sambela hipomujia wau helo polaió Allahu Taáala, sababu ngoáamila u maílo dungohe wau iloontonga limongolio, tiluhata debo odelo uiloíya lo malaíkati.

²¹Toú tutumu-Lio mawalu hui, Walaó boito tilunaalio. Wau timongolio longunte maó o-Lio Isa, tanggulo uilohi lo malaíkati o-Lio toú Tio diipo bilanta liilo-Lio.

²²Malei dungga wakutuulio tei Yusu woli Maria moponaó uúdu pomantaliyalo moduduó butoée Musa. Oditolio timongolio lodelo Walaó boito ode Yerusalemu mola yiludu ode Eeya.

²³Sababu todelomo Butoó Eeya tulatuladu odie, "Timíidu walaó talolaí tamohuhula daá, musi wuduolo ode Eeya."

²⁴Timongolio olo omakusudu mopodewo bake, deúito-yito ngopanggalo bulungi talakuku meaalo mohelu duluo bulungi poombo udonggo muda, debo odelo u tilantulio todelomo Butoó Eeya.

²⁵ Toú boito to Yerusalemu woluo ngotaalio tanggulio Simeon. Tio taa mopiohu, tamoohe to Allahu Taáala wau donggo hemohima saaátilio Allahu Taáala mopoáahu mai Isiraílu. Rohullah wolio,

²⁶ wau Rohullah malo poótaa olio deú tio diila tamate toú diipo moóonto Olongia Tamoo-poáahua tadilanti mai lo Eeya.

²⁷ To potuhata lo Rohullah, tei Simeon tilumuwoto ode Bele lo Eeya. Toú boito tei Yusu woli Maria lopo tuwotaó li Isa, tadonggo ukikiiá boito u mohutu upacala u pilomalanta butoó lo agama.

²⁸ Yi tei Simeon lohama maó Walaó boito wau lomuduó o-Lio, tulusi lomuji mola to Allahu Taáala,

²⁹ "Botia, Eeya, Eeya maloéela danti-Mu. Poluliaalo mai wato lo Eeya botie mate maó wolo duóduóoto.

³⁰ Sababu wolo mato lowatotia lohihilao watotia maloóonto Tamoo-poáahua u lonto Eeya

³¹ Tamoo-poáahua boito mapilo dapato lo Eeya duólo totoonulalo bangusa:

³² debo odelo baango ulopo baangai dalalo babaa-ngusawalo wewo, tau monaó mai ode Eeya; deúito-yito baango

u mopotoduo mai ohulumati duólo umati-Mu Isiraílu."

³³ Tiilo wau tiyamo lo Walaó boito lolinggolabe lodungohe wolo uiloíya lei Simeon pasali lo Walaó limongolio.

³⁴ Tei Simeon lomalakati olimongolio wau loloiya maó odeli Maria, tiilo lo Walaó boito, "Walaó botie maa tilulaotai lo Allahu Taáala u mopobinasa wau mopoáahu dadaata taulo Isiraílu. Tio mamowali tuoto monto Allahu Taáala, u matehengia lotaa dadaata,

³⁵ wau loú odito mamó bonggalilo mola tuango hila limongolio. Osuukali mamoluhí mai hilaamu debo odelo wamilo u molalito."

³⁶ Woluo olo ngotaalio lonabi taabua tamaa panggola daá. Tanggulio ti Hana, walaée Panuel, lonto suku Aser. Tou mapitu lotaunu mola lonika maó,

³⁷ ti Hana malowali janda, wau botia o umulu walu lopula pato lotaunu. Diila peéenta maó tio lololaa Bele lo Eeya. Hui dulahu tio hemo taáluku wau hemo hulumati to Allahu Taáala teto wolo hemoduá wau hemopuasa.

³⁸ Tiluhata tou boito olo tio lonaó mai, tulusi lomuji mola to Allahu Taáala wau

helo bisala pasali lo Walaó boito ode ngoáamila tahipo himawa saaátilio Allahu Taáala mopolopato Yerusalemu.

³⁹Lapataó tei Yusu woli Maria lopohutu maó ngoáamila upilopo wajibu Butoó lo Eeya, timongolio luli lohualinga ode Najaret to Galilea.

⁴⁰Walaó boito heúdaá mola wau molotolo. Tio molinepo daá wau pilonua daá lo Allahu Taáala.

⁴¹Timiídu taunu mongo dulaá li Isa hemonaó mola ode Yerusalemu hemopolame Dulahu Buka Paska.

⁴²Wau touú ti Isa maa omuulu mopulaa dulo taunu, timongolio lonaó mola ode lameyangi boito debo odelo biaasa to limongolio.

⁴³Lopaluta mota lameyangi boito timongolio malo hualingo, boti Isa, Walaó boito, donggo lotitola to Yerusalemu, wau diila ilotaawa lomongo dulaá–Lio.

⁴⁴Helantobu limongolio deú Tio malo duduái wolo ngopoámbua tau. Lapatio lononaó ngohilayaá lodulahu bolo timongolio lotolopani maó mololohe o–Lio towolota lomongo pohutata–Lio wau tamoótaawa woli mongolio.

⁴⁵ Bo timongolio diila loódungga o-Lio, oditolio timongolio malo hualinga ode Yerusalemu mololohe o-Lio.

⁴⁶ Toú matolohui mola hipololohe, malotapu limongolio Tio todelomo Bele lo Eeya. Tio donggo hulohuloó hemo dungohe guguu-ruwaalo agama wau tinggai hemo hihintua.

⁴⁷ Ngoáamila tahi dungohe o-Lio hilinggolabe sababu molinepo totoonulalo totame-Tio.

⁴⁸ Mongo dulaá-Lio olo lolinggolabu loóonto o-Lio. Tiilo-Lio malo loíya o-Lio, "Uuti, yilongola odie huhutuu-Mu to olami? Tiyama-Mu wau tiila-Mu mahilawala hemo lolohe ole-Mu!"

⁴⁹ Ti Isa lolametaó, "Yilongola tipaapa woli maama hemo lolohe olaa-Tia? Wolo diila otaawa lipaapa wau limaama u Watia musi woluo todelomo bele li Paapa lo Watia?"

⁵⁰ Bo timongolio diila mongalati u pilolametaó li Isa.

⁵¹ Lapataó ti Isa malo hualinga woli mongolio ode Najaret, wau lodungohe olimongolio. Ngoáamila suáli boito hetilahu maó liilo-Lio todelomo hilaalio.

⁵² Ti Isa helebe udaá mola wau oduhenga tine–Pio, boli pilonua lo Allahu Taáala wau aahudu lomanusia.

3 ¹ Totaunu opulaa limolio lo pamalenta li Kaisali Tiberius, tei Pontiu Pilaatu lowali gubolonulu to Yudea, wau tei Herodes hemo malenta to Galilea. Tei Pilipu, wutatei Herodes hemo malenta tomadala lo Iturea wau Trakhonistis, hiambola tei Lisantias hemo malenta to Abilene.

² Tadihudihu mongo iimamu daá deúito–yito tei Hanas wolei Kayaapas. Totaunu boitolo Allahu Taáala lotahuda odelei Yahya, walaée Jakaria to huta hungayo u luasi daá.

³ Yi tei Yahya malonaó ode utoonulalo maó to ngoilanggubu madala lo Dutulaa Yordan wau helo potunggulo habari lonto Allahu Taáala. Tei Yahya helo ngibodu odie, "Polilihulo monto duduú–sawaalo limongoli, wau timongoli musi lihuwalo alihu Allahu Taáala mongambungu mai olimongoli."

⁴ Uito tutuuúde loú tulatuladu todelomo buku li Nabi Yesaya: "Woluo tawuwa–wuwaatiá tohuta hungayo u luasi daá,

'Podapato maó dalalo ode Eeya, popayadu maó dalalo o-Lio.

⁵ Timiïdu lumbaya mamusi tambulalo, timiïdu huïdu wau huludu popayadulo, Dalalo u hiliú-liúwa mamusi potulidulo wau dalalo u hilinggo-linggotua popayadulo.

⁶ Tau-tauwala to ngoilanggubu dunia mamooonto Allahu Taáala mopoáahu mai manusia!"

⁷ Dadaata talonaó mai leïlihu olei Yahya. Tei Yahya loloïya ode limongolio, "Timongoli tau moleeto! Tatoonu tahe moloiya deú timongoli moóhuli monto hukumani lo Allahu Taáala udungga-dungga mai?

⁸ Pobilohé maó wolo huhutuumu deú timongoli malo lilihu lonto duduu-sawaalo limongoli! Diila maó polumulo moloiya deú tei Abraham yito tinenemoyamu. Eelai maó: Monto boboo-tuwaalo botie olo Allahu Taáala mambo mohutu mai wali odelei Abraham!

⁹ Bulingo malei dapato u poluwodela bungo lo ayu demola wuwa-wuwaátiolo maó. Timiïdu bungo lo ayu udiila poótapulalo hungolio u mopiohe

maluwodulo wau pomahulolo ode delomo tulu."

¹⁰"Oditolio, wolo u musu pohutuo lamiaatia?" yilintu lotau-tauwalo odelei Yahya.

¹¹Tei Yahya lolametaó, "Taa u oboó dulopita, musu mongohi ngopita to tadiaaluo; wau taa u o uáalo, musu molayadeó."

¹²Tahi potagia beya olo lonaó mai odelei Yahya mai leílihu. Timongolio lohintu maó, "Paaá Guru, wolo u musu pohutuo lamiaatia?" Tei Yahya lolametaó,

¹³"Diila polagi lebe dadaata loú wolo umaa tilantulio."

¹⁴Woluo olo pajule talohintu maó, "Woloolo mola wolamiaatia? Wolo u musu pohutuo lamiaatia?" Tei Yahya lolametaó, "Diila maó pohama untungi daá penu boli olita wau diila maó polambata doi wolo popoo-tuluduwalu paaluti. Polulilo lohilao wolo wuupamu!"

¹⁵Toú boito tau-tauwalo mahipo hihintua, wolo tei Yahya Olongia Tamoo-poáhua taheimaa limongolio.

¹⁶Uito sababuulio tei Yahya lolóiya maó ode limongolio ngoáamila, "Watia mopolihu olimongoli wolo taluhu, bo

demaa meidungga mai Taa lebe udaá maó wolaatia. Penu boli bo monguáde tali losapatu-Lio watia diila patuti. Tio mamó polihu olimongoli wolo Rohullah wau tulu.

¹⁷To uluú-Lio otiitihe u polaapalo ngoáamila palelio tunggula belesi. Pale maimoó-Lio todelomo yibungo, bo ngoáamila taapo mapobuo-Lio todelomo tulu udiila mowali mate!"

¹⁸Odieelo mola tei Yahya helo nasehati totau-tauwala wolo pohuli u hidala-dalaala, toú tio lopo loladu Habari Mopiohe.

¹⁹Bo tei Herodes, takawa-kawasa to Galilea, hedilini lei Yahya tomimbihu ninikalio woli Herodias, dile lowutatio, wau tomimbihu ngoáamila ololeeto wewo umaa pilohutulio.

²⁰Bo tei Herodes tumbaó helo tolongaó totoonulalo ololeetio wolo lopo tuwoto olei Yahya ode delomo tutupa.

²¹Lapataó ngoáamila tau boito yilihualio, ti Isa olo mailihualio. Wau toú Tio donggo hemoduá, hulungo lohuó,

²²wau Rohullah lotuhutai ode yitaa-Tio debo odelo bulungi poombo, tulusi dungo-dungohei suala lo Allahu Taáala

lotahuda, "Yióolo Wala-Ú tapilonu-Ú. Yió moósanangi hilaa-Ú."

²³ Touú ti Isa lolumula kalajaa-Lio, Tio o umulu otanu tolo pulu lotaunu. Moduduó huhama lotau, Tio walaée Yusu, walaée Eli,

²⁴ walaée Matat, walaée Lewi, walaée Malkhi, walaée Yanai, walaée Yusu,

²⁵ walaée Matica, walaée Amos, walaée Nahum, walaée Hesli, walaée Nagai,

²⁶ walaée Maat, walaée Matica, walaée Simeí, walaée Yosekh, walaée Yoda,

²⁷ walaée Yohanan, walaée Resa, walaée Jerubabel, walaée Sealtiel, walaée Ner,

²⁸ walaée Malkhi, walaée Adi, walaée Kosam, walaée Elmadam, walaée Eri,

²⁹ walaée Yesua, walaée Eliejer, walaée Yorim, walaée Matat, walaée Lewi,

³⁰ walaée Simeon, walaée Yehuda, walaée Yusu, walaée Yonam, walaée Elyakim,

³¹ walaée Melea, walaée Mina, walaée Matata, walaée Natan, walaée Dauda,

³² walaée Isai, walaée Obed, walaée Boas, walaée Salmon, walaée Nahason,

³³ walaée Aminadab, walaée Admin, walaée Arni, walaée Hejron, walaée Peres, walaée Yehuda,

³⁴ walaée Yako, walaée Isihaka, walaée Abraham, walaée Terah, walaée Nahor,

³⁵ walaée Serug, walaée Rehu, walaée Peleg, walaée Eber, walaée Salmon,
³⁶ walaée Kenan, walaée Arpaksad, walaée Sem, walaée Noho, walaée Lamekh,
³⁷ walaée Metusalah, walaée Henokh, walaée Yared, walaée Mahalaleel, walaée Kenan,
³⁸ walaée Enos, walaée Set, walaée Adamu, Walaó Allahu Taáala.

4 ¹ Ti Isa kiluwasa lo Rohullah tou Tio lololaa maó Dutulaa Yordan. Rohullah lodelo o–Lio ode huta datahu u luasi daá wau delita.

² Mota teto Tio yilimontala lo Ibilisi wopato pulu hui mola hihewolio. Ngohilayaó waktu boito Tio diila lolamela wolo–wolo. Oditolio tou pulitio maó Tio mapilolango.

³ Ibilisi loloiya maó o–Lio, "Yió botie Walaó Allahu Taáala, diila odito? Oditolio, nte ahuli maó botu botie mowali roti."

⁴ Ti Isa lolametaó, "Todelomo kitabi tulatuladu, 'Manusia diila mowali bo tumumulo wolo roti wambaó.'"

⁵ Lapataó Ibilisi malodelo li Isa ode tambati u molanggato, wau ngoínta lomato Ibilisi lopobilohé o–Lio ngoáamila bele biluloá saaha li olongia todunia.

⁶ "Ngoáamila okokawasa wau okokaya mawuduwoú mai ole-Mu," loíya maó lo Ibilisi odeli Isa, "Sababu ngoáamilalo mailudulio mai olaú wau waú mowali mongohi boli olo tatoonu taóhilaa wohiyaú.

⁷ Ngoáamilalo boito mamowali miliki-Mu wonu yió taáluku molubo olaú."

⁸ Ti Isa lolametaó, "Todelomo Kitabi tulatuladu, 'Tubowa mola Allahu Taáala Eeyamu wau bayailo Eeya wambaío.'"

⁹ Lapataó Ibilisi malodelo li Isa ode Yerusalemu wau lopotihula mola o-Lio to bolitutuó Bele lo Eeya wau lolóiya maó o-Lio, "Yió botie Walaó Allahu Taáala, diila odito? Oditolio, potidehulo mola monteea.

¹⁰ Sababu todelomo Kitabi tulatuladu, 'Allahu Taáala mamopoáhu mai mamaa-laíkati-Lio u modaha ole-Mu mopio-piohulo maó.'

¹¹ Wau olo, 'Mamaa-laíkatiyalo mamololimo ole-Mu wolo uluú limongolio, alihu penu boli oáatumu diila meiteduó tobotu.'"

¹² Ti Isa lolametaó, "Todelomo Kitabi tulatuladu, 'Diila maó pohimontala Allahu Taáala Eeyamu'."

¹³ Lapataó Ibilisi yilapato lohimontala li Isa wolo totoonulalo dudelolio, tio lololaa maó li Isa wau lohima wakutu u mopiohu.

¹⁴ Lapataó ti Isa lohualinga mola ode Galilea; wau Tio kiluwasa maó lo Rohullah. Habari pasali lo batanga–Lio malo loladulo mola ode ngoilanggubu madala boito.

¹⁵ Tio helo ngaajali to bebee–leyaalo potabiaala, wau ngoáamila tau hipomujia o–Lio.

¹⁶ Ti Isa lonaó mola poli ode Najaret, tambati u pilopo udaá mai o–Lio. Todulahu Saabati, moduduá obobiasaa–Lio Tio hemonaó ode bele potabiaalo. Tio tilimihula mola u lopobaca maó Kitabi,

¹⁷ wau yilohilio o–Lio buku li Nabi Yesaya. Tio lomuó mola lilibu lobuku boito, tulusi ilodungga–Lio ayati botie,

¹⁸ "Rohu lo Eeya woluo to ola–Ú, sababu Tio malo muduó ola–Ú mopohabari Habari Mopiohe ode taa mosikini. Tio lalao mai ola–Ú mopo malalumu polobebasi totaa leitawalo wau mopoóluli totaa pitoó: u mopobebasi taa hideehe

¹⁹ wau mopohabari dudunggalio mai saaáti lo Eeya mopoáahu umati–Lio."

²⁰ Ti Isa luli lolilibeó buku boito, wau luli lopo walingaó ode tahi otuugasia, lapataó

lotihuloó. Ngoáamila taa todelomo bele potabiaala boito lomilohe o-Lio.

²¹ Wau ti Isa lolumulo lotahuda maó olimongolio, odie, "Aáa-yatiyaala lo Kitabi botie todulahe botie mapiloó polu mai tosaáti timongoli loódungohe uito."

²² Tataa-heyaaalo u yilapali-Lio mopiohe daá, tilinggula timongolio lilinggolabe wau lodaha o-Lio. Timongolio maloloíya, "Diila bo walaée Yusu Tio botie?"

²³ Yi ti Isa lotahuda maó ode limongolio, "Tantu timongoli mamomake lumadu botie ode ola-Ú, 'Dokuteli, poólulialo maó batanga-Mu lohihilao. Umoó linggolabe u ilodungohe lami u pilohutu-Mu to Kapernaum, pohutuwalo maó olo to pilohuluta loduhu-Mu lohihilao.'"

²⁴ Ti Isa loduhengaó, "Eelai maó, diaaluo nabi tahulumatiolio to kambungu pilohuluta loduhulio lohihilao.

²⁵ Bo dungohe mai: tojamani lei Elia, tou diila dilidia mai tolo taunu wau ngoputu hiheolio, lotoduo mai polobiti daá to ngoilanggubu madala. Tou boito woluo dadaata mongo janda to Isiraílu.

²⁶ Openu boli odito, Allahu Taáala diila lopoáhu olei Elia lonaó ode tala ngota

lomongo janda boito, bo wambaó ode janda ngota to Sarpat to madala lo Sidon.

²⁷ Odito olo tojamani li Nabi Elisa woluo dadaata tau to Isiraílu ongongoto lo alipo u moótihela hapato, bo diaaluo penu boli ngotaa maó limongolio tapiloóluli. Ngopohia tei Naáman taulo Siria boito."

²⁸ Ngoáamila tau tobele potabiaalo boito maloingo daá tou loódungohe suáli boito.

²⁹ Timongolio tilimihula mola wau lopolahi maó li Isa ode bulemengo kota, wau lodelo mola o-Lio ode binggi lohuídee, toutoonu kota limongolio bilongulio. Timongolio omakusudu mohuntude o-Lio ode delomo liito.

³⁰ Boti Isa tilumuwota mota ode taa dadaata boito tulusi lonaó.

³¹ Lapataó ti Isa lonaó mola ode kota Kapernaum to Galilea. Mola teto Tio helo ngaajali tau-tauwala todulahu Saabati.

³² Timongolio lolinggolabe loóonto dudelo-Lio lou mongaajali, sababu Tio helo ngaajali wolo tilihula.

³³ Mota teto tobele potabiaala woluo ngotaalio takiluwasa lorohu u moleeto. Tau boito wuwa-wuwaatiá,

³⁴ "Wuu Isa, taulo Najaret, wolo umaa pohutuo-Mu olami? Yió dungga-dungga

mai mopobinasa olami? Otaawa lami tatoonu Yió botie: Yió botie utolia tamantali lonto Allahu Taáala!"

³⁵ "Poóoyo mola!" antingaó li Isa ode rohu u moleeto boito. "Hinggi maó totau botie!" Tulusi rohu u moleeto boito lopobanti tau boito totalu limongolio ngoáamila, lapataó yilumualo lonto tau boito wau diila lopo ngongoto olio.

³⁶ Ngoáamila tau lolinggolabe wau hipo loíyawa ngota timongota, "Malo odito hebati tahuda-Lio. Wolo tilihula wau kawasa, Tio lomalenta roroo-huwaalo u moleeto yilumualo, wau timongolio yilumualaó olo!"

³⁷ Yi habari pasali li Isa malo loladulo mola to ngoilanggubu lipu boito.

³⁸ Ti Isa lololaa maó bele potabiaalo boito, tulusi lonaó ode bele lei Simon. Moluhengee Simon taabua mongongoto he huhulolio, wau tau-tauwalo malo poótaa suáli boito odeli Isa.

³⁹ Ti Isa lonaó mota ode tambati potuluhe li ibu boito, tulusi lopoáhu maó huhulo boito. Huhulo boito yilooli, wau tiilo moluhengee Simon lato lobongu mola wau lohinta maó olimongolio.

⁴⁰ Toú dulahee donggo tulotulopa mota, ngoáamila tau helodelo mai odeli Isa mongo wutatio tahi ngongota tilolahepaalo ngongoto. Ti Isa helo podutu uluú-Lio toitaati mongolio ngota-ngota wau lopoóluli olimongolio.

⁴¹ Roroo-huwaalo u moleeto boito olo yilumualaó lonto taa dadaata boito, sambela wuwa-wuwaatiá, "Yióolo Walaó Allahu Taáala!" Boti Isa longatinga olimongolio wau lodini olimongolio mobisala, sababu otaawa limongolio deú Tiolo Olongia Tamoo-poáhua.

⁴² Toú dulahee butubutu mai ti Isa lololaa maó kota boito tulusi lonaó mota ode tambati tuwau udiila otau. Tau-tauwalo mahemo lolohe o-Lio, wau toú timongolio loódungga o-Lio, timongolio lotolopani alihu Tio diila tamololaa maó olimongolio.

⁴³ Boti Isa lotahuda maó, "Habari Mopiohe pasali woloolo mola Allahu Taáala momalenta musi pohabariyo-Ú olo to kokoo-tawaalo, sababu duólo ui-uitolo Allahu Taáala lolao mai ola-Ú ode dunia."

⁴⁴ Sababu uito ti Isa helo hutuba todelomo bebee-leyaalo potabiaala to ngoilanggubu lipu lo Yudea.

5 ¹ Toú wakutu tuwau, ti Isa tilimihulaó to pentadu lobulalo Genesaret. Dadaata tahipo huhuuntula motohilaa modungohe habari monto Allahu Taáala.

² Ti Isa loóonto mota bulotu mohelu duluo to pentadu boito; tahi pahalalio malolaabei lonto bubuu–lotuwalo boito wau donggo hiponguloa pajala limongolio.

³ Ti Isa lobotulaó ode tala tuwau lobulotu, deúito–yito bulotu lei Simon, lapataó lopoáhu olei Simon lohuntudeó bulotulio boito lolamingo ngopeé lonto pentadu. Ti Isa malo tihuloó todelomo bulotu boito wau helo ngaajali taa dadaata.

⁴ Lapataó mailapato longajali, Tio lotahuda maó odelei Simon, "Biteyalo mota ode tambati ulebe modelomo, wau pomahula mota pajalamu u moheúpaatola."

⁵ "Paaá Guru," tametaó lei Simon, maílo–iloonua mongo watotia hipo kalajawa tióopatea, bo diila loátapu wolo–wolo! Bo sababu ti Paaá talo poáhu, mopiohulo; watotia mamuli mopo loladeó pajala botie."

⁶ Lapataó timongolio lopohutu maó uito, timongolio maloótapu mai dadaata daá

tola tunggula pajala limongolio malo kaidingo.

⁷ Sababu uito timongolio lohile tulungi tomongo sahabati limongolio tobulotu uwewo. Mongo sahabati limongolio boito lonaó mai tulusi peé-peéenta woli mongolio loluwangaó bulotu boito duuduluo tunggula lopolu wolo tola tilinggula bubuu-lotuwalo boito ngopeé loáhumo.

⁸ Touí tei Simon loóonto maó uito, tio malo sujudu mola totalu li Isa, tulusi lolóiya maó, "Tolailo maó watotia, yaa Eeyau! Sababu watotia taa odusa!"

⁹ Tei Simon wau ngoáamila tapeé-peéenta wolio lolinggolabe loóonto maó dadaata tola uilaúpo limongolio.

¹⁰ Odito olo wolo mongo sahabati lei Simon, deúito-yito tei Yakobus wolei Yahya, mongo walaée Jebedeus. Ti Isa malo tahuda odelei Simon, "Diila maó oohe! Tumulalo mai botia yió mamowali tamoo-majalawa tau."

¹¹ Tei Simon wau mongo sahabatilio malo dedeá mota bubuu-lotuwalo boito ode pentadu, lapataó lololaa maó ngoáamilalo, tulusi loduduó li Isa.

¹² Toú dulahee tuwau, ti Isa woluo tokota tuwau. Mola teto woluo talolaí ngota u wawaío polupolu wolo ngongoto lo alipo u moótihela hapato. Toú loóonto li Isa, tio losujudu lomola totalu li Isa, sambela lomolohone maó, "Paaá, wonu ti Paaá mohuto, ti Paaá moó poluli mai olo watotia!"

¹³ Ti Isa loleyapu maó tau boito wau lotahuda, "Waú mohuto polulilo! To saaáti boitolo ngongotio loluli.

¹⁴ Lapataó ti Isa lodini tau boito mohungguli suáli boito penu boli olita, tahuda-Lio maó, "Ponaólo mota odeli iimamu, wau pohilea maó olio u molantu mai deú yió maloluli. Lapataó ponaólo mopodewo bake debo odelo u pilomalanta lei Musa, debo odelo bukuti totau-tauwalo deú yió tutuulio tutu maloluli."

¹⁵ Bo habari pasali li Isa bo lebe helo loladulo mola ode tilolahepaalo maó, wau dadaata tahi ponaówa mai modungohe o-Lio wau mai leí poóluli ngongoto limongolio.

¹⁶ Lapataó uito ti Isa malonaó mota loduá totambati udiila otau.

¹⁷ Todulahee tuwau toú ti Isa donggo hemo ngaajali, woluo dengolo lota

taulo Parisi wau guguu-ruwaalo agama hihuloáa teto. Timongolio lonaó mai lonto Yerusalemu, lonto kokoo-tawaalo to Galilea wau Yudea. Kawasa lo Eeya woluo toli Isa u mopoóluli tahi ngongota.

¹⁸Toú boito dengolo lota talonaó mai lodelo ngotaalio tadidu mowali monaó bala-balata toitaato amongo. Timongolio helo tolopani modelo mota tau boito ode delomo bele alihu mowali mopo balataó olio totalu li Isa.

¹⁹Bo sababu tau malo odito daatalio mola teto, yi timongolio diila lowali lopotuwoto olio. Masababu uito timongolio lopo botula mola olio odeitaato watopo lobele. Lapataó timongolio lomonggali gentengilio, wau lopolahe mola olio peé-peéenta wolo amongio totalu li Isa tohuungo lotaa dadaata boito.

²⁰Toú ti Isa loóonto malo odito udaá iimani limongolio, Tio lotahuda maó ode tau boito, "Wutato, dusamu maa ilambungu."

²¹Guguu-ruwaalo agama wau tau-tauwalo Parisi malo loíya ngota timongota, "Tatoonu tau botie buheli Mohina Allahu Taáala? Tatoonu tamowali mongambungu dusa, ngopohia Allahu Taáala lohihilao?"

²² Otaawa li Isa yiyintu limongolio boito. Oditolio Tio lotahuda maó, "Yilongola timongoli helohintu odito todelomo hilaamu?"

²³ Toonu ulebe gambangi, moloíya maó, 'Dusamu maa ilambungu', meaalo moloíya maó, 'Pobongulo wau ponaólo'?

²⁴ Bo botia mapo bukutiyo-Ú mai olimongoli deú toitaato dunia botie Walaó Manusia okawasa mongambungu dusa." Lapataó ti Isa lotahuda ode tadidu mowali monaó boito, "Pobongulo, wau bintaáalo tambati pilo tibalatamu, wau pohualingolo!"

²⁵ Lolamemeto tau boito lobongu mola totalu limongolio ngoáamila, tulusi lomintaó tambati pilo tibalatalio, wau lohualingo sambela hemomuji Allahu Taáala.

²⁶ Timongolio ngoáamilalo lolinggolabe daá tulusi helomuji Allahu Taáala. Wau wolo laasa yiloohe, timongolio hipoloíyawa, "Moólinggolabe daá polouítia u silakusiyanto todulahe botie!"

²⁷ Lapataó uito ti Isa yilumualaó wau loóonto ngotaalio tamootagia beya, tanggulio Lewi, donggo hulohuloáa to

kantolilio. Ti Isa lotahuda maó olio,
"Duduílo mai Waú."

²⁸ Tei Lewi tilimihulo wau lololaa maó
ngoáamilalo, tulusi loduduó li Isa.

²⁹ Lapataó uito tei Lewi lohutu
potihunggu tobelelio odeli Isa. Dadaata
tamootagia beya wau tau-tauwalo wewolio
loduduá lolamela peé-peéenta woli
mongolio.

³⁰ Dengolo lota taulo Parisi wau
guguu-ruwaalo agama diila sanangi,
tulusi lolóiya maó odeli Isa, "Yilongola
timongoli ngoáamila lolamela longilu wolo
tamootagia beya wau tau-tauwalo tadiila
hipiohe?"

³¹ Ti Isa lolametaó, "Taa seehati diila
momalalu dokuteli; bo taa mongongoto
wambaó.

³² Waú lonaó mai diila motianga tahi
ponganggapua batangalio malopiohe, bo
tahi oduusawa alihu timongolio molilihu
monto duduu-sawaalo limongolio."

³³ Tau-tauwala lolóiya maó odeli Isa,
"Tahiduduá olei Yahya wau tahiduduá
totau-tauwalo Parisi tingga maito
hemopuasa wau hemoduá. Bo tahiduduá
ole-Mu hemolamelo wau hemongilu."

³⁴ Ti Isa lolametaó, "Wolo timongoli mowali mopoáhu to tahe tiloduo mopuasa to potihunggu lonika, ngotilonggadu tibulentiti laí donggo peé-peéenta woli mongoli? Tantu diila!

³⁵ Bo mamei dungga wakutuulio bulentiti laí boito mahamaalio monto olimongolio. Tou boitolo timongolio mamopuasa."

³⁶ Lapataó ti Isa losilita maó olimongolio pohumaya botie, "Diaaluo tau momambola boó deedelo wolo kaingi ngopita monto boó u bohu. Sababu tio moó kaidingo boó u bohu boito. Donggo poli kaingi u pomambolo u donggo bohu boito diila motuuúde wolo boó u deedelo.

³⁷ Odito olo diaaluo tau moluwato angguru bohu ode delomo bututu lowalito u deedelo, sababu angguru bohu boito mamoo sababu bututu boito mobutaó. Yi anggurulio mohuáyade, wau bututulio moáantulu.

³⁸ Angguru u bohu musi tuwangolo ode delomo bututu u bohu olo.

³⁹ Odito olo diaaluo tau mohuto mongilu angguru bohu lapataó mongilu angguru deedelo, 'Angguru deedelo boito lebe mopiohe,' ualio maó."

6¹ Todulahu Saabati tuwau, toú ti Isa yilumaode to halabolu lopale ngopita, tahiduduá o–Lio lolipu pale. Timongolio lohudedu pale boito wolo uluú, lapataó tilameli mongolio.

² Dengolo lota taulo Parisi lolóiya maó "Yilongola timongoli lolambanga bubuu–toówaalo agamanto wolo lohutu u dinidini todulahu Saabati?"

³ Ti Isa lolametaó, "Diipo peéenta timongoli lopobaca pasali u pilohutu lei Dauda, toú tio wau taulio pilolaango?"

⁴ Tio tilumuwoto ode delomo Bele lo Eeya wau lohama roti umaa pilodewolio ode Allahu Taáala, lapataó pilolamelio. Lapataó yilohilio olo roti boito ode tau–taulio. Lebe–lebe pomaó moduduó butoó lo agamanto, bo mongo iimamu wambaó tamowali molamela roti boito."

⁵ Lapataó ti Isa lotahuda maó, "Walaó Manusia okawasa todulahu Saabati!"

⁶ Todulahu Saabati tuwau uwewo, ti Isa lonaó mota longajali tobele potabiaalo. Teto woluo taa uluúlio yilate ngotuwali.

⁷ Dengolo lota guru lo agama wau taulo Parisi motohilaa mopeehu totala li Isa alihu mowali mopodulohe o–Lio. Oditolio timongolio tulusi hemo poótuoto o–Lio

wolo Tio mamó poóluli tau todulahu Saabati.

⁸ Bo otaawa li Isa pikiilangi limongolio. Yi Tio lotahuda maó ode taa uluúlio yilate ngotuwali boito, "Dulo tihulai teea totalu!" Tau boito malobongu, tulusi tilimihulaó teto.

⁹ Lapataó ti Isa lohintu maó totau-tauwalo tawoluo teto, "Moduduáó lo agama, ito mowali mohutu wolo todulahu Saabati? Mohutu u mopiohu meaalo mohutu u moleeto? Mopoáahu tau meaalo mopoó topotala?"

¹⁰ Ti Isa lomiloheó palitio limongolio ngoáamila, tulusi lotahuda ode tau boito, "Wudua mai uluúmu." Tau boito malohudu uluúlio, wau uluúlio tulusi loluli.

¹¹ Bo guguu-ruwaalo agama wau tau-tauwalo Parisi boito loingo daá, wau lolumula lodulohupa tomimbihu wolo u mowali pohutuo limongolio li Isa.

¹² Toú boito ti Isa lotaódee huludu tuwau mola loduá. Teto Tio loduá mola ode Allahu Taáala ilo-ilonua.

¹³ Toú dulahee malobaango, Tio lotiangai tahiduduá o-Lio, tulusi lolulaoto mopulaa duulota lonto olimongolio. Tio longunte

maó tamopulaa duulota boito mongo rasulu. Timongolio boito deúito-yito.

¹⁴ Simon (taílunte olo Petrus), wau Andreasi wutatee Simon; Yakobus wau Yahya, Pilipus wau Bartolomeus,

¹⁵ Matusi wau Tomas, Yakobus walaée Alpeus, wau Simon (taílunte Patriot),

¹⁶ Yudas walaée Yakobus wau Yudas Iskariot talapatio maó lowali tamoo-hiyanatia.

¹⁷ Lapatio maó ti Isa lotuhutai lonto huludu boito peé-peéenta wolo mongo rasulu boito, tulusi lohuheli wau tilimihulo totambati tuwau u datadatahu. Teto woluo olo ngojumula daá tahiduduá o-Lio uwewo wau dadaata tau lonaó mai lonto utoonulalo maó to ngoilanggubu Yudea, Yerusalemu, wau kokoo-tawaalo Tirus wau Sidon u tobiihu dehetu.

¹⁸ Timongolio mai lodungohe li Isa, wau piloóluli-Lio lonto tilolahepaalo ngongoto limongolio. Timongolio taílo tuanga lorohu u moleeto lonaó mai olo wau piloóluli-Lio.

¹⁹ Ngoáamila tau hipo tolopania modedeta li Isa, sababu woluo kawasa u yilumualai lonto batanga-Lio u helo poóluli maó olimongolio ngoáamila.

²⁰ Ti Isa lomiloheó tahiduduá o-Lio tulusi lotahuda maó, "Potisanangilo tutu timongoli tahi mosikinia, sababu timongoli yito pongawaá umati lo Allahu Taáala!

²¹ Potisanangilo tutu timongoli tahi polaanga masaatia; timongoli mapo butuhu-Lio! Potisanangilo tutu timongoli tahe hiyonga masaatia; timongoli mamoiíi!

²² Potisanangilo tutu timongoli wonu lonuólio, potoulilio, hinaalio wau pitanaalio sababu Walaó Manusia!

²³ Mongo nabi tojamani muloololio mai hepilo hutulio odito olo. Wonu suáli boito motoduo mamusi timongoli motiwengahe mola lohilao wau mongelungo wolo wengahe, sababu udaá wuupa u pilopo dapatio olimongoli tosologa.

²⁴ Bo matopotala timongoli tahi kayaawa masaatia botie; sababu timongoli maloólaasa oniimatilio!

²⁵ Matopototala timongoli tahi buutuhe masaatia botie; sababu timongoli mapolangolo! Matopototala timongoli tahi poiíiíya masaatia botie; sababu timongoli maa osuukalia lohilao wau humoyongo!

²⁶ Matopototala timongoli, wonu ngoáamila tau momujimu; sababu odito olo

tinemoya limongolio helomuji mongo nabi paaluti tojamani muloololio mai."

²⁷"Bo toli mongoli tamodungohe ola-Ú masaatia botie, Waú mongohi mai tahuli odie; toliánga maó timíidu musumu, wau pohutua maó umopiohe totaa molonuúmu.

²⁸Balakatia maó tamolaánati olemu, wau duái mola tamohutu umoleeta olemu.

²⁹Wonu tau molambali putongimu u ngotuwali hulii maó tio molambali putongimu u ngotuwali olo. Wonu jumbamu wahuwolio, wohia maó olo boómu.

³⁰Wonu woluo taa mohile hitua-tuawua to olemu; wohia maó uito olio; wau wonu hakuumu wahuwolio, diilalo maó pohilea.

³¹Pohutua maó taawewo debo odelo otohilaa limongoli pohutuo mai limongolio.

³²Wonu timongoli motoliángo totau-tauwala bo wambaó totaa motoliángi mongoli, wolo huhutuumu u mopiohu? Tahi oduusawa olo motoliángo totaa hipo toliángawa olimongolio!

³³Wau wonu timongoli mohutu maó mopiohu bo totau-tauwalo hipohutua u mopiohu to olemu wambaó, wolo

huhutuumu u mopiohu? Tahi oduusawa olo hipohutua odito!

³⁴Wau wonu timongoli bo mopobulota doi totau-tauwalo tamoó powalingai, wolo huhutuumu u mopiohu? Tahi oduusawa olo hemo pobulota doi totaa odusa, lapataó muli pohileelio.

³⁵Musiilio diila odito! Timongoli bolíio maó musi motoliángo musuumu wau mohutu u mopiohu toli mongolio. Timongoli musi mopobulotaó, wau diila maó pohalapu muli powalingolio mai. Wonu odito, wuupamu maúdaá wau timongoli mamowali mongo walaó Allahu Taáala Taa Laba-labaalo molanggato. Sababu Allahu Taáala mopiohe hilaa ode taa diila motota mongohi sukuru, wau ode taa moleeto olo.

³⁶Mamusi timongoli odehu hilao debo odelo ti Paapamu olo odehu hilao!"

³⁷"Diila maó pomutoó taawewo, alihu timongoli lohihilao olo diila butoó lo Allahu Taáala. Diila maó pohukumani taawewo, alihu timongoli lohihilao olo diila hukumanio lo Allahu Taáala. Ambungua maó taawewo, alihu Allahu Taáala olo mongambungu olimongoli.

³⁸ Pongohi maó ode taawewo, alihu Allahu Taáala olo mongohi mai olemu; timongoli mamó lolimo wowohi dadaata tutu umaa tilimengio wobuwobuó olemu. Sababu titimenga u pomake limongoli ode taawewo mapomake lo Allahu Taáala olemu."

³⁹ Lapataó ti Isa losilita maó olimongolio pohumaya u wumbutio mola botie, "Wonu taapitoó modedeá taapitoó uwewo, tantu duduulotalo mamodehu ode delomo tanggi.

⁴⁰ Diaaluo muri talebe udaá wolo gurulio. Bo muri tamai lapato lobalajali, mamowali tutuwauwa debo odelo gurulio.

⁴¹ Yilongola timongoli moóonto pulingo ayu todelomo mato lo wutatumu, hiambola balaki u tomatomu lohihilao diila poótuoto limongoli?

⁴² Woloolo mola timongoli mowali moloíya ode wutatumu, 'Dulo, wutato, yinggiloú mai pulingo ayu boito monto matomu boito,' hiambola todelomo matomu lohihilao woluo balaki udiila oontonga limongoli? Wuu taa munapiki! Yinggilapo balaki uwoluo todelomo matomu lohihilao. Deúito timongoli mowali moóonto wolo mopatato wau

mowali mohinggi pulingo ayu monto mato lo wutatumu."

⁴³ "Bungo lo ayu u molomiodu diila mongohi hungo u moleeto. Odito olo bungo lo ayu u diila molomiodu diila mongohi hungo u mopiohu.

⁴⁴ Timiïdu bungo lo ayu oonuhe monto hungolio. Pilomulo aáayuwalo kekeëi wau hiwoopawa u oduhi diila mongohi hungo lo ara, wau diúto oduhi diila mongohi hungo lo angguru.

⁴⁵ Taa mopiohe mopobilohe susuu-aliyaalo u mopiohu sababu hilaalio polupolu loú mopiohu. Taa moleeto mopobilohe susuu-aliyaalo u moleeto sababu hilaalio polupolu loú moleeto. Sababu wolo u wulito lotunggilo ui-uitolo u lumepetai monto hilao."

⁴⁶ "Yilongola timongoli mongibode ola-Ú, 'Eeya, Eeya,' bo diila mopohutu maó wolo upilo tahuda-Ú mai olemu?

⁴⁷ Wolita mowali potutuu-wauwonto tahi ponaówa mai ode ola-Ú, wau modungohe tahuda-Ú wau mopohutu maó? -- Mopiohulo Waú mopoílalo mai olemu --.

⁴⁸ Tio debo odelo taa u toú momongu bele mongaúde modelo-delomolo maó, lapataó mohutu pandemenilio tobotu.

Toú woluo taluhe daá wau taluhu dutula molemba bele boito, bele boito diila mowali moéetu, sababu mabilongu toitaato pandemeni u mopiohe.

⁴⁹Bo taa modungohu tahuda–Ú wau diila mopohutu maó, deúito–yito debo odelo ngotaalio tamomongu bele diila opandemeni. Wonu taluhee daá molemba, bele boito huáa mololohubu; wau antululio boito laba–labaalo daá!"

7¹Lapataó mailapato lotahuda maó susuu–aliyaalo boito ode taa dadaata, ti Isa lonaó ode Kapernaum.

²Teto woluo polowila lo Roma owato taa otoliángio daá. Wato boito mongongoto wau ngopeé yilate.

³Toú polowila boito loódungohe pasali li Isa, tio lopoáhu dengolo lota taúwa lo Yahudi lonaó ode o–Lio mota lohile alihu Tio monaó mai mopoóluli watolio.

⁴Toú leidungga mota odeli Isa tau–tauwalo boito malo laba–labaalo lomolohone alihu Tio motulungi polowila boito. "Polowila botie patuti tulungia maó li Paaá," uali mongolio odeli Isa,

⁵"sababu tio motoliángo bungusanto wau malomongu bele potabiaalo ode lamiaatia."

⁶ Yi ti Isa malonaó peé-peéenta woli mongolio. Toú ti Isa ngopeé meidungga mota tobele boito, polowila boito lolao mongo sahabatilio ode o-Lio mai lolóiya maó, "Sambelolo ti Paaá susasuusa monaó mai ode bele laatia. Watia diila patuti mololimo li Paaá tobele lowatia.

⁷ Uito sababuulio watia lohihilao diila buheli motaalua woli Paaá.

⁸ Sababu watia olo taáluku topalenta lotaa toitaato lowatia wau totibawa lowatia woluo olo mongo pajule tamusi taáluku topalenta lowatia. Wonu watia mopoáhu pajule ngota, 'Monaó!' tio olo monaó; wau wonu watia molóiya ode tawewo, 'Odia mai!' tio olo monaó mai. Wau wonu watia momalenta wato lowatia, 'Pohutua maó utie!' tio olo mopohutu uito."

⁹ Ti Isa lolinggolabe loódungohe uito. Tio loili maó wau lotahuda ode taa dadaata tadonggo hiduduá o-Lio, "Malo moólinggolabe tau botie. Penu boli towolota taulo Isiráilu diipo peéenta maó Waú loódungga iimani debo odelo utie udaálio!"

¹⁰ Toú tau-tauwalo tahe ilahulalio boito luli lohualingai ode bele lo polowila boito, wato boito maloluli.

¹¹ Diila lohiheo lapatio maó, Ti Isa lonaó ode kota Nain. Tahiduduá o-Lio wau taa dadaata lonaó wo-Lio.

¹² Tou ti Isa leidungga totili huhebu hulubangi lokota, tau-tauwalo donggo hemo depita milate ode bulemengo kota. Tailate yito walaó talolái, walaó bo tuwa-tuwaulo ngotaalio lojanda. Dadaata tuango lipu lokota loduduó woli Ibu boito.

¹³ Tou ti Isa loóonto taabua boito, Tio malomonu tulusi lotahuda maó, "Diila hiyongo, Ibu!"

¹⁴ Lapataó ti Isa lodudulaó ode huhulihe lo tailate boito wau lodedetaó. Yi tahi pohulihe malo huheli. Ti Isa lotahuda maó, "Wuu tabohulotau, Waú mohehulai olemu pobongulo!"

¹⁵ Tabohulotau tamailate boito, lobongu lotihuloá wau malo bisala. Yi ti Isa malohudu olio odeli maamalio.

¹⁶ Ngoáamila tau mailoohe wau mahi pomujia Allahu Taáala. Timongolio loloíya, "Ngotaalio lonabi daá maa yilumenetai tohuunginto! Allahu Taáala maledungga mai mopoáahu umati-Lio!"

¹⁷ Habari pasali li Isa botie lololadulo mola to ngoilanggubu Yudea wau madala topalitio.

¹⁸ Tahiduduá olei Yahya lopoótaa maó olei Yahya ngoáamila u mailowali boito. Yi tei Yahya malo tiangai duulota tahiduduá olio,

¹⁹ tulusi lopoáhu olimongolio odeli Isa wau lohintu, "Ti Paaá tamaa meidungga mai moduduó danti lo Allahu Taáala, meaalo mamusi amiaatia mohima mai ngotaalio wewo?"

²⁰ Taduulota tahiduduá olei Yahya boito lonaó odeli Isa wau malo loíya, "Tei Yahya Tamopolihua lopoáhu olamiaatia mai mohintu toli Paaá, wolo ti Paaá tamaa meidungga mai moduduó danti lo Allahu Taáala, meaalo amiaatia mamusi mohima mai taa wewo?"

²¹ Towakutu boito, ti Isa helo poóluli taa dadaata, wau lopolahi dadaata rohu u moleeto, wau lohutu tahi piitoá lowali loóonto.

²² Oditolio ti Isa lolametaó, "Pohualingolo mola odelei Yahya wau poótaa maó wolo u iloontonga wau ilodungohe limongoli: taa pitoó loóonto, taadidu mowali monaó malowali lonaó, taa ongongoto lo alipo u moótihela hapato maloluli, taa bungolo maloó dungohu, taa yilate luli tilumumulai,

wau Habari Mopiohu lonto Allahu Taáala pilopo habari totaa himosikinia.

²³ Potisanangilo tutu taa diila o alaasani u diila mololimo ola-Ú."

²⁴ Lapatio maó mongo utolia lei Yahya boito lonaó, ti Isa lolumulo lotahuda totau-tauwalo pasali lei Yahya, tahuda-Lio maó, "Timongoli lonaó ode huta datahu u luasi daá wau delita udelita mola lomilohe wolo? Huóyoto ngopata u hiliipa lodupoto?

²⁵ Timongoli lonaó mola lomilohe wolo? Ngotaalio tapake-pake loú mopiohu? Tau-tauwalo tahapakea uódito wau tatumu-tumulo dadaata ngoáamilalo bilubiluloá tobele biluloá saaha li onlongia!

²⁶ Oditolio, timongoli lumualo mola lomilohe wolo? Mola lomilohe nabi ngota? Otutu, tumbaó bo lebe maó lonabi ngota.

²⁷ Sababu tei Yahya boi-boitolo tamilakusudu todelomo ayati lo Kitabi botie, 'Tabotieelo utoliya-Ú,' tahuda lo Allahu Taáala, 'Waú mamolao mai olio meimulo wole-Mu, alihu tio momuó dalalo ole-Mu!'"

²⁸ "Poótoloma maó," tahuda poli li Isa, "todunia botie diipo peéenta maó woluo taalebe udaá wolei Yahya Tamopolihua. Bo taa u pulito kikiió towolota umati lo

Allahu Taáala, lebe udaá wolei Yahya Tamopolihua."

²⁹ Ngoáamila tau -- tuotuoto tahi pohimoá beya olo -- loódungohe li Isa lotahuda suáli boito; timongoliolo tau-tauwalo tamalo duduó totoonulalo hihiiile wolo moóohuú lo Allahu Taáala wau ohilaa meí polihu olei Yahya.

³⁰ Bo tau-tauwalo Parisi wau guguu-ruwaalo agama diila lohuto lololimo lanjana lo Allahu Taáala ode batanga limongolio. Timongolio diila lohuto lihua lei Yahya.

³¹ Lapataó ti Isa luli lotahuda, tahuda-Lio maó, "Tingga wolita musi pobandingiyo-Ú tau-tauwalo tojamani botie? Debo odelo wolo timongolio?"

³² Timongolio debo odelo taúkekeéi tahi huloáa topaatali; ngopoámbua hipongibode totaa wewo, 'Ami mopoitohei lahu u moéengahu olimongoli, bo timongoli diila mohuto mongelungo! Ami mopolahu mai lahu u ilopatea, wau timongoli diila humoyongo!'

³³ Tei Yahya Tamopolihua lonaó mai -- tio lopuasa wau diila longilu angguru -- wau timongoli lolóiya, 'Tio máilo tuanga lolati!'

³⁴Walaó Manusia lonaó mai -- Tio lolamelo wau longilu -- tulusi timongoli lolóiya, 'Bilohi tau boito! Olalowa, hehuwoálo waitio lotahi pohimoá beya wau waitio lotaa odusa!'

³⁵Openu boli odito tinepo lo Allahu Taáala ilobukuti lonto ngoáamila taa u lololimo maó."

³⁶Ngotaalio lo Parisi tanggulio Simon, loloduwo li Isa lolamelo. Ti Isa lonaó ode belelio wau malo tihuloá lolamelo.

³⁷Tokota boito woluo olo taabua ngota tatumu-tumula todelomo dusa. Toú tio loódungohe u ti Isa donggo hemo lamelo tobele taulo Parisi boito, tio malonaó mota lodelo buutulu tuwau tuatuanga yinulo moonu.

³⁸Tio tilimihula towulea li Isa totili lo oáa-Tio, wau hilumoyongo lou helo pobata oáati Isa wolo ponulio. Lapataó oáati Isa piloó hengulio wolo huwoío tulusi diliilio wau bilatalio loinulo moonu.

³⁹Toú taulo Parisi talo loduwo li Isa loóonto maó suáli boito, tio loíloíya todelomo hilaalio, "Humayaalo tau botie nabi, tantu otaawa-Lio tatoonu taabua boito tamalo dedeta o-Lio, wau deú taabua boito tumutumula todelomo dusa!"

⁴⁰ Lapataó ti Isa lotahuda maó odelei Simon, "Simon, woluo hitua-tuawua u potahuda-Ú mai olemu." "Joo Paaá Guru," tametaó lei Simon, "poleleyalo mai."

⁴¹ Ti Isa lotahuda maó, "Woluo taduulota obiloli totaa upilo bulotalio doi. Tangotaalio obiloli limo lohetuto doi talaá, wau tangotaalio poli limo lopulu doi talaá."

⁴² Duduulotalo diila loóbayali biloli boito, yi biloli limongolio mailulutio. Nte tatoonu towolota limongolio duulota boito talebe motoliángo totaa lopobulota doi boito?"

⁴³ "To lantobu lowatia taa u dadaata daá pilo lulutalio to biloli!" tametaó lei Simon. "Huhamaamu otutu," tametaó li Isa.

⁴⁴ Lapataó ti Isa lomiloheó taabua boito wau lotahuda odelei Simon, "Yió maloóonto taabua botie? Waú lonaó mai ode belemu, wau yió diila lopohetu taluhu u lopobelesi oáatu-Ú; bo taabua botie malo pobelesi oáatu-Ú wolo ponulio, wau lopohengu wolo huwoío."

⁴⁵ Yió diila lololimo ola-Ú loú lodilo, bo taabua botie diila lohuheli lodilo oáatu-Ú anggadu Waú leidungga mai odia.

⁴⁶ Yió diila loloheó yinulo moonu to lunggongu-Ú, bo taabua botie maloloohu yinulo moonu to oáatu-Ú.

⁴⁷ Otutu: toliángio u udaá boito mopoílaalo deú dusalio u dadaata maílambungu! Wonu tau ambunguolo ngoídi, toliángio olo bo ngoídi."

⁴⁸ Lapataó ti Isa lotahuda maó to taabua boito, "Duduusaamu maílambungu."

⁴⁹ Tau-tauwala wewo tahi huloáa hipolamela woli Isa mahipo bisalawa ngota-timongota "Tatoonu tau botie tunggula mowali mongambungu dusa?"

⁵⁰ Boti Isa lotahuda maó to taabua boito, "Sababu yió palacaya to ola-Ú, yió mapiloáahu. Ponaólo wolo damee!"

8¹ Diila lohiheo lapatio maó, ti Isa malonaó ode kokoo-tawaalo wau kakaa-mbunguwalo, mola lopohabari Habari Mopiohu deú Allahu Taáala molumula momalenta odelo Olongia. Mopulu wau duulota tahiduduá o-Lio loduduá o-Lio.

² Odito olo dengolo lota mongobua tamaa piloóluli lonto rohu u moleeto wau ngongoto. Timongolio boitolo ti Maria taílunte Mahadalena (pitu rohu u moleeto u mailinggi lonto oli Mahadalena);

³ ti Yohana olo, dile lei Khuja, pogawee lobele biluloá saaha lei Herodes; ti Susana, wau donggo dadaata mongobua

wewo. Wolo onggosi limongolio lohihilao, timongolio helomantu li Isa wau tahiduduá o-Lio.

⁴ Tau-tauwala debo laito hiponaówa mai odeli Isa lonto totoonulalo kota. Wau toú madadaata tahiámbua, ti Isa losilita maó olimongolio pohumaya odie mola botie:

⁵ "Tamoomengia ngota lonaó lomuáyade bili. Toú tio donggo hemo muáyade, woluo bili u lobiihuto todalalo. Ngotayadu he ilodutaá lotau wau uwewolio he ilila lobulungi.

⁶ Woluo olo u lobiihuto totambati u hibotu-botua. Toú tumbingio yilumualai pilomulo boito malo lolante sababu hutalio mohengu.

⁷ Woluo olo bili u lobiihuto tohungio lodiúto oduhi. Diúto oduhi boito tilumumulo peé-peéenta wolo bili boito, wau lohupeta bili boito tilinggula yilate.

⁸ Bo woluo olo bili u lobiihuto tohuta u molomiodu, lapataó tilumumulo wau lomungo ngohetuto piúwa." Lapataó losilita pohumaya boito, ti Isa lotahuda maó, "Wonu obulonga, podungohulo!"

⁹ Tahiduduá li Isa lohintu o-Lio boli lo pohumaya boito.

¹⁰ Ti Isa lolametaó, "Timongoli maloó toduo wowohi lo Eeya u motota maó hitua-tuawua u sangaja hetuuólo pasali loú woloolo mola Allahu Taáala momalenta odelo Olongia. Bo tau-tauwalo wewo ilaajali wolo pohumaya, alihu timongolio mopoótuoto, bo diila motota wolo u motoduo; wau timongolio moódungohe, bo diila mongalati."

¹¹ "Utieelo boli lo pohumaya boito: Bili boito deúito-yito tahuda lo Allahu Taáala.

¹² Bili u lobiihuto todalalo debo odelo tahipo dungohe tahuda boito. Bo ibilisi mai lolambata habari boito lonto hilaa limongolio, alihu timongolio diila maó palacaya wau poáahuwolo.

¹³ Bili u lobiihuta to hibotu-botua debo odelo taa u towakutu lodungohe habari boito, lololimo wolo hilaa sanangi. Bo habari boito diila longuwaáto todelomo hilaa limongolio. Timongolio palacaya bo ngopeé mola. Wau toú yimontala meidungga timongolio momaahu.

¹⁴ Bili u lobiihuta todelomo diúta oduhi debo odelo taa u modungohe habari boito, bo molawalo pasali lo tutumuli mongolio wau motohilaa tumumula dadaata ngoáamilalo wau sanangi todelomo

dunia botie. Ngoáamilalo boito mohupeta olimongolio tilinggula diila mongohi hungo u mopiohu.

¹⁵ Bili u lobiihuto tohuta u molomiodu debo odelo taa u modungohe habari boito, lapataó tilahulio todelomo hilao u mopiohu wau motulidu. Timongolio moó tahangi tunggula mongohi hungo."

¹⁶ "Diaaluo tamo poléito tohe tulusi molaúbe wolo tombe, meaalo dutuolio to walungo potuluhe. Tio mamopodutu tohe boito to oáato tohe, alihu taa u tumuwotai moóonto baangio.

¹⁷ Diaaluo u hituuá udiila oontonga; wau diaaluo u hitua-tuawua u sangaja hetuuólo udiila tamo bonggali wau otaawa.

¹⁸ Sababu uito poótuota maó tióotutua wolo u dilungohe limongoli. Sababu taa u mawoluo, mawohialio lebe dadaata maó; bo taa u diaaluo, ngoídi udonggo woluo to olio mahamaalio olo."

¹⁹ Tiilo wau mongo wutati Isa lonaó mai ode o-Lio, bo timongolio diila lowali tilunggula mota o-Lio sababu malo odito daata lotau.

²⁰ Yi woluo ngotaalio talolóiya maó odeli Isa, "Paaá, tiilo li Paaá wau mongo wutati

Paaá woluo to bulemengio. Timongolio ohilaa modunggaya woli Paaá."

²¹ Boti Isa lotahuda maó olimongolio, "Tau-tauwala tamodungohe tahuda lo Allahu Taáala wau pohutuolio, maa timongoliolo tiilo wau mongo wutatu-Ú."

²² Todulahu tuwau ti Isa wolo tahiduduá o-Lio lotitaé tobulotu. "Dulo ito monaó ode ngotuwali lobulalo," tahuda maó li Isa olimongolio. Yi timongolio olo malo monggato.

²³ Touú timongolio donggo hibitea, ti Isa malei tuluhu. Debolo dutalo daá lolemba mai bulalo boito. Taluhu mahe tumuwoto ode delomo bulotu, tilinggula mamoo topotala olimongolio ngoáamilalo.

²⁴ Tahiduduá li Isa lonaó mai ode o-Lio wau malo pobongu o-Lio. Timongolio lolóiya, "Paaá Guru, Paaá Guru, matopotala ito!" Ti Isa lobongu wau longantingaó dupoto wau buóola udonggo bale-baleyanga daá boito. Dupoto wau buóolo boito olo yiloole tulusi bulalo maloliilo.

²⁵ Lapataó ti Isa lotahuda to tahiduduá o-Lio, "Yilongola timongoli diila palacaya ola-Ú?" Timongolio malo linggolabu wau yiloche. Wau timongolio malo loíya ngota-timongota, "Tatoonu tutuulio

tutu tau botie tilinggula longohi palenta todupoto wau buóolo, wau Tio olo dilungohelio!"

²⁶ Ti Isa wau tahiduduá o–Lio tulusi lobite tilinggula mola ode madala lo Gerasa to ngotuwali lo Bulalo Galilea.

²⁷ Toú ti Isa lobotulai ode tudulio, tio nilaó mai lo talolaí ngota tamaa ilotuanga lorohu u moleeto. Tau boito lonto kota. Malohiheo tio diilalo hemohiboó wau diila mohuto motitola tobele. Tio bo mohuto motitola to gogoowaalo tambati lokuubulu.

²⁸ Toú loóonto maó li Isa, tio longuatió tulusi losujudu totalu li Isa wau longibodu. "Isa, Walaó Allahu Taáala Taa Laba–labalo molanggato! Mapongola–Mu waú botie? Pohileú diila maó sikisai waú!"

²⁹ Tau boito loloíya odito sababu ti Isa malo malenta rohu u moleeto boito lohinggi maó lonto olio. Tingga maito tio hekawasa lorohu u moleeto boito tilinggula penu boli uluú wau oáatio maílawadu wolo lante wau hedahaalo tióotutua, bo debo donggo mowali buntoolio lante boito tulusi hedeloo lorohu u moleeto ode huta hungayo u luasi daá.

³⁰ Ti Isa lohintu maó totau boito, "Tatoonu tanggulumu?" "Tanggulo watia 'Legiun'," tametaó lotau boito -- sababu woluo ngohuntua rohu u moleeto umaa tilumuwoto ode delomo batangalio.

³¹ Roroo-huwaalo u moleeto boito lohile loú tíootutua alihu ti Isa diila mopolahi olimongolio ode delomo liito malikili-mautu.

³² Membideó lotambati boito ngohuntua daá boi hipo peehuma uáalolio tobinggi lohuludu. Roroo-huwaalo u moleeta boito lohile tíootutua odeli Isa alihu poluasialio-Lio tumuwoto ode delomo bobooiyalo boito. Wau ti Isa akolo.

³³ Yi roroo-huwaalo umoleeta boito yilumualaó totau boito wau tilumuwoto ode bobooiyalo boito. Lapataó bobooiyalo boito tilumeteó wau lotidehu lonto binggi loliito ode bulalo, tulusi loáhumo.

³⁴ Tahi podahawa boi boito loóonto wolo u mailowali. Yi timongolio tilumeteó wau lopololadu habari boito tokota wau kambungu totililio.

³⁵ Lapataó tau-tauwalo yilumualai lomilohe wolo u mailowali. Timongolio lonaó mai odeli Isa, wau teto ilodungga limongolio taa u malo lopato lonto

roroo-huwaalo u moleeto boito donggo hulohuloáa totili lo oáati Isa. Tio maboóboó wau pikiilangilio malobaango. Timongolio mailoohe.

³⁶ Timongolio taloóonto uilowali boito malo silita totau-tauwala woloolo mola tau boito piloóluli-Lio.

³⁷ Lapataó ngoilanggubu tuango lipu lo Gerasa boito lohile tióotutua alihu ti Isa mololaa maó tambati boito, sababu timongolio ngoáamila moohe daá. Oditolio ti Isa lotitaé tobulotu malo hualingo.

³⁸ Taa u malo lopato lonto roroo-huwaalo u moleeto boito lomolohone maó li Isa alihu tio mowali moduduó. Boti Isa lopoáhu olio lonaó, tahuda-Lio maó,

³⁹ "Pohualingolo wau pohabaria maó wolo umaa pilohutu lo Allahu Taáala olemu." Yi tau boito malonaó helopo habari to ngoilanggubu tutulo kota, wolo umaa pilohutu li Isa olio.

⁴⁰ Tou ti Isa luli lohualinga mota to ngotuwali lobulalo, Tio yilimaalio loú hiwengahe lotau-tauwalo sababu timongolio donggo hemohima o-Lio.

⁴¹ Lapataó malonaó mai taúwa ngota lobebe potabiaalo u teto. Tanggوليو Yairus. Tio losujudu totalu li Isa wau lohile

tióotutua alihu ti Isa monaó mai ode belelio,

⁴² sababu bo ngota-ngotaalo walaío taabua u tutumulio mopulaa dulo taunu mawimbide mate. Tou ti Isa donggo dulo-dulungo ode bele lei Yairus, tau-tauwalo hemo huntu-huntula o-Lio lonto totoonulalo tutulio.

⁴³ To wolotalio woluo olo taabua ngota tamaa mopulaa dulo taunu mongongoto pilobaáta loduhu u aáaita wolo dulahio. Tio malo poópulito ngoáamila milikiilio léi wunemo toli dokuteli, bo diaalo maó talowali lopoóluli.

⁴⁴ Taabua boito lohimbidó li Isa loli wulea, tulusi lodedeta biihu lo jumba-Lio. Tou boitolo mola duhu lotaabua boito lotonggodu.

⁴⁵ Ti Isa malo hintu, "Tatoonu talo dedeta ola-Ú?" Ngoáamila tau lomaahu. Tulusi tei Petrus loloíya, "Paaá, dadaata daá tau topalito li Paaá; timongolio hemo huntu-huntula li Paaá!"

⁴⁶ Ti Isa lotahuda maó, "Bo woluo talo dedeta ola-Ú. Otaawa-Ú uito, sababu woluo lotolo u yilumualai lonto ola-Ú."

⁴⁷ Taabua boito lotota mai loútau deú huhutuulio maílo tahua. Oditolio tio

malonaó mai loú hulu–huluhelio wau losujudu totalu li Isa. Yi tio malo silita totalu lotaa ngoáamila, yilongola tio lodedeta li Isa, wau deú ngongotio loluli tosaaátilo boito.

⁴⁸ Ti Isa lotahuda maó olio, "Walaúu–Ú, sababu yió palacaya ola–Ú, yió maloluli. Ponaólo wolo moáahu."

⁴⁹ Touú ti Isa donggo hemobisala, wato ngota lonaó mai lonto bele lei Yairus. Tio lolóiya maó olei Yairus, "Pusili li Tuani mailate. Sambelolo ti Tuani moposuusa li Paaá guru poli."

⁵⁰ Touú ti Isa loódungohe uito, Tio lotahuda maó odelei Yairus, "Diila oohe, tumbaó pomalacayalo wau walaúmu mamoluli."

⁵¹ Touú leidungga mota ode bele lei Yairus, ti Isa diila longohi openu bo ngotaa maó tumuwoto wo–Lio ngopohia tei Petrus, tei Yahya, tei Yakobus wau mongo dulaá lo walaó boito wambaó.

⁵² Ngoáamila tau mahe hiyongo wau hihunggalaá sababu ilopatea lowalaó boito. Boti Isa lotahuda maó, "Diila hiyongo. Walaó boito diila yilate, tio bo tuutuluhu!"

⁵³ Timongolio helopoííi li Isa, sababu otaawa limongolio walaó taabua boito mailate.

⁵⁴ Lapataó ti Isa malodihu uluú lo walaó boito wau lotahuda maó "Pabongulo, Nou!"

⁵⁵ Nyawa lo walaó boito luli lohualingai ode walaó boito, wau tou boitolo mola tio malobongu. Lapataó uito ti Isa lopoáhu olimongolio lopo tamelaó walaó boito.

⁵⁶ Mongo dulaá lo walaó boito lolinggolabe daá. Boti Isa malodini olimongolio mopohabari u mailowali boito openu boli olita.

9¹ Ti Isa lotiangai mopulaa duulota tahiduduá o–Lio, tulusi longohi kawasa olimongolio mopolahi roroo–huwaalo u moleeto wau mopoóluli ngongoto.

² Lapataó Tio lopoáhu olimongolio lonaó mopoóluli tahi ngongota wau mopololadu habari pasali woloolo mola Allahu Taála mamomalenta odelo Olongia.

³ "Diila maó podelo wolo–wolo to nonaómu," tahuda li Isa olimongolio. "Diila maó podelo tunggudu, meaalo bututu losadaka, meaalo uáalo, meaalo doi, meaalo kaingi dulopita.

⁴ Openu boli tou'toonu timongoli tolimoolio, potitolapo teto sambe timongoli mololaa maó kota boito.

⁵ Wau tou'toonu timongoli diila tolimoolio, tou' timongoli mololaa maó kota boito, polotaá maó peahuó topaladu oáatumu, odelo poéela ode limongolio."

⁶ Tahiduduá li Isa malo monggato, tulusi lonaó ode kakaa-mbunguwalo mota lopohabari Habari Mopiohu boito wau lopoóluli tahi ngongota to utoonulalo maó.

⁷ Tou' tei Herodes, hemo malenta to Galilea, loódungohe pasali lo ngoáamila uilowali boito, tio malolingu. Sababu woluo talo loíya deú tei Yahya Tamopolihua maaluli tilumumulai.

⁸ Woluo olo talo loíya deú tei Elia maaluli tilimimbulu mai. Taawewo olo loloíya deú ngotaalio lonabi lonto mongo nabi to muloololio mai daá maaluli tilumumulai.

⁹ Tei Herodes loloíya, "Wau' malo poáhu talo limade lunggongee Yahya. Bo Tau botie, tutuulio tutu tatoonu Tio? Madadaata u ilodungoheú pasalii-Lio." Yi tei Herodess lotolopani u momilohe li Isa.

¹⁰ Mongo rasulu li Isa luli lohualingai wau helo hungguli maó toli Isa ngoáamila

u mapilohutu limongolio. Ti Isa lotianga olimongolio, tulusi lonaó peé-peéenta woli mongolio lotiwiwi tokota Betsaida.

¹¹ Bo toú ilotaawa lotau-tauwalo suáli boito, timongolio malo duduá li Isa. Tio lololimo olimongolio, tulusi lotahuda maó ode limongolio pasali loú woloolo mola Allahu Taáala momalenta odelo Olongia. Wau Tio olo helo poóluli tahi ngongota towolota limongolio.

¹² Toú dulahee matumolopa mola, tamopulaa duulota tahiduduá li Isa lonaó mai ode o-Lio wau loloíya, "Paaá tambati botie tihitihi mai. Lebe mopiohu péi naówalo li Paaá tau-tauwala botie, alihu timongolio mota motali mai uáalo wau tambati pohuheliyalo to kakaambunguwalo wau dedee-sawaalo totili maó leewe."

¹³ Boti Isa lolametaó, "Timongolilo tamopo tamelaó olimongolio." Tahiduduá li Isa loloíya maó, "Woluo to olamiaatia roti bo limo lobotu wau uponula dulo botu. Wolo amiaatia tamusi motali mai uáalo ode taa ngoáamila botie?"

¹⁴ (Woluo otanu limo lolihu lota mongo lolai teto.) Ti Isa lotahuda maó to tahiduduá o-Lio, "Ahuli maó tau-tauwalo

botie motihuloá ngopo-ngopolemboá, otanu limo loppuulota ngopolembua."

¹⁵ Tahiduduá li Isa boito malohutu wolo u tilahuda maó li Isa olimongolio.

¹⁶ Lapataó ti Isa malohama limo lobotu roti wau dulo botu uponula boito tulusi yilumanggela mola ode hulungo wau lolapali sukuru to Allahu Taáala. Lapataó uito Tio malo mita-mitangaó roti wau uponula boito tulusi longohi maó to tahiduduá o-Lio alihu taya-tayadulio mota totaa dadaata boito.

¹⁷ Timongolio ngoáamilalo lolamela tunggula lobutuhu. Lapataó tahiduduá li Isa malo himoó lebe loú aalo boito daatalio mopulaa dulo kalanji.

¹⁸ Todulahee tuwau, toú ti Isa donggo hemoduá tutuwau, tahiduduá li Isa lonaó mai ode o-Lio. Ti Isa lohintu maó olimongolio, "Moduduá loíya lotau, tatoonu Waú botie?"

¹⁹ Timongolio lolametaó, "Woluo talo loíya tei Yahya Tamopolihua. Woluo olo talo loíya tei Elia, tawewo olo lolóíya tala ngota lonabi tojamani muloololio mai tamaa tilumumulai."

²⁰ "Bo moduduó olimongoli lohihilao, tatoonu Waú botie?" yilintu maó li Isa.

Tei Petrus lolametaó, "Ti Paaálo Olongia Tamoo-poáahua tapilo danti mai lo Allahu Taáala."

²¹ Lapataó ti Isa lotahuda to tahiduduá o-Lio. "Diila maó polelea sama-samaata suáli botie penu boli olita."

²² Ti Isa lotahuda olo, "Walaó Manusia memangi musi modutolo dadaata wau tehengia lomongo taúwa wau mongo iimamu taúwa, wau guguu-ruwaalo agama. Tio mapateelio mate-mateelo maó, bo todulahu otolulio mamuli bongulo-Lio mai."

²³ Lapataó ti Isa lotahuda maó totaa ngoáamila tawoluo teto, "Tamotohilaa moduduó ola-Ú, musi molipataó polohuna daá lo batangalio lohihilao, momota salipulio timiïdu dulahu, wau tulusi moduduó ola-Ú.

²⁴ Sababu taa u motohilaa momintengi tutumulio, maóolia lo tutumulio. Bo taa u mopobake tutumulio duólo polohuna daá ola-Ú mapoáahuwolo.

²⁵ Wolo paédaalio to tahingota-ngotaawa wonu ngoilanggubu dunia botie mowali hakuulio, bo tio moluusa wau oolia lo tutumulio?

²⁶ Wonu tau moolito momasisi ola-Ú wau pongaajali-Ú, Walaó Manusia olo mamoolito momasisi tau boito toú Tio meidungga mai wolo kawasaa-Lio, wau wolo kawasa li Paapa wau mamaa-laíkatiyalo tamantali!

²⁷ Ototai maó: towolota limongoli teewe woluo tadiila mate toú tio diipo moóonto Allahu Taáala momalenta."

²⁸ Otanu ngodimmingu mola lapataó ti Isa helo ngaajali susuu-aliyaalo boito, Tio lodelo olei Petrus, Yahya wolei Yakobus ode huídee tuwau mola loduá.

²⁹ Toú ti Isa donggo hemoduá teto, laku-Lio malobolió wau boó-Lio malowali loputió hĩinta-intaawa.

³⁰ Debolo taduulota, deúito-yito tei Musa wolei Elia lopobilohei batangalio wolo tinelo lonto sologa. Timongolio helo bisala woli Isa pasali lo opopate-Lio udiilalo mohiheo matolimoo-Lio to Yerusalemu.

³¹ (9:30)

³² Towakutu boito tei Petrus wau mongo tamanilio malei tuluhu, bo debolo lobongu lomola, wau loóonto li Isa matine-tinela wau taduulota boito tihutihula wo-Lio.

³³ Toú taduulota boito malo lolaa maó li Isa, tei Petrus loloiya odeli Isa, "Paaá

Guru, sanangi tutu ito teea. Lebe mopiohu amiaatia momongu maó kema tolo wale; tuwau uwoli Tuani tuwau uwolee Musa, wau tuwau olo uwolee Elia." (Tei Petrus lolóiya odito diila mongalati wolo ulóiyalio.)

³⁴ Toú tei Petrus donggo bisabisala, timongolio matilaúbei loheengo, tilinggula timongolio mailoohe.

³⁵ Lapatio maó lonto heenga boito ilodungohe suala u lotahuda mai, "Tabotieelo Walaú-Ú tatilulaotu-Ú, Dungohi maó Tio!"

³⁶ Toú suala boito malopoóyo, timongolio loóonto li Isa tutuwau teto. Tahiduduá li Isa hipoóyonga wambaó pasali ngoáamilalo boito, wau diila lopoótaa penu boli olita wolo umaa iloontonga limongolio.

³⁷ Loloombulio mola ti Isa wau toulota tahiduduá o-Lio lotuhutai lonto huídee boito, wau taa dadaata lonaó mai odeli Isa.

³⁸ Talolái ngota lonto huungo lotaa dadaata boito malo nguatió, "Paaá Guru, tulungia mai bilohi maó walaó watia -- tio ngota-ngotaalo walaó watia!

³⁹ Wonu rohu umoleeta boito mopo ngongoto olio, tio bolo monguatiólo mola wau wawaío hemo buwalodu

tunggula ngangolio he lumolombula.
 Rohu umoleeta boito laito hemo posikisa
 olio, wau diila mohuto lumuwalo monto
 olio!

⁴⁰ Mapilohile lowatia to tahiduduá li Paaá
 u mopolahi rohu u moleeto boito, bo
 timongolio diila loówali."

⁴¹ Ti Isa lolametaó, "Mailaba timongoli
 botie! Tutuulio tutu timongoli tau-tauwalo
 tahelo halahu lonto dalalo u otutu wau
 diila palacaya! Tunggula omolua Waú musi
 motibiluloá woli mongoli, wau mosabali
 woli mongoli? Delowa mai walaúmu boito
 odia mai!"

⁴² Toú walaó boito donggo dulu-dulungai
 odeli Isa, rohu umoleeta boito lopobanti
 olio wau lohutu wawaío helo buwalodu.
 Boti Isa lomalentaó rohu umoleeta boito
 yilumualo wau walaó boito maloluli.
 Lapataó walaó boito luli yiludulio maó ode
 liyamolio.

⁴³ Ngoáamila tau hilinggolabe loóonto
 kawasa lo Allahu Taáala u odito udaáalio.
 Toú tau-tauwalo donggo hilinggolabe
 loóonto ngoáamila u pilohutu-Lio, ti Isa
 malo tahuda to tahiduduá o-Lio,

⁴⁴ "Poótuotalo mopio-piohulo maó wau
 diila lipata upilo tahuda-Ú mai botie:

Walaó Manusia mawuduolio ode kawasa lomanusia."

⁴⁵ Bo tahiduduá li Isa boito diila mongalati tahuda-Lio boito. Suáli boito hitua-tuawua u sangaja hetuuólo toli mongolio alihu timongolio diila mongalati. Bo timongolio moohe mohintu suáli boito o-Lio.

⁴⁶ Towolota lo tahiduduá li Isa malo hahaamawa pasali lo tatoonu monto olimongolio tapulito udaá.

⁴⁷ Otaawa li Isa pikiilangi limongolio, sababu uito Tio malohama taúkikiiá ngota pilopotihu-Lio totili-Lio.

⁴⁸ Lapataó Tio lotahuda maó to tahiduduá o-Lio, "Taa molilimo walaó botie sababu Waú, boliilio maó mololimo ola-Ú. Wau taa mololimo ola-Ú, mololimo o-Lio talolao mai ola-Ú. Sababu taa upulito kikiió towolota limongoli, matio-tiolo tapulito udaá!"

⁴⁹ Tei Yahya loloíya maó, "Tuani, amiaatia loóonto tau lopolahi lati to tangguli Tuani, wau amiaatia lodini olio, sababu tio diila lonto olanto."

⁵⁰ "Diila maó dinia tio," tahuda li Isa odelei Yahya wau to tahiduduá li Isa wewolio, "Sababu taa diila moluwali

olimongoli, boliilio maó motiwambaó toli mongoli."

⁵¹ Tou malembidu wakutuulio li Isa bintaó-Lio mola ode sologa, Tio lohama maó putusani u monaó ode Yerusalemu.

⁵² Yi Tio lopoáhu talo timulo wo-Lio. Tau-tauwala táilahula-Lio boito malonaó, tulusi tilumuwoto ode kambungu tuwau to Samaria u lopodapato totoonulalo hitua-tuawua odeli Isa.

⁵³ Bo tau-tauwalo to kambungu boito diila lohuto lololimo li Isa, sababu loílaalo daá Tio donggo dulu-dulungo ode Yerusalemu.

⁵⁴ Yi tou táhiduduá li Isa, deúito-yito tei Yakobus, wau tei Yahya lotota pasali losuáli boito, timongolio malo loíya, "Eeya, wolo Eeya mohuto, mongowatotia mohile tulu motuhutai monto hulungo mai mopobinasa totau-tauwalo botie?"

⁵⁵ Ti Isa lopalingaó, tulusi loingo olimongolio.

⁵⁶ Lapataó uito timongolio malonaó ode kambungu uwewo.

⁵⁷ Tou ti Isa wau táhiduduá o-Lio donggo hemo tolonga mola lononaólio, woluo taa lolóiya maó li Isa, "Paaá, watia yinao moduduó li Paáa penu boli deútoonu!"

⁵⁸ Ti Isa lolametaó, "Saligala oliyango, wau bulungi obeealelio, bo Walaó Manusia diila otambati potibalatalo."

⁵⁹ Lapataó ti Isa lotahuda maó ode ngotaalio wewo, "Duduí mai Waú," Bo tau boito lolóiya, "Paaá, polulia mai watia mohualingopo mola molobunga oliyamo lowatia."

⁶⁰ Ti Isa lolametaó, "Huliimaó taamate molobungo taa matelio lohihilao. Bo yió, ponaólo wau pololade mota habari deú Allahu Taáala malo lumulo lomalenta."

⁶¹ Woluo olo ngotaalio wewo talo loíya, "Paaá, watia yinao moduduó li Paaá, bo poluliyapo mai watia mohualingopo mola mohintu."

⁶² Ti Isa lotahuda maó ode tau boito, "Taa umaa lolumula lomadeó, lapataó moili ode wulea, diila paatuti mowali pongawaá umati lo Allahu Taáala."

10¹ Lapataó uito Eeya lolulaotaó pitu lopusulota muri poli, tulusi lalao olimongolio duduulota lotimulo wo-Lio ode timíidu kota wau tambati u manaóo-Lio.

² "Tilapulo u otoloolo dadaata," tahuda-Lio maó ode limongolio, "bo tamokalaja u mongotolaó bo ngoídi. Sababu uito,

pohilea maó totaa ohuúo lo halabolu alihu tio molao mai tamokalaja u mongotolo tilapulo pilomulo-Lio.

³ Naa, pomonggatolo! Waú molao olimongoli debo odelo himba tohuungo saligala.

⁴ Diila podelo dompeti meaalo bututu losadaka, meaalo sapatu. Diila maó pohuheli tohuungo dalalo u mosalamu penu boli to ngotaalio olo. Wonu timongoli tumuwoto tobele ngowale, polelea maó mulomulo, 'Pohileaala duá moáahulo tato delomo bele botie.'

⁵ (10:4)

⁶ Wonu teto woluo taa u motohilaa dame, salamu dameemu boito matatapu to olio; wonu diila, muli potoulia mai salamu dameemu boito.

⁷ Potitolaalo wambaó tobele ngowale. Tolimoa maó wolo u pohintalio olemu teto, sababu taa u mokalaja ohaku mololimo wuupalio. Diila maó limbataó-limbataó monto bele ngowale ode bele uwewo.

⁸ Wonu timongoli meidungga tokota tuwau wau mola teto timongoli tolimoolio loú mopiohu, tamela maó wolo u pohintalio olimongoli teto.

⁹ Poólulia maó tau-tauwalo tahi ngongota tokota boito, wau pohabaria maó totau-tauwalo teto, 'Allahu Taáala mahuáa molumulo momalenta odelo Olongia tohuungi mongoli.'

¹⁰ Bo wonu timongoli meidungga tokota tuwau wau teto timongoli diila tolimoolio, lualaó ode dalalo wau loíya maó,

¹¹ 'Tumbaó peyahuó lokotamu u medembinga to oáato lami, polotaó lami odelo poéela olemu. Bo ototai maó deú malembidei saaátilio Allahu Taáala molumulo momalenta odelo Olongia tohuungi mongoli!'

¹² Poótoloma maó, todulahu kiama, taulo Sodom malebe gambangi ambunguo lo Allahu Taáala wolo taulo kota boito!"

¹³ "Matopotala timongoli, Korajim! Wau matopotala timongoli, Betsaida! Humayaalio mamooó-linggolabeyalo u pilohutu tohuungi mongoli boito mapilohutu tokota Tirus wau Sidon, matantu tau-tauwalo mola teto malohiheo lolilihu to duduu-sawaalo limongolio, wau momake boó motilimi wau mopodutu peyahuó to lunggongi mongolio.

¹⁴ Todulahu kiama, tau-tauwalo Tirus wau Sidon malebe gambangi ambunguo lo Allahu Taáala woli mongoli.

¹⁵ Wau timongoli, Kapernaum! To pikiilangi limongoli, timongoli mapolaióolo demolo sologa? Diila! Tumbaó timongoli bo mapomahulio ode nalaka!"

¹⁶ Lapataó ti Isa lotahuda maó to tahiduduá o-Lio, "Taa u modungohe olimongoli, modungohe ola-Ú. Taadiila mololimo olimongoli, diila mololimo ola-Ú, wau taadiila mololimo ola-Ú, diila mololimo olo to talolao mai ola-Ú."

¹⁷ Tapitu lopulu lota muri boito malo hualingai loú hiwengahe daá. "Eeya," loíya maó limongolio, "roroo-huwaalo umoleeta olo lodungohe to mongowatotia wonu mongowatotia momalenta olimongolio to tanggulo Eeya!"

¹⁸ Ti Isa lolametaó, "Wau loóonto Ibilisi lodehu mai lonto hulungo odelo ilato.

¹⁹ Ototai maó! Timongoli mailohiya-Ú kawasa alihu timongoli mowali modutaáa tulidu wau bambau wau mongantulu ngoáamila lotolo musu, wau diaaluo penu boli tuwau maó u mowali mopoó topotala olimongoli.

²⁰ Openu boli odito diila maó potiwengahu timongoli sababu roroo-huwaalo u moleeto modungohe olemu. Lebe mopiohu timongoli motiwengahu sababu tanggulumu leitulade tosologa."

²¹ To wakutu boito olo, ti Isa leengahu sababu kiluwasa lo Rohullah. Ti Isa lolóiya, "Paapa, Eeya takawa-kawasa hulungo wau dunia! Watia mosukuru toli Paapa sababu ngoáamilalo boito u hitua-tuawua u sangaja hetuuó li Paapa totau-tauwala tahi tootawa wau tahi o ilimua, bo piloílaalo li Paapa totau-tauwalo tadiila osikolawa. Uitolo umopo sanangi hilaa li Paapa.

²² Toonulalo u hitua-tuauwa mailudu mai li Paapa to olaa-Tia. Diaaluo maó penu boli ngota tamotota to Walaó, ngopohia li Paapa. Diaaluo olo tamotota li Paapa, ngopohia lo Walaó; wau tau-tauwala toólita Walaó boito yinao mopoótaa li Paapa."

²³ Lapataó ti Isa lomiloheó to tahiduduá o-Lio, tulusi lotahuda olimongolio wiwi-wiwi, "Maílo paaéda timongoli sababu maloóonto u iloontonga limongoli masaatia botie.

²⁴ Sababu eelai maó: Dadaata nabi wau onlongia motohilaa momilohe u

iloontonga limongoli masaatia botie bo timongolio diila moóonto. Timongolio ohilaa modungohe u ilodungohe limongoli masaatia botie, bo timongolio diila moódungohe."

²⁵ Lapataó ngotaalio guru lo agama lotibilohei u lopotala li Isa. Tio lohintu maó, "Paaá Guru, mawolo umusi pohutuo lowatia alihu mololimo tutumulo tutu wau ohiheo-hiheolo maó?"

²⁶ Ti Isa lolametaó, "Wolo u tulatulade todelomo Kitabi? Woloolo mola huhamaamu tomimbihu suáli boito?"

²⁷ Tau boito lolametaó, "'Toliánga maó Allahu Taáala Eeyamu loú lealeaatu lohilaamu, loú lealeaatu lojiwamu, loú ngoáamila lotolumu, wau loú totoonulalo aakalimu,' wau 'Toliánga maó timongotamu debo odelo yió motoliángo batangamu lohihilao'."

²⁸ "Totametumu boito otutu," tahuda maó li Isa. "Pohutuwalo uito, yió matumumulo."

²⁹ Bo guru lo agama boito ohilaa mopobanali batangalio. Tio lohintu maó, "Tatoonu timongota lowatia boito?"

³⁰ Ti Isa lolametaó, "woluo talolái ngota lolaabei lonto Yerusalemu ode Yerikho. Tohuungo dalalo tiluhu lo tamoo-lambata,

yilahulio totoonulalo u mililikiilio, pilatelio ngopeé yilate, tulusi tilolaalio maó banti-banti to dalalo loú palipali daá.

³¹ Leitahua ti iimamu ngota naónaó olo to dalala boito. Toú iloontongalio tau boito, tio lohei maó ode ngotuwali lo dalalo lapataó lonaó tulusi.

³² Odito olo ngotaalio lo Lewi tanaónaó teto: toú iloontongalio tau boito, lohimbideó tio wau lopoó tuoto olio. Bo tio olo debo lohei maó ode ngotuwali lo dalaalo, lapataó lonaó tulusi.

³³ Bo lapatio maó tau ngota lo Samaria donggo pasi-pasiyali, yilumaode olo teto. Toú loóonto tau boito, mawunu-wunulo daá hilaalio, sababu motoliángo.

³⁴ Yi diludulalio tau boito tulusi mapiloó belesilio paliilio wolo angguru wau yilunemio wolo yinulo, lapataó bilolulio papaa-liyaalo boito. Lapataó uito, mapilopo taélio tau boito to kolodailio lohihilao, tulusi dilelolio ode tambati pohuhepita ngowale wau yilawatialio.

³⁵ Toú loombulio mola tio lohama dulopita doi talaá wau yilohilio totaa ohuúwo lotambati pohuhepita boito wau loloíya, 'Lawatia maó tio, wau wonu woluo

onggosi wewo, de watia tamomayali tou watia muli mohualingai'."

³⁶ Lapataó ti Isa lopoó pulito silita boito loú lohintu maó odie, "To otolulota boito tatoonu, moduduó huhamaamu, talohutu odelo timongotalio monto taa u yilambatio boito?"

³⁷ Guru lo agama tapilo hintua boito lolametaó, "Taa u malo tulungi tau boito." "Naa, naóolo wau pohutua maó odelo uito olo!" tahuda li Isa.

³⁸ Lapataó ti Isa wau tahiduduá o–Lio lotolonga mola lononaó–Lio, tulusi leidungga to kambungu tuwau. Teto taabua ngota, tanggulio Marta, loloduo o–Lio ode belelio.

³⁹ Ti Marta owutato taabua tanggulio Maria. Ti Maria botie lotihuloó titiilia li Isa Eeya helo dungohe popoo–ngajalii–Lio.

⁴⁰ Boti Marta dadaata daá kalajaalio hemo ngulusi belelio. Tio lonaó mota odeli Isa wau loloíya, "Eeya, wolo Eeya diila pandungi oli Maria bo hemo poluli maó olaatia hemokalaja tutuwau? Ahuli maó tio motulungi mai olaatia!"

⁴¹ "Marta, Marta!" tametaó lo Eeya. "Yió molawalo wau bo hemo mikiilangi uito wau utie;

⁴² lebe–lebe pomaó u polohuna daá bo tuwau. Wau ti Maria malo lulaoto u mopiohu, udiila mowali hamaalo monto olio."

11 ¹ Todulahu tuwau ti Isa loduá totambati tuwau. Tou mailapato loduá ngotaalio lo tahiduduá o–Lio lolóiya, "Eeya, nte ajalia mai mongowatotia odelo tei Yahya helo ngaajali loduá to tahiduduá olio."

² Yi ti Isa lotahuda maó olimongolio, "Wonu timongoli moduá, loíya maó odie, 'Allahu Taáala, Eeyalo Paapa bo Tuwa–tuwaulo. Pohileaala duá Eeya tuboolo wau hulumatiolo.

³ Wuduwalo mai timíidu dulahu uáalo upalaluo lo mongowatotia,

⁴ Ambungua mai duduu–sawaalo mongowatotia, sababu mongowatotia olo hemo ngambungu timíidu tau taótotala to mongowatotia. Wau diila maó polulia mongowatotia oolia lo palacaya towakutu mongowatotia yimontalalio."

⁵ Ti Isa lotahuda maó to tahiduduá o–Lio, "Humayaalio ngotaalio limongolio monaó ode bele lo tamanilio to tomutaá loú hui, wau moloíya, 'Tamani bulotipo mai roti tolobotu,

⁶ sababu tamaniú tadonggo todelomo nonaó, boheli lohepitaó ode bele wau waú madidu o uáalo pohinta olio.'

⁷ Humayaalio tamani tanilaómu boito molametaó odie, monto delomo belelio, 'Diila maó posuusawa waú! Huhebu maleiuunti wau waú wolo mongo walaúuuú malo tuluhu. Waú diilalo moó bongu wau mongohi mai wolo-wolo olemu.'"

⁸ "Lapataó woloolo mola?" Tahuda maó li Isa wumbutio mola. "Waú motahuda mai, ooó! Openu yió tamanilio, tio diila tamohuto mobongu wau mongohi mai wolo-wolo olemu. Bo tumbaó sababu yió diila molaasa moolito mohile to olio mololaalaaita, yi tio mamobongu olo wau mamongohi olemu wolo u palaluwomu.

⁹ Oditolio, Waú motahuda mai olemu: Pohileelo, yi timongoli mawohialio; loloheelo, yi timongoli mamooótapu; pongokoólo, yi huhebu mahuóolio olemu.

¹⁰ Sababu tamohile mamololimo; tamololohu mamooótapu wau tamongokoó mahuówalio tohuhebu.

¹¹ Towolota limongoli tingga woluo tiyamo tamongohi tulidu to walaío, wonu walaío mohile uponula?

¹² Meaalo mongohi bambau, wonu waláio mohile putito?

¹³ Openu timongoli moleeto, debo otaawa limongoli olo mongohi u mopiohu towalaí mongoli. Tidiyolo maó Allahu Taáala to Sologa! Allahu Taáala mamongohi mai Rohu-Lio to limongolio tamohile to o-Lio!"

¹⁴ Todulahu tuwau ti Isa lopohinggi rohu u moleeto yilumualaó lonto ngotaalio buubu. Tou rohu u moleeto boito yilumualaó, tau boito malo bisala. Dadaata tau lolinggolabu,

¹⁵ bo woluo talo loíya, "Tio mowali mopohinggi rohu u moleeto sababu kawasa lo Beeljebulu, taúwa lorohu u moleeto boito."

¹⁶ Woluo olo tau-tauwalo wewo taóhila mopotala li Isa, oditolio timongolio lohile li Isa mohutu u moólinggolabe odelo tuoto deú Tio leidungga mai lonto Allahu Taáala.

¹⁷ Bo otaawa li Isa makusudu limongolio. Yi Tio lotahuda maó olimongolio, "Wonu lipu tuwau mopoó mowali hipala-palateiya u tinggai mumuusua, lipu boito diila moó tahangi. Wau wonu ungaalaá tuwau mamu bubuuálawa wau mumuusua ngota timongota, ungaalaá boito mamoaántulu.

¹⁸ Odito olo todelomo bele biluloá saaha li onlongia lo Ibilisi; wonu ngopolembóá moloohulua wolo polembóá uwewo, yiladia boito mamóántulu. Timongoli hipolóiyawa deú Waú lopohinggi rohu u moleeto boito sababu kawasa lo Beeljebul.

¹⁹ Wonu odito, wolo kawasa lo tatoonu tahiduduá olemu lopohinggi roroo-huwaalo u moleeto boito? Tahiduduá olemu boitolo talo póilaalo mai deú timongoli tilala!

²⁰ Bo Waú lopohinggi rohu u moleeto boito wolo kawasa lo Allahu Taáala, wau uito boliilio maó deú Allahu Taáala malo lumulo lomalanta tohuungi mongoli.

²¹ Wonu tamolotolo ngota, wolo otingolo wimu-wimumuto, modaha belelio lohihilao, ngoáamila milikiilio mamóáahu.

²² Bo wonu ngotaalio talebe molotolo moluhu wau moólaahe olio yi taa u lebe molotolo boito mamóhehu ngoáamila tingolo u hepo ngakulio lotaa ohuúo lobele boito, lapataó molaya-layadeó ngoáamila balangilio.

²³ Taa u diila motiwambaó de ola-Ú, tutuulio tutu moluwali ola-Ú, wau taa diila momantu ola-Ú, tutuulio tutu mopoólusa kalajaa-Ú!"

²⁴ "Wonu bolo rohu u moleeto mololaa maó tahingota-ngotawa, rohu boito momalito to tataa-mbatiyalo u mohengu u molololohe pohuhelialio bo diila motapulio. Masababu uito, tio moloíya, 'Waú mamuli mohuwalinga mola ode bele u matilolaú mai!'

²⁵ Touú tio leidungga mola odito, ilodunggalio bele boito belesi wau aáatulu.

²⁶ Lapataó tio lonaó wau lodelo pitu rohu uwewo ulebe maó moleeto wolio. Tulusi timongolio tilumuwoto ode delomo tau boito lapataó lotibiluloá teto. Wau pulitio maó owowoluwoa lotau boito lowali lebe loleetaó wolo ubohulio."

²⁷ Lapataó ti Isa lotahuda maó odito, taabua ngota towolota lotaa dadaata boito lolóíya li Isa, "Otutu sanangi tutu taabua talo potutu mai wau longohi tutu ole-Mu!"

²⁸ Boti Isa lolametaó, "Lebe sanangi tutu poli taa u modungohe tahuda lo Allahu Taáala wau pohutuolio!"

²⁹ Touú tau-tauwalo donggo hiámbua totili li Isa, Tio lopo tolonga mola bibiisalawa-Lio, "Ua-Lio maó. Donggo boli leetio tau-tauwalo tojamani botie. Timongolio méihutu tuwaulio moólinggolabu alihu

timongolio moó palacaya ola-Ú. Bo timongolio diila tawohiyalo penu boli tuwau maó moólinggolabu, ngopohia moólinggolabu li Nabi Yunu.

³⁰ Odelo woloolo mola ti Nabi Yunu tuwaulio u moólinggolabe totau-tauwalo kota to Niniwe, odito olo Walaó Manusia mamowali tuwaulio lo moólinggolabe totau-tauwala tojamani botie.

³¹ Todulahu kiama Olongia Tabua monto Hulialio mamobongu mai peé-peéenta wolo tau-tauwala tojamani botie, wau mopotuludu olimongolio. Sababu, u modungohe pongaajali lei Salomo tamolinepo, Olongia Tabua boito malo huwato ode u molaminga daá monto huudu dunia. Bo tea botia woluo talebe udaá wolei Salomo!

³² Todulahu kiama, tuango lipu lo Niniwe mamobongu peé-peéenta wolo tau-tauwalo tojamani botie, wau mopotuludu olimongolio, sababu taulo Niniwe boito lolilihu to duduu-sawaalo limongolio tou tei Yunu lohutuba to limongolio. Bo tea botia woluo talebe udaá wolei Yunu!"

³³ "Diaaluo taa u mopoleitaa tohe lapataó tuuólio meaalo taúbelio wolo tombe.

Madutuolio tohe boito to oáato tohe, alihu taa tumuwotaó mamooónto tilangio.

³⁴ Mato yito tohe lobatanga. Wonu matomu motilango, ngoáamila batangamu mobaango daá. Bo wonu matomu mopulau, ngoáamila batangamu mowali modiólomo daá.

³⁵ Masababu uito, poódaha-dahaalo maó, diila bolo tinelo uwoluo to batangamu boito mowali modiólomo.

³⁶ Wonu ngoáamila batangamu mobaango, wau penu boli ngotayadu diila modiólomo, yi ngoáamila batangamu boito mobaango daá debo odelo tilinela lotinelo tohe."

³⁷ Toú ti Isa lapato lotahuda maó, ngotaalio lo Parisi loloduo o-Lio lolamelo to belelio. Ti Isa malonaó mota lolamela teto.

³⁸ Taulo Parisi boito lolinggolabu loónto li Isa lolamela loú diila longulo uluú-Lio loduduó wuúdu lo agama.

³⁹ Sababu uito Eeya lotahuda maó olio, "Memangi timongoli tau-tauwalo Parisi u biasaalio hemo poóbelesi manggo wau pingge towimbihu bulemengio, bo to batangamu lohihilao polupolu wolo palangi wau moleeto.

⁴⁰ Timongoli mohulodu! Diila maa Allahu Taáala talohutu towimbihu bulemengio boito, malohutu olo towimbihu delomio?

⁴¹ U woluo todelomo manggo wau pinggemu boito, uitolo umusi wohi maó limongoli totau-tauwalo mosikini. Wolo pohuli boito, ngoáamilalo mamowali belesi olemu.

⁴² Matopotala timongoli, tau-tauwalo Parisi! Tilapulo loú pilomulomu debo odelo solasi wau denggu-denggu wau lamba-lamba uwewolio, yilohi limongoli ngotayade mopulu ode Allahu Taáala, bo uáadili wau motoliángo to Allahu Taáala diila padulio limongoli. Lebe-lebe pamaó uitolo u patutilio pohutuo maó limongoli, loú diila momalongo uwewolio olo.

⁴³ Matopotala timongoli, tau-tauwalo Parisi! Timongoli motohilaa huhuloáa u hehulumatio lotau todelomo bele potabiaalo, wau motohilaa hulumatiolio to papaa-taliyaalo.

⁴⁴ Matopotala! Timongoli debo odelo kuubulu u diilalo opaítalio, u hepo duduutaá lotau loú diila totatota loú tau."

⁴⁵ Tala ngota guru lo agama loloíya maó odeli Isa, "Paaá Guru, wolo tataa-heyaalo boito, ti Paaá malohina olami olo!"

⁴⁶ Ti Isa lolametaó, "Matopotala timongoli olo, guguu–ruwaalo agama! Timongoli hemohile wolo moóohuú susuu–aliyaalo u mototolo wau hemongohi wuwuu–uduwaalo u hibuuheta, bo timongoli lohihilao openu bo ngoídi maó diila mohuto motulungi tau moponaó uito.

⁴⁷ Matopotala timongoli! Timongoli lomongu kuubulu ode mongo nabi, u tumbaó hepilate yila–yilatelo maó linenemoyamu lohihilao.

⁴⁸ Oditolio timongoli lohihilao lomasisi deú timongoli akolo wolo umaa pilohutu linenemoyamu; sababu memangi timongolio talomate yila–yilatelo maó mongo nabi boito wau timongolilo talo mongu kuubululio.

⁴⁹ Uito sababuulio Tinepo lo Allahu Taáala lotahuda, 'Waú mamolao mai ode limongolio mongo nabi wau mongo utoliya–Ú ngotayadu mapateelio mate–matelo maó wau ngotoyadu maa alinayalio!'

⁵⁰ Allahu Taáala mohutu mai uito alihu tau–tauwala tojamani botie moótapu hukumani sababu timongolio malomate yila–yilatelo maó u pilohutu limongolio

tomongo nabi ngoáamila anggadu dunia
botie pilopowali,

⁵¹ tumulalo maó monto pilomatea olei
Habel yila-yilatelo maó demola pilomatea
olei Jakaria yila-yilatelo maó uilowali
towolota lomesba wau Bele lo Eeya.
Pomalacayalo: Tau-tauwalo tojamani
botie tantu mahuku-maniyolo sababu
ngoáamilalo boito.

⁵² Matopotala timongoli, guguu-ruwaalo
agama! Uúunti u pomuó huhebu lo
pongotota tahutahu to limongoli, bo
timongoli lohihilao diila mohuto tumuwoto
ode delomio u mololohe pongotota boito.
Boliño maó timongoli hemo ngabu-
ngabuto tau-tauwalo tahemo tolopani
tumuwoto ode delomio!"

⁵³ Tou ti Isa lololaa maó tambati boito,
guguu-ruwaalo agama wau tau-tauwalo
Parisi helo tulate wolo ulintapo li Isa
wolo moóohuú. Timongolio mahemo
podudulaó totoonulalo yiyintu u motota
maó tuango hilaa lotau to o-Lio alihu Tio
mohuto mobisala pasali lou dadaata suáli.

⁵⁴ Wau sambela uito timongolio hemo
poótuoto tióotutua o-Lio wau hemololohe
totala lou wolo u heloiyaa-Lio.

12 ¹ Hilihu-lihua tau hipo huhuuntula tunggula woluo táilo dutáa to oáatio. Toú tau-tauwalo boito donggo hiámbua ti Isa lotahuda maó ode tahiduduá o-Lio, "Poódaha-dahaalo maó ragi tau-tauwalo Parisi, makusudu-Ú omunaapiki limongolio.

² Diaaluo utuutuó udiila oontonga, diaaluo u hitua-tuawua u sangaja hetuuólo wau diila tamo bonggali.

³ U heloíya limongoli toú hui maódungohe towakutu dulahu; wau u pilolohumi mongoli ode bulonga lotau todelomo huwali heúheúto, mapo malalumu lomola moloópo-oopolo maó."

⁴ "Poótoloma maó, mongo sahabati-Ú! Diila maó oohe toli mongolio tamomate batanga mate-mateelo maó bo diila mowali mohutu ulebe maó leeto.

⁵ Mopiohulo poílaalo-Ú mai olemu tatoonu tawajibu oohe limongoli. Oohelo mola Allahu Taáala! Sababu lapataó momate mate-mateelo maó, Tio okawasa olo mopomahulo ode delomo nalaka! Pomalacayalo, Tiolo tawajibu oohe limongoli.

⁶ Dinggota mohelu limo pilotali ngohalaga deeduluo mato lodoi upulito

kikiió. Eleponu odito diaaluo penu boli tuwau maó olipata lo Allahu Taáala.

⁷ Huwoó to lunggongumu olo mailiáapa ngoáamilalo, sababu uito diila maó oohe; timongoli lebe maó ohalaga daá wolo diding-gotawalo boito!"

⁸ "Poótoloma maó tióotutua: Tamo tolongaku totalu lotaa dadaata deú tio muri-Ú, tio matoloákuo olo lo Walaó Manusia totalu lo mamaa-laíkatiyalo Allahu Taáala.

⁹ Bo tamomaahu totalu lotaa dadaata deú tio muri-Ú tio mapaahu olo lo Walaó Manusia totalu lo mamaa-laíkatiyalo Allahu Taáala.

¹⁰ Wonu tau moloíya u hitua-tuawua lou motehengi Walaó Manusia, tio mowali ambunguolo; bo wonu tio mohina Rohullah, yi tio diila mowali ambunguolo.

¹¹ Wonu timongoli deloolio ode bebee-leyaalo potabiaala u butoólio totalu lo pamalenta meaalo takawa-kawasa, diila maó polowalo tomimbihu woloolo mola timongoli musi mopodulua batanga meaalo tomimbihu wolo umusi loíya limongoli.

¹² Sababu wolo umusi loíya limongoli boito maáajalio lo Rohullah olemu to wakuuulio."

¹³ Ngotaalio towolota lotaa dadaata lolóíya odeli Isa, "Paaá Guru, nte ahuli maó li Paaá wutato lowatia molayadei halata ngotayadu monto halata u tilolaa maó liyamo lamiaatia."

¹⁴ Ti Isa lolametaó, "Wutato, tita talomuduó ola-Ú lowali hakimu meaalo tamooloyade pusaka towolota limongoli duulota?"

¹⁵ Lapatio maó totaa ngoáamila tawoluo teto, ti Isa lotahuda, "Poódaha-dahaalo maó wau poulintapolo mola, diila bolo timongoli mowali tamaá. Sababu tutumulo manusia diila tolomodu mohalapu to okokayalio, eleponu halataalio laba-labaalo daata."

¹⁶ Lapataó ti Isa lohungguli maó pohumaya botie, "Woluo taakaya ngota. Tio ohuta u hemongohi tilapulo ngohuntua daá.

¹⁷ Taakaya boito mahemo mikiilangi mola todelomo hilaalio, 'Madidu otambati poli u polahuwalo tilapulo hutaú. Wolo aakaliú botia?'

¹⁸ Lapataó tio muli lomikiilangi mola wau lolóiya to batangalio lohihilao, 'Naa, waú oáakali; yibunguú mapéi longgaluú tulusi mapéi bonguú ulebe udaá maó. Mota teto matahuwouú paleú ngoáamila wau wolo babalangiú uwewo.

¹⁹ Lapataó maloíyaú maó to batangaú lohihilao: Yió mapilaaéda! Totoonulalo umopio malo tapumu wau diila huáa mopulito ngotilonggadu ota-otaunualio mola. Pohuhelilo masaatia! Polamelolo pongilulo wau niímatiyalo tutumulumu!'

²⁰ Bo Allahu Taáala lotahuda mai olio, 'Wuu tamohulodu! Tohuilo botie yió maamate, lapataó tatoonu tamaa moótapu ngoáamila okokaya u mailimoúmu ode batangamu boito?'

²¹ Odieelo mola waliilio loú timíidu tahemo tolopani mowali kaya ode batangalio lohihilao, bo diila motolopani mowali kaya tomato lo Allahu Taáala."

²² Lapataó ti Isa lotahuda maó to tahiduduá o-Lio, "Uito sababuulio Waú motahuda mai, 'Diila maó polawalo tomimbihu tutumulumu, wolo umaa polameli mongoli, meaalo wolo umaa pomake limongoli.'

²³ Tutumulo botie lebe maó loú aalo, wau batanga lebe maó wolo pakeyangi.

²⁴ Poótuota maó bubuu-lungiyalo paaó! Timongolio diila helo pomulo, diila helolipu, diila olo ohudungu meaalo oyibungo. Bo Allahu Taáala helolaala olimongolio! Timongoli lebe ohalaga daá wolo bubuu-lungiyalo boito!

²⁵ Tatoonu towolota limongoli wolo ololawalio mowali mopohayaó tutumulio eleponu bo ngoídi?

²⁶ Wonu suáli debo odelo kikiño leeto olo, madiila mowali pohutuo limongoli, yilongola molawalo u wewolio?

²⁷ Poótuota maó woloolo mola bubuu-ngawaalo patihu boito mobutu; bubuu-ngawaalo boito diila hipo kalajawa, diila olo hipo hewola; Bo Olongia Salomo taódito kayalio olo diila helomake boó u odito piohio odelo bubuu-ngawaalo boito!

²⁸ Huóyoto tohuta datahu wau luasi mobutu dulahe botie wau loombu mola mapobuolio tunggula maahu. Openu boli odito Allahu Taáala helo podadai huóyoto boito odito piohio. Tidiyolo maó timongoli! Bo timongoli diila boti palacaya!

²⁹ Oditolio, diila maó polawalo wau polingu tomimbihu wolo umaa polamelo wau yilumolo.

³⁰ Susuu–aliyaalo debo odelo uito heilapita lotaa diila motota lo Allahu Taáala. Lebe–lebe pomaó otaawa lo Allahu Taáala limongoli deú timongoli palalu ngoáamilalo boito.

³¹ Bo timongoli musi motolopani alihu Allahu Taáala momalenta to tutumulumu, yi uwewolio boito mawohi lo Allahu Taáala olo olemu.

³² "Timongoli u bo ngoídi jumulaalio, diila maó oohe! Sababu Allahu Taáala limongoli sanangi mongohi mai olimongoli balakati monto Pomalenta–Lio.

³³ Potaliyalo milikimu wau wohia mota doilio ode taa mosikini. Pohutua maó ode batangamu lohihilao dompeti udiila mowali moodulo, deúito–yito halata u tilahu tosologa. Halata boito diila mowali mooli sababu tamootaówa diila mowali mohama wau wale olo diila mowali mopolusa maó.

³⁴ Sababu touútoonu halatamu teto olo hilaamu!"

³⁵ Poódaha–dahaalo maó motaalua lotimiídu suáli. Timongoli musi laito

dapadapato mohiboó wau tohemu debo léiléiito,

³⁶ tutuuwauwa odelo tahi pomayawa tadonggo dapadapato hemohima oli tuanilio mohualingai monto potihunggu lonika. Wonu tituani boito mohualingai wau mongokoá huhebu, timongolio mahuáa momuó huhebu.

³⁷ Donggo boli paédaalio tahi pomayawa u odungga donggo hemohima towakutu tituanilio meidungga mai. Pomalacayalo: tituani boito mamoti dapato wau mopoáhu maó tahi pomayalio boito motihuloáa, tulusi tio mohinta olimongolio.

³⁸ Donggo boli paédaalio tahi pomayawa boito wonu tituani limongolio moódungga olimongolio donggo hiwimawa, eleponu tio meidungga to tomutaá loú hui meaalo lebe moboyu mai woleeto!

³⁹ Eelai maó utie! Wonu otaawa lotaa ohuúwo lobele jamu ngoolo tamootaówa monaó mai, tio mamo poódaha alihu tamootaówa diila tumuwoto ode delomo belelio.

⁴⁰ Sababu uito timongoli olo musi motidapato sababu Walaó Manusia mamei dungga mai tosaaáti udiila helantobu limongoli."

⁴¹ "Eeya, wolo pongaajali boito pilomatuju lo Eeya ode mongowatotia meaalo totaa ngoáamilalo?" yilintu maó lei Petrus.

⁴² Eeya lolametaó, "Tatoonu tamoomayawa u tatapu wau molotolo hilao wau molinepo tilinggula piluduó lituanilio mowali taúwa lo tahi pomayawa wewolio alihu tio mopotamela olimongolio to wakutuulio?"

⁴³ Donggo boli sanangilio tamoomayawa boito wonu tituanilio mohualingai wau moódungga olio donggo hemoponaó tuugasilio!

⁴⁴ Pomalacayalo: Tituani boito mamó pomalacaya maó ngoáamila halataalio to tamoomayawa boito.

⁴⁵ Bo wonu tamoomayawa boito moloíya todelomo hilaalio, 'Tuani donggo mohiheo watia mohualingai,' tulusi tio momate ngoáamila tamomayawa wau molamelo mongilu tunggula huwoáalo,

⁴⁶ yi tituanilio mamó hualingai todulahu wau jamu udiila ota-otaawa maó. Wau tamoomayawa boito mapateelio mongo-mongongotolo maó lituanilio wau pohutuolio ngopaladu wolo tau-tauwalo tadiila modungohe to Allahu Taáala.

⁴⁷ Tamoomayawa tamotota hilaa lituanilio, bo diila motidapato wau diila mohutu u kahandakio lituanilio boito, mabuboálio mongo-mongongotolo maó.

⁴⁸ Bo tamoomayawa tadiila motota u otohilaa lituanilio, lapataó mohutu hitua-tuawua utalatala tilinggula musi buboálo, yi mabuboálo loú moheelo wambaó. Sababu taa u mailohia dadaata, monto olio mopohilelio wolo moóohuú u dadaata olo. Wau tamaa pilo-malacaya maó udadaata, monto olio mapohilelio wolo moóohuú u dadaata olo."

⁴⁹ "Wauú dungga-dungga mai mopotoodei u moópobu todunia botie. Donggo boli piohio wonu tululio madilumeíto!

⁵⁰ Donggo woluo polodutolo polu-polutuó umusi dutola-Ú. Wau hilaa-Ú balisa daá tou uito boito diipo motoduo mai.

⁵¹ Wolo to lantobi mongoli Wauú meidungga mai modelo polodame ode dunia? Diila, diila polodame bo wambaó pololawani.

⁵² Tumula maó botia ungaalaá tilitangoa loú limolota tinggai motehengia, toulota moluwali taduulota meaalo taduulota moluwali tatoulota.

⁵³ Tiyamo mamoluwali walaño talolaí wau walaño talolaí mamoluwali oliyamolio. Tiilo moluwali walaño bua wau walaño bua mamoluwali oliilolio. Tiilo moluhengo mamoluwali moluhengio bua wau moluhengo bua mamoluwali tiilo moluhengio."

⁵⁴ Ti Isa lotahuda maó olo totaa dadaata, "Wonu timongoli moóonto heengo mobotulo ode ambahu otolopa, timongoli huáa moloíya, 'Madidiyalo.' Wau otu-otutuulo maó dilidia mai.

⁵⁵ Wonu timongoli moólaasa dupoto meidungga mai monto hulialio, timongoli mamoloíya, 'Mamopatu mai' Wau otu-otutuulo maó mopatu.

⁵⁶ Timongoli taa u motohilaa diila otu-otutuulo maó! Timongoli mowali motakusili loú momilohe owowoluwoa lohulungo wau dunia. Yilongola tutuuotaalo jamani botie diila mowali takusilio limongoli?"

⁵⁷ "Yilongola timongoli diila molantu lohihilao wolo ubanali?"

⁵⁸ Wonu woluo tau mopodulohu olimongoli ode bubutoó, tolopania maó tióotutua u mopoó lapato palakala boito wolio tou timongoli donggo tohuungo

dalalo. Wonu diila, de tio tamodedeá olimongoli ode talu lobutoó wau butoó boito mamohudu olimongoli ode Pulisi, wau Pulisi mamopo tuwoto olimongoli ode delomo tutupa. Pomalacayalo!

⁵⁹Timongoli diila talumualai monto tutupa boito tou diipo moóbayali dintamu ngoáamila."

13 ¹Towakutu boito tau lohungguli maó li Isa tomimbihu dengolo lota taulo Galilea tapilate lei Pilaatu, tou timongolio donggo hemo podewo bake ode Allahu Taála.

²Lomaahamu silita boito, ti Isa lotahuda maó, "Sababu tau-tauwalo Galilea boito pilatelio yila-yilateelo maó debo odelo uito, wolo helantobu limongoli uito bukutiilio timongolio lebe odusa wolo ngoáamila taulo Galilea uwewolio?

³Sama-samaata diila! Bo eelai mola: wonu timongoli diila molilihu monto duduu-sawaalo limongoli, timongoli ngoáamila debo mate olo, debo odelo timongolio.

⁴Woloolo mola olo wolo mopulaa walulota tailate to Siloam, tou monala boito lolemba olimongolio? Wolo uito tolantobi mongoli mopobayahei

olimongolio lebe odusa wolo tau-tauwalo wewo tabilu-biluloá to Yerusalemu?

⁵ Sama-samaata diila! Peéentapo potahuda-Ú mai; Wonu timongoli diila molilihu monto duduú-sawaalo limongoli, timongoli ngoáamila maamate olo debo odelo timongolio."

⁶ Lapataó uito ti Isa malo hungguli olo pohumaya botie, "Woluo tahingota-ngotawa obungo lo ayu ara to ilengi lo anggurulio. Todulahu tuwau lonaó tio mota lopeehu hungo lo ara boito, bo diila loótapu openu bo ngobotu.

⁷ Oditolio, tio lolóiya maó to tamoo-kalajawa ilengilio, 'Bilohi, matolo taunu watia hemonaó mai mopeehu hungo lo ara u tobungo lo ara botie, bo diila hemoótapu openu bo ngobotu. Luwodelo bungo lo ayu boito! Tio bo hemo poópulito sati lou aalo monto huta!'

⁸ Bo tamoomengia boito lolametaó, 'Huliaalo maó tio tumutumulo tou ngotaunu pomola, Tuani. Watia mamomati huta topalitia wau dutuwalo puupuki.

⁹ Tanu tio de momungo mai totaunu talutalu botie. Bo wonu diila, mowalilio ti Tuani méi luwodeó'."

¹⁰Toú dulahu Saabati tuwau, ti Isa longajali tobele ngowale potabiaalo.

¹¹Mota teeto woluo taabua ngota tamaa mopulaa walu lotaunu mongongoto, sababu woluo rohu u moleeto todelomo batangalio. Taabua boito bunggu wau sama-samaata diila mowali timihulo motulidu.

¹²Toú ti Isa loóonto olio, maa ilibode li Isa tio, "Ibu, ti Ibu molopato monto ngongoti Ibu!"

¹³Lapataó ti Isa loleaapu maó yimbupulu lotaabua boito, wau to saaátילו boito tio matilimihulo lotulidu tulusi lomuji Allahu Taáala.

¹⁴Taúwa lobebe potabiaala boito moloingo, deú ti Isa lopoóluli tau todulahu Saabati, sababu uito tio lolóiya maó totau-tauwalo, "Woluo wolonggui mola u mokalaja; ponáolo mai to duduu-laheyaalo boito meí poóluli, diila maó todulahu Saabati!"

¹⁵Eeya lolametaó, "Munapiki timongoli botie! Todulahu Saabati ngoáamila tau momuli sapi meaalo kolodailio monto lantunga wau deloolio ode bulemengio mota pelumolio.

¹⁶ Naa, tee botia woluo taabua ngota wali mai lei Abraham, umaa mopulaa walu lotaunu hiheolio ilotihuta lo Ibilisi. Wolo tio diila mowali huliyalo to tihutalio todulahu Sabati?"

¹⁷ Totameti Isa boito maloóhutu mumuu-suwaalo li Isa loolito daá; bo ngoáamila tau-tauwalo wewolio sanangi loóonto tilolahepaalo moólinggolabe u pilohutu li Isa.

¹⁸ Ti Isa lohintu maó, "Wonu bolo Allahu Taáala momalenta, tingga woloolo mola owowoluwoalio? Mahinta woloolo mola mowali pobandingiyo-Ú maó?"

¹⁹ Owowoluwoalio debo odelo pohumaya botie. Bili losawi ngobotu hilama lo tahingota-ngotawa tulusi pilomulolio to ilengilio. Bili losawi boito malobutu mai tulusi lowali ayu ngobungo, wau bubuu-lungiyalo mai lohutu beealelio to tataa-ngowaalo ayu boito."

²⁰ Peéentapo ti Isa lohintu maó, "Wonu Allahu Taáala momalenta, mahinta woloolo mola mowali pobandingiyo-Ú owowoluwoalio?"

²¹ Owowoluwoalio yito debo odelo ragi u hilama lotaabua ngota wau ilulau wolo

wopato pulo loliiteli labu, tunggula lolesi ngoáamilalo."

²² Todelomo nonaó ode Yerusalemu, ti Isa lolibaya to kokoo-tawaalo wau kakaa-mbunguwalo sambela helo ngaajali.

²³ Lapataó woluo talohintu o-Lio, "Paaá, wolo bo ngoídi wambaó taa umapo aahuwolo?"

²⁴ Ti Isa lolametaó, "Potolopanilo u tumuwoto moli huhebu umeepito. Sababu, eelai! Dadaata tahemo tolopani tumuwoto bo diila mowali.

²⁵ Towakutu taa ohuúwo lobeles mobongu wau moheúta huhebulio, timongoli hitihula to bulemengio wau hemo ngoko-ngokoó sambela hemoloíya, 'Tuani, huówalo mai huhebu olamiaatia!' Tituani boito mamolametai, 'Diila otaawa lowatia timongoli lonto utoonu!'

²⁶ Timongoli mamolameta, 'Amiaatia malo lamelo wau longilu woli Tuani, wau ti Tuani malo ngaajali olo to dadaa-lalaalo lokota lamiaatia!'

²⁷ Boti Tuani boito mamoloíya poli, 'Diila otaawa lowatia timongoli lonto utoonu. Pohinggi maó monteea, timongoli tahipo hutua u moleeto!'

²⁸ Tou timongoli moóonto olei Abraham, Isihaka wolei Yako wau ngoáamila nabi hiwengahe todelomo Dunia Bohu lo Allahu Taáala, mahumoyongo timongoli wau modutolo sababu timongoli lohihilao polahilio ode bulemengio!

²⁹ Tau-tauwala mamonaó mai monto tiimulu wau otolopa, monto tilayo wau hulialio, wau mamó tiwengahe todelomo Dunia Bohu lo Allahu Taáala.

³⁰ Tutuulio tutu, woluo tapulitio mamowali tabohulio, wau woluo tabohulio mamowali tapulitio."

³¹ Towakutu boitolo, woluo dengolo lota taulo Parisi lonaó mai odeli Isa wau lolóiya, "Diila maó potitola tewe! Naólo ode tambati uwewo, sababu tei Herodes ohilaa momate mateelo maó ole-Mu."

³² Ti Isa lolametaó, "Ponaólo poótaa maó totaa diila ohunalio boito, 'Dulahee botie wau loombu Waú mopolahi rohu u moleeto wau mamó poóluli taa mongongoto, bo todulahee otolulio, Waú mamopoó lapato kalajaa-Ú.'

³³ Openu odito Waú mamusi mopotolonga mola lo nonaó-Ú todulahee botie, loombu wau loombu ngonu, sababu diila mopiohu nabi ngota

pateelio mate-mateelo maó to bulemengo Yerusalemu.

³⁴ Yerusalemu, Yerusalemu! Mongo nabi hepilatemu yila-yilateelo maó! Motiidu tamailao mai lo Allahu Taáala hepilaímu lobotu tunggula yilate! Mapoó ngoolo Waú ohilaa moloópu tuango lipumu odelo tiilo lomaluó modaha mongo walaío towalungo polipio, bo yió diila mohuto!

³⁵ Sababu uito Allahu Taáala diilalo wolemu. Ototai maó, tumula maó botia yió diilalo moóonto ola-Ú, tunggula yió moloíya, 'Mabala-balakatilo Tio tadungga-dungga mai to tanggulo Eeya.'

14 ¹ Todulahu Saabati tuwau ti Isa lonaó lolamelo tobele ngotaalio lo Parisi taó tanggulo. Teto tau-tauwalo helo poótuoto li Isa loú motombipidu.

² Yi malonaó mai odeli Isa ngotaalio tamo ngongoto ombongo momatango u oáatio wau uluúlio himata-matanga.

³ Tulusi ti Isa lohintu maó to guguu-ruwaalo agama wau tau-tauwalo Parisi tawoluo teto, "Moduduó wuúdu lo agamanto, tingga mowali ito mopoóluli taa mongongoto todulahu Saabati meaalo diila?"

⁴ Guguu-lawaalo agama wau tau-tauwalo Parisi boito bo wambaó lotipoóyo. Tulusi ti Isa lotiangai tau boito wau lopoóluli olio, lapataó lopoáhu olio lonaó.

⁵ Lapataó uito ti Isa lotahuda maó totau-tauwalo, "Humayaalio ngotaalio limongoli owalaó ngota meaalo sapi tuwau ulodehu ode delomo ali todulahu Saabati, wolo diila huáa bantangalo ode bulemengio walaó meaalo sapi boito tou boitolo?"

⁶ Diaaluo penu boli ngotaa maó taloo tameto li Isa tomimbihu suáli boito.

⁷ Ti Isa loóonto maó woluo tahe tiloduo tahi polulaoto tataa-mbatiyalo u mopiohu daá. Sababu uito Tio malongohi pangaajali odie olimongolio ngoáamila.

⁸ "Wonu bolo timongoli toduwolio ode potihungu lonika, diila maó potihuloáa tokadela uhulu-hulumati. Sababu diila otaawa bolo woluo ngotaalio wewo talebe polohuna daá wolemu matilo duwolio olo,

⁹ tilinggula taa ohuúwo lobebe tamaa loloduo olimongoli duulota boito, wolo pakusa monaó mai ode olemu wau moloíya, 'Maáapu, tambati botie mapilohetu ode tamu boito.' Yi wolo

woolito daá yíó bolo pakusa motihuloáa totambati to dibalaka daá.

¹⁰Sababu uito, wonu timongoli toduwolio, polulaotolo tambati u to dibalaka daá, alihu taa ohuúwo lobele mamonaó mai ode olemu wau moloíya, 'Tamani, toduwolo motihuloáa totambati ulebe mopiohe.' Lou odito timongoli hilulumatilio totalu lo ngoáamila tatiloduo uwewo.

¹¹Sababu timíidu tamopolaió lobatanga mapo dupapaalio, bo tamoti dupapa lobatanga mapolaiólio."

¹²Tulusi tahuda maó li Isa totaa ohuúwo lobele, "Wonu bolo yíó moloduo tau ode potihunggu molamela dulahu meaalo melamelo hui, diila maó poloduo tamani meaalo wutato, meaalo mongo ilaato, meaalo tiheedumu takaya. Sababu de timongolio tamaa moloduo olemu olo, wau lou odito yíó mololimo pahala to huhutuumu.

¹³Oditolio, wonu bolo yíó mohutu potihunggu, toduwaalo taa mosikini, taa o aibu, taa didu mowali monaó, taapitoó.

¹⁴Yíó mabalakatia-Lio mai, sababu tau-tauwalo boito diila tamoó baalasi opopiohumu. Opopiohumu mawohia mai

pahala lo Allahu Taáala toú tau-tauwalo tamopiohu muli potumulo-Lio mai monto opopate.

¹⁵Toú tala ngota talo lamelo peé-peéenta teto loódungohu tahuda li Isa, tio lolóíya, "Paéeda daá taa umaa molamelo peé-peéenta wolo Allahu Taáala wonu Tio meidungga odelo Olongia!"

¹⁶Boti Isa lotahuda maó ode tau boito, "Towakutu tuwau woluo ngotaalio talohutu potihungu uleidaá wau loloduo taa dadaata.

¹⁷Toú mawakutuulio u molumulo potihunggu, tau boito lopoáhu tamoomayawa olio lonaó ode tahe tiloduo wau lolóíya, 'Toduwolo monaó mai, ngoáamilalo mahidapata!'

¹⁸Bo timongolio ngoáamila, ngota-ngota mahi pohilea maápu. Tabohulio lolóíya maó ode tamoomayawa boito, 'Watia boheli lotali maó huta ngopita wau palalu mota palakisa lowatia. Maápuwa mai watia.'

¹⁹Tawewo lolóíya, 'Watia boheli lotali sapi limo lo panggalo, wau ohilaa yimontalalo sasaa-piyaalo boito. Maápuwa mai watia.'

²⁰ Tawewo poli loloíya, 'Watia boheli lonika maó, sababu uito watia diila moónaó mai.'

²¹ Tamoomayawa boito lohualingo wau lopoótaa suáli boito odeli tuanilio. Tituani boito maloingo daá wau loloíya maó to tamoomayawa olio. 'Huáa ponaólo ode dadaa-lalaalo daá wau huhuu-lupilowalo to kota. Tianga mai taa mosikini, taa o aibu, taapitoó wau taa didu mowali monaó.'

²² Lapataó tamoomayawa boito loloíya maó, 'Tuani, palenta li Tuani mapilo ponaó, bo tambati donggo dadaata.'

²³ Tulusi tituani boito loloíya, 'Ponaólo mota ode dadaa-lalaalo daá wau huhuu-lupilowalo to bulemengo kota, wau wuntuli maó tau-tauwalo monaó mai, alihu beleú mopolu.

²⁴ Poótoloma maó! Diaaluo penu boli ngota monto tahe tiloduo tamaa tiloduo boito mamooálaasa uáalo potihunggu laatia botie!'"

²⁵ Dadaata tau loduduó lonaó woli Isa. Ti Isa maloili wau lotahuda mao ode limongolio,

²⁶ "Wonu taa monaó mai ode ola-Ú, bo lebe motoliángo oliilolio, oliyamolio,

dilelio bua mongo walaío, mongo wutatio, tumbaó batangalio lohihilao, tio diila mowali muri-Ú.

²⁷Taa u diila mohuto momota salipulio wau moduduó ola-Ú, diila mowali muri-Ú.

²⁸Wonu ngotaalio limongoli motohilaa momongu monala tuwau, tantu tio mamotihuloó molekenipo onggosilio alihu otaawalio wonu doilio moótuheto mopoó lapato monala boito meaalo diila.

²⁹Sababu wonu moílaalo mai tio diila mowali mopoó lapato uito, lebe-lebe pomaó pandasilio mapilohutu, yi ngoáamila tau u moóonto kalaja boito mamohanti olio.

³⁰Timongolio mamoloíya, 'Wii, tau botie momongu, bo diila mowali mopoó lapato!'

³¹Wonu onlongia ngota taópajule mopulolihi lota motohilaa mopaatea wolo onlongia wewo taópajule dulo pulolihi lota, tantu onlongia boito mamotihuloó motimbangipo meimulo wolo tio moó tahangi moluwali musulio boito.

³²Wonu otaawalio u tio diila molotolo, matantu toú musulio boito donggo molamingo, tio mamolao utolialio motaa mohile modaamea."

³³ Pulitio maó ti Isa lotahuda, "Odito olo woli mongoli. Diaaluo penu boli ngotaa maó limongoli mowali muri-Ú, wonu tio diila mopobake totoonulalo u hitua-tuawua."

³⁴ "Watingo boito mopiohu, bo wonu diilalo olamita tingga mowali muli poó panggelolo?"

³⁵ Diilalo ohunalio, mopio ode halabolu meaalo ode puupuki. Oditolio tapilaalo maó wambaó. Wonu obulonga, podungohulo!"

15 ¹ Todulahee tuwau, dadaata tahi potagia beya wau tau-tauwalo tahe anggapuolio diila mopiohu lotuango lipu, mai lodungohe li Isa.

² Tau-tauwalo Parisi wau guguu-ruwaalo agama mahibiihe. Timongolio loloíya, "Wii, tau botie lololimo tau-tauwalo tadiila mopiohu wau tumbaó lolamela woli mongolio!"

³ Masababu uito ti Isa lohungguli maó ode limongolio pohumaya botie.

⁴ "Humayaalo maó ngotaalio limongoli ohimba ngohetuto lapataó tio iloolia tuwau -- tingga wolo umaa pohutuolio? Matantu tio mololaa maó himba u tio lopulaa tio boito tohuta luasi u pilobutua

lohuóyoto, wau mota mololohe u mailooli boito tunggula motapu.

⁵Wau wonu muli motapulio mai himba boito, tio mameengahe daá tilinggula himba boito mapotaalio to binggungio,

⁶tulusi deloolio mohualingo. Lapataó tio motiango mongo tamani wau mongo tiheedio, wau moloíya maó, 'Dulo ito motiwengahu. Himbaú uilooli maluli lotapuú mai!'

⁷Naa, oditolo olo tosologa woluo wengahe ulebe udaá totaa ngota odusa molilihu, wolo taa tio lopulaa tio lota tamaa lopiohe wau diila palalu molilihu."

⁸"Meaalo humayaalo maó taabua ngota odoi mopulo pita doi talaá, tulusi iloolia ngopita -- tingga wolo umaa pohutuolio? Tio mamó podeito tohe wau mongaáto belelio wau mololohe penu boli deútoonu tunggula motapulio doi boito.

⁹Toú motapulio mai doi boito, tio motianga mongo tamanilio wau mongo tiheedio, tulusi moloíya maó, 'Waú sanangi daá maluli loódungga doiú uilooli. Dulo ito motiwengahu!'

¹⁰Odito olo malaíkati lo Allahu Taáala meengahu wonu woluo ngotaalio

tamoleeto molilihu monto duduusaalio.
Pomalacayalo!"

¹¹ Ti Isa luli lotahuda maó, "Woluo tiyamo ngota owalaó mongo lolaí duulota.

¹² Tawali-yali loloíya maó olio, 'Paapa, wohia mai ode laatia masaatia botie tayadu lowatia monto okokayanto. Oditolio tiyamolio malo layadeó okokayalio boito towolota lomongo walaío.'

¹³ Ngoolohui mola lapatio maó walaío tawali-yali boito malo potali tayadio, tulusi lonaó odelipu tuwau u molamingo. Mola teto tio malo poloyali doilio boito lou tumutumulo bo hemo tisa-tisanangi.

¹⁴ Tou doilio malo pulito ngoáamila, lipu boito ilodungga lo polobiti daá, tilinggula tio masilikisa.

¹⁵ Lapataó tio malonaó mota lokalaja to ngotaalio lotuango lipu teto, tamaa lopoáhu olio ode halabolulio u lodaha boilio.

¹⁶ Malo odito polaangio tilinggula tio ohilaa molamela uáalo lo bobooiyaalo boito. Eleponu tio malo odito polaangio, diaaluo maó penu boli ngota tamopo tamela olio.

¹⁷ Pulitio maó tio lotota mai loútau wau lolóiya, 'Tau-tauwalo tahipo kalajawa toliyamaú o uáalo dadaata daá, wau waú tewe ngopeé yilate lopolaango!

¹⁸ Waú mamó monggato wau monaó odeliyamaú, wau molóiya olio: Paapa watia maílodusa to Allahu Taáala wau toli Paapa.

¹⁹ Diilalo paatuti watia tanggulalo walái Paapa. Anggapualo maó watia ngotaalio tahemo kalaja toli Paapa.'

²⁰ Yi lomonggatolo tio lohualinga odeli paapalio. Donggo molamingo monto bele, tio maíloontonga lipaapalio. Lou lodehu daá hilaa lipaapalio tilumeteá mota lodunggayá wolio, tulusi longoóde wau lodiilo olio.

²¹ 'Paapa,' loíya maó lowalaó boito, 'watia maílodusa to Allahu Taáala wau toli Paapa. Diilalo paatuti watia tanggulalo walái Paapa.'

²² Boti paapalio malo tiangai tahi pomayalio wau lolóiya, 'Aliheó! Hamaa mai boó u mopiohe daá, wau popakea maó olio. Popohulia maó huálimo to tingongoa lo uluúlio, wau sapatu to oáatio.

²³ Lapataó uito podedeái sapi kikiió u molingohu wau olota maó. Ito mamolamela wau motiwengahu.

²⁴ Sababu walaúuú botie mailate, masaatia luli tilumumulai; tio mailooli masaatia luli lotapu mai.' Tulusi timongolio malohutu potihunggu.

²⁵ Toú boito, walaó tamohuhula donggo to halabolu. Toú tio malo hualingai wau malembidu bele, tio maloó dungohe muusiki wau tahi pongelunga.

²⁶ Tio malo tiango tala ngota lo tahi pomayalio, tulusi lohintu maó, 'Wolo u malowali tobele botie?'

²⁷ Tamoomayawa boito lolametaó, 'Tawali-yali li Tuani malo hualingai! Wau tiyamo li Tuani maleí olotaó sapi u molingohu, sababu maluli lotapulio mai walaío todelomo owowoluwoa uloáahu!'

²⁸ Walaío tamohuhula boito maloingo daá tilinggula didu lohuto tio tilumuwoto ode delomo bele. Tulusi tipaapalio yilumualai wau lomaluto olio tilumuwoto.

²⁹ Bo tio loloíya maó, 'Ilotaa-taunuwalio mola hiheolio watia helo kalaja tióotutua toli Paapa. Diipo peéenta maó watia helo buutola topalenta li Paapa. Wau wolo u mailohi li Paapa olaatia? Openu bo batade tuwau diipo peéenta maó yilohi mai li Paapa olaatia u mohutu potihunggu wolo mongo sahabati lowatia!

³⁰Walaï Paapa boito malo poópulita okokaya li Paapa wolo mongobua suntali, bo odito tio lohualingai, pilongolota li Paapa walaó sapi u molingohu olio!

³¹'Walaúuuú,' tametaó li Paapalio, 'yió laito wolaú tewe. Ngoáamila hakuuú hakuumu olo.

³²Bo ito wajibu mohutu potihunggu wau motiwengahu, sababu wutatumu tawali–yali boito mailate, bo botia luli tilumumulai; tio mailooli, bo botia luli lotapu mai."

16 ¹Ti Isa lotahuda maó to tahiduduá o–Lio, "Woluo taakaya ngota. Tio opogawee ngota tamotota mongulusi doi u hemo ngulusi okokayalio. Taakaya boito lololimo poótaa deú pogaweelio boito malo poloyali doilio.

²Oditolio matiliyangio mai pogawee tahe mongulusi doilio boito wau lolóïya, 'Wolo utie umaïlo dungoheú tomimbihu olemu? Masaatia, podulohe mai olaú wolo wimu–wimumuto tomimbihu kalajamu hemo ngulusi okokayaú. Yió madiilalo mowali pogawee mongulusi doiú.'

³Yi pogawee boito mahemo mikilangi mola, 'Mawolo u pohutuwoú botia?

Tituaniú mamopo huheli olaú. Momati waú diila molotolo; mohile-hile waú moolito.

⁴Waú o aakali; wonu waú mailinggilio, waú musu otamani dadaata tamohuto mololimo olaú tobele limongolio!

⁵Oditolio pogawee boito malo tiangai timiídu taa obiloli toli tuanilio. To tabohulio, tio loloíya maó, 'Ngoolo bilolimu toli tuaniú?'

⁶Tau boito lolametaó, 'Ngohetuto bolinggo yinulo jaitun?' Pogawee boito loloíya maó olio, 'Utie tuladu lo bilolimu. Huloóolo wau aliheó tuladelo maó: limo lopulu.'

⁷Lapataó tio loloíya maó totaa oluolio, 'Wau Wutato, ngoolo biloli lowutato?' Tau boito lolametaó, 'Ngolihi lokado pale.' Pogawee boito loloíya olio, 'Utie tuladu lobilolimu. Tuladelo maó walu lohetuto.'

⁸Yi tituani lo pogawee tamotota mengulusi doi tadiila juujulu boito helomuji pogaweelio boito sababu huhutuulio u motota boito, sababu tau-tauwala lodunia botie lebe motota mongaatulu ulusani limongolio wolo tau-tauwala tahitumula todelomo u mobaango."

⁹ Lapataó ti Isa luli lotahuda, tahuda-Lio maó, "Dungohilo! Pomakea maó okokaya lodunia botie u moótapu tamani, alihu wonu okokaya lodunia botie madiilalo ohalaga, timongoli matolimoolio totambati biluloá u ohio-hiheolo maó.

¹⁰ Taa u mowali palacayalo to susuu-aliyaalo ukikiió mowali palacayalo olo to susuu-aliyaalo uleidaá. Bo taadiila mowali palacayalo to susuu-aliyaalo ukikiió, diila mowali olo palacayalo to susuu-aliyaalo uleidaá.

¹¹ Oditolio, wonu tomimbihu okokaya lodunia botie timongoli madiilalo mowali palacayalo, tatoonu tamohuto mopo palacaya maó olemu okokaya lo lohani?

¹² Wau wonu tomimbihu balangi u mililikiki lotaa wewo, timongoli ilobukuti diila mowali palacayalo, tatoonu tamohuto mongohi olimongoli wolo umowali haku limongoli?

¹³ Diaaluo maó penu bo ngotaa mowali mokalaja ode tuani duulota; sababu tio malebe motoliángo tangota wolo tawewo, meaalo tio malebe tatapu wau molotolo hilao toli tuani ngota woli tuani wewo. Odito olo wolimongoli. Timongoli diila

mowali mokalaja ode Allahu Taáala wau ode halata upango olo."

¹⁴Tau-tauwalo Parisi loódungohu ngoáamila upilo tahuda li Isa. Tulusi bo héíiya limongolio Tio, sababu timongolio motohilaa doi.

¹⁵Boti Isa lotahuda maó olimongolio, "Timongolilo taa u totalu lotaa wewo oontonga otutu, bo otaawa lo Allahu Taáala todelomo tuango hilaamu. Sababu wolo u heánggapuo lomanusia lailaió, oontonga dupadupapa lo Allahu Taáala.

¹⁶Butoó uilohi mai lei Musa wau pongaajali lomongo nabi debo pohupohutu demola tomaasa lei Yahya Tamopolihua. Anggadu towakutu boito Habari Mopiohu tomimbihu woloolo mola Allahu Taáala momalenta odelo olongia pilo habarilio mololaalaita. Wau tau hipo makusawa lobatanga u mowali pongawaá umati lo Allahu Taáala.

¹⁷Bo lebe gambangi duólo hulungo wau dunia mooli, wolo hulupu tuwau todelomo Butoó lo Allahu Taáala mowali diila pohupohutu.

¹⁸Tatoonu tamotolaki dilelio bua, lapataó monika wolo taabua wewo, tau boito

lojina. Wau taa u monika wolo taabua tamaa tilalakilio, tio olo lojina."

¹⁹"Woluo taakaya ngota. Pakeyangilio himahalea, wau tutumulio ngoáamilalo dadaata timiídu dulahe.

²⁰Totalu lohuhebu belelio pilopo huloío ngotaalio tamosikini tanggulio Lajarus. Wawaío polupolu lokukudu onana mohutodu.

²¹Tio ohilaa molamelo mumuío loú aalo u loduduulahu lonto meja lotaakaya boito. Apula tumbaó malonaó mai lodelita kukudio onana mohutodu.

²²Taa mosikini boito lapatio maó yilate tulusi dilelo malaíkati ode tambati hulu-hulumati totili lei Abraham tosologa. Taakaya boito yilate olo wau yilobungio.

²³Todunia lotailate tio sikisa daá. Wau touú tio lomilohe lonteeto mola ode yitaato, tio maloóonto olei Abraham totambati molamingo wau tei Lajarus totili lei Abraham.

²⁴'Paaá Abraham!' wuwaatió lotaakaya boito. 'Toliánga mai watia. Ahuli mai tei Lajarus mopolomo lo uluúlio todelomo taluhu tulusi mai mopobata maó dila lowatia. Watia sikisa daá todelomo tulu botie!'

²⁵ Bo tei Abraham lolameto, 'Eelai maó walaúuú: ngotupa lo tutumulumu yió maloótapu ngoáamila u hipiiöhe, hiambola tei Lajarus loótapu u hileeleta. Masaatia tio sanangi teea, wau yió sikisa.

²⁶ Uwewolio maó leeto, towolotamu wolami mapilo hutualio liito leidaá tuwau, alihu tamonteea diila mowali odito mola, wau tamola monteeto diila mowali odia mai!

²⁷ 'Wonu odito, Paaá,' loíya lotaakaya boito, 'watia tióotutua mohile ti Paaá molao olei Lajarus ode bele liyamo lowatia.

²⁸ Woluo limo lota wutato lowatia mota teto. Ahuli maó tei Lajarus mopoéela olimongolio, alihu timongolio diila bolo modehu ode tambati usikisa botie.'

²⁹ Tei Abraham lolameto, 'Timongolio maó kikii-tabiyaalo lei Musa wau kitabi lomongo nabi! Huliilo maó timongolio moduduó wolo u tulatulade todelomo kikii-tabiyaalo boito!'

³⁰ Bo taakaya boito lolameto, 'Uito diila motuuheta, Paaá Abraham. Bo wonu woluo taamate muli tumumulai wau monaó mai ode limongolio, timongolio mamolilihu monto duduu-sawaalo limongolio.'

³¹ Bo tei Abraham lolóíya, 'Wonu timongolio diila momandungi palenta lei Musa wau mongo nabi, matantulo maó timongolio diila tapalacaya olo, openu boli woluo taamate tamuli tumumulai.'"

17 ¹ Ti Isa lotahuda maó to tahiduduá o-Lio, "Suáli umoó sababu tau mohutu dusa tantulo maó debo woluo. Bo matopotala taa u moó sababu maó!

² Lebe mopiohu wonu botu pohilingalo potihutolo to buloólio, tulusi tio pomahulolo ode delomo deheto loú tio mamooó sababu tala ngota lotau-tauwalo tabiasa botie mohutu dusa.

³ Sababu uito, poódahailo! Wonu wutatumu odusa, dinia maó tio. Wonu tio moleée, ambungua maó tio.

⁴ Wonu tio odusa to olemu poóopitu ngohui wau timiídu monaó mai ode olemu wau molóíya, 'Watia mohile maáapu,' ambungua maó tio."

⁵ Mongo rasulu malo loíya odeli Isa Eeya, "Yaa Eeya, poólotola mai iimani lomongo watotia."

⁶ Eeya lolametaó, "Wonu timongoli o iimani debo odelo udaá bili losawi, timongoli mowali molóíya ode bungo lo ayu mulubei botie, 'Pobunggatolo

yió wau meilodungolo mola todelomo dehetó,' tantulo maó bungo lo ayu botie mamoduduó palentamu."

⁷"Humayaalio ngotaalio limongoli owato u hemomadeó to halabolu meaalo hemo himbala himba. Wonu bolo wato boito mohualingai, wolo tio mamoloíya olio, 'Dulo aliheó molamelo'?

⁸Tantulo maó diila! Bolíio maó tio mamoloíya olio, 'Pohetua maó uáaloú. Pomakeyalo boó ubelesi wau wimai maó waú donggo hemolamelo wau hemongilu; lapataó uito yió mamowali molamelo.'

⁹Wato boito diila palalu pujiolo sababu malo dungohe palenta lituanilio, diila odito?

¹⁰Odito olo timongoli. Wonu timongoli malohutu ngoáamila upilo malentalio mai olimongoli, loíyawa maó, 'Ami bo wato biaasa; ami bo wambaó mohutu uwajibu olami'."

¹¹To nonaó ode Yerusalemu, ti Isa lolibaya to sipatana madala lo Samaria wau Galilea.

¹²Toú tilumuwoto to kambungu tuwau, Tio nilaó mai lo tamopulu lota taóngongoto lo alipo u moótihela hapato. Timongolio hitihula toú molamingo,

¹³ wau hiwaatiá, "Isa! Tuani! Ponua mai mongowatotia!"

¹⁴ Toú ti Isa loóonto olimongolio, Tio lotahuda maó, "Ponaólo ode mongo iimamu, pohilea maó olimongolio momalakisa wawaúmu." Toú timongolio donggo hinaówa, mailooli ngongoti mongolio.

¹⁵ Toú ngotaalio limongolio loólaasa maó deú tio maloluli, tio malo hualingo sambela wenga-wengahe daá helomuji Allahu Taáala.

¹⁶ Tulusi totalu li Isa tio losujudu wau lolapali oduólo o-Lio. Tau boito ngotaalio lo Samaria.

¹⁷ Lapataó ti Isa lotahuda maó, "Diila mopulu lota tamaa piloóluli? Matóútoonu taa tiolota?"

¹⁸ Yilongola bo taa deli botie talo hualingai lolapali oduólo to Allahu Taáala?"

¹⁹ Lapataó ti Isa lotahuda maó ode tau boito, "Pobongulo, wau naóolo. Sababu yió palacaya ola-Ú, yió maloluli."

²⁰ Dengolo lota taulo Parisi lohintu toli Isa omolua Allahu Taáala meidungga mai u momalenta. Ti Isa lolametaó, "Pamalenta lo Allahu Taáala diila tumulalio wolo

tutuuotalo umowali oontonga lotau,
tilinggula tau mowali moloíya,

²¹ 'Dulo, bilohi, botie Tio!' meaalo, 'Teto mola Tio!' Sababu Allahu Taáala malo lumulo lomalanta tohuungi mongoli."

²² Lapataó uito ti Isa lotahuda to tahiduduá o-Lio, "Mamei dungga wakutuulio timongoli ohilaa momilohe dulahe tuwau monto duduu-laheyaala lo Walaó Manusia, bo timongoli diila mowali moóonto maó.

²³ De tau mamoloíya olemu, 'Bilohi, teto!' meaalo 'Bilohi, teea!' Bo timongoli diila polualaó u mololohe olio.

²⁴ Odelo woloolo molo ilato pukapukaó tohulungo, wau motinelo monto huudio ode huudio, odito olo de owowoluwoa lo Walaó Manusia todulahio.

²⁵ Bo bohu-bohulio Tio musi modutolopo dadaata wau diila tolimoo lotau-tauwalo tojamani botie.

²⁶ Todulahee lo Walaó Manusia de poílaalolio, owowoluwoalio odelo tojamani li Nabi Noho tou boito.

²⁷ Tau molamelo mongilu, wau monika; oditolo mola mololaalaaita tunggula ti Nabi Noho tilumuwoto ode kapali wau

taluhe daá leidungga tunggula loósababu tau-tauwala boito lopunungo ngoámila.

²⁸Wau olo debo odelo tojamani lei Lot. Tau-tauwalo hipo lamela hipo ngiluma, hipopo taalia, hipo tolopania halabolu wau pangimba wau hipo mongula bele.

²⁹Bo toú tei Lot yilumualai lonto Sodom, todulahu boito tulu wau walilangi lotuhutai lonto hulungo wau lopobinasa olimongolio ngoámila.

³⁰Odieelo mola owowoluwoalio de todulahee lo Walaó Manusia poílaalolio mai.

³¹Todulahee boito taa donggo woluo toitaato watopo belelio diila maó polaahu u mohama babaa-langilio todelomo bele. Odito olo taa donggo to halabolu diila maó pohualingo ode belelio.

³²Eelai mola wolo u malowali todile lei Lot!

³³Taa motolopani mopoáahu tutumulio, maóolia lo tutumulio. Bo taóolia lo tutumulio mapoáahuwolo.

³⁴Pomalacayalo: Tohui boito, duulota tadonggo tuutuluhu toheetule tuwau, ngota madeloolo; wau ngota tolaalio maó poli.

³⁵ Mongobua duulota donggo hemo hilinga pale, ngota madeloolo wau ngota tolaalio maó poli.

³⁶ [Taduulota donggo hemokalaja to halabolu, ngota madeloolo, wau ngota tolaalio maó poli]"

³⁷ Tahiduduá li Isa malohintu maó, "Mamowali toutoonuu uito Eeya?" Ti Isa lolametaó, "Toutoonuu omilate, teto obulungi mongongala milate."

18 ¹ Lapataó uito ti Isa lohungguli maó pohumaya tuwau u longajali to tahiduduá o–Lio alihu timongolio laito moduá wau diila maó mopulito halaapani.

² Ti Isa lotahuda maó, "Tokota tuwau woluo hakimu ngota tadiila moohe to Allahu Taáala, wau diila momandungi openu boli olita.

³ Tokota boito woluo olo janda ngota tamaa poó–poódaata helo taalua woli hakimu boito meí podulua to palakalalio. 'Tulungi mai watia motaalua wolo musu lowatia,' loíya lojanda boito.

⁴ Dengolo mola hiheolio tihakimu boito diila lohuto lotulungi janda boito. Bo pulitio maó tihakimu boito helo mikiilangi mola, 'Eleponu waú diila moohe to Allahu

Taáala wau diila momandungi penu boli olita,

⁵ bo sababu janda botie laito bo momuyu olaú, lebe mopiohu waú mamó podulua palakalalio. Wonu diila, tio mamolo laalaaita monaó mai wau mopoósuusa olaú'."

⁶ Tulusi Eeya lotahuda maó, "Poótuota maó wolo uiloíya lihakimu tadiila adili boito!

⁷ Naa, wolo Allahu Taáala diila tamo podulua palakala lo umati-Lio lohihilao tahi pongibode o-Lio hui wau dulahu? Wolo Tio mamopo lohudu lowakutu mai motulungi olimongolio?

⁸ Pomalacayalo: Tio mahuáa mopodulua palakala limongolio! Bo wonu Walaó Manusia meidungga mai, wolo donggo odungga taa palacaya o-Lio todunia botie?"

⁹ Ti Isa lohungguli maó olo pohumaya botie u pilomatuju-Lio ode tahe monganggapu dupadupapa taawewo, bo yakini deú batangalio lohihilao mopiohu.

¹⁰ Tahuda maó li Isa, "Woluo taduulota lonaó ode Bele lo Eeya mota loduá. Ngotaalio taulo Parisi, tawewolio ngotaalio tamootagia beya.

¹¹ Taulo Parisi boito tilimihula lotiwiwi wau Ioduá, 'Oo Allahu Taáala, wototia molapali oduólo to Allahu Taáala, sababu watotia diila debo odelo taawewo, talanggamu, hale diila motulidu meaalo hemojina. Watotia mosukuru sababu watotia diila debo odelo tamootagia beya boito.

¹² Watotia hemo puasa poóluo ngodiminggu, wau watotia hemo podewo to Eeya ngotayade mopulu monto ngoáamila tilapulo watotia.'

¹³ Bo tamootagia beya boito tilimihula tou molamingo wau tumbaó diila buheli lumanggela ode hulungo. Sambela hemoleaapu duhelio tio maloloíya, 'Oo Allahu Taáala, ponua mai watotia, taa odusa botie!'"

¹⁴ "Pomalacayalo," tahuda maó li Isa, "tou malo hualinga ode bele, tamootagia beya boitolo tatilolimo lo Allahu Taáala wau diila taulo Parisi boito. Sababu timíidu tamopolaió batangalio mapo dupapaalio; wau timíidu tamopo dupapa batangalio mapolaiólio."

¹⁵ Woluo tau-tauwalo talodelo mai taúkekeéi odeli Isa alihu Tio moleaapu wau mobalakati olimongolio. Tou

tahiduduá li Isa loóonto maó, timongolio maloingo totau-tauwala boito.

¹⁶ Boti Isa malo tiangai taúkekeeí boito tulusi lotahuda maó to tahiduduá o-Lio. "Hulii maó taúkekeeí boito monaó mai ode ola-Ú! Diila maó dinia timongolio, sababu taa debo odelo utieelo tamowali pongawaá umati lo Allahu Taáala.

¹⁷ Eelai maó! Taa diila motaalua wolo Allahu Taáala debo odelo taúkikiiá ngota, diila mowali pongawaá umati lo Allahu Taáala."

¹⁸ Taúwa ngota lo Yahudi lohintu maó li Isa, "Paaá Guru tamopiohu, watia musi mohutu wolo alihu mowali mololimo tutumulo tutu wau ohiheo-hiheolo maó?"

¹⁹ "Yilongola heloíyamu Waú tamopiohu?" yilintu li Isa olio. "Diaaluo tamopiohu, ngopohia Allahu Taáala wambaó.

²⁰ Maa ilotaawamu ngoáamila palenta lo Allahu Taáala: 'Diila maó pojina, diila maó pomate mateelo maó, diila maó potaó, diila maó posakusi yimbulo, wau hulumatia maó tiilamu wau tiyamamu."

²¹ "Ngoáamila palenta boito madiluduá lowatia toú watia donggo muda mai," tametaó lotau boito.

²² Loódungohe uito, ti Isa lotahuda maó, "Donggo woluo suáli tuwau umusi pohutuwomu: Potaliyalo ngoáamila milikimu, wohia maó doilio totaa mosikini, wau yió mamooótapu halata tosologa. Lapataó ponaólo mai moduduá ola-Ú."

²³ Bo touú tau boito loódungohe uito, tio tilapakulu sababu tio kaya daá.

²⁴ Otaawa li Isa tau boito tilapakulu, sababu uito tio lotahuda maó, "Suukali daá taakaya mowali pongawaá umati lo Allahu Taáala.

²⁵ Lebe gambangi unta tuwau tumuwoto huwango dudetu, wolo taakaya ngota tumuwoto ode Dunia Bohu lo Allahu Taáala."

²⁶ Tau-tauwalo taloó dungohe li Isa lotahuda odito malohintu, "Wonu odito, tatoonu tamowali moáahu?"

²⁷ Tametaó li Isa, "Udiila mowali ode manusia, mamowali ode Allahu Taáala!"

²⁸ Tulusi tei Petrus lolóiya maó, "Bilohilo! Amiaatia malo lolaa maó ungaalaá lamiaatia wau loduduó li Paaá."

²⁹ "Pomalacayalo!" tahuda li Isa. "Taa malo lolaa maó belelio, meaalo dilelio, meaalo wutatio, meaalo tiilo wau tiyamolio

meaalo mongo walaño sababu momaya to Allahu Taáala,

³⁰tau boito mabalasiyalo dadaata daá tomaasa botie, wau tomaasa u mamei dungga mai tio mawohialio tutumulo tutu wau ohiheo-hiheolo maó."

³¹Ti Isa malongambu mopulu wau duulota tahiduduá o-Lio wiwiwiwi, tulusi lotahuda maó, "Dungohi! Ito masaatia dulu-dulunga ode Yerusalemu. Mola teto, ngoáamila u tiluladio lomongo nabi tomimbihu Walaó Manusia, mamotoduo.

³²Tio mawuduolio ode tau-tauwalo tadiila Yahudi, tamamo hente-henteá o-Lio, mohina, wau monula loiyohé o-Lio.

³³Timongolio mamopo sikisa wau momate mateelo maó o-Lio, bo tou dulahee otolulio, Tio mamobongu mai."

³⁴Ngoáamilalo boito diila ilotoneá penu boli ngoídi maó lo tahiduduá li Isa boito. Boli lo tataahe-Lio boito hehuliyo-Lio monto olimongolio. Diila otaawa limongolio Tio helo bisala pasali loolo.

³⁵Tou ti Isa ngopeé meidungga ode Yerikho, ngotaalio tapitoó donggo hulohuloáa hemohile-hile tobiihu dalalo.

³⁶ Toú ilodungohelio taa dadaata boito yilumawodu, tio malohintu, "Owolo?"

³⁷ "Ti Isa, taulo Najaret boito, lawolawodu," loíya maó limongolio ode olio.

³⁸ Yi taapitoó boito malo nguatió, "Isa, walaée Dauda! Ponua mai watotia!"

³⁹ Tau-tauwalo tatotalu, maloingo wau pileí poóyongalio tio. Bo tio lebe loóohuú longuatiá poli, "Walaée Dauda! Ponua mai watotia!"

⁴⁰ Ti Isa malo huheli wau lopoáhu mota tau lodelo mai ode o-Lio taapitoó boito. Toú tio leitungga mai, ti Isa malohintu,

⁴¹ "Wolo u otohilaamu pohutuwo-Ú mai olemu?" "Tuani," tametaó lotaa pitoó boito, "watotia ohilaa moóonto."

⁴² Tulusi ti Isa lotahuda maó, "Wonu odito, pomilohulo! Sababu yió palacaya ola-Ú, yió maloluli."

⁴³ Toú boitolo tio malowali loóonto, tulusi tio malo duduó li Isa sambela hemo lapali oduólo ode Allahu Taáala. Toú taa dadaata boito loóonto maó suáli boito, timongolio ngoáamila mahipo muji-mujia Allahu Taáala.

19¹ Touú ti Isa leitungga mola ode Yerikho, Tio lonaó tulusi loli kota boito.

² Tokota boito woluo taúwa ngota tamootagia beya wau kaya. Tanggulio Jakheus.

³ Tio ohilaa momilohe wonu tatoonu ti Isa boito, bo sababu mailaba daatalio lotau wau tio lohihilao limbo-limbongo, yi tio diila lowali lomilohe li Isa.

⁴ Oditolio, tio matilumeteó lotitimulo wolo tau-tauwalo, tulusi malo miáata ayu ngobungo, alihu moóonto li Isa bolo ngopeée mola lumaode teto.

⁵ Touú ti Isa leitungga mota ode bungo lo ayu boito, Tio yilumanggela mola ode yitaato tulusi lotahuda, "Jakheus, aliheó polaahei! Sababu Waú musi mohepita ode belemu todulahee botie."

⁶ Tei Jakheus ngoínta lolaahi wau malohima li Isa lou wenga-wengahu.

⁷ Ngoáamila taloóonto suáli boito mahibiihe. Timongolio hipoloíyawa, "Wii! Tio lonaó ode bele lotaa diila mopiohu!"

⁸ Lapataó tobelelio, tei Jakheus tilimihulo wau lolóiya maó li Isa, "Eeya, ngotayadu halata lowatotia maposadaka lowatotia ode taa mosikini; wau titaalo tita tamaa

peéenta ilaakalia lowatotia, mamuli bayalia lowatotia poóopato piúwa!"

⁹Tulusi tahuda maó li Isa, "Todulahee botie yió wau ngoáamila ngaalaámu poáahua mai lo Allahu Taáala wau moótoduo tutumulo u bohu, sababu yió olo wali mai lei Abraham.

¹⁰Walaó Manusia leidungga mai u mololohe wau mopoaaahu taa u yilapalo."

¹¹Toú tau donggo hidungohe li Isa hemobisala, Tio malo hungguli maó pohumaya tuwau. Sababu, toú boito Tio membideó lo Yerusalemu, wau helantobu lotau deú Allahu Taáala mahuáa momalenta odelo Olongia todunia.

¹²Ti Isa lotahuda maó, "Woluo tabangusa ngota u lonaó ode lipu molamingo mola hiluwatio lowali olongia, lapataó luli lohualingai.

¹³Toú diipo lomonggato, tio lotiangai tamo pululota tahi pomayalio tulusi longohi maó olimongolio ngota-ngota doi hulawa ngopita. 'Podahangilo wolo doi botie toú waú diaaluo,' loíyaalio maó to limongolio.

¹⁴Bo tuango lipulio boito molonuío. Oditolio, toú tio lomonggato, timongolio malolao mongo utolia mota lolóiya, 'Ami

diila mohuto tau botie mowali olongia lami.'

¹⁵ Bo tabangusa boito piluduió lowali olongia, lapataó luli lohualingai ode lipulio. Huáa tiliangio tamoomayawa olio mai lotaalua wolio, alihu otaawalio ngoolo maó paéeda u malotapu limongolio.

¹⁶ Tamoomayawa bohulio lonaó mai wau lolóiya, 'Tuani, doi hulawa ngopita uilohi li Tuani boito, mapilowali lowatia mopuulo pita.'

¹⁷ 'Mopiohu,' loíya maó lituani boito, 'yió tamoomayawa mopiohu! Sababu todelomo susuu-aliyaalo ukikiió yió mowali palacayalo, waú mamomuduo olemu taókawasa to mopuulo kota.'

¹⁸ Tamoomayawa oluolio lonaó mai wau lolóiya, 'Tuani, doi hulawa ngopita uilohi li Tuani, mapilowali lowatia limo lopita.'

¹⁹ To tamoomayawa boito ti olongia malolóiya, 'yió mamowali taókawasa to limo lokota.'

²⁰ Tamoomayawa wewo lonaó mai wau lolóiya, 'Tuani, botie doi li Tuani; matilahu lowatia toleto.

²¹ Moohe watia toli Tuani; sababu ti Tuani tamoingowa daá. Tituani hemohama wolo udiila haku li Tuani, wau ti Tuani

hemohimoá tilapulo totambati udiila pilomuloa li Tuani.'

²² Olongia boito malo loíya olio, 'Yió tamoomayawa moleeto! Lotuuúde wolo loíyamu lohihilao, waú mamó hukumani olemu. Otaawamu waú tamoingowa daá; waú hemohama wolo udiila hakuuú wau hemo himoá tilapulo totambati udiila pilomulowaú.

²³ Wonu odito yilongola yió diila lopotuoto doi boito ode bangi alihu wonu waú mohualingai waú mamowali mololimo doi boito wolo lentelio?'

²⁴ Lapataó ti olongia boito loloíya maó totau-tauwalo tahitihula teto, 'Hamaa maó doi boito toólio wau wohia maó to tamoomayawa u odoi hulawa mopuulo pita boito.'

²⁵ Bo tau-tauwala boito loloíya, 'Tuani, tio maa omopuulo pita.'

²⁶ Olongia boito lolametaó, 'Eelai maó: tamaa ilowoluo, toólio mawohialio lebe dadaata maó. Bo taadiila ilowoluo hitua-tuawua, wolo u mailoluo toólio mamuli hamaalio monto olio.

²⁷ Wau botia delowalo mai mumuusuuú boito tadiila motohilaa olaú mowali

olongialio. Pateyalo timongolio ngoáamila mate-mateelo maó totaluú!"

²⁸Toú lapataó ti Isa lotahuda maó ngoáamilalo boito Tio lonaó totalu limongolio lotidulungo ode Yerusalemu.

²⁹Toú leidungga mola totili lo Betpage wau Betania to Huludu lo Jaitun, Tio lopoáhu duulota tahiduduá o-Lio lotitimulo.

³⁰"Ponaólo mota ode kambungu u totalu boito," tahuda maó li Isa olimongolio, "Wonu bolo timongoli tumuwoto mola odito, timongoli mamooónto walaó kolodai tuwau u tihutihuto. Kolodai boito diipo peéenta maó tilaéa lotau. Hulua maó kolodai boito wau delowa mai.

³¹Wonu tau mohintu olemu, 'Yilongola timongoli lomuli kolodai boito?' polelea maó, 'Eeya palalu leeto.'

³²Taduulota hiduduá li Isa boito malonaó, wau ilodunggaalio ngoáamilalo tiluhata debo odelo upilo tahuda-Lio.

³³Toú timongolio lomuli walaó kolodai boito, taa ohuúwolio lolóiya maó ode limongolio, "Yilongola hilulia limongoli kolodai boito?"

³⁴Timongolio lolametaó, "Eeya palalu leeto."

³⁵ Tulusi timongolio lodelo walaó kolodai boito odeli Isa. Lapataó timongolio lopo hepideó jumba limongolio towulea lo kolodai boito wau lopotaé li Isa toitaatio.

³⁶ Tou Tio yilumaodeó donggo toitaato kolodai boito, tau-tauwalo helo pohepide jumba limongolio todalalo.

³⁷ Tou ti Isa ngopeé meidungga ode Yerusalemu, todalalo motuhuto to Huludu lo Jaitun, ngoáamila tahiduduá o-Lio u dadaata boito mahiwatiá hemomuji Allahu Taála wau helo lapali sukuru to o-Lio sababu ngoáamila moólinggolabe u masilakusia limongolio.

³⁸ Timongolio malo nguatió, "Mabala-balakatilo Olongia tadungga-dungga mai to tanggulo Eeya! Salaamati tosologa, wau ilopujalo mola Allahu Taála!"

³⁹ Ngoolo lota taulo Parisi towolota lotaa dadaata boito loloíya maó odeli Isa, "Paaá Guru, Peí poóyongilo mola tahiduduá li Paaá."

⁴⁰ Ti Isa lolametaó, "Pomalacayalo! Wonu timongolio motipoóyo, boboo-tuwaalo botie mamonguatió."

⁴¹ Tou ti Isa lebe hemembideó wolo Yerusalemu, wau loóonto mota kota boito, mahiliyonga-Lio kota boito.

⁴² Tahuda-Lio maó, "Atióolo, donggo boli piohio wonu todulahu botie otaawamu wolo u mowali mopotoduo mai polodame! Bo botia yió diila mowali moóonto maó.

⁴³ Yió mamooálaasa maasa tuwau, toútoonu musumu mamohutu popoo-mubulaalo to palitumu; timongolio mamomala olemu wau mohuntula olemu monto totoonulalo tutulio.

⁴⁴ Timongolio mamoo ngantulu olemu wolo ngoáamila tuango lipumu; wau diaaluo penu boli botu ngobotu mapoluli limongolio meitolaa, susuusungi to tambatilio, sababu yió diila lopoótuoto saaáti toú Allahu Taáala leidungga mai mopoáahu olemu!"

⁴⁵ Ti Isa tilumuwoto ode Bele lo Eeya wau lolumulo helo polahi to tahipo dahangia teto.

⁴⁶ "Todelomo Kitabi," Tahuda-Lio maó olimongolio, "tulatuladu odie; Allahu Taáala lotahuda, 'Bele-Ú mamowali tambati poduáalo.' Bo timongoli lopowali beelea lopohehu!"

⁴⁷ Timiídu dulahu ti Isa hemo ngaajali to Bele lo Eeya. Mongo iimamu tauwa, wau guguu-ruwaalo agama wolo mongo taúwa

lo Yahudi, ohilaa momate–mateelo maó o–Lio,

⁴⁸ bo diila loótapu dalalo u mohutu maó suáli boito, sababu taa ngoáamila wambaó hemo dungohe laito o–Lio, wau iloáanga to tataahe–Lio.

20 ¹ Todulahee tuwau, ti Isa donggo hemo ngaajali wau hemo pohabari Habari Mopiohu monto Allahu Taáala ode tau–tauwala todelomo Bele lo Eeya. Mongo iimamu tauwa, guguu–ruwaalo agama wolo mongo taúwa lo Yahudi, lonaó mai,

² wau loloiya li Isa, "Nte polelea mai olami dutadutaá tolo yió helohutu ngoáamilalo botie? Tatoonu talongohi haku boito to ole–Mu?"

³ Ti Isa lolametaó, "Waú ohilaa mohintu. Nte polelea mai ola–Ú,

⁴ Tei Yahya helo polihu wolo haku lo tatoonu? Allahu Taáala meaalo manusia?"

⁵ Yi timongolio malo lumulo lodulohupa, "Wonu maloiyanto 'Wolo haku lo Allahu Taáala,' Tio mamoloiya, 'Wonu odito, yilongola timongoli diila palacaya o–Lio?'

⁶ Bo wonu ito moloiya, 'Wolo haku lomanusia,' taa ngoáamila mamomaí olanto wolo botu, sababu timongolio palacaya deú tei Yahya nabi ngota."

⁷ Oditolio timongolio lolametaó, "Diila otaawa lami."

⁸ Yi ti Isa lotahuda maó ode limongolio, "Wonu odito Waú olo diila tamolele mai olemu wolo haku lotatoonu Waú malohutu ngoáamilalo botie."

⁹ Ti Isa lohungguli maó totau-tauwalo boito, pohumaya odie mola, "Woluo ngotaalio talo pomulo angguru to ilengi ngopita. Pilopo seuwalio ilengi boito ode tangolo lota tahi pokalajawa, tulusi lomonggato odelipu uwewo wau mola lotibiluloá lohiheo teto.

¹⁰ Touú mawakutuulio molipu hungo lo angguru, taa ohuúwo lo ilengi boito lolao tamoomayawa olio ode tahi pokalajawa ilengi boito mola mololimo tayadio. Bo tahi pokalajawa ilengi boito lomate tamoomayawa boito wau huáa pileí walinga limongolio loú laulau lo uluú.

¹¹ Yi taa ohuúwo lo ilengi boito luli lolao tamoomayawa wewo; bo debo pilate mai limongolio olo tamoomayawa boito boli hilinaalio lo tahi pokalajawa boito tulusi pileí walingalio wolo laulau lo uluú.

¹² Lapataó taa ohuúwo lo ilengi boito lolao mota tamoomayawa otolulio. Bo tamoomayawa boito debo pilatelio olo

lo tahi pokalajawa boito wau pilomahuli mongolio ode bulemengo lo ilengi boito.

¹³ 'Pulitio maó taa ohuúwo lo ilengi boito lolóíya, mawolo umusi pohutuwoú poli? Waú mamolao walaúuuú lohihilao taa otoliánguú. Tantu tio mahulumatio mai limongolio!'

¹⁴ Bo tou tahi pokalajawa ilengi boito loóonto walaó lotaa ohuúwo lo ilengi boito, timongolio malolóíya ngota-timongota, 'Botie tio taáhali lo walisilio. Dulo pateento tio mate-mateelo maó, alihu motapunto walisilio.'

¹⁵ Yi madiledéi mongolio tio ode bulemengo ilengi boito lapataó pilate limongolio yila-yilateelo maó." Lapataó ti Isa lohintu mao, "Naa, wonu taa ohuúwo lo ilengi boito mohualingai, mawolo u pohutuolio to tahi pokalajawa ilengi boito?"

¹⁶ Matantu tio monaó mai wau momate-mateelo maó to tahi pokalajawa ilengi boito, tulusi mongohi ilengi boito to tahi pokalajawa wewo." Loódungohe uito, malolóíya tau-tauwala odeli Isa, "Sama-samaata diila!"

¹⁷ Ti Isa lomiloheó ode limongolio lapataó lotahuda, "Wonu odito, wolo boliilio ayati lo Kitabi botie? 'Botu udiila

ilopomakea pani lo hudungu, malowali botu ulaba-labaalo mopiohu.'

¹⁸ Ngoáamila tamodehu tobotu boito mamóántulu; wau tatoonu taódeehe lobotu boito mamotoyopu mowali peaahuó."

¹⁹ Guguu-ruwaalo agama wau mongo iimamu taúwa motota deú pohumaya boito pilomatuju li Isa ode limongolio. Sababu uito timongolio ohilaa moheúpa o-Lio to saaátilo boito, bo timongolio moohe totaa dadaata.

²⁰ Oditolio timongolio malo lolohe hiangio u mopiohu. Timongolio losoloí totaa u lotihutu odelo taa ihilasi, wau lopoáhu tau-tauwalo boito lohentobu li Isa wolo totoonulalo yiyintu, alihu timongolio mowali mohudu o-Lio to taóhaku molantu wau to okokawasa li gubolonulu.

²¹ Yi tau-tauwala tamaa siloloí boito lolóiya li Isa, "Paaá Guru, otaawa lamiaatia deú ngoáamila uiloíya li Paaá boito otutu. Otaawa lamiaatia olo ti Paaá helo ngaajali loú juujulu tomimbihu kahandaki lo Allahu Taáala ode manusia, sababu ti Paaá diila bo wambaó momilohe tau.

²² Sababu uito nte polelea mai li Paaá olamiaatia, moduduó wuúdu lo agamanto,

wolo mowali momayali beya odeli Kaisali meaalo diila?"

²³ Bo otaawa li Isa siyasati limongolio. Sababu uito tio lotahuda maó,

²⁴ "Nte pobilohe mai ola-Ú doi talaá ngopita. Gambali wau tanggulita utie?" "Kaisali!" tametaó limongolio.

²⁵ "Wonu odito," tahuda li Isa olimongolio, "wohia maó li Kaisali, wolo miliki li Kaisali wau ode Allahu Taáala wolo miliki lo Allahu Taáala."

²⁶ Malo patata totalu lotaa dadaata boito timongolio diila loótapu totala penu boli tuwau maó toli Isa. Timongolio bo wambaó hipoóyonga wau hilinggolabe to totame-Tio boito.

²⁷ Dengolo lota talonto palatei lo Saduki lonaó mai odeli Isa. (Timongolio botie palatei taó huhama deú tamailate diilalo mobongu mai.) Timongolio lohintu li Isa,

²⁸ "Paaá Guru, Tei Musa loluladei butoó botie ode olanto: Wonu talolaí ngota mate wau diila owalaó, yi wutatio musi monika wolo jandalio alihu moótapu mai wali totaa mailate boito.

²⁹ Peéenta woluo tamohutato pitu lota. Tamohuhula lonika, lapataó yilate diila owalaó.

³⁰ Lapataó taóluolio lonika wolo jandalio, bo tio olo yilate wau diila loótapu walaó.

³¹ Suáli u tutuuwauwa lowali olo wolo wutatio taótolulio demola taópitulio.

³² Pulitio maó taabua boito yilate olo.

³³ Todulahu muli pobongula mai lotaa malo punungo, dile lo tatoonu taabua boito? Sababu pitupitu lotaalo malonika wolio."

³⁴ Ti Isa lolametaó, "Tau-tauwalo tahitumula masaatia botie hiponikawa,

³⁵ bo tau-tauwalo tapaatuti u muli potumulolio mai toú malo punungo, wau tumumulo tojamani u mamei dungga, timongolio diila mowali monika.

³⁶ Owowoluwoa limongolio debo odelo malaíkati, wau diila mowali mate. Timongolio yito mongo walaó Allahu Taáala, sababu timongolio maluli bilongulio mai lonto opopate.

³⁷ Tei Musa lohihilao malo poílaalo loú mopatato deú taamate mamuli bongulolio mai. Todelomo tuladio tomimbihu diúto u léiléíta boito tio longunte Eeya odelo 'Allahu Taáala lei Abraham, Allahu Taáala lei Isihaka wau Allahu Taáala lei Yako'.

³⁸ Naa, Allahu Taáala boito diila Allahu Taáala lotaa yilate! Tio Allahu Taáala lotau-

tauwalo tahitumula! Sababu ode Allahu Taáala, ngoáamila tau tumutumulo."

³⁹ Ngoolo lota guru lo agama lolóiya maó, "Totameti Paaá Guru mopiohe daá."

⁴⁰ Sababu uito timongolio diilalo buheli helohintu hitua-tuawua toli Isa.

⁴¹ Ti Isa lohintu maó olimongolio, "Wooloolo mola mowali loíyalo deú Olongia Tamoo-poáhua boito wali mai lei Dauda?"

⁴² Lebe-lebe pomaó tei Dauda lohihilao lolóiya todelomo Jaburu, 'Eeya lotahuda to Eeyaú: Potihuloólo to ambahu olowala-Ú,

⁴³ tunggula Waú mohutu mumuusuu-Mu taáluku ole-Mu.'

⁴⁴ Oditolio wonu tei Dauda longunte Olongia Tamoo-poáhua boito 'Eeya', mawooloolo mola Tio wali mai lei Dauda?"

⁴⁵ Toú tau-tauwala donggo hipo dungohe li Isa hemobisala, Tio lotahuda maó to tahiduduá o-Lio,

⁴⁶ "Poódaha-dahaalo maó to guguu-ruwaalo agama. Timongolio motohilaa mojalena wolo jumba hayahayaó, wau motohilaa méi hulumati to papaa-taliyaalo. Timongolio motohilaa tataa-mbatiyalo u hulu-hulumati todelomo bele potabiaalo wau to popoo-tihungguwalo.

⁴⁷ Timongolio hemohimbulo tomongo janda, wau hemohehu belelio. Wau u modepuheó ololeeti mongolio boito, timongolio hemoduá hayahayaó! Hukumani limongolio de mobuheetai!"

21 ¹ To Bele lo Eeya, ti Isa loóonto tau-tauwalo tahi kaayawa helo luwango doi ode delomo bulua lodewo.

² Iloontonga-Lio olo janda ngota tamosikini daá, loluwango doi tombaha dulopita.

³ Lapataó ti Isa lotahuda maó, "Dungohi: janda botie loluwango lebe dadaata wolo ngoáamila taawewo.

⁴ Sababu timongolio ngoáamila longohi ololebe lohalata limongolio. Bo janda botie, eleponu mosikini tutu, malongohi ngoáamila uwoluo toólio u palaluolio lohihilao u potumulo."

⁵ Woluo tahipo loíyawa tomimbihu woloolo mola piohio Bele lo Eeya dadaiyalo wolo boboo-tuwaalo u mopiohu wau wolo babaa-langiyalo u pilopodewo ode Allahu Taáala. Yi ti Isa lotahuda maó olimongolio,

⁶ "De woluo mai saaátilio, ngoáamila u iloontonga limongoli botie malolo hubuolio; diaaluo maó penu boli botu

ngobotu tewe u meitolaá susuusungi to tambatilio!"

⁷ Timongolio lohintu maó li Isa, "Paaá Guru, omolua suáli boito mamotoduo mai? Wau wolo tuotio deú malei dungga saaátílio suáli boito mamotoduo mai?"

⁸ Ti Isa lotahuda maó, "Poódahailo, diila bolo timongoli o aakalialio. Dadaata taa mamonaó mai loú momake tanggulu-Ú, wau moloíya, 'Waúlo Tio!' wau 'Mawakutuulio.' Bo timongoli diila maó poduduá olimongolio.

⁹ Diila maó oohe olo wonu timongoli modungohe habari tomimbihu lo popaatea wau polo malakala. Ngoáamilalo boito musi motoduwopo mai. Bo uito diila oboliilio deú mawakutuulio kiama."

¹⁰ Lapataó ti Isa malo potolonga mola bisalaa-Lio, tahuda-Lio maó, "Bangusa u tuwau mamopaatea moluwali bangusa uwewo wau lipu tuwau mamoluhu lipu uwewo.

¹¹ Teto teea mamotoduo liluhu daá, polobiti, wau wembolo longongoto. Mamei dungga mai susuu-aliyaalo u moótihela hapato wau dahasati tohulungo.

¹² Bo toú dipolulio mai ngoáamilalo boito motoduo, timongoli mawaúpolio

wau alinayalio. Timongoli mabutoólio to bebee-leyaalo potabiaalo wau potuwotolio ode delomo tutupa. Wau timongoli madedeólio ode talu lomongo olongia wau tahi okawasawa sababu timongoli muri-Ú.

¹³ Uitolo hiyangio olimongoli u mopohabari Habari Mopiohu monto Allahu Taáala.

¹⁴ Poóohuúwalo hilao deú timongoli diila tamolawalo tomimbihu wolo umusi loíya limongoli u mopodulua batanga.

¹⁵ Waú lohihilao mamongohi mai tataa-heyaalo wau tinepo olimongoli, tilinggula diaaluo maó penu boli ngota monto mumuusumu mowali moluwali meaalo momaahu wolo ulóíya limongoli.

¹⁶ Timongoli mahiyanatio lipaapa wau limaamamu, lomongo wutatumu, lomongo ilaatumu wau lomongo tamanimu. Ngotayadi mongoli mapateelio mate-mateelo maó limongolio.

¹⁷ Timongoli malonuó lotaa ngoáamila sababu timongoli muri-Ú.

¹⁸ Bo penu boli huwoó ngopata monto lunggongumu diila tameenggi.

¹⁹ Wonu timongoli moótahangi wau sabali, yi timongoli moáahu."

²⁰ "Wonu bolo timongoli moóonto Yerusalemu bilaala lopajule, maótaawa maó limongoli deú kota boito diilalo mohiheo maántuluolio.

²¹ Towakutu boito mamusi tau to Yudea tumeteó ode hihuí-huídea. Timongolio tawoluo todelomo kota mamusi mololaa maó kota, wau timongolio to bulemengo kota diila maó potuwoto ode delomo kota.

²² Sababu duduu-laheyaalo boito tutuulio tutu 'Duduu-laheyaala lo Hukumani Podehuwolo mai', alihu loú odito motoduwolo mola wolo u malei tuladu todelomo Kitabi.

²³ Malo moótihela hapato duduu-laheyaalo boito ode taabua tadonggo ombodaá, wau tiilo tadonggo hemo potutu lotaúnge. Lipu botie maódungga loú suusa daá, wau Eeya mamu hukumani mai bangusa botie.

²⁴ Woluo tamaa pateelio lobanggo mate-mateelo maó, woluo olo tamaa deloolio odelo tatilawalo ode lilii-puwaalo lotau; wau tau-tauwalo tadiila motota lo Allahu Taáala mamu dutadutaáa Yerusalemu tunggula mopulito wakutuulio u matilantu lo Eeya ode limongolio."

²⁵ "De tomato lodulahu, hulalo, wau popoo-liyamalo maóntonga tutuu-wotalo. Todunia babaa-ngusawalo mamoohe wau molingu motaalua wolo tingohu dupota daá wau oliyoó buoóolo uwali-walihuhu lodeheto.

²⁶ Manusia mamoohe tióopatea motaalua loú wolo u mamotoduo mai to ngoilanggubu dunia botie, sababu tahi kawasawa todulente daá mamowali moááá-mbulatia.

²⁷ Tou boitolo Walaó Manusia mamei dungga todelomo heengo wolo kawasa wau ololaió daá.

²⁸ Wonu bolo susuu-aliyaalo boito mamotoduo mai, pobongulo wau bintaáa mola lunggongumu, sababu ngopeéepo mai timongoli mapo aahuwolo."

²⁹ Lapataó ti Isa lohungguli maó olimongolio pohumaya odie mola, tahuda-Lio, "Poóbilohé maó bungo lo ayu ara wau ngoáamila bungo lo ayu wewo.

³⁰ Wonu bolo duduungio muda to wohutio mahe oontonga, otaawa maó limongoli deú malembidu sembo loú mopatu.

³¹ Odito olo wonu timongoli moóonto suáli boito motoduo maótaawa limongoli

deú Allahu Taáala mahuáa momalenta odelo Olongia.

³² Ototai maó! Susuu-aliyaalo boito mamotoduo tou dipolulio mai tau-tauwalo tahitumula masaatia botie mate ngoáamilalo.

³³ Hulungo wau dunia mamooli, bo tahuda-Ú debo ohiheo-hiheolo maó."

³⁴ "Poódahawa batangamu, diila bolo timongoli mopusingi daá wolo popoo-tihungguwalo wau mimii-numaniyalo u moóhuwoó, meaalo mailaba momikiilangi susuu-aliyaala lo tutumulumu, tilinggula timongoli diila dapadapato tou dulahee boito tumahuólo mola lumenetai.

³⁵ Sababu Dulahee boito mamei dungga debo odelo talele to ngoáamila tau todunia botie.

³⁶ Poódaha-dahaalo maó, wau poduáalo laito alihu timongoli moó tahangi tou ngoáamila suáli de motoduo mai wau timongoli mowali motaalua lo Walaó Manusia."

³⁷ Ti Isa helo ngaajali to Bele lo Eeya waktu dulahe wau huilio maó Tio lonaó ode huludu lo Jaitun wau lotitola tetó.

³⁸ Timiĩdu dumodupo ngoáamila tau hiponaówa mai ode Bele lo Eeya hemo dungohe pongaajali li Isa.

22 ¹ Lameyangi lo Roti Diila Oragi u ilunte Paska malembidei.

² Mongo iimamu taúwa wau guguu–ruwaalo agama hipololohe dalalo lou poó–poóoyo u momate li Isa mate–mateelo maó, sababu timongolio moohe totaa dadaata.

³ Lapataó Ibilisi tilumuwoto odelei Yudas taĩlunte olo Iskariot, deúito–yito ngotaalio lo tamopulu wau duulota tahiduduá li Isa.

⁴ Sababu uito tei Yudas malonaó mola lodulohupa wolo mongo iimamu taúwa wau wolo mongo taúwa lo tamoo–kawalia Bele lo Eeya pasali woloolo mola tio mowali mohudu li Isa ode limongolio.

⁵ Timongolio leengahe daá wau lodanti u mamongohi doi olio.

⁶ Tei Yudas olo akolo wau malopeehu hiyango u mohudu li Isa ode limongolio, lou diila ilotaawa lotau.

⁷ Malei dungga dulahio todelomo Lameyangi lo Roti Diila Oragi deú himba u pohutu uáalo lo Paska maólotolo.

⁸ Yi ti Isa lopoáhu olei Petrus wolei Yahya, "Ponaólo podapato maó uáalo lo Paska olanto."

⁹ "Toútoonu otohilaa li Paaá podapato maó lamiaatia?" uali mongolio.

¹⁰ Ti Isa lolametaó, "Toú timongoli tumuwoto ode kota, talolaí ngota tadonggo delodelo bolinggo tuwau tuatunga taluhu mamó dunggaya wolimongoli. Duduí maó tio ode bele u potuwotalio,

¹¹ wau polelea maó totaa ohuúwo lobele boito: Ti Guru lolóiya mai, 'Toútoonu tambatilio lo tahiduduá ola-Ú wau Waú molamela uáalo lo Paska?'

¹² Taa ohuúwo lobele boito mamopotunu mai olemu huwali lopahu tuwau u leidaá, wimu-wimumuto wolo pakakasilio. Podapato maó ngoáamilalo teto mola."

¹³ Yi malonaó tei Petrus wolei Yahya, tulusi loódungga ngoáamilalo lotuuúde debo odelo u tilahuda li Isa. Timongolio olo malopo dapato uáalo lo Paska boito.

¹⁴ Toú malei dungga wakutuulio u molamelo uáalo lo Paska boito, ti Isa lotihuloáa peé-peéenta wolo tahiduduá o-Lio totambati polamelalo.

¹⁵ Lapataó Tio lotahuda maó olimongolio, "Otohilaa-Ú daá molamelo uáalo lo Paska botie peé-peéenta wolimongoli touú Waú diipo modutolo sikisa!

¹⁶ Sababu, pomalacayalo: Waú diilalo molamela uáalo botie tunggula boliilo totamela botie póilaalolo to Dunia Bohu lo Allahu Taáala."

¹⁷ Lapataó uito ti Isa lomintaáa hakati lo angguru, tulusi lolapali duá sukuru ode Allahu Taáala, lapataó lotahuda maó, "Hamaalo utie, wau taya-tayadelo mota;

¹⁸ sababu ototai maó: tumula maó masaatia botie Waú diilalo mongilu angguru botie poli tunggula Allahu Taáala maílo kawasa wolo lealeaatulo maó."

¹⁹ Lapataó uito ti Isa malohama roti. Wau touú mailapato lolapali duá sukuru, hepili-pilita-Ngio roti boito wolo uluú-Lio tulusi yilohi-Lio maó olimongolio, wau lotahuda, "Uti-utieelo batanga-Ú [uiludu ode limongoli. Pohutuwalu utie u mopoéela ola-Ú."

²⁰ Odito olo lapataó lolamelo, Tio longohi maó olimongolio hakati lo angguru boito wau lotahuda, "Hakati botie tutuulio tutu daantia lo Allahu Taáala u bohu,

u piloposaaha wolo duhu-Ú -- duhu u bilanguatai ode limongoli."]

²¹ "Bo bilohi! Taa u mohiyanati ola-Ú woluo tewe peé-peéenta wola-Ú.

²² Walaó Manusia memangi maamate odelo woloolo mola u matilantu mai lo Allahu Taáala; bo matopotala taa u mohiyanati o-Lio!"

²³ Yi timongolio mahipo hihintua ngota timongota, tatoonu towolota limongolio tamamohutu maó suáli boito.

²⁴ Towolota lo tahiduduá li Isa tilumoodu polohamawa tomimbihu tatoonu monto olimongolio tamusi anggapuwolo tapulito udaá.

²⁵ Ti Isa lotahuda maó ode limongolio, "Mongo onglia lobangusa tadiila motota lo Allahu Taáala hipodeehe ulipulio, wau tahi okawasawa ulipulio táilunte, 'Tamoduólawa Ulipu'.

²⁶ Bo timongoli diila mowali odito. Boliño maó, taa pulito udaá towolotamu musi debo odelo tapulito ukikiió, wau taúwa mamusi mowali debo odelo tamoomayawa.

²⁷ Tatoonu talebe udaá: taa u hulohuloá hemolamela tomeja, meaalo taa u hemohinta olio? Matantu taa u hulohuloá

boito. Bo Waú woluo towolota limongoli odelo tamoomayawa.

²⁸Todelomo totoonulalo polodutolo-Ú, timongoli laito peé-peéenta wola-Ú.

²⁹Odelo woloolo mola Allahu Taáala malongohi palenta ola-Ú haku u momalenta, odito olo Waú mamongohi mai olemu haku boito.

³⁰Lou odito timongoli mowali moduduó motisana-sanangi wola-Ú towakutu Waú mowali Olongia. Wau timongoli mamó tihuloó toitaato mopulaa duluo tambati huhuloá li onlongia u momalenta tomopulaa duluo suku bangusa lo Isiraílu."

³¹"Simon, Simon, dungohe mai! Ibilisi mailohiya luasi u motesi olimongoli; debo odelo pale yinggilolo monto alipo tilinggula u mopiohu yilinggi monto u moleeto.

³²Bo Waú maloduá mola olemu, Simon, alihu iimanimu diila maó moluluto. Wau wonu yió malo hualingai ode ola-Ú, yió mamusi mopoó lotolaó mongo wutatumu."

³³Tei Petrus lolametaó, "Eeya, watotia ihilasi tumuwoto ode tutupa wau mate peé-peéenta wolo Eeya!"

³⁴"Pomalacayalo, Petrus," tahuda maó li Isa, "toú maluó diipo mokukuyuú mai

todulahee botie, mapoóotolu yió lomaahé
ola-Ú."

³⁵ Lapataó uito ti Isa lotahuda maó ode
limongolio, "Muloololio mai toú Waú lolao
olimongoli loú diila lopoluasi olimongoli
helodelo dompeti, bututu meaalo sapatu,
wolo timongoli ilopulita lolo-loolo?"

"Diila!" tametaó limongolio.

³⁶ "Bo botia," tahuda maó li Isa, "tatoonu
taódompeti meaalo bututu, mamusi
modelo uito; wau tatoonu tadiila owamilo,
musi mopotali jumbalio mota motali
wamilo.

³⁷ Sababu, pomalacayalo, ayati lo Kitabi
u tingohio odie: 'Tio ilanggapu odelo tau
ngota tamoleeto,' musu motoduo mai
tobatanga-Ú. Sababu wolo u tulatulade
todelomo Kitabi tomimbihu-Ú donggo
todutoduo masaatia botie."

³⁸ "Eeya," loíya maó lo tahiduduá li Isa,
"bilohi, tea woluo wamilo mohelu duluo."
"Sambelolo!" tametaó li Isa.

³⁹ Ti Isa lololaa maó kota wau malonaó
debo odelo ubiaasa ode Huludu Jaitun,
wau tahiduduá o-Lio lonaó olo wo-Lio.

⁴⁰ Toú malei dungga mota teto, "Tio
lotahuda maó ode limongolio, Poduáalo

mola alihu timongoli diila maó odusa wonu timongoli yimontalalio."

⁴¹ Lapataó Tio lonaó lebe lolaminga ngopeé lonto olimongolio, tanu lamingio ngopopaí lobotu, tulusi loti bonggohuú wau loduá,

⁴² "Oo Paapa," ua-Lio maó, "wonu mowali, powalahe maó monto olaa-Tia polodutolo umusi olaasawa lowa-Tia botie. Bo diila moduduó utohilaa lowa-Tia, bo moduduó utohilaa li Paapa wambaó."

⁴³ [Maláikati ngota malonaó mai ode o-Lio wau lopoó lotolaó o-Lio.

⁴⁴ Ti Isa lodutola daá lohilao tilinggula Tio helebe tióotutua loduá. Wula-Tio debo odelo duhu u hilumeheta ode huta.]

⁴⁵ Yilapato loduá, ti Isa luli lohualingai ode tahiduduá o-Lio. Tio loódungga olimongolio donggo hituluhe sababu siluukali daá lohilao.

⁴⁶ Tulusi Tio lotahuda maó olimongolio, "Yilongola timongoli bo hituluhe? Pobongulo wau poduáalo mola alihu timongoli diila odungga loimontala."

⁴⁷ Toú ti Isa donggo hemotahuda leidungga mai ngopolemoá tau. Taúwa limongolio tei Yudas, tala ngota muri li

Isa. Lapataó tei Yudas lonaó mota odeli Isa wau malodilo o–Lio.

⁴⁸ Boti Isa lotahuda maó olio, "Yudas, wolo yió lodilo ola–Ú botie, yió ohilaa mohiyanati Walaó Manusia?"

⁴⁹ Tou táhiduduá li Isa tawoluo teto loóonto maó wolo u mamotoduo, timongolio lolóiya, "Eeya, matuhuwo wambaó lomongo watotia wolo wamilo!"

⁵⁰ Tulusi tala ngota limongolio lolimadeó wato li iimamu daá wolo wamilo tilinggula loputu bulongalio olowala.

⁵¹ Boti Isa lotahuda maó, "Sambelolo!" Tulusi dilede–Tio bulonga lotau boito wau lopoóluli maó.

⁵² Lapataó ti Isa lotahuda ode mongo iimamu taúwa wau mongo polowila tamoo–kawalia, Bele lo Eeya, wau mongo taúwa lo Yahudi talonaó mai odito u moheúpa o–Lio, "Yilongola Waú botie tamoleeto, tunggula timongoli lonaó mai wolo wamilo wau ayu pangokoó u moheúpa ola–Ú?

⁵³ Ngohui–ngohui Waú wolimongoli to Bele lo Eeya, timongoli diila loheúpa ola–Ú. Bo uti–utieelo saaátilio limongoli moponaó uito, saaáti kawasa loú modiólomo modihu poloitohu."

⁵⁴ Timongolio loheúpa li Isa wau lodelo o–Lio ode Bele lomongo iimamu daá. Tei Petrus lohunuhe lonto u molamingo.

⁵⁵ Tohuungo pango boito tulu towungolo mapilo léitio wau tei Petrus mota lotihuloáa peé–peénta wolo tahihuloáa to palitio.

⁵⁶ Tala ngota lowato taabua loóonto olei Petrus hulohuloáa tobiihu polulo tulu boito; tulusi wato taabua baito helo poótuoto olei Petrus, lapataó lolóiya maó, "Tau botie olo engonti woluo peé–peénta woli Isa!"

⁵⁷ Bo tei Petrus malomaahu. Tio lolóiya, "Watia sama–samaata diila moótaawa wolo tau boito!"

⁵⁸ Ngosaaáti lapatio maó, ngotaalio wewo loóonto olei Petrus wau lolóiya, "Yió olo ngotaalio limongolio!" Bo tei Petrus lolametaó, "Diila, diila watia!"

⁵⁹ Tanu ngojamu lapatio maó, ngotaalio wewo poli malo loíya wolo suala daá, "Memangi tau botie muri li Isa, sababu tio tau lo Galilea!"

⁶⁰ Bo tei Petrus lolametaó, "Wolo makusudumu, diila otaawaú!" To saaátילו boito, toú tei Petrus donggo hemobisala, maluó lokukuyuú.

⁶¹ Ti Isa poli loili maó wau lomilohe olei Petrus. Tulusi tei Petrus loóéela mola to Eeya u malo tahuda olio, "Toú diipo maluó mokukuyuú todulahe botie, yió mapoóotolu lomaaha ola-Ú."

⁶² Yi tei Petrus mailumuwalo lonteto wau hilumoyongo mopotide-tideó.

⁶³ Tau-tauwala tadonggo hidahawa li Isa, helo poitohe wau lomate o-Lio.

⁶⁴ Matolio tilaúbe limongolio wau hepilo hintualio, "Nte tapula tatoonu talomate ole-Mu?"

⁶⁵ Donggo dadaata tataa-heyalo u mohina hepomukaó limongolio o-Lio.

⁶⁶ Dimodupio mola, mongo taúwa lo Yahudi, mongo iimamu taúwa, wau guguu-luwalo agama lotiámbu, tulusi lodelo li Isa, ode talu lo Mahakama Agama limongolio.

⁶⁷ "Poótaawa mai olami," uali mongolio o-Lio, "wolo Yió botie Olongia Tamoo-poáahua?" Ti Isa lolametaó, "Wonu polele-Ú mai olimongoli, timongoli debo diila tapalacaya.

⁶⁸ Wau wonu Waú mohintu mai olemu, timongoli debo diila tamolameto.

⁶⁹ Bo tumula maó botia, Walaó Manusia mamó tihuloáa to ambahu olowala lo Allahu Taáala Taa Laba-labaalo kawasa."

⁷⁰ Yi timongolio ngoáamila malo loíya, "Wonu odito, Yió botie Walaó Allahu Taáala?" Ti Isa lolametaó, "odito uali mongoli."

⁷¹ Yi timongolio malo loíya, "Diilalo palalu sakusi! Ito maloó dungohu lonto tunggi-Lio lohihilao!"

23 ¹ Ngoáamila majalisi boito tilimihulo, tulusi lodelo li Isa ode talu lei Pilatus.

² Teto timongolio malo potulude o-Lio, "Timongolio lolóíya, 'Malotapu lami tau botie hemopo lapalo ulipu. Tio hemo popatu totau alihu diila momayali beya toli Kaisali, sababu helóiyaa-Lio deú Tio yito Almasi, ngotaalio li onlongia."

³ Lapataó tei Pilatus lohintu maó li Isa, "Tingga otutu Yió onlongia tau lo Yahudi?" Tametaó li Isa, "Oditolo loíyamu."

⁴ Yi loíya maó lei Pilatus ode mongo iimamu taúwa wau taa dadaata boito, "Wau diila loótapu totala penu boli tuwau maó totau botie u pohukuu-maniyalo o-Lio."

⁵ Bo timongolio lebe hemo huntulaó olo, "Wolo pongaajali-Lio, Tio hemo popatu

taa to ngoilanggubu Yudea; bohu-bohulio to Galilea, wau botia matilinggula poli odiamai."

⁶ Toú tei Pilatus loódungohe uito, tio malohintu, "wolo Tio botie taulo Galilea?"

⁷ Toú piloótaalio maó deú ti Isa asalii-Lio lonto madala to kawasa lei Herodes, tei Pilatus malolao li Isa odelei Herodess, u toú boito woluo olo to Yerusalemu.

⁸ Tei Herodes sanangi daá toú loóonto li Isa, sababu malohiheo tio loódungohe pasalii-Lio wau ohilaa momilohe o-Lio. Tio hemo halapu moó sakusi li Isa mohutu u moólinggolabe.

⁹ Sababu uito tei Herodes heloówoli maó dadaata yiyintu ode o-Lio, boti Isa diila peéenta maó lolameto.

¹⁰ Mongo iimamu taúwa wau guguu-ruwaalo agama lotaalua olo teto wau helo potulude wolo moóohuú li Isa.

¹¹ Tei Herodes wau mongo pongowaá lo suludadulio helo poitohe wau lohina li Isa, lapataó pilakealio Tio boó odudaá, lapataó luli yilaolio Tio odelei Pilatus.

¹² To dulahulo boito tei Herodes wolei Pilatus, toú muloololio mai mumuusua, maluli lotamania."

¹³ Tei Pilatus malongambu mongo iimamu taúwa, mongo taúwa, wau ulipu,

¹⁴ Iapataó loloíya maó olimongolio, "Timongoli malodelo mai tau botie ode olaú wau loloíya deú Tio helo poólapalo totau-tauwalo. Botia totalu limongoli waú malo malakisa o-Lio, bo waú sama-samaata diila loótapu u moleeto penu bo tuwau maó u hepotuludi mongoli o-Lio.

¹⁵ Odito olo huhama lei Herodes, sababu tio olo maluli lolao mai li Isa boito ode olami. Tau botie diila helohutu penu bo tuwau maó upaatuti pohukuu-maniyalo o-Lio wolo hukumani mate.

¹⁶ Sababu uito waú mamu muboáa o-Lio, tulusi mopoluli maó o-Lio."

¹⁷ [Totimíidu lameyangi lo Paska, tei Pilatus musi mopobebasi ngotaalio lotutupa ode ulipu.]

¹⁸ Ngoáamila tahiámbua teto longuatió, "Pateyalo Tio mate-mateelo maó! Bebasia maó tei Barabas olami!"

¹⁹ (Tei Barabas tiluwotio ode tutupa sababu polomalakala ulowali tokota wau sababu polomatea yila-yilatelo maó.)

²⁰ Tei Pilatus ohilaa mopoluli maó li Isa, sababu uito tio luli lobisala peéentapo totaa dadaata boito.

²¹ Bo timongolio longuatió, "Salipua Tio, salipua Tio!"

²² Lapataó u otolulio tei Pilatus longibode olimongolio, "Bo wolo totalaa-Lio? Waú diila loótapu penu boli tuwau maó totala to o-Lio upaatuti pohukuu-maniyola o-Lio hukumani mate! Waú mamó muboáa o-Lio tulusi mopoluli maó o-Lio."

²³ Bo timongolio tulusi hiwatiá lodaá-daáalo maó deú ti Isa musi salipuolo. Wau pulitio maó wuwaatii mongolio lomata.

²⁴ Yi tei Pilatus malo podehu hukumani mate li Isa loduduó utohilaa lotaa dadaata boito,

²⁵ wau lopoluli taa u pilohile limongolio, deúito-yito taa u tiluwotio ode tutupa sababu polo molakala wau polomatea yila-yilatelo maó. Lapataó ti Isa yiludulio ode limongolio u lololimo totoonulalo u otohilaa pohutuo limongolio o-Lio.

²⁶ Yi ti Isa madilelo limongolio. Tohuungo dalalo, timongolio lodunggaya wolo ngotaalio táilunte Simon, u asaliilio mai lonto Kirene, tadonggo tuwo-tuwotai ode kota. Timongolio loheúpa olio, tulusi

lomakusa olio lomota ayu salipu boito to wulea li Isa.

²⁷ Dadaata taa tunu-tunuhe towulea li Isa -- to wolotalio woluo olo dengolo lota mongobua. Mongobua boito hehiyonga wau hipo hilimutawa li Isa.

²⁸ Boti Isa malomilohe ode limongolio wau lotahuda maó, "Mongobua lo Yerusalemu! Diila maó hiyongi Waú. Hiyongilo mola batangamu lohihilao wau mongo walaúmu.

²⁹ Sababu mamei dungga wakutuulio tau mamoloíya, 'Donggo boli paédaalio mongobua tadiila peéenta maó ilombodaá, tadiila peéenta maó owalaó wau diila peéenta maó lopotutu lotaúnge!'

³⁰ Tou boitolo tau mamoloíya to huhuu-iduwaalo, 'Deehilo mai ami!' Wau to huhuu-luduwalo, 'Tambulilo mai ami!'

³¹ Sababu wonu to ayu udonggo hitumula, tau malohutu debo odelo utie, wolo poli u mapohutuo limongolio to ayu umalo hengu!"

³² Woluo poli taduulota wewo -- duduulotalo tamoleeto -- tadilelo limongolio u hukuu-maniyola mate peé-peéenta woli Isa.

³³ Toú malei dungga mola totambati u ilunte "Bakakau," timongolio malo salipu li Isa wolo taduulota tamoleeto boito -- ngotaalio to ambahu olowala wau ngotaalio poli to ambahu oloihi li Isa.

³⁴ Tulusi ti Isa maloduá, "Paapa, ambunguwalo mai timongolio! Diila otaawa limongolio wolo upilohutu limongolio."

³⁵ Pakeyangi li Isa hetila-tilayadio teto towolota limongolio wolo undi. Tau-tauwalo tahitihula teto sambela hibilohe, tulusi mongo taúwa lo Yahudi hipohenteá li Isa wolo loíya, "Tio malo poáahu taa wewo; ntali botia Tio mopoáahu batanga-Lio lohihilao, wonu Tio tutuulio tutu Olongia Tamoo-poáhua tatilulaoto Allahu Taáala!"

³⁶ Mongo pajule olo hemohenteá li Isa. Timongolio lonaó mai longohi angguru molotingo o-Lio

³⁷ wau loloiya, "Wonu Yió olongia taulo Yahudi, poáahuwalo lohihilao batanga-Mu!"

³⁸ Toitaato ayu salipu li Isa, tulatuladu tataa-heyaalo odie: "Tabotieelo Olongia Taulo Yahudi."

³⁹ Tala ngota lo tamoleeto tasilalipu teto hemohina li Isa. Tio loloíya, "Yió Olongia Tamoo-poáhua, diila odito? Nte, poáahuwalo batanga-Mu wau ami!"

⁴⁰ Bo tamoleeto ngota poli lodini to tamaniilio boito, loíyaalio maó, "Tingga yió diila moohe to Allahu Taáala? Yió peé-peéenta hilukuu-manilio mate debo odelo Tio.

⁴¹ Bo hukuu-maninto duulota memangi malo tuuúde wolo huhutuunto. Bo Tio sama-samaata diila ototala!

⁴² Tulusi tio loloíya, "Isa, Eelai mai watia, wonu lto meidungga mai odelo Olongia!"

⁴³ "Pomalacayalo," tahuda maó li Isa olio, "Dulahee botie yió mapeé-peéenta wola-Ú to Pirdaus."

⁴⁴ Otanu dulahee totaú, mato lodulahu diila otinelio, wau ngoilanggubu lipu boito lowali lodiólomo daá tunggula jamu tiga lolaango.

⁴⁵ Lalante untaya-ntayanga todelomo Bele lo Eeya, lokaidingo dului.

⁴⁶ Tulusi ti Isa longuatiá wolo suala daá, "Paapa! Ode delomo uluú li Paapa wuduo mola lo Watia batanga lo Watia!" Tou yilapato loloíya odito, Tio yilate!

⁴⁷ Tou polowila lo pasukani loóonto wolo u mailowali, tio malomuji Allahu Taáala. Tulusi tio loloíya, "Otutu Tio diila ototala!"

⁴⁸ Taa dadaata talonaó mai odito u momilohe, loóonto maó wolo u mailowali. Timongolio ngoáamila malo hualingo wolo hilaa uleé-leée daá.

⁴⁹ Wau ngoáamila tamoótaawa woli Isa, tuwotuwoto mongobua talo duduái o-Lio lonto Galilea, hitihula lonto u molamingo wau loóonto ngoáamilalo boito.

⁵⁰ Woluo ngotaalio táilunte Yusu, u asaliilio mai lonto kota Arimatea tolipu lo Yudea. Tio tau ngota mopiohu tahe hulumatio lotau, wau tadonggo hemohima wakutuulio Allahu Taáala molumula momalenta odelo Olongia. Eleponu tio waito Mahakama lo Agama, tio diila akolo wolo putuusani wau huhutu lo mahakama boito.

⁵¹ (23:50)

⁵² Tei Yusu botie lonaó mota lotaalua wolei Pilatus wau lohile alihu milate li Isa wohi maó olio.

⁵³ Lapataó yilaahio milate li Isa lonto ayu salipu, tulusi tilaputio wolo latu lonto lenani. Lapataó uito tio malopo balato li Isa todelomo kuubulu upilohutu todelomo

huludu botu -- kuubulu boito diipo peéenta maó pilomake.

⁵⁴ Dulahu boito dulahu Jumaáti; wau dulahu Saabati wimbedeó tumulalio.

⁵⁵ Mongobua talonaó mai woli Isa lonto Galilea loduduá olei Yusu wau lomilohe kuubulu boito. Timongolio olo loóonto woloolo mola milate li Isa pilopo balatio todelomo kuubulu.

⁵⁶ Lapataó timongolio malo hualingo tulusi lopodapato lamba–lamba wau yinulo moonu u polamahio tomilate li Isa. Todulahu Saabati, timongolio lohuheli lokalaja u loduduo butoó lo agama.

24 ¹ Todulahu Ahadi, didimodupo daá, mongobua boito lonaó ode kuubulu li Isa lodelo yilonta u mapilo dapato limongolio.

² Tokuubulu ilodungga limongolio botu heútio malo lilidu.

³ Tulusi timongolio tilumuwota mola ode delomo kuubulu boito, bo diila loódungga milate li Isa teto.

⁴ Toú timongolio hitihula teto wau lolingu hemo mikiilangi suáli boito, debolo taduulota wolo boó heínta–intawa tilimihulai totili limongolio.

⁵ Timongolio mailoohe daá, lapataó losujudu demola huta, sambela taduulota boito loloíya maó ode limongolio, "Yilongola timongoli hemo lolohe totaa tumutumulo towolota lotaa yilate?

⁶ Diaaluo Tio tea. Tio malobongu! Eelai mola wolo u mapilo tahuda—Lio olemu tou Tio donggo to Galilea,

⁷ deú 'Walaó Manusia musi wuduolio totaa odusa, lapataó salipuolio wau todulahe otolulio Tio mamobongu mai.'"

⁸ Yi mongobua boito maloéela mola tataa—heyaalo li Isa.

⁹ Tou malo hualingai lonto kuubulu boito timongolio helo hungguli u lotuduo boito to tamopulaa tuwau lota rasulu wau ode ngoáamila tahiduduá wewolio.

¹⁰ Mongobua talo poótaa ngoáamilalo boito to tahiduduá li Isa, yito: ti Maria Mahadalena, ti Yohana wau ti Maria tiilo lei Yakobus wau mongobua wewolio tapeé—peéenta woli mongolio.

¹¹ Bo mongo rasulu boito hemo lantobu mongobua boito bo hipo hunggulia udiila pongalo aakali. Timongolio diila palacaya silita lo mongobua boito.

¹² Bo tei Petrus malobongu wau tilumeteó ode kuubulu. Sambela lotibunggu tio

lohedupa mola ode delomo kuubulu, tulusi loóonto mola bo wambaó taputo u teto. Tei Petrus lolinggolabe daá, tulusi lohualingo wolo dadaata yiyintu todelomo hilaalio tomimbihu wolo u mailowali.

¹³To dulahulo boito, duulota tahiduduá li Isa donggo hinaówa ode kambungu tuwau u ilunte Emaus, tanu mopulaa tuwau lokilo lamingio lonto Yerusalemu.

¹⁴Toú hinaówa timongolio bibiisalawa pasali loú totoonulalo poloútia u mailowali boito.

¹⁵Toú timongolio donggo bibiisalawa wau hipotuuuloá lo pikiilangi, ti Isa lohihilao leidungga mai wau lonaó peé-peéenta woli mongolio.

¹⁶Timongolio loóonto li Isa, bo woluo hitua-tuawua u lohutu olimongolio diila loóonuhe o-Lio.

¹⁷Lapataó ti Isa lotahuda maó, "Wolo u hebisala limongoli tohuungo dalalo botie?" Timongolio malo huheli wolo baya suukali.

¹⁸Tulusi ngotaalio limongolio, táilunte Kleopas, lohintu maó li Isa, "Mati Paaá ngota-ngotaalo tau deli to Yerusalemu tadiila motota poloútia uilowali teto mola towoli-woli mai botie?"

¹⁹ "Poloútia wolo?" yilintu maó li Isa. "Pasali uilowali woli Isa, talonto Najaret boito," tametaó limongolio. "Tio Nabi. Tataahe-Lio wau huhutuu-Lio okawasa daá -- mopio moduduó huhama lo Allahu Taáala meaalo moduduó huhama lotaa ngoáamila.

²⁰ Mongo iimamu taúwa wau mongo taúwa lo bangusanto malohudu o-Lio u hilukuu-manilio yila-yilaatelo maó, wau timongolio loposalipu o-Lio!

²¹ Lebe-lebe pomaó hehalapuo lami deú Tiolo tamamo lopato Isiráilu! Wau dulahee botie dulahee otolulio anggadu suáli boito lotoduo mai.

²² Donggo poli, dengolo lota mongobua towolota lami malohutu olami iloohea. Didimodupo daá timongolio ode kuubulu,

²³ bo diila loódungga milate li Isa mola teto. Tulusi timongolio luli lohualingai wau lolóiya deú timongolio maloóonto malaíkati, wau mamaa-laíkatiyalo boito lolóiya deú ti Isa tumutumulo.

²⁴ Dengolo lota tawolami tulusi lonaó ode kuubulu wau loódungga mola deú wolo uiloíya lo mongobua boito memangi odito, bo timongolio diila loóonto li Isa."

²⁵ Lapataó ti Isa lotahuda maó olimongolio, "Timongoli memangi mohulodu! Mailaba pomboyongi mongoli u momalacaya ngoáamila u mailóiya lomongo nabi!

²⁶ Memangi Olongia Tamoo-poáahua musí moólaasapo sikisa boito, bolo moó toduo mai ololai-lo."

²⁷ Lapataó ti Isa lotombangaó olimongolio wolo u tulatuladu todelomo ngoilanggubu Kitabi tomimbihu batanga-Lio tumulalo mai monto bubuu-kuwaalo lei Musa wau bubuu-kuwaalo lomongo nabi.

²⁸ Sambela uito timongolio mahe membideó kambungu u hepatujuo limongolio. Ti Isa lotiwali debo odelo taóhilaá mopotolonga mola lononaó-Lio,

²⁹ bo timongolio lolahangi o-Lio, "Potitolaapo totambati lamiaatia, "lóiya maó limongolio o-Lio," masaatia mabolo ngopeé mola hui wau mamo diólomai olo." Yi ti Isa tilumuwotaó u lotitihui totambati limongolio.

³⁰ Tou hihuloáa hipolamela peé-peéenta woli mongolio, ti Isa lohama roti, lolapali sukuru ode Allahu Taáala, wau lomita-mitangaó roti boito wolo uluú-Lio, tulusi longohi maó ode limongolio.

³¹ Lapataó timongolio malongalati deú tau boito ti Isa. Bo Tio mailooli to poomilohi mongolio.

³² Uali mongolio ngota timongota, "Memangi laasa lohilaanto debo odelo wali-walihuhu, toú Tio hemobisala wolanto to huungo dalalo, wau helo tombango tuango Kitabi ode olanto?"

³³ To saaátilo boito timongolio matilimihulo wau tulusi lohualinga ode Yerusalemu. Mola teto timongolio loódungga tamopulaa tuwau lota tahiduduá li Isa donggo hiámbua wolo tawewolio.

³⁴ Timongolio boito loloíya, "Memangi otutu Eeya maluli tilumumulai! Tio malopo bilohe batanga-Lio odelei Simon!"

³⁵ Duulota hiduduá li Isa taboheeli leidungga mai boito tulusi lohungguli maó u maílo laasawa limongolio toú hinaówa, wau woloolo mola timongolio loóonuhe Eeya tosaaáti Tio helo mita-mitanga roti.

³⁶ Toú timongolio donggo hemosilita, debolo ti Isa lohihilao matihu-tihula tohuungi mongolio wau lotahuda, "Salaamatilo timongoli!"

³⁷ Timongolio iloohea wau mailoohe, sababu helantobu limongolio loóonto lati.

³⁸ Boti Isa lotahuda maó, "Yilongola timongoli yiloohe? Yilongola timongoli pilotoodei loú molilimbuto todelomo hilaa limongoli?"

³⁹ Bilohi uluú-Ú wau bilohi oáatu-Ú. Ototai maó, deú utie Waú lohihilao! Tontali mai wau poótuota maó, sababu lati diila otapu wau tulalo, odelo u iloontonga limongoli to ola-Ú."

⁴⁰ Ti Isa lotahuda odito sambela hemo pobiloheó uluú wau oáa-Tio olimongolio.

⁴¹ Wau tou timongolio debo donggo diipo palacaya, sababu malo odito wengahu wau linggolabu, ti Isa malohintu olimongolio, "Wolo timongoli o uáalo tewe?"

⁴² Timongolio malongohi maó o-Lio uponula tilinanga ngoputu.

⁴³ Ti Isa malohama uponula boito, lapataó lolamela totalu limongolio.

⁴⁴ Lapataó uito Tio lotahuda maó olimongolio, "Utieelo susuu-aliyaalo umaa piloótaa-Ú mai olimongoli tou Waú donggo peé-peéenta woli mongoli; deú timiïdu suáli u tulatuladu tomimbihu tanggulu-Ú todelomo Bubuu-kuwaalo lei Musa, lomongo Nabi, wau Jaburu, musi motoduo mai."

⁴⁵ Lapataó ti Isa malomuó pikiilangi limongolio alihu mongalati makusudu lo Kitabi.

⁴⁶ Tulusi Tio lotahuda maó ode limongolio, "Todelomo Kitabi tulatuladu deú Olongia Tamoo–poáahua musi modutolo wau musi muli mobongu mai monto opopate todulahee otolulio.

⁴⁷ Wau olo deú to tanggulo Olongia Tamoo–poahua boito mamusi pololadulo to ngoáamilalo bangusa deú manusia musi molilihu, wau deú Allahu Taáala mongambungu dusa. Wau habari boito musi pololadulo tumula mai to Yerusalemu.

⁴⁸ Matimo–timongolilo tamowali sakusi toú ngoáamilalo boito.

⁴⁹ Wau Waú lohihilao mamolao mai olemu wolo u madilanti lo Allahu Taáala. Bo timongoli musi debo mohima tokota botie tunggula kawasa monto Allahu Taáala mohenggubei olimongoli."

⁵⁰ Lapataó uito ti Isa lodelo olimongolio ode bulemengo kota demola Betania. Teto Tio lomintaá mola uluú–Lio, tulusi lomalakati olimongolio.

⁵¹ Toú tio donggo hemohutu uito, Tio bilintáio ode sologa, tulusi lobuáala woli mongolio.

⁵² Timongolio losujudu lolubo olio, lapataó lohualinga ode Yerusalemu wolo hilao leengahe daá,

⁵³ wau molo laalaaita hemo muji boli puji to Allahu Taáala to Bele lo Eeya.

Yohanes

1 ¹ Tobohulio, toú diipo dunia pilowali mai, Tahuda boito mailoluo. Tahuda woluo peé-peéenta wolo Allahu Taáala. Wau Tahuda tutuuwauwa wolo Allahu Taáala.

² Tumulalo bohulio mai Tio peé-peéenta wolo Allahu Taáala.

³ Ngoáamilalo pilowali mai lotimbulude o-Lio, wau monto ngoáamilalo uwoluo diaaluo maó penu boli tuwau u pilowali mai wonu diila monto o-Lio.

⁴ Tahuda boito bungo lo tutumulo, wau tutumulo boito mongohi mai tilango tomanusia.

⁵ Tilango boito tinetinelo toú modiólomo, wau modiólomo diila mowali momate tilango boito.

⁶ Dunga-dunggalo mai tailao lo Allahu Taáala, tei Yahya tanggulio.

⁷ Tio lonaó mai lopo habari pasali lotilango boito, alihu ngoáamila tau palacaya.

⁸ Tio lohihilao diila tilango boito, tio bo mopo habari mai uito.

⁹ Tilango ututuulio tutu u mopo baangai ngoáamila tau dungga mai ode dunia.

¹⁰ Tahuda woluo todunia, dunia pilowali mai lotimbulude o-Lio, bo dunia diila moóonuhe o-Lio.

¹¹ Tio dungga-dungga mai odelipu-Lio lohihilao bo bangusaa-Lio diila mololimo o-Lio.

¹² Penu boli odito debo woluo olo talo lolimo o-Lio wau palacaya o-Lio: timongolio yilohia-Lio haku lowali Walaó Allahu Taáala,

¹³ tapilo tutulio mai diila lonto manusia, sababu tutumula bohu boito lonto Allahu Taáala asaliilio.

¹⁴ Tahuda malowali manusia, Tio bilubiluloá to wolotanto, wau ito maloóonto odudaá-Lio. Odudaá boito tilolimo-Lio odelo Walaó Allahu Taáala tatuwa-tuwaulo. Lotimbulude o-Lio ito maloóonto Allahu Taáala wau ponu-Lio ode olanto.

¹⁵ Tei Yahya lonaó mai odelo sakusii-Lio, tio lopo habari: "Tabotieelo Tio tailóiyaaú: Tio mamei dungga meimulo wolaú, bo lebe maó udaá wolaú, sababu tou waú dipoolu, tio mailoluo."

¹⁶ Tio polupolu loponu: diila ohuheli-Lio, Tio mobalakati olanto.

¹⁷ Butoó Eeya tilolimonto lotimbulude olei Musa. Bo ponu wau otatapu wau olootolo hilao lo Allahu Taáala piloílaalo lotimbulude li Isa Almasi.

¹⁸ Diaaluo tapeéenta maó loóonto Allahu Taáala, ngopohia Walaó tuwa-tuwaulo lo Allahu Taáala, u tutuuwauwa wolo Allahu Taáala wau mohulanga daá wo-Lio. Tiolo talo poílaalo mai Allahu Taáala to olanto.

¹⁹ Tahidihima kawasa lo Yahudi to Yerusalemu lopoáhu mongo iimamu wau tau-tauwalo Lewi lonaó odelei Yahya wau lohintu olio, "Yió botie tatoonu?"

²⁰ Tei Yahya malongaku wolo juujulu, "Watia diila Olongia Tamoo-poáhua."

²¹ "Wonu odito, tatoonu yió?" yilintu maó limongolio. "Wolo yió tei Elia?" "Diila," tametaó lei Yahya. "Wolo yió Nabi?" yilintu maó limongolio poli. "Diila," tametio maó.

²² "Wonu odito, poleleaalo mai olami tatoonu yió botie," uali mongolio, "alihu ami moó tametaó totau-tauwalo talo poáhu mai olami. Wolo u heloíyamu tomimbihu batangamu lohihilao?"

²³ Tei Yahya lolametaó, "Watiaalo tio tailoíya li Nabi Yesaya: 'Taa u hemo

ngiibode tohuta hungayo u luasi daá: Popayade maó dalalo ode Eeya."

²⁴ Tau-tauwalo tailao mai taulo Parisi

²⁵ malohintu, "Wonu yió diila Olongia Tamoo-poáahua, diila tei Elia, diila olo nabi, yilongola yió hemo polihu?"

²⁶ Tei Yahya lolametaó, "Watia mopolihu wolo taluhu. Bo tohuungi mongoli woluo taa diila oonuhe limongoli.

²⁷ Tio meidungga mai lapatio maó lowatia, bo u monguádeó tali losapatu-Lio watia diila paatuti."

²⁸ Ngoáamilalo boito lotoduo to Betania, to ambahu Tiimuru lo Dutula Yordan tambati hepopo lihua lei Yahya.

²⁹ Loloombulio mola, tei Yahya loóonto li Isa lonaó mai ode olio. Tulusi tei Yahya lolóiya maó, "Bilohi, boi-boitolo Walaó Himba lo Allahu Taáala tamo luluto dusa lodunia.

³⁰ Tiolo taheloíya laatia mamei dungga mai lapatio maó laatia, bo lebe udaá wolaatia, sababu tou watia diipo pilotutulio mai, Tio mawoluo.

³¹ Tou dipolulio mai, diila otaawa laatia tatoonu Tio boito. Lebe-lebe pomaó watia lonaó mai mopolihu wolo taluhu alihu bangusa lo Isiráilu moóonuheó o-Lio."

³² Tei Yahya olo longohi sakusi odie, "Watia loóonto Rohullah lotuhutai debo odelo poombo lonto hulungo lapataó lotitolaa toitaa-Tio.

³³ Tou boito diipo otaawa laatia tatoonu Tio. Bo Allahu Taáala talo poáhu mai olaatia mopolihi wolo taluhu malo tahuda olaatia, 'Wonu yió moóonto Rohullah motuhutai, lapataó motitolaa toitaato lo ngotaalio, yi Tiolo tamamo polihu wolo Rohullah.'

³⁴ Watia lohihilao maloóonto o-Lio," ualei Yahya, "wau watia mongohi mai sakusi deú Tiolo Walaó Allahu Taáala."

³⁵ Loloombulio mola tei Yahya woluo totambati boito poli wolo taduulota murilio.

³⁶ Tou tio loóonto li Isa yilumaodeó, tio malolóiya, "Bilohi! Tiolo Walaó Himba lo Allahu Taáala."

³⁷ Taduulota muri lei Yahya loódungohe loíya boito, tulusi lonaó loduduá li Isa.

³⁸ Ti Isa loili ode wulea, wau loóonto olimongolio donggo hiduduá o-Lio. Tio malohintu maó, "timongoli hemo lolohe olita?" Tametaó limongolio, "Rabbi, toutoonu biluloá li Rabbi?" ('Rabbi' boliilio maó guru).

³⁹ "Dulo mai bilohi lohihilao," tahuda maó li Isa. Timongolio malonaó wo-Lio wau mota lomilohe touótonu piloti biluloá-Lio. Wakutu boito jamu ampa lolaango. Todulahu boito timongolio lotibiluloá wo-Lio.

⁴⁰ Tala ngota lo taduulota tamaloó dungohe wolo uiloíya lei Yahya wau lapataó lonaó loduduá li Isa, deúito-yito tei Andreas, wutatio lei Simon Petrus.

⁴¹ Lolamemetaó tei Andreas lololohe olei Simon, wutatio, wau loloíya olio, "Ami malo dunggaya woli Mesiasi!" (Mesiasi tutuuwauwa woli Almasi, deúito-yito: Olongia Tamoo-poáhua).

⁴² Tei Andreas malo depita mota olei Simon odeli Isa. Ti Isa lolontonga olei Simon, lapataó lotahuda maó, "yió Simon, walaée Yona, yió maunteelo Kepas." (Kepas tutuuwauwa wolei Petrus, bolilio maó: huídee botu.)

⁴³ Loloombulio mola ti Isa lolantu maó u monaó ode Galilea. Tio lodunggaya wolei Pilipus wau lotahuda maó olio, "Dulo duduí mai Waú!"

⁴⁴ Tei Pilipus asaliilio lonto Betsaida, deúito-yito tambati piloti biluloá lei Andreas wau lei Petrus.

⁴⁵ Tei Pilipus lodunggay wolei Natanael wau lolóíya maó olio, "Ami maloó dungga tahe untee lei Musa todelomo Buku Butoó lo Allahu Taáala, wau tapilo habari mai lomongo nabi. Tio boito ti Isa talonto Najaret, Walaée Yusu."

⁴⁶ Bo tei Natanael lolametaó, "Wolo pongalo aakali hitua-tuawua umopiohe meidungga mai monto Najaret?" Dulo mai bilohi lohihilao tametaó lei Pilipus.

⁴⁷ Ti Isa loóonto olei Natanael lonaó mai, lapataó lolóíya pasali olio, "Bilohi, uito taulo Isiraílu ututuulio tutu! Diaaluo maó upaluti to olio."

⁴⁸ "Woloolo mola ti Paaá moóonuhe olaatia?" yilintu maó lei Natanael li Isa. Ti Isa lolametaó, "Toú tei Pilipus diipo lotianga olemu, Waú maloóonto olemu towalungo bungo lo ara boito."

⁴⁹ "Paaá Guru," loíya maó lei Natanael, "ti Paaá yito Walaó Allahu Taáala! Ti Paaáalo Olongia bangusa lo Isiraílu!"

⁵⁰ Ti Isa lotahuda maó, "Yió palacaya, bo sababu Waú lolóíya mai deú Waú maloóonto olemu towalungo bungo lo ara boito? Susuu-aliyaala ulebe udaá maó tutu woleeto maóontongamu!"

⁵¹ Uali Isa poli, "Otutu, pomalacayalo, yió mamooónto mola hulungo mohuó, wau maaaa–laíkatiyala lo Allahu Taáala laahe bootula to Walaó Manusia."

2 ¹ Duuhui mola lapatio maó woluo potihunggu lonika tokota Kana to Galilea, wau tiilo li Isa woluo mola teto.

² Ti Isa wolo tahiduduá o–Lio tiloduwolio olo ode potihunggu boito.

³ Touú angguru malo pulito, tiilo–Lio lolóiya maó odeli Isa, "Timongolio maílo pulita lo angguru."

⁴ Ti Isa lolametaó, "Maama, diila maó ahuli Watia. Diipo leidungga wakutuulio Watia mopoílaalo batanga."

⁵ Bo tiilo li Isa lolóiya maó to tahi pohintawa, "Wambaó pohutuwalu wolo u mapilo tahuda–Lio olemu."

⁶ Teto woluo mohelu wolomo tombe upilohetu odelo tambati pongulowalo moduduá uúudu lo Yahudi. Timíidu tombe boito tuangio tanu ngohetuto liiteri.

⁷ Ti Isa lotahuda maó to tahi pohintawa boito, "Tuangi maó timíidu tombe boito wolo taluhu." Yi matilungga limongolio tombe boito tunggula lopolu.

⁸ Lapataó ti Isa lotahuda maó ode limongolio, "Botia hamaawa maó taluhu

boito ngoïdi wau delowa mai ode taúwa lo potihunggu. Timongolio malodelo taluhu boito ode taúwa lo potihunggu."

⁹Wau tio lolamitaó taluhu umalo bolió lowali angguru. (Diila otaawalio lonto utoonu angguru boito, bo tahi pohintawa talo luango taluhu boito tamotota). Yi taúwa lo potihunggu boito lohimbideó ode bulentiti talolai,

¹⁰tulusi lotahuda maó olio, "Biasaalio tau mopo hintapo angguru umopiohe daá meimulo wau wonu tahe tiloduo malotolu longilu, deúito angguru ubiasa. Bo Wutato lolahu angguru u mopiohe daá tunggula botia!"

¹¹Ui-uitolo bohulo moólinggolabe u pilohutu li Isa. Tio lohutu uito to Kana to Galilea. Wolo tuoto boito Tio lopobilohe odudaá-Lio. Yi tahiduduá o-Lio palacaya o-Lio.

¹²Lapataó uito ti Isa lonaó mola ode Kapernaum peé-peénta woliilo-Lio, mongo wuta-Tio wau tahiduduá o-Lio. Timongolio lotibiluloá mola teto dengolo hui mola hiheolio.

¹³Toú Dulahu Buka Paska lo Yahudi malembidei, ti Isa lonaó mola ode Yerusalemu.

¹⁴To Bele lo Eeya to Yerusalemu Tio loódungga tahe mopotaalia losapi, himba, wau bulungi poombo; wau olo tahipo tutuuloá lodoi hihuloá teto.

¹⁵Ti Isa lohutu maó buuboá ngohuú lonto tali tulusi lolanenga ngoáamila binatangi boito, himba wau sapi, lonto delomo Bele lo Eeya. Memee-jawaalo lotaa hipo tutuuloá lodoi hebilantulele-Ngio tilinggula doi limongolio lo pupuulepelo maó.

¹⁶Lapataó Tio lotahuda maó ode tahe mopotaalia lo bulungi poombo, "Bintaáalo ngoáamilalo monteea. Diila maó pohutua Bele li Paapa-Ú tambati podaa-hangiyalo!"

¹⁷Yi tahiduduá o-Lio maloéela mola ayati lo Kitabi botie. "Toliángu-Ú duólo Bele lo Eeya, yaa Allahu Taáala, molumbila hilaa-Ú."

¹⁸Tahidihima kawasa lo Yahudi helo tehengi li Isa, uali mongolio, "Nte pohutua mai u moólinggolabe odelo tuoto olami deú yió ohaku mohutu maó debo odelo utie."

¹⁹Ti Isa lolametaó, "Lolohubelo Bele botie, wau todelomo utolo hui mola Waú mamuli momongu maó."

²⁰ Lapataó timongolio loloíya, "Wopato pulaa wolomo lotaunu upilo mongulalio Bele lo Eeya botie. Wau Yió mamuli momongu bo todelomo utolo hui?"

²¹ Bo Bele lo Eeya u milakusudu li Isa yito batanga–Lio lohihilao.

²² Oditolio lapatio maó, tou ti Isa bilongu mai monto opopate, maíloéela mola lo tahiduduá o–Lio deú suáli boito mapeéenta pilotahuda–Lio. Yi malo malacaya timongolio tou wolo u tulatuladu todelomo Kitabi wau tou wolo u tilahuda li Isa.

²³ Tou ti Isa donggo to Yerusalemu tou Lameyangi lo Paska, dadaata taa palacaya o–Lio sababu ngoáamila moólinggolabe u hepilohutu–Lio.

²⁴ Boti Isa lohihilao diila palacaya olimongolio, sababu oonuhe–Lio ngoáamila tau.

²⁵ Diila palalu tau mongohi tombango to o–Lio pasali penu boli olo tatoonu wambaó, sababu otaawa–Lio lohihilao wolo uwoluo todelomo hilaa lomanusia.

3¹ Woluo ngotaalio taótanggulo to agama towimbihu taulo Parisi taílunte Nikodemus.

² Tou huilio tuwau tio lonaó mai odeli Isa wau loloíya maó, "Paaá Guru, otaawa lamiaatia ti Paaá tailao mai lo Allahu Taáala. Sababu diaaluo penu boli ngotaa maó tamowali mohutu u moólinggolabe debo odelo upilohutu li Paaá, Wonu Allahu Taáala diila wolio."

³ Ti Isa lolametaó, "Pomalacayalo, diaaluo penu boli ngotaa maó tamowali pongawaá umati lo Allahu Taáala, wonu tio diila muli potutuolio mai."

⁴ "Diila pongalo aakali tamaa iludaá muli potutuolio mai," loíya maó lei Nikodemus odeli Isa, "Tingga mowali tio muli tumuwoto ode delomo talomo liilolio wau muli pututuolio mai?"

⁵ Ti Isa lolametaó, "Otutu banali tahuda-Ú botie: Wonu tau diila potutuolio mai monto taluhu wau monto Rohullah, tau boito diila mowali pongawaá umati lo Allahu Taáala.

⁶ Manusia odelo pohuli lotapu pilotutu mai lomongo dulaálio, bo odelo pohuli lorohani pilotutu mai lo Rohullah.

⁷ Diila maó polinggolabu wonu Waú motahuda mai: timongoli ngoáamila paatuti muli potutuolio mai.

⁸ Dupoto mohiipo deútoonu otohilaalio; ito moódungohe tingohio, bo diila

otaawanto monto utoonu dudunggaalio mai wau deútoonu dulungio. Odito olo wolo taa potutuo mai lo Rohullah."

⁹"Woloolo mola uito mowali motoduo mai?" yilintu lei Nikodemus.

¹⁰Ti Isa lolametaó, "Yiό Guru lo agama to Isiraílu; diila pongalo aakali diila otaawamu?"

¹¹Pomalacayalo; ami mobisala bo tomimbihu wolo u otaawa lami, wau ami mongohi sakusi bo tomimbihu wolo umaa iloontonga lami; bo timongoli diila mohuto mololimo u silakusia lami.

¹²Timongoli diila palacaya wonu Waú mohungguli mai olimongoli pasali susuu-aliyaala lodunia botie; woloolo mola timongoli mowali palacaya, wonu Waú mohungguli mai olimongoli pasali lo sologa?

¹³Diaaluo penu boli ngotaa tapeéenta maó lobotula mola ode sologa, ngopohia Tio tamalo laahei ode dunia, deúito-yito Walaó Manusia.

¹⁴Tutuuwauwa debo odelo tei Musa malopo botula mola tulidu tombaha tobatango ayu ngoputu tohuta datahu u luasi daá wau delita, odito olo Walaó Manusia paatuti pobotulolo,

¹⁵ alihu ngoáamila taa palacaya o-Lio moótapu tutumulo ututuulio tutu wau ohiheo-hiheolo maó."

¹⁶ Sababu Allahu Taáala odito momonu mai manusia todunia botie, tilinggula Allahu Taáala longohi mai Wala-lo tatuwa-tuwaulo, alihu timíidu taa palacaya o-Lio diila binasa, bo moótapu tutumulo ututuulio tutu wau ohiheo-hiheolo maó.

¹⁷ Sababu Allahu Taáala lolao Wala-lo diila mai momutoó dunia botie, bo mai mopoáahu maó.

¹⁸ Taa palacaya o-Lio diila hukuu-maniyola. Bo taa diila palacaya mahi luumani lo Allahu Taáala, sababu tio diila palacaya to Walaó Allahu Taáala tatuwa-tuwaulo.

¹⁹ Tio pilohile moóohuú dadaasali tosuáli botie; Tilango boito malei dungga mai ode dunia, bo manusia lebe motohilaa u modiólomo wolo u mobaango, sababu huhutu limongolio moleeto.

²⁰ Timíidu taa hipohutua u moleeto, molonuó u mobaango; tio diila motohilaa u mobaango, alihu huhutuulio u moleeto diila oontonga.

²¹ Bo taa u hipohutua kahandaki lo Allahu Taáala monaó mai ode mobaango alihu

mowali moílaalo deú wolo u pilohutulio boito yito moduduá kahandaki lo Allahu Taáala.

²² Lapataó uito ti Isa wau tahiduduá o-Lio malonaó ode Yudea. Tio lotitolaa mola teto dengolo wakutu hiheolio woli mongolio wau helo polihu tau.

²³ Tou boito tei Yahya diipo tilumuwoto ode tutupa. Tio helo polihu to Ainom, diila molamingo monto Salim, sababu mola teto dadaata taluhu. Tau-tauwalo helonaó mai ode olio, wau tio lopolihu olimongolio.

²⁴ (3:23)

²⁵ Dengolo lota tahiduduá olei Yahya helo haamawa wolo taulo Yahudi pasali lowuúdu u mopoó belesi.

²⁶ Timongolio lonaó mota odelei Yahya, wau lolóiya maó, "Paaá Guru, wolo donggo oéela mola li Paaá tapeé-peéenta woli Paaá to ngotuwali lo Dutulaa Yordan boito, tou boito pilotunu mai li Paaá olamiaatia omoómolu? Tio masaatia olo hemo polihu, wau ngoáamila tau hiponaówa ode o-Lio!"

²⁷ Tei Yahya lolametaó, "Manusia diila mowali owolo-wolo wonu tio diila wohia mai lo Allahu Taáala.

²⁸ Timongoli lohihilao maloó dungohe olaatia lolóiya mai, 'Watia diila Olongia

Tamoo-poáhua. Watia ilutolia leimulo mai wo-Lio.'

²⁹ Bulentiti taabua yito hakuulio libulentiti talolaí. Sahabati libulentiti talolaí boito wambaó tihutihula totili wau modungohe, wau tio sanangi wonu modungohe suala libulentiti talolaí. Odito olo wolaatia. Masaatia watia sanangi daá.

³⁰ Tiolo tamusi helebe polohuna daá, wau watia diila boti polohuna daá."

³¹ Tadungga-dungga mai monto yitaato mongilabotaó loú ngoáamilalo. Tadungga-dungga mai monto dunia, meituwoto tau lodunia, wau mobisala pasali lodunia. Tio tadungga-dungga mai monto yitaato mongilabotaó loú ngoáamilalo.

³² Tio mobisala tomimbihu wolo umaa iloontonga wau ilodungohe-Lio, bo diaaluo penu boli ngotaa maó tapalacaya tou silakusia-Lio.

³³ Taa palacaya tou silakusia-Lio boito, motolongaku maó deú Allahu Taáala banali.

³⁴ Sababu taa uilao mai lo Allahu Taáala mopo tunggulai tataa-heyaalo Allahu Taáala, sababu Rohullah mailohi ode o-Lio lealeaatulo maó.

³⁵ Allahu Taáala momonu Wala-ílo, wau malohudu totoonulalo kawasa to o-Lio.

³⁶ Taa palacaya to Walaó boito mamootapu tutumulo ututuulio tutu wau ohiheo-hiheolo maó. Bo taa diila modungohe to Walaó boito diila moótapu tutumulo. Tio hukuumanio lo Allahu Taáala u ohiheo-hiheolo maó.

4 ¹ Tau-tauwalo Parisi loódungohe deú ti Isa loótapu wau helo polihu lebe dadaata maó muri wolei Yahya.

² (Otutuulio maó ti Isa lohihilao diila lopolihi bo tahiduduá o-Lio wambaó.)

³ Tou ilotaawa li Isa deú tau-tauwalo Parisi maloó dungohu pasali losuáli boito, Tio malo monggato lonto Yudea lohualinga ode Galilea.

⁴ Todelomo nonaóo-Lio boito Tio musi lumaodeó to Samaria.

⁵ Yi malei dungga ti Isa tokota tuwau to Samaria u iluntee Sikhar, diila molaminga monto huta u muloololio mai yilohi lei Yako odelei Yusu walaío.

⁶ Mota teto woluo ali lei Yako. Ti Isa moongolo daá sababu nonaóo-Lio boito, sababu uito Tio lotihuloáa tobiihu ali. Tou boito otanu dulahu matotaú,

⁷ wau tahiduduá li Isa malonaó ode kota mota lotali mai uáalo. Lapataó taabua ngota lo Samaria mai lolime taluhu. Ti Isa lotahuda maó olio, "Ibu, mowali Watia mohile taluhu uilumolo?"

⁸ (4:7)

⁹ Taabua lo Samaria boito lolametaó, "Ti Tuani taulo Yahudi, wau watia taulo Samaria; yilongola ti Tuani mohile uilumolo monto olaatia?" (Sababu tau-tauwalo Yahudi diila owumbuta wolo taulo Samaria).

¹⁰ Ti Isa lolametaó, "Humayaalio otaawamu wowohi mai lo Allahu Taáala wau tatoonu talohile taluhu olemu, tantuulo maó yió lohihilao tamohile uilumolo to o-Lio, wau Tio mamongohi mai olemu taluhu lo tutumulo."

¹¹ Loíya maó lotaabua boito, "Ti Tuani diila otuuntu, wau ali botie modeloma daá. Monto utoonu ti Tuani moótapu mai taluhee lo tutumulo?"

¹² Tei Yako, tipaapa loluuhuru lamiaatia, longohi mai ali botie. Tio lohihilao malohama taluhu yililumio lonteea; odito olo mongo waláio wau binatangi bibiaahio. Wolo tolantobu li Tuani deú ti Tuani talebe udaá wolei Yako?"

¹³ "Taa mongilu taluhu botie mamuli mototoángo," tahuda maó li Isa,

¹⁴ "bo taa mongilu taluhu u mawohi-Ú mai madiilalo mototoángo poli ohiheo-hiheolo maó. Sababu tahulu u mawohi-Ú boito mamowali mato lotaluhu todelomo batangalio u mopentelai ode bulemengio wau mongohi olio tutumulo ututuulio tutu wau ohiheo-hiheolo maó."

¹⁵ Loíya maó lotaabua boito. "Tuani wohiyalo mai taluhu boito olaatia alihu watia diilalo mototoángo; wau watia diilalo palalu mohualingai odia mai mohama taluhu."

¹⁶ "Ponaólo, mota tianga mai dilemu, lapataó muli pohualingai," tahuda maó li Isa.

¹⁷ "Watia diila odile," tametaó lotaabua boito. "Memangi otutu loíyamu," tahuda li Isa,

¹⁸ "Sababu yió mapoóolimo lonika, wau talolaí tatumu-tumulo wolemu botia diila dilemu."

¹⁹ "Botia maílotaawa lowatia ti Tuani nabi ngota," loíya lotaabua boito.

²⁰ "Nenemoya lamiaatia helolubo Allahu Taáala tohuludu botie, bo bangusa li Tuani malo loíya deú bo to Yerusalemu

wambaó tambatilio polubowa lotau to Allahu Taáala."

²¹ "Pomalacayalo," tahuda li Isa olio, "Tosaaáti tuwau tau mamolubo Allahu Taáala, diilalo tohuludu botie wau diila olo to Yerusalemu.

²² Timongoli taulo Samaria hipolubowa tadiila otaawa limongoli, hiambola ami taulo Yahudi hemolubo o-Lio taótaawa lami, sababu osalaamati dudunggaalio mai monto taulo Yahudi.

²³ Bo wakutuulio mamei dungga, tumbaó malei dungga mai, deú wolo kawasa lo Rohullah tau-tauwalo mamolubo li Paapa odelo Allahu Taáala tabanali debo odelo u otohilaa li Paapa.

²⁴ Sababu Allahu Taáala boito Rohu, wau bo wolo kawasa lo Rohullah tau-tauwalo moótubo li Paapa odelo woloolo mola Tio woluo."

²⁵ Taabua boito loloíya maó li Isa. "Otaawa lowatia Olongia Tamoo-poáhua (taílunte Almasi) mamei dungga. Wonu Tio meidungga, Tio mamo poótaa totoonulalo u hitua-tuawua to olanto."

²⁶ "Waúlo Tio," tahuda li Isa, "Waú tabotia donggo hemo bisala wolemu."

²⁷ Toú boito tahiduduá li Isa lohualingai. Timongolio lolinggolabu loóonto li Isa hemobisala wolo taabua ngota. Bo diaaluo penu boli ngotaa maó limongolio talohintu totaabua boito, "Ti ibu palalu wolo?" meaalo lohintu toli Isa, "Yilongola ti Paaá hemobisala wolo taabua boito?"

²⁸ Yi taabua boito lololaa maó tombelio teto lapataó tilumeteó ode kota wau lolóiya totau-tauwalo mola teto.

²⁹ "Dulo mai bilohi talo poótaa mai olaatia totoonulalo hitua-tuawua u mapeéenta pilohutu lowatia. Wolo otanu Tiolo boito Olongia Tamoo-poáahua?"

³⁰ Yi tau-tauwala boito olo malo lolaa maó kota tulusi lonaó odeli Isa.

³¹ Toú boito tahiduduá o-Lio malo loduo li Isa lolamelo, "Paaá Guru," uali mongolio, "toduwolo molamelo."

³² Boti Isa lolametaó, "Woluo uáalo to ola-Ú, udiila otaawa limongoli."

³³ Yi tahiduduá o-Lio mahipo hihintua, "Wolo woluo talodelo mai uáalo ode o-Lio?"

³⁴ Lapataó ti Isa lotahuda maó, "Uáalo-Ú yito moduduá u otohilaa-Lio lo tamalolao mai ola-Ú, wau mopoó lapato kalaja uiludu-Lio mai ola-Ú.

³⁵ Timongoli hemoloíya, 'Donggo wopato hula mola sembo pongotolaalo.' Bo Waú moloíya mai olemu: Bilohi mota hahaa-laboluwalo u mahilalahe, dapadapato otololo:

³⁶ Taa u mongotolo malo lumulaó hipo lolimoa wuupalio wau hipo himoá tilapulio duólo tumumulo ututuulio tutu wau ohiheo-hiheolo maó. Yi taa u momuáyadu wau taa u mongotolo mowali motisanangi peé-péenta.

³⁷ Lumadu botie otutu olo, 'Tangota mopomulo, tawewo mongotolo.'

³⁸ Waú mopoáhu olimongoli mota mongotolo to halabolu udiila tilolopani limongoli; taawewo malo kalaja mola teto, wau timongoli tamololimo paéeda lokalaja limongolio."

³⁹ Dadaata taulo Samaria tuango kota boito palacaya li Isa, sababu taabua boito loloíya, 'Tio lolele mai to olaatia totoonulalo hitua-hituawua u mapeéenta pilohutu lowatia.'

⁴⁰ Yi touú tau-tauwalo Samaria boito lodunggay woli Isa, timongolio lohile tióotutua alihu Tio motibiluloá woli mongolio. Oditolio ti Isa malo tibiluloá teto duuhui mola hiheolio.

⁴¹ Lapataó lebe dadaata maó poli taa palacaya li Isa sababu wolo u hepilo ngaajali-Lio lohihilao olimongolio.

⁴² Timongolio lolóiya maó ode taabua boito, "Ami palacaya masaatia, diila bo kalena u pilolelemu mai olami, bo sababu ami lohihilao malo dungohe o-Lio, wau otaawa lami deú Tio memangi Tamoo-poáhua dunia."

⁴³ Lapataó duuhui mola lotibiluloá to Sikhar, ti Isa lonaó mola ode Galilea.

⁴⁴ Ti Isa lohihilao malo tahuda, "Nabi ngota diila hulumatiolio to lipulio lohihilao."

⁴⁵ Bo tou Tio leitungga mola ode Galilea, tau-tauwalo mola teto lolutulaó o-Lio wolo hiwengahe, sababu timongolio woluo to Yerusalemu to Dulahu Buka Paska, wau maloóonto ngoáamila u hepilohutu li Isa.

⁴⁶ Lapataó ti Isa luli lohualingo ode Kana to Galilea, toutoonuu Tio mapeéenta lomolió taluhu lowali angguru. Tokota boito woluo pogawee ngota lo pamalenta, walaño donggo mongongoto to Kapernaum.

⁴⁷ Tou ilodungohelio deú ti Isa malei dungga ode Galilea lonto Yudea, tio malonaó mota odeli Isa wau loloduo li

Isa ode Kapernaum u mopoóluli walaío ungopeeé mate.

⁴⁸Ti Isa lotahuda maó ode pogawee lo pamalenta boito, "Wonu timongoli diila loóonto totoonulalo moólinggolabe, yi timongoli diila palacaya."

⁴⁹"Tuani," ualo pogawee lo pamalenta boito, "aliheó ponaólo mai tou walaó lowatia boito diipo mate."

⁵⁰Tahuda maó li Isa olio, "Pohualingolo, walaúmu moluli." Tau boito palacaya u tilahuda li Isa, tulusi tio malonaó.

⁵¹Tohuungo dalalo, tahi pomayalio malonaó mai ode olio wau lopohabari maó, "Walaí Tuani maloluli."

⁵²Lapataó tio malohintu olimongolio, jamu ngoolo walaó boito loluli. Timongolio lolametaó, "Olaango tanu jamu satu mohulonou polipitio yilooli."

⁵³Lapataó tiyamo lowalaó boito loóéela mola deú tosaaáti boito ti Isa lotahuda olio, "Walaúmu moluli." Yi tio wau ngoáamila ngaalaálio palacaya li Isa.

⁵⁴Uitolo u moólinggolabe oluolio u pilohutu li Isa to Galilea tou dudunggaalio mai lonto Yudea.

5¹ Lapataó uito woluo lameyangi lo Yahudi, yi ti Isa lonaó mola ode Yerusalemu.

²To Yerusalemu totili "Huhebu lo Himba" woluo kulamu tuwau, u todelomo bahasa lo Ibrani iluntee Betesda. Mota teto woluo sulambe mohelu limo.

³To susuu–lambeyalo boito dadaata taa mongongoto hibalata; woluo taapitoó, woluo taapenggo, wau woluo tadidu mowali monaó. [Timongolio ngoáamila hipo himawa taluhu tokulamu boito mobuólai.

⁴Sababu tingga maito malaíkati lo Eeya motuhutai ode delomo kulamu boito wau mopo buólai taluhio. Wau tahi ngongota tabohulio tumuwoto ode delomo kulamu boito toú taluhio donggo mobuólo mamoluli penu boli ngongota wolo u hedutolalio.]

⁵Totambati boito woluo talolaí ngota u ngongotio matolo pulaa walu lotaunu hiheolio.

⁶Ti Isa loóonto olio balabalata mola teto, wau otaawa li Isa deú tio malohiheo daá mongongoto; yi ti Isa malohintu olio, "Mohuto yió moluli?"

⁷Taa mongongoto boito lolametaó, "Paaá, diaaluo taatewe umopo tuwotaó olaatia ode delomo kulamu toú taluhio mobuólai. Wau toú watia maóde kulamu, taawewo maa tilumuwoto leimulo."

⁸Yi ti Isa lotahuda maó olio, "Bongulo mola, bintaáalo amongumu wau ponaólo."

⁹Toú boitolo olo tau boito loluli. Tio malo mintaá amongio wau lonaó. Suáli boito lotoduo mai todulahu Saabati.

¹⁰Sababu uito tahidihima kawasa lo Yahudi malo loíya totaa boheli loluli maó boito, "Dulahu botie dulahu Saabati. Yió diila mowali momintaá amongumu."

¹¹Bo tau boito lolametaó, "Taa u lopoóluli mai olaatia engonti boito talo poáhu olaatia lomintaá amongo lowatia wau loponaó."

¹²"Tatoonu Tio talo poáhu olemu lomintaá amongumu wau lononaó?" yilintu maó limongolio.

¹³Bo tailoluli boito diila lotota tatoonu taulio, sababu ti Isa mailooli lomola towolota lotaa dadaata boito.

¹⁴Lapataó ti Isa lodunggaya wolo tau boito todelomo Bele lo Eeya, wau lotahuda maó olio, "Botia yió maloluli. Diilalo

pohutu dusa, alihu yió diila moólaasa mai suáli ulebe moleetaó."

¹⁵Yi malonaó tau boito lapataó lopoótaa to tahidihima kawasa lo Yahudi deú ti Isaalo talo poóluli olio.

¹⁶Wau sababu uito timongolio mahipo tolopania mopoósuusa li Isa, sababu Tio lopoóluli tau todulahu Saabati.

¹⁷Boti Isa lotahuda maó olimongolio, "Allahu Taáala debo hemo kalaja tunggula botia, wau Waú olo musu mokalaja."

¹⁸Tahuda boito maloó sababu to tahidihima kawasa lo Yahudi lebe maó hipo tolopania u momate o-Lio mate-mateelo maó. Timongolio lohutu uito, diila bo sababu u Tio lolambanga wuúdu lo agama tomimbihu dulahu Saabati, bo olo kalana Tio malo tahuda deú Allahu Taáala boito ti Paapa-Lio; boliilio maó Tio mopo tutuuwauwa batanga-Lio wolo Allahu Taáala.

¹⁹Ti Isa lolametaó ode tau-tauwala boito odie, "Pomalacayalo, Walaó diila mowali mohutu wolo-wolo, wolo kawasaa-Lio lolohilao. Tio bo mohutu wolo u iloontonga-Lio pilohutu li Paapa-Lio. Sababu wolo u pilohutu li Paapa-Lio, uito olo u pohutuo lo Walaó.

²⁰ Sababu Allahu Taáala lomonu to Walaó wau lopobilohei o-Lio ngoáamila u pilohutu-Lio lohihilao. Tumbaó Allahu Taáala mamopo bilohei o-Lio totoonulalo huhutu ulebe udaá maó poli tilinggula timongoli molinggolabe.

²¹ Allahu Taáala boito mopobongu mai taamate, wau mongohi olimongolio tutumulo ututuulio tutu wau ohiheo-hiheolo maó; odito olo Walaó mongohi mai tutumulo u ohiheo-hiheolo maó totaa mohuto wohia-Lio tutumulo.

²² Allahu Taáala lohihilao diila momutoó boli olita. Ngoáamila kawasa u momutoó mailudu-Lio to Wala-ío.

²³ Allahu Taáala lohutu uito alihu ngoáamila tau mohulumati to Walaó debo odelo timongolio mohulumati to Allahu Taáala. Taa diila mohulumati to Walaó diila mohulumati olo to Allahu Taáala tamalolao mai to Walaó.

²⁴ Otutu banali totoonulalo tahudaa-Ú botie: Taa umopoó tuotaó totoonulalo tahudaa-Ú, wau palacaya o-Lio talolao mai ola-Ú, o tutumulo ututuulio tutu wau ohiheo-hiheolo maó. Tio diila tahukuu-maniyolo; tio malo lopato lonto opopate wau loótapu tutumulo.

²⁵ Pomalacayalo: Mamei dungga wakutuulio -- tumbaó malei dungga wakutuulio -- taamate mamo dungohe suala lo Walaó Allahu Taáala. Wau taa modungoheó matumumulo.

²⁶ Debo odelo Allahu Taáala lohihilao bungo lo tutumulo, yi Tio olo mopowali mai wala-ílo bungo lotutumulo.

²⁷ Tio malohudu ode wala-ílo haku u momutoó, sababu Tio Walaó Manusia.

²⁸ Diila maó polinggolabu timongoli modungohe suáli botie, sababu wakutuulio mamei dungga deú ngoáamila taa mailate modungohe sualaa-Lio,

²⁹ Iapataó lumualai monto kuubulu. Taa malohutu u mopiohe mamobongu mai ode tutumulo. Bo taa malohutu u moleeto mamobongu mai u hukuu-maniyolo."

³⁰ "Waú diila mowali mohutu wolo-wolo moduduá otohilaa-Ú lohihilao. Waú bo momutoó motuuúde loú wolo u pilomalentai lo Allahu Taáala. Wau putuusani-Ú aadili, sababu Waú diila moduduá u otohilaa-Ú lohihilao, bo wambaó u otohilaa lo Allahu Taáala talolao mai ola-Ú.

³¹ Humayaalio Waú mongohi mai sakusi pasali lobatanga lohihilao, diila mowali palacayalo.

³² Bo woluo taawewo tamongohi sakusi tomimbihu ola-Ú, wau otaawa-Ú deú u silakusialio boito otutu.

³³ Timongoli malolao utolia odelei Yahya, wau tio malongohi sakusi ubanali tomimbihu ola-Ú.

³⁴ Suáli botie tahudaa-Ú mai, diila bo sababu Waú momalalu sakusi monto manusia, bo alihu timongoli poáahuwolo.

³⁵ Tei Yahya boito debo odelo tohe uléi-léiita wau mopo bulilangai lotilango. U ngopeé mola waktu timongoli sanangi mololimo tinelio boito.

³⁶ Bo u silakusiya-Ú lebe udaá maó loú silakusia lei Yahya. Wolo u masaatia pilohutu-Ú botie, deúito-yito kalaja u pilotuugasi mai li Paapa ola-Ú, u mopobukuti deú ti Paapa malolao mai ola-Ú.

³⁷ Wau ti Paapa talolao mai ola-Ú olo longohi sakusi pasali ola-Ú. Timongoli diipo peéenta maó lodungohe sualaa-Lio meaalo loóonto baya-Lio.

³⁸Tataahe-Lio diila leitahu todelomo hilaamu sababu timongoli diila palacaya to ola-Ú tailao-Lio mai.

³⁹Timongoli mopoóolato kitabi sababu helantobu limongoli deú wolo dudelo boito timongoli otutumulo ututuulio tutu wau ohiheo-hiheolo maó.

⁴⁰Bo timongoli diila motohilaa monaó mai ode ola-Ú u moótapu tutumulo ohiheo-hiheolo maó.

⁴¹Waú diila mololohe poloílaalo momuji monto manusia.

⁴²Oonuhe-Ú timongoli. Otaawa-Ú timongoli diila motoliánga to Allahu Taáala todelomo hilaamu.

⁴³Waú dungga-dungga mai wolo kawasa li Paapa-Ú, bo timongoli diila mololimo ola-Ú. Bo wonu taawewo dungga-dungga mai wolo kawasaalio lohihilao, timongoli motohilaa mololimo olio.

⁴⁴Woloolo mola timongoli moó palacaya, wonu timongoli bo ohilaa meípuji monto timongotamu, wau diila motolopani u moótapu poloílaalo momuji monto Allahu Taáala u Tuwa-tuwaulo?

⁴⁵Diila maó polantobu Waú mamopotala olimongoli totalu lo Allahu Taáala.

Tumbaó tamaa mopotala olimongoli yito tei Musa.

⁴⁶ Humayaalio timongoli palacaya olei Musa, timongoli mapalacaya to ola-Ú, sababu pasali-Úlo tunggula tio loluladei.

⁴⁷ Bo wonu timongoli diila palacaya tou wolo u tiluladio lei Musa, woloolo mola timongoli moó palacaya tou wolo upilo tahudaa-Ú mai?"

6 ¹ Dengolo wakutu lapatio maó ti Isa lonaó mola ode ngotuwali lobulalo Galilea, u ilunte olo Bulalo Tiberias.

² Leidungga mola odito, dadaata talo duduá o-Lio sababu timongolio maloóonto u moólinggolabu hepilohutu-Lio wolo lopoóluli tahi ngongota.

³ Ti Isa lotaódee mola ode huludu, lapataó lotihuloá mola teto wolo tahiduduá o-Lio.

⁴ Towakutu boito mabolo ngopeé mola Dulahu Buka Paska lo Yahudi.

⁵ Tou ti Isa lomilohe mota ode pali-Tio, Tio loóonto taa dadaata hinaówa mai ode o-Lio. Yi Tio lotahuda maó odelei Pilipus. "Touútonu mowali potaliyanto uáalo, alihu ngoáamila tau botie mowali molamelo?"

⁶ (Maílotaawa li Isa wolo u mapo hutuo-Lio, bo Tio lotahuda maó odito sababu Tio motohilaa motesi olei Pilipus.)

⁷ Tei Pilipus lolametaó, "Roti u ngohalaga dulo hetuto doi talaá diila tamoó tuheta totau-tauwalo botie, eleponu ngota-ngota bo moótapu ngoídi wambaó."

⁸ Ngotaalio lomuri li Isa wewolio deúito-yito tei Andreas, wutatei Simon Petrus malo loíya,

⁹ "Tewe woluo walaó talolaí wolo limo lobotu roti wau uponula dulo botu. Bo wolo boliilio uito totaa dadaata botie?"

¹⁰ "Ahulaalo mota tau-tauwalo boito motihuloó," tahuda maó li Isa. Totambati boito o huóyoto dadaata, oditolio tau-tauwala boito malo tihuloó to huóyoto -- ngoáamilalo tanu limo lolihu lota mongo loláí.

¹¹ Lapataó ti Isa malohama roti boito tulusi losukuru mola ode Allahu Taáala. Lapataó uito Tio lolaya-layadeó roti boito totaa dadaata. Lapataó Tio lolaya-layadeó uponula boito, wau timongolio malo lamelo lotolu-toluulo maó.

¹² Lapataó ngoáamilalo malo lamelo tunggula lobutuhu ti Isa lotahuda ode tahiduduá o-Lio, "Yimoálo labitio lo uáalo boito; diila bolo woluo u mohuáyadu."

¹³ Lapataó timongolio malo himoá mopulaa dulo kalanji hipolua lebe lo uáalo

monto limo lobotu roti upilo lamela lotaa dadaata boito.

¹⁴Toú taa dadaata loóonto maó moólinggolabe u pilohutu li Isa, timongolio malo loíya, "Otutu, utieelo Nabi tahe halapuwolo meidungga mai ode dunia!"

¹⁵Otaawa li Isa timongolio malonaó monaó mai momakusa o-Lio mowali olongia limongolio. Sababu uito Tio malolahi ode madala ohuludu.

¹⁶Toú mahemo diólomai, tahiduduá li Isa lotuhutaa mola ode bulalo.

¹⁷Lapataó timongolio malo titaé tobulotu lobalango bulalo boito lotidulunga ode Kapernaum. Dulahu malo diólomai ti Isa debo diipo leidungga mai ode limongolio.

¹⁸Toú boito bulalo mahemo buóolai sababu dupoto daá.

¹⁹Toú malobite mota tanu limo meaalo wolomo kilo, timongolio loóonto mota li Isa tahu-tahudei ode bulotu wau naónaó totudu lotaluhu. Timongolio mailoohe daá.

²⁰Boti Isa lotahuda olimongolio, "Diila oohe, utie Waú!"

²¹Tulusi wolo sanangi lohilao timongolio malo lolimo o-Lio ode delomo bulotu, wau

tosaaátilo boito bulotu limongolio boito malei dungga mota ode tambati u pilatuju.

²² Loloombulio mola taa dadaata tadonggo leitolaa to ngotuwali lobulalo, lotota loútau deú engontielio bo woluo bulotu tuwau mola teto. Otaawa limongolio deú tahiduduá li Isa malo monggata mota wolo bulotu boito, hiambola ti Isa diila loduduó.

²³ Lapataó demohelu ngoolo bulotu lonto kota lo Tiberias leitungga mai wau lotirabua totili lotambati lotaa dadaata boito hipo lamela roti u mailapato silukuru mola lo Eeya.

²⁴ Toú taa dadaata boito loóonto deú mopio ti Isa meaanto tahiduduá o-Lio diaaluo teto, timongolio olo malo titaé to bubuu-lotuwalo boito wau lobite ode Kapernaum mola mololohe li Isa.

²⁵ Toú tau-tauwala boito lodunggaya woli Isa to ngotuwali lobulalo, timongolio lohintu o-Lio, "Paaá Guru, omolua ti Paaá leitungga mai odie?"

²⁶ Ti Isa lolametaó, "Otutu, timongoli hemo lolohe ola-Ú diila bo sababu timongoli malo ngalati makusudu totoonulalo moólinggolabe u hepilohutu-

Ú, bo sababu timongoli malo lamela tunggula lobutuhu.

²⁷ Diila maó pokalaja u moótapu mai uáalo u mowali mopulito wau mobunuto. Pokalajaalo u moótapu mai uáalo udiila mowali mobunuto u mongohi tutumulo ututuulio tutu wau ohiheo-hiheolo maó. Uáalo boito mawohi mai lo Walaó Manusia olemu, sababu Tio mapiluduó lo Allahu Taáala."

²⁸ Lapataó timongolio lohintu maó o-Lio, "Amiaatia musi mohutu maó wolo u moponaó kahandaki lo Allahu Taáala?"

²⁹ Ti Isa lolametaó, "Utieelo u otohilaa lo Allahu Taáala monto olimongoli: pomalacayalo o-Lio tailao mai lo Allahu Taáala."

³⁰ "Wonu odito," uali mongolio, "bukuti wolo u mowali wohi mai li Paaá alihu amiaatia moóonto wau palacaya li Paaá? Wolo u mapohutuo li Paaá?"

³¹ Tinenemoya lamiaatia lolamela manna tohuta datahu u luasi daá wau delita, debo odelo u leitulade todelomo Kitabi, 'Tio longohi olimongolio uáalo roti lonto sologa!'"

³² Lapataó ti Isa lotahuda maó olimongolio, "Pomalacayalo: Diila tei

Musa, boti Paapa-Úlo tamongohi mai olemu roti u otutuulio maó monto sologa.

³³ Sababu roti uwahi mai lo Allahu Taáala yito Tio tamo tuhutai monto sologa wau mongohi tutumulo ode manusia todunia."

³⁴ "Paaá," uali mongolio, "wohiyalo mai laito roti boito ode lamiaatia."

³⁵ "Waúlo roti tamongohi mai tutumulo," tahuda maó li Isa olimongolio. "Taa u monaó mai ode ola-Ú diila tapolaangolo poli u ohiheo-hiheolo maó." Wau taa u palacaya ola-Ú diila tamotoángo poli u ohiheo-hiheolo maó.

³⁶ "Bo debo odelo u mapilo tahuda-Ú mai olemu, eleponu timongoli maloóonto ola-Ú, timongoli diila palacaya.

³⁷ Ngoáamila tailudu mai li Paapa ode ola-Ú mamonaó mai ode ola-Ú. Waú diila tamopo touli boli tatoonu tamonaó mai ode ola-Ú.

³⁸ Sababu Waú lotuhutai lonto sologa, diila mai mohutu u otohilaa-Ú lohihilao, bo u otohilaa-Lio lo talolao mai ola-Ú.

³⁹ Wau uti-utieelo u otohilaa-Lio lo talolao mai ola-Ú: alihu monto ngoáamila tailudu-Lio mai ola-Ú, diaaluo penu boli ngotaa maó tamooli; bo alihu Waú

mopobongu mai olimongolio to Dulahu Kiama.

⁴⁰ Memangi uti-utieelo u otohilaa li Paapa-Ú: alihu ngoáamila tau moóonto to Walaó boito wau palacaya o-Lio o tutumulo tutu wau ohiheo-hiheolo maó, wau muli bongulo-Ú mai to Dulahu Kiama."

⁴¹ Tau-tauwalo Yahudi maloingo toli Isa, sababu Tio lotahuda: "Wau rotu talo tuhutai lonto sologa."

⁴² Timongolio lolóiya maó, "Diila maa Tio botie ti Isa walaée Yusu? Otaawa lami mongo dulaá-Lio! Woloolo mola Tio mowali moloíya deú Tio malo tuhutai lonto sologa?"

⁴³ Lapataó ti Isa lotahuda ode limongolio, "Diila maó poingo.

⁴⁴ Diaaluo penu boli ngotaa tamowali monaó mai ode ola-Ú, wonu Allahu Taáala talolao ola-Ú, diila modelo mai olio ode ola-Ú; wau tatoonu tamonaó mai ode ola-Ú, mabongulo-Ú to Dulahu Kiama.

⁴⁵ Todelomo Buku lomongo nabi tulatulade odie, 'Ngoáamila tau maáalarío lo Allahu Taáala.' Oditolio ngoáamila taa modungohe li Paapa-Ú wau mobalajali monto o-Lio, monaó mai ode ola-Ú.

⁴⁶ Uito diila oboliilio deú woluo tamaa loóonto li Paapa-Ú. Bo Tio tadungga-dungga mai lonto Allahu Taáala, maloóonto li Paapa.

⁴⁷ Ototai maó: Taa u palacaya, o tutumulo ututuulio tutu wau ohiheo-hiheolo maó.

⁴⁸ Waúlo roti tamongohi mai tutumulo.

⁴⁹ Tinenemoyamu lolamelo manna tohuta datahu u luasi daá wau delita wau timongolio yilate olo.

⁵⁰ Bo diila odito wolo roti u lotuhutai lonto sologa; taa u molamela roti boito diila tamaate.

⁵¹ Waúlo roti u lotuhutai lonto sologa -- roti u mongohi tutumulo. Taa u molamela roti botie matumumulo ohiheo-hiheolo maó. Roti u mawohi-Ú ode tutumulo manusia todunia ui-uitolo tapu-Ú."

⁵² Loódungohe uito, tau-tauwalo Yahudi mahipo hahaamawa ngota-timongota. "Woloolo mola tau botie mowali mongohi tapu-Lio ode olanto u polamelo?" uali mongolio.

⁵³ Lapataó ti Isa lotahuda maó olimongolio, "Pomalacayalo: Wonu timongoli diila molamelo tapu lo Walaó Manusia wau mongilu duhu-Lio, timongoli diila taótu-otutuulo maó tumumulo.

⁵⁴ Taa u molamelo tapu-Ú wau mongilu duhu-Ú o tutumulo ututuulio tutu wau ohiheo-hiheolo maó wau Waú mamopo bongu mai olio to Dulahu Kiama.

⁵⁵ Sababu tapu-Ú tutuulio tutu uáalo, wau duhu-Ú tutuulio tutu minumani.

⁵⁶ Taa u molamelo tapu-Ú wau mongilu duhu-Ú, debo motituwau wola-Ú, wau Waú wolio.

⁵⁷ Allahu Taáala tatumu-tumulo boito, lolao mai ola-Ú wau Waú olo tumumulo monto Allahu Taáala. Odito olo taa u molamelo tapu-Ú matumumulo monto ola-Ú.

⁵⁸ Uti-utieelo roti u lotuhutai lonto sologa; diila debo odelo roti u pilolameli nenemoyamu. Sababu toú malo lamelo roti boito, timongolio debo yilate olo. Bo taa u molamelo roti botie matumumulo ohiheo-hiheolo maó."

⁵⁹ Ngoáamilalo boito pilotahuda li Isa toú Tio helo ngaajali tobele potabiaalo to Kapernaum.

⁶⁰ Toú loódungohe tataa-heyaalo li Isa boito, dadaata towolota lo tahiduduá o-Lio lolóiya maó, "Pongaajali botie mailaba buheetio. Tatoonu tamowali mololimo maó!"

⁶¹ Ti Isa lohihilao motota deú tahiduduá o-Lio hiwingoa pasali losuáli boito. Yi Tio malo tahuda, "Wolo timongoli diila sanangi sababu tataa-heyalo boito?"

⁶² Woloolo mola waliilio dewonu timongoli moóonto Walaó Manusia muli mobotula mola ode tambati-Lio u bohulio?

⁶³ Tamohutu mai manusia tumumulo yito Rohullah. Olootolo manusia diaaluo hunalio. Tataa-heyalo upilo tahuda-Ú mai olemu botie tataa-heyalo Rohullah wau tataa-heyalo u mongohi tutumulo.

⁶⁴ Bo debo woluo olo towolota limongoli tadiila mohuto palacaya." (Maílotaawa li Isa toú bohulio mai titatita tadiila mohuto palacaya, wau tatoonu tamamo hiyanati o-Lio.)

⁶⁵ Lapataó ti Isa luli lotahuda maó, "Uitolo sababuulio Waú mopoótaa mai olemu deú diaaluo penu boli ngotaa maó tamowali monaó mai ode ola-Ú, wonu ti Paapa-Ú diila mongohi olio."

⁶⁶ Tumulalo mai tosaaáti boito dadaata tahiduduá o-Lio, lololaa maó o-Lio, wau diilalo mohuto moduduá o-Lio.

⁶⁷ Lapataó ti Isa lohintu maó to tamo pulaa duulota tahiduduá o-Lio, "Wolo

timongoli olo mohuto mololaa maó
ola-Ú?"

⁶⁸ "Eeya," ualei Simon Petrus o-Lio, "ode
tatoonu mongowatotia musí monaó?
Tahuda lo Eeya mongohi tutumulo
ututuulio tutu wau ohiheo-hiheolo maó.

⁶⁹ Mongo watotia mapila-lacaya wau
yakini deú Eeyaalo utolia tamantali lonto
Allahu Taáala."

⁷⁰ Ti Isa lolametaó, "Wolo diila maa
Waú talo lulaotaó olimongoli tamo pulaa
duulota botie? Bo ngota towolota limongoli
yito lati!"

⁷¹ Tapilatuju li Isa yito tei Yudas walaée
Simon Iskariot. Sababu eleponu tei Yudas
ngotaalio lo tamo pulaa duulota muri li
Isa, tio mamó hiyanati li Isa.

7¹ Lapataó uito ti Isa malonaó ode
utoonulalo maó to Galilea. Tio diila
lohuto ode madala lo Yudea sababu
tahidihima kawasa lo Yahudi mola teto
o makusudu momate olio mate-mateelo
maó.

² Towakutu boito malembidei Dulahu
Buka Wombohe Duungo.

³ Yi mongo wutati Isa lolóiya maó o-Lio,
"Tolailo maó tambati botie wau ponaólo

ode Yudea, alihu tahiduduá ole-Mu mowali momilohe olo kalajaa-Mu.

⁴ Diaaluo taa u mamoluuó wolo u pohutuolio, wonu tio motohilaa mowali otaawa lotaa dadaata. Wonu Yió mohutu susuu-aliyaalo debo odelo uito ngoilanggubu dunia musí motota!"

⁵ (Sababu mongo wuta-Tio lohihilao olo diila palacaya o-Lio).

⁶ "Diipo wakutuulio ola-Ú," tahuda maó li Isa ode limongolio, "bo ode limongoli timíidu wakutu mowali.

⁷ Dunia botie diila pongalo aakali molonuí mongoli. Bo Waú memangi lonuó lodunia, sababu Waú laito hemo tahuda ode dunia deú huhutuulio moleeto.

⁸ Ponaólo timongoli lohihilao ode lameyangi boito. Waú diila monaó sababu diipo wakutuulio ola-Ú."

⁹ Oditolo tahuda li Isa ode mongo wuta-Tio, wau Tio olo malo tibiluloá to Galilea.

¹⁰ Lapataó mongo wuta-Tio lonaó ode lameyangi boito, wolo poó-poóoyo ti Isa malonaó lohihilao loú diila ilotaawa lotau.

¹¹ Ngotilonggadu lameyangi boito, tahidihima kawasa lo Yahudi hemo lolohe

o-Lio wau hemohintu-hintu, "Touútoonu Tio?"

¹² Dadaata tau mahipo loloohuma tomimbihu o-Lio. Woluo talo loíya, "Tio taa mopiohu." Waluo poli talo loíya, "Diila! Tio hemo polapalo totaa dadaata."

¹³ Bo diaaluo penu boli ngotaa maó tabuheli mobisala juujulu tomimbihu o-Lio sababu timongolio moohe to tahidihima kawasa lo Yahudi.

¹⁴ Tohuungo lo lameyangi, ti Isa tilumuwoto ode delomo Bele lo Eeya, tulusi lolumulaó longajali.

¹⁵ Tahidihima kawasa lo Yahudi lolinggolabe daá wau loloíya, "Woloolo mola tau botie malotota odito daatalio, lebe-lebe pomaó Tio diipo peéenta maó helo sikola?"

¹⁶ Ti Isa lolametaó, "U pilongajali-Ú botie diila ajalani-Ú, bo ajalani-Lio lo talolao mai ola-Ú.

¹⁷ Taa u mohuto moduduó u otohilaa lo Allahu Taáala, mamotota maó wolo pongajali-Ú boito dudunggaalio mai monto Allahu Taáala meaambo monto ola-Ú lohihilao.

¹⁸ Taa u mongohi ajalanilio lohihilao mololohe ohulumati ode batangalio

lohihilao. Bo taa u mololohe ohulumati ode o-Lio tailaolio mai, tau boito juujulu, diaaluo wimbulo to olio.

¹⁹Diila tei Musa tamaa longohi mai papaa-lentawalo Allahu Taáala ode olemu? Bo towolota limongoli diaaluo maó talo duduá papaa-lentawalo boito. Yilongola timongoli ohilaa momate ola-Ú mate-mateelo maó?"

²⁰Taa dadaata boito lolametaó, "Yió biyongo! Tatoonu taóhilaa momate ole-Mu mate-mateelo maó?"

²¹Ti Isa lolametaó, "Bo wambaó tuwau kalaja pilohutu-Ú todulahu Saabati, wau timongoli lolinggolabu.

²²Tei Musa longohi mai olimongoli wuúdu u polunaalo -- eleponu sunati boito otutuulio maó asaliilio mai diila lonto olei Musa bo lonto mongo tiyamo loluuhuru toú dipolulio mai tei Musa. Sababu uito, penu boli todulahu Saabati timongoli ohilaa moluuna tau.

²³Wonu timongoli mohutu uito alihu diila maó molambanga wuúdu lei Musa pasali loú sunati, yilongola timongoli moingo ola-Ú, sababu lopoóluli ngangaa-waálo maó batanga lotau todulahu Saabati?

²⁴ Diila maó pomutoó tau bo dadaasari toú oontonga, bo dadaasari toú aadili."

²⁵ Lapataó woluo dengolo lota taulo Yerusalemu lolóiya, "Diila maa Tio botie tau-Lio tahe lolohulo u pateelo mate-mateelo maó?

²⁶ Bilohi maó Tio hemobisala lou bebase totalu lotaa dadaata, wau diaaluo tamolóiya wolo-wolo to o-Lio! Wolo tahidihima kawasa to olanto botie tanu malotota lou tau deú Tio botie Olongia Tamoo-poáahua?

²⁷ Bo wonu Olongia Tamoo-poáahua boito meidungga mai diaaluo penu boli ngotaa maó tamotota monto utoonu asalii-Lio! Lebe-lebe pomaó otaawanto lonto utoonu asalii-Lio lotau botie."

²⁸ Lapataó, toú ti Isa donggo hemo ngaajali todelomo Bele lo Eeya, Tio longibode mola wolo suala daá, "Oditolio otaawa limongoli tatoonu Waú botie, wau lonto utoonu asalii-Ú? Waú diila leidungga mai sababu otohilaa-Ú lohihilao. Waú yilao-Lio mai lo taóhaku lolao mai ola-Ú, wau Tio mowali palacayalo. Bo timongoli diila moóonuhe o-Lio.

²⁹ Waú moóonuhe o-Lio, sababu Waú asaliilio mai lonto o-Lio, wau Tiolo talolao mai ola-Ú."

³⁰ Touú boito timongolio ohilaa moheúpa li Isa, bo diaaluo tabuheli modihu o-Lio, sababu diipo leidungga wakutuulio.

³¹ Dadaata towolota lotau-tauwalo boito mapilacaya o-Lio, wau hemoloíya, "Wonu Olongia Tamoo-poáhua boito meidungga mai, wolo Tio mowali mohutu lebe dadaata maó u moólinggolabe wolo tau botie?"

³² Tau-tauwalo Parisi loódungohe woloolo mola taa dadaata boito hipo lolohuma pasali li Isa. Sababu uito peé-peéenta wolo mongo iimamu taúwa, timongolio malo poáhu dengolo lota tamoo-kawalia Bele lo Eeya loheúpa li Isa.

³³ Ti Isa lotahuda maó totaa dadaata boito todelomo Bele lo Eeya, "Bo ngopeé mola wambaó Waú donggo peé-peéenta woli mongoli. Lapataó uito Waú mamuli mohualinga mola ode talolao mai ola-Ú.

³⁴ Timongoli mamo lolohe ola-Ú, bo diila moódungga ola-Ú; sababu timongoli diila moónaó mai ode tambati touútonu Waú woluo."

³⁵ Lapataó tahidihima kawasa lo Yahudi malo loíya ngota timongota "Tau botie ohilaa monaó ode utoonu tilinggula ito diilalo moódungga o-Lio? Wolo Tio ohilaa monaó ode tau-tauwalo Yahudi tahi biluloáawa to bulemengo lipu towolota taulo Yunani, wau mongaajali taulo Yunani?

³⁶ Wolo makusudu-Lio wolo lotahuda deú ito mamololohe o-Lio bo diila moódungga o-Lio wau deú ito diila moónaó mai ode tambati touótonu Tio woluo?"

³⁷ Topulito dulahu lo lameyangi boito, deúito-yito dulahu ulaba-labaalo polohuna daá, ti Isa tilimihulaó todelomo Bele lo Eeya tulusi longiibode, "Taa u mototoángo ponaólo mai ode ola-Ú mai mongilu.

³⁸ Tomimbihu taa upalacaya to ola-Ú, tulatulade todelomo Kitabi, 'Monto delomo hilaalio tumolohei totoo-lohuwaalo taluhu u mongohi tutumulo.'"

³⁹ (Ti Isa lotahuda pasali lo Rohullah, u matolimo lotau-tauwalo tapalacaya o-Lio. Sababu tou boito Rohullah diipo yilohi-Lio mai; sababu ti Isa diipo pilolaió wolo opopate-Lio.)

⁴⁰ Dadaata taa loódungohu wolo upilo tahuda li Isa, wau towolota limongolio woluo talo loíya, "Tau botie maatantu Nabi boito!"

⁴¹ Tawewo loloíya, "Utieelo Olongia Tamoo-poáhua!" Bo woluo olo talo loíya, "Aa, diila pongalo aakali Olongia Tamoo-poáhua dudunggaalio mai lonto Galilea?"

⁴² Todelomo Kitabi tulatuladu deú Olongia Tamoo-poáhua yito wali mai lei Dauda wau mamei dungga monto Betlehemu, deúito-yito kambungu pilohuluta loduhu lei Dauda."

⁴³ Pulitio maó tau-tauwalo mahipo hahaamawa tomimbihu li Isa.

⁴⁴ Woluo taóhilaa moheúpa o-Lio, bo diaaluo penu boli ngotaa maó tamodihu o-Lio.

⁴⁵ Toú tahi pokawalia Bele lo Eeya taa ilahulalio mota loheúpa li Isa luli lohualingai, mongo iimamu tauwa wau tau-tauwalo Parisi boito lohintu maó olimongolio, "Yilongola timongoli diila lodelo mai o-Lio odia?"

⁴⁶ Tahi pokawalia boito lolametaó, "Waa, diipo peéenta maó woluo tahelo bisala debo odelo Tio!"

⁴⁷ "Wolo timongoli olo mapilo lapalo–Lio?"
ualo tau–tauwalo Parisi boito.

⁴⁸ "Wolo woluo tahidihima kawasa lonto
olanto meaambo taulo Parisi tapalacaya
o–Lio?"

⁴⁹ Bo taa dadaata botie, diila otaawa
limongolio butoée Musa, wau penu
boli woloolo mola olo timongolio
malaá–laánati."

⁵⁰ Tala ngota towolota lotau–tauwalo
Parisi boito yito tei Nikodemus tamaa
peéenta lonaó mai odeli Isa. Tei
Nikodemus loloíya maó ode tau–tauwalo
Parisi wewo,

⁵¹ "Moduduá butoó, tahingota–
ngotaawa diila mowali hukuu–maniyola
tóu palakalalio diipo dilungohe wau
huhutuulio pilalakisa."

⁵² "Wolo yió olo lonto Galilea?" tametaó
limongolio, "Palakisai maó Kitabi! Yió
mamoóonto deú diaaluo nabi taásaliilio
mai lonto Galilea!"

⁵³ [Lapataó uito, ngoáamila tau malo
hualinga ode bele.]

8 ¹ Boti Isa lonaó mola ode Huludu Jaitun.
² Loloombulio mola dimodupo Tio
lonaó mota poli ode Bele lo Eeya, wau
dadaata tahe lonaó mai ode o–Lio. Ti

Isa malo tihuloáa mola, tulusi lolumulo longajali maó olimongolio.

³Toú boito, guguu-ruwaalo agama wau tau-tauwalo Parisi lodelo mai ode o-Lio taabua ngota taílo dungga hemojina. Timongolio lopoáhu taabua boito tilimihulo tohuungio,

⁴Lapataó loloíya maó odeli Isa, "Paaá Guru, taabua botie ilodungga lamiaatia donggo hemojina.

⁵Todelomo butoée Musa woluo wuúdu deú taabua debo odelo utie paatuti paíyola lobotu tunggula mate. Botia woloolo mola huhama li Paaá?"

⁶Timongolio lohintu odito u mohentobe o-Lio, alihu timongolio mowali mopotala o-Lio. Boti Isa wambaó dungudungu, wau hemo lulade tohuta wolo tingoonga lo uluú-Lio.

⁷Toú timongolio tulusi hemo huntula o-Lio, yi Tio malo mintaái lunggo-Ngio wau lotahuda maó olimongolio, "Taa udiila odusa towolota limongoli, hulialo maó tio tamomaí lobotu ode taabua boito."

⁸Lapataó uito ti Isa luli lotidungu mola wau luli lolulade tohuta.

⁹Lapataó loódungohe li Isa lotahuda odito, malo tinaónaó timongolio lololaa

maó tambati boito, ngota-ngota tumulalo mai tahulango. Pulitio maó bolo ti Isa tutuuwau taleitolaa teto wolo taabua tadonggo tihutihula totambati boito.

¹⁰ Lapataó ti Isa malo mintáa mola lunggo-Ngio wau lotahuda maó ode taabua boito, "Touútoonuu timongolio ngoáamila? Diaaluo talo hukuumanu olemu?"

¹¹ "Diaaluo, Paaá," tametio maó. ["Ooó," uali Isa, "Wauú olo diila mohukuumanu mai olemu. Botia ponaólo, diilalo pohutu dusa."]

¹² Ti Isa luli lotahuda totaa dadaata, tahuda-Lio maó, "Wauúlo tilango dunia. Taa u moduduó ola-Ú diila tamonaó touú modiólomo, bo o tilango tutumulo."

¹³ "Botia Yió longohi sakusi pasali lo batanga-Mu lohihilao," ualo tau-tauwalo Parisi boito to o-Lio, "Sakusi-Mu boito diila otutu."

¹⁴ Ti Isa lolametaó, "Eleponu Wauú mongohi mai sakusi pasali lo batanga-Ú lohihilao, sakusi-Ú boito otutu; sababu otaawa-Ú lonto utoonu mai dudungгаа-Ú wau ode utoonu nonaóo-Ú. Diila otaawa limongoli lonto utoonu mai dudungгаа-Ú, wau ode utoonu nonaóo-Ú.

¹⁵ Timongoli momutoó tau wolo dudelo lomanusia; Waú diila momutoó penu boli ngotaa maó.

¹⁶ Bo humayaalio Waú momutoó tau, putuusani-Ú boito aadili, sababu Waú diila tutuuwau; Allahu Taáala talolao mai ola-Ú woluo wola-Ú.

¹⁷ Todelomo butoée Musa tulatuladu odie; ososakusi u otutu yito ososakusi monto taduulota.

¹⁸ Tamongohi sakusi pasali lo batanga-Ú woluo duulota Waú wau ti Paapa-Ú talolao mai ola-Ú."

¹⁹ "Ti Paapa-Mu boito touútoonu?" loíya maó limongolio. Ti Isa lolametaó, "Timongoli diila moóonuhe ola-Ú meaambo li Paapa-Ú. Humayaalio timongoli olo moóonuhe ola-Ú, maatantu timongoli moóonuhe li Paapa-Ú."

²⁰ Ngoáamilalo botie pilotahuda li Isa touú Tio donggo hemo ngaajali to Bele lo Eeya totili bubuu-luwaalo lodoi podewo. Bo diaaluo penu boli ngotaa maó talo heúpa o-Lio, sababu diipo leidungga wakutuulio.

²¹ Ti Isa luli lotahuda maó ode limongolio, "Waú mamonaó wau timongoli mamololohe ola-Ú, bo timongoli maamate

todelomo dusamu. Ode tambati ponaówa-Ú, diila mowali onaówa limongoli."

²² Yi tahidihima kawasa lo Yahudi malo loíya, "Tanu Tio motohilaa motitipate, sababu tio malo tahuda, 'Ode tambati ponaówa-Ú, diila mowali onaówa limongoli.'"

²³ Lapataó ti Isa lotahuda maó ode limongolio, "Timongoli dungga-dungga mai lonto walungo; bo Waú dungga-dungga mai lonto yitaato. Timongoli lonto dunia; Waú diila lonto dunia.

²⁴ Uito sababuulio Waú motahuda mai olemu, deú timongoli maamate todelomo duduu-saamu. Wau memangi timongoli maamate todelomo duduu-saamu, wonu diila palacaya deú, 'Waúlo Tio táilunte WAÚ WOLUO'."

²⁵ "Otutuulio maó tatoonu Yió?" yilintu maó limongolio. Ti Isa lolametaó, "Donggo pongoola muli mobisala woli mongoli!

²⁶ Donggo dadaata suáli tomimbihu olimongoli u ohilaa potahuda-Ú mai wau pomutoálo. Bo Tio talolao mai ola-Ú mowali palacayalo. Wau Waú mopoótaa ode dunia wolo u ilodungohe-Ú lonto o-Lio."

²⁷ Timongolio diila mongalati deú Tio donggo hemo bisala toli mongolio pasali li Paapa.

²⁸ Sababu uito ti Isa lotahuda maó olimongolio, "De wonu timongoli malo palaió mola Walaó Manusia, timongoli mamotota deú 'Waúlo Tio taílunte WAÚ WOLUO', wau timongoli mamotota deú diaaluo penu boli tuwau maó u pilohutu-Ú monto batanga-Ú lohihilao. Waú bo wambaó motahuda wolo upilo ngaajali mai li Paapa ola-Ú.

²⁹ Wau Tio tamalolao mai ola-Ú woluo wola-Ú. Diila peéenta maó Tio mopoluli ola-Ú tutuuwau, sababu Waú laito hemohutu wolo umoó sanangi hilaa-Lio."

³⁰ Lapatio maó ti Isa lotahuda u ngoáamilalo boito, dadaata taa palacaya o-Lio.

³¹ Lapataó ti Isa lotahuda totau-tauwalo Yahudi tamaa pilalacaya o-Lio, "Wonu timongoli tumumulo moduduá pongaajali-Ú otu-otutuulio maó muri-Ú,

³² yi maóonuhe limongoli Allahu Taáala taótutu, wau masababu uito timongoli malopatolo!"

³³ "Amiaatia botie wali mai lei Abraham," uali mongolio. "Diipo peéetna maó

amiaatia lowali wato penu boli lo tatoonu!
Wolo makusudu–Mu wolo tahuda,
'Timongoli malopatolo'?"

³⁴ "Otutu banali tahuda–Ú botie," tahuda maó li Isa ode limongolio. "Taa u mohutu dusa, taboitolo wato lodusa.

³⁵ Wau wato ngota diila otambati utatapu todelomo ungaalaá, hiambola walaó u ohiheo–hiheolo maó otambati todelomo ungaalaá.

³⁶ Sababu uitolo, wonu Walaó mopo lopotai olimongoli, timongoli otu–otutuulio maó molopato.

³⁷ Memangi otaawa–Ú timongoli botie wali mai lei Abraham. Bo timongoli motohilaa momate ola–Ú mate–mateelo maó, sababu timongoli diila mohuto mololimo pongaajali–Ú.

³⁸ Wolo u iloontonga–Ú toli Paapa–Ú, uitolo olo upilo tahuda–Ú mai. Hiambola timongoli mohutu wolo u pilo ngaajali lipaapamu olemu."

³⁹ Timongolio lolametaó, "Ti Paapa lamiaatia deúito–yito tei Abraham."
"Humayaalio timongoli tióotutua walaée Abraham," tahuda Isa, "tantuulo maó timongoli mohutu wolo u pilohutu lei Abraham.

⁴⁰ Waú mopo tunggulai olemu obobanali u ilodungohe-Ú lonto Allahu Taáala, bo timongoli ohilaa momate ola-Ú mate-mateelo maó. Tei Abraham diila lohutu debo odelo uito!

⁴¹ Timongoli helohutu wolo upilohutu lipaapamu lohihilao." Tametaó limongolio, "Amiaatia diila mongo walaó haramu. Ti Paapa lamiaatia bo ngota, deúito-yito Allahu Taáala lohihilao."

⁴² Lapataó ti Isa lotahuda ode limongolio, "Humayaalio Allahu Taáala boito ti Paapamu, timongoli mamo toliánga ola-Ú, sababu Waú dungga-dungga mai lonto Allahu Taáala. Waú dungga-dungga mai diila wolo hilaa-Ú lohihilao, bo Tiolo tamalolao mai ola-Ú.

⁴³ Wolo sababuulio timongoli diila mongalati wolo upilo tahuda-Ú? Sababu timongoli diila moó tahangi modungohe pongaajali-Ú.

⁴⁴ Ibilisi wambaó ti paapamu, wau timongoli mohuto moduduá u otohilaa lipaapamu. Tumulalo mai bohulio ibilisi boito moomatea mate-mateelo maó. Tio diila peénta maó motiwambaó ode u otutu, sababu diaaluo u otutu to olio. Wonu tio mohimbulo, uito mawaajibu,

sababu maódito pĩliilio. Tio mohimbuloa wau bungo loú totoonulalo yimbulo.

⁴⁵ Bo Waú motahuda mai u otutu, wau sababu uitolo timongoli diila palacaya ola-Ú.

⁴⁶ Tatoonu towolota limongoli mowali mongohi bukuti deú Waú odusa? Wonu Waú motahuda mai u otutu, yilongola timongoli diila palacaya ola-Ú?

⁴⁷ Taa asaliilio mai monto Allahu Taáala, modungohe tahuda lo Allahu Taáala. Bo timongoli diila lonto Allahu Taáala, uitolo sababuulio timongoli diila mohuto modungohu."

⁴⁸ Tau-tauwalo Yahudi boito lolametaó li Isa, "Wolo diila otutu loíya lami botie deú Yió taulo Samaria táilo tuanga lolati?"

⁴⁹ Ti Isa lolametaó, "Waú diila ilotuanga lolati. Waú hemo hulumati li Paapa-Ú, bo timongoli lohina ola-Ú.

⁵⁰ Waú diila hemo lolohe hulumati ode batanga-Ú lohihilao. Woluo ngota tahemo tolopani mai ohulumati ode ola-Ú, wau Tiolo tamo mutoái.

⁵¹ Otutu banali tahuda-Ú botie, taa u moduduó tahuda-Ú, ohiheo-hiheolo maó diila tamaate."

⁵² Lapataó tau-tauwalo Yahudi boito lolóiya maó odeli Isa, "Botia maílotaawa lami deú yió botie otu-otutuulo maó ilotuanga lolati! Tei Abraham lohihilao mailate, odito olo ngoáamila nabi. Bo Yió malo tahuda, 'Taa u moduduá tahuda-Mu, ohiheo-hiheolo maó diila tamaate.'

⁵³ Wonu tei Abraham lohihilao mailate, wau mongo nabi ngoáamilalo olo mailate, Yió botie tatoonu? Diila pongalo aakali Yió talebe udaá woli paapa lami tei Abraham!"

⁵⁴ Ti Isa lolametaó, "Humayaalio Waú mololohe ohulumati ode batanga-Ú lohihilao, ohulumati boito diaaluo hunalio. Tamo hulumati ola-Ú yito ti Paapa-Ú tahe anggapuo limongoli Allahu Taáala limongoli,

⁵⁵ lebe-lebe pomaó timongoli diila moóonuhe o-Lio. Bo Waú moóonuhe o-Lio. Humayaalio Waú motahuda mai deú Waú diila moóonuhe o-Lio, yi Waú ngotaalio lo tamoo-himbulowa, tutuuwauwa debo odelo timongoli. Waú moóonuhe o-Lio wau modungohe tahudaa-Lio.

⁵⁶ Ti Paapamu Abraham sanangi daá deú tio mamóonto dulahu-Ú. Tio maloóonto wau tio sanangi!"

⁵⁷ Lapataó tau–tauwalo Yahudi lolóiya maó odeli Isa, "Umulu–Mu diipo limo lopulu lotaunu, wau Yió maloóonto olei Abraham?"

⁵⁸ Ti Isa lolametaó, "Otutu Waú motahuda mai olemu: toú tei Abraham diipo pilotutulio mai, Waú mawoluo."

⁵⁹ Lapataó tau–tauwalo Yahudi boito lohama botu u pomaílio o–Lio; boti Isa loluuó batanga–Lio, tulusi lonaó lololaa maó Bele lo Eeya.

9¹ Toú ti Isa naónaó, iloontonga–Lio taa pitoó anggadu pilotutulio mai.

² Tahiduduá li Isa lohintu maó odeli Isa, "Paaá Guru, yilongola tau botie pilotutulio mai pitoó? Wolo kalana tio lohihilao odusa meaalo mongo dulaálio taódusa?"

³ Ti Isa lolametaó, "Tio pitoó diila sababu dusalio lohihilao meaalo dusa lomongo dulaálio, bo alihu tau mowali moóonto maó okokawasa lo Allahu Taáala mokalaja todelomo batangalio.

⁴ Ngotilonggadu donggo dulahu, ito musi mokalaja maó kalajaa–Lio lo talolao mai ola–Ú. Hui mamei dungga, wau penu boli ngotaa maó diila tamowali mokalaja.

⁵ Ngotilonggadu Waú todunia botie, Waúlo tinelo dunia."

⁶ Lapataó lotahuda odito ti Isa lonula loiyohu ode huta, wau longaaheó yiyoo-Hio boito wolo huta. Lapataó piloseka-Lio tomato lotau boito, tulusi lotahuda maó olio,

⁷ "Ponaólo pobelesia maó bayamu to Kulamu Siloam." (Siloam boliilio 'Ilutolia'.) Yi tau boito malonaó wau lopobelesi bayalio. Touú tio lohualingai, tio malowali loóonto.

⁸ Mongo tiheedio wau tau-tauwalo touú dipolulio mai loóonto olio hemohile-hile, ngoáamilalo malo loíya, "Diila bo maatio botie tabiasaallo hulohuloáa hemohile-hile?"

⁹ Woluo talo loíya, "Memangi maatio." Bo woluo olo talo loíya, "Diila, tio bo ngopeéé motutuuwau wolo tau boito." Bo tau boito lohihilao lolóiya, "Wawaatiaalo tio."

¹⁰ "Woloolo mola waliilio tunggula yió malowali loóonto?" uali mongolio olio.

¹¹ Tio lolametaó, "Taa ilunte Isa boito lohutu maó lataó ngoídi tulusi piloseka-Lio mai tomato lowatia wau lotahuda, 'Ponaólo pobelesia maó bayamu to Kulamu Siloam.' Tulusi watia lonaó. Wau touú watia hemo pobelesi baya lowatia, watia malowali loóonto."

¹² "Tóútoonu tau boito?" yilintu maó limongolio. Tio lolametaó, "Diila otaawa."

¹³ Todulahu boito dulahu Saabati tou ti Isa longaaheó huta wolo yiyoo-Hio u lohutu taa pitoó boito lowali loóonto. Yi taa engontielio pitoó boito dilelolio mota ode tau-tauwalo Parisi.

¹⁴ (9:13)

¹⁵ Timongolio olo lohintu maó olio woloolo mola tio malowali loóonto. Tio lolametaó, "Tio malodutu mai lataó tomato lowatia, lapataó pilobelesi maó lowatia lataó boito watia malowali loóonto."

¹⁶ Dengolo lota towolota tau-tauwalo Parisi boito loloíya, "Diila pongalo aakali taa ulohutu utie asaliilio mai lonto Allahu Taáala, sababu Tio diila momandungi dulahu Saabati." Bo taa wewo loloíya, "Diila pongalo aakali taa odusa mohutu momoó-linggolabeyalo debo odelo utie?" Lapataó tilumoodulo mola huhama u hihiihede towolota limongolio.

¹⁷ Yi tau-tauwalo Parisi boito luli lohintu maó totau boito, "Wolo huhamaamu pasalii-Lio lo talohutu mai olemu loóonto?" "Tio nabi." tametaó lotau boito.

¹⁸ Bo mongo taúwa lo Yahudi boito diila lohuto palacaya deú tau boito memangi

pitoó tou dipolulio mai wau botia malowali loóonto. Sababu uito timongolio malo tianga mongo dulaálio,

¹⁹ wau lohintu maó, "Otutu tio botie walaúmu tahe loíyamu pilotutulio mai pitoó? Woloolo mola tio malowali loóonto botia?"

²⁰ Mongo dulaá lotau boito lolametaó, "Memangi tio botie walaó lamiaatia; wau tio memangi pitoó anggadu pilotutulio mai.

²¹ Bo woloolo mola tio malowali loóonto botia, diila otaawa lamiaatia. Wau tatoonu talohutu olio malowali loóonto, uito olo diila otaawa lamiaatia. Yintuwalo olio, tio maleidaá; tio mowali molameto lohihilao."

²² Mongo dulaá lotau boito lolóiya maó odito sababu timongolio moohe tomongo taúwa lo Yahudi; sababu timongolio boito malo heeluma, deú tamo tolongaku maó li Isa debo odelo Olongia Tamoo-poáahua, diilalo mowali tumuwoto ode bele potabiaalo.

²³ Uito sababuulio mongo dulaá lotau boito lolóiya maó, "Tio maleidaá; yintuwalo olio."

²⁴ Lapataó timongolio luli lotiango taa u engontielio pitoó boito, wau lolóiya maó

olio, "Potadiaalo mola deú yió mamoloíya mai u otutu. Otaawa lami tau boito taa odusa."

²⁵ "Wolo tio odusa meaalo diila," tametaó lotau boito, "diila otaawa lowatia. Bo tuwau suáli u otaawa lowatia; muloololio mai watia pitoó, botia watia maloóonto."

²⁶ Lapataó timongolio luli loloíya maó olio, "Mawolo u pilohutu-Lio olemu? Woloolo mola Tio lohutu olemu lowali loóonto?"

²⁷ Tau boito lolametaó, "Mailungguli mai lowatia olimongoli bo timongoli diila mohuto modungohu. Yilongola timongoli ohilaa modungohe poli? Otanu timongoli ohilaa mowali muri-Lio olo?"

²⁸ Lapataó timongolio malomuayo olio wau loloíya maó, "Yió-yióolo muri-Lio; ami diila! Ami muri lei Musa.

²⁹ Otaawa lami deú Allahu Taáala malo tahuda odelei Musa. Bo pasali lotau boito, diila otaawa lami lonto utoonu asalii-Lio."

³⁰ Tau boito lolametaó, "Moólinggolabe daá deú diila otaawa limongoli lonto utoonu asalii-Lio, hiambola Tio malohutu olaatia lowali loóonto.

³¹ Otaawanto deú Allahu Taáala diila modungohe taa odusa, bo taa u

mohulumati Allahu Taáala, wau tamohutu kahandaki-Lio.

³² Tumulalo mai bohulo dunia diipo peéeta maó ilodungohe woluo talohutu tau pilotutulio mai pitoó malowali loóonto.

³³ Wonu tau boito diila monto Allahu Taáala, tio diila mowali mohutu wolo-wolo."

³⁴ Tametaó limongolio, "Wolo? Yió tapolu-polu lodusa anggadu pilotutulio mai, yió mamó ngaajali olami?" Yi tumulalo mai toú boito tio dilinilio tumuwoto ode bele potabiaalo.

³⁵ Ti Isa loódungohe deú tau boito mailinggi limongolio lonto bele potabiaalo. Tio malo lolohe tau boito lapataó lotahuda olio, "Wolo yió palacaya to Walaó Manusia?"

³⁶ Tau boito lolametaó, "Tatoonu Tio. Tuani? Tulungia poótaa mai alihu watia palacaya o-Lio."

³⁷ "Yió maloóonto o-Lio," tametaó li Isa. "Tiolo tamasaatia botie donggo hemobisala wolemu."

³⁸ "Watotia, palacaya, Eeya," loíya maó lotau boito, lapataó losujudu mola tio totalu li Isa.

³⁹ Ti Isa lotahuda maó, "Wau dungga-dungga mai ode dunia botie mai momutoó; alihu taa pitoó mowali moóonto, wau taa moóonto, mowali pitoó."

⁴⁰ Dengolo lota taulo Parisi tawoluo teto loódungohe li Isa lotahuda odito, tulusi timongolio lohintu o-Lio, "Makusudu-Mu ami botie pitoó olo?"

⁴¹ Ti Isa lolametaó, "Humayaalio timongoli pitoó, timongoli diila odusa. Bo sababu timongoli malo loíya, 'Ami moóonto,' uito boliilio maó timongoli donggo odusa."

10 ¹ "Otutu banari tahudaa-Ú botie: Taa tumuwoto ode delomo lantunga lohimba moli bala, wau diila moli huhebu, bo momiáata moli dalalo wewo, tau boito mototaówa wau tamoo-lambata.

² Bo taa tumuwoto moli huhebu, tio-tiolo diti lohimba.

³ Tamoodahawa lantunga momuó maó huhebu to olio, wau hihii-mbawaalo mamoduduá sualaalio toú tio motiango timiídu tanggulo hihii-mbawaalo boito wau modelo hihii-mbawaalo ode bulemengio.

⁴ Lapataó hihii-mbawaalo boito dilelolio ode bulemengio, diti boito monaó totalu, wau hihii-mbawaalo boito moduduá

olio sababu hihii-mbawaalo moóonuhe suaalio.

⁵ Hihii-mbawaalo diila tamohuto moduduá taawewo, tumbaó matumateó monto tau boito, sababu diila moóonuhe suaalio."

⁶ Ti Isa lohungguli maó pohumaya boito, bo timongolio diila mongalati wolo u milakusudu-Lio.

⁷ Yi ti Isa peéentapo lotahuda maó, "Otutu banali tahudaa-Ú botie: Waúlo huhebu duólo himba.

⁸ Ngoáamila tamonaó mai tou dipolulio Waú deúito-yito tamootaówa wau tamoo-lambata, bo hihii-mbawaalo diila modungohe suaala limongolio.

⁹ Waúlo huhebu. Tatoonu tatumuwoto moli ola-Ú mamoaáahu; tio tumuwoto lumualo wau moótapu uáalo.

¹⁰ Tamootaówa monaó mai bo mai motaó, mai momate mate-mateelo maó wau mai mongantulu. Bo Waú dungga-dungga mai alihu manusia moótapu tutumulo -- tutumulo laba-labaalo daata.

¹¹ Waúlo diti tamopiohu. Diti tamopiohu mongohi nyawalio ode hihii-mbalio.

¹² Tahe wuupalio tadiila diti wau diila olo taa ohuúwo lo hihii-mbawaalo boito,

matumeteó mololaa maó hihii-mbawaalo wonu tio moóonto soligala monaó mai. Yi hihii-mbawaalo boito madangapolio wau pobubuu-alaalio lo sorigala.

¹³ Tahe wuupalio boito tumetaó, sababu tio mokalaja duólo wuupa. Tio diila momandungi hihii-mbawaalo boito.

¹⁴ Waúlo diti tamopiohu. Tutuuwauwa debo odelo ti Paapa moóonuhe ola-Ú wau Waú moóonuhe li Paapa, odito olo Waú moóonuhe hihii-mbaa-Ú wau hihii-mbaa-Ú olo moóonuhe ola-Ú. Waú mohudu nyawa-Ú ode limongolio.

¹⁵ (10:14)

¹⁶ Donggo woluo hihii-mbawaalo uwewo hakuu-Ú olo, bo diila waiwaito todelomo himbala lohimba botie. Timongolio olo musi deloo-Ú wau timongolio mamó dungohe سوالا-Ú. Timongolio ngoáamilalo mamowali ngopo himbala wolo ngota ditilio.

¹⁷ Ti Paapa lomonu ola-Ú sababu Waú lohudu nyawa-Ú, u muli tolimoolo poli.

¹⁸ Diaaluo penu boli ngotaa tamowali mohama maó monto ola-Ú. Waú mohudu maó moduduá otohilaa lohihilao. Waú okawasa u mohudu maó, wau okawasa

muli mohama maó. Ui-uitolo tuugasi u tilolimo-Ú lonto li Paapa-Ú."

¹⁹ Sababu ti Isa lotahuda odito, yi tau-tauwalo Yahudi mahipo hahaamawa.

²⁰ Dadaata tahi poloíyawa, "Tio maílo tuanga lolati! Tio biyongo! Pongoola timongoli modungohe o-Lio?"

²¹ Bo woluo olo tahe moloíya, "Taa u ilotuanga lolati diila hemobisala odito! Wolo lati mowali mohutu taa pitoó mowali moóonto?"

²² To Yerusalemu tau-tauwalo donggo hemo polame dulahu Buka Pongo-saahalo Bele lo Eeya. Toú boito sembo lohuhulo.

²³ Ti Isa donggo naónaó to Sulambe Salomo todelomo Bele lo Eeya,

²⁴ toú tau-tauwalo Yahudi lona@o mai lotiámbu topalito li Isa. Timongolio malo loíya, "Tunggula omolua Yió ohilaa mopoluli olami diila otatapua lohilao? Poleleaalo mai wolo juujulu, wonu Yió otu-otutuulo maó Olongia Tamoo-poáhua."

²⁵ Ti Isa lolametaó, "Mapilo tahuda-Ú mai olimongoli, bo timongoli diila palacaya. Ngoáamila kalaja u pilohutu-Ú to tangguli Paapa-Ú, mongohi mai bukuti pasalii-Ú.

²⁶ Timongoli diila palacaya sababu timongoli diila waiwaito to hihii-mbaa-Ú.

²⁷ Hihii-mbaa-Ú modungohe sualaa-Ú. Otaawa-Ú timongolio, wau timongolio moduduá ola-Ú.

²⁸ Waú mongohi mai olimongolio tutumulo ututuulio tutu wau ohiheo-hiheolo maó, wau u ohiheo-hiheolo maó timongolio diila tabinasa. Diaaluo penu boli ngotaa maó tamowali molambata olimongolio monto ola-Ú.

²⁹ Ti Paapa-Ú tamalohudu mai olimongolio ode ola-Ú, mongilabotaó loú totoonulalo maó. Wau diaaluo penu boli ngotaa maó tamowali molambata olimongolio monto uluú li Paapa-Ú.

³⁰ Waú wau ti Paapa-Ú yito tuwau."

³¹ Lapataó tau-tauwalo Yahudi luli lohama botu u pomáilio li Isa.

³² Boti Isa lotahuda maó olimongolio, "Timongoli maloóonto ola-Ú helohutu dadaata kalaja umopiohu, uiludu mai li Paapa ola-Ú. Monto ngoáamila kalaja boito, toonu umoó sababu olimongoli ohilaa momaí ola-Ú?"

³³ Tau-tauwalo Yahudi boito lolametaó, "Diila bo kalana ngoáamila kalaja-Mu u mopiohu boito ami ohilaa momaí wolo

botu ole-Mu, bo sababu Yió hemo muayo Allahu Taáala. Yió ngotaalio lomanusia, wau ohilaa mopowali batanga-Mu Allahu Taáala."

³⁴ Lapataó ti Isa lolametaó, "Diila matodelomo Buku lo Butoúmu leitulade: Allahu Taáala lotahuda mai, 'Timongoli yito ila'?

³⁵ Otaawanto deú wolo u leitulade todelomo Kitabi pohupohutu u ohiheo-hiheolo maó. Oditolio, wonu Allahu Taáala mongunte mai 'ila' totaa hipo lolimoa tuhudaa-Lio,

³⁶ yilongola timongoli helo loíya ola-Ú hemo muayo Allahu Taáala sababu Waú lotahuda Walaó Allahu Taáala? Lebe-lebe pomaó Waú tilulaoto Allahu Taáala wau yilao-Lio mai ode dunia.

³⁷ Wonu Waú diila mohutu kalaja u pilomalentai lo Allahu Taáala, diila maó pomalacaya ola-Ú.

³⁸ Bo sababu Waú helohutu maó uito, pomalacayalo toú wolo u pilohutu-Ú boito, eleponu timongoli diila mohuto palacaya ola-Ú. Lou odito otaawa maó limongoli wau mongalati deú Allahu Taáala debo tuwau wola-Ú, wau Waú debo tuwau wolo Allahu Taáala."

³⁹ Timongolio luli lotolopani moheúpa li Isa, bo Tio loólahi lonto olimongolio.

⁴⁰ Ti Isa luli lohualinga ode ngotuwali lo Dutula Yordan, totambati u muloololio mai hepopolihua lei Yahya, lapataó malo tibiluloá mola teto.

⁴¹ Dadaata tau lonaó mai ode o–Lio. Timongolio malo loíya. "Tei Yahya diila helohutu momoó–linggolabeyalo, bo ngoáamila uiloíyaalio pasali lotau botie otutu."

⁴² Tulusi dadaata taa mola teto palacaya li Isa.

1 1 ¹ Ngotaalio táilunte Lajarus bilu–biluloá to Betania peé–peéenta wolo wutatio ti Maria woli Marta.

² Ti Maria yito taabua talo looheó yinulo moonu ode oáati Isa, wau pilaidelio wolo huwoío. Tou wakutu tuwau tei Lajarus longongoto.

³ Mongo wutatio duulota lopohabari maó odeli Isa, "Eeya, wutato mongowatotia tapilonua lo Eeya boito mongongoto."

⁴ Tou ti Isa laódungohe habari boito, Tio lotahuda maó, "Ngongoto botie diila tamooó pate. Utie lotoduo mai alihu Allahu Taáala poudaáalo, wau alihu woleeto olo Walaó Allahu Taáala poudaáalo mola."

⁵ Ti Isa momonu oli Marta, Maria wolei Lajarus.

⁶ Bo tou ti Isa lootapu maó habari deú tei Lajarus mongongoto, Tio sangaja lotibiluloá to tambati-Lio donggo duuhui mola.

⁷ Lapataó uito bolo Tio lotahuda maó to tahiduduá o-Lio, "Dulo ito mohualinga ode Yudea."

⁸ Timongolio lolametaó, "Paaá Guru, botiboti mola tau-tauwalo Yahudi ohilaa momái li Paaá wolo botu wau botia ti Paaá ohilaa poli mohualinga mola odito?"

⁹ "Wolo diila ilo-ilolaanga hiheolio mopulaa dulo jamu?" tahuda maó li Isa. "Taa monaó tou duluhu, diila meiteduó sababu tio moóonto baango dunia botie.

¹⁰ Bo taa monaó tou hui meiteduó, sababu diaaluo baango to olio."

¹¹ Odi-oditolo tahuda li Isa. Lapataó Tio luli lotahuda maó, "Sahabatinto tei Lajarus malei tuluhi, bo Waú maamota mopobongu olio."

¹² Tahiduduá li Isa loloiya maó, "Eeya, wonu tei Lajarus tuutuluhi, de tio mamoluli mai."

¹³ Makusudu li Isa deú tei Lajarus mailate. Bo timongolio hemo lantobu

deú makusudu li Isa yito tei Lajarus bo tuutuluhu biasa.

¹⁴ Sababu uito ti Isa lotahuda maó ode limongolio wolo juujulu, "Tei Lajarus mailate.

¹⁵ Bo Waú sanangi olo deú Waú diaaluo mola teto, sababu lebe mopioheó olimongoli, alihu timongoli moó palacaya. Duloolo ito monaó mota botia odelei Lajarus."

¹⁶ Tei Tomas táilunte "Taa Pingi" lolóiya maó ode mongo sahabatilio tahiduduá li Isa, "Dulo ito moduduó, penu boli ito mate wo-Lio!"

¹⁷ Toú ti Isa leidungga mota ode tambati boito, tei Lajarus mawopahui hiheolio tokuubulu.

¹⁸ Betania membideó lo Yerusalemu, tanu tolo kilo lamingio.

¹⁹ Dadaata taulo Yahudi malonaó mai lomilohe oli Marta woli Maria u lomalongo olimongolio sababu timongolio ilopatea lo wutatio.

²⁰ Toú ti Marta loódungohe ti Isa lonaó mai, tio yilumualai lolutulo li Isa, hiambola ti Maria lotibiluloáa tobele.

²¹ Loíya maó li Marta odeli Isa, "Eeya, humayaalio Eeya woluo teea toú boito, tantu wutato lowatotia diila yilate.

²² Boli odito otaawa lowatotia deú masaatia botieelo Allahu Taáala mamongohi mai penu boli wolo upohile mola lo Eeya o-Lio."

²³ "Wutatumu mamuli tumumulai," tahuda maó li Isa oli Marta.

²⁴ Ti Marta lolametaó, "Otaawa lowatotia tei Lajarus mamuli tumumulai wonu taa mate bonguloola to Dulahu Kiama."

²⁵ "Waúlo tamongohi mai tutumulo wau mopobongu mai taa mate," tahuda maó li Isa odeli Marta "Taa u palacaya ola-Ú matumumulo, eleponu tio mailate.

²⁶ Wau taa tumu-tumulo wau palacaya ola-Ú, diilalo mate ohiheo-hiheolo maó. Wolo yió palacaya tosuáli boito?"

²⁷ "Eeya," tametaó li Marta, "Watotia palacaya Eeya Walaó Allahu Taáala, Olongia Tamoo-poáhua tamamei dungga mai ode dunia botie."

²⁸ Lapataó ti Marta lolóiya maó odito, tio mota lotiangai oli Maria, wutatio wau lopo lohumaó olio, "Ti Paaá Guru woluo tewe; tio hemohintu olemu,"

²⁹ Loódungohe uito, ti Maria huáa tilimihulo, tulusi malo dunggaya woli Isa.

³⁰ Toú boito, ti Isa diipo tilumuwoto ode kambungu. Tio donggo totambati li Marta toú lodunggaya wo-Lio.

³¹ Tau-tauwalo Yahudi tadonggo hipoliyanga oli Maria tobele, loóonto oli Maria tilimihulo wau huáa yilumualaó; oditolio timongolio malo duduá olio, sababu helantobu limongolio tio monaó ode kuubulu mola humoyongo.

³² Toú ti Maria leidungga totambati li Isa wau loóonto o-Lio, maloti bonggohuúlo mola ti Maria totalu li Isa wau lolóiya, "Eeyaú, wonu Eeya woluo tea toú boito, tantu wutato lowatotia diila yilate."

³³ Toú ti Isa loóonto oli Maria hiyo-hiyongo, wau tau-tauwalo Yahudi talonaó mai woli Maria boito olo hehiyonga, hilaa-Lio masiluukali, wau oontonga lodehu daá hilaa-Lio.

³⁴ Yi Tio malohintu maó olimongolio, "Toútoonu pilolobunga limongoli olio?" "Toduwolo mai bilohi lo Eeya," tametaó limongolio.

³⁵ Lapataó ti Isa mahilu moyongo. Yi tau-tauwalo Yahudi boito malo loíiya, "Bilohi, donggo boli ponu-Lio olei Lajarus!"

³⁶ (11:35)

³⁷ Bo woluo towolota limongolio talo loíya, "Tio lopoóluli taa pitoó maloóonto, yilongola Tio diila mowali mongabuto olei Lajarus alihu diila maó mate?"

³⁸ Luli lodehu daá hilaa li Isa, lapataó malonaó mota ode kuubulu. Kuubulu boito yito gowa tuwau u hileútalio wolo botu leidaá.

³⁹ "Poheiya maó botu boito," tahuda li Isa. Ti Marta wutato lo tailate boito, lolametaó, "Bo Eeyau, tio mawopahui tokuubulu. Tantulo maó maboobolo mohutodu!"

⁴⁰ Ti Isa lolametaó oli Marta, "Diila mapilo tahuda-Ú mai olemu; Wonu yió palacaya, yió mamooóonto malo odito udaá kawasa lo Allahu Taáala!"

⁴¹ Yi timongolio malo pohinggi botu boito. Lapataó ti Isa yilumanggela mola ode hulungo wau lolóiya, "Oduólo, Paapa, sababu ti Paapa malo dungohei olaatia.

⁴² Otaawa lowatia ti Paapa laito modungohei olaatia, bo watia molóiya maó utie, ode tau-tauwalo tawoluo teea; alihu timongolio palacaya deú boti Paapalo talolao mai olaatia."

⁴³ Lapataó lolóiya maó odito, ti Isa malo ngiibode wolo suala u loóohuú, "Lajaru, lualoolo mai!"

⁴⁴ Yi mailumualai taa mailate boito. Uluú wau oáatio donggo bolubolu lolatu, wau bayalio donggo taútaúbu wolo kaingi taúbu baya. "Yinggilalo latulio alihu tio bebasi monaó," tahuda maó li Isa totau-tauwalo teto.

⁴⁵ Dadaata tau-tauwalo Yahudi talonaó mai lomilohe oli Maria, palacaya toli Isa tou timongolio loóonto u lotoduo mai boito.

⁴⁶ Bo dengolo lota towolota limongolio lonaó mota ode taulo Parisi wau lopo duloheó wolo u mapilohutu li Isa.

⁴⁷ Sababu uito tau-tauwalo Parisi wau mongo iimamu taúwa malohutu dudunggaya wolo Mahakama Agama. Timongolio lolóiya, "Wolo umusi pohutuwonto? Tau botie malohutu dadaata u moólinggolabu!"

⁴⁸ Wonu hulianta maó Tio mololaalaaita odie, ngoáamila tau mapalacaya o-Lio. Wau pulitio maó tahidihima kawasa lo Roma mamonaó mai wau mongantulu Bele lo Eeya wau ngoilanggubu bangusanto!"

⁴⁹ Ngotaalio limongolio taílunte Kayapas, iimamu daá totaunu boito, lolóiya, "Timongoli diila motota lolo–lolo.

⁵⁰ Wolo timongoli diila mongalati deú domi ulipu, lebe mopioheó taangota mate wolo ngoilanggubu bangusa moáantulu?"

⁵¹ Otutuulio maó tei Kayapas lolóiya uito, diila lonto pikiilangilio lohihilao. Bo odelo iimamu daá totaunu boito tio lonubuwati mai deú ti Isa maamate duólo bangusa lo Yahudi.

⁵² Wau diila bo ode bangusa lo Yahudi wambaó, bo olo u mongambu wau mopotuwau maó mongo walaó Allahu Taáala tamalo bubuuáyawa.

⁵³ Tumulalo mai todulahu boito tahidihima kawasa lo Yahudi malo heeluma u momate li Isa mate–mateelo maó.

⁵⁴ Sababu uito ti Isa diilalo lotibilohei totalu lotaa dadaata towolota taulo Yahudi. Tio malo lolaa maó Yudea, tulusi lonaó ode kota u ilunte Epraim membideó lohuta datahu u luasi daá wau delita. Mota teto Tio lotibiluloá peé–peéenta wolo tahiduduá o–Lio.

⁵⁵ Toú boito malembidei Dulahu Buka Paska lo Yahudi. Dadaata taa lonto

kakaa–mbunguwalo malonaó mola ode Yerusalemu moponaó lo upacala mopobelesi batanga tou dipolulio lameyangi boito.

⁵⁶ Timongolio hemo lolohe li Isa wau tou hiambua to Bele lo Eeya, timongolio malo loiya ngota timongota, "Woloolo mola huhamaamu? Tanu tio diila monaó mai ode lameyangi botie."

⁵⁷ Timongolio loloiya maó uito sababu mongo iimamu tauwa wau tau–tauwalo Parisi malo polualaó palenta deú taa motota toutoonu ti Isa woluo, musi mopo dulohei alihu Tio mowali waúpolo.

12 ¹ Wolonggui mola tou diipo Dulahu Buka Paska, ti Isa lonaó mola ode Betania. Totambati boito bilu–biluloá tei Lajarus tamaa bilongu–Lio mai lonto opopate.

² Mola teto ti Isa tilamelaó limongolio, wau ti Marta talohinta o–Lio. Tei Lajarus wau tahe tiloduo lotihuloáa lolamela peé–peéenta woli Isa.

³ Lapataó ti Maria lonaó mai lodelo yinulo Narwastu moonu u mahale daá otanu ngoputu loliiteri. Tio loluwataó yinulo boito ode oáati Isa, lapataó malo maideó wolo huwoío. Ngoilanggubu bele boito

mailoonulo mola, sababu yinulo moonu boito.

⁴ Bo tei Yudas Iskariot, tala ngota muri li Isa -- talapatio maó lohiyanati o-Lio -- loloíya maó.

⁵ "Yilongola yinulo moonu boito diila pilotali wolo halaga tolo hetuto doi talaá, wau doilio wohi mota ode taa mosikini?"

⁶ Tei Yudas loloíya odito diila kalana tio mopoótuoto taa mosikini bo sababu tio mootaówa. Tio helohama doi lokasi peé-peéenta wolo doi utilahu maó to olio.

⁷ Boti Isa lotahuda, "Huliaalo maó taabua boito! Tio lohutu uito duólo dulahu u polobungalo ola-Ú.

⁸ Taa mosikini laito woluo towolota limongoli, bo Waú diila."

⁹ Dadaata taulo Yahudi loódungohe deú ti Isa woluo to Betania, oditolio timongoli malonaó mola odito. Timongolio lonaó mola diila bo sababu ti Isa, bo sababu timongolio olo ohilaa momilohe olei Lajarus tamaa bilongu li Isa lonto opopate.

¹⁰ Uito sababuulio mongo iimamu taúwa ohilaa momate olo olei Lajarus mate-mateelo maó;

¹¹ sababu tio maloó sababu dadaata taulo Yahudi lololaa maó olimongolio wau palacaya li Isa.

¹² Loloombulio mola taa dadaata tamalonaó mai u mopolame Paska loódungohe deú ti Isa donggo tononaó-Lio dulu-dulunga ode Yerusalemu.

¹³ Yi timongolio malohama duduu-ngowaalo Palemu tulusi mota lolutulai o-Lio, sambela hiwaatiá wolo wengahe daá, "Pujiaalo mola Allahu Taáala! Mabala-balakatilo Tio tadungga-dungga mai to tanggulo Eeya. Mabala-balakatilo Olongia lo Isiraílu!"

¹⁴ Ti Isa loótapu kolodai tuwau udonggo buboto, wau tilaéa-Lio. Yi malo toduwolo u leitulade todelomo Kitabi:

¹⁵ "Diila oohe, puusili lo Sion! Bilohilo Olongiaamu dungga-dungga mai, taétaé tokolodai buboto tuwau!"

¹⁶ Touú boito tahiduduá li Isa diipo mongalati ngoáamilalo boito. Bo lapatio maó ti Isa piloúdaá wolo opapate-Lio, bolo timongolio loóéela mola deú u pilohutu lotau-tauwala o-Lio boito malei tuladu todelomo Kitabi tomimbihu o-Lio.

¹⁷ Tau-tauwalo tawoluo touú ti Isa lotianga olei Lajarus yilumulai lonto kuubulu

wau lopobongu mai olio lonto opopate, mololaita helongohi sakusi pasali losuáli boito.

¹⁸ Uito sababulio taa dadaata boito lonaó mota odeli Isa sababu timongolio loódungohu deú maa Tiolo talohutu u moólinggolabe boito.

¹⁹ Yi tau-tauwalo Parisi malo loíya ngota timongota, "Ito diila mowali mohutu wolo-wolo! Bilohilo wambaó, ngoilanggubu dunia lonaó loduduá o-Lio!"

²⁰ Towolota lotau-tauwalo talonaó ode Yerusalemu mola lomaya to lameyangi boito woluo olo dengolo lota taulo Yunani.

²¹ Timongolio lonaó mai odelei Pilipusi wau lolóiya maó, "Wutato, wonu mowali amiaatia ohilaa modunggaya woli Isa." (Tei Pilipus asaliilio lonto Betsaida to Galilea.)

²² Yi tei Pilipus lonaó mota lopoótaa suáli boito odelei Andreas, wau lapataó timongolio duduulota lopo tunggulaó odeli Isa.

²³ Ti Isa lotahuda maó ode limongolio, "Mawakutuulio Walaó Manusia pouááalo.

²⁴ Otutu banali tahuda-Ú botie; Wonu pale ngobotu diila pomulolo ode delomo huta wau mate, pale boito madebo ngobotu wambaó. Bo wonu bili lopale

boito mate, bolo bili boito mamongohi mai tilapulo dadaata pale.

²⁵Taa motoliángo tutumulio todunia botie, maóolia lo tutumulio. Bo taa molonuó tutumulio todunia botie, mamolaalaó duólo tutumulo ututuulio tutu wau ohiheo-hiheolo maó.

²⁶Taa u motohilaa momaya ola-Ú musi moduduá ola-Ú; alihu tamoomayawa ola-Ú mowali peé-peéenta wola-Ú toutoonu Waú woluo. Taa u momaya ola-Ú mahulumatio li Paapa-Ú."

²⁷"Hilaa-Ú lawa-lawalo; wolo umusi loíyaa-Ú botia? Wolo waajibu Waú moloíya, 'Paapa, lopatalo mai Watia monto saaáti botie'? Bo tumbaó u molaasa maó saaáti polodutolo botieelo Watia lonaó mai.

²⁸Paapa, pouádaáalo mola tangguli Paapa!" Yi dungo-dungohei suala lonto hulungo lotahuda mai, "Waú malo poudaá o-Lio, wau Waú mamuli mopoudaá o-Lio."

²⁹Taa dadaata tawoluo teto loódungohe suala boito. Timongolio malo loíya, "Uito bulonggodu!" Bo woluo olo talo loíya, "Diila! Malaíkati tahemo bisala wo-Lio".

³⁰Lapataó ti Isa lotahuda maó olimongolio. "Suala boito ilodungohe,

diila duólo polohuna daá ola-Ú, bo duólo polohuna daá olemu.

³¹ Botia maa wakutuulio dunia butoólo; botia takawa-kawasa todunia botie powulidulo.

³² Bo Waú botie, wonu Waú mapilo lañio toitaato dunia, mabantanga-Ú ngoáamila tau ode ola-Ú."

³³ Tio lotahuda odito u lopoílaalo woloolo mola dudelolio tou Tio maamate maó.

³⁴ Taa dadaata boito loloíya maó o-Lio. "Moduduá Buku lo Butoó lami, Olongia Tamoo-poáhua matumumulo ohiheo-hiheolo maó. Woloolo mola Yió mowali moloíya deú Walaó Manusia musi polaiólo toitaato dunia? Tatoonu Walaó Manusia boito?"

³⁵ Ti Isa lolametaó, "Bo u ngopeé mola tilango boito woluo towolota limongoli. Oditolio pononaólo ngotilonggadu tilango boito donggo woluo, alihu timongoli diila maó odungga lou modiólomo. Taa monaó todelomo u modiólomo diila otaawalio ode utoonu naóolio.

³⁶ Pomalacayalo to tilango boito, ngotilonggadu tilango boito donggo woluo to olemu, alihu timongoli mowali mongo walaó lo tilango." Lapataó ti Isa

lotahuda maó odito, Tio lonaó lonteeto mola wau diila mohuto mopobilohé batanga olimongolio.

³⁷ Eleponu madadaata u moólinggolabe hepilohutu li Isa totalu limongolio, timongolio debo diila palacaya o-Lio.

³⁸ Yi malo toduo wolo uiloíya li Nabi Yesaya, "Eeya, tatoonu tapalacaya tohabari lomongo watotia? To olita kawasa lo Eeya pilopo bilohei?"

³⁹ Uito sababuulio timongolio diila moó palacaya, sababu tei Yesaya malo loíya olo, "Allahu Taáala lotahuda,

⁴⁰ 'Waú mopopitoó mato limongolio, mohutu hilaa limongolio diila mowali bolióolo; alihu mato limongolio diila maó moóonto, pikiilangi limongolio diila maó mongalati. Alihu timongolio diila maó mohualingai ode ola-Ú, lapataó Waú mamó poóluli olimongolio.'"

⁴¹ Tei Yesaya lolóiya odito sababu tio maloóonto odudaá li Isa, wau helo bisala tomimbihu o-Lio.

⁴² Eleponu odito, dadaata tau, tumbaó towolota lo tahidihima kawasa lo Yahudi palacaya li Isa. Bo timongolio diila buheli motolongaku uito wolo juujulu, sababu timongolio moohe diila bolo taulo Parisi

diila mongohi olimongolio tumuwoto ode bele potabiaalo.

⁴³ Timongolio lebe motohilaa moótapu poloilaalo momuji monto manusia wolo polohalaga lo Allahu Taáala.

⁴⁴ Lapataó ti Isa malo ngiibodu, "Taa palacaya ola-Ú, diila to ola-Ú tio palacaya, bo to o-Lio talolao mai ola-Ú.

⁴⁵ Wau taa umoóonto ola-Ú, moóonto o-Lio talolao mai ola-Ú.

⁴⁶ Waú dungga-dungga mai ode dunia botie odelo tilango, alihu ngoáamila taa palacaya ola-Ú diila tamoti biluloá todelomo u modiólomo.

⁴⁷ Taa modungohe pongaajali-Ú, bo diila moduduáaó -- diila Waú tamo hukuumanio olio. Sababu Waú dungga-dungga mai diila mai momutoó dunia botie, bo mai mopoáahu maó.

⁴⁸ Taa diila mololimo ola-Ú wau diila modungohe u tilahuda-Ú, mawoluo tamo mutoái olio. Tahuda upilo tunggulo-Ú mai, ui-uitolo u mamomutoó olio to Dulahu Kiama.

⁴⁹ Sababu Waú diila lotahuda mai to hilaa-Ú lohihilao; ti Paapa talolao mai ola-Ú, mati Paapalo boito talo malentai

ola-Ú wolo uwajibu potahuda-Ú wau u potunggulo-Ú.

⁵⁰Wau otaawa-Ú deú palentaa-Lio boito mongohi tutumulo ututuulio tutu wau ohiheo-hiheolo maó. Yi Waú mopo tunggulai debo odelo upilo ngaajali li Paapa ola-Ú."

13 ¹Ngohui toú diipo Dulahu Buka Paska, otaawa li Isa deú maa wakutuulio Tio mololaa maó dunia botie wau muli mohulinga mola odeli Paapa-Lio. Tio momonu totau-tauwalo talowali milikii-Lio todunia, wau Tio debo momonu olimongolio tunggula pulitio.

²Ti Isa wau tahiduduá o-Lio donggo hipolamela hui. Ibilisi malo potuwoto niyatilio ode hilaa lei Yudas walaée Simon Iskariot u mohiyanati li Isa.

³Otaawa li Isa deú ti Paapa-Lio malohudu mai ngoáamila okokawasa ode o-Lio. Otaawa-Lio olo deú dudungгаа-Lio mai monto Allahu Taáala wau mamuli mohualinga mola ode Allahu Taáala.

⁴Sababu uito Tio tilimihulaó, malomuó jumba-Lio, wau lopo bintolaó hando to wohuta-Lio.

⁵Lapataó uito Tio lohuwataó taluhu ode delomo basi tuwau, tulusi malongulo oáato

lo tahiduduá o-Lio wau pilohengu-Lio wolo hando u bibiintolo to wohuta-Lio.

⁶ Maa tilunggulaó Tio odelei Simon Petrus, talo loíya, "Eeya, diila pongalo aakali Eeya tamaa mongulo oáato lowatotia?"

⁷ Ti Isa lolametaó, "Botia yió diila mongalati wolo u pohutuwo-U botie, bo yió de mamongalati maó."

⁸ "Keke, Yaa Eeyaú," loíya maó lei Petrus odeli Isa, "Sama-samaata diila maó wuloi oáato lowatotia yaa Eeyaú!" Bo tahuda maó li Isa, "Wonu Waú diila mongulo maó olemu, yió diila owumbuta wola-U."

⁹ Ualei Simon Petrus, "Wonu odito, yaa Eeyaú, diila bo oáato wambaó bo wolo uluú wau lunggongo lowatotia olo!"

¹⁰ "Taa u malolihi, malo belesi ngangaawaálo maó," tahuda li Isa odelei Petrus. "Tio diilalo palalu pobelesiyolo; ngopohia oáati. Timongoli botie malo belesi, bo diila ngoáamilalo."

¹¹ (Maílotaawa li Isa tatoonu tamamo hiyanati o-Lio. Uito sababuulio Tio lotahuda maó, "Timongoli botie malo beresi, bo diila ngoáamilalo.")

¹² Lapataó ti Isa longulo oáati mongolio, Tio luli lopomake jumba-Lio wau luli

lotihuloó. Lapataó Tio lotahuda maó olimongolio, "Tingga mongalati timongoli wolo u boheli pilohutu-Ú mola olimongoli?"

¹³Timongoli longunte ola-Ú Guru wau Eeya. Wau memangi odito.

¹⁴Wonu Waú odelo Eeya wau Guru mongulo mai oáatumu, yi timongoli olo waajibu mongunguuloa maó oáati mongoli.

¹⁵Waú mongohi mai obaaya botie olimongoli, alihu timongoli olo mopohutu maó wolo umaa pilohutu-Ú mai olimongoli.

¹⁶Otutu banali tahuda-Ú botie: wato ngota diila lebe udaá woli tuanilio, wau utolia ngota diila lebe udaá wolo talolao olio.

¹⁷Wonu maílotaawa limongoli ngoáamilalo botie, potisangilo tutu timongoli wonu mopohutu maó uito.

¹⁸Wolo u tilahuda-Ú mai botie diila tomimbihu olimongoli ngoáamila. Otaawa-Ú tita-tita tamaa tilulaotu-Ú. Bo wolo u tulatuladu todelomo Kitabi, musi motoduo mai, deúito-yito, 'Taa molamela wola-Ú, mamoluwali ola-Ú.'

¹⁹Suáli boito potunggulo-Ú mai botia olemu, toú diipo motoduo mai, alihu wonu

suáli boito de motoduo mai, timongoli mapalacaya maó deú Waúlo Tio táilunte, WA-Ú WOLUO.

²⁰ Otutu banali tahuda-Ú botie: Tatoonu taa u mololimo tailawo-Ú, mololimo ola-Ú. Wau tatoonu tamololimo ola-Ú, mololimo o-Lio tamalolao mai ola-Ú."

²¹ Lapataó ti Isa lotahuda odito, malodehu daá hilaa-Lio. Lapataó Tio lotahuda maó, "Otutu banali tahuda-Ú botie: tala ngota limongoli mamó hiyanati ola-Ú."

²² Tahiduduá o-Lio lobibiilohe ngota timongota wolo hilinggolabe daá sababu diila otaawa limongolio tatoonu tahe makusuduo-Lio.

²³ Muri tapilonu li Isa hulohuloáa to ngotuwali li Isa.

²⁴ Tei Simon Petrus longohi isalati olio, alihu tio mohintu maó li Isa wonu tatoonu tahe makusuduo-Lio.

²⁵ Yi muri boito malo dudulaó odeli Isa wau lohintu, "Tatoonu tio, Eeya?"

²⁶ Ti Isa lolametaó, "Taa u wohiya-Ú roti u polomo-Ú ode delomo manggo, matio-tiolo taulio." Yi ti Isa malohama roti ngopita, pilopo lomo-Lio ode delomo manggo; tulusi yilohi-Lio odelei Yudas walaée Simon Iskariot.

²⁷ Lolamemeto lapataó tei Yudas lololimo roti boito, Ibilisi matilumuwoto ode delomo hilaalio. Lapataó ti Isa lotahuda maó olio, "Huáa pohutuwaló wolo u otohílaa pohutuwoomu."

²⁸ Diaaluo penu boli ngotaa maó limongolio tahi huloáa hipo lamelawa teto mongalati deú yílongola ti Isa lotahuda odito odelei Yudas.

²⁹ Woluo tahemo lantobu li Isa deú Tio lopoáhu olei Yudas motali hitua-tuawua u palaluwolo to potihunggu boito, meaalo mongohi doi ngoídi ode taa mosikini -- sababu tei Yudas yito tamo dihimawa doi lokasi limongolio.

³⁰ Lapataó tei Yudas lololimo roti boito, tio lato yílumualaó. Malei dungga mai hui.

³¹ Tou tei Yudas malonaó, ti Isa lotahuda maó, "Botia Walaó Manusia pouádaáalo, wau Allahu Taáala mapo udaáalo moli o-Lio.

³² Wonu Allahu Taáala pouádaáalo moli o-Lio, Tio olo pouádaá mai lo Allahu Taáala moli batanga-Lio lohíhilao. Tumbaó Allahu Taáala mahuáa mopoúdaá mai o-Lio.

³³ Mongo walaa-Ú, Waú diilalo mohiheo motibiluloá woli mongoli. Timongoli

mamo lolohe ola-Ú, bo debo odelo umapilo tahuda-Ú ode tahidihima kawasa lo Yahudi, odito olo potahuda-Ú mai olimongoli; ode tambati u ponaówa-Ú, diila mowali onaówa limongoli.

³⁴ Palenta bohu wohi-Ú mai olemu: Toliángilo ngota timongota, debo odelo Waú motoliángai olimongoli odito olo timongoli musí mototoo-liánga.

³⁵ Wonu timongoli mototoo-liánga, ngoáamila tau mamotota deú timongoli muri-Ú."

³⁶ "Eeya, Eeya mamonaó ode utoonu?" yilintu maó lei Simon Petrus odeli Isa. Támetaó li Isa, "Ode utoonu ponaówa-Ú, yió diila mowali moduduá ola-Ú botia. Yió mamoduduá ola-Ú delapatio maó."

³⁷ "Eeya, yilongola watotia diila mowali moduduá to Eeya botia?" yilintu maó lei Petrus poli, "Watotia iloheela lohilao mate wolo Eeya!"

³⁸ Ti Isa lolametaó, "Otutu yió iloheela lohilao mate wola-Ú? Ototai maó, toú diipo maluó de mokukuyuú mai, yió mapoóotolu loloíya deú yió diila moóonuhe ola-Ú!"

14¹ "Diila maó pobalisa hilaamu," tahuda li isa olimongolio.

"Pomalacayalo to Allahu Taáala, wau pomalacayalo ola-Ú olo.

² Tobele li Paapa-Ú otambati dadaata upoti biluloáalo. Waú odito mola u mopo dapato tambati olimongoli. Waú diila tamohuda mai odito olemu, humayaalio uito diila odito.

³ Lapatio maó Waú odito mola u mopo dapato tambati olimongoli, Waú muli mohualingai wau mai molutula olimongoli, alihu toútoonuu Waú woluo, timongoli olo woluo.

⁴ Ode tambati ponaówa-Ú otaawa limongoli dalalio."

⁵ Lapataó tei Tomas loloíya maó odeli Isa, "Eeya, diila otaawa lo mongowatotia ode utoonu ponaówa lo Eeya, woloolo mola otaawa lo mongowatotia dalalio?"

⁶ Tametaó li Isa, "Waúlo dalalo u pongo taawalo Allahu Taáala wau poótapulalo tutumulo. Diaaluo penu boli ngotaa maó tamowali monaó ode Allahu Taáala, wonu diila moli ola-Ú.

⁷ Humayaalio timongoli moóonuhe ola-Ú, tantulo maó timongoli mamooonuhe li Paapa-Ú olo. Botia timongoli malo oonuhe o-Lio wau malo oonto o-Lio."

⁸ Yi tei Pilipus loloiya maó odeli Isa, "Eeya, pobilohe mai ti Paapa boito to mongowatotia, alihu mongowatotia molaasa sanangi."

⁹ Boti Isa lolametaó, "Maa odito hiheolio Waú peé-peéenta woli mongoli, wau debo diipo iloonuhemu Waú, Pilipusi? Taa u malo oonto ola-Ú, malo oonto oli Paapa. Woloolo mola yió mowali moloíya, 'Pobilohe mai ti Paapa to mongowatotia'?"

¹⁰ Pilipus! Wolo yió diila palacaya, deú Waú tuwau woli Paapa wau ti Paapa tuwau wola-Ú? Wolo umapilo tahuda-Ú mai olemu, diila lonto ola-Ú lohihilao. Ti Paapa-Ú tadebo tuwau wolaú, Tiolo tamohutu mai ngoáamilalo boito.

¹¹ Pomalacayalo ola-Ú, deú Waú tuwau woli Paapa wau ti Paapa tuwau wola-Ú. Meaalo wonu diila, pomalacayalo sababu wolo u mapilo hutu-Ú mai.

¹² Otutu banali tahuda-Ú botie: Taa palacaya ola-Ú, mamohutu maó wolo u mapilo hutu-Ú mai, -- tumbaó tio mamohutu ulebe udaá poli -- sababu Waú monaó mola odeli Paapa.

¹³ Wau penu boli wolo upohile limongoli to tanggulu-Ú, uito mapo hutuwo-Ú mai

olimongoli, alihu ti Paapa-Ú pouááalo moli Walaó.

¹⁴ Boli wolo wambaío upohile limongoli to tanggulu-Ú, mapo hutuwo-Ú mai."

¹⁵ "Wonu timongoli motoliángu-Ú, timongoli mamó duduá totoonulalo palentaa-Ú.

¹⁶ Waú mohile mola li Paapa-Ú, wau Tio mamongohi mai olemu Tamoo-tulungia wewo, tamaa motibiluloá peé-peénta woli mongoli u ohiheo-hiheolo maó.

¹⁷ Tio boito Rohullah tamamo póilaalo mai obobanali pasali lo Allahu Taáala. Dunia diila loótolimo o-Lio, sababu diila loóonto meaalo loóonuhe o-Lio. Bo timongoli moóonuhe o-Lio, sababu Tio bilu-biluloá peé-peénta woli mongoli wau tuwau woli mongoli.

¹⁸ Timongoli diila tatolaa-Ú tutuuwau debo odelo tadidu otiilo otiyamo. Waú muli mohualingai ode olemu.

¹⁹ Bolo ngopeé mola dunia diilalo moóonto ola-Ú. Bo timongoli mamóonto ola-Ú. Wau sababu Waú tumutumulo, timongoli olo matumumulo.

²⁰ Wonu meidungga mai dulahu boito, maótaawa limongoli deú Waú motituwau

woli Paapa, timongoli motituwau wola-Ú, wau Waú motituwau woli mongoli.

²¹ Taa mololimo totoonulalo palentaa-Ú wau pohutuolio, tio-tiolo tamo toliángu-Ú. Ti Paapa-Ú mamomonu mai taa motoliángo ola-Ú. Waú olo mamoto liángo tau boito wau mopo bilohei batanga-Ú olio."

²² Tei Yudas (diila tei Yudas Iskarioti) lohintu maó li Isa, "Eeya, yilongola Eeya motohilaa mopoílaalo batanga lo Eeya to mongowatotia wau diila ode dunia?"

²³ Ti Isa lolametaó, "Taa motoliángu-Ú, mamoto duduá pongaajali-Ú. Ti Paapa-Ú mamomonu mai olio. Ti Paapa wau Waú mamei dungga mai ode olio wau motibiluloá wolio.

²⁴ Taa diila motoliánga ola-Ú, diila moduduá pongaajali-Ú. Pongaajali u ilodungohe limongoli boito, diila lonto ola-Ú, bo lonto li Paapa-Ú talolao mai ola-Ú.

²⁵ Ngoáamilalo boito potahuda-Ú mai olemu ngotilonggadu Waú peé-peéenta woli mongoli.

²⁶ Bo Rohullah, Tamoo-tulungia tamaa laolo mai li Paapa-Ú to tanggulu-Ú, Tiolo tamaa mongaajali olimongoli

totoonulolalo maó wau mamopoéela olimongoli ngoáamila umaa piloótaa-Ú olimongoli.

²⁷ Salaamati tolaa-Ú maó olimongoli. Salaamati-Ú lohihilao uwohi-Ú mai olemu. Uwohi-Ú mai boito diila debo odelo uwohi lodunia olemu. Diila maó pobalisa hilaamu, diila maó oohe.

²⁸ Maílo dungohe limongoli upilo tahuda-Ú mai, 'Waú mamonaó, bo Waú mamuli mohualingai ode limongoli' Wonu timongoli motoliánga ola-Ú timongoli masanangi Waú monaó mola odeli Paapa-Ú, sababu ti Paapa-Ú lebe udaá wola-Ú.

²⁹ Waú mopoótaa mai uito to olemu botia, toú ngoáamilalo boito diipo motoduo mai, alihu de wonu motoduo mai, timongoli mapalacaya.

³⁰ Waú diilalo mobisala mai lebe dadaata maó toli mongoli, sababu mawakutuulio tahidihima kawasa lodunia botie mamonaó mai. Bo tio diila okawasa to batanga-Ú.

³¹ Bo ngoáamila boito musí motoduo mai alihu dunia mongalati deú Waú momonu oli Paapa wau hemohutu ngoáamila u pilomalentai li Paapa to ola-Ú. Naa, dulo ito monaóolo monteea."

15 ¹ Tahuda maó li Isa poli, "Waú bungo lo angguru ututuulio tutu wau ti Paapa-Ú yito tamokele-kela maó ilengilio.

² Timiídu tango to ola-Ú udiila momungo, panggee-Lio, wau timiídu tango u momungo, ilangiyalo duungio wau pobelesiyolo alihu lebe dadaata poli hungolio.

³ Timongoli malo belesi sababu pongaajali uilohi-Ú mai olimongoli.

⁴ Debo potituwaulo wola-Ú wau Waú olo madebo motituwau woli mongoli. Tango wambaó diila mowali momungo mai, ngopohia wonu tango boito debo to bungolio. Odito olo timongoli bo mowali momungo, wonu debo motituwau wola-Ú.

⁵ Waúlo bungo lo angguru, wau timongoli tataa-ngolio. Taa u debo motituwau wola-Ú wau Waú wolio, mamomungo dadaata; sababu wonu diila wola-Ú, timongoli diila mowali mohutu wolo-wolo.

⁶ Taa u debo diila motituwau wola-Ú, mapo mahulolio debo odelo tango, lapataó mowali mohengu. Tataa-ngowaalo udebo odelo uito maimoóolo wau pomahulola ode delomo tulu, tulusi tumbilalo.

⁷ Wonu timongoli debo motituwau wola-Ú wau pongaajali-Ú debo todelomo

hilaamu, pohileaalo odeli Paapa-Ú boli wolo u otohila limongoli; hihile limongoli boito mapoó poluo-Lio mai.

⁸ Wonu timongoli momungo dadaata, ti Paapa-Ú pouáaalo mola; wau loú odito otu-otutuulo maó timongoli mowali muri-Ú.

⁹ Debo odelo ti Paapa-Ú lomonu mai ola-Ú, oditolo olo Waú momonu olimongoli. Mamusi timongoli tatapu wau molotolo hilao tumutumulo odelo taa u pilonu-Ú.

¹⁰ Wonu timongoli moponaó ngoáamila palentaa-Ú, timongoli debo tatapu wau molotolo hilao toponu-Ú. Tutuuwauwa debo odelo Waú debo molotolo hilao toponu li Paapa-Ú sababu loponaó ngoáamila palentaa-Lio.

¹¹ Ngoáamilalo botie poótaa-Ú mai olimongoli, alihu owengahu-Ú woluo todelomo hila limongoli, wau owengahi mongoli mowali wimu-wimumuto ngoáamilalo.

¹² Uti-utieelo palentaa-Ú; toliángalo ngota timongota, tutuuwauwa debo odelo Waú momonu olimongoli.

¹³ Taa motoliánga daá mongo sahabatilio tio-tiolo tamongohi maó tutumulio ode limongolio.

¹⁴ Timongoli mongo sahabati-Ú, wonu timongoli mohutu maó wolo upilo malenta-Ú mai olimongoli.

¹⁵ Timongoli diilalo tanggula-Ú wato, sababu wato diila motota wolo u hekalaja lituanilio. Timongoli tanggula-Ú mai sahabati, sababu ngoáamila u dilungohe-Ú lonto li Paapa-Ú, mapiloótaa-Ú mai olimongoli.

¹⁶ Diila timongoli talo lulaoto ola-Ú. Waúlo talo lulaotai olimongoli, wau mopoáhu olimongoli u momungo dadaata -- huhuu-ngowaalo udiila mowali binasa. Yi ti Paapa-Ú mamongohi mai olimongoli boli wolo upohile mola limongoli o-Lio to tanggulu-Ú.

¹⁷ Uti-utieelo palentaa-Ú to olemu: toliángalo ngota timongota."

¹⁸ "Wonu dunia molunuí mongoli, eelai maó deú Waú maleimulo yilonuó lodunia.

¹⁹ Humayaalio timongoli miliki lodunia, timongoli matoliángo lodunia debo odelo milikiilio. Bo Waú malo lulaoto olimongoli lonto dunia botie, oditolio timongoli diilalo miliki lodunia, uito sababuulio dunia molonuí mongoli.

²⁰ Eelei maó wolo umapilo tahuda-Ú mai olimongoli, 'Wato diila lebe udaá woli

tuanilio.' Wonu timongolio malo ngalinaya ola-Ú, timongolio olo mamó ngalinaya olimongoli. Wonu timongolio moduduó pongaajali-Ú, timongolio olo mamoduduó pongaajalimu.

²¹ Ngoáamilalo boito mapohutuo limongolio ode limongoli, sababu timongoli muri-Ú, sababu timongolio diila moóonuhe o-Lio talolao mai ola-Ú.

²² Humayaalio Waú diila lonaó mai wau diila lopoótaa ngoáamilalo boito ode limongolio, timongolio diila ilodusa. Bo botia timongolio diilalo o alaasani duólo dusa limongolio.

²³ Taa molonuúu-Ú, molonuá li Paapa-Ú.

²⁴ Humayaalio tohuungi mongolio Waú diila lohutu susuu-aliyaala udiipo peéenta maó pilohutu lotaa wewo, yi timongolio diila ilodusa. Bo botia timongolio malo oonto wolo u pilohutu-Ú, wau timongolio molonuúu-Ú meaalo li Paapa-Ú.

²⁵ Bo mawajibulio odito, alihu motoduo mai wolo u tulatuladu todelomo Buku Butoó limongolio, deúito-yito: 'Timongolio molonuúu-Ú diila o alaasani.'

²⁶ Waú mamolao mai olemu Tamoo-tulungia u asaliilio mai monto li Paapa-Ú. Tiolo Rohu tamamo póilaalo mai obobanali

pasali lo Allahu Taáala. Wonu bolo Tio meidungga mai Tio mamongohi sakusi pasali ola-Ú.

²⁷Wau timongoli olo musí mongohi sakusi pasali ola-Ú, sababu timongoli mapeé-peéenta wola-Ú anggadu bohuliolo mai.

16 ¹Ngoáamilalo boito poótaa-Ú mai olimongoli alihu timongoli diila maó momaahu iimani limongoli.

²Timongoli malualolio monto bebee-leyaala potabiaalo. Wau mamei dungga wakutuulio deú taa momate olimongoli mate-mateelo maó mamo lantobu tio hemotiwato to Allahu Taáala.

³Timongolio mohutu mai uito olemu sababu timongolio diipo moóonuhe li Paapa-Ú meaalo ola-Ú.

⁴Bo botia poótaa-Ú mai uito olemu, alihu wonu uito bolo motoduo mai, maéela mola limongoli deú Waú malo poótaa mai uito olimongoli." "Suáli botie diila piloótaa-Ú olimongoli toú bohulio mai, sababu Waú donggo peé-peéenta woli mongoli.

⁵Bo botia Waú mamo hualinga mola ode o-Lio talolao mai ola-Ú; wau diaaluo penu boli ngotaa maó monto olimongoli tamohintu mai ode utoonu ponaówa-Ú.

⁶ Botia tumbaó hilaamu lowali siluukali, sababu Waú lopoótaa mai suáli boito olemu.

⁷ Bo Waú molele mai u otutu olemu: Lebe mopioheó olimongoli, wonu Waú mohualinga mola; sababu wonu waú diila mohualinga mola, Tamoo-tulungia boito diila tamei dungga ode olemu.

⁸ Wonu Tio meidungga, Tio mamopo ilaalo ode dunia boli lodusa u otutuulio maó, monto wolo u otutu, wau monto huumani lo Allahu Taáala.

⁹ Tio mamopo ilaalo mai deú diila palacaya to ola-Ú yito dusa;

¹⁰ deú Waú otutu, sababu Waú mohualinga mola odeli Paapa wau timongoli diilalo moóonto ola-Ú;

¹¹ wau deú Allahu Taáala malo lumula lohuumani mai, sababu tahidihima kawasa lodunia botie mahilu-kuumani.

¹² Donggo dadaata u ohilaa polele-Ú mai olemu, bo masaatia botie timongoli diipo mambo mololimo maó.

¹³ Bo wonu Rohu boito meidungga mai, deúito-yito Tio tamopo ilaalo mai obobanali pasali lo Allahu Taáala, timongoli madeloo-Lio u moóonuheó ngoáamilalo obobanali. Tio diila

tamotahuda monto batanga-Lio lohihilao bo motahuda mai wolo u maílo dungohe-Lio, wau Tio mamopo poótaa mai olemu wolo u mamowali todulahu momooli.

¹⁴ Tio mamopo údaá ola-Ú, sababu wolo u pilotunggu-Lio mai olemu, tilolimo-Lio lonto ola-Ú.

¹⁵ Ngoáamila uwoluo toli Paapa yito hakuu-Ú. Uito sababuulio Waú motahuda mai deú wolo upilo tunggulai lo Rohu olemu, tilolimo-Lio lonto ola-Ú."

¹⁶ "Bolo ngopeé mola timongoli diilalo moóonto ola-Ú, wau olo bolo ngopeé mola poli timongoli mamooóonto ola-Ú."

¹⁷ Dengolo lota tahiduduá li Isa mawiwiintua ngota timongota, "Wolo makusudu-Lio u Tio lotahuda olanto: 'Bolo ngopeé mola timongoli diilalo moóonto ola-Ú, wau olo bolo ngopeé mola timongoli mamooóonto ola-Ú'? Wolo poli makusudu-Lio loú: 'Waú mohualinga mola odeli Paapa?'"

¹⁸ Timongolio hipohintua laito "Wolo boliilio maó, 'ngopeé mola'? Ito diila mongalati Tio hemobisala pasali loolo!"

¹⁹ Otaawa li Isa timongolio motohilaa mohintu o-Lio. Oditolio Tio lotahuda maó, "Engonti tilahuda-Ú mai, 'Bolo

ngopeé mola, timongoli diilalo moóonto ola-Ú, wau olo bolo ngopeé mola timongoli mamóonto ola-Ú'. Maa uito u heposu@alia limongoli towolota limongoli?

²⁰ Pomalacayalo, timongoli mahumoyongo wau mohilimuta, bo dunia mameengahu. Timongoli maa osuusawa lohilao, bo osuusamu boito mamoboliá mowali owengahu.

²¹ Wonu taabua ngota wimbideó motutu mai, tio suusa, sababu maa wakutuulio tio modutolo. Bo odito walaío mapilo tutulio mai, taabua boito mamolipato dudutolio sababu meengahu deú taúnge ngota mapilo tutulio mai ode delomo dunia.

²² Odito olo woli mongoli: Botia timongoli osuusawa lohilao, bo Waú mamuli modunggaya woli mongoli, yi hilaamu mameengahu; wau diaaluo penu boli ngotaa maó tamowali mohama owengahu boito monto hilaamu.

²³ Todulahu boito, timongoli diilalo mohintu wolo-wolo poli ola-Ú. Pomalacayalo: Penu boli wolo upohile mola limongoli toli Paapa-Ú to tanggulu-Ú, uito mawohi mai li Paapa-Ú olemu.

²⁴ Tunggula tosaaáti botie timongoli diipo lohile mola wolo-wolo to tanggulu-Ú.

Pohileaalo mola, yi timongoli mamolimo, alihu owengahumu wimu-wimumuto ngoáamilalo."

²⁵ "Ngoáamila botie polele-Ú mai olemu wolo lumadu. Bo mamei dungga wakutuulio, Waú diilalo momake lumadu, bo motahuda wolo juujulu pasali li Paapa-Ú.

²⁶ Tou boito timongoli mamohile li Paapa-Ú to tanggulu-Ú; ototai maó, Waú diila tamohile monto li Paapa-Ú duólo olimongoli,

²⁷ sababu ti Paapa-Ú lohihilao momonu olimongoli. Tio momonu olimongoli sababu timongoli motoliánga ola-Ú, wau palacaya deú Waú dungga-dungga mai lonto li Paapa-Ú.

²⁸ Memangi asalii-Ú lonto li Paapa-Ú, wau malei dungga mai ode delomo dunia. Bo botia Waú mamololaa maó dunia u mohualinga mola odeli Paapa-Ú."

²⁹ Lapataó tahiduduá li Isa lolóiya o-Lio, "Botia Eeya lotahuda mai wolo juujulu wau diila lomake lumadu,

³⁰ wau otaawa lo mongowatotia deú otaawa lo Eeya totoonulalo u hitua-tuawua. Diila palalu penu boli ngotaa maó mohintu wolo-wolo ode Eeya. Sababu

uito mongowatotia palacaya to Eeya dungga-dungga mai lonto Allahu Taáala."

³¹ Ti Isa lolametaó olimongolio, "Oditolio mapalacaya timongoli botia?"

³² Eelai maó! Saaátilio mamei dungga, tumbaó malei dungga mai, timongoli mapo bubuu-ayaalio. Ngota-ngota timongoli mamó hualinga ode bele lohihilao wau mololaa maó ola-Ú tutuuwau. Bo Waú diila tutuuwau sababu ti Paapa-Ú woluo peé-peéenta wola-Ú.

³³ Ngoáamilalo botie polele-Ú mai alihu timongoli moótodo mai moáahu sababu motituwau wola-Ú. To dunia timongoli mamodutolo. Bo poótoheeta mola hilaamu! Dunia maa ilolahe-Ú!"

17 ¹ Lapataó lotahuda maó odito, ti Isa yilumanggela mola ode hulungo wau lolóiya, "Paapa, botia malei dungga wakutuulio. Poúdaáalo mai Waláí Paapa, alihu Waláí Paapa olo mopoúdaá mola li Paapa.

² Ti Paapa malohudu mai kawasa to ngoáamila umati lomanusia ode Waláó, alihu Tio mongohi tutumulo ututuulio tutu wau ohiheo-hiheolo maó ode ngoáamila tamailudu mai li Paapa o-Lio.

³ Uti-utieelo tutumulo ututuulio tutu wau ohiheo-hiheolo maó; alihu tau motota li Paapa, tuwa-tuwaulo Allahu Taáala tabanali, wau moóonuhe li Isa Almasi tailao mai li Paapa.

⁴ Watia malo pouádaá mola li Paapa toitaato dunia botie wolo lopoó lapato kalaja u pilopoáhu mai li Paapa olaa-Tia.

⁵ Paapa! Pouádaáalo mai Watia botia toli Paapa, wolo odudaá u mililiki lo Watia peé-peéenta woli Paapa tou dunia botie diipo pilowali mai.

⁶ Watia malo poótaa li Paapa ode tau-tauwalo lonto dunia botie tamailudu mai li Paapa olaa-Tia. Timongolio yito miliki li Paapa, wau ti Paapa malohudu mai olimongolio ode Laatia. Timongolio malo duduá tahuda li Paapa.

⁷ Botia otaawa limongolio deú ngoáamila uiludu mai li Paapa olaa-Tia asaliilio mai lonto li Paapa.

⁸ Mapilo tunggulaó lo Watia olimongolio tahuda u pilotahuda mai li Paapa olaa-Tia; wau timongolio malo lolimo maó. Otaawa limongolio deú Watia otu-otutuulo maó dungga-dungga mai lonto li Paapa wau timongolio palacaya deú ti Paapaalo tamalolao mai olaa-Tia.

⁹ Watia moduá mola ode limongolio. Watia diila moduá duólo dunia bo duólo tamailudu mai li Paapa olaa-Tia, sababu timongolio deúito-yito miliki li Paapa.

¹⁰ Ngoáamila miliki lo Watia yito miliki li Paapa olo; wau ngoáamila miliki li Paapa yito miliki lo Watia olo. Watia pilopo udaá towolota limongolio.

¹¹ Botia Watia monaó mai odeli Paapa. Watia diilalo motibiluloá todunia; bo timongolio woluo todunia. Paapa tamantali! Dahailo mai timongolio wolo okokawasa tangguli Paapa, deúito-yito tanggulo u mailohi mai li Paapa olaa-Tia -- alihu timongolio mowali tuwau, tutuuwauwa debo odelo ti Paapa wau Watia tuwau olo.

¹² Tou Watia donggo peé-peéenta woli mongolio, Watia malodaha olimongolio wolo okokawasa tangguli Paapa -- tanggulo uilohi mai li Paapa olaa-Tia. Watia malodaha olimongolio wau diaaluo penu boli ngotaa maó limongolio tailooli, ngopohia tio tameemangi musiilio mooli; alihu woleeto boito motoduwolo mai wolo u tulatuladu todelomo Kitabi.

¹³ Botia Watia monaó mai odeli Paapa. Ngoáamilalo botie tilahuda maó lo Watia

toú donggo todunia; alihu timongolio wolo tióotutua moólaasa owengahu lo Watia.

¹⁴ Watia malopo tunggulaó olimongolio tahuda li Paapa, wau dunia molonuí mongolio, sababu timongolio diila miliki lodunia, tutuuwauwa debo odelo Watia olo diila miliki lodunia.

¹⁵ Watia diila mohile alihu ti Paapa mohama mola olimongolio monto dunia botie, bo Watia mohile alihu ti Paapa modaha olimongolio monto Ibilisi.

¹⁶ Tutuuwauwa suáliilio debo odelo Watia diila miliki lodunia, timongolio olo diila miliki lodunia.

¹⁷ Powaliyalo mai timongolio tolomodu miliki li Paapa moli obobanali; tahuda li Paapa boitolo obobanali.

¹⁸ Debo odelo ti Paapa malolao mai olaa-Tia ode dunia, odito olo Watia lolao olimongolio ode dunia.

¹⁹ U polohuna daá olimongolio, Watia mohudu mola batanga odelo tolomodu miliki li Paapa, alihu timongolio olo mowali tolomodu miliki li Paapa moli obobanali.

²⁰ Diila bo ode limongolio wambaó Watia moduá mola. Watia moduá mola olo ode

tau-tauwalo tamaa palacaya olaa-Tia lo ososakusi limongolio botie.

²¹ Pohile laa-Tia, Paapa, alihu timongolio ngoáamila mowali tuwau, debo odelo ti Paapa lotituwau mai wolaa-Tia, wau Watia woli Paapa. Pohileaala duá timongolio mowali tuwau wolaan-To alihu dunia palacaya deú ti Paapa talolao mai olaa-Tia.

²² Watia malohudu maó olimongolio odudaá, uiludu mai li Paapa olaa-Tia, alihu timongolio mowali tuwau, tutuuwauwa debo odelo lto olo tuwau;

²³ Watia woli mongolio, wau ti Paapa wolaa-Tia; alihu timongolio otu-otutuulo maó tuwau. Yi dunia mamotota maó deú ti Paapaalo talolao mai olaa-Tia, wau deú ti Paapa momonu olimongolio debo odelo ti Paapa lomonu olaa-Tia.

²⁴ Paapa, otohila laa-Tia alihu timongolio, tailudu mai li Paapa olaa-Tia, woluo peé-peéenta wolaa-Tia totambati Watia woluo, alihu timongolio moóonto odudaá laa-Tia; deúito-yito odudaá uiludu mai li Paapa olaa-Tia; sababu ti Paapa lomonu olaa-Tia tou dunia diipo pilowali mai.

²⁵ Paapa taádili! Dunia diila moóonuhe li Paapa; bo Watia moóonuhe li Paapa; wau

tau-tauwala botie motota deú ti Paapa talolao mai olaa-Tia.

²⁶ Watia malo poílaalo tangguli Paapa ode limongolio; wau Watia madebo mohutu maó odito, alihu ponu li Paapa olaa-Tia debo todelomo hilaa limongolio wau Watia motituwau woli mongolio."

18 ¹ Lapatio maó ti Isa loduá mola odito, Tio wolo tahiduduá o-Lio malonaó ode ngotuwali lo Dutula Kidron. Mota teto woluo ilengi tuwau u pilomuloa wolo bubuu-ngawaalo, wau ti Isa wolo tahiduduá o-Lio tilumuwoto ode ilengi u pilomuloa wolo bubuu-ngowaalo boito.

² Tei Yudas tamoo-hiyanatia boito, motota lotambati boito; sababu ti Isa tingga maito hemo tiambu mota teto wolo tahiduduá o-Lio.

³ Yi tei Yudas lonaó mota ode tambati boito wolo ngopasuukani suludadu lo Romawi wau dengolo lota tamoo-kawalia Bele lo Eeya taílahula lomongo iimamu tauwa wau tau-tauwalo Parisi. Timongolio hideloa tingolo, lantera wau molongo.

⁴ Otaawa li Isa ngoáamila u mamotoduo mai to batanga-Lio. Oditolio Tio malo himbide mota ode tau-tauwala boito

wau lohintu maó, "Tatoonu tahe lolohu limongoli?"

⁵ "Ti Isa, taulo Najaret," tametaó limongolio. "Waúlo Tio," tahuda maó li Isa. Tei Yudas tamoo-hiyanatia tihutihula teto woli mongolio.

⁶ Touú ti Isa lotahuda maó olimongolio, "Waúlo Tio," timongolio ngoáamila matilumouli tulusi leibalata mola tohuta.

⁷ Peéentapo ti Isa lohintu maó olimongolio, "Tatoonu tahe lolohu limongoli?" "Ti Isa taulo Najaret," tametaó limongolio.

⁸ "Mapilolele-Ú mai Waúlo Tio," tahuda Isa. "Wau wonu memangi Waú tahe lolohu limongoli, poluliaalo mota tawewo limongoli botie monaó."

⁹ (Wolo lotahuda maó odito, lotoduwolo mola wolo u mapilo tahuda li Isa touú dipo-dipolulio: "Paapa, monto tau-tauwala tailudu mai li Paapa olaa-Tia, diaaluo penu boli ngota maó tailooli.")

¹⁰ Tei Simon Petrus u delodelo mai wamilo tuwau, lomahutaó tulusi lolimadeó wato li iimamu daá tunggula loputu bulongalio olowala. Tanggulo wato boito Malkus.

¹¹ Yi ti Isa lotahuda maó odelei Petrus, "Muli potaúpa mola wamilumu ode taúpio! Wolo to pikiilangimu Waú diila tamongilu hakati lo dudutolo uilohi mai li Paapa ola-Ú?"

¹² Lapataó mongo pajule lo Romawi wolo kamudangilio wau tahipo kawalia lo Yahudi malo heúpo wau lomungu li Isa.

¹³ Bohu-bohulio timongolio lodelo li Isa lotaalua wolei Hanas, tiyamo moluhengo lei Kayapas. Tei Kayapas boitolo iimamu daá totaunu boito.

¹⁴ Wau tio-tiolo tamalo nasehati to tahidihima kawasa tauilo Yahudi deú lebe mopiohu ngotaalio mate maó duólo ngoáamila bangusa.

¹⁵ Tei Simon Petrus wau ngotaalio lomuri wewo loduduá li Isa. Muri uwewo botie oonuhe li iimamu daá; oditolio tio loduduá tilumuwoto peé-peéenta woli Isa ode paango lobele li iimamu daá;

¹⁶ hiambola tei Petrus wimawima to bulemengio, tohuhebu. Lapataó muri uwewo boito lonaó mota ode bulemengio wau helo bisala wolo taabua moomayawa tahemodaha huhebu, lapataó malopo tuwotaó olei Petrus ode delomio.

¹⁷Wato taabua tamoodahawa huhebu boito lolóiya maó odelei Petrus, "Wuu, diila mayió-yióolo tala ngota muri lotau boito?" "Diila," tametaó lei Petrus.

¹⁸Toú boito dulente mohuhulo, oditolio tahi pomayawa wau tahi pokawalia malopo léiita tulu dúito wau timongolio lopo dengengo wawaí mongolio teto. Tei Petrus lonaó mola odito wau tilimihulo peé-peéenta loti dengengo woli mongolio.

¹⁹Ti iimamu daá helohintu li Isa pasali lo tahiduduá o-Lio wau pasali lo pongaajali-Lio.

²⁰Ti Isa lolametaó, "Waú laito hemo bisala wolo juujulu totalu lotaa dadaata. Waú laito hemo ngaajali tobele potabiyaalo wau to Bele lo Allahu Taáala, tambati taulo Yahudi u biasaalio hemo ambuwa. Diila peéenta maó Waú helo bisala wolo-wolo loú tuuáaó-tuuáaó.

²¹Oditolio yilongola ti Tuani hemohintu mai olaa-Tia? Yintuwalo maó olimongolio tamaa loódungohe olaa-Tia helo ngaajali. Tantu otaawa limongolio wolo u yilóiyaa-Ú maó."

²²Toú ti Isa lotahuda maó odito, tala ngota lo tamoo-kawalia teto, lolambali

o–Lio wau loloíya, "Buheli daá Yió mobisala debo odelo uito odeli iimamu daá!"

²³ Ti Isa lolametaó, "Wonu Waú mobisala mai hitua–tuawua utalatala, poleleaalo mai tewe wolo totalaallo! Bo wonu u pilolele–Ú mai boito memangi otutu, yilongola yió lolambali ola–Ú?"

²⁴ Lapataó tei Hanas lopoáhu talodelo mota li Isa wolo pungu–pungu odeli limamu Daá Kayapas.

²⁵ Tei Simon Petrus olo donggo tihutihula hemo tidengengo teto. Tau–tauwalo loloíya maó olio. "Diila mayió–yióolo muri lotau boito?" Bo tei Petrus lomaheó, ualio maó, "Diila!"

²⁶ Wato ngota li iimamu daá, deúito–yito ilaato lotaa bulongalio pilutu maó lei Petrus, loloíya, "Wolo diila waú taloóonto olemu to ilengi u pilomuloa lo bubuu–ngawaalo boito peé–péenta wo–Lio?"

²⁷ Lapataó tei Petrus luli lomaheó, "Diila" -- wau tiluhata tou boi–boitolo maluó malo kuukuyuú mai.

²⁸ Didimodupo daá timongolio lodelo mota li Isa lonto bele lei Kayapas ode bele biluloá saaha li Gubolonulu. Tau–tauwalo Yahudi lohihilao diila tilumuwoto ode

delomo bele biluloá saaha li onlongia, alihu timongolio diila mowali najisi moduduó dudelo lo agama, sababu timongolio ohilaa molamela uáalo lo Paska.

²⁹ Sababu uito tei Pilatus yilumualaó ode bulemengio ode limongolio wau lohintu maó, "Wolo dudulohumu totau botie?"

³⁰ Timongolio lolametaó, "Humayaalio Tio diila ototala, amiaatia diila talodelo mai o-Lio odeli Paaá Gubolonulu."

³¹ Tei Pilatus loíya maó olimongolio, "Hamaalo mota Tio wau butoílo maó Tio moduduó butoí mongoli lohihilao!" Bo tau-tauwalo Yahudi boito lolametaó, "Amiaatia diila mowali mohukuumani mate totau."

³² (Utie motoduo alihu pohupohutu wolo upilo tahuda li Isa tomimbihu pohuliilio toú Tio maamate maó.)

³³ Tei Pilatus luli tilumuwoto ode bele biluloá saaha li onlongia wau lotiangaó li Isa, lapataó malohintu, "Wolo Yió onlongia tau lo Yahudi?"

³⁴ Ti Isa lolametaó, "Wolo yiyintu botie lonto olemu lohihilao meaalo woluo taawewo tamalo poótaa mai olemu tomimbihu ola-Ú?"

³⁵ Tei Pilatus lolametaó, "Wolo waú botie taulo Yahudi? Tamalohudu mai ole-Mu ode olaú yito bangusaa-Mu lohihilao wau mongo iimamu tauwa. Wolo umaa pilohutu-Mu?"

³⁶ Tametaó li Isa, "Yilaidiaa-Ú diila lonto dunia botie. Humayaalio yilaidiaa-Ú lonto dunia botie, tautau-Ú mamohipate alihu Waú diila tawuduolio ode tahidihima kawasa lo Yahudi. Bo memangi yilaidiaa-Ú diila lonto dunia botie!"

³⁷ Yi tei Pilatus lohintu maó o-Lio, "Wonu odito, Yió botie onlongia?" Ti Isa lolametaó, "Yió lolóiya deú Waú botie onlongia. Waú pilotutulio wau dungga-dungga mai ode dunia wolo makusudu tuwau, deúito-yito mai mongohi sakusi pasali lo obobanali. Taa monto obobanali boito mamó dungohe ola-Ú."

³⁸ Tei Pilatus lohintu o-Lio, "Wolo boliilio obobanali?" Lapataó tei Pilatus luli yilumualo lonto bele biluloá saaha li onlongia wau lolóiya maó ode tau-tauwalo Yahudi, "Waú diila loótapu totala penu boli tuwau maó lonto o-Lio."

³⁹ Bo moduduáaó obobiasa limongoli, waú laito hemo lopato ngotaalio lotaa hihukuu-mania to Dulahu Buka Paska.

Wolo mohuto timongoli alihu waú molopataó oli onlongia taulo Yahudi botie ode limongoli?"

⁴⁰Timongolio lolametaó wolo hiwaatiá, "Diila, diila Tio, bo tei Barabas!" (Tei Barabas yito ngotaalio tamoo–lambata.)

19¹ Lapataó tei Pilatus tilumuwotaó tulusi lopoáhu tau mota lomuboá li Isa.

² Mongo pajule lohutu maó makuta lonto tataa–ngowaalo kekeeĩ u oduhi, lapataó lopohuli to lunggongi Isa, lapataó uito timongolio lopopake maó o–Lio jumba lailoumu,

³ tulusi wuwuulia timongolio hiponaówa mai ode o–Lio wau helo loíya maó, "Pomali–tutuólo mola onlongia taulo Yahudi!" Lapataó timongolio helo lambali o–Lio.

⁴ Lapataó uito tei Pilatus peéentapo yilumualai wau lolóiya ode taa dadaata, "Bilohilo! Waú lodelo mai o–Lio ode bulemengio ode limongoli, alihu otaawa maó limongoli Tio diila piloó tapulaú totala penu boli tuwau maó."

⁵ Yi ti Isa yilumualaó wolo pakepake makuta duhi wau jumba lailoumu. Lapataó

tei Pilatus lolóíya ode limongolio, "Bilohilo tau boito."

⁶Toú mongo iimamu tauwa wau tahi pokawalia boito loóonto li Isa, timongolio malo nguwatió mola, "Salipuwalo Tio! Salipuwalo Tio!" Tei Pilatus lolóíya maó ode limongolio, "Hamaawa mota Tio, wau salipuwalo limongoli lohihilao, Tio diila piloó tapulaú totala penu boli tuwau maó."

⁷Tau-tauwalo Yahudi boito lolametaó, "Moduduá butoó lamiaatia Tio musi hukuu-maniyolo mate-mateelo maó sababu Tio longaku batanga-Lio Walaó Allahu Taáala."

⁸Toú tei Pilatus loódungohe olimongolio lolóíya odito, yi malebe yiloohe tio.

⁹Yi tio luli tilumuwoto ode delomo bele biluloá saaha li olongia wau lapataó ti Isa pilotuotio mai, tei Pilatus lohintu maó o-Lio, "Lonto utoonu mai asalii-Mu?" Boti Isa diila lolameto.

¹⁰Oditolio tei Pilatus luli lolóíya maó, "Yió diila mohuto mobisala wolaú? Ototai maó waú okawasa molopata ole-Mu, wau okawasa moposalipu ole-Mu!"

¹¹Ti Isa lolametaó, "Wonu Allahu Taáala diila mongohi mai kawasa boito olemu, yió sama-samaata diila okawasa ola-Û.

Sababu uito talohudu mai ola-Ú ode olemu, lebe udaá maó dusalio wolemu."

¹²Toú tei Pilatus loódungohe uito, tio helo tolopani u molopata o-Lio. Bo tau-tauwalo Yahudi mahiwatiá, "Wonu ti Tuani molopata o-Lio, ti Tuani diila sahabati li Kaisari! Taa motolongaku batangalio onlongia, tau boito musu li Kaisari!"

¹³Toú tei Pilatus loódungohe tataa-heyalo boito, tio malodelo li Isa ode bulemengio lapataó lotihuloáa tokadera lobubutoó totambati u ilunte Wumbato Botu. (To delomo bahasa lo Ibrani ilunteelio Gabata.)

¹⁴Toú boito dulahu wimbideó totaú, dulahu toú diipo Dulahu Buka Paska. Tei Pilatus loloíya maó ode tau-tauwala boito, "Taboti-botieelo onlongiyamu!"

¹⁵Timongolio hiwuwa-wuwaatiá, "Pateyalo Tio mate-mateelo maó! Pateyalo Tio mate-mateelo maó! Salipuwalo Tio!" Tei Pilatus lohintu maó, "Tingga wajibu waú mosalipu maó onlongia limongoli?" Mongo iimamu tauwa malo lametaó, "Boti Kaisari wambaó tuwa-tuwaulo onlongia lamiaatia!"

¹⁶ Yi tei Pilatus malohudu li Isa ode limongolio mota silalipulio. Timongolio malohama li Isa tulusi dilelolio mota.

¹⁷ Ti Isa yilumualai wolo potapota lohihilao salipu-Lio ode tambati u ilunte "Tambati lo Bakakau". (Todelomo bahasa lo Ibrani ilunte Golgota.)

¹⁸ Mota teto Tio silalipulio. Peé-peéenta wo-Lio woluo olo duulota wewo tasilalipu; taangota to ambahu oloihi, taangota to ambahu olowala wau ti Isa tohuungio.

¹⁹ To ayu salipu li Isa, tei Pilatus léi tuladeó odie: "Ti Isa lonto Najaret, Olongia tauo Yahudi".

²⁰ Dadaata tauo Yahudi loóbaca maó u tulatuladu boito, sababu tambati upilo salipua li Isa boito diila molamingo monto kota. Tuladu boito todelomo bahasa lo Ibrani, Latini wau Yunani.

²¹ Mongo iimamu tauwa malo loíya odelei Pilatus, "Diila maó tulade 'Olongia tauo Yahudi', bo tulade maó, 'Tau botie loloíya, Waú Olongia tauo Yahudi.'"

²² Bo tei Pilatus lolametaó, "U maa tiluladuú, hulialo maó debo tulatuladu."

²³ Lapataó mongo pajule boito lopo salipu li Isa, timongolio malohama boó-Lio. Pakeyangi boito tilayadio wopato:

ngota-ngota loótapu ngotayadu. Hilama limongolio olo jumba-Lio. Jumba boito diila odetumalio -- hilewolio lonto yitaato demola tibawa.

²⁴ Mongo pajule boito malo loíya ngota timongota, "Diila maó kede-kedenganto jumba botie. Dulo undionto u molantu tatoonu tamoótapu maó." Suáli boito motoduo mai alihu pohupohutu wolo u tulatuladu todelomo Kitabi, deúito-yito: "Timongolio malo laya-layade boóo-Ú, wau longundi jumba-Ú." Wau memangi mongo pajule boito lohutu maó odito.

²⁵ Totili losalipu li Isa tihutihulo tiilo li Isa, wutatiilo-Lio taabua, ti Maria dile lei Kleopas, wau ti Maria Mahadalena.

²⁶ Toú ti Isa loóonto oliilo-Lio wau muri tapilonu-Lio tihutihula teto, Tio lolóiya maó oliilo-Lio, "Maama uito walái Maama."

²⁷ Lapataó ti Isa lotahuda maó tomuri-Lio boito, "Uito ibumu." Tonggadio toú boito muri boito lololimo oliilo li Isa u lotibiluloá tobelelio.

²⁸ Otaawa li Isa deú botia mailapato ngoáamilalo, wau alihu wolo u tulatuladu todelomo Kitabi mowali motoduo mai, Tio malo tahuda "Waú mototoángo."

²⁹Teto woluo manggo tuwau polupolu lo angguru molotingo. Yi bunga lopatihu tuwau pilopo lomolio todelomo angguru boito, wau tiluwohio tohisop ngopangge, tulusi piloheduño mola ode biihio li Isa.

³⁰Ti Isa lolamitaó angguru boito tulusi lotahuda, "Mailapato!" Tulusi Tio lotidungu mola wau yilate.

³¹Tahidihima kawasa lo Yahudi diila mohuto milate lotau-tauwalo tahi salipua boito debo hintayanga to ayu salipu todulahu Saabati, tidiyolo maó peéenta botie Sabaati boito Dulahu Buka utolo-tolomodu. Sababu dulahu toú ti Isa silalipulio lotaahua toú diipo dulahu Saabati boito, tau-tauwalo Yahudi lohile luasia olei Pilatus u mota momoli oáato lotau-tauwala tahe silalipulio boito wau mopolaahi mimii-lateyaalo boito monto ayu salipu.

³²Yi mongo pajule boito lonaó mota wau lomoli bohulio oáato lo taduulota tasilalipu peé-peéenta woli Isa.

³³Toú timongolio leidungga odeli Isa, iloontonga limongolio Tio mailate. Oditolio timongolio diila lomata lomoli oáa-Tio.

³⁴ Bo tutuálobu li Isa hebiletuño wolo totobuó lo ngotaalio lomongo pajule boito; wau huáa yilumualai duhu wau taluhu.

³⁵ Taa loóonto lohihilao u lotoduo boito, tio-tiolo talo pohabari suáli boito, alihu timongoli olo palacaya. Wau u silakusialio boito otutu, wau otaawalio deú uito otutu.

³⁶ Suáli boito motoduo mai alihu pohupohutu wolo u tulatuladu todelomo Kitabi, deúito-yito "Diaaluo penu boli tuwau maó tulalio maboliyolo".

³⁷ Todelomo Kitabi olo tulatuladu, "Timongolio mamooonto o-Lio tamaa biletuñi mongolio".

³⁸ Lapataó uito tei Yusu lonto Arimatea lohile maó luasi olei Pilatus u mota lohama milate li Isa. (Tei Yusu yito muri li Isa, bo wolo tutuuó, sababu tio moohe to tahidihima kawasa lo Yahudi.) Tei Pilatus longohi maó luasi olio, oditolio tio mota lohama milate li Isa.

³⁹ Tei Nikodemus, tamuloolo mapeéenta lonaó mai odeli Isa tou hui, lonaó olo peé-peéenta wolei Yusu. Tei Nikodemus lodelo pidelo damahu moonu wau gaharu -- Ngoáamilalo otanu tolo pulu lokilo daatalio.

⁴⁰ Taduulota boito lohama milate li Isa tulusi lolaputaó wolo latu peé-peéenta wolo pidelo moonu boito loduduá uúdu polobungalo taulo Yahudi.

⁴¹ Totambati pilo salipua li Isa woluo ilengi u pilomuloa lo bubuu-ngawaalo tuwau. To ilengi u pilomuloa lo bubuu-ngawaalo boito woluo kuubulu bohu, udiipo peéenta maó pilomake pilolobunga tau.

⁴² Sababu kuubulu boito membidu, wau dulahu Saabati bolo ngopeé mola tumulalio, timongolio malo lobunga li Isa mola teto.

20 ¹ Todulahu ahadi dimodupo, tou donggo modiólomo, ti Maria Mahadalena lonaó ode kuubulu. Tio loóonto maó botu poheútio mahileilio lonto huango kuubulu boito.

² Yi tio tilumeteó malo lolohe olei Simon Petrus wau muri tapilonu li Isa, wau lolóiya maó olimongolio, "Eeya mahilama lotau lonto kuubulu, wau diila otaawa laatia toutoonnu Tio pilopo balatio."

³ Tulusi tei Petrus wau muri wewo boito malonaó ode kuubulu.

⁴ Duduulotalo hiteteá, bo muri wewo boito lebe molinggaheó wolei Petrus, wau tio leidungga mola leimulo tokuubulu.

⁵ Tio lomilohe mola ode delomo kuubulu wau loóonto latu dutudutu teto, bo tio diila tilumuwota mola.

⁶ Tei Simon–Petrus tunu–tunuhe lonto wulea, tulusi lato tilumuwota mola ode delomo kuubulu boito. Tio loóonto maó latu dutudutu teto,

⁷ bo kaingi u pilolihutio to lunggongi Isa diaaluo to tiliilio bo leililibe wiwiwiwi.

⁸ Lapataó muri tamaa leimulo tilunggulaó ode kuubulu, tilumuwota mola olo. Tio loóonto maó wau palacaya.

⁹ (Tunggula tou boito timongolio diipo mongalati wolo u tulatuladu todelomo Kitabi deú Tio musi mobongu mai monto opopate.)

¹⁰ Lapataó uito tahiduduá li Isa boito malo hualingo.

¹¹ Ti Maria Mahadalena tilimihulaó totalu lokuubulu sambela hiyo–hiyongo. Tou donggo hiyo–hiyongo, tio lomilohe mola ode delomo kuubulu,

¹² lapataó maloóonto malaíkati duulota hipakea moputió. Timongolio boito hihuloáa tobakasi lotambati milate li

Isa, ngota towimbihu lunggongo wau tawewolio towimbihu oáato.

¹³ Mamaa-laíkatiyalo boito lohintu maó, "Ibu yilongola hiyo-hiyongo?" Ti Maria lolametaó, "Eeya lowatia mahilamalio, wau diila otaawa lowatia touótonu Tio pilopo balatio."

¹⁴ Lapataó tio loloíya maó odito, tio loili ode wulea wau loóonto li Isa tihutihula teto. Bo diila otaawalio deú taboitolo ti Isa.

¹⁵ Ti Isa lohintu maó olio, "Ibu, yilongola hiyo-hiyongo? Ti Ibu hemo lolohe olita?" Ti Maria hemo lantobu tau boito tamomengia, oditolio tio loloíya maó, "Paaá, wonu ti Paaá talopo limbata o-Lio lonteea, tulungia polelea mai olaatia touótonu pilopo balata li Paaá o-Lio, alihu watia mowali mohama o-Lio."

¹⁶ Ti Isa lotahuda maó olio, "Maria!" Ti Maria loili maó odeli Isa tulusi loloíya todelomo bahasa lo Ibrani, "Rabuni!" (Boliilio maó "Guru".)

¹⁷ "Diila maó dihima Waú," tahuda li Isa olio, "Sababu Waú diipo lobotula mola odeli Paapa. Bo ponaólo mota ode mongo wutatu-Ú, wau polelea maó olimongolio deú botia Waú mamó botula mola odeli

Paapa-Ú wau odeli Paapamu, Allahu Taáala-Ú wau Allahu Taáalamu."

¹⁸Yi ti Maria malonaó lopoótaa to tahiduduá li Isa deú tio maloóonto Eeya wau deú Eeya malo tahuda mai ngoáamilalo boito olio.

¹⁹Todulahu ahadi boitolo, toú maahui, tahiduduá li Isa lotiámbu maó tobele ngowale wolo huhuu-hebuwaalo hiúntia, sababu timongolio moohe to tahidihima kawasa lo Yahudi. Debolo ti Isa lonaó mai wau tilimihulaó tohuungi mongolio wau lotahuda, "Salamu moáahu olemu."

²⁰Lapataó lotahuda odito, ti Isa lopo biloheó olimongolio uluú wau tutuálobe-Lio. Toú loóonto maó to Eeya, timongolio lengahee daá.

²¹Lapataó ti Isa peéentapo lotahuda maó olimongolio, "Salamu moáahu olemu. Debo odelo ti Paapa-Ú lolao mai ola-Ú, odito olo Waú mamolao olimongoli."

²²Lapataó ti Isa lopo hiipaó napasi-Lio ode limongolio wau lotahuda maó, "Tolimowalo Rohullah.

²³Wonu timongoli mongambungu dusa lo tahingota-ngotaawa, Allahu Taáala olo mongambungu mai olio. Wonu timongoli diila mongambungu dusa lo

tahingota-ngotaawa, Allahu Taáala olo diila mongambungu olio."

²⁴ Tei Tomas (taílunte "Pingi") ngotaalio lo tamo pulaa duulota muri li Isa, diaaluo peé-peéenta wolo tawewo tou ti Isa leidungga mai.

²⁵ Yi tahiduduá li Isa wewolio lolóiya maó odelei Tomas, "Ami maloóonto Eeya!" Bo tei Tomas lolametaó, "Wonu watia diipo loóonto bakasi lopaku to uluú-Lio, diipo lopodutu tingoongoa lo uluú laatia to babaa kasiyalo pali lopaku boito wau diipo lopodutu uluú laatia to tutuálobe-Lio sama-samaata watia diila mohuto palacaya."

²⁶ Ngodiminggu lapatio maó tahiduduá li Isa woluo poli totambati boito, wau tei Tomasi woluo olo. Huhebu ngoáamila hiúntia. Boti Isa malonaó mai wau tilimihulaó tohuungi mongolio, lapataó lotahuda, "Salamu moáahu olemu."

²⁷ Lapataó ti Isa lotahuda odelei Tomas, "Bilohilo mai uluúu-Ú, wau podutua mai tingoongoa lo uluúmu tea. Wudua mai uluúmu wau podutua to tutuálobe-Ú. Diila maó polingu poli, bo pomalacayalo!"

²⁸ Tei Tomas malo loíiya odeli Isa, "Eeyaú wau Allahu Taáalaú!"

²⁹ Yi ti Isa lotahuda maó olio, "Yió palacaya sababu maloóonto ola-Ú, diila odito? Potisanangilo tutu taa palacaya eleponu diila moóonto ola-Ú!"

³⁰ Debo donggo dadaata poli totoonulalo moólinggolabe wewo u hepilohutu li Isa totalu lo tahiduduá o-Lio, bo diila tiluladio todelomo buku botie.

³¹ Bo ngoáamilalo botie tiluladio mai, alihu timongoli palacaya deú ti Isa yito Olongia Tamoo-poáhua, Walaó Allahu Taáala, wau sababu palacaya to o-Lio, timongoli mamooótapu tutumulo.

21 ¹ Lapataó uito ti Isa lopobilohe batanga peéntapo to Bulalo Tiberias to tahiduduá o-Lio. Odie mola waliilio:

² Toú dulahee tuwau tei Simon Petrus, tei Tomas táilunte Pingi, tei Natanael lonto Kana to Galilea, mongo walaée Jebedeus wau duulota muri li Isa tawewolio, donggo hiámbua.

³ Ualei Simon Petrus ode tawewo, "Watia motohilaa mota moheúpa tola." "Ami moduduó," loíya maó limongolio olio. Yi malonaó timongolio lotitaé tobulotu. Bo ilo-ilonua loú hui boito timongolio diila loó waúpa wolo-wolo.

⁴Toú dulahu malobutu mai, ti Isa tilimihulaó to pentadu, bo diila ilotaawa limongolio deú taboitolo ti Isa.

⁵Ti Isa lotahuda maó olimongolio, "Mongo walaó, wolo timongoli otola?" "Diaaluo," tametaó limongolio.

⁶Ti Isa lotahuda maó olimongolio, "Pomahulalo mota pajalamu ode ambahu olowala lobulotu, alihu timongoli moótapu mai tola." Tulusi pajala boito pilomahulio mota limongolio, bo timongolio diilalo mambo lomantangai pajala boito sababu malo odito daatalio lotola todelomio.

⁷Muri tapilonu li Isa lolóiya maó odelei Petrus, "Uito Eeya!" Toú tei Simon Petrus loódungohe deú uito Eeya, tio malo pomake mola boólio (sababu tio diila boóboó) tulusi lotidehulo mola ode delomo taluhu.

⁸Tahiduduá wewo lolunuheó ode tudulio wolo bulotu, sambela hipo mantanga pajala u polupolu wolo tola. Timongolio diila boti molamingo monto tudulio, tanu bo ngohetuto meeteri lamingio.

⁹Toú timongolio lolaatheó lonto bulotu, iloontonga limongolio woluo bohu lotulu mola teto wolo tola toitaatio wau roti.

¹⁰ Ti Isa lotahuda maó olimongolio, "Nte deloa mai odia tola ngoolo botu u heli yilaúpai limongoli."

¹¹ Tei Simon Petrus malotitaé mola tobulotu, tulusi lodedeáa pajala ode tudulio. Pajala boito polupolu wolo tola u duduulaá; ngoáamilalo woluo ngohetuto limo lopulaa tolo botu. Wau eleponu odito daatalio, pajala boito diila lokaidingo.

¹² Ti Isa lotahuda maó olimongolio, "Dulo molamelo." Diaaluo penu boli ngotaa maó lo tahiduduá o-Lio buheli lohintu, "Ti Paaá tatoonu?" Sababu otaawa limongolio deú Tio Eeya.

¹³ Lapataó ti Isa lohimbideó olimongolio, wau lohama roti boito, wau yiludu-Lio olimongolio. Tio malohutu odito olo wolo tola boito.

¹⁴ Uti-utieelo otolulio ti Isa lopo biloheó batanga-Lio ode tahiduduá o-Lio lapataó Tio bilongu-Lio mai tou yilate maó.

¹⁵ Lapatio maó lolamelo, ti Isa lotahuda odelei Simon Petrus, "Simon, walaée Yona, wolo yió lebe motoliánga ola-Ú wolo toliáangi mongolio ola-Ú?" "Otutu, Eeya," tametaó lei Petrus, "Otaawa lo Eeya watotia motoliángo to Eeya." Ti Isa lotahuda olio, "Biyacheelo mongo walaó himba-Ú."

¹⁶ U oluolio ti Isa lohintu olio, "Simon walaée Yona, wolo yió motoliángo ola-Ú?" "Otutu, Eeya," tametaó lei Petrus, "Otaawa lo Eeya watotia motoliángo to Eeya." Ti Isa luli lotahuda olio, "Biyaheelo ngoáamila himba-Ú."

¹⁷ U otolulio ti Isa luli lotahuda maó olio, "Simon walaée Yona, wolo yió motoliángo ola-Ú?" Tei Petrus masiluukali sababu ti Isa malohintu olio tunggula poóotolu. Yi tei Petrus luli lolametaó, "Eeya, otaawa lo Eeya totoonulalo u hitua-tuawua. Otaawa lo Eeya watotia motoliángo to Eeya!" Tulusi ti Isa lotahuda olio, "Biyaheelo ngoáamila himba-Ú."

¹⁸ Otutu banali tahudaa-Ú botie: Toú yió donggo muda mai, yió lohihilao lomintolo wohutamu, wau lolontale penu boli ode utoonu u otohilaamu. Bo wonu yió de mapanggola mola, yió mamohudu maó uluúmu, wau taawewo tamo ngawade olemu wau modelo olemu ode utoonu udiila otohila naóomu."

¹⁹ (Wolo tataa-heyalo boito ti Isa mopo bilohe@o woloolo mola tei Petrus dewonu mate maó u mopoúdaá mola Allahu Taáala.) Lapataó uito ti Isa lotahuda maó odelei Petrus, "Duduílo mai Waú!"

²⁰ Toú tei Petrus loili mota, tio loóonto to wuleaallo muri tapilonu li Isa. (Tio-tiolo talo tihuloáa totili li Isa toú donggo hemo lamelo wau talohintu o-Lio, "Eeya tatoonu tamaa mohiyanati to Eeya?")

²¹ Loóonto olio, tei Petrus malohintu li Isa, "Eeya, woloolo mola wolio botie?"

²² Ti Isa lolametaó, "Wonu humayaallo Waú mohuto u tio debo tumutumulo tunggula odungga-Ú mai, uito diila uluusanimu. Bo yió poduduólo mai ola-Ú!"

²³ Yi lolooladulo mola habari tohuungo lo tahiduduá li Isa deú muri boito diila tamaate. Lebe-lebe pomaó ti Isa diila lotahuda deú muri boito diila taamate, bo: "Humayaallo Waú mohuto u tio debo tumutumulo tunggula odungga-Ú mai, uito diila uluusanimu."

²⁴ Muri boi-boitolo talongohi sakusi pasali popoo- loútiyaalo botie. Tio-tiolo olo tamaa loluladeó. Wau otaawanto deú wolo uiloíyaallo boito otutu.

²⁵ Donggo dadaata suáli wewo u hepilohutu li Isa. Humayaallo ngoáamilalo boito tuladulo tuwau-tuwau, pongolaasa laatia diila moótuheto tambati to ngoilanggubu dunia u modetoheó ngoáamila buku umaa tuladulo boito.

Kisah Para Rasul

1 ¹ Teopilus taa u owatade, Todelomo bohulo bukuú ubohulio matilombangaú mai ngoáamilalo u pilohutu wau pilo ngaajali li Isa anggadu Tio lolumulaó kalajaa-Lio,

² tunggula todulahu Tio bilintaáa mola ode sologa. Toú Tio diipo lobotula mola ode sologa, wolo kawasa lo Rohullah Tio helongohi totoonulalo tomongo rasuluu-Lio tatilulao-Tio.

³ Lapataó Tio yilate maó ngotilonggadu wopato pulu hui mola laito Tio hemo pobilohe wolo dudelo u móilaalo daá tomongo rasulu boito deú Tio tutuulio tutu tumutumulo. Timongolio loóonto o-Lio, wau Tio helo bisala woli mongolio tomimbihu woloolo mola Allahu Taáala momalenta odelo Olongia.

⁴ Wau toú Tio lotiámbu woli mongolio, Tio longohi maó palenta botie olimongolio, "Diila maó tolai Yerusalemu. Pohimaapo teto tunggula ti Paapa-Ú mongohi mai wolo umapilo dantia-Lio, deúito-yito

umapilo otaa–Ú olimongoli toú muloololio mai.

⁵ Sababu tei Yahya helo polihu lotaluhu, bo donggo ngoolo huipo mola timongoli malihualo wolo Rohullah."

⁶ Toú mongo rasulu boito donggo hiámbua peé–peéenta woli Isa, timongolio lohintu maó o–Lio, "Eeya, tingga mabotia Eeya ohilaa muli mopotihula pamalenta bangusa lo Isiraílu?"

⁷ Ti Isa lolametaó, "Ti Paapa–Ú lohihilao tamolantu mai dulahu wau wakutuulio. Uito diila palalu otaawa limongoli sababu uito haku li Paapa–Ú.

⁸ Bo timongoli mamooótapu kawasa, wonu Rohullah malei dungga mai ode limongoli. Wau timongoli mamowali sakusi ola–Ú to Yerusalemu, to ngoilanggubu Yudea, to Samaria, wau tunggula ode huudio lodunia."

⁹ Lapataó ti Isa lotahuda maó odito Tio bilinta–lo mola ode sologa iloontonga limongolio, wau heengo lohenggubei o–Lio to pomilohi mongolio.

¹⁰ Toú timongolio donggo hilanggela mola ode hulungo, towakutu ti Isa leibintaáa mola, debolo duulota tahapakea loú moputió hitihula totili limongolio.

¹¹ "Wuu, tau-tauwalo Galilea," loíya maó lo taduulota boito, "yilongola timongoli bo wambaó hitihula teto hilanggela mola ode hulungo? Ti Isa, taa iloontonga limongoli lobintaáa mola ode sologa boito totalu limongoli, mamuli mohualingai poli wolo dudelo uito olo debo odelo u iloontonga limongoli engontie."

¹² Lapataó mongo rasulu boito luli lohualingo ode Yerusalemu lonto Huludu Jaitun. Huludu boito maito tanu ngokilo lamingio lonto Yerusalemu.

¹³ To Yerusalemu timongolio lonaó mota ode bele upilo tihangata limongolio, tulusi lobotula mola ode huwali u toitaato. Mongo rasulu boito, deúito-yito tei Petrus wolei Yahya, tei Yakobus wau Andreas, tei Pilipus wau Tomas, tei Baratolomeus wau Matiusi, tei Yakobus walaée Alpeus, tei Simon Patriot wau Yudas walaée Yakobus;

¹⁴ Ngoáamilalo laito wolo tuwau lohilao helo tiámbu wau hipoduáawa. Timongolio loduá peé-peéenta wolo mongobua teto tuwotuwoto ti Maria tiilo li Isa, wau wolo mongo wutati Isa.

¹⁵ Todulahu tuwau, toú timongolio donggo hiámbua -- maito tanu ngohetuto

dulo pululota tahi hadilia -- tei Petrus tilimihulo u lobisala maó. Tio loloíya,

¹⁶"Mongo wutato! Wolo u tulatulade todelomo Kitabi, uito mamusi motoduo. Muloololio mai loli olei Dauda, Rohullah malo nubuwati mai pasali lei Yudas, taúwa lotau-tauwalo talo heúpa li Isa boito.

¹⁷Tei Yudas yito tala ngota lonto olanto, wau tio maa tilulaota olo u loduduá lokalaja peé-peéenta wolanto."

¹⁸(Tei Yudas botie maloótapu huta polobungalo olio lonto wuupa ololeeto lopolo hiyanatilio. Tio lodehu wau yilate wolo ombongio lobutaó tunggula tuango ombongio yilumualai ngoáamilalo.

¹⁹Ngoáamila tahi biluloáwa to Yerusalemu motota pasali losuáli boito. Uito sababuulio todelomo bahasa limongolio, ilunte limongolio huta boito Akeldama, uboliilio maó 'Huta Duhu'.)

²⁰"Sababu todelomo Buku Jaburu woluo tulatuladu odie, 'Huliaalo maó biluloálio mamowali diila otau; diila mowali boli ngotaa maó motibiluloá todelomio.' Woluo tulatuladu odie olo, 'Huliaalo maó huhuloálio hamaa lotaawewo.'

²¹Sababu uito, musi woluo tahingota-ngotaawa tamoduduá wolanto mowali

sakusi deú ti Isa Eeya maluli tilumumulai lonto opopate. Tau boito mamusi tala ngota lotau-tauwalo talaito peé-peéenta wolanto toú ito heloduduó li Isa Eeya boli ode utoonulalo maó, tumulalo mai tei Yahya lolumula lopolihi tunggula toú ti Isa bilintaá mola ode sologa to wolotanto."

²² (1:21)

²³ Tau-tauwalo tawoluo teto longohi maó nasehati duulota, deúito-yito tei Yusu tailunte olo Barsabas (tio iluntelio olo Yustus), wau tei Matias.

²⁴ Tulusi timongolio loduá. Timongolio lolóiya, "Yaa Eeya otaawa lo Eeya hilaa lotaa ngoáamila. Tei Yudas malodehu lonto huhuloálio odelo rasulu wau mailate. Oditolio póilaalo mai ode mongowatotia, tatoonu to taduulota botie tatulaoto lo Eeya u wohiyalo tuugasi boito mobuulota wolei Yudas."

²⁵ (1:24)

²⁶ Lapataó uito tanggulo taduulota boito pilahutio maó, tulusi popahuto boito lodehu tolei Matias. Oditolio tio piluduó lowali rasulu loduduá peé-peéenta wolo tamopulaa tuwau lota rasulu wewolio.

2 ¹ Toú malei dungga dulahu Pantekosta, ngoáamila taa palacaya lotiámbu totambati tuwau.

² Debolo dungo–dungohei tingohe lonto hulungo debo odelo dupoto daá hihiipo. Tobele toútoonuu tau–tauwala boito donggo hihuloáa, ngoáamilalo lopolu lomola lotingohe boito.

³ Tulusi timongolio loóonto didii–lawaalo debo odelo deíto tulu lotiálapo ode utoonulalo maó wau leáito toli mongolio ngota–ngota.

⁴ Timongolio ngoáamila kiluwaasa lo Rohullah, wau malo lumula lobisala todelomo bahasa wewo u hidala–dalaala. Timongolio helo bisala loduduá wolo uilohi lo Rohullah boito u lapalia maó limongolio.

⁵ Toú boito ngohuntua taulo Yahudi lonto lipu hidala–dalaala to ngoilanggubu dunia hibiluloáwa to Yerusalemu. Timongolio boito tau–tauwalo tahi podungohe to Allahu Taáala.

⁶ Toú loódungohe tingohe boito ngohuntua daá tau lonaó mai lotiámbu. Timongolio ngoáamila iloohea loódungohe totau–tauwalo tapalacaya boito hipo

bisalawa todelomo bahasa limongolio lohihilao.

⁷Wolo hilinggolabe wau leitontongo timongolio malo loíya, "Tau-tauwalo tahi pobisalawa botie ngoáamilalo tau-tauwalo Galilea, diila odito?"

⁸Woloolo mola ilowaliilio tilinggula ito modungohe olimongolio hemobisala todelomo bahasa lolipunto ngota-ngota?

⁹Ito tau-tauwalo talonto Partia, Media, Elam; lonto Mesopotamia, Yudea wau Kapodokia; lonto Pontus wau Asia,

¹⁰lonto Prigia wau Pampilia, lonto Masiri wau mamaa-dalawaalo Libia totili lo Kirene; woluo talonto olanto lonaó mai lonto Roma,

¹¹woluo tau-tauwalo Yahudi wau woluo olo tau-tauwalo bangusa wewo tamaa tilumuwoto agama lo Yahudi; woluo olo talonaó mai lonto Kreta wau Arabi. Ito ngoáamila loódungohe olimongolio hemo bisala lo bahasanto ngota-ngota tomimbihu susuu-aliyaalo moólinggolabe upilohutu mai lo Allahu Taáala!"

¹²Wolo hilinggolabe wau leitontongo timongolio ngoáamila mahipo hintua ngota timongota, "Wolo boliilio lewe botie?"

¹³ Bo woluo olo tau-tauwalo tahi poluúde. Timongolio malo loíya, "Aa, tau-tauwala boito bo hihuwoá wambaío!"

¹⁴ Lapataó tei Petrus tilimihula mola wolo tamopulaa tuwau lota rasulu uwewo, tulusi lobisala ode taa dadaata boito. Wolo suala daá tio lolóiya, "Mongo wutato, tau-tauwalo Yahudi wau ngoáamila tahi biluloáwa to Yerusalemu! Poódungohe mopio-piohulo maó, sababu suáli botie palalu tombanga mai lowatia olimongoli.

¹⁵ Tau-tauwala botie diila hihuwoá, debo odelo helantobu limongoli; sababu botia boheli jamu sambila dumodupo.

¹⁶ Bo utie mapiloótaa mai lo Allahu Taáala lotimbulude toli Nabi Yoel;

¹⁷ Allahu Taáala lotahuda mai, 'Topulito lojamani Waú mamó luwatai Rohu-Ú ode ngoáamila tau. Mongo walaúmu talolái wau mongo walaúmu taabua mamopoótaa olemu susuu-aliyaalo u piloótaa-Ú olimongolio. Tahi-muudawa limongoli mamóóonto susuu-aliyaalo upilopo bilohu-Ú olimongolio. Mongo dulaámu mamóó tohiilopo tomimbihu tohiilopo uilohi-Ú olimongolio.

¹⁸ Tomongo wato-Ú olo -- mopio mongo lolái meaalo mongobua --, maa

bangguwato-Ú mai Rohu-Ú to duduu-laheyaalo boito. Timongolio mamopoótaa susuu-aliyaalo u piloótaa-Ú olimongolio.

¹⁹Wau mamopo woluo momoóo-linggolabeyalo toitaato mola tohulungo, wau susuu-aliyaalo upolu-polutuó to walungo lewe todunia; mawoluo mai duhu wau tulu, wumbuó wau poloó.

²⁰Mato lodulahu mamowali modiólomo, hulalo mamowali meela debo odelo duhu toú dipolulio mai Dulahu Eeya, Dulahee u udaá wau molamahu boito meidungga mai.

²¹Towakutu boito, taa u mongiibodu to Eeya mapoáahuwolo.'

²²Mongo wutato tau-tauwalo Isiraílu! Dungohilo wolo uiloíya mai lowatia botie: ti Isa taulo Najaret boito mailohia tuugasi lo Allahu Taáala ode wutato. Uito loílaalo daá toú tilolahepalo u moólinggolabu wau susuu-aliyaalo upolu-polutuó upilohutu mai lo Allahu Taáala tohuungi mongoli lotimbulude toli Isa boito. U ngoáamilalo boito mailotaawa lowutato lohihilao.

²³Lotuuúde wolo lanjana-Lio lohihilao, Allahu Taáala malolantu u mohudu li Isa ode limongoli. Wau toú Tio yiludu mai, timongoli lomate o-Lio yila-yilateelo maó,

wolo lopoluli totau-tauwalo tahileeta boito lopo salipu o-Lio.

²⁴ Bo Allahu Taáala luli lopotumulai o-Lio lonto wolota lotau-tauwalo tahe lopowate. Tio tiloloolo lo malikili mautu, bo Allahu Taáala lolopata o-Lio, sababu diila pongalo aakali Tio kawasaalio tulusi lo opopate.

²⁵ Pasali li Isa botie tei Dauda mapeéenta lolóiya, 'Waú laito hemoóonto Eeya totaluú; Tio hemodaha ola-Ú, alihu waú diila moétu penu boli loolo.

²⁶ Uito sababuulio hilaaú motiwengahe, tunggiluú molapali puji poloílaalo momuji: wau batangaú botie mamohima wolo amani todelomo kuubulu.

²⁷ Sababu Eeya diila mopoluli himuúduú meitolaa todelomo dunia lotaa lopowate. Eeya diila mopoluli wato lo Eeya taa tatapu wau molotolo hilao boito motoyopu wau mopulito.

²⁸ Eeya malo pobilohei olaú dalalo udulu-dulunga ode tutumulo utuutu. Owengahuú lepa-lepato sababu Eeya woluo peé-peéenta wolaú.'

²⁹ Mongo wutato, poluasia mai watia mobisala loú juujulu pasali lei Dauda, tiyamo loluuhurunto boito. Tio mailate

wau mailobungio; kuubululio donggo to huungonto tunggula botia.

³⁰ Allahu Taáala malodanti odelei Dauda, wolo tadia, deú tala ngota lowaliilio mola mapuduó lo Allahu Taáala mowali olongia. Sababu maótaawa lei Dauda danti boito wau sababu tio nabi ngota olo,

³¹ yi otaawalio olo wolo u mapohutuo mai lo Allahu Taáala. Oditolio tio malo nubuwati deú Olongia Tamoo-poáahua tapilo danti mai lo Allahu Taáala boito, mamuli tumumulai monto opopate.

Tei Dauda lolóiya, 'Tio diila piloluliilio leitolaa todelomo dunia lotahe lopowate; batangalio diila mowali moántulu wau mopulito.'

³² Ti Isa botieelo taluli pilo tumulai lonto opopate lo Allahu Taáala. Ami ngoáamila malo sakusi lohihilao suáli boito.

³³ Tio piludu-lo ode huhuloáa ulailaió wau yiludua kawasa lo Allahu Taáala, lapataó lololimo Rohullah uma pilodanti li Paapa. Wau u masaatia botie u ilodungohe wau iloontonga limongoli deúito-yito Rohu boito u bilanguwa-Tio mai ode olami.

³⁴ Tei Dauda lohihilao diila lobotula mola ode sologa, bo tei Dauda loloiya, 'Eeya lotahuda ode Eeyau':

³⁵ Potihuloólo towimbihu olowala-U, tunggula Waú mohutu mai ngoáamila musu-Mu taaluku to ole-Mu!"

³⁶ Uito sababuulio ngoáamila taulo Isiraïlu musi motota otu-otutuulo maó deú ti Isa tasilalipu limongoli boito, ti Isa boitolo olo tamaa pilowali lo Allahu Taáala lowali Eeya wau Olongia Tamoo-poáahua!"

³⁷ Touú tau-tauwala boito loódungohe suáli boito, hilaa limongolio lobalisa daá. Tulusi timongolio malohintu odelei Petrus wau mongo rasulu wewolio, "Mongo wutato, wolo umusi pohutuo lamiaatia?"

³⁸ Tei Petrus lolametaó, "Polilihulo monto duduu-sawaalo limongoli. Wau mawajibulio timongoli ngota-ngota lihuwalo to tangguli Isa Almasi, alihu ngoáamila dusa limongoli maa ambunguolo. Yi Mongo wutato mamololimo palaseni Rohullah monto Allahu Taáala.

³⁹ Sababu upilo dantia lo Allahu Taáala boito yito ode olemu wau walimu mola wau ode tau-tauwalo tawoluo to tataa-mbatiyalo u molamingo -- deúyito-yito

ngoáamila taa u tiliyango Allahu Taáala Eeyanto u monaó mai ode o-Lio."

⁴⁰ Odieelo mola tei Petrus helo tombangaó olimongolio. Wau wolo dadaata loíya uwewo olo hepilo nasehatilio maó olimongolio alihu timongolio mopolahi batanga monto bangusa u moleeta botie tamaa hukuumanio lo Allahu Taáala.

⁴¹ Ngohuntua tamaa pilalacaya toú yiloíya lei Petrus, lapataó timongolio yilihualio. Yi jumulaa taa palacaya todulahee boito donggo iloduhenga mola tololihi lota.

⁴² Wolo moóolohu timongolio hipo balajalia tulusi lonto mongo rasulu wau laito hemo tiámbu peé-peéenta. Timongolio hemo lamelo peé-peéenta wau hipoduáwa peé-peéenta.

⁴³ Ngohuntua daá moólinggolabe u hepilohutu lomongo rasulu boito tilinggula ngoáamila tau lolinggolabu wau yiloohe.

⁴⁴ Tau-tauwalo tapalacaya boito ngoáamilalo tulusi hemo tituwau wau wolo ulowali miliki limongolio, hepilomake limongolio peé-peéenta.

⁴⁵ Timongolio helo potali babaa-langiyalo wau halata miliki limongolio,

tulusi helo laya–layadeó doilio towolota limongolio ngoáamilalo loduduá u palaluo lo tahingota–ngotaawa.

⁴⁶ Timiïdu dulahu timongolio tulusi hemo tiámbu to Bele lo Eeya; wau hemo lamelo peé–peénta, wolo hiwengahe wau hidupapawa lohilao to bebee–leyaalo limongolio.

⁴⁷ Timongolio tulusi hipomuji–mujia Allahu Taála wau aahudu lotaa ngoáamila. Timiïdu dulahu jumulaa limongolio tulusi he oduhenga mola sababu Eeya lohudu ode limongolio tau–tauwalo tadonggo hepo aahuwolo.

3 ¹ Todulahee tuwau tei Petrus wolei Yahya lonaó mola ode Bele lo Eeya jamu tiga lolaango, deúito–yito towakutu u moduá.

² Mola teto tohuhebu hulubangi u ilunte "Huhebu Gaagadaá", woluo talolaí ngota tadidu mowali monaó anggadu pilotutulio mai. Timiïdu dulahu tau boito hedeloolio mola odito u mohile–hile totahi tuwota maó ode Bele lo Eeya.

³ Touú tau boito loóonto olei Petrus wolei Yahya donggo tuwo–tuwotai ode Bele lo Eeya, tio lohile maó olimongolio u mongohi mai hitua–tuawua olio.

⁴ Yi mapiloóo tontongi mongolio tio, lapataó tei Petrus lolóiya maó, "Bilohi mai ami!"

⁵ Tulus tau boito malo poóotuoto olimongolio wolo halaapani mamooótapu u hitua–tuawua monto olimongolio.

⁶ Bo tei Petrus lolóiya maó olio, "Wau diila odoi sama–samaata. Bo wolo uwoluo to olaú, uito mawohiú mai olemu: wolo kawasa li Isa Almasi taulo Najaret boito, ponaóolo!"

⁷ Lapataó tei Petrus malodihu uluú olowala lo tadidu mowali monaó boito wau lotulungi olio tilimihula mola. Tulusi oáato tau boito wau páilio lowali lolotolai.

⁸ Lapataó tio tilumayanga mola tilimihulo, wau malowali lonaó odito mota odia mai. Lapataó tio tilumuwoto ode Bele lo Eeya peé–peéenta wolei Petrus wau lei Yahya, sambela naónaó wau lantiáaó–lantiáaó hemomuji mola Allahu Taáala.

⁹ Ngoáamila tau loóonto olio naónaó wau hemomuji–muji mola Allahu Taáala.

¹⁰ Tulusi timongolio malongalati deú tio–tiolo tamoohilea u biasaalio hulohuloáa to "Huhebu Gaagadaá" to Bele lo Eeya. Timongolio lolinggolabe

daá wau leitontongo loóonto maó wolo u malotoduo mai to olio boito.

¹¹ Tau boito bolo wambaó hemoduduá olei Petrus wolei Yahya. Wau tou timongolio toulota leidungga mota ode sulambe u ilunte "Sulambe Salomo", ngoáamila tau lonaó mai lotiámbu toli mongolio sababu lolinggolabu.

¹² Tou tei Petrus loóonto maó tau-tauwala boito, malo loíya tio olimongolio, "Wuu tau-tauwalo Isiraílu, yilongola Mongo wutato lolinggolabu to ulotoduo mai botie? Yilongola timongoli hemo lontongo tulusi olami? Wolo to lantobu limongoli tau botie malowali lonaó sababu woluo kawasa to olami meaalo sababu ami lodungohe to Allahu Taáala?

¹³ Allahu Taáala tahe tuboo lei Abraham, lei Isihaka, lei Yako, Allahu Taáala linenemoyanto, Allahu Taáala boito tamaa lopolaió Wato-Lio, deúito-yito ti Isa. Ti Isa boitolo tailudu limongoli ode tahidihima kawasa, wau hetiluwali limongoli totalu lei Pilatus, tou tei Pilatus ohilaa molopata o-Lio.

¹⁴ Tio mantali boli mopiohu bo timongoli lotehengi o-Lio wau helo huntulo alihu tei Pilatus molopataó ngotaalio lo

tamoomatea mate-mateelo maó ode limongoli.

¹⁵ Mongo wutato lomate o-Lio yila-yilateelo maó, lebe-lebe pomaó tumbaó Tiolo bungo lo tutumulo duólo taa ngoáamila. Wau Allahu Taáala maluli lopo tumulai o-Lio lonto opopate. Masilakusia lami lohihilao suáli boito.

¹⁶ Mongo wutato maloóonto wau losakusi wolo u malotoduo mai totaa didu mowali monaó botie. Tio malowali lolotolai wau luli silehati mai sababu tio palacaya li Isa wau kawasaa-Lio. Sababu palacaya li Isa yi tau botie maluli silehati totalu lomongo wutato ngoáamila.

¹⁷ Mongo wutato! Botia mailotaawa lowatia deú wolo u hepilohutu limongoli wau mongo taúwa limongoli odeli Isa, uito pilohutu limongoli sababu diila otaawa limongoli wolo udonggo hepohutuo limongoli.

¹⁸ Wau sababu uitolo lotoduo mai olo wolo u mapiloótaa lo Allahu Taáala toú muloololio mai daá lotimbulude tomongo nabi-Lio ngoáamila, deú Olongia Tamoo-poáhua upilo dantia boito musi modutolo.

¹⁹ Masababu uito Mongo wutato, polilihulo monto duduu-sawaalo limongoli, wau pohualingolo ode Allahu Taáala, alihu Tio moluluto duduu-sawaalo limongoli.

²⁰ Eeya mamei dungga mai ode limongoli wau timongoli mamooáasa rohu useehati. Wau Eeya mamopoáhu li Isa monaó mai ode limongoli, sababu Tio matilantu mai lo Allahu Taáala mowali Olongia Tamoo-poaahua olimongoli.

²¹ Tio musi motibiluloá tosologa tunggula Allahu Taáala mopowali mai ngoáamilalo bohu debo odelo upilo tahuda lo Allahu Taáala lotimbulude tomongo nabi-Lio tou muloololio mai.

²² Tei Musa peéenta loloíya, 'Allahu Taáala Eeyamu mamolao ode olemu nabi ngota monto bangusamu lohihilao, debo odelo Tio lolao mai olaú. Timongoli musi modungohe ngoáamila uiloíya lonabi boito olemu.

²³ Taa diila mopoótuoto wolo uiloíya lonabi boito, tau boito mainggilolo monto umati lo Allahu Taáala wau pobinasaalio.'

²⁴ Mongo nabi tapeéenta lopo tunggulai habari lonto Allahu Taáala, tumulalo mai lonto li Nabi Semuel wau mongo

nabi wewolio talei dungga mai leewoli, ngoáamilalo helo pohabari pasali lojamani botie.

²⁵ Dadaa–ntiyaalo lo Allahu Taáala upilopo tunggulai lomongo nabi yito ode mongo wutato. Todelomo daantia u pilohutu lo Allahu Taáala woli nenemoyamu, Allahu Taáala lotahuda odelei Abraham odie, 'Monto walimu mola Waú mamo balakati mai totoonulalo bangusa todunia.' Daantia boito yito olo ode limongoli.

²⁶ Uito sababuulio Allahu Taáala lolulaoto Wato–Lio, lapataó lopoáhu mai o–Lio leimulo ode limongoli, alihu Tio mobalakati olimongoli. Dudelo–Lio u Tio mobalakati yito wolo mohutu to Mongo wutato ngoáamila molilihu monto pohuli lo tutumulumu u moleeto."

4 ¹ Toú tei Petrus wolei Yahya donggo bibiisalawa wolo tau–tauwalo boito, mongo iimamu taúwa wau kamudangi tamoodahawa Bele lo Eeya wau tau–tauwalo Saduki lonaó mai odelei Petrus wolei Yahya.

² Timongolio loingo sababu tei Petrus wolei Yahya lolóiya totau–tauwalo deú ti Isa maluli tilumumulai lonto opopate.

Wau uito mopo bukuti mai deú taamate mamuli tumumulai.

³ Yi timongolio malo heúpa rasulu duulota boito tulusi lopotuwoto ode delomo tutupa. Wau sababu maahui mai, yi tei Petrus wolei Yahya matilaa–hangialio teto tunggula lombulio mola.

⁴ Bo tau–tauwalo tamaloó dungohe pongaajali lomongo rasulu boito, dadaata tapalacaya. Yi jumulaa limongolio heilo duhenga mola tunggula malowali tanu limo lolihu lota.

⁵ Lombulio mola tahimuloa lo Mahakama Agama, mongo taúwa lo Yahudi wau guguu–ruwaalo agama malo tiámbu to Yerusalemu.

⁶ Timongolio lodunggaya woli iimamu Daá Hanas, wolei Kayapas, Yahya, Aleksander, wau ngoámila tatuwo–tuwoto ilaato li iimamu daá boito.

⁷ Tei Petrus wolei Yahya dilelolio ode talu limongolio, tulusi timongolio lohintu maó, "Woloolo mola pohuliilio timongoli lopoóluli totaa didu mowali monaó boito? Lo olootolo wolo boli wolo kawasa lonto olita pilohutu limongoli uito?"

⁸ Tei Petrus, takiluwasá lo Rohullah boito, lolametaó, "Mongo tuani taúwa lobangusa wau Mongo tuani pongawaá lo Mahakama!

⁹ Amiaatia butoólio todulahu botie sababu lohutu mopiohu u lotulungi ngotaalio tadidu mowali monaó, wau sababu mongo tuani ohilaa motota woloolo mola tau boito piloóluli.

¹⁰ Naa, mongo tuani ngoáamilalo musi motota wau ngoáamila bangusa lo Isiraïlu olo musi motota maó deú tau botie tilimihulo masaatia botie wolo batanga u sileehati totalu lomongo tuani, uito sababu lotolo wau kawasa li Isa Almasi taulo Najaret boito. Mongo tuani malo posalipu li Isa boito, bo Allahu Taáala maluli lopotumulai o-Lio.

¹¹ Ti Isa botieelo u milakusudu lo ayati botie todelomo Kitabi, 'Botu udiila ilopomakea limongoli mongo pani lohudungu, malo ilaalo lowali botu ulaba-labaalo mopihu.'

¹² Bo motimbulude li Isa wambaó tau mowali moáahu. Sababu to ngoilanggubu dunia towolota lomanusia diaaluo penu boli ngotaa maó wewolio taloótapu kawasa lonto Allahu Taáala u mopoáahu mai olanto."

¹³ Popoo-ngawaáalo majalisi lobubutoó boito lolinggolabu loóonto obuheli lei Petrus wolei Yahya, tidiyolo maó otaawa limongolio deú rasulu duulota boito yito tau-tauwalo biasa tadiila he osikolawa. Lapataó timongolio bolo longalati maó deú rasulu duulota boito yito tau-tauwalo talo duduó li Isa.

¹⁴ Bo timongolio diila lowali lolóiya wolo-wolo, sababu tamaa piloó luliilio boito woluo tihutihula teto totalu limongolio peé-peéenta wolei Petrus wau lei Yahya.

¹⁵ Yi timongolio malo poáhu rasulu duulota boito yilumualo lonto tambati lomajalisi boito, lapataó timongolio malo dulohupa.

¹⁶ Timongolio lolóiya, "Mamusi pohutunto woloolo mola totau-tauwalo botie? Ngoáamila tahi biluloáawa to Yerusalemu malotota deú moólinggolabe upolu-polutuó botie, hepilohutu limongolio duulota. Uito diila mowali paahunto.

¹⁷ Bo alihu suáli botie diila maó mololadu lebe motanggalaó poli ode tau-tauwalo, dulo ito monganjamu olimongolio duulota deú timongolio didu mowali boli peéenta

maó mobisala penu boli olita momake tangguli Isa."

¹⁸Yi timongolio malo tiangai rasulu duulota boito luli tilumuwotai, wau lopoótaa maó deú timongolio sama-samaata diilalo mowali molanggula meaanto mongaajali wolo tangguli Isa.

¹⁹Bo tei Petrus wolei Yahya lolametaó, "Pikilangia mola lohihilao wolo u otutu totalu lo Allahu Taáala: moduduá palenta lomongo tuani meaanto moduduá palenta lo Allahu Taáala.

²⁰Sababu amiaatia diila mowali mohuheli mobisala tomimbihu wolo u maíloontonga wau ilodungohe lamiaatia lohihilao."

²¹Popoo-ngawaálo lomajalisi boito diila loótapu alasan penu boli tuwau maó u mohukuumani olei Petrus wolei Yahya. Oditolio timongolio malo nganjamu rasulu duulota boito, lapataó yilopatio duduulotalo, sababu ngoáamila tau hipomuji-mujia Allahu Taáala sababu ulotoduo mai boito.

²²Taa u maloluli wolo moólinggolabe boito malebe loú wopato pulu lotaunu tutumulio.

²³Toú tei Petrus wolei Yahya yilopatio, timongolio luli lohualinga mota ode

mongo sahabati limongolio wau lohungguli maó ngoáamila uiloíya lomongo iimamu taúwa wau mongo taúwa lo Yahudi olimongolio.

²⁴Toú mongo sahabati limongolio boito loódungohe uito, maloduá mola timongolio peé-peéenta wolo ngohilao ode Allahu Taáala. Timongolio loloíya, "Yaa Eeya, Eeyaalo talopowali mai hulungo wau dunia boli dehetu wolo totoonulalo tuangio.

²⁵Wolo Rohu lo Eeya, Eeya peéenta lotahuda mai lotimbulude toli nenemoya lomongo watotia Dauda, deúyito-yito wato lo Eeya; Eeya lotahuda, 'Yilongola tau-tauwala, tadiila moóonuhe to Eeya, moingo; yilongola babaa-ngusawalo hipohutua lanjana udiila ohunalio?

²⁶Mongo olongia lodunia dapadapato u mopaatea, wau mongo taúwa motituwau moluwali to Eeya wau Olongia Tamoo-poáahua.'

²⁷Sababu memangi tei Herodes wau tei Pontius Pilatus malohutu dudunggaya wolo tau-tauwalo tadiila moóonuhe to Eeya wolo tau-tauwalo Isiraílu tokota botie. Timongolio lodunggaya u moluwali li Isa Wato lo Eeya tamantali boito,

tamaa piluduó lo Eeya lowali Olongia Tamoo-poáhua.

²⁸ Timongolio lotituwau u mohutu totoonulalo u hitua-tuawua, u matilantu lo Eeya leimulo deú uito mamotoduo mai. Wau Eeya lolantu mai uito to okokawasa wau ilohilaa lo Eeya lohihilao.

²⁹ Botia, yaa Eeya, bilohilo mai woloolo mola timongolio longanjamu mongowatotia, wau poluasiyalo mai mongo watotia, mongo wato lo Eeya botie, mopololade habari lo Eeya wolo diila wohewohe.

³⁰ Wohiyalo mai polo tulungi lo Eeya alihu taa mongongoto mowali poóluliolo wau ngoáamila u moólinggolabe wau susuu-aliyaalo upolu-polutuó motoduo mai motimbulude to okokawasa wau olootolo monto tangguli Isa, Wato lo Eeya tamantali boito."

³¹ Lapataó timongolio yilapato loduá mola, tambati upilo tiámbua limongolio boito hilumeulo. Timongolio ngoáamilalo kiluwaasa mai lo Rohullah, wau malo bisala wolo buheli daá pasali lohabari lonto Allahu Taáala.

³² Ngoáamila taa palacaya boito hitumula ngohilao wau ngojiwa. Diaaluo penu boli

ngota maó limongolio hemo nganggapu deú wolo u mililikilio yito uolio lohihilao. Totoonulalo u hitua–tuawua uwoluo toli mongolio, pilomake limongolio peé–peéenta.

³³Wolo kawasa u udaá mongo rasulu boito helongohi sakusi deú ti Isa maluli tilumumulai. Yi Allahu Taáala laba–labaalo lomalakati mai olimongolio.

³⁴Wau diaaluo penu boli ngotaa maó towolota limongolio táilo kulangia lolo–lolo. Sababu timongolio taóhuta meaalo bele, helo potali huta meaalo bele limongolio boito; lapataó doilio boito dilelo limongolio,

³⁵wau yilohi limongolio ode mongo rasulu. Lapataó doi boito hetila–tilayadi mongolio ode timíidu taa palalu leeto.

³⁶Odito olo wolei Yusu. Tio olo lopotali huta milikilio, tulusi halagaalio boito dilelolio wau yilohilio ode mongo rasulu. Tei Yusu botie yito ngotaalio wali mai lei Lewi lonto Siprus, mongo rasulu longunte olio olo Barnabas (boliilio Tamoo–liyango).

³⁷(4:36)

5¹ Bo woluo talolaí ngota táilunte Ananias. Tio wolo dilelio táilunte

Sapira, malo potali olo huta ngopita haku limongolio.

² Doi halaga lohutalio boito ngotayadu tilaa-hangialio ode batangalio lohihilao wau uwewolio yiludulio ode mongo rasulu. Pilohutulio uito wolo ilotaawa lodilelio.

³ Yi tei Petrus lolóiya maó olio, "Ananias, yilongola pilolulimu Ibilisi longawasa hilaamu, tunggula yió malo himbulo to Rohullah, wolo poó-poóoyo helo laahangi ode batangamu lohihilao ngobutaío halaga lohuta boito?

⁴ Huta boito uwolemu tou diipo pilotalimu. Wau lapatio maó huta boito pilotali doilio olo donggo uwolemu. Oditolio yilongola omakusudu todelomo hilaamu umohutu debo odelo uito? Diila manusia táilaa-kalimu bo Allahu Taáala!"

⁵ Odito tei Ananias loódungohe loiya boito, tio malei balatolo mola tulusi yilate. Ngoáamila taloo dungohu pasali uilowali boito mailoohe.

⁶ Yi mongo bohulotau mai lolaputaó milate lei Ananias, lapataó lodelo milatelio ode bulemengio mota yilobungi mongolio.

⁷ Tanu tolo jamu lapatio maó dilelio tilumuwotai. Diila otaawalio wolo uheli lowali mola.

⁸ Tei Petrus lolóíya maó olio: Nte polelea mai olaú: Wolo huta u pilotalimu wolo dilemu boito, odelo daata lewe halagaalio?" "Otutu, odito halagaalio," tametaó lodile lei Ananias.

⁹ Tulusi tei Petrus lolóíya maó olio, "Yilongola yió wau dilemu malo woomboa lohimontala Rohu lo Eeya. Dungohilo! Tau-tauwala tamota lolobunga dilemu maluli lohualingai. Timongolio mamodelo olemu olo ode bulemengio."

¹⁰ Tosaátilo boito dile lei Ananias boito malei balatolo mola wau yilate totalu lei Petrus. Wau toú mongo bohulotau boito tilumuwotai, ilodungga limongolio tio mailate. Lapataó timongolio malodelo milatelio ode bulemengio wau yilobungio totili lodilelio.

¹¹ Yi ngoáamila taa palacaya boito wau tau-tauwalo wewolio taloó dungohe pasali uilowali boito, mailoohe.

¹² Sababu bubaya lomongo rasulu yi ngohuntua u moólinggolabe wau susuu-aliyaalo upolu-polutó lotoduo mai towolota lotaa dadaata. Wolo ngohilao ngoáamila taa palacaya lotiámbu to Sulambe Salomo to Bele lo Eeya.

¹³Wau taulo bulemengio diaaluo maó tabuheli mai lotiámbu wolo taa palacaya boito. Bo ngoáamila taa palacaya boito hehulumatio daá lo ulipu.

¹⁴Wau lebe hihiiheo maó lebe he oduhenga mola taa palacaya to Eeya -- mopio mongo lolai mealo mongobua.

¹⁵Tumbaó owowoluwoalio tingga malowali odito, tilinggula tahi ngongota pilopo balatio toitaato tambati potuluhelo meaanto amongo, lapataó dilelolio mota ode dalalo, alihu timongolio penu bo ngoídi otuhata lowolilu lei Petrus, wonu tei Petrus lumaodeó teto.

¹⁶Totoyunuta dadaata daá talonaó mai lonto kokoo-tawaalo topalito Yerusalemu. Timongolio lodelo mai tahi ngongota wau táilo tuanga lo roroo-huwaalo u moleeto. Wau tau-tauwala boito piloólulio ngoáamilalo.

¹⁷Pulitio maó ti iimamu daá wau ngoáamila tahiduduá olio, de@uito-yito palatei tau-tauwalo Saduki, lolumula lohutu hitua-tuawua, sababu timongolio mohiihia.

¹⁸Mongo rasulu boito yilaúpio, tulusi pilotuwotio ode delomo tutupa ulipu.

¹⁹ Bo huilio mola, ngotaalio malaíkati lo Eeya mai lomuó huhuu-hebuwaala lotutupa, tulusi lodelo mongo rasulu boito ode bulemengio. Malaíkati boito loloíya maó ode mongo rasulu boito,

²⁰ "Ponaóolo mota tihulolo to Bele lo Eeya wau polelea maó ode tau-tauwalo pasali lo tutumulo ubohu botie."

²¹ Yi mongo rasulu boito olo malo dunohe tahuli lo malaíkati boito. Didimodupo daá timongolio lonaó mota ode Bele lo Eeya wau malo ngaajali teto. Toú boito, ti iimamu daá wau tahiduduá olio lonaó mai, tulusi lohutu maó sidangi lo mahakama wolo mongo taúwa lo Yahudi, lapataó timongolio lopoáhu tau mola lohama mongo rasulu boito lonto tutupa mai lotaalua woli mongolio.

²² Bo toú tahe ilahulalio boito leidungga mola ode tutupa, diila ilodungga limongolio mongo rasulu boito mola teto. Oditolio timongolio luli lohualingai, tulusi lopoótaa maó suáli boito ode mahakama.

²³ "Toú amiaatia leidungga mola ode tutupa uali mongolio to mahakama, "ilodungga mola lamiaatia huhebu lotutupa boito hiúntia mopiohu, wau tahi pokawalia donggo hidahawa tohuhebu. Bo

toú amiaatia lomuó maó huhebu boito, amiaatia diila loódungga penu boli ngotaa maó todelomio."

²⁴Toú polowila tamoo-kawalia Bele lo Eeya wau mongo iimamu taúwa loódungohe poótaa boito malolingu timongoli pasali lomongo rasulu boito wau moohe toú wolo u mamotoduo mai.

²⁵Lapataó lonaó mai talolaí ngota, lodelo mai habari botie, "Dungohi! Tau-tauwala tahe tilahangia lomongo tuani totutupa boito, masaatia donggo hemo ngaajali taa dadaata to Bele lo Eeya!"

²⁶Yi polowila tamoo-kawalia Bele lo Eeya boito wolo tahi pokawalia olio malonaó mota luli lohama mai tomongo rasulu boito. Bo timongolio diila lomakusai sababu timongolio moohe totaa dadaata; tolongaó taa dadaata boito de momaí olimongolio wolo botu.

²⁷Mongo rasulu boito dilelolio tilumuwoto lotaalua wolo mahakama. Tulusi ti iimamu daá lomalakisaó olimongolio.

²⁸Tio lolóiya maó, "Ami malodini olimongoli wolo loóohuú alihu diila maó mongaajali pasali lo Tau boito. Bo botia nte bilohilo maó wolo u

mapilohutu limongoli! Mapilopo loladi mongoli pongaajali limongoli boito to ngoilanggubu Yerusalemu, wau tumbaó timongoli ohilaa mopotuludu deú ami–amiilo taloó sababu Tau boito yilate."

²⁹ Tei Petrus wau mongo rasulu wewolio boito lolametaó, "Amiaatia musu moduduá to Allahu Taáala wau diila moduduá tomanusia.

³⁰ Ti Isa tasilalipu limongoli boito, maluli pilotumu–Lio mai lonto opopate lo Allahu Taáala tinenemoyaanto.

³¹ Wau Allahu Taáala malohudu o–Lio huhuloáa wau okokawasa ulailaió odelo Taúwa wau Tamoo–poáahua; alihu bangusa lo Isiraílu moótoduo wakutu u molilihu monto ngoáamila dusalio wau moótoduo pongu ngambungu.

³² Amiaatiaalo sakusi tomimbihu ngoáamilalo boito -- amiaatia wau olo Rohullah tailudu mai lo Allahu Taáala ode tau–tauwalo tahemo duduá palentaa–Lio."

³³ Touú popoo–ngawaáalo Mahakama Agama boito loódungohe uito, timongolio loingo daá, wau timongolio malo tituwau u momate mongo rasulu boito mate–mateelo maó.

³⁴ Bo towolota popoo–ngawaáalo mahakama boito woluo ngotaalio lo Parisi taílunte Gamaliel. Tio guru lo agama tahe hulumatio daá lotaa ngoáamila. Tio tilimihula mola tulusi lopoáhu tamodelo mota mongo rasulu boito ode bulemengio ngopeé mola.

³⁵ Lapataó tio lolóiya maó ode Mahakama Agama boito, "Mongo wutato tau–tauwalo Isiraílu! Pikiilangia maó tióotutua tomimbihu wolo u mapohutuo lomongo wutato ode tau–tauwalo botie.

³⁶ Sababu omoóomolu peéenta yilumenetai tei Teudas, tahe monganggapu batanga taa udaá, tilinggula tanu wopato hetuto lota heloduduá olio. Bo tio pilatelio yila yilateelo maó wau ngoáamila tahiduduá olio lo bubuuálawa, wau oliyoío olo yilooli sama–samaata.

³⁷ Lapataó uito, toú woluo poloyiáapo jumulaa ulipu, debolo yilumenetai poli tei Yudas, talonto Galilea. Sababu waingio, dadaata olo tahe loduduá olio. Bo tio olo pilatelio yila–yilateelo maó, wau ngoáamila tahiduduá olio lo bubuuálawa.

³⁸ Oditolio botia wolo polóútia botie, naseehati lowatia yito: Diila maó pongo–

pongolawa tau-tauwalo botie, huliilo maó timongolio. Sababu wonu pongaajali wau oóoliyoí mongolio botie yito lonto manusia, yi pongaajali wau oóoliyoá boito mamooli.

³⁹Bo wonu uito lonto Allahu Taáala, yi Mongo wutato diila tamoólaahe olimongolio. Tumbaó tanu mamóilaalo mai deú Mongo wutato moluwali Allahu Taáala." Naseehati lei Gamaliel boito tilolimo lo mahakama.

⁴⁰Yi mongo rasulu boito pileí tiangio mai, tulusi biluboálio, lapataó dilinilio muli mongaajali pasali li Isa. Lapataó uito, deúito timongolio yilopatio.

⁴¹Mongo rasulu boito lololaa maó Mahakama Agama wolo wengahu sababu Allahu Taáala malo nganggapu olimongolio paatuti u moótapu maó hihina sababu ti Isa.

⁴²Wau timiídu dulahu to Bele lo Eeya wau to bebee-leyeyaalo lotau, timongolio debo hemo ngaajali tulusi wau hemo pololadu Habari Mopiohe pasali li Isa deú Tiolo Olongia Tamoo-poáhua u pilodanti mai boito.

6¹Tahiduduá li Isa helebe mohiheo maó helebe oduhenga mola dadaata.

Towakutu boito tau-tauwalo Yahudi tahipo bahasawa lo Yunani, diilalo sanangi totau-tauwalo Yahudi pulua. Tahipo bahasawa lo Yunani boito lolóiya maó, "Mongobua lami tamaa janda diila ilotayade lo dembulo onggosi ngohui-ngohui utila-tilayadio ode tau-tauwalo."

² Sababu uito, mongo rasulu tamopulaa duulota boito longambu mai ngoámila tahiduduá wau lolóiya maó olimongolio, "Diila mopiohe wonu ami mohuheli mopo loladu tahuda lo Allahu Taáala, sababu musi mongulusi susuu-aliyaalo lo uáalo.

³ Oditolio, mopiohulo wonu Mongo wutato molulaotaó towolota limongoli pitulota taa otanggulo mopiohe wau kiluwaasa lo Rohullah wau molinepo, tamowali wohia lami tuugasi u mongulusi maó susuu-aliyaalo botie;

⁴ sababu ami ohilaa moduá wau mopohabari tahuda lo Allahu Taáala wambaó."

⁵ Ngoámila tau boito akolo wolo potuhata lomongo rasulu boito. Tulusi timongolio lolulaota olei Stepanus, ngotaalio lo tapalacaya daá li Isa wau kiluwaasa lo Rohullah. Ilotulaotalio olo: tei Pilipus, Prokhorus, Nikanor,

Timon, Parmenas, wau tei Nikolaus lonto Antiokhia; tio diila taulo Yahudi bo matilu muwoto agama lo Yahudi.

⁶Taapitu lota boito tiloówolio maó ode mongo rasulu, tulusi mongo rasulu boito loduá mola wau lomolohone balakati to Eeya ode limongolio.

⁷Odieelo mola habari lo Allahu Taáala helebe lololadu mola wau tahiduduá li Isa to Yerusalemu olo helebe iloduhenga mola daatalio, wau dadaata olo mongo iimamu tapalacaya li Isa.

⁸Tei Stepanus laba–labaalo bilalakati lo Allahu Taáala, tilinggula tio helohutu ngohuntua u moólinggolabe wau susuu–aliyaalo upolu–polutuó towolota lo ulipu.

⁹Bo woluo tau–tauwalo tahi potehengia olio; timongolio yito popoo–ngawaáalo bele potabiaalo u ilunte Bele Potabiaalo Tau–tauwalo Bebas. Popoo–ngawaáalo bele potabiaalo boito yito tau–tauwalo Yahudi lonto Kirene wau Aleksandria. Timongolio wolo tau–tauwalo Yahudi lonto Kilikia wau Asia helo hahaamawa wolei Stepanus.

¹⁰ Bo timongolio diila lowali lobatata wolo uiloíya lei Stepanus, sababu Rohullah longohi olio tinepo u mobisala.

¹¹ Masababu uito timongolio helosoloí maó dengolo lota talo bisala, "Iلودungohe lami tau boito helohina olei Musa wau Allahu Taáala!"

¹² Odieelo mola timongolio helo popatu maó tau-tauwalo, wau mongo taúwa lo Yahudi, wolo guguu-ruwaalo agama. Tulusi timongolio mota loheúpa olei Stepanus lapataó lodelo olio lotaalua wolo Mahakama Agama.

¹³ Wau timongolio olo helo potaalua maó mongo sakusi tahe longohi tombango udiila otutu pasali lei Stepanus. Mongo sakusi boito lolóíya maó, "Tau botie laito hemohina Bele lo Eeya umantali wau hemohina totoonulalo palenta lo Allahu Taáala upilo tunggulai lei Musa.

¹⁴ Amiaatia malo dungohe tio lolóíya deú ti Isa lonto Najaret boito mamopo lohubeó Bele lo Eeya botie, lapataó molomela ngoáamila uúdu u tiluhutai lei Musa olanto!"

¹⁵ Ngoáamila tau tawoluo tosidangi lo Mahakama Agama boito hibilohe odelei Stepanus. Wau towakutu boito baya lei

Stepanus oontonga debo odelo baya lo malaikati.

7¹ Ti iimamu daá lohintu maó olei Stepanus, "Wolo ngoáamila uiloíya lotau boito otutu?"

² Tei Stepanus lolametaó, "Mongo wutato wau mongo tiyamo! Nte dungohi mai watia! Tou dipolulio mai tinenemoyaanto Abraham lolimbata ode Haran, tou tio donggo bilubiluloá to Mesopotamia, Allahu Taála talailaió dungga–dungga mai ode olio

³ wau lotahuda, 'Tolailo maó lipumu wau mongo ilaatamu. Ponaóolo odelipu u potunuwo–Ú mai olemu.'

⁴ Yi tei Abraham malo lolaa maó lipu lo Kasdim, tulusi lolimbata ode Haran. Lapataó tiyamo lei Abraham yilate maó, Allahu Taála lohutu olei Abraham lolimbatai odelipu botie upilo tibiluloá lo Mongo wutato wau Mongo tiyamo ngoáamilalo masaatia botie.

⁵ Tou boito diaaluo penu boli ngotayadu lolipu botie uilohi lo Allahu Taála odelei Abraham lowali miliki lei Abraham; penu boli odelo paladu lo uluú diila yilohi–Lio olio. Bo Allahu Taála lodanti deú Tio mamongohi maó odelei Abraham u mowali

miliki lei Abraham wau waliilio mola. Tou boito tei Abraham diila owalaó.

⁶ Bo uti–utieelo u pilotahuda lo Allahu Taáala olio, 'Waliimu mola mamoti biluloá debo odelo tau deli tolipu lo taawewo. Tau–tauwala tolipu boito mamopowato olimongolio wau mohutu maó wolo diila omanusia olimongolio wopato hetuto lotaunu mola hiheolio.

⁷ Bo Waú mamó huumani mai bangusa tahemo powato olimongolio, wau timongolio malumualo monto lipu boito wau mamolubo ola–Ú totambati botie.'

⁸ Lapataó lotahuda odito buuhuta lodanti boito silaaha lo Allahu Taáala wolo upacala losuunati. Yi lapataó tei Isihaka, walaée Abraham pilotutulio mai, tei Abraham loluuna olio tou maa o umulu walu hui. Lapataó tei Isihaka loluuna maó walaío olo, deúito–yito tei Yako. Wau tei Yako olo loluuna walaío tamopula duulota, deúito–yito talowali tiyamo loluhuru bangusa lo Yahudi.

⁹ Mongo tiyamo loluhurunto boito lohiihia to olei Yusu, tilinggula timongolio malo potali olio lowali wato to Masiri.

¹⁰ Bo Allahu Taála wolio wau lolopata olio lonto totoonulalo osuusalió. Allahu

Taáala longohi olio watade wau tinepo toú tio lodudulaó odelei Piraun onlongia lo Masiri, tilinggula tei Piraun lomintaáa olio lowali Gubolonulu tolipu lo Masiri wau taókawasa to bele biluloá saaha li onlongia lei Piraun.

¹¹ Lapataó malotoduo maasa lopolobiti daá to ngoilanggubu lipu lo Masiri wau Kanaán tilinggula tau helo dutolo daá. Ti nenemoyaanto diila lowali loótapu mai uáalo.

¹² Yi toú tei Yako loódungohe woluo pale to Masiri tio malo poáhu mongo waláio, tinenemoyaanto, lonaó mola u bohulio.

¹³ Toú timongolio lonaó mola to oluolio, tei Yusu malo poótaa maó tomongo wutatio boito deú tiolo tei Yusu. Deúito towakutu boito ilotaawa li onlongia lo Masiri pasali lomongo wutatee Yusu.

¹⁴ Lapataó tei Yusu malo pohabari oliyamolio, deúito–yito tei Yako, u mohile olio peé–peéenta wolo ngoilanggubu ngaalaálio molimbatai ode Masiri -- ngoáamilalo woluo pitu lopulaa limolota.

¹⁵ Yi tei Yako malo limbata ode Masiri wau mota teteetolo tio woli nenemoyaanto yilate.

¹⁶ Milate limongolio lapataó luli pilohualingo ode Sikhem wau yilobungio tokuubulu u matilali lei Abraham wolo ngojumula doi lonto suku bangusa lo Hemor to Sikhem.

¹⁷ Toú malembidu wakutuulio Allahu Taáala lopoópolu danti–Lio odelei Abraham, bangusanto to Masiri maílo duhenga mola huntualio.

¹⁸ Mapulitio ngotaalio li onlongia wewo tadiila motota olei Yusu, malo malenta to Masiri.

¹⁹ Olongia boito helo poitohe bangusanto wau diila omanusia odeli nenemoyaanto. Tio lomakusa olimongolio helo pomahulo tahi ungea limongolio uheli pilotutulio mai alihu lulia maó odito wau mate.

²⁰ Tomaasa boitolo pilotutulio mai tei Musa; tio taúnge gaaga daá. Tolo hula mola hiheolio tio tilaala tobele lipaapalio,

²¹ wau toú tio tilapilio, tipuusili Piraun malohama olio, tulusi tilaalalio tio debo odelo walaño lohihilao.

²² Ngoáamila ilimi bangusa lo Masiri pilo ngaajali maó olio wau tio lowali taa okawasa daá toloíya wau huhutuulio.

²³ Toú tei Musa maa o umulu wopato pulu lotaunu, tilumoodei lonto hilaalio

ohilaa mota momilohe owowoluwoa lo bangusaalio taulo Isira'ilu.

²⁴Lapataó tio loóonto ngotaalio limongolio he alinaya ngotaalio lo Masiri; yi tio malo poduulua totahe alinayaalio boito wolo lomate taulo Masiri boito yila-yilateelo maó.

²⁵Tolantobu lei Musa bangusaalio boito mamongalati deú Allahu Taáala donggo hemomake olio u mopo lopata olimongolio. Bo malo ilaalo deú timongolio diila mongalati.

²⁶Loombulio mola tio loóonto poli duulota taulo Isira'ilu donggo hemolohulua, tulusi tio lotolopani u mopodame olimongolio. Tio loloíya maó, 'Timongoli botie mohutato. Yilongola timongoli hemolohulua?'

²⁷Bo tahe momate waitio boito lohuntudeó olei Musa ode biihio tulusi loloíya maó,

²⁸'Tatoonu talo muduó olemu lowali butoó lami? Yilongola yió botie ohilaa momate olaú olo mate-mateelo maó debo odelo yió lomate taulo Masiri boito yila-yilateelo maó olaango?'

²⁹Toú tei Musa loódungohe wolo uiloíya lotau boito, yi malolahi tei Musa lonto

Masiri tulusi mola lotibiluloá to Midian. Mola teto tio loótapu walaó duulota.

³⁰Wopato pulu lotaunu mola lapatio maó malaíkati ngota lonaó mai odelei Musa tohuta datahu u luasi daá wau delita membideó lo Huídee Sinai. Malaíkati boito dungga–dungga mai todelomo tulu todiúto udonggo hinta–hintalabu.

³¹Tei Musa lolinggolabe loóonto suáli boito, tilinggula tio lohimbide mota lomilohe u motota maó wolo uito. Lapataó tio loódungohe suala lo Allahu Taáala lotahuda mai,

³²'Waúlo Allahu Taáala tinenemoyaamu; Waú Allahu Taáala lei Abraham, Isihaka, wau Yako.' Tei Musa hilumuhela yiloohe tilinggula diilalo buheli lomilohe mota ode diúto boito.

³³Lapataó Eeya lotahuda poli, 'Yinggila maó sandale u pakepake olemu boito, sababu huta tambati ilotihulamu boito yito huta mantali.

³⁴Waú maloóonto wau lopoó tuotai paátio u hedilutola lo umati–Ú to Masiri. Waú malo dungohe poloílaalo suusa limongolio wau Waú lotuhutai u molopata olimongolio. Botia, dulo! Waú mamolao olemu muli mohualinga mola ode Masiri.'

³⁵ Tei Musa botieelo tei Musa tadiila ilaku lobangusa Isira'ilu wau tadiila tilolimo wolo lo'iya botie, 'Tatoonu talo muduó olemu lowali taúwa wau butoó lami?' Bo tumbaó tio-tiolo taa u yilao lo Allahu Taáala u lowali taúwa wau tamoo-poáahua, wolo bubantu lo mala'ikati talonaó mai ode olio todiúto u hinta-hintalabu boito.

³⁶ Tei Musa boitolo talodelo bangusa lo Isira'ilu yilumualai lonto Masiri wolo helohutu u moólinggolabe wau susuu-aliyaalo upolu-polutuó to Masiri, to Deheto Meela, wau tohuta datahu u luasi daá wau delita wopato pulu lotaunu mola.

³⁷ Tio-tiolo olo tei Musa talo lo'iya ode bangusa lo Isira'ilu, 'Allahu Taáala mamongohi mai olemu nabi ngota tatulaotolo to wolotamu lohihilao, tutuuwauwa debo odelo Tio lolulaota olaú!'

³⁸ Tei Musaalo tato huungo bangusa lo Isira'ilu tohuta ohungaya u luasi daá, talowali pilo timbulude ode mala'ikati u lobibii-salawa wolio to Hu'idee Sinai wolinenemoyaanto. Tiolo talo lolimo habari utumu-tumulo u pilopo tunggulai ode olanto.

³⁹ Oopenu boli odito tinenemoyaanto diila lohuto lodungohe olio. Timongolio diila lololimo olio wau ohilaa muli mohualinga ode Masiri.

⁴⁰ Timongolio loloíya odelei Haruna, 'Pohutua mai dedee-waalo olami, alihu dedee-waalo boito modelo olami. Sababu madidu otaawa lami wolo u malotoduo tolei Musa talopo lualai olami lonto Masiri boito!'

⁴¹ Lapataó towakatu boito timongolio lohutu buí tuwau lowalaó sapi, lapataó timongolio helo podewo bake ode buí boito wau malohutu potihunggu u lomuja balangi huhutu limongolio lohihilao.

⁴² Yi Allahu Taáala lololaa olimongolio wau lopoluli olimongolio hipoluboa popoo-liyamaalo tohulungo. Uito lotuuúde loú wolo u tulatuladu todelomo buku lomongo nabi. Odie mola, 'Wuu tau-tauwalo Isiraílu! Diila ode ola-Ú timongoli longoloto wau lopobake binatanggi ngotilonggadu wopato pulu lotaunu mola hiheolio to huta ohungaya u luasi daá.

⁴³ Kema lo balaahala Molokhilo u hedeloo limongoli peé-peéenta wolo buí lo binatanggi balaahalamu, deúito-yito

Repan; ui-uitolo buí upilohutu limongoli u hetuboolo. Masababu uito Waú mamolapi olimongoli tunggula molamingo ode ngotuwali tolipu lo Babel.'

⁴⁴ Kema tambati lo Allahu Taáala dungga-dungga mai ode manusia woluo tolinemoyaanto tohuta datahu u luasi daá wau delita. Kema boito pilohutulio topalenta lo Allahu Taáala odelei Musa wau loduduá pongawaá upilo bilohei lo Allahu Taáala odelei Musa.

⁴⁵ Lapataó kema boito dilelolio tulusi linenemoyanginto toú timongolio wolei Yosua mota lohehu lipunto botie lonto okokawasa lo babaa-ngusawalo tapilolahi lo Allahu Taáala totalu limongolio. Kema boito woluo teto tunggula tojamani lei Dauda.

⁴⁶ Tei Dauda loósanangi hilaa lo Allahu Taáala wau lomolohone o-Lio alihu tio luasias-Lio momongu bele ngowale ode Allahu Taáala tahe tuboo lei Yako boito.

⁴⁷ Bo tei Salomoolo tama lomongu bele lo Allahu Taáala.

⁴⁸ Bo Allahu Taáala Taa Laba-labaalo molanggato diila lotibiluloá tobele upilohutu lomanusia; sababu todelomo Buku linabi tulatuladu odie mola,

⁴⁹ 'Hulungo yito tambati huhuloáa-Ú, wau huta wapidu oáatu-Ú. Bele wolo u mabongulo limongoli ola-Ú? Touútoonu tambati u pohuheliya-Ú?

⁵⁰ Diila maa Waú lohihilao talo powali mai totoonulalo u hitua-tuawua?' odieelo mola tahuda lo Allahu Taáala.

⁵¹ Donggo boli baaángilio lo Mongo wutato wau odito totolio modungohe to Allahu Taáala! Bulongamu bungolo tióotutua to tahuda lo Allahu Taáala! Timongoli tutuuwauwa woli nenemoya limongoli; laito hemoluwali Rohullah!

⁵² Wolo woluo nabi tadiila ilalinaya linenemoya limongoli? Timongolio helomate mongo utolia lo Allahu Taáala yila-yilateelo maó u muloololio mai daá malopo malalumu deú Wato lo Allahu Taáala taótutu boito madungga-dungga mai. Wau botia timongoli lohiyanati wau lomate yila-yilateelo maó Wato lo Allahu Taáala boito.

⁵³ Mamaa-laíkatiyalo malopo tunggulai papaa-lentawalo Allahu Taáala olemu bo timongoli diila loduduáaó!"

⁵⁴ Odito popoo-ngawaáalo Mahakama Agama boito loódungohu ngoáamila

uilóiya lei Stepanus, lopalato hilaa limongolio wau maloingo daá olio.

⁵⁵ Bo tei Stepanus tamaa kiluwaasa lo Rohullah, yilumanggela mola ode hulungo. Tio loóonto mola ololaió Allahu Taáala wau ti Isa tihutihula totambati okawasa to ambahu olowala lo Allahu Taáala.

⁵⁶ "Bilohi," loíya maó lei Stepanus, "Watia loóonto mola sologa lohuó wau Walaó Manusia tihutihula to ambahu olowala lo Allahu Taáala!"

⁵⁷ Popoo-ngawaáalo Mahakama Agama lolaúbeó bulonga limongolio sambela hiwuwa-wuwaatiá, tulusi peéentalo maó loluhu olei Stepanus.

⁵⁸ Timongolio lodedeá olio ode bulemengo kota lapataó hepilaíilio lobotu. Tau-tauwalo tahi sakusia ulotoduo mai boito lopo hangataó boó limongolio to tabohulotau ngota taa táilunte Saulus.

⁵⁹ Tou timongolio donggo hemomaí olei Stepanus lobotu, tei Stepanus malo ngiibodu, "Eeya Isa, tolimowalo rohu lowatotia!"

⁶⁰ Tulusi tio loti bonggohuúlo mola wau lomotaalo tingalahu, "Eeya, diila maó pobantawa mai dusa botie olimongolio!" Tou yilapato lolóiya maó odito tio yilate.

8¹ Wau tei Saulus sanangi olo to polomatea yila-yilateelo maó boito. To dulahulo boito jamaá to Yerusalemu maheila-yilapitalio tilinggula ngoáamila tahi o iimania, ngopohia mongo rasulu, malo bubuuálaalo maó ode ngoilanggubu madala lo Yudea wau Samaria.

² Tau-tauwalo tamoohe to Allahu Taáala lolobunga olei Stepanus wau helo hiyongaó olio wolo hisuukalia daá.

³ Bo tei Saulus debo tulusi hemo tolopani mongantulu jamaá. Tio monto bele ngowale ode bele ngowale helo dedeá ode bulemengio ngoáamila taa palacaya, lapataó helo potuwoto olimongolio ode delomo tutupa.

⁴ Tau-tauwalo tapalacaya tamalo bubuuálawa boito helo pohabari Habari Mopiohe lonto Allahu Taáala boito ode utoonulalo maó.

⁵ Tei Pilipus lonaó ode kota Samaria wau lopohabari totau-tauwala mola teto pasali li Olongia Tamoo-poáhua u pilodanti mai lo Allahu Taáala.

⁶ Tou tau-tauwala loódungohe olei Pilipus bisabisala wau timongolio loóonto ngoáamila moólinggolabe u hepilo

hutulio, ngohuntua lonto olimongolio lopoótuoto wolo u heloíya lei Pilipus.

⁷ Sababu roroo-huwaalo u moleeto mailumualaó loú hiwatiá lonto taa dadaata tailo tuanga lolati. Tadidu mowali monaó wau penggo olo dadaata tapiloó lulilio.

⁸ Yi tau-tauwalo tokota lo Samaria boito hiwengahe daá.

⁹ Tokota boito woluo talolaí ngota taílunte Simon, tamaa dengolo wakutu mola hiheolio helohutu totau-tauwalo Samaria leitontongo to ilimi lo sihirilio. Tio maloloíya olimongolio deú tio taa upolu-polutuó.

¹⁰ Yi ngoáamila taa tokota boito lonto ngoáamila wolude lo ulipu hemo poótuoto daá olio. "Tau botie yito olootolo Allahu Taáala u otaawa lotaa dadaata odelo 'Olootolo Daá' boito," uali mongolio.

¹¹ Malohiheo daá tio heloó tontonga totau-tauwala wolo olootolo sihirilio, tilinggula timongolio hemo poótuoto daá olio.

¹² Bo tei Pilipus lopohabari maó olimongolio pasali lo Habari Mopiohe tomimbihu woloolo mola Allahu Taáala mamó malenta odelo olongia wau pasali li Isa Almasi, Olongia Tamoo-poáhua boito.

Yi timongolio palacaya to habari upilo tunggulai lei Pilipus lapataó timongolio yilihualio -- mopio mongobua meaalo mongo lolai.

¹³ Tei Simon lohihilao olo palacaya. Wau lapataó yilihualio, tio tulusi loduduá olei Pilipus. Momoóo-linggolabeyalo ulotoduo mai boito helohutu olei Simon molaasa hileerani daá.

¹⁴ Mongo rasulu to Yerusalemu loódungohe deú tau-tauwalo Samaria malo lolimo tahuda lo Allahu Taáala. Sababu uito timongolio lolao olei Petrus wolei Yahya odito mola.

¹⁵ Tou tei Petrus wolei Yahya leidungga mola, timongolio heloduá ode tau-tauwalo Samaria boito alihu timongolio moótoduo mai Rohullah,

¹⁶ sababu Rohullah diipo leidungga mai longaawasa maó penu boli ngotaalio limongolio; timongolio boheli yilihualio to tanggulo Eeya Isa wambaó.

¹⁷ Tulusi tei Petrus wolei Yahya lopodutu uluú limongolio ode yitaato lotau-tauwalo Samaria boito; yi timongolio lololimo Rohullah.

¹⁸ Tei Simon loóonto deú sababu uluú lomongo rasulu dilutu ode yitato

lotau-tauwala boito, yi Rohullah yilohi ode limongolio. Sababu uito tei Simon lodelo doi odelei Petrus wolei Yahya,

¹⁹ Lapataó loloíya maó, "Wohia mai olaú kawasa boito olo alihu wonu uluúúú podutuwole boli toitaato lotatoonu, tau boito mamó lolimo Rohullah."

²⁰ Bo tei Petrus lolameto, "Matopotala yió wau doimu! To lantobumu deú wowohi mai lo Allahu Taáala boito mowali taliyola lodoi?"

²¹ Yió diila ohaku u moduduá todelomo kalajaa lami, sababu hilaamu diila otutu to Allahu Taáala.

²² Sababu uito tolai maó makusudumu u moleeto boito, wau pohilelo mola duá ode Eeya alihu Eeya mongambungu mai pikiilangimu umoleeta boito!

²³ Sababu otaawaú yió polupolu lou mohiihia wau pilowatolio lou moleeto."

²⁴ Lapataó tei Simon loloíya maó odelei Petrus wolei Yahya, "Tulungia mai u mohile mola ode Eeya alihu diaaluo penu boli tuwau maó u heloíya lomongo wutato boito motoduo mai olaatia."

²⁵ Lapataó longohi ososakusi limongolio wau helo pohabari tahuda lo Allahu Taáala, tei Petrus wolei Yahya luli lohualinga ode

Yerusalemu. Wau toú hinaówa, timongolio helo pohabari Habari Mopiohe boito to dadaata kambungu lo Samaria.

²⁶ Malaíkati ngota lo Allahu Taáala lolóiya maó odelei Pilipus, "Ntali pomonggatolo! Ponaólo talutalu ode hulialio ode dalalo mopo wumbuta Yerusalemu wau Gasa." Dalalo boito diila otau.

²⁷ Yi tei Pilipus olo malo monggato. Toú boito woluo pogawee ngota lobebe biluloá li olongia Etiopia tadonggo tononaólio mohualinga ode lipulio. Tau boito ngotaalio lopogawee talailaió wau tatihi-tihulo toú ngoáamila okokaya lo Kandake, olongia taabua lolipu Etiopia. Tau boito malonaó ode Yerusalemu mola motaáluku wau mohulumati to Allahu Taáala wau botia donggo to wuwalingio mai wolo kaletaalio. Toú donggo hulohuloáa todelomo kaletaalio boito tio hemobaca Buku li Nabi Yesaya.

²⁸ (8:27)

²⁹ Rohullah lotahuda mai odelei Pilipus, "Ponaólo duduli mota kaleta boito."

³⁰ Yi tei Pilipus malo dudula mota ode kaleta boito, lapataó ilodungohelio tau boito hemobaca Buku lei Yesaya. Tei

Pilipus lohintu maó olio, "Wolo ti Tuani mongalati u hepobaca li Tuani boito?"

³¹ Tau boito lolameto, "Woloolo mola watia mongalati, wonu diaaluo tamo tombangai uito olaatia?" Tulusi tiloduwolio tei Pilipus lotitaé mola ode kaleta lotihuloáa peé-peéenta wolio.

³² Utieelo ááa-yatiyalo u hepilo bacalio boito, "Tio debo odelo himba u dilelolio u olotolo, debo odelo walaó himba udiila momembeleó wonu lambutio huntingalo, odieelo mola Tio diila lolapali penu boli ngotahe maó.

³³ Tio hilinaalio wau pilohutulio lou diila aadili. Nyawa-Lio pilahutio lonto tudu lodunia tilinggula diaaluo penu boli ngotaa maó tamoó wungguli pasali lo walii-Lio."

³⁴ Pogawee talailaió lonto Etiopia boito malo loíya odelei Pilipus, "Nte poótaa mai olaatia, tatoonu tapilatuju linabi botie? Wolo batangalio lohihilao meaalo taawewo?"

³⁵ Yi tei Pilipus olo malo lumula lobisala; tio lomake ááa-yatiyaalo boito odelo pomuó u lopohabari Habari Mopiohe pasali li Isa ode pogawee talailaió boito.

³⁶ Tohuungo lononaó, timongolio malei dungga ode tambati tuwau u otaluhu. Pegawee boito malo loíya, "Bilohi uito otaluhu! Donggo wolo poli ukuulangi u mopolihi olaatia?"

³⁷ [Tei Pilipus lolóíya maó, "Wonu ti Tuani palacaya wolo lealeaatu lohilao, ti Tuani mowali lihuwalo." "Watia palacaya deú ti Isa Almasi yito Walaó Allahu Taáala," loíya maó lopogawee talailaió lonto Etiopia boito.]

³⁸ Lapataó pileí huheliilio kaletaalio; tulusi timongolio duulota, tei Pilipus wau pogawee boito, lolahe mola ode taluhu wau tei Pilipus malo polihu olio.

³⁹ Toú timongolio lobotulai lonto taluhu, Rohullah lohama olei Pilipus lonteeto. Pogawee talailaió lonto Etiopia boito diilalo loóntonu olio. Wolo wenga–wengahe pogawee talailaió boito lopo tolona mola lononaólio.

⁴⁰ Lou diila ota–otaawa maó tei Pilipus mawoluo to Asdod. Wau toú tio lopo tolona mola lononaólio, tio helo pohabari Habari Mopiohe pasali li Isa to ngoáamila kota tunggula tio leidungga mola ode Kaisarea.

9¹ Toú boito tei Saulus tulusi wambaío ohilaa monganjamu wau momate-mateelo maó tahiduduá lo Eeya Isa. Tio lonaó odeli iimamu daá,

² wau malohile tulade kawasa u monaó ode mongo taúwa lo bebee-leyaalo potabiaalo taulo Yahudi to Damusiki, alihu wonu tio moódungga mola teto tau-tauwalo tapalacaya li Isa, tio mamoo waúpaó olimongolio wau modelo olimongolio ode Yerusalemu.

³ Toú donggo dulu-dulunga ode Damusiki, toú malembide mota wolo kota boito, debolo tinelo tuwau lonto hulungo lolinelai topalito lei Saulus.

⁴ Tio lodehu lewumbade tohuta tulusi loódungohe suala tuwau lotahuda mai olio, "Saulus, Saulus! Wolo sababuulio yío mongalinaya ola-Ú?"

⁵ "Tatoonu lto, Tuani?" yilintu maó lei Saulus. Suala boito lolametai, "Waúlo ti Isa, taa ilalinayamu.

⁶ Bo botia pobongulo wau tuwotolo ode kota, mota teto mapo tahuda-Ú mai olemu wolo umusi pohutuwomu."

⁷ Tahiduduá peé-peéenta wolei Saulus iloohea tilinggula diilalo osuala; sababu

timongolio maloó dungohe sua boito bo diila loóonto penu boli ngotaa maó.

⁸Lapataó tei Saulus tilimihula mola wau lomulahei, bo matolio diilalo mowali moóonto wolo-wolo. Oditolio timongolio malodihu uluúlio wau lodedeá olio tilumuwoto mota ode Damusiki.

⁹Tolo hui mola hiheolio tio diila mowali moóonto wau toú boito tio diila lolamela wau longilu sama-samaata.

¹⁰To Damusiki woluo ngotaalio muri li Isa tanggulio Ananias. Todelomo bibilohe tuwau, Eeya lotahuda mai olio. Eeya lotahuda, "Ananias!" Tametaó lei Ananias, "Watotia, Eeya."

¹¹Eeya lotahuda mai, "Ntali pomonggatolo botia. Ponaólo mola ode bele lei Yudas todalalo motulidu. Yintua maó mola teto u tanggulio Saulus, taa asaliilio mai lonto kota Tarsus. Tau boito donggo hemoduá,

¹²wau todelomo bibilohe tuwau tio loóonto talolaí ngota, u tanggulio Ananias, lonaó mai ode olio wau lopodutu uluú toitaatio alihu tio muli moóonto."

¹³Tei Ananias lolametaó, "Eeya, watotia maloó dungohe dadaata tahi polóiyawa pasali lotau botie, detidiyolo maó

tomimbihu totoonulalo polo ngalinaya u hepilo hutulio ode umati lo Eeya to Yerusalemu.

¹⁴Wau botia tio malonaó mai odia wolo yiluwasia lomongo iimamu taúwa u moheúpa ngoáamila taa palacaya to Eeya."

¹⁵Bo Eeya lotahuda mai odelei Ananias, "Wambaó ponaólo! Sababu Waú malo lulaota olio u momaya ola-Ú, alihu tio mopohabari pasalii-Ú ode babaa-ngusawalo wewo tadiila o agama Yahudi wau ode mongo olongia wau ode umati lo Isiraílu olo.

¹⁶Wau Waú lohihilao mamopo bilohei olio ngoáamila polodutolo umusi dutolalio sababu Waú."

¹⁷Yi tei Ananias malonaó mota olo ode bele boito wau lopodutu uluúlio odeitaato lei Saulus. "Wutato Saulus," loíya maó lei Ananias, "Ti Isa Eeya taa iloontonga lo Wutato tohuungo dalalo toú Wutato maódia mai, Tiolo talo poáhu olaatia odia mai alihu Wutato mamuli moóonto wau kawaasa mai lo Rohullah."

¹⁸Toú boitolo olo hitua-tuawua udebo odelo tolitió tola lodehu lonto mato lei Saulus wau tio maluli loóonto. Yi tio malobongu mola, lapataó yilihualio.

¹⁹Wau lapatao lolamelo, tio maluli lolotolai. Tei Saulus lotibiluloá to Damusiki wolo tahiduduá li Isa dengolo hui mola hiheolio.

²⁰Tio tulusi lonaó ode bebee-leyaalo potabiaalo wau lolumula helo pohabari deú ti Isa boitolo Walaó Allahu Taáala.

²¹Ngoáamila tau lolinggolabu loódungohe olei Saulus. Timongolio malo loíya, "Diila tio botie taamota to Yerusalemu malomate yila-yilateelo maó ngoáamila taa palacaya li Isa? Tio lonaó mai odia tumbaó bo mai moheúpa wau modelo olimongolio ode mongo iimamu taúwa!"

²²Bo helebe moóohuú waingio lei Saulus. Bubuu-kutiyaalo u tiloówolilio pasali li Isa odito moóyakini deú ti Isa boitolo Olongia Tamoo-poáhua, tunggula tau-tauwalo Yahudi tahi biluloáwa to Damusiki diilalo loó batala.

²³Lapataó lopaluto dengolo wakutu mola hiheolio tau-tauwalo Yahudi malo heeluma u momate olei Saulus mate-mateelo maó.

²⁴Bo patuju limongolio boito ilotahualio. Hui wau dulahu timongolio hipohimawa

tohuhebu hulubangi lokota u momate olio mate-mateelo maó.

²⁵ Bo toú huilio tuwau, tahiduduá olei Saulus malohama olio, tulusi lopolaahe mola olio todelomo kalanji tuwau loli dingingo botu lokota.

²⁶ Tei Saulus lonaó mola ode Yerusalemu, wau mola teto tio helo tolopani motituwau wolo tahiduduá li Isa. Bo timongolio moohe olio sababu timongolio diila palacaya deú tio otu-otutuulo maó malowali muri li Isa.

²⁷ Lapataó tei Barnabas lonaó mai ode olio, tulusi lodelo olio ode mongo rasulu. Tei Barnabas lohungguli maó olimongolio pasali woloolo mola tei Saulus loóonto Eeya tohuungo dalalo wau woloolo mola Eeya lotahuda mai olio. Tei Barnabas lopoótaa maó olo pasali woloolo mola obuheli lei Saulus helo ngaajali to Damusiki to tangguli Isa.

²⁸ Sababu uito tei Saulus lotibiluloá woli mongolio, wau helo hutuba wolo buheli to ngoilanggubu Yerusalemu to tanggulo Eeya.

²⁹ Tio lobisala wau helo tataameta olo wolo tau-tauwalo Yahudi tahipo bahasawa

lo Yunani, bo timongolio hipo tolopania u momate olio mate–mateelo maó.

³⁰Toú tau–tauwalo tapalacaya wewolio lotota maó pasali losuáli boito, madilelo limongolio tei Saulus ode Kaisarea, lapataó lolao olio ode Tarsus.

³¹Yi jamaá to ngilanggubu Yudea, Galilea, wau Samaria malowali aamani. Bilantua mai lo Rohullah, loú yiloohe to Eeya, jajaa–maáalo boito he iloduhenga mola lotolio wau daatalio.

³²Tei Petrus lonaó ode utoonulalo maó helo biilohe wolo jajaa–maáalo. Todulahee tuwau tio mola lobiilohe wolo umati lo Eeya tahi biluloáwa to Lida.

³³Mola teto tio lodunggaya wolo talolaí ngota tanggulio Eneas, tadidu mowali monaó wau diilalo hemo pobongu–bongu monto potuluhelio mawalu lotaunu mola hiheolio.

³⁴Tei Petrus lolóiya maó odelei Eneas, "Eneas, ti Isa Almasi mamó poóluli mai olemu. Pobongulo mola wau pobelesia maó potuluhemu." Toú boitolo olo tei Eneas lobongu.

³⁵Ngoáamila tuango lipu to Lida wau Saron loóonto olei Eneas, tulusi timongolio ngoáamilalo palacaya to Eeya.

³⁶To Yope woluo taabua ngota tanggulio Tabita. Tio ngotaalio tapalacaya li Isa. (Tanggulio tobahasa Yunani yito Dorkas u boliilio maó buúlu.) Tio laito bo wambaó hemohutu susu-aliyaalo u mopiohu wau hemo tulungi totahi mosikinia.

³⁷Toú boito tio mongongoto lapataó yilate. Lapataó milatelio yilihualio maó, tio pilobalatio tohuwali u toitaato.

³⁸Yope diila botie molamingo monto Lida. Oditolio toú tahiduduá li Isa to Yope loódungohe olei Petrus to Lida, timongolio malo poáhu mota duulota lonaó odelei Petrus wolo tahuli odie, "Huáa pohuwalingai odia."

³⁹Tei Petrus huáa lobongu wau malo duduá woli mongolio. Toú leidungga mola odito, tio dilelolio ode huwali u toitaato. Ngoáamila tahi jandawa teto malo tiámbu totili lei Petrus sambela hehiyonga wau lopo biloheó olio bobooówalo wau jujuu-mbawaalo u hediletu li Dorkas ode limongolio toú tio donggo tumutumulo.

⁴⁰Tei Petrus malo poáhu olimongolio ngoáamilalo yilumualo, lapataó tio loti bonggohuúlo mola wau loduá. Lapataó uito tio lotitalu maó ode milate li Dorkas wau lolóiya, "Tabita, pabongulo!" Yi ti

Dorkas malo mulahei, wau toú tio loóonto olei Petrus tio malo tihuloó.

⁴¹ Tulusi tei Petrus lodihu uluúlio wau lomantu lopo tihula mola olio. Lapataó tei Petrus lotiangai tau-tauwalo tapalacaya teto wau peé-peéenta wolo mongo janda boito, tulusi lohudu maó oli Dorkas tamaa tilumumulai boito ode limongolio.

⁴² Habari pasali u lotoduo mai boito malo loladulo mola ode ngoilanggubu Yope, tilinggula dadaata taa palacaya li Isa odelo Olongia Tamoo-poáhua limongolio.

⁴³ Tei Petrus lotibiluloá teto dengolo hui mola tobele ngotaalio tamoolahea walito lo binatanggi tanggulio Simon.

10¹ To Kaisarea woluo talolaí ngota tanggulio Kornelius. Tio kapitengi lo "Pasuukani Italia."

² Tio ngotaalio lotaa u moohe to Allahu Taáala wau ngoáamila ilaatolio hipo tabiyawa ode Allahu Taáala. Tio mapoó-poódaata helomantu tau-tauwalo Yahudi tamosikini, wau tio laito hemoduá ode Allahu Taáala.

³ Toú dulahee tuwau tanu jamu tiga lolaango tio loóonto wolo mopatatao tuwaulio lo bibilohu, ngotaatio lo malaíkati

lo Allahu Taáala dungga–dungga mai wau lotianga olio, "Kornelius!"

⁴Tei Kornelius lomiloheó malaíkati boito wolo wohe–wohe lapataó lolóíya maó, "Mahinta wolo Tuani?" Malaíkati boito lolametaó, "Duámu wau omuula lohilaamu matilolimo lo Allahu Taáala wau Allahu Taáala loéelai olemu.

⁵Botia ahulilo mota tau ode Yope motiangai olei Simon táilunte wimu–wimumuto Simon Petrus.

⁶Tio donggo hanga–hangato tobele lo ngotaalio tamoolahea walito tanggulio Simon, tabilu–biluloá tobiihu pentadu."

⁷Lapataó malaíkati talo bisala wolei Kornelius boito lonaó, tei Kornelius malo tiangai duulota tamoomayawa belelio wau suludadu ngota mokawalia olio taó iimani.

⁸Tei Kornelius lohungguli maó olimongolio wolo u malo toduo mai, tulusi lopoáhu mola olimongolio ode Yope.

⁹Loombulio mola, toú timongolio donggo todelomo nonaó limongolio wau wimbideó meidungga ode Yope, tei Petrus malo botula odeitaato bele mola loduá.

¹⁰Lapataó tio maloólaasa pilolaango daá wau ohilaa molamelo. Toú uáalo donggo

hepo dapatolio, tio loótoduo mai tuwaulio lobibilohe.

¹¹ Tio loóonto mola hulungo lohuó wau u hitua-tuawua debo odelo kaingi u motanggalo wuduwudu mai ode dunia, ntaya-ntayanga to opaato tutulio.

¹² Todelomio woluo tilolahepalo binatangi hidala-dalaala u oáatio wopato, tilolahepalo binatangi u hiálapa wau bulungi u hilinggela.

¹³ Lapataó woluo suala lotahuda mai olio, "Petrus, bongulo! Olotaalo wau polamelolo!"

¹⁴ Tei Petrus lolametaó, "Diila, Eeya! Diipo peénta maó watotia helo lamela wolo-wolo u haramu meaalo najisi."

¹⁵ Bo suala boito luli lotahuda mai olio, "Wolo u mapilo ilaalo halale lo Allahu Taáala, diila maó anggapua uito haramu."

¹⁶ Bibilohe boito helo piúwa tunggula poóotolu, lapataó kaingi boito leibintaá mola ode sologa.

¹⁷ Tei Petrus malolingu lomikiilangi mola wolo boliilio loú bibilohe boito. Toú tei Petrus donggo hemo mikiilangi mola, tahe ilahula lei Kornelius boito maloó dungga bele lei Simon wau timongolio mawoluo totalu lohuhebu.

¹⁸ Lapataó timongolio lotiangai tau wau lohintu maó, "Wolo tewe otamu talo titihui, taílunte Simon Petrus?"

¹⁹ Tou tei Petrus donggo wambaó hemo tolopani tulusi u motota maó boli lou iloontongalio boito, Rohullah lotahuda mai olio, "Wuu Petrus woluo toulota tadonggo hemololohe olemu.

²⁰ Ntali, lato polaahulo mola ode walungo wau diila maó polingu moduduá olimongolio, sababu Waúlo talo poáhu olimongolio."

²¹ Yi tei Petrus malolaahe mola ode walungo wau lolóiya maó ode tau-tauwala boito, "Wawaatiyalo tahe lolohu lomongo wutato. Mongo wutato lonaó mai odia mai mongola?"

²² Timongolio lolametaó, "Ti Kapitengi Kornelius malo poáhu olamiaatia odia mai. Tio ngotaalio lo tamopiohu wau moohe to Allahu Taáala, wau hehulumatio daá lo ngoáamila taulo Yahudi. Maláikati ngota lo Allahu Taáala lopoáhu olio, mohalapu li Tuani monaó mai ode belelio sababu odelo totameto todualio, tio ilahulalio modungohe wolo u malóiya li Tuani olio."

²³ Yi tei Petrus malo loduo olimongolio tilumuwoto u motitihui teto. Lombulio

mola tei Petrus lobongu wau lonaó peé-peéenta woli mongolio. Dengolo lota tapalacaya lonto Yope loduduá olo.

²⁴ Ngohui mola lapataó uito timongolio malei dungga mola ode Kaisarea. Mola teto timongolio maheimaa lei Kornelius wolo mongo ilaatolio wau mongo sahabatilio tamodudula wolio tamaa tiloduwolio.

²⁵ Tou tei Petrus malei dungga, tei Kornelius mota lolutulai olio wau losujudu mola totalulio.

²⁶ Bo tei Petrus lomantu olio tilimihula mola wau loloíya maó, "Pobongulo! Watia lohihilao olo manusia wambaó."

²⁷ Tou donggo hemo bisala wolei Kornelius tei Petrus tilumuwotaó ode delomo bele. Teto tio loóonto ngohuntua tau mahiámbua.

²⁸ Tulusi tio loloíya maó olimongolio, "Mongo wutato lohihilao motota deú taulo Yahudi hedinio lo agamaalio u mobiilohe meaanto mohumbuta wolo tau-tauwalo monto bangusa wewo. Bo Allahu Taáala malo pobilohei ode laatia deú watia diila mowali monganggapu penu boli tatoonu olo najisi meaanto haramu.

²⁹ Uito sababuulio tou ti Tuani lohile alihu watia monaó mai, watia diila okabalatani

Ionaó mai. Oditolio botia ohilaa otaawa maó lowatia yilongola pileínaó mai li Tuani watia."

³⁰ Tei Kornelius lolametaó, "Tolo hui uilalu maó, tanu towakutu debo odelo utie, watia donggo hemoduá tobele jamu tiga lolaango. Debolo talolaí ngota tilimihulai totalu lowatia. Pakeyangi lotau boito heínta-intawa.

³¹ Tio malo loíya, 'Kornelius! Allahu Taáala malo lolimo duámu wau loéelai omuura lohilaamu.

³² Oditolio ahulilo mota tau ode Yope motiangai táilunte Simon Petrus. Tio donggo hanga-hangaata tobele ngotaalio lo tamoolahea walito; bele boito tobiihu deheto.'

³³ Uito sababuulio watia huáa lopoáhu tau mota loloduo mai li Tuani. Wau hilaa li Tuani otutu mopiohe u monaó mai. Botia amiaatia ngoáamila mahiámbua tewe totalu lo Allahu Taáala u modungohe ngoáamila upileí loíya lo Allahu Taáala toli Tuani ode lamiaatia."

³⁴ Lapataó tei Petrus lolóíya maó, "Botia otu-otutuulo maó watia malo ngalati deú Allahu Taáala lohutu mai ngoáamila tau tutuuwauwa.

³⁵ Taa u moohe to Allahu Taáala wau mohutu u otutu, tau boito tolimoo lo Allahu Taáala, diila paduli tio monto bangusa wolo.

³⁶ Mongo wutato malotota tuango habari upilo tunggulai lo Allahu Taáala ode bangusa lo Isiraílu. Habari boito yito pasali lo Habari Mopiohe tomimbihu loú damee lotimbulude li Isa Almasi, deúito-yito Eeya lotaa ngoáamila.

³⁷ Otaawa limongoli wolo u malo toduo to ngoilanggubu lo Yudea, deúito-yito u tumulalo mai lonto Galilea lapataó popolihi upilo nasehati lei Yahya.

³⁸ Otaawa limongoli deú Allahu Taáala malo lulaotaó li Isa taulo Najaret boito wau longohi o-Lio Rohullah wau kawasa. Otaawa limongoli olo deú ti Isa boito malonaó ode tilolahepalo maó helohutu u mopiohe; Tio lopoóluli ngoáamila tau tahe kiluwaasa lo Ibilisi, sababu Allahu Taáala peé-peéenta wo-Lio.

³⁹ Ami botieelo tau-tauwalo tahe loóonto lomato lami lohihilao totoonulalo hitua-tuawua u pilohutu-Lio tolipu taulo Yahudi wau to Yerusalemu. Openu boli odito timongolio lopo salipu wau lomate o-Lio yila-yilatelo maó.

⁴⁰ Bo todulahee otolulio Allahu Taáala luli lopo tumulai lonto opopate wau lopobilohe o-Lio tomanusia;

⁴¹ diila ode ngoámila tau, bo wambaó ode olami tamaa tilulaoto Allahu Taáala leimulo u lowali mongo sakusii-Lio: Ami lolamela wau longilu wo-Lio tou Tio luli tilumumulai.

⁴² Wau Tio lopoáhu olami mopohabari Habari Mopiohe boito ode tau-tauwalo wau mongohi sakusi deú Tiolo tapiluduó Allahu Taáala lowali Butoó totau-tauwalo tadonggo hitumula wau tau-tauwalo tamailate.

⁴³ Ngoámila mongo nabi helo bisala pasali o-Lio. Timongolio loloíya deú ngoámila taa palacaya li Isa, maámbunguwolo dusa limongolio wolo okokawasa li Isa."

⁴⁴ Tou tei Petrus donggo bisabisala, Rohullah lotuhutai wau helo ngawaasa ngoámila tau tahi dungohe habari boito.

⁴⁵ Tau-tauwalo Yahudi tapalacaya li Isa wau heloduduó olei Petrus lonto Yope, ngoáamilalo lolinggolabe olo loóonto Allahu Taáala lopo tuhutai Rohu-Lio ode tau-tauwala bangusa wewo tadiila Yahudi.

⁴⁶ Sababu timongolio loódungohe tau-tauwala boito hipo bisalawa todelomo bahasa u hidala-dalaala wau hemomuji-muji mola odudaá lo Allahu Taáala. Lapataó tei Petrus lolóiya maó,

⁴⁷ "Nte, bilohi, tau-tauwala botie maloó toduo mai Rohullah debo odelo ito. Oditolio tingga mowali tau mongabu-ngabuto olimongolio u lihuwalo wolo taluhu?"

⁴⁸ Yi tei Petrus lopoáhu olimongolio lihuwalo to tangguli Isa Almasi. Lapataó uito timongolio lohile maó alihu tei Petrus motitolaapo ngoolo hui mola woli mongolio.

1 1 ¹ Mongo rasulu wau tau-tauwalo tapalacaya to ngoilanggubu Yudea maloó dungohe deú tau-tauwalo tadiila o agama Yahudi olo malo lolimo tahuda lo Allahu Taáala.

² Lapatio maó tou tei Petrus lonaó mola ode Yerusalemu, tau-tauwalo Yahudi tamalo malacaya boito, helo henteá olei Petrus. Timongolio lolóiya,

³ "Yilongola yió lonaó mota ode bele lotau-tauwalo tadiipo hetuunawa? Yió tumbaó malo lamela olo peé-peéenta woli mongolio!"

⁴ Sababu uito tei Petrus lotombangaó olimongolio ngoáamilalo u malotoduo, tumulalo mai monto bohulio. Tei Petrus lolóiya maó,

⁵ "Watia donggo hemoduá tokota Yope, lapataó watia loóonto tuwaulio lobibilohe. Watia loóonto woluo u hitua-tuawua debo odelo kaingi u motanggalo ngopita tiluhutio mai lonto hulungo, ntaya-ntayanga to opaato tutulio wau lapataó lotipoóoyo totili lowatia.

⁶ Tou watia lopoó tuotaó ode delomio, watia maloóonto bibii-natangiyalo u oáatio wopato, bibii-natangiyalo u hilinggela, bibii-natangiyalo u hiálapa wau bubuu-lungiyalo u hilinggela.

⁷ Lapataó watia loódungohe suala tuwau lotahuda mai ode laatia, 'Ntali bongulo, Petrus! Olotalo uito wau tamelalo!'

⁸ Bo watia lolametaó, 'Diila, Eeya! Diipo peéenta mao watotia lolamela uáalo haramu meaalo najisi.'

⁹ Bo suala boito luli lotahuda mai lonto hulungo, 'Balangi u mapilo ilaalo lo Allahu Taáala halale diila maó tangguli haramu.'

¹⁰ Iloontonga laatia suáli boito tunggula poóotolu wau pulitio maó ngoáamilalo luli leibintaáa mola ode sologa.

¹¹ Lotuhatawa toú boito olo toulota lonto Kaesarea, tailaolio ode laatia, leitungga mai ode bele upilo tihangata laatia.

¹² Lapataó Rohullah malo poáhu olaatia lonaó peé-peéenta woli mongolio louú diilalo lologu. Mongo wutato wolomota botie olo, loduduá olaatia ode Kaisarea wau amiaatia ngoáamila tilumuwoto ode delomo bele lei Kornelius.

¹³ Lapataó tei Kornelius malo hungguli mai olamiaatia woloolo mola tio loóonto malaíkati ngota tihutihula tobelelio wau lotahuda, 'Ahuli maó tau ode Yope mola motiangai talolaí ngota taílunte Simon Petrus.

¹⁴ Tio mamopo tunggulai olemu habari u mopoáahu olemu wau ngaalaámu.'

¹⁵ Wau toú watia malo lumula lobisala odito," odie mola tei Petrus lopo tolona mola lo wunggulilio, "Rohullah dungga-dungga mai odeitaati mongolio, tutuuwauwa debo odelo u malotoduo mai to olanto muloololio mai toú bohulio.

¹⁶ Lapataó watia loóéela mola, Eeya peéenta lotahuda mai, 'Tei Yahya lopoliho wolo taluhu, bo timongoli malihua-Lio wolo Rohullah.'

¹⁷ Oditolio loílaalo mai deú Allahu Taáala longohi olo ode tau-tauwalo tadiila o agama Yahudi boito, wowohi u tutuuwauwa uilohi-Lio mai olanto toú ito palacaya ode Eeya Isa Almasi. Sababu uito, diila pongalo aakali watia modini to Allahu Taáala."

¹⁸ Toú loódungohe uito, timongolio diilalo lobatata. Lapataó timongolio lomuji mola Allahu Taáala. Timongolio loloíya, "Wonu odito tau-tauwalo tadiila Yahudi olo yilohia wakutu lo Allahu Taáala u molilihu monto ngoáamila dusalio wau moólaasa maó tutumulo utuutu!"

¹⁹ Lapataó tei Stepanus pilatelio yila-yilateelo maó, tau-tauwalo tapalacaya li Isa mahe yila-yilapitalio, tilinggula timongolio malo bubuuálawa bolo ode utoonulalo maó. Woluo talolahi demola Penesia, wau woluo olo taa demola Siprus wau Antiokhia. Timongolio helo pohabari Habari lonto Allahu Taáala, bo wambaó ode tau-tauwalo Yahudi.

²⁰ Bo towolota lotau-tauwalo tapalacaya boito, taa asaliilio mai lonto Siprus wau Kirene, woluo olo tau-tauwalo talonaó mola ode Antiokhia, wau helo pohabari

Habari Mopiohe pasali li Isa boito ode tau-tauwalo tadiila o agama Yahudi olo.

²¹ Kawasa lo Eeya woluo toli mongolio tilinggula dadaata talowali palacaya wau helohudu batangalio ode Eeya.

²² Wuwuung-guliyalo pasali lo popoo-loútiyaalo botie demola olo jamaá to Yerusalemu. Yi timongolio malolao mola olei Barnabas ode Antiokhia.

²³ Wau toú tei Barnabas leitungga mola odito, wau loóonto woloolo mola Allahu Taáala lobalakati tau-tauwala boito, tio leengahe daá. Lapataó pilohilelio alihu timongolio tióotutua tatapu wau molotolo hilao modungohe to Eeya wolo lealeaatu lohilaa limongolio.

²⁴ Tei Barnabas botie tamopiohe halelio wau kiluwaasa lo Rohullah wau palacaya daá to Eeya tilinggula ngohuntua talo duduá to Eeya.

²⁵ Lapataó tei Barnabas lonaó ode Tarsus mola lololohe olei Saulus.

²⁶ Toú lodunggaya wolei Saulus, tio lodelo olei Saulus ode Antiokhia wau ngotaunu mola polupolu timongolio helo tiámbu wolo jamaá mola teto sambela helo ngaajali totaa dadaata. To Antiokhia boitolo tau-tauwalo tapalacaya li Isa

ubohu–bohulio iluntelio tau–tauwalo Nasara.

²⁷ Tomaasa boito woluo dengolo lota nabi Ionaó mai lonto Yerusalemu ode Antiokhia.

²⁸ To wolotalio woluo ngotaalio táilunte Agabus. Bolo yiluntula lo Rohullah tio malo nubuwati deú to ngoilanggubu dunia mamei dungga mai polobiti daá. (Wau suáli boito memangi lotoduo olo toú ti Kaisari Klaudius hemo malenta.)

²⁹ Yi ngoáamila tahiduduá li Isa boito malo heeluma u molao mola dembulo ode mongo wutatio tahi biluloáwa to Yudea; ngota–ngota lolao mola u owaliylio.

³⁰ Polo akolowa boito pilonaólio olo, lapataó tei Barnabas wolei Saulus yilaolio mola u lodepita dembulo boito ode mongo taúwa lojamaá.

12 ¹ Membideó lomaasa boito olo ti Olongia Herodes lumula helodeehe popoo–ngawaáalo jamaá.

² To palentaalio, tei Yakobus wutatee Yahya tilimadelio yila–yilateelo maó wolo wamilo.

³ Toú tei Herodes loóonto deú huhutuulio boito loósanangi hilaa lotau–tauwalo Yahudi, tio luli lohutu maó udebo odelo

uito; tio malo poáhu olo talo heúpa olei Petrus. Suáli boito lotoduo to Dulahu Buka Roti Diila Oragi.

⁴Toú mailaúpio mai, tei Petrus pilopo tuwotio ode tutupa. Wopato dusingi suludadu pileí dahalio olei Petrus teto -- motíidu dusingi wopatota suludadu. Lapataó rameyangi lo Paska lopalutaó, deúito tei Herodes mamomutoó olei Petrus totalu lotaa dadaata.

⁵Oditolio tei Petrus tilahangialio to tutupa; bo popoo-ngawaáalo jamaá bolo wambaó hipoduáawa mola wolo tióotutua ode Eeya tolei Petrus.

⁶Tohui toú diipo tei Herodes mamopo taalua olei Petrus ode taa dadaata, tei Petrus lotuluhi tihutihuto wolo dulo titihuto towolota lo suludadu duulota tamoo-kawalia. Tohuhebu lotutupa, tahi pokawalia wewo olo donggo hipodahawa tutupa.

⁷Debolo malaíkati lo Eeya tilimihulaó teto wau tinela tuwau lolinela ode delomo huwali lotutupa boito. Malaíkati boito helo poheu-heulaó olei Petrus tilunggala tio lobongu. Tulusi malaíkati boito lotahuda maó, "Wuu, huáa pobongulo!" To saaátilo

boito malodehu lomola rante wate lonto uluú lei Petrus.

⁸ Lapataó uito malaíkati boito lotahuda maó, "Pomakeyalo mola boómu wau tihutaalo tali lo sapatumu." Yi tei Petrus malo pomake mola boólio wau lolihutaó tali lo sapatulio. Lapataó malaíkati boito luli lotahuda, "Pomakeyalo mola jumbamu wau duduílo mai waú."

⁹ Yi tei Petrus maloduduá malaíkati boito yilumualaó lonto tutupa. Bo tei Petrus diila mongalati deú wolo udonggo hepohutuo lo malaíkati boito yito tuwaulio u tutuulio-tutu ulotoduo mai. To lantobu lei Petrus uito bo tuwaulio lobibilohu.

¹⁰ Toú timongolio mailumaode totambati u hepodahalo bohulio wau oluolio, timongolio malei dungga ode huhebu wate, udulu-dulunga ode kota. Huhebu boito malo huóolo mola lohilaalio, tulusi timongolio yilumualo wau lonaó loli hulupila tuwau. Debolo malaíkati boito malo lolaa maó olei Petrus.

¹¹ De lapataó uito bolo tei Petrus longalati wolo u malo toduo mai to olio, tulusi tio lolóíya, "Botia maílo taawaú deú Eeya otu-otutuulo maó malo poáhu mai malaíkati-Lio u lolopota olaatia lonto

kawasa lei Herodes wau lonto totoonulalo hitua-tuawua u mapohutuo bangusa lo Yahudi ode laatia."

¹²Toú malo ngalati lo owowoluwoa boito, tei Petrus lonaó mota ode bele li Maria, tiilo lei Yahya tailuntelio olo Markusi. Mota teto ngohuntua tahiámbua wau donggo hipoduáawa.

¹³Tei Petrus longokoó huhebu bulemengio, tulusi taabua ngota tamoomayawa táilunte Rode, lonaó mai u lomuó maó.

¹⁴Lato ilonuhelio suala lei Petrus, sababu wengahio, tio ngointa tilumuwotaó poli wau diilalo lomuó mai huhebu, tulusi lopoótaa maó ode tau-tauwala teto deú tei Petrus woluo to bulemengio.

¹⁵"Yió biyongo!" loíya maó limongolio. Boti Rode helo poótoheto deú tio otu-otutuulo maó tei Petrus. Yi timongolio malo loíya, "Uito malaíkatilio!"

¹⁶Toú boito tei Petrus debo tulusi hemongokoó huhebu. Yi toú timongolio lomuó mai huhebu, wau loóonto olei Petrus, timongolio lolinggolabe daá.

¹⁷Tei Petrus longohi isalati wolo uluúlio alihu timongolio motipoóoyo, lapataó tio lohungguli maó woloolo mola Eeya

malodelo olio lopolualai lonto tutupa. Lapataó tio loloíya, "Poótaalo maó utie odelei Yakobus wau tomongo wutato wewo olo." Lapataó uito tei Petrus lololaa maó tambati boito wau lonaó ode tambati wewo.

¹⁸Loombulio mola dimodupo malotoduo mai tolonggalo towolota lo suludadu tamoo-kawalia. Timongolio lologu daá pasali wolo u malo toduo wolei Petrus.

¹⁹Tulusi tei Herodes lopoáhu tau mota mololohei olei Petrus, bo timongolio diila loódungga olio. Oditolio tei Herodes lomalantaó alihu tamoo-kawalia boito pohintuwalo lapataó pateelo mate-mateelo maó. Lapataó uito tei Herodes malonaó lonto Yudea wau mola lotibiluloá ngoolo mola hiheolio to Kaisarea.

²⁰Tei Herodes loingo daá totau-tauwalo Tirus wau Sidon. Masababu uito timongolio peé-peéenta lonaó mai lotaalua wolio. Bohu-buhulio timongolio helomiyo olei Blastus, ta@u ta@utaúwa tobele biluloá saaha li olongia Herodes, tilunggula tio lotiwambaó ode limongolio. Lapataó timongolio mota lotaalua wolei Herodes, tulusi lohile lodaamea, sababu

lipu limongolio bo hemo haalapu uáalo lonto lipu lei Herodes.

²¹ Todulahee tuwau u matilantu ma@o, tei Herodes lomake boó lo odudaálio wau lotihuloá tokadera lo bele biluloá saaha li onlongia wau lolumula lopidato totalu lo ulipu.

²² Ulipu tadonggo hidungohe boito hiwuwa–wuwaatiá, "Utie suala lodewa, diila suala lomanusia!"

²³ Tou boitolo malaíkati lo Eeya lolambali olei Herodes, sababu tio diila mohulumati Allahu Taáala. Tei Herodes iliilaa loluwanti tulusi yilate.

²⁴ Yi tahuda lo Allahu Taáala malebe hemo lolade mola wau lebe hemo totohetaó.

²⁵ Lapataó tei Barnabas wolei Saulus lopoó lapato kalaja limongolio, timongolio luli lohualinga lonto Yerusalemu wolo lodelo olei Yahya Markusi peé–peéenta woli mongolio.

13 ¹ Todelomo jamaá to Antiokhia woluo mongo nabi wau guguu–ruwaalo, deúito–yito tei Barnabas, Simon tatiloli Tei Moito, tei Lukius lonto Kirene, tei Menahemi táilu damanga mola

peé-peéenta woli Olongia Herodes, wau tei Saulus.

² Toú timongolio donggo hemotabia to Bele lo Eeya wau hemopuasa, Rohullah lotahuda olimongolio, "Tulaotalo tei Barnabas wolei Saulus tolomodu bo ode ola-Ú, alihu timongolio mokalaja maó kalaja uma tilantu-Ú olimongolio."

³ Lapataó lopuasa wau loduá mola timongolio lopodutu uluí mongolio toitaato lei Barnabas wolei Saulus tulusi longutolio olimongolio duulota.

⁴ Sababu ilutolia lo Rohullah, tei Barnabas wolei Saulus lomonggata mola ode Seleukia. Mola lonteeto timongolio lobite ode pulo Siprus.

⁵ Toú leidungga mola ode Salamis, timongolio helo pohabari tahuda lo Allahu Taála to bebee-leyaalo potabiaala lo Yahudi. Tei Yahya Markusi lomantu olimongolio tononaó limongolio.

⁶ Ngoáamila pulo boito yilontale limongolio demola Papos. Mola teto timongolio lodunggaya wolo taulo Yahudi ngota, taílunte Bar Isa. Tio tamoo-sihiria helongaku batangalio nabi.

⁷ Tei Sergius Paulus, gubolonulu lopulo boito yito sahabati modudulo lo tamoo-

sihiria boito. Ti Gubolonulu boito yito ngotaalio lo tamotoloó wau molinepo. Tio lotiangai olei Barnabas wolei Saulus, sababu tio motohilaa modungohe tahuda lo Allahu Taáala.

⁸ Bo tei Barnabas wolei Saulus hetilehengi lei Elimas ahali losihiri boito, sababu tei Elimas, (uitolo tanggulio tobahasa lo Yunani) helo tolopani alihu ti gubolonulu boito diila bolo palacaya li Isa.

⁹ Bo tei Saulus -- tailuntelio olo Paulus -- kiluwaasa lo Rohullah, tilinggula tio lolontongo taáahali losihiri boito,

¹⁰ Iapataó loloíya maó, "Wuu tamoo-himbuloa tutu, walaó jahanama! Yió musu lo totoonulalo umopiohe. Yilongola yió diila mohuheli mongantulu patuju lo Allahu Taáala u mopoáahu manusia?

¹¹ Botia bilohi, Eeya mamu hukuumanu mai olemu! Yió mamowali pitoó tunggula yió diilalo mowali moóonto tinelo mato lodulahu toú ngopeé waktu mola." Tosaátulo boito tei Elimas maloólaasa woluo wambulo moitomo lolaúbei matolio, tilunggula tio bolo oáapaó-oáapaó monaó hemo lolohe tamo dedeá olio.

¹² Toú ti gubolonulu boito loóonto maó wolo u malotoduo mai, tio palacaya li Isa;

sababu tio lolinggolabe daá tomimbihu pongaajali lo Eeya.

¹³ Lonto Papos, tei Paulus wau mongo sahabatilio lobite ode Perga to Pampilia. Mota teto tei Yahya Markusi lololaa maó olimongolio, tulusi luli lohualinga ode Yerusalemu.

¹⁴ Lonto Perga, timongolio lopo tolona mola lononaó limongolio ode Antiokhia to Pisidia, lapataó todulahu Saabati timongolio mota lotihuloá tobele potabiaalo.

¹⁵ Lapataó Buku lei Musa wau Buku lomongo nabi pilobacalio maó, mongo taúwa lobele potabiaalo boito lopoáhu taa lohintu olei Paulus wolo mongo sahabatilio, "Mongo wutato, wonu mongo wutato bolo o naseehati hitua-tuawua ode tau-tauwalo botie, yi toduwolo umopo tunggulaó naseehati boito."

¹⁶ Tei Paulus matilimihula mola, tulusi longohi maó isalati lo uluúlio, lapataó lolóiya, "Mongo wutato bangusa lo Isiráilu wau ngoáamila mongo wutato wewolio tewe tamo dunohe to Allahu Taáala! Nte dungohi mai watia:

¹⁷ Allahu Taáala lobangusa Isiráilu malo lulaoto linene moyaanto, wau

lohutu mai bangusa botie bangusa udaá toú timongolio hibiluloáwa to Masiri debo odelo tau deli. Lapataó wolo kawasa uleidaá lo Allahu Taáala lodelo olimongolio yilumualo lonto Masiri.

¹⁸Tio sabari topíili wau huhutu limongolio tohuta datahu u luasi daá wau delita wopato pulu lotaunu mola hiheolio.

¹⁹Pitu bangusa hebilinasaa–Lio tolipu lo Kanaán u lolaya–layadeó lipu boito ode bangusa lo Isiraílu alihu lipu boito mowali haku limongolio.

²⁰Ngoáamilalo boito pohupohutu ngotilonggadu wopato hetuto limo lopulu lotaunu mola hiheolio. Lapataó lolaya–layadeó lipu lo Kanaán boito, Allahu Taáala malongohi olimongolio mongo hakimu. Hakimu pulitio yito Nabi Semuel.

²¹Lapataó timongolio malohile onlongia ngota. Allahu Taáala longohi olimongolio olei Saulu walaée Kisi lonto suku bangusa Benyamini lowali onlongia limongolio wopato pulu lotaunu mola hiheolio.

²²Lapataó Allahu Taáala lopohinggi olio lonto huhuloálio, Allahu Taáala malo muduá poli olei Dauda lowali onlongia limongolio. Wau utieelo upilo tahuda lo

Allahu Taáala pasali olei Dauda, 'Wau maloó dungga olei Dauda Walaée Isai boito ngotaalio lo tamoó sanangi hilaa-Ú. Tiolo taa mamohutu u otohilaa-Ú.'

²³ Lonto wali mola lei Dauda boitolo Allahu Taáala lopohetu ode Bangusa lo Isiraïlu ngotaalio Olongia Tamoo-poáahua, debo odelo umaa pilodanti-Lio mai. Wau ti Isa boitolo Olongia Tamoo-poáahua boito.

²⁴ Tou ti Isa diipo lolumula loponao tuugasi-Lio, tei Yahya malo pongiibode ode tau-tauwalo Isiraïlu alihu timongolio molilihu monto dusa limongolio wau méilihu.

²⁵ Wau tou mamembideó mopulito kalajaalio, tei Yahya loloíya ode tau-tauwalo, 'Tatoonu watia botie moduduá huhama limongoli? Watia diila taa u heimaa limongoli. Poótoloma maó, Tau boito mamei dungga mai mobuulota wolaatia; u monguádeó tali lo sapatu-Lio olo watia diila paatuti.'

²⁶ Mongo wutato wali mai lei Abraham, wau ngoáamila Mongo wutato tawewolio tewe tamo dungohe to Allahu Taáala! Allahu Taáala malolao mai ode olanto habari u mopoáahu boito;

²⁷ Sababu tahi biluloáwa to Yerusalemu wau mongo taúwa limongolio diila mongalati deú Tiolo tamoo-poáhua boito. Timongolio diila mongalati pongaajali lomongo nabi u hepo bacaalio timíidu Saabati, tilinggula timongolio malo hukuumaní li Isa. Bo tumbaó wolo helohutu u odito boito timongolio maloó sababu deú wolo upilo nubuwati lomongo nabi boito lotoduo mai.

²⁸ Eleponu timongolio diila loódungga u hitua-tuawua olo to o-Lio upaatuti pohukuu-maniyalo o-Lio lo hukuumaní mate, bo timongolio lohile maó olei Pilatus alihu Tio pateelo mate-mateelo maó.

²⁹ Wau lapataó timongolio yilapato loponaó ngoáamilalo u malei tuladu todelomo Kitabi pasali o-Lio, timongolio lopo tuhutai milate-Lio lonto ayu salipu, tulusi lopobalata o-Lio todelomo kuubulu.

³⁰ Bo Allahu Taáala luli lopo tumulai o-Lio lonto opopate.

³¹ Lapataó oduduu-laheelio mola hiheolio Tio helonaó mai lopobilohe batanga totau-tauwalo talonaó mai wo-Lio lonto Galilea ode Yerusalemu. Timongolio boitolo tamasaatia lowali mongo sakusii-Lio ode bangusa lo Isiráilu.

³² Oditolio, masaatia botie ami mopo tunggulai Habari Mopiohe boito olemu: Wolo u mapilo dantia lo Allahu Taáala odeli nene moyaanto,

³³ uito mapilohutu-Lio olanto loú luli lopo tumulai li Isa lonto opopate. Sababu todelomo Jaburu oluolio woluo tulatulade odie, 'Yióolo Walaúu-Ú, todulahee botie Waú malowali ti Paapa-Mu.'

³⁴ Allahu Taáala maluli lopo tumulai o-Lio lonto opopate. Botia Tio diilalo tamoólasa opopate todelomo kuubulu. Pasali losuáli boito Allahu Taáala lotahuda, 'Waú mamongohi mai Ole-Mu danti mantali u tantu maéelalo, umaa pilodanti-Ú odelei Dauda.'

³⁵ Odito olo todelomo ayati wewo loí-loíya, 'Yió diila tamopoluli Wato-Mu taa tatapu wau molotolo hilao boito mohutodu todelomo kuubulu.'

³⁶ Tei Dauda mailate wau yilobungio olo peé-peéenta wolinenemoyaalio, lapataó tio lohutu maó wolo u pileíhutu lo Allahu Taáala olio. Milate lei Dauda olo malo aantulu ngoáamilalo.

³⁷ Boti Isa, taluli pilopo tumulai lo Allahu Taáala lonto opopate, ti Isa boito diila loáantulu sama-samaata.

³⁸ Sababu uito Mongo wutato, wajibulio otaawa maó limongoli deú motimbulude li Isa botieelo habari pasali loú ponga–mbungualo dusa pilopo habari de olemu; wajibu otaawa maó limongoli deú timiídu taa palacaya o–Lio, lopato–Lio monto totoonulalo dusa udiila mowali lulutolo motimbulude to papaa–lentawalo Allahu Taáala upilopo tunggulai lei Musa.

³⁹ (13:38)

⁴⁰ Uito sababuulio timongoli musi mopoó tuoto mopio–piohulo maó, alihu diila bolo motoduo mai ode limongoli wolo uiloíya lomongo nabi odie mola,

⁴¹ 'Poótuota maó tióotutua, wuu timongoli tau–tauwalo taóhilaa mohina! Timongoli mamó linggolabe, tulusi mate! Sababu tojamani botie Waú donggo hemohutu mai hitua–tuawua u timongoli lohihilao diila tamo malacaya maó, eleponu woluo tamo tombangai uito olimongoli.'"

⁴² Touí tei Paulus wolei Barnabas lololaa maó bele potabiaalo boito, tau–tauwalo tobele potabiaala boito lohile olimongolio muli mohualingai todulahu Saabati talutalu mai, u lebe motombango wumbutio mola pasali lo susuu–aliyaalo boito.

⁴³ Lapataó tau-tauwala boito yilumualaó lonto bele potabiaala boito, tei Paulus wolei Barnabas tilunuhe lotaa dadaata taulo Yahudi wau bangusa wewo tamaa tilumuwoto agama lo Yahudi. Yi mongo rasulu boito lonaseehati maó olimongolio alihu timongolio tulusi motiwunela to odehu hilaó lo Allahu Taáala.

⁴⁴ Todulahu Saabati wumbutio mola, ngopeé ngoáamila tau tokota boito lonaó mai lodungohe tahuda lo Eeya.

⁴⁵ Touú tau-tauwalo Yahudi loóonto taa dadaata boito, timongolio lohiihia daá. Timongolio malohina olei Paulus wau helo tehengi ngoáamila uiloíyaalio.

⁴⁶ Tumbaó bo lebe buheli tei Paulus wolei Barnabas helo bisala loú juujulu. Timongolio loloíya, "Tahuda lo Allahu Taáala memangi wajibu potunggulopo ode limongoli. Bo sababu timongoli diila mohuto mololimo uito, timongoli malolantu lohihilao deú timongoli diila paatuti mololimo tutumulo utuutu wau ohiheo-hiheolo maó. Wau botia ami mamololaa maó olimongoli wau monaó ode bangusa wewo.

⁴⁷ Sababu utieelo palenta mai lo Eeya olami; Eeya lotahuda, 'Waú malolantu mai

olimongoli lowali tinela tuwau ode tau-tauwalo bangusa wewo tadiila bangusa lo Yahudi, alihu timongoli mopotoduo mai osalaamati ode ngoilanggubu dunia."

⁴⁸Towakutu tau-tauwalo bangusa wewo tadiila Yahudi loódungohe uito, timongolio leengahe daá, lapataó helomuji-muji tahuda lo Eeya. Wau tau-tauwalo tamaa tilantu mai lo Allahu Taáala u moótapu tutumula utuutu wau ohiheo-hiheolo maó, tau-tauwala boito palacaya.

⁴⁹Tahuda lo Eeya olo malo loladulo mola ode utoonulalo maó to ngoilanggubu madala boito.

⁵⁰Bo taduduulaá lokota boito wau mongobua lonto kaumu lotau-tauwalo talailaió tamoohe to Allahu Taáala, mapilopatu lotau-tauwalo Yahudi. Timongolio helo potoodei polomuusua tolei Paulus wolei Barnabas, wau lopolahi olimongolio duulota lonto madala boito.

⁵¹Yi mongo rasulu boito malo polotaáa peahuó to oáati mongolio totalu lotaa dadaata boito odelo poéela, lapataó malonaó ode Ikonium.

⁵²Tahiduduá to Antiokhia leengahe daá wau kiluwaasa mai lo Rohullah.

14¹ Tei Paulus wolei Barnabas loótoduo mai suáli u tutuuwauwa to Ikonium. Timongolio lonaó mota olo ode bele potabiaalo taulo Yahudi wau helo bisala teto odito rupalio tilunggula ngohuntua taulo Yahudi wau taa diila Yahudi lowali palacaya li Isa.

² Bo tau-tauwalo Yahudi tadiila mohuto palacaya, helo popatu totau-tauwalo tadiila Yahudi, tilunggula timongolio malo lonuó totau-tauwalo tapalacaya li Isa.

³ Sababu uito tei Paulus wolei Barnabas lotibiluloá lohiheo teto. Wau wolo buheli timongolio helo bisala pasali ponu lo Eeya. Yi Eeya olo lopobukuti mai deú habari limongolio pasali loponu-Lio boito otutu; Tio lohudu mai olimongoli okawasa u mohutu totoonulalo u moólinggolabe wau susuu-aliyaalo upolu-polutuó.

⁴ Bo ulipu lokota boito malo hulinggila ngota timongota; woluo talo tiwambaó wolo taulo Yahudi wau woluo talo tiwambaó wolo mongo rasulu boito.

⁵ Lapataó tau-tauwalo Yahudi wolo mongo taúwalio peé-peéenta wolo tadiila Yahudi malo heehea lopusikisa wau lolembái mongo rasulu boito wolo botu.

⁶ Bo mongo rasulu boito malo ngalati lo owowoluwoa boito, lapataó lolahi mola ode Listra wau Derbe, deúito-yito kokoo-tawaalo to Likaonia, wau ode madala topalitio.

⁷ Mola teto timongolio luli lopohabari Habari Mopiohe boito.

⁸ To Listra woluo talolaí ngota u oáatio didu mowali monaó anggadu pilotutulio mai, tilunggula tio diila peéenta maó loówali lonaó, sababu oáatio molulupuhe daá.

⁹ Tau boito hulohuloáa mola teto modungohe olei Paulus hemobisala. Tei Paulus loóonto deú tau boito palacaya wau sababu uito tio lowali piloó luliilio. Yi tei Paulus lomiloheó olio,

¹⁰ wau wolo suala daá tei Paulus lolóiya maó, "Tihuloolo mola motulidu!" Tau boito tilumayango tilimihulo tulusi lonaó.

¹¹ Tou taa ngohuntua boito loóonto maó wolo u pilohutu lei Paulus, timongolio malo nguatió todelomo bahasa Likaonia, "Dedeewaalo malo tuhutai ode dunia wolo batanga lomanusia."

¹² Lapataó tei Barnabas ilunte limongolio Jeus, wau tei Paulus ilunte limongolio Hermes, sababu tio-tiolo tahelo bisala.

¹³ Ti limamu Dewa Jeus, u kuiliilio woluo totalu lokota, lonaó mai lodelo sasaa-piyaalo ulái wau bubuu-ngawaalo ode huhebu hulubangi lokota. Tio motohilaa moduduá wolo taa dadaata boito u mopodewo bake ode mongo rasulu boito.

¹⁴ Toú tei Barnabas wolei Paulus loódungohe wolo utohilaa lotaa dadaata boito, timongolio malongai-ngaidinga boó limongolio sambela hiteteá ode huungo lotaa dadaata boito, lapataó longuatió,

¹⁵ "Wuu, yilongola timongoli helohutu utie? Ami botie manusia olo debo odelo Wutato! Ami meeteea mai mopohabari Habari Mopiohe ode limongoli alihu timongoli mololaa maó susuu-aliyaalo udiila ohuna botie wau monaó mai ode Allahu Taáala tatumu-tumulo, talo powali hulungo wau dunia wau deheto boli ngoáamila uwoluo todelomio.

¹⁶ Tomaasa uilalu mola Allahu Taáala helo poluli babaa-ngusawalo hitumula loduduá utohilaa limongolio ngota-ngota.

¹⁷ Bo diila ilolipata-Lio longohi mai bubuu-kutiyaalo pasali lobatanga-Lio, deúito-yito loú lohutu umopiohu. Tio lopo tuhutai didi olemu lonto hulungo wau

tilapulo huta to sembolio. Tio longohi mai uáalo olemu wau lopusanangi hilaamu."

¹⁸Bo penu boli wolo tataa-heyaaalo boito donggo mototola olo ode mongo rasulu boito molanggu totau-tauwala boito mopodewo bake ode limongolio.

¹⁹Dengolo lota taulo Yahudi talonaó mai ode Listra lonto Antiokhia to Pisidia wau lonto Ikonium helo heingo taa dadaata boito lotiwambaó ode limongolio. Timongolio lolembái olei Paulus wolo botu, lapataó lodedeá olio ode bulemengo kota. To lantobi mongolio tio mailate,

²⁰bo tou tau-tauwalo tapalacaya teto tilimihulaó topalitia, tio lobongu mola wau luli tilumuwoto mota ode kota. Loombulio mola tio lomonggato ode Derbe peé-peéenta wolei Barnabas.

²¹To Derbe, tei Paulus wolei Barnabas helo pohabari Habari Mopiohe boito wau ngohuntua talowali palacaya li Isa. Lapataó uito timongolio luli lohualinga ode Listra, tulusi ode Ikonium, tulusi ode Antiokhia to Pisidia.

²²To kokoo-tawaalo boito timongolio helo poólotolo hilaa lo tahiduduá li Isa wau helo nasehati to tahiduduá boito alihu debo palacaya li Isa. "Ito wajibu

meimulopo modutolo dadaata deúyito ito mamoo' toduo mai usanangi tutu to Dunia Bohu lo Allahu Taáala," odieelo mola mongo rasulu boito helo ngaajali to tahiduduá li Isa to kokoo-tawaalo boito.

²³Wau totimiídu jamaá, tei Paulus wolei Barnabas helomuduó mongo taúwa ode jajaa-maáalo boito. Lapataó wolo duá wau puasa, timongolio helohudu mola mongo taúwa boito ode Eeya tahe palacayawa limongolio boito.

²⁴Lapataó uito tei Paulus wolei Barnabas lopo tolonga mola lononaó limongolio lolibaya tomadala lo Pisidia wau demola Pampilia.

²⁵Wau lapataó timongolio helo pohabari tahuda lo Allahu Taáala to Perga, timongolio malonaó ode Atalia.

²⁶Lonteeto timongolio luli lobite ode Antiokhia. Ui-uitolo kota tambati u muloololio mai timongolio yiludulio ode odehu hilaa lo Allahu Taáala, alihu timongolio mohutu maó kalaja u botia mapiloó lapato limongolio.

²⁷Toú leidungga mola ode Antiokhia, timongolio malongambu mai tau-tauwala lonto jamaá boito, tulusi lohungguli maó olimongolio wolo u mapilohutu lo

Allahu Taáala lotimbuludei olimongolio. Timongolio lohungguli maó olo pasali woloolo mola Allahu Taáala malomuó dalalo alihu tau–tauwalo tadiila Yahudi palacaya li Isa.

²⁸ Tokota boito tei Paulus wolei Barnabas lotibiluloá lohiheo wolo tau–tauwalo tapalacaya.

15 ¹ Dengolo lota talonto Yudea lonaó mai ode Antiokhia wau helo ngaajali tau–tauwalo tapalacaya to Antiokhia boito deú wonu timongolio diila tunaalo moduduá butoée Musa, timongolio diila mowali moaahu.

² Tei Paulus wolei Barnabas helo tehengi daá huhama lotau–tauwala boito. Pulitio tilantulio maó alihu tei Paulus wolei Barnabas wolo dengolo lota wewolio lonto Antiokhia lonaó ode Yerusalemu mola mobisala suáli boito wolo mongo rasulu wau mongo taúwa mola teto.

³ Jamaá to Antiokhia lodepita olimongolio demota bulemengo kota, lapataó timongolio lonaó loli Penesia wau Samaria. Mola teto timongolio lohungguli maó woloolo mola tau–tauwalo tadiila Yahudi malohudu batanga limongolio ode Allahu

Taáala. Habari boito helo eengahe daá totau-tauwalo tapalacaya mota teto.

⁴ Touú timongolio leidungga mola ode Yerusalemu, timongolio tilolimolio loú mopiohe lojamaá, wau lomongo rasulu wolo mongo taúwa. Tulusi timongolio lohungguli maó ode tau-tauwala boito pasali loú ngoáamilalo umaa pilohutu lo Allahu Taáala lotimbuludei olimongolio.

⁵ Bo dengolo lota talonto kaumu lo Parisi tamaa pilalacaya, tilimihula mola wau lolóiya, "Tau-tauwala bangusa wewo tamaa pilaracaya boito wajibu tunaalo wau wajibu olo moduduá butoée Musa."

⁶ Lapataó mongo rasulu wau mongo taúwa malo tiámbu u lobiisalawa suáli boito.

⁷ Lohiheo daá timongolio tutuuloá lo pikiilangi. Pulitio tei Petrus matilimihulo wau lolóiya, "Mongo wutato! Otaawa limongoli lohihilao deú dengolo waktu mola uilalu maó Allahu Taáala malo lulaotai olaú to wolotamu u mopohabari Habari Mopiohe boito totau-tauwalo tadiila Yahudi, alihu timongolio olo modungohe wau momalacaya.

⁸ Wau Allahu Taáala tamotota hilaa lomanusia malo pobilohei deú Tio lololimo

olimongolio; Tio lopo bilohei suáli boito wolo longohi olimongolio Rohullah tutuuwauwa odelo u mailohi-Lio mai olanto olo.

⁹Allahu Taáala diila lopo hihiihede olanto woli mongolio. Allahu Taáala lopo mantali hilaa limongolio sababu timongolio palacaya.

¹⁰Naa, wolo sababuulio timongoli botia motohilaa moluwali to Allahu Taáala wolo longohi tuwaulio uwajibu mobuheeto to tahiduduá botie, lebe-lebe pomaó tinenemoyaanto wau penu boli ito lohihilao diila mambo mohutu maó uito?

¹¹Boliío maó, ito palacaya wau ito piloáahu sababu lodehu hilaa li Isa Eeya; odito olo timongolio."

¹²Yi malei poóoyolo mola ngoáamila tahiámbua teto. Lapataó timongolio malo dungehe olei Barnabas wolei Paulus luli lohungguli maó ngoáamila u moólinggolabe wau susuu-aliyaalo upolu-polutuó u mapilohutu lo Allahu Taáala lotimbuludei olimongolio towolota lotau-tauwalo bangusa wewo tadiila Yahudi.

¹³ Toú timongolio yilapato lobisala, tei Yakobus loló'ya, "Mongo wutato! Nte dungohi mai watia.

¹⁴ Tei Simon boheli lotombangai woloolo mola Allahu Taáala toú bohulio helo poótuoto totau-tauwalo tadiila Yahudi, wolo makusudu molulaotaó towolota limongolio tau-tauwalo wewo tamaa mowali umati-Lio.

¹⁵ Uito lotuuúde loú mapilo nubuwati mai lomongo nabi. Sababu woluo tulatuladu odie mola,

¹⁶ 'Lapataó uito Waú mamuli meidungga mai,' tahuda lo Eeya, 'Waú mamuli momongu bele lei Dauda u malo lohubu, wau mopoó pioheó tuodio, lapataó muli mopotihula mola;

¹⁷ alihu ngoáamila taa donggo ilolabita boito mololohe Eeya, peé-peéenta wolo ngoáamila bangusa wewo tadiila Yahudi tamaa tiliangu-Ú u lowali miliki-Ú.' Odi-odieelo mola tahuda lo Eeya,

¹⁸ tamaa lopoótaa mai suáli boito anggadu muloololio mai."

¹⁹ "Oditolio moduduó huhama lowatia," ualei Yakobus, "ito diila mowali moposuusa tau-tauwalo tadiila Yahudi

boito tamohudu batanga ode Allahu Taáala.

²⁰ Bo ito musí moluladee mota tuladu ode limongolio wau monaseehati alihu timongolio diila molamela uáalo najisi u mapilo dewo limongolio ode balaahala, meaambo molamela tapu lo binatangí uilate tilingoló, meaambo molamela duhu! Wau olo alihu timongolio mopo halahu batanga monto totoonulalo huhutu u huloto.

²¹ Sababu butoée Musa maa anggadu muloololio mai hepilo bacalio totimíidu dulahu Saabati to bebee-leyaalo potabiaalo, wau hepilo habari to ngoáámila kota."

²² Mongo rasulu wau mongo taúwa, peé-peéenta wolo ngoáamila pongawaá lojamaá boito lolantu u molulaoto dengolo lota towolota limongolio tamaa utoliyalo ode Antiokhia peé-peéenta wolei Paulus wau Barnabas. Yi timongolio malo lulaotaó olei Silas wolei Yudas taílunte olo Barsabas Taduulota botie yito tahimuloa lo ulipu towolota lotau-tauwalo tapalacaya to Yerusalemu.

²³ Peé-peéenta wolo mongo utolia boito timongolio lolao olo tuladu ngopita u

tingohio odie mola, "Ode ngoáamila mongo wutato taa asaliilio mai lonto babaa-ngusawalo wewo tadiila Yahudi, tahi biluloáwa to Antiokhia, Siria wau Kilikia. Salamu monto olami, mongo rasulu wau mongo taúwa, deúito-yito mongo wutatumu.

²⁴ Ilodungohe lami woluo dengolo lota towolota lami tamaa lonaó mola ode limongoli wau lopo tolonggalo wau lopolingu olimongoli wolo popoo-ngajaliyalo limongolio. Lebe-lebe pomaó ami diila lopoáhu mola olimongolio lohutu suáli boito.

²⁵ Uitolo sababuulio ami malo dulohupa wau ngoáamilalo akolo u mamu lulaotaó dengolo lota wau molao mola olimongolio ode olemu. Timongolio mamonaó peé-peéenta wolo Wutato Barnabas wolei Paulus taótoliángo lami.

²⁶ Taduulota botie yito tamaa lohudu nyawa limongolio sababu Eeyanto Isa Almasi.

²⁷ Oditolio, ami molao mola olei Yudas wolei Silas ode Mongo wutato. Timongoliolo tamaa mopo tunggula lohihilao wolo loíya ode limongoli habari u tulatuladee todelomo tuladee botie olo.

²⁸ Rohullah maáakolo -- wau ami olo akoro -- alihu timongoli diila maó wohialio totoonulalo u wawaa-jibuwaalo ulebe mobuheeto wolo u wawaa-jibuwaalo u palaluwola botie wambaó:

²⁹ diila maó polamela uáalo umaa pilodewo ode balaahala; diila maó polamela duhu, diila maó polamela tapu lo binatangi uilate tilingoloó, wau pohalaheó monto huhuu-hutuwaalo u huloto. Wonu timongoli mopohalahu batanga monto susuu-aliyaala boito, timongoli malohutu u mopiohe. Bo oditopo, pohileaala duá moáahu!"

³⁰ Lapataó losalaamua maó, timongolio tailaolio boito lomonggato ode Antiokhia. Mola teto timongolio loloduo ngoáamila pongawáa lo jamaá lotiámbu lapataó lopobaca maó tuladee boito.

³¹ Tou popoo-ngawaalo jamaá boito lobaca tuladee boito, timongolio silanangi daá tuango tuladu boito uloó liyango hilaa limongolio.

³² Tei Yudas wolei Silas, deúito-yito nabi olo, lohiheo hipo bisalawa wolo mongo wutato tapalacaya to Antiokhia boito, helongohi maó sumangati wau obobuheli olimongolio.

³³ Lapataó tei Yudas wolei Silas lotibiluloá mola teto dengolo mola hiheolio, tau-tauwalo tapalacaya to Antiokhia boito luli lolao olimongolio wau lopoáhu olimongolio lopo tunggulaó salamu ode tau-tauwala talolao mai olimongolio.

³⁴ [Bo tei Silas lolantu maó u debo lotibiluloá to Antiokhia.]

³⁵ Tei Paulus wolei Barnabas olo lotibiluloá dengolo mola hiheolio to Antiokhia. Mola teto timongolio helo ngaajali wau lopohabari tahuda lo Eeya peé-peéenta wolo taa dadaata wewolio.

³⁶ Diila lohiheo lapatio maó tei Paulus loloiya odelei Barnabas, "Duloolo ito muli momilohe mongo wutato tapalacaya li Isa to ngoáamila kota toutoonuu umapilo habariyanto maó tahuda lo Eeya; alihu ito moóonto woloolo mola owowoluwoa limongolio."

³⁷ Tei Barnabas ohilaa modelo olei Yahya Markusi,

³⁸ bo tei Paulus molaasa diila mopiohe modelo olei Markusi, tadiila mohuto mokalaja peé-peéenta woli mongolio wau malo lolaa maó olimongolio to Pampilia.

³⁹ Yi tei Paulus wolei Barnabas malo hahaamawa daá tilinggula pulitio

timongolio lobuuála: tei Barnabas malohama olei Markusi wau lobite wolio ode Siprus.

⁴⁰Tei Paulus lolulaoto olei Silas tulusi lomonggato wolio lapatio maó mongo wutato tato Antiokhia boito lohudu olimongolio ode odehu hilaa lo Eeya.

⁴¹Timongolio olo lomalita Siria wau Kilikia; mola teto timongolio helo poólotolo hilaa lo jajaa–maáalo.

16¹Tei Paulus lopo tolonga mola lononaólio ode Derbe, lapataó ode Listra. Mota teto woluo talolaí ngota, muri li Isa tanggulio Timotius. Tiilolio Yahudi ngota, tamalo malacaya li Isa; bo tiyamolio tauo Yunani.

²Towolota lotau–tauwalo tapalacaya tahi biluloáwa to Listra wau Ikonium, tei Timotius otaawa lotaa dadaata odelo taa mopiohe.

³Tei Paulus motohilaa alihu tei Timotius moduduá wolio; sababu uito tio loluuna olei Timotius. Tio lohutu uito, sababu tau–tauwalo Yahudi to madala boito ngoáamila motota deú tiyamo lei Timotius ngotaalio lo Yunani.

⁴Totimiídu kota unilaó limongolio, timongolio helo potunggulaó ode

tau-tauwalo tapalacaya to pupuu-tusaniyalo u matilantu lomongo rasulu wau mongo taúwa to Yerusalemu.

Timongolio helo naseehati tomongo wutato tamalo malacaya boito alihu moduduá wuwuu-uduwaalo boito.

⁵ Yi jajaa-maáalo boito iloduhenga mola lotolo iimanilio, wau timíidu dulahu héilo duhenga mola jumulaalio.

⁶ Rohullah diila longohi olei Paulus wolei Silas mopo loladu tahuda lo Allahu Taáala to polopinsi lo Asia. Oditolio nonaó limongolio pilopo tolona mola limongolio ode madala lo Prigia wau Galatia.

⁷ Touú leidungga mola, ode sipatana lo Misia, timongolio mohimontala tumuwoto ode polopinsi lo Bitinia, bo Rohu li Isa lodini olimongolio odito mola.

⁸ Oditolio timongolio lolaapata to Misia wau tulusi ode Troas.

⁹ Huilio maó, to Troas, tei Paulus loóonto tuwaulio lobibilohu. Todelomo bibilohio boito tio loóonto taulo Makedonia ngota tihutihula totalulio sambela hemohile lou tióotutua alihu tio monaó ode Makedonia mola motulungi olimongolio.

¹⁰ Lapataó tei Paulus loótoduo mai bibilohe boito, ami lato lotidapa-dapato u

Ionaó mola ode Makedonia. Sababu wolo yakini ami lolantu maó deú Allahu Taáala malo poáhu olami mopohabari Habari Mopiohe boito ode tau-tauwala mola teto.

¹¹ Ami lololaa maó Troas wau lobite tulusi ode Samotrake, wau loombulio mola ode Neapolis.

¹² Lonteeto ami ode Pilipi, kota tuwau tobohulo madala Makedonia. Pilipi yito kiluwaasa bele biluloá saaha li olongia lo Roma. Mola teto ami lotibiluloá dengolo hui mola.

¹³ Todulahu Saabati ami Ionaó mota ode biihu dutula to bulemengo huhebu hulubangi lokota, sababu to pongolaasa lami teto woluo tambati potabiaalo duólo taulo Yahudi. Lapataó ami malo tihuloó wau lobibii-salawa wolo mongobua tahi ambua totambati boito.

¹⁴ Ngotaalio limongolio yito tamoo-dahangia kaingi lailoumu, táilunte Lidia wau asaliilio mai lonto Tiatira. Tio motoliángo to Allahu Taáala, yi Eeya malo ngoliyoó hilaalio alihu tio mololimo wolo upilo ngaajali lei Paulus olio.

¹⁵ Ti Lidia wau ngotuango belelio yiluhualio. Lapataó yilihualio tio loloduó olami. Ualio maó, "Wonu Mongo wutato

molaasa u watia otu-otutuulo maó malo malacaya li Isa, toduwolo motihangata tobele lowatia." Tulusi tio helo huntula alihu ami moduduó hihilelio.

¹⁶Todulahee tuwau touú ami donggo hinaówa ode tambati poduáalo, ami lodunggaya wolo taabua ngota; tio wato. Taabua boito kiluwaasa lorohu u moleeto umoó laamali popoo-loútiyalo umamei dungga mai. Wolo topo laamalia paladu lotau, taabua boito hemoó paéeda daá odeli mongo tuanilio.

¹⁷Taabua boito loduduá tulusi wambaó olei Paulus wau wolami sambela wuwa-wuwaatiá, "Tau-tauwala botie wato lo Allahu Taáala Taa Laba-labaalo molaió! Timongolio lonaó mai mopoótaa to Mongo wutato woloolo mola pohuliilio timongoli mowali moáahu!"

¹⁸Dengolo hui mola hiheolio taabua boito mololaalaita hemo nguatiá odito. Oditolio tei Paulus madiilalo loósabari, tilunggula tio maloili, tulusi lolóiya maó ode rohu boito, "To tangguli Isa Almasi waú momalenta olemu polahilo monto taabua botie!" Touú boitolo olo rohu boito lololaa maó taabua boito.

¹⁹ Toú timongo tuanilio longalati maó deú hiangi mongolio upoó tapulalo doi madiduú, yi timongolio loheúpa olei Paulus wolei Silas, wau duduulotalo diledéi mongolio ode tanalapa mota pilopo taluolio wolo tawaajibu.

²⁰ Timongolio lopotaluo maó olei Paulus wolei Silas ode tahidihima pantungo pamalenta lo Roma, lapataó loloíya maó, "Tau-tauwala botie tau lo Yahudi. Timongolio tahelo potoodei tolonggalo tokota botie.

²¹ Timongolio helo poáhu tau moponaó adati obobiasa u bubuu-lemenga wolo bubuu-toóonto, tau-tauwalo Roma. Ito diila mowali mololimo meaanto moduduó adati obobiasa boito!"

²² Taa dadaata olo loduduá loluhu olei Paulus wolei Silas; wau tahidihima pantungo lo pamalenta malo ngaidinga boó u hipakea to rasulu duulota boito lapataó lopoáhu tau lomuboáa olimongolio duulota.

²³ Lapataó biluboáa limongolio longongotolo maó, timongolio pilo tuwotio ode delomo tutupa. Taúwa lotutupa ilahulalio lodaha olimongolio wolo lotoheetolo maó.

²⁴ Sababu palenta boito, taúwa lotutupa boito malo lahangí olimongolio tohuwáli lotutupa umola todelomio daá, wau lomungu oáati mongolio tobaalaki.

²⁵ Tanu to tomutaáa loú hui tei Paulus walei Silas heloduá wau lopolahu mola puji poloílaalo momuji ode Allahu Taáala. Tahí tahangia wewolio olo helo dungohe olimongolio hipolahua mola.

²⁶ Debolo lotoduwolo mola liluhu ulaba-labaalo tutu, tilinggula pundasi lotutupa boito olo hilumeulo loóohuú. Ngoáamila huhebu lotutupa boito lohuó wau lalaa-nteyaalo u hipungua to ngoáamila tahí tahangia malo lopato.

²⁷ Taúwa lotutupa boito maíloohea lobongu. Toú tio loóonto ngoáamila huhebu lotutupa mahi huówa, tio malo mahuto wamilio wau mamó tipate wolo wamilio boito sababu to lantobio deú tahí tahangia boito matilumeteó ngoáamila.

²⁸ Bo tei Paulus malo nguatiá loóohuú-huúulo mola, "Diila maó potipate! Amiaatia ngoáamila donggo maatia teea!"

²⁹ Taúwa lotutupa boito malohile tohe tulusi tilumeteá mota ode delomio, wau wolo hulu-huluhelio tio leidumulolo mola totalu lei Paulus wolei Silas.

³⁰ Lapataó tio malodelo olimongolio ode bulemengio wau lolóiya, "Mongo tuani, wolo umusi pohutuo lowatia alihu watia moáahu?"

³¹ Tei Paulus wolei Silas lolametaó, "Pomalacayalo li Isa Eeya! Yió mamoaáahu -- yió wau ngoáamila taa tobelemu!"

³² Lapataó tei Paulus wolei Silas lotombangaó tahuda lo Eeya ode taúwa lotutupa boito wau ode ngoáamila taa u woluo tobelelio.

³³ To tomutaáa loú huilo boito, taúwa lotutupa boito lodelo olimongolio tulusi lopoó belesi maó papaa-liyaalo limongolio. Yi tio wau ngoáamila taa tobelelio lato yilihualio.

³⁴ Lapataó tio lodelo mota olei Paulus wolei Silas ode belelio wau lopohinta uáalo ode limongolio. Tio wau ngoáamila ngaalaálio sanangi daá sababu timongolio botia palacaya to Allahu Taáala.

³⁵ Loombulio mola dimodupo, tahidihima pantungo pamalenta lo Roma malolao mota pulisi ode tutupa u lopo tunggulaó palenta alihu tei Paulus wolei Silas lopatolo.

³⁶ Taúwa lotutupa boito lopoótaa maó suáli boito odelei Paulus. Tio malo loíya,

"Mongo tuani, tahidihima pantungo lo pamalenta malo malentai u molopata tomongo tuani. Botia mongo tuani mamowali mohualingo. Hinta moáahu todalalo!"

³⁷ Bo tei Paulus lolóiya ode pulisi tahi otuugasia boito, "Ami walaó lipu lo Roma. Lou diilalo bilutoío ami mabiluboálio totalu lotaa dadaata wau tiluwotio ode tutupa. Wau botia timongolio meínaó olami wolo poó-poóoyo? Ami diila mohuto! Peínaói mai lohihilao tahidihima pantungo lo pamalenta boito odia mai u molopata olami."

³⁸ Pulisi tahi otuugasia boito lopo duloheó suáli boito ode tahidihima pantungo pamalenta lo Roma. Tou tahidihima pantungo lo pamalenta boito loódungohe deú tei Paulus wolei Silas walaó lipu lo Roma, timongolio mailoohe.

³⁹ Lapataó timongolio malonaó mota lohile maáapu olei Paulus wolei Silas, lapataó lodepita olimongolio duulota yilumualaó lonto tutupa, wau lohile maó alihu timongolio monaóolo monto kota boito.

⁴⁰ Tei Paulus wolei Silas lololaa maó tutupa boito tulusi lonaó ode bele li Lidia.

Lapataó lodunggaya wolo tau-tauwalo tapalacaya mola teto, wau helongohi maó sumangati olimongolio, tei Paulus wolei Silas lomonggato.

17¹ Tei Paulus wolei Silas lotolonga mola lononaó limongolio loli Ampipolis wau Apolonia tulusi leidungga mola ode Tesalonika. Mola teto woluo bele potabiaalo taulo Yahudi.

² Yi tei Paulus olo lonaó mota ode bele potabiaalo boito -- debo odelo ubiasa hepo hutuolio wonu woluo bele potabiaalo ngowale taulo Yahudi -- lapataó lotuuloá pikiilangi wolo tau-tauwalo teto pasali lo aáa-yatiyaalo lo Kitabi. Tio helohutu uito poóotolu tutuuntunga mola timiídu Saabati.

³ Lotimbulude to aáa-yatiyaalo lo Kitabi boito tio helo poópatataó wau lopobukuti deú Olongia Tamoo-poáahua tapilo danti lo Allahu Taáala palalu modutolo wau muli tumumulai monto opopate. "Ti Isa tahe pilohabari lowatia olimongoli boito, maa Tiolo Olongia Tamoo-poáahua tapilo danti-Lio," ualei Paulus.

⁴ Dengolo lota malowali palacaya tulusi loduduá olei Paulus wolei Silas; odito olo ngojumulaa daá tau-tauwalo Yunani

tamoohe to Allahu Taáala, wau dadaata poli mongobua tahimuloa lo ulipu.

⁵ Bo tau-tauwalo Yahudi lohiihia.

Timongolio malo tiangai tau-tauwalo tadiila tantu tambati poti biluloálio wau kalajaalio to dadaa-lalaalo wau lopo tihulaó woomboa tamoo-tolonggaloa. Lapataó timongolio helopo tolonggalo ngoilanggubu kota boito wau maloluhu bele ngotaalio tapalacaya táilunte Yason u mololohe olei Paulus wolei Silas, sababu timongolio ohilaa modelo olei Paulus wolei Silas ode bulemengio potaluolio wolo taa dadaata.

⁶ Bo toú timongolio diila loódungga olei Paulus wolei Silas, yi timongolio malo dedeá olei Yason wau dengolo lota tapalacaya wewolio ode talu lo tahidihima pantungo taókawasa tokota boito.

Timongolio malonguatiá, "Tau-tauwala botie helohutu tolonggalo toú toonulalo maó! Botia kotaanto olo manilaó mai limongolio,

⁷ wau tei Yason malo lolimo olimongolio tobelelio. Timongolio ngoáamila malo lambanga totoonulalo putusani li Kaisari lo Roma, sababu timongolio hipoloíyawa

deú donggo woluo poli olongia wewo tailunte Isa."

⁸Wolo tataa-heyaaalo boito timongolio heloó buluhuta totaa dadaata wau tahidihima kawasa tokota boito.

⁹Lapataó tahidihima kawasa boito malo poáhu olei Yason wau tau-tauwalo tapalacaya wewolio boito helo mayali doi pongaku. De lapataó uito bolo timongolio yilopatio.

¹⁰Toú hui boito tau-tauwalo tapalacaya tokota boito leínaó olei Paulus wolei Silas ode Berea. Leidungga mota odito tei Paulus wolei Silas lonaó ode bele potabiaalo Yahudi.

¹¹Tau-tauwalo to Berea lebe lohuó hilaa limongolio wolo tau-tauwalo to Tesalonika. Wolo sanangi lohilao timongolio helo dungohe habari pasali li Isa, wau timiïdu dulahu timongolio hemotulete Kitabi alihu motota maó wolo u hepo ngaajali lei Paulus boito otutu.

¹²Dadaata towolota limongolio palacaya li Isa, wau diila bo ngoïdi tau-tauwalo Yunani tahimuloa lo ulipu, tapalacaya; mopio mongobua meaalo mongo lolái.

¹³Toú tau-tauwalo Yahudi to Tesalonika loódungohe deú tei Paulus helo pohabari

olo tahuda lo Allahu Taáala to Berea, timongolio olo lonaó mai ode Berea wau helo popatu wau helohutu maó totau-tauwala teto lowali balisa.

¹⁴ Ali-alihu mongo wutato to Berea boito malo depita olei Paulus ode pentadu, hiambola tei Silas wolei Timotius debo bilubiluloá tokota boito.

¹⁵ Lapataó lodepita olei Paulus demola Atena, mongo wutato boito luli lohualingai ode Berea wolo lodelo mai tahuli lonto olei Paulus alihu tei Silas wolei Timotius huáa mohunuhe mola olio.

¹⁶ Touí tei Paulus donggo hemohima olei Silas wolei Timotius to Atena, hilaalio siluukali loóonto maó kota boito polupolu lo bubuu-iyalo.

¹⁷ Masababu uito tobele potabiaalo, tei Paulus lotuuloá pikiilangi wolo tau-tauwalo Yahudi wau tau-tauwala wewolio tahi poluboa Allahu Taáala mota teto. Odito olo to papaa-taliyaalo ngohui-ngohui tio hemo tuuloá pikiilangi wolo timiídu taa woluo teto.

¹⁸ Guguu-ruwaalo alilani Epikuros wau alilani Stoa helo susuuália olo wolio. Dengolo lota limongolio hipoloíyawa, "Wolo otaawa lotau botie? Pongototalio

bo ngoídi, bo tio dadaata bisalaalio!" Dengolo lota tawewolio hipoloíyawa, "Oontonga maó tio hemo pohabari pasali lo dedeewaalo bangusa wewo." Timongolio loloíya odito, sababu tei Paulus helo bisala pasali li Isa wau pasali loú muli tumumulai monto opopate.

¹⁹Tulusi timongolio malodelo olei Paulus ode dudunggaya mola tohuludu Areopagus. Mola teto timongolio loloíya maó olio, "Otohilaa lami modungohe pongaajali bohu u hepo habariyomu boito.

²⁰Sababu yió heloóowoli susuu–aliyaalo umoó linggolabu tobulonga lami. Masababu uito ohilaa otaawa maó lami boliilio."

²¹(Sababu ngoáamila taulo Atena wau tahideelia tahi biluloáwa teto ohilaa daá mopoó pulita waktu uperei limongolio bo modungohe wau mobisala pasali lo susuu–aliyaalo u bohu.)

²²Toú tei Paulus tilimihulaó totalu lo tahiámbua to Areopagus boito, tei Paulus loloíya maó, "Wuu tau–tauwalo Atena! To pomilohu lowatia deú todelomo ngoáamila suáli timongoli tutuulio tutu o agama.

²³Sababu toú watia lolontale mota topalito kotamu wau helo poótuoto tataa–

mbatiyalo potabiaamu, watia loóonto olo tambati tuwau uhepo dewowalo bake; totambati boito tulatuladu, 'Duólo Allahu Taáala Taa Diila Otaawa.' Naa, Allahu Taáala tahe tuboo limongoli bo diila oonuhe limongoli boitolo, tahepo habariyóu mai olimongoli.

²⁴ Allahu Taáala tamalo powali mai dunia botie wolo totoonulalo tuangio, Tiolo Eeya lohulungo wau dunia. Tio diila bilu-biluloá todelomo bebee-leyaalo lobuí u pilohutu lomanusia.

²⁵ Tio olo diila palalu bantua lomanusia, sababu maa Tiolo talongohi mai tutumulo wau napasi wau totoonulalo u hitua-tuawua ode manusia.

²⁶ Lonto ngotaalio lomanusia pilohutu-Lio mai ngoáamila bangusa wau lopoáhu olimongolio lotibiluloá to ngoilanggubu dunia. Tiolo olo talolantu tumulalo mai bohulio, omolua wau toútoonu timongolio mowali tumumulo.

²⁷ Allahu Taáala lohutu mai uito alihu timongolio mololohe o-Lio. Pohileaala duá timongolio modunggayo wo-Lio toú timongolio donggo hemo lolohe o-Lio. Bo tutuulio tutu Allahu Taáala diila molamingo monto olanto ngota-ngota.

²⁸ Debo odelo u heloíya lotau, 'Ito hitumula wau hióoliyoá wau woluo todunia botie sababu okokawasa-Lio! Tutuuwauwa olo loú heloíya lo dengolo lota tamoo-sáiria limongoli. Timongolio lolóíya, 'Ito ngoáamila yito mongo wala-lo.'

²⁹ Naa, sababu ito yito mongo walaó Allahu Taáala, diila mowali ito monganggapu Allahu Taáala yito tutuuwauwa debo odelo buí upilohutu monto hulawa meaalo talaá meaalo botu upilohutu moduduá pongotota lomanusia.

³⁰ Wakutu ohulodunto boito maa ilolipata lo Allahu Taáala, bo botia Tio lomalentai ngoáamila tau to ngoilanggubu dunia molilihu monto duduu-sawaalo limongolio.

³¹ Sababu Tio malolantu mai wakutu tuwau u momutoó ngoilanggubu dunia botie wolo aadili. Tuugasi boito mapohutuo lo ngotaalio tamaa tilulaoto Allahu Taáala u mohutu maó suáli boito. Wau alihu ngoáamila tau yakini losuáli boito, Allahu Taáala maluli lopo tumulai tau boito lonto opopate!"

³² Toú tau-tauwala boito loódungohe pasali loú muli tumumulai toú mailate

maó, woluo towolota limongolio tahe lopoííi maó olei Paulus. Woluo olo talo loíya, "Ami ohilaa modungohe Wutato muli mobisala mai pasali losuáli botie."

³³ Lapataó tei Paulus malo lolaa maó dudunggaya boito.

³⁴ Bo woluo towolota limongolio talo tiwambaó odelei Paulus wau palacaya li Isa, to wolotalio: tei Dionisius pongawaá majalisi lo Areopagus, wau taabua ngota tailunte Damaris, wau dengolo lota tawewolio olo.

18 ¹ Lapataó uito tei Paulus lololaa maó Atena wau lonaó ode Korintus.

² Mota teto tio lodunggaya wolo tauilo Yahudi ngota tailunte Akwila, asaliilio mai lonto lipu lo Pontus. Tei Akwila boheli leidungga mai lonto Italia wolo dilelio ti Priskila. Timongolio lonaó mai ode Korintus sababu ti Kaisari Klaudius malo poáhu ngoáamila tauilo Yahudi lumualo lonto Roma. Tei Paulus lonaó mota lobiilohe woli mongolio duulota,

³ lapataó lotibiluloá mota teto woli mongolio wau helo kalaja peé-peéenta woli mongolio, sababu mato lopopeehu limongolio tutuuwauwa wolei Paulus, deúito-yito mohutu kema.

⁴ Bo totimiíidu dulahu Saabati, tei Paulus hemonáó mota hemo bibiisalawa tobele potabiaalo u mohutu tau-tauwalo Yahudi meaalo tau-tauwalo Yunani, palacaya li Isa.

⁵ Touú tei Silas wolei Timotius leidungga mai lonto Makedonia, tei Paulus lopohuna maó ngoáamila tembolio helo pololadu habari lonto Allahu Taáala ode tau-tauwalo Yahudi deú ti Isaalo boito Olongia Tamoo-poáhua tapilo danti mai lo Allahu Taáala.

⁶ Bo sababu tau-tauwala tulusi wambaó hemo tehengi wau hemo hente@a olio, yi tei Paulus lopongeeé peaahuó lonto boólio odelo tuoto u mopoéela totala limongolio. Tio lolóíya, "Wonu timongoli topotala, tingga totala limongoli lohihilao! Diila otaawaú! Tumulalo mai botia waú mamonaó ode tau-tauwalo tadiila Yahudi."

⁷ Lapataó tei Paulus malo lolaa maó olimongolio wau lonaó mota lotibiluloá tobele u titiilia wolo bele potabiaala boito. Bele boito bele longotaalio tadiila Yahudi, bo tio hemolubo Allahu Taáala. Tanggulo tau boito tei Titus Yustus.

⁸ Bo tei Krispus, taúwa lobebe potabiaala boito wolo ngoáamila mongo ilaatolio

palacaya li Isa Eeya. Wau dadaata olo tau-tauwalo Korintus wewolio lodungohe habari upilo tunggulai lei Paulus, wau timongolio palacaya li Isa lapataó yiluhualio.

⁹Toú huilio tuwau todelomo tuwaulio lobibilohe, Eeya lotahuda mai odelei Paulus, "Diila maó oohe! Pobisalaalo tulusi wau diila maó potipoóoyo.

¹⁰Sababu Waú peé-peéenta wolemu. Diaaluo penu boli ngotaa maó tamoóhutu mai u moleeto olemu, sababu ngohuntua taa tokota botie yito tautau-Ú."

¹¹Masababu uito tei Paulus malo tibiluloá to Korintus ngotaunu wau ngoputu hiheolio wau helo ngaajali tahuda lo Allahu Taáala toli mongolio.

¹²Toú tei Galio lowali gubolonulu lo Akhaya, tau-tauwalo Yahudi lotituwau helo tehengi olei Paulus wau lodelo olio ode bubutoó.

¹³Timongolio lopo dudulaó lo dudulohe botie, "Tau botie helo heinga taa dadaata alihu molubo Allahu Taáala wolo pohuli u bubuu-lemenga wolo butoée Musa!"

¹⁴Odito tei Paulus mamo lametaó, tei Galio malo loíya ode tau-tauwalo Yahudi, "Wuu tau-tauwalo Yahudi! Wonu upilopo

dulohei mai botie tuwaulio loú totala mealo tuwaulio loú moleeto, memangi patutilio waú sabari modungoheó pilopo dulohumu mai botie.

¹⁵Bo utie yito polohaamawa pasali lo tataa-heyalo wau tataang-gulalo boli bubuu-toóomu lohihilao! Oditolio timongoli tamusi mopoó lapataó. Waú okabalatani momutoó susuu-aliyaalo u odie botie!"

¹⁶Lapataó tei Galio lopolualaó olimongolio ode bulemengio.

¹⁷Yi timongolio malo heúpa olei Sostenes, taúwa lobele potabiaalo boito, wau lomate olio totalu lomeja bubutoó. Bo tei Galio diila lomaduli sama-samaata to suáli boito.

¹⁸Lapataó uito tei Paulus donggo lohiheo mola lotibiluloá to Korintus. Lapataó tio lolóiya maó hinta moáahu mobuuála totau-tauwalo tapalacaya teto, tulusi malobite wolei Priskila woli Akwila ode Siria. To Kengkrea, tei Paulus longuluhi huwoío umaa hilulialio lowali hilumayaó sababu dantilio to Eeya.

¹⁹Toú leitungga mola ode Epesus, tei Paulus lololaa maó olei Priskila woli Akwila, tulusi tilumuwoto ode bele

potabiaalo wau helotuuloá pikiilangi wolo tau-tauwalo Yahudi mota teto.

²⁰ Pihile limongolio alihu tio motibiluloá mohiheo woli mongolio, bo tio diila lohuto.

²¹ Penu boli odito, toú mamo monggato, malo loíya tio, "Wonu Allahu Taáala potala mopoluasi, watia muli mohualingai odia." Lapataó lolóya maó odito, tio lomonggato lonto Epesus.

²² Lapataó tio lotuhuta mola to Kaisarea, tio lonaó ode Yerusalemu mota longohi salamu tojamaá mota teto, lapataó tulusi ode Antiokhia.

²³ Lapataó lotibiluloá teto dengolo mola hiheolio, tio luli lomonggata mola lomilohe madala lo Galatia wau Prigia u helo poólotolo iimani lotau-tauwalo tapalacaya.

²⁴ Toú boito, malonaó mai ode Epesus Yahudi ngota tapilo tutulio to Aleksandria, taílunte Apolos. Tio motota mobisala wau mongalati daá pasali lotuango Kitabi,

²⁵ wau maílaa-jaliilio u motota maó pongaajali tomimbihu li Isa. Yi wolo sumangati uwali-walihuhu tio helo ngaajali wolo moúlintapo pasali li Isa,

eleponu heli popolihi lei Yahya wambaó u otaawalio.

²⁶Wolo buheli tei Apolos malo lumula lobisala tobele potabiaalo wau toú tei Priskila woli Akwila lodungohe pongaa-jaliilio, timongolio malodelo olio ode bele. Mola teto timongolio lotombangaó olio wolo lebe tiluhata maó pasali patuju lo Allahu Taáala u mopoáahu mai manusia motimbulude li Isa.

²⁷Lapataó tei Apolos omakusudu monaó mola ode Akhaya. Yi tau-tauwalo tapalacaya li Isa to Epesus malolao mola tuladee tomongo wutato tapalacaya to Akhaya alihu timongolio mahuto mololimo olei Apolos. Wau toú tei Apolos leidungga mola ode Akhaya, bubantulio malo ilaalo ilohuna daá ode tau-tauwala u sababu odehu hilaa lo Allahu Taáala malo malacaya li Isa.

²⁸Sababu wolo otilihula daá tei Apolos loólaaheó tau-tauwalo Yahudi todelomo bubuutola moduduó huhamaalio ngota-ngota. Wau tio helo pobukuti maó wolo aáa-yatiyaala lo Kitabi deú ti Isaalo Olongia Tamoo-poáhua tapilo danti mai.

19¹Toú tei Apolos donggo mola to Korintus, tei Paulus donggo hemo

lontale kambungu tomadala boito lapataó leidungga mola ode Epesus. Mola teto tio lodunggayo wolo dengolo lota tamalo malacaya li Isa.

² Tio lohintu maó olimongolio, "Wolo Mongo wutato botie malo lolimo Rohullah toú timongoli palacaya li Isa?" Timongolio lolametaó, "Diipo. Tumbaó diipo peéenta maó amiaatia loódungohe deú woluo Rohullah."

³ "Wonu odito, wolo polihu lotatoonu timongoli yilihualio?" yilintu maó lei Paulus. "Wolo polihu lei Yahya," tametaó limongolio.

⁴ Lapataó tei Paulus loloíya maó, "Tei Yahya helo polihu tau u mopoó patatai deú tau-tauwala boito malo lilihu lonto duduu-sawaalo limongolio. Bo sambela uito olo tei Yahya helo poótaa ode tau-tauwalo Isiraílu deú timongolio musi palacaya to Taa mamei dungga mai lapataó tio, deúito-yito ti Isa."

⁵ Touú timongolio loódungohe uito, timongolio mailihualio to tangguli Isa Eeya.

⁶ Wau touú tei Paulus lopodutu uluúlio toitaati mongolio, Rohullah longawasa mai olimongolio, lapataó timongolio

lolumulo lobisala todelomo babaa-
hasawaalo umoó linggolabu wau helopo
tunggulo habari lonto Allahu Taáala.

⁷Jumulaa limongolio ngoáamila woluo
tanu mopulaa duulota.

⁸Tolo hula mola hiheolio tei Paulus tulusi
helo bisala loú buheli ode tau-tauwala
tobele potabiaalo wau helo susuu-alia woli
mongolio u lopoyakini maó olimongolio
pasali woloolo mola Allahu Taáala
momalenta odelo Olongia.

⁹Bo dengolo lota towolota lotau-tauwala
boito baángiola wau diila mohuto
palacaya. Totalu lo ngoáamila tahiámbua
teto hilantiá limongolio pongaajali pasali
lanjana lo Allahu Taáala, mopoáahu
manusia motimbulude li Isa. Masababu
uito tei Paulus lololaa maó olimongolio,
tulusi lonaó wolo tahiduduá li Isa ode
huwali leidaá lokulia lei Tiranus. Mota teto
ngohui-ngohui tio helo susuu-alia wolo
tau-tauwalo.

¹⁰Hepilo hutulio uito diila obuntoolio
dulo taunu mola hiheolio tunggula
ngoáamila tahi biluloáwa to polopinsi
Asia, mopio taulo Yahudi meaambo taa
bangusa wewo, ngoáamilalo helo dungehe
tahuda lo Eeya.

¹¹ Allahu Taáala helohutu mai totoonulalo moólinggolabe upolu polutuó lotimbulude tolei Paulus.

¹² Wonu leto meaanto kaini pobintolo wohuta u boheli peéenta pilomake lei Paulus deloolio ode tahi ngongota, ngongoti mongolio mooli, wau rohu lolati olo molahi monto olimongolio.

¹³ Woluo dengolo lota hulango lo Yahudi talonaó ode utoonulalo maó, helo polahi roroo-huwaalo umoleeta lonto tau-tauwalo. Mongo hulango boito helo himontala olo lomake tangguli Isa Eeya lopohinggi rohu lolati boito. Timongolio loloíya ode roroo-huwaala lolati boito, "To tangguli Isa tapilo habari mai lei Paulus boito, waú mopohinggi maó olimongoli!"

¹⁴ Woluo pitulota walaó mongo lolái longotaalio li iimamu tauwa, táilunte Sekewa, tahe lohutu maó suáli debo odelo uito.

¹⁵ Bo rohu lolati boito loloíya olimongolio, "Otaawaú ti Isa wau olo tei Paulus otaawaú, bo timongoli botie tatoonu?"

¹⁶ Tulusi tailo tuanga lolati boito tilumayango wau lodangapo olimongolio wolo palangi daá tilinggula timongolio tilumeteó lonto bele boito loú pipiilalia

wau loú hilaalawa, sababu boó limongolio kilaidingio lonto wawaáí mongolio.

¹⁷ Ngoáamila taulo Yahudi wau taa bangusa wewo tahi biluloáwa to Epesus loódungohe ulotoduo boito, lapataó timongolio mailoohe. Yi tangguli Isa Eeya malebe hepo pujiaalio.

¹⁸ Ngohuntua tamalowali palacaya li Isa, lonaó mai helongaku totalu lotaa dadaata totoonulalo huhutu limongolio toú yilalu maó.

¹⁹ Wau timongolio tabiaasa hemo ponaó lo ilimi mojinaka totau, malo himoá bubuu-kuwaalo limongolio wau pilobulio totalu lotaa dadaata. Halaga lo bubuu-kuwaalo boito wonu jumulaalo ngoáamilalo tanu limo lopulu lolihu doi talaá.

²⁰ Odieelo mola wolo pohuli upolu-polutuó boito tahuda lo Eeya helebe lololadu lomola wau helebe lolotolaó heingio.

²¹ Lapataó popoo-loútiyalo boito, tei Paulus malolantu u monaó mola ode Makedonia wau Akhaya lapataó tulusi ode Yerusalemu. "Lapataó odito mola," ualei Paulus, "Watia musi monaó ode Roma."

²² Yi tio malolao duulota tamoohiyowa olio, deúito-yito tei Timotius wolei Erastus u lonaó mola ode Makedonia, sambela uito tio donggo loti biluloópo dengolo tembo mola hiheolio to polopinsi Asia.

²³ Tanu tou boitolo lotoduo mai tolonggalo daá to Epesus sababu pongaajali pasali li Isa.

²⁴ Sababu tokota boito woluo ngotaalio tamoomania talaá táilunte Demetrius, tahe mohutu u mohaamawa wolo bele ode Dewi Artemis. Kelakela lotau boito heloó toduo tilapula uleidaá ode tahi pokalajaalio.

²⁵ Masababu uito tio longambu mai tahi pokalajaalio peé-peéenta wolo tahi pokalajawa pani lotalaá wewolio, tulusi lolóiya maó, "Mongo wutato! Otaawa lo Wutato deú ito hemoó toduo mai tilapulo monto kalaja botie!

²⁶ Botia maa iloontonga lo Wutato wau lodungohe lohihilao wolo u hepilohutu lei Paulus boito. Tio lolóiya deú dedeewaalo u pilohutu lomanusia sama-samaata diila dewa. Wau tio maloóhutu totaa dadaata palacaya to pongaajalilio, wau diila bo wambaó tewe to Epesus, bo ngopeé to ngoilanggubu madala lo Asia olo.

²⁷ Topotalalio yito deú polokela–kelanto botie mamoó toduo mai tanggulo u moleeto. Wau diila bo uito wambaó, bo bele li Dewi Artemis olo maa anggapuolio diila ohuna wau odudaálio poduduu–taálio; lebe–lebe pomaó tio dewi u hepujaa lo ngoáamila tau to Asia wau ngoilanggubu dunia!"

²⁸ Odito tau–tauwalo boito loódungohe uito malopatu hilaa limongolio, tulusi timongolio mahi wuwa–wuwaatiá, "Pomaluu–tutuólo mola Artemis, dewi taulo Epesus!"

²⁹ Yi tolonggalo boito lololadu lomola ode ngoilanggubu kota. Lapataó woomboa lo tahipo tolonggaloa boito malo heúpa olei Gayus wolei Aristarkus, deúito–yito tau–tauwalo Makedonia tahe lohiyo olei Paulus todelomo nonaólio, lapataó lodedeá mola olimongolio ode tanalapa lokota boito.

³⁰ Tei Paulus ohilaa tumuwoto moduduá olimongolio, bo tau–tauwala tapalacaya li Isa mola teto lodini olio.

³¹ Dengolo lota taduduulaá lo polopinsi Asia boito olo, tasasaa–habatia wolei Paulus, malo poáhu tau lopoótaa olei

Paulus alihu tio diila mopobilohe batanga to tanalapa boito.

³² Touú boito tau-tauwalo tadonggo hiámbua to tanalapa boito malowali ambulati daá. Woluo talo nguatiá odie, woluo talo nguatiá odito, sababu odaata limongolio diila motota wolo sababuulio timongolio helo ambua teto.

³³ Ngotayadu lotau-tauwala boito hemo lantobu deú tei Aleksander tapilo timuátaí leeto, sababu tiolo tahe yiluntulalio ode talu lotau-tauwalo Yahudi. Yi tei Aleksander malongohi mota isalati lo uluúlio u léíwohi mai tembo mopoduulua batanga totalu lotau-tauwala boito.

³⁴ Bo odito timongolio loóonto deú tio taulo Yahudi, timongolio malo nguatió peéentalo mola wolo daá-daáalo maó, "Pomaluu-tutuólo mola Artemis, dewi taulo Epesus!"

³⁵ Mapulitio dulutuli lokota lowali lopo duóotaó taa dadaata boito. Tio loloiya maó, "Tuango lipu lo Epesus! Ngota-ngota motota deú Epesus wambaó kota u hemolaala bele li Dewi Artemis wau botu mantali umodehu mai monto hulungo.

³⁶ Diaaluo penu boli ngota maó tamowali mobatata suáli boito. Sababu uito

potipoóyolo mola wau diila maó pohutu u hitua–tuawua wolo majanunu.

³⁷ Tau–tauwala botie, dilelo limongolio odia mai diila bo sababu timongolio malo lambata bele lodewa meaalo sababu timongolio malohina dewinto.

³⁸ Wonu tei Demetrius wolo tahi pokalajaalio boito odudulohe tuwau to tahingota–ngotaawa, hulua maó timongolio modelo palakalalio boito ode bubutoó. Bubutoó huóhuó u mololimo olimongolio wau tahidihima pantungo lo pamalenta olo laito woluo.

³⁹ Bo wonu donggo woluo poli hitua–tuawua wewolio u otohila limongoli, uito musi poólapatolo todelomo dudunggayalotaa dadaata alihu saaha.

⁴⁰ Sababu wolo u motoduo mai todulahee botie mowali mopo topotala olanto. Ito mowali potuludelio hemo potoodei polo malakala, sababu ito diila o alasanu penu boli tuwau maó u mopobanali tolonggalo botie."

⁴¹ Lapataó lolóiya u ngoáamilalo boito, tidulutuli lokota boito lopoáhu totaa dadaata boito lohualingo.

20 ¹ Touú owowoluwoa to Epesus luli loduóoto mola, tei Paulus longambu

mai jamaá wau helongohi sumangati olimongolio. Lapataó tio lolóiya maó hinta moáahu mobuuála, tulusi tio lohumbuta mola nonaólio ode Makedonia.

²Tio lonaó mola ode lilii-puwaalo Makedonia wau helo naseehati maó dadaata totau-tauwalo tapalacaya li Isa mola teto wau longohi sumangati olimongolio. Lapataó tio lonaó ode Yunani.

³Tolo hula mola hiheolio tio mola teto. Lapataó touú tio donggo hemo podapato u mobite mola ode Siria, woluo mai habari deú tau-tauwalo Yahudi donggo hipo heeluma u momate olei Paulus mate-mateelo maó. Masababu uito tio lolantu maó u muli mohualinga moli Makedonia.

⁴Tei Sopater walaée Pirus u asaliilio mai lonto Berea lonaó peé-peéenta wolio; odito olo tei Aristarkus wolei Sekundus taulo Tesalonika, wau tei Gayus taulo Derbe. Tei Timotius olo tei Tikhikus wolei Tropimus, tau-tauwala lonto polopinsi Asia.

⁵Timongolio lotitimulo wolami lapataó mola lohima olami to Troas.

⁶Lapataó Rameyangi lo Roti Diila Oragi, ami malobite lololaa maó Pilipi. Limo hui

mola lapatio maó ami luli lotiámbu woli mongolio mola to Troas. Mola teto ami lotibiluloá ahadilio tuwau.

⁷Tohuilo ahadi ami lotiámbu u molamelo peé-peéenta debo odelo tamohutato. Tei Paulus helo bibiisalawa wolo tau-tauwalo, sababu loombulio mola tio oniyati mamonggato. Tunggula lo tomutaá loú hui tei Paulus helo bisala tulusi.

⁸Tohuwali u belebelea toitaato, tambati upilo tiámbua lami boito, otohe ngohuntua.

⁹Tabohulotau ngota táilunte Eutikhus hulohuloáa to tutuloa. Sababu tei Paulus diila lopo huhe-huheli lobisala, tabohulotau boito malo diduto daá tunggula tio leituluhu to tutuloa boito, lapataó lodehu mola ode walungo lonto belebelea otolulio. Tou bilintaío maó limongolio, tio mailate.

¹⁰Bo tei Paulus lolahe mola ode walungo, lapataó lopo wombaheó batangalio odeitaato lo tabohulotau boito wau longoóodeó. Tei Paulus lolóiya maó, "Diila maó polawalo, tio donggo tumutumulo!"

¹¹Lapataó tei Paulus luli lobotula mola odeitaato, tulusi lolaya-layadeó roti wau

lamelo peé-peéenta. Lapataó lohiheo mola bibiisalawa wolo tau-tauwala tunggula dimodupo, tei Paulus lomonggato.

¹² Tau-tauwala boito lodelo tabohulotau tatumu-tumulo boito luli lohualinga ode belelio. Timongolio loótoduo mai sanangi wau iloliyanga daá.

¹³ Ami lonaó mola ode kaapali lapataó lobite leimulo ode Asos u lolutulo olei Paulus ode kaapali mola teto. Tio malo ngaatulu odito sababu tio maódito mola moli dalalo tudulio.

¹⁴ Lapataó lodunggaya maó to Asos, tei Paulus huáa lotitaé tokaapali tulusi ami lobite mola ode Matilene.

¹⁵ Tou mola teto ami luli lobite poli, wau loombulio mola leidungga ode tambati u tataalua wolo Khios. Ngonulio mola ami leidungga to Samos wau ngohui lapatio maó to Miletus.

¹⁶ Tei Paulus malolantu udiila mohepita to Epesus, alihu diila mopoluhi lowakutu tomadala lo Asia. Hiambola wonu mowali otohilaalio ngoínta mola meidungga ode Yerusalemu to Dulahu Buka Pantekosta.

¹⁷ Lonto Miletus tei Paulus lolao mola habari ode Epesus u lohile mongo taúwa lojamaá mola teto mai modunggaya wolio.

¹⁸Toú timongolio leidungga mai, tei Paulus lolóiya maó olimongolio, "Otaawa lo Mongo wutato deú woloolo mola watia tumutumulo ngotilonggadu botie towolota limongoli tumulalo mai tobohulo dulahu watia leidungga mai to Asia.

¹⁹Wolo dupadupapa lohilao wau wolo hehe-heheeta ponu dadaata, watia helo kalaja ode Eeya tohuungo polodutolo u helo toduo mai olaatia sababu lanjana u moleeto lotau-tauwalo Yahudi.

²⁰Otaawa lo Wutato deú watia diila mopomomu-momu helo poótaa mai olimongoli wolo u ohuna olimongoli. Watia helo ngaajali olimongoli totimiidu dudunggayo lo ulipu to bebee-leyaalo.

²¹Mopio ode tau-tauwalo Yahudi meaalo ode tau-tauwala bangusa wewo watia laito hemopoéela alihu timongolio molilihu monto duduu-sawaalo limongolio wau monaó mai ode Allahu Taáala, wau palacaya li Isa Eeya.

²²Botia u modungoheó palenta lo Rohullah, watia monaó ode Yerusalemu. Wau diila otaawa lowatia wolo u mamotoduo mai olaatia mola teto.

²³Bo wambaó u otaawa lowatia deú to timiidu kota, Rohullah malo

popintalo lopoótaa mai olaatia, deú watia matumuwoto ode tutupa wau mamodutolo.

²⁴ Bo watia diila pandungi wolo tutumulo watia botie, asali watia mowali mopoó lapato tuugasi upilo malacaya mai li Isa Eeya olaatia wau asali watia tatapu wau molotolo hilao tunggula mate u mopololadu Habari Mopiohe boito pasali odehu hilaa lo Allahu Taáala.

²⁵ Watia malo biilohe wolo Mongo wutato ngoáamilalo wau malo pohabari olo pasali loú woloolo mola Allahu Taáala momalenta odelo Olongia. Botia to pongolaasa lowatia diilalo modunggaya wolo Mongo wutato.

²⁶ Masababu uito wolo pintalo loíya mai lowatia olimongoli todulahee botie deú wonu woluo towolota limongoli de mabinasa, uito diila totala lowatia.

²⁷ Diila peéenta watia tilumeteó lololaa maó tuugasi lowatia u motombangai olimongoli ngoáamila lanjana lo Allahu Taáala.

²⁸ Mamusi timongoli modaha batanga wau dahai maó olo ngoáamila jamaá u mailudu mai lo Rohullah olimongoli upéi dahaa-Lio; sababu timongoli mapiludu-lo lowali tamoo- ngimatoa jamaá lo Allahu

Taáala boito debo odelo diti hemodaha himbalio, sababu Allahu Taáala malo powali mai jamaá boito milikii-Lio lohihilao lotimbulude to ilopate lo Wala-lo lohihilao.

²⁹Toú tolaa maó lowatia, tantulo maó mamonaó mai sasaa-rigalaalo u mongantau tohuungi mongoli. Wau tau-tauwala tahedahaa limongoli boito mamowali mangusa lo sasaa-rigalaalo boito.

³⁰Tumbaó towolota lo Mongo wutato lohihilao olo malumunetai tau-tauwalo tamamo pohabari habari udiila otutu. Timongolio mohutu u odito alihu tau-tauwala tamalo malacaya li Isa malapalolo wau moduduá olimongolio.

³¹Sababu uito poódaha-dahaalo maó! Poótoloma deú tolo taunu mola hiheolio wolo ponu dadaata, hui wau dulahu watia diila peénta maó lohuheli helo ngaajali timiídu tau lonto olimongoli.

³²Botia mawuduo mai lowatia timongoli ode Allahu Taáala alihu Tio tamaa molaala olimongoli wau alihu timongoli motidihu tohabari odehu hilaa lo Allahu Taáala. Allahu Taáala okawasa u mopoó lotolai olimongoli wau mongohi olimongoli

babaa-lakatiyalo umaa pilohetu-Lio ode ngoáamila umati-Lio.

³³ Diipo peénta maó watia ilohilao todoi meaalo boó penu boli monto tahingota-ngotaawa.

³⁴ Otaawa lo Wutato lohihilao, deú wolo lotolo lowatia lohihilao watia helo kalaja u lopoópolu upalaluo lowatia wau mongo sahabati laatia tahiduduá wolaatia.

³⁵ Todelomo totoonulalo palakala watia malongohi mai obaaya olimongoli deú wolo mokalaja tióotutua debo odelo utie ito musi motulungi tau-tauwalo tadiila hilootola. Sababu ito musi moéela mola wolo u mapilo tahuda mai li Isa Eeya lohihilao, 'Lebe sanangi tutu mongohi wolo mololimo.'"

³⁶ Toú tei Paulus lapato lobisala maó, tio maloti bongghuúlo mola woli mongolio ngoáamila tulusi loduá.

³⁷ Timongolio ngoáamila hilumoyongo sambela helongoóde olei Paulus wau lolele maó hinta moáahu todalalo.

³⁸ Timongolio siluukali daá tidiyolo maó toú tei Paulus lolóiya deú timongolio diilalo moóontonga wolio. Tulusi timongolio malo depita olio demota kaapali.

21 ¹ Ami malohintu lonaó wolo mongo taúwa lojamaá lonto Epesus boito, lapataó lololaa maó olimongolio. Tulusi ami lobite demola pulo Kos; wau loombulio mola ami leidungga topulo Rodos. Lonteeto ami lobite tulusi demola rabua lo Patara.

² To Patara, ami loódungga kaapali u made Penesia. Yi ami malotitaé tokaapali boito, tulusi lomonggato

³ wau lobite tunggula ami loóonto pulo Siprus to ambahu oloihi lami; bo ami lobite tulusi hitalua ode Siria. Ami malo tirabua to Tirus sababu mota teto kaapali utilaéa lami boito mamongo monggali detohio.

⁴ Totambati boito ami mota lobiilohe wolo tau-tauwala tapalacaya li Isa, lapataó lotibiluloá woli mongolio ahadilio tuwau hiheolio. To potuhata lo Rohullah timongolio helo naseehati olei Paulus alihu tio diila monaó mola ode Yerusalemu.

⁵ Bo tou lopulito wakutuulio u ami motibiluloá teto, ami lololaa maó olimongolio wau lopo tolona mola lononaó lami. Timongolio ngoáamilalo peé-peéenta wolo mongo walaío wau dilelio taabua lodepita olami demola bulemengo kota. Mola teto

tobiihu pentadu, ami ngoáamila maloti bonggohuú wau loduá.

⁶Lapataó uito ami malo sasaalamua tulusi ami lotitaé tokaapali wau timongolio olo malo hualinga ode bele.

⁷Ami lobite tulusi lonto Tirus demola Ptolemaisi. Mola teto ami mota lobiilohe wolo mongo wutato tapalacaya, mota longohi salamu olimongolio, tulusi lotibiluloá ngohui mola woli mongolio.

⁸Lolombulio mola ami lomonggata poli, lapataó leidungga mota ode Kaisarea. Mota teto ami lonaó lonaó ode tamoo-
nginjilia táilunte Pilipus, tulusi lotibiluloá to belelio. Tio yito tala ngota lo tapitulota táilo tulaota to Yerusalemu.

⁹Wopatota waláio mongo dulahu mailohia lo Allahu Taáala u mambo mopohabari habari monto Allahu Taáala.

¹⁰Toú mangolo wakutu mola hiheolio ami mola teto, malei dungga mai lonto Yudea nabi ngota táilunte Agabus.

¹¹Tio lonaó mai ode olami lapataó lohama bintolo wohuta lei Paulus. Wolo bintolo wohuta boito tio longawade oáatio wau uluúlio lohihilao lapataó loloiya maó, "Uti-utieelo upilo tahuda mai lo Rohullah: Taa ohuúwo lobintolo

botie mapunguolio debo odelo utie to Yerusalemu lotau-tauwalo Yahudi, wau wuduolio ode tau-tauwala tadiila Yahudi."

¹²Toú ami loódungohe uito, ami wau ngoáamila wutato tahi biluloáwa to Kaisarea boito lohile tióotutua olei Paulus alihu tio diila monaó mola ode Yerusalemu.

¹³Bo tio lolametaó, "Wolo hunalio Wutato humoyongo debo odelo utie tilinggula moó aantulu hilaa lowatia? Watia madapa-dapato diila bo umola waúpolio teto, bo penu boli mateelo maó olo watia dapadapato sababu ti Isa Eeya."

¹⁴Tei Paulus diila lohuto lodungohe olami, yi ami diilalo lodini olio. "Huliaalo maó kahandaki lo Eeya wambaó umotoduo mai," loíya maó lami.

¹⁵Lapataó loti biluloáaó teto dengolo wakutu mola hiheolio, ami malopo dapato babaa-langiyaalo lami, tulusi lomonggata mola ode Yerusalemu.

¹⁶Dengolo lotta wutato lonto Kaisarea lonaó olo peé-peénta wolami mota lodepita olami ode bele lei Manason, sababu to beleliolo umapo tihangata lami. (Manason yito ngotaalio lo Siprus tamalo hiheo lowali muri li Isa.)

¹⁷Toú ami leidungga mola ode Yerusalemu, mongo wutato mota teto lolutula olami wolo sanangi lohilao.

¹⁸Loombulio mola tei Paulus lonaó peé-peéenta wolami mota lobiilohe wolei Yakobus; ngoáamila mongo taúwa lojamaá woluo olo mota teto.

¹⁹Lapataó longohi maó salamu olimongolio, tei Paulus helo hungguli olimongolio totoonulalo u hitua-tuawua umaa pilohutu mai lo Allahu Taáala lotimbuludei olio towolota lotau-tauwalo tadiila Yahudi.

²⁰Toú loódungohe silita lei Paulus boito, timongolio ngoáamila helomuji mola Allahu Taáala. Lapataó timongolio loloíya maó odelei Paulus, "Wutata Paulus! Wajibu otaawa maó lowutato deú mahi lihu-lihua taulo Yahudi tapalacaya li Isa. Timongolio ngoáamila yito tau-tauwalo taa tatapu wau molotolo hilao hemoduduá butoée Musa.

²¹Wau botia timongolio loódungohe deú wutato helo ngaajali ngoáamila taulo Yahudi tahi biluloáwa towolota lobangusa wewo, alihu mololaa maó butoée Musa. Wutato helo naseehati olimongolio alihu timongolio diila moluuna mongo walái

mongolio meanto moduduá uúdu lo Yahudi.

²² Botia tau-tauwalo Yahudi tamalo malacaya boito tantulo maó mamoo dungohe deú Wutato mawoluo tewe. Oditolio, woloolo mola botia?

²³ Opiohelio poduduólo naseehati lami. Woluo wopatota tewe tamalohutu danti ode Eeya.

²⁴ Naa, mamusi Wutato mota mohutu upacala pomantaliya lobatanga peé-peéenta woli mongolio, wau bantailo maó oonggosi limongolio alihu huwoi mongolio mowali uluhelo. Lou odito mamoo ilaalo ode ngoáamila tau deú wolo umaílo dungohe limongolio pasali lo Wutato diila otutu, sababu Wutata lohihilao bo hemo ponaó butoée Musa.

²⁵ Bo pasali lotaa diila Yahudi, tamalo malacaya li Isa, ami malolao mola tuladu olimongolio pasali putuusani lami deú timongolio diila mowali molamelo uáalo u mapilodewo ode balaahala, diila mowali molamelo duhu, meaalo molamelo binatanggi uilate tilingoloó; wau diila mowali mohutu totoonulalo huhutu u huloto."

²⁶ Yi tei Paulus malonaó wolo tawopa tota boito tulusi lohutu maó upacala pomantaliya lobatanga peé-peéenta woli mongolio toú loombulio mola. Lapataó timongolio maa tilumuwoto ode Bele lo Eeya u lopoótaa deú donggo ngoolo hui mola bolo upacala pomantaliya lobatanga boito mopaluto wau bake ode limongolio ngota-ngota pilodewolio.

²⁷ Toú hiango wakutu pitu hui mola boito bolo ngopeé mopaluto, dengolo lota taulo Yahudi lonto Asia loóonto olei Paulus todelomo Bele lo Eeya. Lapataó timongolio malo popatu totaa dadaata, tulusi lodihu maó olei Paulus

²⁸ sambela hiwuwa-wuwaatiá, "Wuu tau-tauwalo Isiraílu, bantua mai! Uti-utieelo taulio talonaó ode utoonulalo maó helo ngaajali ngoáamila tau totoonulalo pongaajali u lotehengi bangusa lo Isiraílu, lotehengi butoée Musa wau lotehengi Bele lo Eeya botie. Wau botia tio tumbaó malodelo mai tau-tauwalo tadiila Yahudi tilumuwoto ode delomo Bele lo Eeya wau loónajisi tambati u mantali botie!"

²⁹ (Timongolio loloiya odito sababu timongolio maloóonto olei Tropimus taulo Epesus boito tokota peé-peéenta wolei

Paulus; wau tolangtobi mongolio deú tei Paulus malodelo mai olio ode delomo Bele lo Eeya.)

³⁰ Ngoilanggubu kota malo tolonggalo tutu wau ngoáamila tau hitete-teteeáa loámbua daata-daatalo maó. Timongolio malo heúpa olei Paulus wau lodedeá olio yilumualo lonto Bele lo Eeya. Toú boitolo olo huhebu Bele lo Eeya hileútalio.

³¹ Toú tahipo tolonggaloa boito donggo hipo tolopania momate olei Paulus mate-mateelo maó, tau lopoótaa oli kamudangi pasuukani lo Roma deú ngoilanggubu Yerusalemu donggo hibuluhuta.

³² Tulusi ti kamudangi boito lotiangaó dengolo lota polowila wau pajule lapataó huáa lonaó woli mongolio ode tambati u hibuluhutawa boito. Toú taa dadaata boito loóonto oli kamudangi boito wolo pasukanilio, timongolio lohuheli hemomate olei Paulus.

³³ Ti kamudangi boito lonaó mota odelei Paulus tulusi loheúpa olio, wau lopoáhu talo mungu olio. Lapataó ti kamudangi boito malohintu tomimbihu tatoonu tei Paulus boito wau wolo umaa pilohutulio.

³⁴ Ngotayade lotaa dadaata boito lolametaó odie wau ngotayade poli

lolametaó odito. Owowoluwoa boito malo odito puyoóto tilinggula ti kamudangi boito madidu motota wonu wolo tutuulio tutu umalo toduo mai. Masababu uito tio lomalantaó alihu tei Paulus deloolo ode malakasi.

³⁵ Tou timongolio lodelo olio demota tutuádu, tahipo tolonggaloa boito malo lilalilau daá tilinggula tei Paulus bolo pilotaalio mola lomongo pajule boito.

³⁶ Timongolio tilunuhelio lonto wulea lo woomboa tahipo tolonggaloa boito u hiwuwa-wuwaatiá, "Patea tio mate-mateelo maó!"

³⁷ Odito matumuwoto ode delomo malakasi, tei Paulus loloíya maó odeli kamudangi boito, "Mowali watia mobisala ngopeé mola woli Tuani?" "Wolo yió mowali mobisala lo Yunani?" yilintu maó likamudangi boito.

³⁸ "Wonu odito, yió diila taulo Masiri boito taómoómolu mai helo powoluo polo malakala lapataó lopoteteá wopato lihulota tamoo-tolonggaloa otingolo tilumuwoto ode huta datahu u luasi daá daá wau delita?"

³⁹ Tei Paulus lolametaó, "Watia taulo Yahudi; watia ulipu lokota Tarsus, kota

u polohuna daá to Kilikia. Halapuwola poluasiasa mai watia mobisala maó totau-tauwalo boito."

⁴⁰Yi lapataó tei Paulus yiluasialio lobisala, tei Paulus tilimihulo totuádu, tulusi longisalati mota wolo uluúlio. Ngoáamila tau mahi poóoyonga. Lapataó tei Paulus malo bisala ode limongolio todelomo bahasa lo Ibrani. Tei Paulus lolóiya maó odie.

22 ¹"Mongo dulaá wolo Mongo wutato ngoáamilalo! Watia mamooowoli mai poduulua lowatia ode limongoli. Nte dungohi mai!"

²Toú timongolio loódungohe olei Paulus helo bisala todelomo bahasa lo Ibrani, malebe maó poli duóoti mongolio. Yi tei Paulus lopo tolonga mola tombangio.

³"Watia taulo Yahudi," ualei Paulus, "watia pilotutulio to Tarsus tolipu lo Kilikia, bo watia pilo udaálio tewe to Yerusalemu wau diliidiki loú motombipidu loguru daá Gamaliel todelomo butoó uilohi lei Musa odeli nene moyaanto. Tutuuwauwa debo odelo Mongo wutato ngoáamila tewe todulahee botie, watia olo moóloohe daá ode Allahu Taáala.

⁴ Watia helo ngalinaya tunggula yilate tahiduduá to pongaajali bohu boito. Timongolio ngoáamila, mopio mongo lolái meaambo mongobua, heilaúpo lowatia wau pilopo tuwoto laatia ode tutupa.

⁵ Ti limamu daá lohihilao wau ngoáamila Mahakama Agama mowali sakusi u watia diila mohimbulo. Sababu timongolio boitolo tamaa longohi olaatia tuladee podepita u pilopo dulungio mola ode tau-tauwalo Yahudi to Damusiki. Wolo tuladee boito watia lowali loheúpo mola teto totau-tauwalo tapalacaya to pongaajali boito, wau helodelo olimongolio ode Yerusalemu u hukuu-maniyolo."

⁶ "Toú watia donggo todelomo nonaó wau ngopeé meidungga mola to Damusiki, toú dulahee matotaú, tinela tuwau u mobaango daá debolo lotinelai lonto hulungo topalito lowatia.

⁷ Watia leumbade mola ode huta lapataó watia loódungohe suala tuwau lotahuda mai ode laatia, 'Saulus, Saulus! Yilongola yió mongolinaya ola-Ú?'

⁸ Lapataó watia malohintu, 'Tatoonu Ito botie, Tuani?' 'Waúlo Isa tauulo Najaret boito taa ilalinayamu,' tame-Tio mai.

⁹ Tau-tauwala tawoluo teto peé-peéenta wolaatia loóonto tinelo boito, bo timongolio diila loódungohe suala u lotahuda mai ode laatia.

¹⁰ Lapataó watia lohintu poli, 'Mawolo u waajibu pohutuo maó lowatotia yaa Eeya?' Eeya lolametai, 'Pobongulo wau tuwotolo mola ode Damusiki. Mola teto demaa poótaalio mai olemu pasali loú ngoáamila u mowali pohutuwomu moduduó otohila lo Allahu Taáala.'

¹¹ Watia lowali pitoó sababu tinelo u loópulau boito. Oditolio mongo sahabati lowatia lodelo olaatia tilumuwoto mola ode Damusiki.

¹² Teto woluo ngotaalio táilunte Ananias. Tio ngotaalio lotaa saale wau taaáti hemoponaó butoée Musa. Ngoáamila taulo Yahudi tahi biluloáwa to Damusiki hipo hulumatia daá olio.

¹³ Tio lonaó mai lomilohe olaatia, lapataó tilimihulaó totili lowatia wau lolóiya, 'Wutato Saulus, yió mamusi muli moóonto!' Toú boitolo olo watia lomintaáa mola baya laatia, tulusi loóonto olio.

¹⁴ Lapataó tio lolóiya olaatia, 'Allahu Taáala tinene moyaaanto malo lulaotai olemu alihu yió motota maó kahandaki-Lio

wau moóonto li Isa, Wato lo Allahu Taáala tahemohutu kahandaki lo Allahu Taáala wau modungoheó suala li Isa lohihilao.

¹⁵Yió mamowali sakusi u mopohabari ngoáamila wolo umaa iloontongamu wau ilodungohemu.

¹⁶Botia didu maó pohima lebe mohiheo. Tihuloolo mola wau wuduwalo batangamu u lihuwalo. Pongibodulo mola ode Eeya alihu yió lopato-Lio mai monto totoonulalo dusamu."

¹⁷"Watia luli lohualinga mola ode Yerusalemu, wau toú watia donggo hemoduá to Bele lo Eeya, watia kiluwaasa mai lo Rohullah.

¹⁸Watia loóonto Eeya; Tio lotahuda mai olaatia, 'Huáa tolai maó Yerusalemu, sababu tau-tauwalo tewe diila mololimo u silakusiyamu pasali-Ú.'

¹⁹Watia lolametaó, 'Yaa Eeya, tutuulio tutu mailotaawa limongolio deú watia maa tilumuwotaó ode bebee-leyaalo potabiaalo u loheúpa olimongolio wau helomate tau-tauwalo tapalacaya to Eeya.

²⁰Odito olo toú sakusi lo Eeya tei Stepanus pilatelio yila-yilateelo maó, watia lohihilao woluo teto wau akolo to pilomatea yila-yilateelo maó boito.

Tumbaó wawaa-tiyalo tahe lodaha maó boó limongolio lo tahe lomate olio yila-yilateelo maó.'

²¹ Bo Eeya luli lotahuda mai olaatia, 'Bolo ponaóolo, sababu waú mamopoáhu olemu monaó ode tambati u molamingo ode tau-tauwala tadiila Yahudi.'"

²² Tau-tauwalo debo tulusi hidungohe olei Paulus hemo bisala, bo to lapali pulitio boito timongolio malo nguatiá wolo daá-daáalo maó, "Pateaalo mate-mateelo maó taa debo odelo uito. Diila paatuti tio tumumulo!"

²³ Sambela hiwuwaatiá, timongolio helo pongoábeó jumba limongolio, wau helo polayuhe mola peahuó ode dulente.

²⁴ Yi tikamudangi pasuukani lo Roma boito maleídelo mota olei Paulus ode malakasi, alihu tio palakisaalo mota teto wolo diila omanusia u pongotaawalo wolo sababuulio tau-tauwalo Yahudi helo nguatiá odito olio.

²⁵ Bo touú tei Paulus mapilungu u buboálio, tei Paulus lolóiya maó ode polowila tatihu-tihula teto, "Wolo mowali momuboá ngotaalio walaga bele biluloá saaha li olongia lo Roma touú tio diipo bilutoío?"

²⁶ Loódungohe uito polowila boito malonaó mota odeli kamudangi lo pasuukani wau loloíya, "Wolo utieelo u mapohutuo li Paaá? Tau botie walaga lipu lo Roma!"

²⁷ Yi tikamudangi boito lonaó mota odelei Paulus wau lohintu maó, "Nte polelea mai, yió botie walaga lipu lo Roma!" "Joo," loíya maó lei Paulus, "Watia walaga lipu lo Roma."

²⁸ Tikamudangi boito luli loloíya, "Wau lowali walaga lipu lo Roma loú helo maayali ngohuntua daá!" Tei Paulus malo lameto, "Bo watia pilotutulio mai odelo walaga lipu lo Roma."

²⁹ Toú boitolo olo popoo-ngawaáalo suludadu taóhila momalakisa olei Paulus boito, malotouli wau tikamudangi boito olo mailoohe sababu tio malomungu olei Paulus, lebe-lebe pomaó tei Paulus walaga lipu lo Roma.

³⁰ Tikamudangi pasuukani lo Roma boito ohilaa daá motota tutuulio tutu wolo uloó sababu totau-tauwalo Yahudi helo potala olei Paulus. Masababu uito loombulio mola tio lotiangai mongo iimamu taúwa wau Mahakama Agama alihu motiámbu. Lapataó tei Paulus

yilopatio lonto pungulio, tulusi dilelolio mota lotaalua woli mongolio ngoáamila.

23 ¹ Tei Paulus lolontonga popoo-ngawaáalo mahakama boito tulusi loloíya maó, "Mongo wutatuú! Tunggula todulahee botie watia molaasa diila ototala to Allahu Taáala todelomo hilaa lowatia u molo@otapu tinelo Eeya pasali tutumulo laatia."

² Tou tei Paulus loloíya odito, ti limamu Daá Ananias lopoáhu tau u tilimikula@ototili lei Paulus lolambali tunggilee Paulus.

³ Yi tei Paulus loloíya maó odeli iimamu daá boito, "Allahu Taáala tantuulo mamolambali mai olemu taa munapiki tadiila tióotutua mantali! Ito lotihuloáa teto lomutoá olaatia loduduá butoée Musa, lebe-lebe pomaó Ito lohihilao malo lambanga butoó boito loú lopoáhu tau lolambali olaatia!"

⁴ Tau-tauwala tatotili lei Paulus loloíya maó odelei Paulus, "Yió lohina li iimamu daá lo Allahu Taáala!"

⁵ Tei Paulus malolameto, "Oo, diila otaawa lowatia, Mongo wutato, deú tio iimamu daá. Memangi todelomo Kitabi woluo tulatulade, 'Yió diila maó pohina taúwa lo bangusamu.'"

⁶ Tei Paulus loóonto deú ngotayadu lo popoo-ngawaáalo mahakama boito bo wambaó tau-tauwalo Saduki wau ngotayade poli bo wambaó tau-tauwalo Parisi. Sababu uito tio loloíya maó ode mahakama boito, "Mongo wutato! Watia ngotaalio lo Parisi, wali mai lo Parisi. Watia bilutoío teea, sababu watia palacaya deú tahe lopunungo mamuli tumumulai."

⁷ Touú tio loloíya maó odito, tau-tauwalo Parisi wau tau-tauwalo Saduki boito mahipo buutola, tilunggula majalisi boito lopoó lowali dulo polembóá.

⁸ (Sababu tau-tauwalo Saduki ohuhama deú taa mailate diilalo tumumulai, deú malaáikati diaaluo, wau roroo-huwaalo olo diaaluo; hiambola taulo Parisi palacaya maa woluwoolio mai loú ngoáamilalo boito.)

⁹ Yi maa tilumoodei buluhuta ulaba-labaalo. Dengolo lota taulo Parisi talowali guru lo agama tilimihula mola wau helo tehengi maó tióotutua. Timongolio loloíya, "Moduduá mota olami tau botie diila ototala penu boli ngoídi maó! Tanu memangi woluo rohu meaanto malaáikati tahelo bisala maó olio!"

¹⁰ Polo buutola boito lowali odito labalio tilinggula tikamudangi boito mailoohe dia bolo tei Paulus mapoluutoá limongolio. Oditolio tio malo poáhu pasukanilio mota lohama mai olei Paulus tohuungo lotau-tauwala boito wau lodelo olio ode malakasi.

¹¹ Hui u wumbutio mola ti Isa Eeya mai tilimihulaó totili lei Paulus wau lotahuda, "Poólotola mola hilaamu! Yió malongohi u silakusiyamu pasali-Ú to Yerusalemu. Yió demusi olo mongohi u silakusiyamu boito mola to Roma."

¹² Toú didimodupo loombulio mola, tau-tauwalo Yahudi malo woomboa. Timongolio lotadia diila tamo lamelo wau mongilu wonu timongolio diipo loópate olei Paulus mate-mateelo maó.

¹³ Maito maó loú wopato pulu lota tahelo woomboa boito.

¹⁴ Timongolio lonaó mota ode mongo iimamu taúwa wau mongo taúwa lo Yahudi wau lolóiya, "Ami malo tadia peé-peéentalo maó, diila tamo lamelo meaalo mongilu wolo-wolo wonu ami diipo loópate olei Paulus mate-mateelo maó.

¹⁵ Naa, botia Mongo wutato wolo popoo-ngawaáalo Mahakama Agama wajibulio molao mola tuladee odeli kamudangi pasuukani lo Roma boito u mohile olio muli modelo mai olei Paulus mai motaalua woli mongoli, pohutu debo odelo timongoli donggo ohilaa muli momalakisa palakalalio wolo lebe moúlintapo. Wau ami mamoti dapato momate olio mate-mateelo maó tou tio diipo meidungga mai odia."

¹⁶ Bo walaó lowutatio taabua lei Paulus loódungohu patuju lo woomboa boito. Yi tio malonaó ode Malakasi wau lopoótaa suáli boito olei Paulus.

¹⁷ Tei Paulus tulusi malo tiangai polowila ngota wau lolóiya maó olio, "Delowalo tabohulotau botie odeli kamudangi; tio ohilaa mopodulohe u hitua-tuawua olio."

¹⁸ Polowila boito malodelo tabohulotau boito odeli kamudangi wau lolóiya maó, "Tei Paulus, taa u tilaahangia boito, lotianga olaatia wau léidelo mai olaatia tabohulotau botie odeli Paaá; tio ohilaa mopo dulohei u hitua-tuawua."

¹⁹ Ti kamudangi boito malodihu uluú lo tabohulotau boito, lapataó lodelo olio

lotiwiwi maó ode tili wau malohintu, "Wolo u mapolelemu mai olaú?"

²⁰Tabohulotau boito lolameto, "Tau-tauwalo Yahudi malo heeluma u moharapu li Tuani modelo olei Paulus mota motaalua wolo Mahakama Agama loombu, debo odelo timongolio ohilaa muli momalakisa palakalalio lebe moulintapo.

²¹Bo diila maó duduí li Tuani hihile limongolio boito, sababu maito maó lou wopato pulu lota tadonggo hituuá tamo momontoá olio todalalo. Timongolio boito ngoáamilalo malo tadia diila tamo lamelo wau mongilu wonu timongolio diipo loópate olei Paulus mate-mateelo maó. Masaatia botie olo timongolio mahihetua; bolo hemohima totameti Tuani wambaño."

²²Tikamudangi boito malo loíya, "Diila maó polelea boli olita, deú yió malo poótaa mai utie olaú." Lapataó tio maleí walinga tabohulotau boito.

²³Lapataó tikamudangi boito malo tiangai polowila duulota, tulusi tio lolóiya olimongolio, "Popohetua maó dulo hetuto suludadu wolo pajule pitu lopulu lota owadala wau dulo hetuto suludadu ototobuó u momonggato jamu sambila tou huilo botie ode Kaisarea.

²⁴ Popohetua maó olo wadala u taéya lei Paulus wau delowalo tio wolo moáahu demola li Gubolonulu Peliks."

²⁵ Lapataó tikamudangi boito malo luladee tuladu u tingohio odie mola,

²⁶ "Taa Lailaió Gubolonulu Peliks. Salamu lonto olei Klaudius Lisias!

²⁷ Tau botie mailaúpo tau-tauwalo Yahudi wau bolo ngopeé pilopaatea limongolio yila-yilateelo maó, wonu diila watia wolo pasuukani lowatia lonaó mai wau lopoáahu olio; sababu watia loódungohu deú tio walaga lipu lo Roma.

²⁸ Sababu watia ohilaa motota maó wolo tutuulio tutu totala upilo tuludi mongolio olio, yi watia malodelo olio ode Mahakama Agama limongolio.

²⁹ Bo malo patato deú tio diila helohutu penu boli tuwau maó upaatuti pohukuu-manialo wolo hukuumanu mate meaanto potutupalo olio. Timongolio helo potuludu olio bo wambaó wuwuumbuta wolo bubuu-toóowalo agama limongolio lohihilao.

³⁰ Lapataó watia pilo leleyalio mai deú woluo patuju u moleeto lonto taulo Yahudi to olio. Oditolio watia huáa lolao mai olio odeli Tuani Gubolonulu. Wau watia

malo poáhu mai tahi potulude olio mopo dudulai dudulohi mongolio odeli Tuani."

³¹ Yi popoo-ngawaáalo suludadu boito malo ponaó tuugasi limongolio. Timongolio lohama olei Paulus tulusi lodelo olio hui boito demola Antipatrisi.

³² Loloombulio mola hilulia maó limongolio pasuukani owadala lopo tolonga mola lononaó wolei Paulus, wau timongolio lohihilao luli hualingai ode malakasi.

³³ Toú pasuukani owadala boito leidungga mola ode Kaisarea, pilopo tunggulaó limongolio tuladee boito odeli Gubolonulu, lapataó lohudu maó olei Paulus ode olio.

³⁴ Toú ti gubolonulu boito lapato lobaca maó tuladee boito, malohintu tio olei Paulus lonto utoonu asaliilio mai. Toú ilotaawalio deú tei Paulus asalilio mai lonto Kilikia,

³⁵ tio loloiya maó, "Ooó! Waú mamo malakisa palakalamu, wonu bolo tamo podulua olemu malei dungga mai." Tulusi tio malo malentaó alihu tei Paulus tahangiola todelomo bele biluloá saaha li olongia lei Herodes.

24 ¹ Limu hui mola lapatio maó, ti limamu Daá Ananias wau mongo taúwa lo Yahudi lonaó mola ode Kaisarea peé-peénta wolo pala kololo ngota taílunte Tertulus. Timongolio mola lotaalua woli Gubolonulu Peliks wau lopo dudulaó dudulohi mongolio pasali olei Paulus.

² Tou tei Tertulus tiloduwolio ode talu, tio helo potuludu olei Paulus odie mola, "Tuani Gubolonulu Taa Lailaió! To totaúwa li Tuani lipu lamiaatia aamani. Wau to otinepo li Tuani olo mangohuntua ulopiohe u pilohutu ode bangusa lamiaatia.

³ Ngoáamilalo boito hetolimoo lamiaatia laito wolo oduólo wau pasisi u molai-laióolo mola penu boli toutoonu.

⁴ Bo alihu diila maó mopoluhi lowakutu ngohuntua li Tuani, ambunguolo bolo potala ti Tuani modungoheó dudulohu lamiaatia u limbu-limbu botie.

⁵ Lotapu mai lamiaatia tau botie tamoo-tolonggaloa umoó topotala. Boli tou toonulalo maó tio hemo potoodei tolonggalo towolota tau-tauwalo Yahudi wau tio lowali taúwa helo poóliyoó tau-tauwalo Najaret.

⁶ Tio tumbaó malo himontala loPONAJISI Bele lo Eeya, bo amiaatia malo heúpa olio. [Amiaatia omakusudu momutoá olio moduduá butoó lo agama lamiaatia lohihilao.

⁷ Bo tikamudangi Lisias malohehu olio lonto olamiaatia,

⁸ wau lomalenta alihu tahelo podulohu olio mai motaalua woli Tuani.] Wonu ti Tuani momalakisaó tau botie, ti Tuani lohihilao mamodungohu monto olio u otutu loú ngoáamilalo upilo dulohei lamiaatia botie pasaliilio."

⁹ Tau-tauwalo Yahudi mota teto olo loduduá lopotulude olei Paulus wau helo poótutuwolo maó ngoáamila uiloíya lei Tertulus.

¹⁰ Lapataó ti gubolonulu boito longohi maó isalati olei Paulus deú tio mowali mobisala. Yi tei Paulus malo loíya, "Otaawa lowatia ti Tuani malowali hakimu tolipu botie ota-otaunualio mola hiheolio. Uito sababuulio watia molaasa sanangi moóowoli mai podulua lowatia botie ode talu li Tuani.

¹¹ Ti Tuani mowali motulete maó lohihilao deú lebe loú mopulaa duuhui mola uilalu

maó watia lonaó ode Yerusalemu mola lotabia.

¹²Wau diila peéenta maó tau-tauwalo Yahudi loódungga olaatia helo buutola penu boli wolo ngotaalio meaanto helo himoáa tau u mohutu tolonggalo mopio to Bele lo Eeya meaanto to bebee-leyaalo potabiaalo meaanto penu boli touútoonu todelomo kota.

¹³Timongolio olo diila lowali lopo bukuti maó totoonulalo potuludi mongolio u mapilo tunggulai limongolio odeli Tuani pasali lowatia.

¹⁴Memangi musi akuo lowatia toli Tuani deú watia hemolubo Allahu Taáala tinenemoya lamiaatia loduduá pongaajali li Isa tahe anggapuo limongolio tilala. Bo watia donggo palacaya touú ngoáamilalo u hitulade todelomo Buku lei Musa wau Buku lo Mongo nabi.

¹⁵Tutuuwauwa debo odelo timongolio, watia olo ohalapani to Allahu Taáala deú ngoáamila tau mamuli tumumulai touú mailate maó -- tau-tauwalo mopiohu, meaambo tau-tauwalo moleeto!

¹⁶Uito sababuulio watia laito hemo tolopani mopio-piohuulo maó, alihu hilaa

lowatia u maloótapu tinelo Eeya belesi to Allahu Taáala wau beresi tomanusia.

¹⁷Lapataó dengolo taunu mola didu to Yerusalemu, watia luli lohualinga mola odito lodelo mola doi u pilomantu ode bangusa lowatia wau mola lopodewo bake ode Allahu Taáala.

¹⁸Toú watia donggo hemohutu maó uito, ilodungga limongolio watia to Bele lo Eeya, toú watia mailapato wolo upacala pomantaliya lobatanga. Diaaluo taa dadaata wolaatia, wau diaaluo olo tolonggalo mola teto toú boito.

¹⁹Bo woluo dengolo lota taulo Yahudi mola teto lonto polopinsi lo Asia. Timongoliolo tamaa wajibulio woluo tewe umopo tunggulai dudulohi mongolio odeli Tuani, wonu timongolio odudulohu u hitua-tuawua pasali lowatia.

²⁰Meaalo hulialo maó tau-tauwala botie moóowoli lohihilao ololeeta wolo u mailotapu mai limongolio olaatia toú watia pilopo taaluo limongolio ode Mahakama Agama.

²¹Timongolio bo loótapu maó tolomodu kalima u ngotahe botie wambaó uiloíya lowatia totalu limongolio, deúito-yito kalima odie: Watia bilutoío todulahee botie

bo u sababu watia palacaya deú tamailate mamuli potumulo–Lio mai."

²² Lapataó tei Peliks tamalotota ngohuntua pasali lo pongaajali li Isa, lopoó lapato sidangi lo palakala boito. "Waú mamu muutusi maó palakala botie," ualio, "wonu tikamudangi Lisias malei dungga mai."

²³ Lapataó tio lomalantaó polowila tatihu–tihula pasali lei Paulus boito alihu debo molahangi olei Paulus, bo wolo mongohi ngoídi obeevasi olio wau mopoluasi mongo sahabatilio mongohi olio wolo u palaluolio.

²⁴ Dengolo hui mola lapatio maó tei Peliks lonaó mai, tilamania lodilelio táilunte Drusila; tio ngotaalio lo Yahudi. Lapataó tei Peliks lopoáhu tau mota lohama mai olei Paulus, lapataó tei Peliks malo dungoheó olei Paulus helo bisala pasali loú palacaya li Isa Almasi.

²⁵ Bo toú tei Paulus lopo tolunga mola lo bisalaalio pasali loú juujulu wau mongotongo napusu wau pasali lo hukuumanu to Dulahu Kiaama, tei Peliks mailohe tulusi lolóiya maó, "Yió mowali monaóolo botia. Waú mamuli motiangai olemu wonu ohiangio."

²⁶ Toú boito tei Peliks donggo hemo haalapu mamoo'tapu mai doi monto olei Paulus. Uito sababuulio tio pipiiúwa mota helei hama mai olei Paulus u mobisala wolio.

²⁷ Lapataó dulo taunu mola, tei Perkius Pestus lobuulota wolei Peliks lowali gubolonulu. Wau kalana tei Peliks ohilaa momiyo hilaa lotau-tauwalo Yahudi, hiluliaalio maó tei Paulus todelomo tutupa.

25 ¹ Tolo hui mola lapatio maó tei Pestus leitungga mola ode madala boito, tio mola lonto Kaisarea ode Yerusalemu.

² Mola teto mongo iimamu taúwa wau mongo taúwa lo Yahudi loóowoli maó olio pasali lo dudulohi mongolio tolei Paulus. Timongolio tulusi wambaó hemomiyo olei Pestus

³ alihu to opiohu hilaalio toli mongolio, tio ohilaa mopoáhu maó tau modelo mola olei Paulus ode Yerusalemu; sababu timongolio malo heeluma u momate olio mate-mateelo maó tohuungo dalalo.

⁴ Bo tei Pestus lolametaó, "Tei Paulus donggo tataahangi to Kaisarea; wau watia

lohihilao olo diilalo mohiheo mamuli mohualinga mola odito.

⁵ Oditolio, hulialo maó tahimuloa lo ulipu towolota limongoli peé-peéenta wolaatia ode Kaisarea wau mopo palakala maó olio mola teto, wonu memangi tio malohutu tuwaulio lototala."

⁶ Lapataó lotibiluloá to Yerusalemu tanu donggo walu meaalo mopulu hui mola, tei Pestus luli lohualinga mola ode Kaesarea. Loombulio mola tio lohutu sidangi lobubutoó wau lomalentaó leídelo olei Paulus mai lotaalua.

⁷ Tou tei Paulus leidungga mai, tau-tauwalo Yahudi tamaa lonaó mai lonto Yerusalemu tilimihulaó to tiliilio, wau maloóowoli totoonulalo potuludu u hibuheta olio.

⁸ Todelomo podulualio, tei Paulus loloíya, "Watia diila lohutu penu boli tuwau maó utilala tobutoée Musa meaalo ode Bele lo Eeya meaalo odeli Kaisari lo Roma."

⁹ Bo tei Pestus ohilaa mohama hilaa taulo Yahudi. Yi tio malohintu olei Paulus, "Mohuto yió monaó ode Yerusalemu butoólio mola teto totaluú tomimbihu totoonulalo potuludu boito?"

¹⁰ Tei Paulus lolametaó, "Watia donggo tihutihula totalu lo mahakama li Kaisari lo Roma; wau totambati boitolo watia musi butoólio. Otaawa li Tuani lohihilao deú watia diila ototala totaulo Yahudi.

¹¹ Wonu watia malo lambanga butoó wau helohutu hitua-tuawua upaatuti pohukuu-maniyola lo hukuumanu mate, yi watia iloheela lohilao mate. Bo wonu totoonulalo potuludi mongolio boito diila otutu, diaaluo penu boli ngotaa maó tamowali mohudu olaatia ode limongolio. Watia mohaalapu butoólo tobubutoó li Kaisari!"

¹² Lapatio maó lodulohupa wolo tahipo naseehatia olio, tei Pestus malo loíya, "Yió mohaalapu butoólo tobubutoó li Kaisari, oditolio yió musi monaó mola motaalua woli Kaisari."

¹³ Diila ngoolo mola hiheolio lapatio maó, ti Olongia Agripa wolei Bernike lonaó mai ode Kaisarea mai lopali ma@o hinta moáahu olei Pestus.

¹⁴ Lapataó timongolio ngoolo hui mola mota teto, tei Pestus helo tombangaó palakala lei Paulus odeli Olongia Agripa. Tei Pestus lolóya, "Woluo tewe taulo tutupa ngota tatilolaa maó lei Peliks.

¹⁵ Toú watia to Yerusalemu, mongo iimamu taúwa wau mongo taúwa lo Yahudi lopo tunggulai dudulohi mongolio pasali lotau boito wau lohile alihu watia mopodehu maó hukuumani olio.

¹⁶ Bo watia lolametaó deú taulo Roma diila mowali mohudu odito wambaío ngotaalio lo tapilo tuludelio u hukuumaniyola, wonu tapilo tuludelio boito diipo lotaalua wolo tahelo daúwa olio wau yilohia wakutu mopodulua lobatanga.

¹⁷ Oditolio, toú timongolio lonaó mai odia, watia diila lohima lebe lohiheo. Loombulio mola watia huáa lohutu sidangi lobubutoó wau lomalentaó alihu tau boito deloolio mai motaalua.

¹⁸ Toú tahelo podulohu olio tilimihula mola loóowoli lo dudulohi mongolio, timongolio diila loóowoli penu boli tuwau maó u moleeto debo odelo u helantobu lowatia umaa potunggulo mai limongolio.

¹⁹ Huhama limongolio bo wambaó lohiihede wolio tomimbihu agama limongolio lohihilao wau tomimbihu lo tahingota-ngotaawa tailunte Isa. Tau boito mailate, bo tei Paulus malo buutola deú tau boito tumutumulo.

²⁰ Sababu watia lolingu tomimbihu woloolo mola watia mowali moótapu mai totoo-mbangowalo pasali lo palakala boito, watia malohintu olei Paulus wonu tio mohuto monaó ode Yerusalemu wau butoólio mola teto pasali lo palakala boito.

²¹ Bo tei Paulus lohile u mopo tolonga mola palakalalio; ode bubutoó ulebe lailaió; tio lohile alihu tio debo tataahangi totutupa tunggula palakalalio putusio maó li Kaisari. Sababu uito watia lomalentaó alihu tio debo tahangiola tulusi, tunggula watia ohiango u molao olio odeli Kaisari."

²² Lapataó tei Agripa malo loíya odelei Pestus, "Watia lohihilao olo ohilaa modongohe tau boito." "Loombu ti Tuani mowali modongohe olio," tametaó lei Pestus.

²³ Loombulio mola ti Agripa wolei Bernike lonaó mai wolo upacala odudaá. Timongolio tilumuwotaó ode huwali leidaá losidangi peé-peéenta wolo taduduulaá diti lo popaatea wau tau-tauwalo tahimuloa lo ulipu tokota boito. Topalenta lei Pestus, tei Paulus pilopo tuwotio mai.

²⁴ Lapataó tei Pestus malo loíya, "Baginda Agripa wau mongo wutato ngoáamilalo! Tau botie mapilo dulohio mai olaatia lo

ngoáamila bangusa lo Yahudi, mopio tato Yerusalemu boli tateea. Timongolio helohile loú mo@oohu@u wolo hiwuwa-wuwaatiá deú tio diila paatuti poluli maó tumutumulo.

²⁵ Bo watia diila loódungga penu boli tuwau maó u pilohutulio u mowali pohukuu-maniyola olio wolo hukuumanimate. Wau masababu tio lohihilao malohile palakalalio butoóla to bubutoó li Kaisari, yi watia malolantu u molao mola olio odeli Kaisari.

²⁶ Bo watia diipo o katalangani tuwau maó u mopatato daá tomimbihu batangalio u tuladulo todelomo tuladu lowatia odeli Kaisari. Uito sababuulio pilopo taaluo mai lowatia tio odeli Mongo tuani ngoáamilalo, tidiyolo daá ode Taa Lailaió Baginda Agripa! Makusudu lowatia yito alihu lapataó momalakisa olio botie, woluo u hitua-tuawua olaatia u tuladulo.

²⁷ Sababu to pongolaasa lowatia, diila to tambatilio molao mola tau ngota lotutupa loú diila mopílaalo totoonulalo totala u pilopo tulude olio."

26 ¹ Tei Agripa lolóiya maó odelei Paulus, "Yiό poluasiyóú mai mobisala u mopoduulua batangamu."

Yi tei Paulus malo mintaáa mola uluúlio tulusi lopo tunggulaó podulualio odie mola,

² "Taa Lailaió Baginda Agripa! Watia molaasa opaéeda daá moó podudulai poduulua batanga laatia tumbaó ode talu li Baginda pasali loú ngoáamila podulohu upilopo dudulai lotau-tauwalo Yahudi pasali laatia;

³ tidiyolo daá sababu otaawa tutu li Baginda uúdu wau susuu-aliyaalo taulo Yahudi. Masababu uito, ambunguolo potaala ti Baginda modungoheó tombango lowatia wolo sabari.

⁴ Ngoáamila taulo Yahudi motota woloolo mola tutumulo watia tonggadio donggo muda mai. Otaawa limongolio deú tonggadio watia lowali taamuda mai, watia maa tilumumulo towolota bangusa laatia lohihilao to Yerusalemu.

⁵ Malohiheo ilotaawa limongolio pasali laatia. Wau wonu timongolio mohuto, timongolio mowali mongohi mai sakusi deú tonggadu bohuliolo mai watia maa tilumumulo odelo taulo Parisi wau helo duduó totoonulalo wuúdulio u modetoá daá todelomo agama lamiaatia.

⁶Wau botia watia tihutihula teea mabutoólio sababu watia palacaya to daantia u pilohutu lo Allahu Taáala odeli nenemoya lamiaatia.

⁷Daantia boitolo olo u hehaalapuo lo mopulaa duluo suku bangusa lo Isiráilu, tilinggula timongolio helo taáaluku wau hemo hulumati to Allahu Taáala hui wau dulahu. Wau tumbaó kalana watia palacaya to daantia boito, Baginda Taa Lailaió, watia pilopotala lotau-tauwalo Yahudi.

⁸Yilongola mongo wutato tau-tauwalo Yahudi diila moó palacaya deú Allahu Taáala muli mopo tumulai taa mate?

⁹Bohuliolo mai watia lohihilao olo ohuhama deú watia musi mohutu maó totoonulalo hitua-tuawua u motehengi li Isa lonto Najaret boito.

¹⁰Wau memangi uitolo u mapilohutu lowatia to Yerusalemu. Wolo tuladu kawasa lonto mongo iimamu taúwa, watia malo potuwoto ode delomo tutupa ngohuntua tau-tauwalo tadebo molotolo hilao to Allahu Taáala. Watia olo tumbaó malo duduá lo akolowa deú timongolio dehuwalo hukuumanu mate.

¹¹Poó-poódaata watia helo posikisa olimongolio to bebee-leyaalo potabiaalo,

alihu momakusa olimongolio momaahu wolo u pilalacaya limongolio. Odito patulio hilaa lowatia olimongolio tilinggula ode kokoo-tawaalo wewo olo henilanaó lowatia u mohilapita olimongolio mola teto."

¹² "Wolo makusudu boitolo olo watia lodelo tuladu kawasa lonto mongo iimamu taúwa wau lonaó mola ode Damusiki.

¹³ Tou watia tohuungo dalalo, to tomutaáa lodulahu, Baginda Taa Lailaió, watia loóonto tinelo tuwau lonto hulungo ulebe motilango wolo mato lodulahu. Tinela boito lotinelai topalito lowatia wau topalito lotau-tauwalo tahinaówa peé-peéenta wolaatia.

¹⁴ Amiaatia ngoáamila leibalata tohuta. Tulusi watia loódungohe suala tuwau lotahuda mai ode laatia todelomo bahasa lo Ibrani, "Saulus, Saulus! Yilongola yió tulusi wambaó hemo ngalinaya ola-Ú? Maa olaasamu lohihilao mongongoto, wonu yió tulusi wambaó moluwali to taúwa-Lio lo tamowali tuanimu."

¹⁵ Yi watia malo loíya, 'Tatoonu Ito, Tuani?' Wau Eeya lolametai, 'Waúlo Isa tahe alinayamu.

¹⁶ Pobongulo wau tihulolo mola!
 Waú mopo bilohei batanga olemu
 wolo makusudu u momuduó olemu
 mowali tamoomayawa ola-Ú. Yió musi
 mopohabari ode taawewo wolo u
 iloontongamu to dulahee botie pasali-Ú
 wau pasali loú wolo u demaa pobilohu-Ú
 mai olemu towakutu udungga-dungga
 mai.

¹⁷ Waú mamo lopata olemu monto
 bangusa lo Isiráilu wau monto
 babaa-ngusawalo tadiila Yahudi.
 Waú mamopoáhu olemu monaó ode
 limongolio,

¹⁸ u momuó mato limongolio alihu
 timongolio lumualo monto u modiólomo
 wau tumuwoto ode u mobaango; alihu
 timongolio molopato monto aangio lo
 Ibilisi, lapataó kiluwaasa lo Allahu Taáala.
 Yi loú momalacaya ola-Ú duduu-sawaalo
 limongolio maa ambunguo-Lio wau
 timongolio mamowali pongawaá umati lo
 Allahu Taáala taílo tulaota."

¹⁹ "Sababu uito, Baginda Agripa, watia
 laito hemo tolopani modungohe to
 bibilohe umaa tilolimo lowatia lonto
 Allahu Taáala boito.

²⁰Wolo juujulu watia helo poótaa ode tau-tauwalo deú timongolio musí molilihu monto duduu-sawaalo limongolio wau mohudu mola batanga limongolio ode Allahu Taáala wau mopo biloheó todelomo tutumuli mongolio deú timongolio malo lilihu lonto duduu-sawaalo limongolio. Watia helo poótaa suáli boito bohulio mai to Damusiki, lapataó to Yerusalemu wau to ngoilanggubu Yudea wau towolota lotau-tauwalo tadiila Yahudi.

²¹Masababu uitolo tau-tauwalo Yahudi loheúpa olaatia to Bele lo Eeya wau helo tolopani momate olaatia mate-mateelo maó.

²²Bo tunggula tosaaáti botie watia dilaaha lo Allahu Taáala, tilinggula watia loótihulo teea moóowoli mai u silakusia lowatia ode taa ngoáamila -- taúdaá meaalo taúkikiiió. Wolo uiloíya mai lowatia botie diila ngopohia loú wolo upilo nubuwati mai lomongo nabi wau lei Musa;

²³deúito-yito Olongia Tamoo-poáahua tadilanti mai lo Allahu Taáala boito musí modutolo, wau mowali taa bohulio umuli mobongu mai tou mailate; alihu woleeto Tio mowali mopohabari mai tilango -- deúito-yito u mopoáahu -- mopio ode

tau-tauwalo Yahudi boli ode tau-tauwalo tadiila Yahudi."

²⁴ Toú tei Paulus donggo hemoówoli podulualio boito, tei Pestus malo nguatió, "Yió mabiyongo Paulus! Ilimiimu u dadaata boito maloó biyonga olemu!"

²⁵ Bo tei Paulus lolametaó, "Watia diila biyongo, Taa Lailaió. Tataa-heyaaalo uiloíya lowatia boito otutu wau yilumualai lonto pikiilangi u seehati.

²⁶ Ti Baginda Agripa lohihilao motota tutu susuu-aliyaalo boito. Uito sababuulio watia buheli mobisala mai totalu li Baginda wolo juujulu. Watia yakini diaaluo penu boli tuwau maó susuu-aliyaala boito udiipo ilotaawa li Baginda, sababu ngoáamilalo boito diila lotoduo to tataa-mbatiyalo u tutuuó.

²⁷ Taa Lailaió Baginda Agripa, tingga ti Baginda palacaya uiloíya mai lomongo nabi? To pongolaasa lowatia ti Baginda palacaya!"

²⁸ Lapataó tei Agripa loloíya maó odelei Paulus, "Halapumu gambangi mohutu olaú mowali Nasara todelomo wakutu u bo ngoínta lomola?"

²⁹ "Todelomo wakutu u bo ngoínta lomola meaanto todelomo wakutu u mohiheo,"

ualei Paulus, "watia moduá mola ode Allahu Taáala alihu ti Baginda wau Mongo tuani ngoáamilalo tamo dungohe olaatia todulahee botie mowali debo odelo watia -- ngopohia pomungu botie, tantulo maó!"

³⁰ Pulitio tibaginda onlongia, ti gubolonulu wolei Bernike, wolo ngoáamila tawewolio tilimihulaó.

³¹ Tou maa to bulemengio, timongolio hipoloíyawa ngota timongota, "Tau botie diila lohutu penu boli tuwau maó upaatuti pohukuu-maniyalo wolo hukuumanu mate meaalo tutupaalo."

³² Lapataó tei Agripa loloíya odelei Pestus, "Tau botie mamowali lopatolo, wonu humayaalio tio diila mohile wolo moóohuú palakalalio butoóla to bubutoó li Kaisari!"

27 ¹ Lapataó tilantulio maó deú ami musu mobite mola ode Italia, tei Paulus wau dengolo lota taulo tutupa wewo yiludulio odelei Yulius, polowila pasuukani suludadu lo Roma u ilunte "Resimeni li Kaisari".

² Ami lotitaé to kaapali u leitungga mai lonto Adramitium, lapataó lomonggato wolo kaapali boito umalei dapato mobite

mola ode raraa-buwaalo to polopinsi lo Asia. Tei Aristarkus, ngotaalio lo Makedonia talei dungga mai lonto Tesalonika, lobite olo peé-peéenta wolami.

³ Loombulio mola ami leidungga mola ode Sidon. Tei Paulus pilohutulio lou mopiohe daá lei Yulius. Tio yiluasialio lobiilohe wolo mongo sahabatilio alihu timongolio mowali mongohi maó olio wolo u palaluolio.

⁴ Lonteeto ami lopo tolonga mola lobibiite lami. Sababu dupoto lalaawania wolo dulungo kaapali, ami malobite tulusi lotiduluhe mola to pentadu pulo Siprus u leililunga ngopeé todupoto.

⁵ Lapataó ami loli dehetu u tataalua wolo Kilikia wau Pampilia tulusi leidungga mola ode Mira tolipu lo Likia.

⁶ Mota teto polowila boito loódungga kaapali tuwau lonto Aleksandria u mamobite mola ode Italia. Yi tio lopo limbataó olami ode kaapali boito.

⁷ Dengolo hui mola hiheolio ami hilayahe moopoto daá, wau wolo tióopatea pulitio maó ami demola ngoilamingo kota Knidus. Lapataó sababu dupoto debo donggo mobulilo, ami diila loówali lopo tolonga

mola lobibite lami ode dulungo bohulio. Yi ami malobite mola ode hulialio lopulo Kreta, loli Wulungo Salmone alihu mola teto ami meililungo todupoto.

⁸Wolo tióopatea ami hilayahe lotiduluhe mota to pentadu lopulo boito tunggula pulitio ami leidungga mola totambati tuwau u ilunte Rabua Ugaaga, diila boti molamingo monto kota Lasea.

⁹Toú boito Dulahu Buka Polodaamea taulo Yahudi malo paluto. Ami maílo pulita lowakutu dadaata, tilinggula madidu wakutuulio u mobite wolo aamani. Sababu uito tei Paulus longohi naseehati odie olimongolio,

¹⁰"Mongo wutato, moduduá mota huhama lowatia, matopotala daá wonu ito mobite tulusi. Ito mamooó toduo mai u luhi daá diila bo wambaó to dudetohunto wau kapaalinto, bo jiwanto olo mamooli."

¹¹Bo polowila boito lebe palacaya to julumudi wau to kapitengi lokaapali wolo loíya lei Paulus.

¹²Rabua mota teto memangi diila mopiohu u potirabua lo kakaa-paliyaalo tosembo lopolo huhulo. Masababu uito odaata lo tahipo kalajawa tokaapali akolo u muli mobite mololaa maó rabua boito

sababu timongolio ohilaa motolopani tunggula mola ode Peniks wau motibiluloá mola teto tunggula sembo lopolo huhulo mopaluto. Peniks yito rabua lokaapali to Kreta u talutalu ode baradaya wau barlau.

¹³ Toú boito dupoto hulialio hihiipa loú moopoto. Yi tolantobu lo tahipo kalajawa tokaapali timongolio mamowali poli mobite. Oditolio timongolio malo mintaáa jangga tulusi lobite lotiduluhe mola topentadu pulo lo Kreta boito.

¹⁴ Bo diila lohiheo mola lapatio maó dutala daá -- deúito-yito dupoto u ilunte dupoto Tiimuru Lau -- lohiipo moóohuú lonto tudulio,

¹⁵ wau helo lemba kaapali lami. Masababu kaapali boito diilalo mowali mobite tulusi moluwali dupoto yi ami madidu okawasa wau lopoluli lomaó kaapali leelihu dilelo dupoto.

¹⁶ Ami leililunga nogopeé, toú ami yilumaode mola toámabahu hulialio lopulo Kauda u mooyoto boito. Mota teto wolo tióopatea ami loókawasa maó sikuci lokaapali lami.

¹⁷ Lapataó sikuci lokaapali boito bilintaáa mola ode kaapali, kaapali boito lohihilao piloó toheeto wolo lomake awadu u

pilolihuto lolilito kaapali boito. Sababu moohe bolo meihuwato totudu lohungayo Sirtis u mooti, layahu mailohudu wau tulusi kaapali piloluli mota loduduá dupoto.

¹⁸ Dupoto tulusi lilalilau tilinggula loombulio mola dudetohu kapali pilomahulo ode deheto.

¹⁹ Todulahee wumbutio mola poli tahipo kalajawa tokaapali boito luli lopomahula mola totoonulalo pakaakasi lokaapali ode deheto lo uluú limongolio lohihilao.

²⁰ To oduduulahe mola hiheolio ami diila loóonto mato lodulahu wau poliyama wau dupoto debo tulusi lilalilau. Pulitio diduuluo maó halapani lami u moáahu.

²¹ Ngoolo waktu mola hiheolio tau-tauwala boito diila helo lamelo. Yi tei Paulus lonaó maó ode huungi mongolio tulusi lolóiya, "Mongo wutato! Wonu timongoli malo duduó naseehati lowatia wau diila lobite lonto Kreta, ito diila loótoduo mai ngoáamila poloántulu wau pololuhi botie.

²² Bo botia olo pohile lowatia tióotutua alihu timongoli mopoúdaá mola lohilao. Diaaluo penu boli ngotaa maó lomongo

wutato tamaa mate; ito maéenggila bo kaapali botie wambaó.

²³ Sababu ohui malaíkati lo Allahu Taáala tahe tuboo lowatia, deúito-yito Allahu Taáala taa ohuúwo tutumulo watia, dungga-dungga mai odelaatia.

²⁴ Malaíkati boito lotahuda, 'Diila maó oohe, Paulus! Sababu yió mamotaalua woli Kaisari. Wau sababu opiohu hilaa lo Allahu Taáala olemu, ngoáamila tahibitea wolemu mamoaáahu sababu yió.'

²⁵ Masababu uito, Mongo wutato, wajibulio wutato mopouáa mola lohilao! Sababu watia palacaya to Allahu Taáala deú ngoáamilalo mamotoduo mai debo odelo umapilo tahuda-Lio olaatia.

²⁶ Bo ito de mamei tapodu topentadu lopulo tuwau."

²⁷ Tou hui opulaa patolio ami donggo hilantu-lantunga to Deheto Adria. Tanu to tomutaá loú huilio tahipo kalajawa tokaapali maloó laasa mai deú kaapali lebe hemembide mota lotudulio.

²⁸ Oditolio timongolio malo pololoá mola awadu wolo botu u loloneáa delomio lodeheto. Malo patatai deú tambati boito delomio ngopeé mola wopato pulu lomeeteri. Diila lohiheo lapatio maó

timongolio luli loloneáa mola, tulusi maílotaawa limongolio deheto totambati boito delomio ngopeé mola tolo pulu lomeeteri.

²⁹Timongolio moohe kaapali mamei huwato topatihu, oditolio timongolio malo polaahe mola jangga mohelu wopato to ambahu huli lokaapali, lapataó hemo haalapu wonu bo mowali mahuáa dumodupai.

³⁰Wolo poó-poóoyo tahipo kalajawa tokaapali boito mohimontala molahi monto kaapali boito. Timongolio malo polaahe mola sikuci ode taluhu helohutu bo debo odelo ohilaa mopolaahe mola jangga monto kaapali.

³¹Bo tei Paulus lolóiya maó ode polowila wau mongo pajule tato kaapali boito, "Wonu tahipo kalajawa tokaapali botie diila motibiluloá tokaapali, Mongo wutato ngoáamilalo diila opaladu moáahu."

³²Masababu uito mongo pajule boito malomunto tali losikuci boito, tilinggula sikuci boito leelihu.

³³Toú diipo lobutu mai dulahu, tei Paulus helo naseehati maó alihu timongolio ngoáamila molamelo. Tei Paulus lolóiya maó, "Maa mopulaa pato hui hiheolio

Wutato ngoáamilalo bo hipo himawa wambaó todelomo owowoluwoa u papaahenga wau diila lolamelo wolo-wolo.

³⁴ Botia naseehatia mai laatia, polamelopo penu bo ngoídi. Uito mopiohe ode limongoli, alihu timongoli muli molotolai. Sababu Wutato ngoáamilalo mamoaáahu wau diila okulangia lolo-loolo."

³⁵ Lapataó loloíya maó odito tei Paulus malohama roti wau lolapali mola sukuru ode Eeya totalu limongolio ngoáamila. Lapataó tio lolaya-layadeó roti boito, tulusi lolamelo.

³⁶ Yi timongolio ngoáamila luli ilo sumangati mai wau malo duduá lolamelo.

³⁷ Ngoáamila tawaluo to kaapali boito maito dulo hetuto pitu lopulaa wolomota.

³⁸ Toú ngoáamila malo lamelo louú tutuuhetalo maó, timongolio malo pomahula mola dudetohu pale ode deheto alihu kaapali mowali moheelo.

³⁹ Toú madulahei, tahipo kalajawa tokaapali maloóonto tudulio, bo diila otaawa limongolio tudu lolo uito. Timongolio loóonto wulungo wolo pentadio. Oditolio timongolio omakusudu moporabua kaapali boito mola teto wonu mowali.

⁴⁰ Yi ááa-wadeyaalo lojangga biluntolio tulusi jajaang-gawaalo boito piloluli limongolio yilumoduá mola ode delomo deheto. Peé-peéenta woleeto olo iluádeó limongolio awadu u hibuhuta to kakaamudiyalo. Lapataó timongolio malo mintaáa mola layahu to dulu lokaapali alihu dupoto mohiipai kaapali boito umoliyoó motidulunga ode pentadu.

⁴¹ Bo kaapali boito maleitaé towamoó lohungayo. Wimbihu dululio leihuwato wau diilalo mowali umoliyoó, hiambola wimbihu huliilio loántulu hepilo mái-máilio lobuóola moóohuú.

⁴² Mongo pajule tokaapali boito oniyati momate-mateelo maó ngoáamila taulo tutupa, sababu timongolio moohe bolo woluo tamaa mololangi ode tudulio wau tumetaó.

⁴³ Bo polowila boito longabutaó niyati limongolio boito sababu tio ohilaa mopoáahu olei Paulus. Tio malo poáhu ngoáamila tamowali mololangi lotidehu mola leimulo todeheto wau lololangi mota ode pentadu;

⁴⁴ Tawewolio musi mohunuhe mota wolo motidihu to duduu-piyaalo meaalo topoó

lokaapali boito. Wolo dalala odieelo mola ami ngoáamila loáahu tunggula tudulio.

28¹ Toú matotudulio wolo loáahu, bolo ilotaawa lami deú pulo boito ilunte Malta.

² Tuango lipu lopulo boito mopiohe daá olami. Timongolio lololimo olami ngoáamila wolo mopiohe wau helopo deíta tulu olami sababu malodehu mai didi wau dulente olo mohuhulo.

³ Tei Paulus malo himoái ayu, wau helo podutu maó aáa-yuwaalo boito totulu. Toú tio donggo hemohutu uito, tulide tuwau mailumualai, sababu patulio lotulu boito, tulusi lolopango uluúlio.

⁴ Toú tuango lipu lopulo boito loóonto tulide boito ntaya-ntayanga to uluú lei Paulus, malo loíya timongolio ngota-timongota, "Tau botie tantulo maó tamoomatea mate-mateelo maó, sababu penu boli tio maloáahu mai lonto musiba todeheto, Dewi Uáadili diila mopoluli olio tumumulo."

⁵ Bo tei Paulus lopongeeé maó tulide boito ode delomo tulu loú diila loólaasa longongoto penu boli ngoídi maó.

⁶ To pikiilangi limongolio ngopeéepo mola uluú lei Paulus mamo matangai

meaalo deboho tio mamohu dehuho mola wau mate. Bo toú timongolio donggo hiwimaawa ngoolo wakutu mola hiheolio wau dia-diaaluo maó hitua-hituawua upolu-polutuó u lotoduo mai to olio, yi pikiilangi limongolio malo bolió tulusi timongolio loloíya deú tei Paulus yito dewa.

⁷ Diila molaminga monto tambati boito woluo huta miliki lei Publius, tadihudihu pantungo lebe-lebe topulo boito. Wolo mopiohu hale tio lololimo olami debo odelo tamolio tolo hui mola hiheolio.

⁸ Toú boito tiyamolio donggo mongongoto, he polipitolo wau hemongili loduhu. Tei Paulus lonaó mota lomilohe oliyamolio tadonggo mongongota boito tulusi maloduá wau lomintaá uluú odeitaatio tilinggula tio loluli.

⁹ Sababu u lotoduo mai boito, ngoáamila tahi ngongota topulo boito helonaó mai odelei Paulus, wau timongolio piloó lulilio maó.

¹⁰ Timongolio helongohi olami palaseni dadaata, wau toú ami mamobite, timongolio helodelo mota ode kaapali ngoáamila upalaluo lami tobibite lami.

¹¹ Toú matolo hula mola teto, ami lomonggato lonto pulo boito lotitaé tokaapali tuwau lonto Aleksandria u ngotilonggadu sembo lopolo huhulo raburabua topulo boito. Kaapali boito pakepake tuoto "Dewa Pingi Kastor wau Poluks".

¹² Ami lotirabua tokota Sirakusa wau lotibiluloá mota teto tolo hui mola.

¹³ Lonteeto ami luli lobite lotiduluhe mota to pentadu demola kota lo Regium. Loombulio mola dupoto malo hiipai lonto hulialio, tilinggula bo todelomo duuhui ami malei dungga mola ode kota Putioli.

¹⁴ Mota teto ami lodunggaya wolo dengolo lota tapalacaya li Isa, wau sababu tiloduo limongolio ami lotibiluloá woli mongolio ngodiminggu mola hiheolio. Lapataó ami lomonggato ode Roma.

¹⁵ Mongo wutato to Roma tapalacaya li Isa loódungohe habari pasali lami, tilinggula timongolio lonaó mai leidungga ode Patali Apius wau Tambati Pohuhelia Totolu, u lololimo maó olami. Toú tei Paulus lodunggaya woli mongolio, tio lolapali mola sukuru ode Allahu Taáala wau hilaalio malowali sabari.

¹⁶Toú malei dungga mola ode Roma, tei Paulus yiluasialio lotibiluloá tutuwau kakaawali topajule ngota.

¹⁷Toú matolo hui mola, tei Paulus lotiangai tahimuloa lo ulipu taulo Yahudi ngotambatilo maó. Wau toú timongolio mahiámbua, tio loloíya ode limongolio, "Mongo wutato! Watia diila ototala wolo-wolo to bangusanto, meaalo lolambanga uúdu u tilolimonto mai lonto linenemoyaanto. Penu boli odito watia yilaúpio to Yerusalemu wau yiludulio ode tau-tauwalo Roma.

¹⁸Toú palakala lowatia pilalakisaalio, timongolio ohilaa molopata olaatia, sababu malo ilaalo watia diila helohutu totala penu boli tuwau maó upaatuti pohukuu-maniyalo hukuumani mate.

¹⁹Bo sababu tau-tauwalo Yahudi helo tehengi olaatia, yi bolo pakusa watia helohile wolo moóohuú palakala lowatia butoóla to bubutoó li Kaisari lo Roma. Pilohutu lowatia uito diila sababu watia odudulohu u hitua-tuawua tobangusa lowatia lohihilao.

²⁰Wau uitolo sababuulio watia lohile modunggaya woli mongoli u mobibii-salawa woli mongoli; sababu watia

pilungulio, tumbaó sababu Tamoo-poáahua tahe halapuo bangusa lo Isiraílu."

²¹ Lapataó timongolio lolóiya maó olio, "Amiaatia diipo lololimo tuladee ngopita maó lonto Yudea pasali lo Wutato. Wau diaaluo penu boli ngotaa maó lowutato mola lonteeto mai lodelo habari pasali lo Wutato meaalo helo bisala u mobulilo pasali lo Wutato.

²² Bo amiaatia ohilaa olo modungohe pasali loú opopalacaya lo Wutato, sababu amiaatia ngoáamila maloó dungohe tahipo soseroa pongaajali u dihudihu to Wutata boito."

²³ Yi timongolio wolei Paulus lolantu maó toú dulahio tuwau u modunggaya. Todulahee boito ngohuntua tau lonaó mai ode tambati piloti biluloá lei Paulus. Tumulalo mai dimodupo tunggula lolaango tei Paulus lotombangaó wau helo pohabari olimongolio habari pasali loú woloolo mola Allahu Taáala momalenta odelo Olongia. Wolo lomake ááa-yatiyaala lonto Buku lei Musa wau Buku lo Mongo nabi, tei Paulus helo tolopani mohutu olimongolio palacaya pasali li Isa.

²⁴ Woluo tapalacaya tou wolo uiloíya lei Paulus, bo woluo olo tadiila palacaya.

²⁵ Wolo huhaama u tinggai bubulemenga timongolio lololaa maó tambati boito, lapataó tei Paulus lolóíya u odie mola botie olimongolio, "Memangi tiluhata daá wolo upilo tahuda mai lo Rohullah lotimbulude toli Nabi Yesaya odeli nenemoya limongoli!

²⁶ Allahu Taáala lotahuda, 'Ponaólo polelea maó ode bangusa botie: Timongoli malaito modungohe, bo diila mongalati; timongoli matulusi mopoótuoto bo diila motota wolo u motoduo mai.

²⁷ Sababu pikiilangi lobangusa botie malowali lopuntuhi, bulonga limongolio malowali bungolo wau mato limongolio malowali pitoó. Utie motoduo mai alihu mato limongolio diila maó moóonto, bulonga limongolio diila maó modungohe, pikiilangi limongolio diila maó mongalati, wau diila maó mohualingai ode Olaú, lapataó Waú mamo poóluli maó olimongolio."

²⁸ Mapulitio tei Paulus lolóíya, "Musi otaawa maó lo Mongo wutato deú habari pasali lou moáahu umonto Allahu Taáala botia mapilopo habari ode

babaa-ngusawalo wewo tadiila Yahudi.
Timongolio mamo duduááó!"

²⁹ [Lapataó tei Paulus lolóíya odito,
tau-tauwalo Yahudi boito lololaa maó
tambati boito sambela hipo bubuutolawa
ngota timongota.]

³⁰ Dulo taunu mola hiheolio tei Paulus
lotibiluloá to Roma, tobele u sileuwalio
lohihilao. Tio sanangi helo lolimo
ngoáamila tahi ponaówa mai momilohe
olio.

³¹ Wau wolo buheli tio helo pohabari
olimongolio pasali woloolo mola Allahu
Taáala momalenta odelo Olongia
wau pasali lo Eeya Isa Almasi. Tei
Paulus helohutu uito wolo beebasi, loú
hetai-taibutolio.

Roma

1 ¹ Mongo wutato ngoáamila to Roma tapilonua lo Allahu Taáala wau tamaa tiliango Allahu Taáala u lowali umati-Lio. Allahu Taáala malo lulaoto wau lomuduó olaatia tolomodu u mopohabari Habari Mopiohe monto Allahu Taáala.

² Habari mopiohe boito mapilo danti lo Allahu Taáala tojamani muloololio mai lotimbulude tomongo nabi-Lio wau malei tuladu todelomo Kitabi.

³ Habari Mopiohe boito tomimbihu walaó Allahu Taáala, Eeyanto Isa Almasi. Debo odelo watade lomanusia, Tio wali mai lei Dauda,

⁴ bo debo odelo watade lo Eeya, Tio yito malo ilaalo walaó Allahu Taáala. Uito ilobukuti wolo kawasa upolu-polutuó lotimbulude to obobongu-Lio mai tou mailate maó.

⁵ Lotimbulude o-Lio olo Allahu Taáala longohi mai olaatia ponu lowali rasulu, alihu watia -- u mohulumati maó li Isa Almasi -- modelo tau-tauwala monto

totoonulalo bangusa alihu palacaya wau modungohu.

⁶ U milakusudu lowatia wolo totoonulalo bangusa yito timongoli olo tawoluo to Roma; timongoli olo matilia–Ngio lowali umati li Isa Almasi.

⁷ Uito sababuulio watia loluladei olimongoli. Pohileaala duá Allahu Taáala ti Paapanto wau ti Isa Almasi mongohi mai balakati wau salaamati olimongoli.

⁸ Bohu–bohulio motimbulude li Isa Almasi, watia molapali mola sukuru ode Allahu Taáala sababu Mongo wutato ngoáamilalo; sababu ngoilanggubu dunia maloó dungohe deú timongoli palacaya daá li Isa Almasi.

⁹ Watia laito hemoéela mola olimongoli wonu watia moduá. Allahu Taáala sakusiilio deú wolo uiloíya lowatia boito otutu. Tiolo Allahu Taáala tahe bayawa lowatia lou lealeaatu lohilao wolo helo pohabari Habari Mopiohe pasali lo Wala–lo.

¹⁰ Watia momolohone mola wolo tióotutua ode Allahu Taáala, pohileaala duá Allahu Taáala mopoluasi mai olaatia botia mola mobiilohe woli mongoli.

¹¹ Sababu watia ohilaa daá modunggaya woli mongoli alihu watia moótayade ponu monto Rohullah u mopoó lotolo olimongoli.

¹² Makusudu lowatia yito sababu ito peé-peéenta malo malacaya li Isa Almasi, yi ito mowali tinggai mopopooó lotolo.

¹³ Mongo wutato! Otohilaa lowatia alihu otaawa limongoli deú mapoó-poódaata watia omakusudu mola mobiilohe woli mongoli bo laito woluo wambaó umoó tabuto. Otohilaa lowatia towolota limongoli olo kalaja lowatia otilapulio odelo woloolo mola kalaja lowatia mailo tilapulo towolota lotau-tauwala tadiila Yahudi to tataa-mbatiyalo uwewo.

¹⁴ Sababu watia owaajibu ode ngoáamila bangusa; tamaó adabu wau tadiila oádabu, tahi osikolawa meaalo tadiipo hiósikolawa.

¹⁵ Uitolo sababuulio watia ohilaa daá mopohabari Habari Mopiohe boito ode limongoli tahi biluloáwa mola to Roma olo.

¹⁶ Watia palacaya daá to Habari Mopiohe boito, sababu habari boito yito lotolo Allahu Taáala u mopoáahu mai ngoáamila taa palacaya; bohu-bohulio taulo Yahudi, wau bangusa wewo olo.

¹⁷ Sababu wolo Habari Mopiohe boito Allahu Taáala mopo bilohei woloolo mola pohuliilio wumbuta lomanusia wolo Allahu Taáala muli mowali mopiohu; pohuliilio yito palacaya to Allahu Taáala monto bohulio tunggula pulitio. Uito tutuuwauwa debo odelo u leituladu todelomo Kitabi, "Taa palacaya to Allahu Taáala tilinggula wumbutalio wolo Allahu Taáala muli mowali mopiohu, tau boito matumumulo!"

¹⁸ Lonto sologa Allahu Taáala lopo bilohei muluka-Lio ode ngoáamila dusa wau ololeeto lomanusia, sababu ololeeto boito longabuto tomanusia u moóonuhe pongaajali u otutu pasali lo Allahu Taáala.

¹⁹ Wolo umowali otaawa lomanusia pasali lo Allahu Taáala malo patato todelomo hilaa u maloótapu tenelo Eeya lomanusia, sababu Allahu Taáala lohihilao malo poílaalo uito ode manusia.

²⁰ Tumulalo mai Allahu Taáala lopowali dunia, sisii-patiyaalo Allahu Taáala udiila oontonga, deúito-yito owowoluwoa-Lio odelo Allahu Taáala wau kawasa-Lio udiila opulitio, maílo pahamua lomanusia lotimbulude to ngoáamila umaa pilowali-Lio mai. Oditolio manusia sama-samaata diila o alasani umopo otutu lobatanga.

²¹ Manusia moóonuhe lo Allahu Taáala, bo manusia diila mohulumati o–Lio odelo Allahu Taáala wau diila olo mosukuru mola to o–Lio. Boliño maó manusia bo hemo mikiilangi udiila ota–otaa maó; hilaa limongolio malowali lodiólomo.

²² Timongolio molaasa batangalio molinepo, lebe–lebe pomaó timongolio mohulodu.

²³ Diilalo Allahu Taáala taó hiheo–hiheolo maó tahe tuboo limongolio, bo tumbaó bubuuíyalo udebo odelo mahaluku umowali mate; deúito–yito manusia, bulungi, binatangí u oáatio wopato, wau binatangí u hiálapa.

²⁴ Sababu uito Allahu Taáala lopoluli olimongolio kiluwasa lohilaa limongolio u mohutu moólusa, tilinggula timongolio helohutu susuu–aliyaalo ukotolo ode timongotalio lohihilao.

²⁵ Allahu Taáala taótutu, tiluloá limongolio wolo hitua–tuawua upaaluti. Diila Talopowali mai bo tumbaó tapilowali boitolo tatilubo wau tabilaya limongolio. Lebe–lebe pomaó talopowali mai boitolo tawajibulio pujiolo ohiheo–hiheolo maó! Amin.

²⁶ Sababu manusia helohutu u odito, yi Allahu Taáala lopoluli olimongolio loduduá napusu limongolio u hina. Mongobua limongolio diilalo ohilao tomongo lolái debo odelo u biasaalio tomanusia, bo ohilao topangelio mongobua.

²⁷ Mongo lolái olo debo odito; timongolio diilalo paatuti mohumbuta wolo mongobua, bo obilahi topangelio mongo lolái. Mongo lolái helohutu huhutu u moóolito topangelio mongo lolái, tilinggula timongolio lololimo polo tontuli u lotuuúde wolo huhutu limongolio u moleeto boito.

²⁸ Masababu manusia diila molaasa palalu moóonuhe to Allahu Taáala, yi hiluliaalo maó lo Allahu Taáala pikiilangi limongolio lowali lolusa, tilinggula timongolio helohutu susuu–aliyaalo udiila opohutuo limongolio.

²⁹ Hilaa limongolio ngoáamila polupolu wolo u moleeto, udiila otutu; polupolu wolo langgamu, polupolu wolo ohutodu wau laasa molonuó; polupolu wolo hilaa umomate mate–mateelo maó, moloohulua, mohimbulo wau moniyatia. Timongolio motohilaa moloíya taa wewo,

³⁰ motohilaa mopoóleeta tanggulo taa wewo; timongolio soombongi wau diila oádabu, wau molonuó to Allahu Taáala, wau motohilaa mosilita toongi. Timongolio motota mololohe totoonulalo pohuli bohu wolo mohutu u moleeto. Timongolio moluwali tomongo dulaá;

³¹ timongolio diila motohilaa mongalati taa wewo, timongolio diila tatapu wau molotolo hilao wau diila omanusia.

³² Otaawa limongolio, deú moduduá butoó lo Allahu Taáala, taa mohutu maó ngoáamilalo boito paatuti hukuu–maniyola mate. Penu boli odito timongolio helohutu olo susuu–aliyaalo boito; wau tumbaó akoro olo taa wewo hipohutua u odito.

2 ¹ Masababu uito, mongo Wutato, tatoonu Wutato, tilunggula Wutato motohilaa mopotala taa wewo? Wutato diila owolo–wolo u mopodulua lobatanga! Sababu wonu Wutato mopotala taa wewo, lebe–lebe pomaó Wutato lohihilao helohutu huhutu u tutuuwauwa debo odelo timongolio, yi Wutato malo podehu hukuumani tobatanga lohihilao olo.

² Otaawanto deú wonu Allahu Taáala mopodehu mai hukuumani ode tau–tauwalo tahe lohutu totoonulalo huhutu

udebo odelo uito, yi putuusani lo Allahu Taáala boito otutu.

³ Bo timongoli, Mongo wutato, helohutu lohihilao olo susuu–aliyaalo u pilotuludi mongoli ode tau–tauwala wewo! Wau to pikiilangi limongoli u timongoli moólopato monto hukuumani lo Allahu Taáala?

⁴ Meaalo timongoli diila botie paduli omuula lo Allahu Taáala wau otanggalo hilaa boli osabali–Lio u odito udaá? Tantu otaawa limongoli deú Allahu Taáala mopo bilohei opopiohu hilaa–Lio sababu Tio motohilaa alihu timongoli molilihu monto dusa limongoli.

⁵ Bo timongoli baaángiola wau diila mohuto molomelo. Masababu uito timongoli lohihilaolo talohutu hukuumani limongoli heóduhenga mola buheetio to Dulahe Kiama, wonu Allahu Taáala mopoilaalo mai mulukaa–Lio wau mopodehu hukuumani u aadili.

⁶ Sababu Allahu Taáala mamo lontuli mai timiídu tau motuuúde wolo huhutuulio.

⁷ Allahu Taáala mongohi mai tutumulo tutu wau ohiheo–hiheolo maó ode limongolio taa tatapu wau molotolo hilao hemohutu mopiohe u moótapu maó ulailaió, u hulu–hulumati wau u abadi.

⁸ Bo tau-tauwala tamopo udaá batangalio lohihilao wau diila mohuto modungohe to Allahu Taáala, bo moduduá u moleeto yi tau-tauwalo boito malaba-labaalo mulukaa mai lo Allahu Taáala.

⁹ Timíidu taa motohilaa mohutu u moleeto masikisa wau modutolo; bohu-bohulio taulo Yahudi, wau odito olo babaa-ngusawalo wewo.

¹⁰ Bo ngoáamila taa motohilaa mohutu mopiohe mawohia-Lio mai ololaió wau ohulumati wau osalaamati lo Allahu Taáala; bohu-bohulio ode taulo Yahudi; odito olo ode tau-tauwalo bangusa wewo.

¹¹ Sababu Allahu Taáala mopohutu mai ngoáamila tau tutuuwauwa.

¹² Tau-tauwalo bangusa wewo ilodusa loú diila motota butoó agama lo Yahudi. Oditolio timongolio hukuu-maniyalo to bulemengo lobutoó boito. Bo tau-tauwalo Yahudi ilodusa toú maílotaawa limongolio butoó boito; sababu uito timongolio mapohilelio wolo moóohuú olo dadaasali tobutoó boito.

¹³ Sababu taamuli mopiiohe wolo Allahu Taáala, diila bo sababu tau boito malotota butoó agama lo Yahudi, bo sababu tio

helohutu wolo uwoluo todelomo butoó boito.

¹⁴ Tau-tauwala bangusa wewo diila motota butoó agama lo Yahudi. Bo wonu timongolio to ilohilaa lohihilao mohutu wolo u pilomalanta lobutoó boito, hilaa limongolio lohihilaolo umowali butoó toli mongolio, eleponu timongolio diila motota butoó agama lo Yahudi.

¹⁵ Píili limongolio mopo bilohei deú wolo u pilomalanta lobutoó boito malei tulade tohilaa limongolio. Hilaa u malo@otapu tino Eeya limongolio olo mopo bukuti mai suáli boito, sababu timongolio lohihilao tingga maito potalalio tingga maito poótutuo lo pikiilangi limongolio.

¹⁶ Odieelo mola u de mamotoduo mai todulahee u matilantu boito. Todulahee boito -- moduduá Habari Mopiohe upilo habari mai lowatia -- Allahu Taáala motimbulude li Isa Almasi, mamomutoó ngoáamila u hitua-tuawua u sangaja hetutu@o lohilao wau pikiilangi lotaa ngoáamila.

¹⁷ Bo botia woloolo mola wolo Mongo wutato lohihilao? Wutato longaku lohihilao taulo Yahudi. Wutato lotiwunela tobutoó

agama lo Yahudi wau Wutato leengahu wumbuta lo Wutato wolo Allahu Taáala.

¹⁸Wutato loótapu totoonulalo potuhata lonto butoó boito, tilinggula ilotaawa lo Wutato kahandaki lo Allahu Taáala wau motota molantu toonu u mopiohe.

¹⁹Wutato yakini deú Wutato yito taúwa lotaa pitoó wau tilango odeli mongolio tawoluo todelomo u modiólomo;

²⁰Wutato tamoo didikia totau–tauwalo ta@o adabu dupadupapa wau guru lotau–tauwalo tahi. Wutato yakini deú todelomo butoó agama lo Yahudi, Wutato o toonulalo pongotota wau o pongajali u otutu.

²¹Wutato hemo ngaajali taa wewo; naa yilongola Wutato diila helo ngaajali batanga lohihilao? Wutato hemo ngaajali tau alihu diila maó potaó, lebe–lebe pomaó Wutato lohihilao hemotaó!

²²Wutato hemo ngaajali tau alihu diila maó pojina, lebe–lebe pomaó Wutato lohihilao hemojina! Wutato molonuó to balaahala, lebe–lebe pomaó Wutato lohihilao hemohama babaa–langiyaalo lonto bebee–leyaalo balaahala.

²³Wutato hemo pomangga–mangga mola deú Wutato obutoó lei Musa, lebe–lebe

pomaó Wutato hemohina Allahu Taáala loú diila loduduá buto-ílo.

²⁴Todelomo Kitabi tulatulade odie, "Sababu timongoli, tau-tauwalo Yahudi, yi tanggulo Allahu Taáala pilo najisilio towolota lo babaa-ngusawalo wewo."

²⁵Wonu Wutato modungohe tobutoó agama lo Yahudi, yi tuuna lo Wutato ohunaliao olo. Bo wonu Wutato diila mowali modudu@o susuu-aliyaalo u pilomalanta todelomo butoó boito, yi tuuna lo Wutato diila ohunaliao sama-samaata.

²⁶Wonu ngotaalio diila Yahudi, tadiila tiluuna, moduduáaó butoó agama lo Yahudi, wolo Allahu Taáala diila monganggapu olio odelo tamaa tiluuna?

²⁷Wau tau-tauwala tadiila tiluuna boito mamopotala to Wutato taulo Yahudi, sababu Wutato obutoó agama lo Yahudi wau Wutato tiluuna, bo Wutato lolambanga butoó boito. Timongolio diila tiluuna, bo tumbaó timongoliolo tahemo dungohe butoó agama lo Yahudi.

²⁸Sababu taulo Yahudi u pulua diila bo tanggulio wambaó taulo Yahudi; wau taa u tióotutua tiluuna diila taa u tiluuna odelo lahiri wambaó.

²⁹ Boliño maó, ngotaalio lo Yahudi u pulua yito taa u hilaalio ojiwa Yahudi; wau tuuna u tutu yito tuuna tohale u kilalaja lo Rohullah, diila u tulatulade todelomo buku. Taa debo odelo uito mamololimo poílaalo momuji monto Allahu Taáala, diila monto manusia.

3 ¹ Wonu odito, wolo untungilio mowali tau lo Yahudi? Wau wolo hunalio moduduáaó wuúdu lotuuna?

² Tantulo maó dadaata hunalio! Bohu–bohulio, sababu totaulo Yahudilo Allahu Taáala lopo palacaya maó tataa–hudaalo Allahu Taáala.

³ Bo woloolo mola wonu ngotaalio tau lo Yahudi diila tatapu wau molotolo hilao? Wolo sababu uito Allahu Taáala mamowali diila tatapu wau molotolo hilao?

⁴ Tantu diila! Sababu malo patatai Allahu Taáala laito otutu, eleponu timiídu tau hipo himbuloa. Todelomo Kitabi tulatulade, "Wajibulio yió obukuti otutu todelomo wolo uiloíyamu, wau yió moóhaama tou yió butoólio."

⁵ Bo wonu u aadili lo Allahu Taáala malebe henaasa mai, masababu ito helohutu udiila otutu, wolo u mamusi loíyanto? Deú Allahu Taáala diila aadili wonu Tio

mohukuumani mai olanto? (Memangi yiyintu botie paatuti odelo manusia.)

⁶ Sama-samaata diila! Sababu wonu Allahu Taáala diila aadili, woloolo mola Tio mowali momutoái dunia botie?

⁷ Bo wonu sababu huhutu udiila otutu, wolo u otutu pasali lo Allahu Taáala helebe oontonga daá tilunggula Tio piluji, yi yilongola taa umohutu moleeto boito donggo pilopotala odelo taa odusa?

⁸ Wau yilongola ito diila mowali moloíya, "Mopiohulo ito mohutu u moleeto alihu tumoodei umopiohe?" Memangi woluo tau-tauwalo tahe lohina olaatia lou hemoloíya deú watia malo loíya odito. Tau-tauwala debo odelo uito patutilio hukuumanio lo Allahu Taáala.

⁹ Naa, wolo huhuloánto odelo taulo Yahudi lebe mopiohu wolo huhuloío lobangusa wewo? Sama-samaata diila! Mailoíya mai lowatia deú mopio taulo Yahudi meaalo bangusa wewo, ngoáamilalo makiluwasa lodusa.

¹⁰ Debo odelo u tulatulade todelomo Kitabi, "Diaaluo penu boli ngotaa maó taótutu,

¹¹ diaaluo penu boli ngotaa maó tamongalati wau diaaluo penu boli ngotaa maó tamolubo Allahu Taáala.

¹² Ngoáamila tau malo poólamingo batanga lonto Allahu Taáala; ngoáamila mailapalo. Diaaluo penu boli ngotaa maó helohutu u otutu; penu boli ngotaa maó diaaá!

¹³ Bunggohi mongolio odelo kuubulu uilonganga. Wimbulo u hidala–dalaala tumolohu monto dila limongolio, wau biihu limongolio wambaó hemo pomukaó pitana, debo odelo bisa lotulidu.

¹⁴ Tunggili mongolio polupolu wolo laáanati wau didini u moóohuú.

¹⁵ Didiambangi mongolio hidiyota wonu ohilaa moposikisa wau momate tau mate–mateelo maó.

¹⁶ Oáantulu wau osuusa, pilo loladi mongolio ode utoonulalo maó.

¹⁷ Diila otaawa limongolio dalalo poáahuwalo,

¹⁸ wau diila mohulumati Allahu Taáala."

¹⁹ Botia bolo ilotaawanto deú ngoáamila u tulatulade todelomo butoó agama lo Yahudi, deúito–yito duólo tau–tauwala tawoluo towalungo pamalenta lobutoó boito. Lou odito diaaluo penu boli ngotaa

maó tamoó wohi alaasani wolo–wolo poli wau ngoilanggubu dunia mowali pohile wolo moóohuú lo Allahu Taáala.

²⁰ Sababu diaaluo penu boli ngotaa maó mowali mopiiöhe wolo Allahu Taáala masababu tau boito helohutu susuu–aliyaalo uwoluo todelomo butoó lo agama. Boliío maó butoó boito bo mopobilohei tomanusia deú manusia odusa.

²¹ Bo botia Allahu Taáala malo pobilohei dalalo woloolo mola manusia mopiiöhe wo–Lio; wau dudelolio boito diaaluo aitalio wolo butoó agama lo Yahudi. Bubuu–kuwaalo lei Musa wau bubuu–kuwaalo lomongo nabi tumbaó helo poílaalo mai suáli boito,

²² deú Allahu Taáala mowali mohutu manusia mopiiöhe wo–Lio, tumbaó wonu manusia palacaya li Isa Almasi; Allahu Taáala mohutu mai utie ode ngoáamila taa palacaya li Almasi; sababu diaaluo hiheedio:

²³ Ngoáamila tau maílodusa wau lolamingo lonto Allahu Taáala taóhilaa mopoáahu olimongolio.

²⁴ Bo sababu odehu hilaa lo Allahu Taáala wambaó uilohi mai wolo bebasi, wumbuta

lomanusia wolo Allahu Taáala luli lopiiohei; dudelolio yito: manusia yilopatai li Isa Almasi.

²⁵ Allahu Taáala lopobake mai li Isa Almasi alihu wolo opopate–Lio boito manusia póilaalolo molopato monto totala wonu timongolio palacaya o–Lio. Allahu Taáala lohutu odito u mopo bilohei o adili–Lio. Sababu toú yilalu mola masilabalia lo Allahu Taáala duduu–sawaalo manusia, tilinggula Tio diila lohukuumani mai olimongolio.

²⁶ Bo botia hepilohutu–Lio ode dusa boito u mopo bukuti maó o aadili–Lio. Wolo dudelo boito Tio mopo bilohei deú batanga–Lio otutu; wau timíidu taa palacaya li Isa póilaalo–Lio mai odelo taa maluli lopiiohe wolo Allahu Taáala.

²⁷ Masababu uito ito didu o alasani umopo mangga–mangga lohilao. Yilongola odito? Wolo sababu ito helo ponaó u tulatulade todelomo butoó agama lo Yahudi? Diila. Bo sababu ito palacaya.

²⁸ Sababu pulito lohuhamalio yito odie: Tau póilaalolio muli mopiiohe wolo Allahu Taáala, diila bo sababu tio helo ponaó wolo u tulatulade todelomo butoó agama

lo Yahudi, bo sababu tio palacaya li Isa Almasi.

²⁹ Meaalo Allahu Taáala boito Allahu Taáala tau lo Yahudi wambaó? Diila, Tio olo Allahu Taáala lobangusa wewo? Ooó, memangi Tio olo Allahu Taáala lobangusa wewo!

³⁰ Sababu Allahu Taáala bo tuwau. Tiolo tahe lohutu tau–tauwalo Yahudi luli lopiiohe wolo Allahu Taáala sababu timongolio palacaya. Wau Tiolo olo tahe lohutu tau–tauwalo bangusa wewo luli lopiiohe wolo Allahu Taáala; uito olo sababu timongolio palacaya.

³¹ Wolo utie boliilio deú sababu ito palacaya li Almasi, yi ito molapi butoó agama lo Yahudi? Sama–samaata diila! Tumbaó wolo opopalacayanto boito, ito mohulumati butoó boito.

4 ¹ Wonu odito, wolo umowali loiyanto pasali lei Abraham, nenemoya lo bangusanto? Woloolo mola uilo lasawalio?

² Wonu susuu–aliyaala u hepilo hutulio loósababu Allahu Taáala lololimo olio odelo tamo eengahe hilaa lo Allahu Taáala, yi woluo olo alaasani to olio u motiwengahe. Bo tio diila mowali motiwengahe totalu lo Allahu Taáala.

³ Todelomo Kitabi tulatulade, "Tei Abraham palacaya to Allahu Taáala, wau sababu opopalacayalio botie tio tilolimo lo Allahu Taáala odelo taa u moéengahe hilaa lo Allahu Taáala."

⁴ Taa u mokalaja, mololimo wuupa; wau wuupalio diila ilanggapulio odelo tuwaulio lowowohi, sababu uito yito hakuulio.

⁵ Bo woluo tadiila motiwunela tokelakelalio lohihilao; tio mopo palacaya batangalio ode Allahu Taáala tamoponasa mai taódusa molopato monto totalalio. Dadaasari to palacayalio boitolo Allahu Taáala mololimo tau boito odelo tamoó sanangi hilaa lo Allahu Taáala.

⁶ Odieelo mola huhama lei Dauda olo; uito sababuulio tio lolóiya hinta sanangi tutu ode taa u duólo Allahu Taáala matilolimo odelo taa uloó sanangi hilaa–Lio, loú diila piloótuoto Allahu Taáala totoonulalo huhutu lotau boito. Tei Dauda lolóiya odie,

⁷ "Potisanangilo tutu taa u totoonulalo totalaalio milaáapu wau totoonulalo dusalio ilambungu lo Allahu Taáala.

⁸ Potisanangilo tutu taa u totoonulalo dusalio diila pilohile wolo moóohuú lo Eeya!"

⁹Wolo loíya potisanangi tutu botie bo pilopo dulungo wambaó ode tahe loduduá wuúdu lotuuna? Meaalo olo ode tau-tauwalo tadiila helo duduá wuúdu lotuuna? Mailoíya lami tou dipolulio mai, deú tei Abraham tilolimo Allahu Taáala odelo taloó sanangi hilaa-Lio, sababu tei Abraham palacaya to Allahu Taáala.

¹⁰Naa, omolua Allahu Taáala lopoílaalo mai suáli boito? Tou dipolulio mai meaalo lapatio maó tei Abraham tiluunelio? Memangi tou tio dipo tiluuna, diila lapatio maó.

¹¹Tio tiluunelio lapatio maó, wau tuunelio boito bo odelo tuoto deú Allahu Taáala malo lolimo olio odelo taloó sanangi hilaa lo Allahu Taáala, sababu palacaya to Allahu Taáala. Tio tilolimo Allahu Taáala tou tio dipo loduduá wuúdu lotuuna. Wau tei Abraham lowali tiyamo delo pohuli lorohani ode ngoáamila taa palacaya to Allahu Taáala, wau u sababuulio matilolimo Allahu Taáala odelo taloó sanangi hilaa-Lio, eleponu timongolio diila loduduá wuúdu lotuuna.

¹²Tei Abraham olo tiyamo delo pohuli lorohani ode tau-tauwalo talo duduá wuúdu lotuuna. Tio tiyamo delo pohuli

lorohani limongolio diila bo sababu timongolio helo duduá wuúdu lotuuna, bo sababu timongolio olo hitumula wolo palacaya ode Allahu Taáala, tutuuwauwa debo odelo tei Abraham toú tio diipo loduduá wuúdu lotuuna.

¹³ Allahu Taáala lodanti odelei Abraham wau waliilio mola deú dunia botie mamowali miliki lei Abraham. Allahu Taáala lodanti mai odito diila sababu tei Abraham helo dungohe tobutoó agama lo Yahudi, bo sababu tio palacaya to Allahu Taáala tilinggula tio tilolimo Allahu Taáala odelo taloó sanangi hilaa–Lio.

¹⁴ Sababu wonu bo tau–tauwalo tamo dungohe to bubuu–toóowalo agama lo Yahudi wambaó tamaa mololimo wolo u pilodanti mai lo Allahu Taáala, yi palacaya to Allahu Taáala diila ohunalio sama–samaata, wau danti lo Allahu Taáala olo toongi wambaío.

¹⁵ Butoó agama lo Yahudi mopodungga mai hukuumaní lo Allahu Taáala. Bo wonu butoó diaaluo, yi totala olo diaaluo.

¹⁶ Oditolio danti lo Allahu Taáala boito dadaasali palacayalio lotau ode Allahu Taáala. Uito mowali tuwaulio pongaku ode ngoáamila wali mola lei Abraham deú

danti boito yilohi-Lio mai ode limongolio odelo tuwaulio lo wowohi u beebasi monto Allahu Taáala; diila bo toli mongolio tahemo dungohe tobutoó agama lo Yahudi wambaó, bo toli mongolio olo taa palacaya to Allahu Taáala tutuuwauwa debo odelo tei Abraham palacaya to o-Lio. Sababu tei Abraham yito tiyamanto ngoáamila delo pohuli lorohani.

¹⁷ Sababu Allahu Taáala lotahuda odie odelei Abraham, "Wau malo powali olemu tiyamo ode dadaata bangusa." Odieelo mola Allahu Taáala longohi mai danti boito odelei Abraham, wau tei Abraham palacaya to o-Lio. Tiolo Allahu Taáala tamopo tumulai taa mate; Tiolo olo Allahu Taáala u wolo tahuda-Lio wambaó helohutu mai wolo udipo peéenta woluo lowali woluo.

¹⁸ Tei Abraham tulusi wambaó hemo halapu mola wau palacaya eleponu tio diilalo ohalapani. Sababu uito tio malowali tiyamo lobangusa dadaata. Debo odelo ulei tuladu todelomo Kitabi, "Walimu mola mamowali mai dadaata daá."

¹⁹ Tei Abraham tou boito motota deú tio madiilalo moótapu mai wali, sababu batangalio mapanggola daá wau umululio

mawimbideó ngohetuto taunu; odito olo ti Sara, dilelio boito, pulia. Bo iimani lei Abraham diila loéetu.

²⁰Tio debo palacaya wau yakini danti lo Allahu Taáala. Tumbaó iimanilio bo héilo duhenga mola lotolio, tilunggula tio helomuji–muji Allahu Taáala.

²¹Tio palacaya daá deú Allahu Taáala mowali mohutu wolo umapilo dantia–Lio mai.

²²Uito sababuulio tei Abraham tilolimo Allahu Taáala odelo taa umoó sanangi hilaa lo Allahu Taáala.

²³Loíya u "Tilolimo odelo taa umoó sanangi hilaa lo Allahu Taáala" leituladei diila bo wambaó odelei Abraham lohihilao,

²⁴bo ode olanto olo. Ito olo matolimoo–Lio odelo taa umaloó sanangi hilaa lo Allahu Taáala, sababu ito palacaya to Allahu Taáala talopo tumulai li Isa, Eeyanto, lonto opopate.

²⁵Ti Isa boito mailudu–Lio mai u pateelio mate–mateelo maó sababu duduu–saanto; lapataó luli pilopo tumulai lo Allahu Taáala mai lohutu olanto luli lopiiohe wolo Allahu Taáala.

5¹ Botia ito maluli lopiiohe wolo Allahu Taáala, sababu ito palacaya. Wau

masababu uito ito hitumula todelomo u dame wolo Allahu Taáala lotimbulude li Isa Almasi Eeyanto.

² Masababu ito palacaya li Isa, yi Tio lohutu olanto loólaasa hitua-tuawua todelomo hilao wau ponu lo Allahu Taáala, wau wolo ponu boitolo ito botia hitumula. Sababu uito hilaanto meengahe sababu ito ohalapani deú ito mamooálaasa sanangi tutu uwohi mai lo Allahu Taáala!

³ Wau lebe maó leeto, ito olo meengahe todelomo polodutolo, sababu otaawanto deú polodutolo boito mohutu tau mowali mo@oolohu,

⁴ wau o@oolohu mamohutu tau mambo tesiyolo; uti-utieelo u mopotoodei halapani.

⁵ Halapani udebo odelo utie diila tamoo kikiio hilaanto, sababu hilaanto matiluanga lo Allahu Taáala wolo ponu-Lio. Allahu Taáala lohutu mai uito lotimbulude to Rohu-Lio, u mailohi-Lio mai olanto.

⁶ Tou ito todelomo owowoluwoa didu okawasa, ti Isa Almasi mailate ode olanto towakutu u lotuhatawa loú tilantu mai lo Allahu Taáala; lebe-lebe pomaó ito tahi

tau-tauwalo tahi laminga monto Allahu Taáala.

⁷ Duólo tahingota-ngotaawa taáadili olo mototolo tau mohuto mate. Tanu duólo tahingota-ngotaawa tamopiohe, woluo olo tau buheli mate.

⁸ Bo Allahu Taáala lopo@ilaalo mai ponu-Lio olanto tou ti Isa Almasi yilate ode olanto tou ito donggo taa odusa.

⁹ Botia ito maluli lopiiohe wolo Allahu Taáala lotimbulude to opopate li Almasi; sababu uito tantu ito mapo aahuwolo olo monto muluka lo Allahu Taáala motimbulude li Almasi.

¹⁰ Wonu tomaasa ito mumuusua wolo Allahu Taáala, ito pilopodeme wo-Lio lotimbulude to opopate lo Wala-lo, tidiyolo maó botia tou lapatio maó wumbutanto wolo Allahu Taáala luli lopiiohe, tantu ito mapo aahuwolo olo motimbulude to tutumuli Almasi.

¹¹ Wau lebe maó leeto, ito olo motiwengahe to opopiohu lo Allahu Taáala lotimbulude li Isa Almasi Eeyanto. Sababu lotimbulude li Almasi, ito botia loólaasa wumbutanto u mopiohe boito wolo Allahu Taáala.

¹² Dusa tilumuotai ode delomo dunia lotimbulude to ngotaalio, wau lonto dusa boito tilumoodei opopate. Akibatilio, opopate loloópolo mola ode ngoilanggubu umati lomanusia, sababu ngoáamila tau maílodusa.

¹³ Toú butoó agama lo Yahudi diipo yilohilio mai, dusa mawoluo todelomo dunia. Bo dusa diila yilinggilelio, sababu diaaluo butoó u mowali lambangalo.

¹⁴ Bo, lonto jamani lei Adamu demola jamani lei Musa, opopate okawasa to ngoilanggubu umati lomanusia. Tumbaó tau–tauwalo tadiila helohutu totala wolo dudelo u tutuuwauwa debo odelo u pilohutu lei Adamu, tau–tauwalo boito olo loduduá olo kiluwasa lo opopate. Tei Adamu yito bayahu monto o–Lio tamaa dungga–dungga mai lapatio maó.

¹⁵ Bo duduulotalo boito diila tutuuwauwa; sababu wowohi mai lo Allahu Taáala lebe udaá maó, wonu pobandingio mola wolo totala u mapilohutu lei Adamu. Totala lotaa ngota loósababu dadaata taa yilate. Donggo boli lebe udaá maó poli akibati lo odehu hilaa monto Allahu Taáala wau ponu osalaamati uilohi–Lio mai totaa

dadaata daá, lotimbulude to opopiohu hilaa lotaa ngota, deúito–yito ti Isa Almasi.

¹⁶Wowohi lo Allahu Taáala olo lebe udaá tutu wolo dusa lotaa ngota boito. Sababu lapatio maó taa ngota lohutu totala, mailumualai putuusani, "Ototala". Bo lapatio maó taa dadaata helohutu dusa leitunggalo mai wowohi lonto Allahu Taáala u lopoilaalo mai, "Diila ototala".

¹⁷Sababu totala lotaa ngota, opopate loloópolo mola ode utoonulalo ma@o lotimbulude totaa ngota boito. Donggo boli lebe udaá maó poli akibati loú wolo u pilohutu lotaa ngota wewo, deúito–yito li Isa Almasi. Lotimbulude o–Lio, Allahu Taáala lopodaata daá odehu hilaa–Lio totaa u odito daatalio, wau wolo diila ohunalio lopowali olimongolio luli lopiiohe wolo Allahu Taáala; timongolio maa okawasa todunia botie motimbulude li Isa Almasi.

¹⁸Oditolio, odelo woloolo mola totala lotaa ngota malo posababu ngoilanggubu umati lomanusia hilukuumani, odito olo huhutu lotaa ngota talo duduá kahandaki lo Allahu Taáala, maloó sababu ngoáamila tau yilopato lonto totala wau yilohia–Lio tutumulo.

¹⁹Wau odelo woloolo mola dadaata tau lowali taa ilodusa sababu taa ngota diila lodungohu, odito olo dadaata tau yiluwasia luli lopiiohe wolo Allahu Taáala sababu taa ngota lodungohu to Allahu Taáala.

²⁰Talongohi mai butoó agama lo Yahudi yito Allahu Taáala lohihilao. Bo helebe maó manusia hemo tolopani modungohe butoó boito, helebe maó timongolio hipohutua totala wau odusa to Allahu Taáala. Bo helebe maó manusia hipohutua dusa, Allahu Taáala helebe maó poli momonu olimongolio.

²¹Naa, ito musu mate sababu ito malohutu dusa. Bo Allahu Taáala momonu olanto wau longohi mai dalalo olanto luli lopiiohe wo–Lio. Wau sababu wumbutanto wolo Allahu Taáala maluli lopiiohe, yi Tio longohi mai tutumulo tutu wau ohiheo–hiheolo maó to olanto lotimbulude li Isa Almasi, Eeyanto.

6 ¹Wonu odito, wolo u mowali loiyanto? Mamusi ito wambaó mohutu dusa alihu Allahu Taáala helebe momonu mai olanto?

²Tantu diila! Dusa diilalo okawasa to olanto, oditolio, diila pongalo aakali ito tumumulo mololaalaaita mohutu dusa?

³ Diila otaawo lo Mongo wutato deú tou ito yilihualio, ito pilopo tuwau woli Isa Almasi? Uito boliilio maó ito pilopo tuwau wolo opopate–Lio.

⁴ Wolo polihu boito, ito yilobungio woli Almasi, wau loduduá yilate peé–peéenta wo–Lio, alihu debo odelo ti Almasi pilopo tumulai lonto opopate tokawasa li Paapa talailaió, odito olo ito mowali tumumulo todelomo tutumulo u bohu.

⁵ Wonu ito malowali tuwau woli Almasi sababu ito loduduá yilate peé–peéenta wo–Lio, ito mamowali tuwau wo–Lio olo sababu ito loduduá luli pilopo tumulai debo odelo Tio.

⁶ Otaawanto deú watadento udeedelo odelo manusia mapilate yila–yilateelo maó peé–peéenta woli Almasi toáyu salipu alihu kawasa lo watadento u odusa boito antuluwolo; loú odito ito diilalo pilowato lodusa.

⁷ Sababu wonu tahingota–ngotaawa mate, tau boito pilopo lopato monto kawasa lodusa.

⁸ Wonu ito mailate peé–peéenta woli Almasi; ito palacaya deú ito olo matumumulo peé–peéenta wo–Lio.

⁹ Sababu otaawanto deú ti Almasi mapilopo tumulai mai lonto opopate wau Tio diilalo mate; opopate madiilalo okawasa tobatanga-Lio.

¹⁰ Opopate u ilolaasawa li Almasi yito opopate duólo dusa. Uito lotoduo bo peéenta u ohiheo-hiheolo maó, wau tutumulo u nilaó-Lio masaatia botie yito tutumulo ode Allahu Taáala.

¹¹ Timongoli olo musi monganggapu batanga limongoli mate duólo dusa, bo tumumulo todelomo wumbuta u motoheeto wolo Allahu Taáala motimbulude li Isa Almasi.

¹² Diilalo maó polulia dusa motolo kawasa to tutumulumu upanaa alihu Wutato diila moó duduá ilohilaamu u moleeto.

¹³ Diila maó wudua olo pongawaá lo batangamu ode kawasa lodusa u pohunaalo ode totoonulalo makusudu u moleeto. Bo wuduwalo mola batanga limongoli ode Allahu Taáala odelo tamaa yilimbato lonto opopate ode tutumulo. Wuduwalo mola batanga limongoli lealeaatulo maó to Allahu Taáala alihu pohunaalo u mohutu kahandaki lo Allahu Taáala.

¹⁴ Dusa diila mowali motolo kawasa olimongoli, sababu timongoli diilalo tumutumulo to walungo butoó agama lo Yahudi bo to walungo odehu hilaa lo Allahu Taáala.

¹⁵ Botia, wolo upulito lo huhamalio? Tingga mowali ito odusa, sababu ito diilalo to walungo okokawasa lobutoó agama lo Yahudi, bo to walungo okokawasa odehu hilaa lo Allahu Taáala? Sama–samaata diila!

¹⁶ Wolo otaawa limongoli deú wonu timongoli mohudu batanga ode tahingota–ngotaawa u mohutu otohilaalio yi timongoli yito wato lotaa dilungohe limongoli boito -- diila otaawa uito wato lodusa u modelo olimongoli ode opopate, meaalo wato tamo modungohe to Allahu Taáala, wau loú odito muli mopiiohe wolo Allahu Taáala.

¹⁷ Bo sukuru ode Allahu Taáala! Sababu muloololio mai timongoli lowali wato lodusa, bo botia timongoli wolo lealeaatu lohilao helo dungohe pongaajali u otutu u mailohilio olemu.

¹⁸ Timongoli mailopato lonto dusa, wau botia malowali wato ode kahandaki lo Allahu Taáala.

¹⁹Sababu huhamamu odito lulupuhu, watia lomake mai luluu–maduwala lopolowato alihu lebe gambangi timongoli mongalati. Mulooololio mai timongoli helohudu batangamu lealeaatulo maó odelo wato duólo susuu–aliyaalo ukootolo wau u moleeto ode totoonulalo makusudu u moleeto. Odito olo botia, mamusi timongoli mohudu batanga lealeaatulo maó odelo wato duólo kahandaki lo Allahu Taáala ode totoonulalo makusudu lo Allahu Taáala utolo–tolomodu.

²⁰Toú timongoli pilowato lodusa, timongoli diila tokawasa kahandaki lo Allahu Taáala.

²¹Toú boito paéeda wolo u tilolimo limongoli monto susuu–aliyaalo u masaatia botie moóolito pohutuo limongoli? Huhuu–tuwaalo huhutu boito bo modelo ode opopate!

²²Bo botia timongoli mailopa–Tio lonto dusa, wau lowali wato lo Allahu Taáala. Opaéeda yito deú Wutato tumutumulo tolomodu duólo Allahu Taáala wau suáli boito moótoduo mai tutumulo tutu wau ohiheo–hiheolo maó.

²³Sababu opopate yito wuupa lodusa; bo tutumulo tutu wau ohiheo–hiheolo maó

peé–peéenta woli Isa Almasi Eeyanto yito wowohi uiludu mai lo Allahu Taáala wolo palacuma.

7¹ Mongo wutatuú! Wutato ngoáamilalo malotota lobutoó. Oditolio, otaawa limongoli deú okokawasa lobutoó to tahingota–ngotaawa pohupohutu ngotilonggadu tau boito donggo tumutumulo.

² Taabua ngota odile, humayaalio, iloáwade lobutoó todilelio bo ngotilonggadu dilelio donggo tumutumulo. Wonu dilelio mate, yi dile taabua boito molopato monto butoó u mongawade olio todilelio.

³ Wonu taabua boito tumumula wolo talolaí wewo toú dilelio donggo tumutumulo, yi taabua boito iluntee lojina. Bo wonu dilelio mate, yi odelo dudelo lobutoó, taabua boito malo lopato. Wau wonu tio muli monika wolo ngotaalio talolaí wewo, yi tio diila lojina.

⁴ Odito olo suáliilio woli mongoli, Mongo wutatuú. Duólo butoó agama lo Yahudi timongoli mailate, sababu timongoli mapilopo tuwau wolo batanga li Almasi wau lowali miliki–Lio tamaa luli pilopo tumulai lonto opopate. Tio luli pilopo

tumulai lonto opopate alihu todelomo tutumulonto ito mowali ohuna duólo Allahu Taáala.

⁵ Sababu, muloololio mai ito tumutumulo helo duduá pipii–iliyaalo lomanusia. Tou boito totoonulalo ilohilaa u odusa, u tilumoodei sababu woluwolio lobutoó agama, odulude todelomo batanganto. Uito sababuulio ito helohutu susuu–aliyaalo u moópate.

⁶ Bo botia ito diilalo leiáawade tobutoó agama lo Yahudi. Ito mailate duólo butoó u muloololio mai motolo kawasa olanto. Ito diilalo momaya wolo dudelo udeedelo, moduduá butoó u tulatuladu. Botia ito momaya moduduá dudelo bohu upilopo tuhata mai lo Rohullah to olanto.

⁷ Wonu odito, wolo u mowali polelento? Deú butoó agama lo Yahudi moleeto? Tantu diila! Bo butoó boi–boitolo u longaajali olaatia pasali lodusa. Diila taótaawa lowatia wolo uito tamaá, wonu butoó lo agama diila lolóiya, "Diila maó potamaá."

⁸ Lotimbulude tobutoó lo agama, dusa ilohiango u helo potoodei totoonulalo hilao utamaá todelomo hilaa lowatia,

sababu wonu butoó lo agama diaaluo, yi dusa olo diaaluo.

⁹Watia muloololio mai tumutumulo diila obutoó lo agama. Bo toú butoó lo agama yilumenetai, dusa mawoluo

¹⁰wau watia yilate. Yi butoó lo agama boito, u muloololio mai pilomatuju u mongohi tutumulo, bo tumbaó lopotoduo mai opopate ode laatia.

¹¹Sababu lotimbulude tobutoó lo agama boito, dusa ilohiangio lohimbulo wau lomate olaatia yila-yilatelo maó.

¹²Butoó lo agama bungolio mai monto Allahu Taáala, wau timiídu palenta todelomo butoó boito dudunggaalio mai monto Allahu Taáala, oditolio aadili wau mopiohe.

¹³Naa, wolo utie boliilio deú u mopiohe boito mopotoduo mai opopate odelaatia? Tantu diila! Dusaalo umalo potoduo mai opopate boito. Wolo lomake u mopiohe, dusa malo potoduo mai opopate ode laatia, alihu totoonulalo píili lodusa oontonga loú mopatato. Lotimbulude to papaa-lentawalo lo Allahu Taáala, maílo bukuti deú dusa odito leetio.

¹⁴Otaawanto deú butoó agama lo Yahudi bungolio mai monto Rohullah; bo

watia botie manusia diila okawasa. Watia mapilotali lowali wato lodusa.

¹⁵ Sababu watia lohihilao diila mongalati huhutu lowatia. Suáli u otohilaa pohutuo lowatia, uito diila pilohutu lowatia; bo susuu–aliyaalo uilonuó lowatia, uito tumbaó u hepilohutu lowatia.

¹⁶ Naa, wonu watia mohutu susuu–aliyaalo u teteehengia wolo hilaa lowatia, uito boliilio maó watia momasisi deú butoó agama lo Yahudi boito mopiohu.

¹⁷ Oditolio, tutuulio tutu diilalo watia talohutu uito, bo dusa ukawa–kawasa tobatanga lowatia.

¹⁸ Otaawa lowatia diaaluo penu boli tuwau u mopiohe todelomo batanga lowatia; deúito–yito todelomo pīili lowatia odelo manusia. Sababu woluo todelomo hilaa lowatia u mohutu mopiohe, bo watia diila mambo moponaó leeto.

¹⁹ Watia diila lohutu u mopiohe u otohilaa pohutuo lowatia, bo boliio maó watia helohutu susuu–aliyaalo u moleeto, udiila otohilaa pohutuo lowatia.

²⁰ Wonu watia mohutu susuu–aliyaalo udiila otohilaa pohutuo lowatia, uito boliilio maó diila watia tahelohutu susuu–

aliyaala boito, bo dusa ukawa-kawasa tobatanga lowatia.

²¹ Oditolio, watia malohama patoó deú butoó utieelo u dulu-dulude; deúito-yito deú wonu watia ohilaa mohutu u mopiohe, yi bo u moleeto wambaó u tumoodei to olaatia.

²² Batini lowatia motohilaa tobutoó Allahu Taáala,

²³ bo watia mongalati deú todelomo batanga lowatia woluo olo butoó wewo u dulu-dulude -- deúito-yito butoó u bubuu-lemenga wolo butoó u ilaku lo aakali wau pongolaasa lowatia. Uito sababuulio watia malei awade tobutoó lodusa u dulu-dulude todelomo batanga lowatia.

²⁴ Naa, odieelo mola owowoluwoa lobatanga laatia; watia modungohe tobutoó lo Allahu Taáala wolo aakali wau watade lowatia, bo wolo piili lomanusia wambaó, watia taaluku todusa. Donggo boli topotalalio watia botie! Tatoonu tamohuto mopo@aahu olaatia monto batanga botie u modelo olaatia ode opopate? Sukuru ode Allahu Taáala! Tio mohuto mopoáahu mai olaatia lotimbulude li Isa Almasi.

²⁵ (7:24)

8¹ Masaatia madiduú hukuumaní ode limongolio tahitumula lotituwau woli Isa Almasi.

² Sababu butoó lo Rohullah ulohutu mai olanto tilumumula lotituwau woli Isa Almasi tamalo lopatai olaatia lonto hukuumaní uloó sababu dusa wau opopate.

³ Wolo udiila mowali pohutuo butoó lo agama, sababu ito manusia molulupuhu, uito mapilohutu mai lo Allahu Taáala. Allahu Taáala maloó-laaheó kawasa lodusa todelomo píili lomanusia loú lolao mai Wala-lo lohihilao, tadungga-dungga mai todelomo owowoluwoa u tutuuwauwa wolo manusia taódusa, mai loluluta dusa.

⁴ Allahu Taáala lohutu uito alihu kahandaki-Lio u pilo@ilaalo todelomo butoó agama lo Yahudi boito mowali ponaóolo todelomo batanganto tahitumula loduduá to Rohullah wau diila loduduá píili lomanusia.

⁵ Tau-tauwalo tahitumula loduduá píili lomanusia, tulusi hemo mikiilangi wolo u otohilaa píili lomanusia. Bo tau-tauwalo tahitumula loduduá to Rohullah, tulusi

hemo mikiilangi wolo u otohilaa lo Rohullah.

⁶Wonu pikiilangimu kiluwasa pīli lomanusia yi akibatilio opopate. Bo wonu pikiilangimu kiluwasa lo Rohullah, yi akibatilio yito tutumulo wau odudame wolo Allahu Taáala.

⁷Taa pikiilangilio kiluwasa pīli lomanusia, tau boito mumuusua wolo Allahu Taáala; sababu tau boito diila taáluku tobutoó lo Allahu Taáala; wau memangi tio diila mowali taáluku tobutoó lo Allahu Taáala.

⁸Tau-tauwalo tahitumula helo duduá pīli lomanusia, diila moósanangi to Allahu Taáala.

⁹Bo timongoli diila tumutumulo moduduá pīli lomanusia. Timongoli tumutumulo moduduá Rohullah -- wonu, tantulio, Rohullah otu-otutuulo maó dulu-dulude todelomo batangamu. Taa diila o Rohu li Almasi, tau boito diila miliki li Almasi.

¹⁰Bo wonu ti Almasi tumutumulo todelomo batangamu, yi eleponu wawaúmu maamate sababu dusa, bo Rohullah mongohi mai tutumulo olemu,

sababu wumbutamu wolo Allahu Taáala malopiohu.

¹¹ Wonu Rohullah, talo potumulai li Almasi lonto opopate, tumutumulo todelomo batangamu, yi Tio talo potumulai li Almasi lonto opopate boito, mamó potumulai olo wawaúmu u mowali mate boito. Tio mohutu mai uito wolo Rohu–Lio u tumutumulo todelomo wawaúmu.

¹² Uitolo sababuulio, Mongo wutato, ito otitihula; bo diila titihula topĩli lomanusia; ito diila palalu tumumulo moduduá u otohilaalio.

¹³ Sababu wonu timongoli tumumulo moduduá pĩli lomanusia, yi timongoli maamate; bo wonu wolo kawasa lo Rohullah, timongoli tulusi wambaó mopopate totoonulalo huhutuumu u odusa, yi timongoli matumumulo.

¹⁴ Tau–tauwalo tadilelo lo Rohullah, de@uyito–yitomongo walaó Allahu Taáala.

¹⁵ Sababu Rohu, uilohi mai lo Allahu Taáala ode limongoli, diila mohutu olimongoli mowali wato tilinggula timongoli tumumulo wolo wohe–wohe. Bolíio maó Rohullah boito mopowali olimongoli mongo walaó Allahu Taáala,

wau wolo kawasa lo Rohullah boito ito mongunte Allahu Taáala boito, "Paapa, oo ti Paapaú!"

¹⁶ Rohullah peé–peéenta wolo rohunto mopo@ilaalo mai deú ito yito mongo walaó Allahu Taáala.

¹⁷ Naa, wonu ito yito mongo wala–lo, yi ito olo ahali lowarisi–Lio u mamololimo babaa–lakatiyalo upilohetu lo Allahu Taáala ode mongo wala–lo. Ito mamololimo peé–peéenta woli Isa Almasi wolo u mapilohetu lo Allahu Taáala o–Lio; sababu wonu ito modutolo peé–peéenta woli Isa Almasi, ito mapolai@o–Lio olo peé–peéenta wo–Lio.

¹⁸ Ngoáamila polodutolo u olaasanto masaatia botie, moduduá huhama lowatia, sama–samaata diila mowali pobandingiolo wolo ololai@o u mapo@ilaalo mai olanto.

¹⁹ Ngoilanggubu aalamu malo hiwoolola hemohima wakutuulio lo Allahu Taáala mopo@ilaalo mai mongo wala–lo.

²⁰ Sababu aalamu mapilo luliilio lowali lotupo, diila bo sababu hilaalio lohihilao, bo sababu Allahu Taáala malo poluli mai odito. Eleponu odito woluo olo halapani utie:

²¹ deú towakutu tuwau aalamu mapo lopatolo monto kawasa umoó aantulu wau mamoduduá lopato–Lio wau pouádaáalo peé–peéenta wolo mongo walaó Allahu Taáala.

²² Otaawanto deú tunggula toú botie ngoilanggubu aalamu hemo po@ilaalo suukali sababu hidutola debo odelo ti ibu ngota hemodutola toú mopotutu mai lo ta@unge.

²³ Wau diila bo wambaó ngoilanggubu aalamu u hemo po@ilaalo suukali; ito lohihilao olo hemo po@ilaalo suukali todelomo hilaanto. Ito malo lolimo Rohullah odelo wowohi mai lo Allahu Taáala ubohulio, bo boli odito ito olo donggo hemohima Allahu Taáala mopo lopatai batanganto lea–leaatulo maó wau mopowali olanto mongo wala–lo.

²⁴ Sababu wolo mohaalapu, yi ito piloáahu–Lio. Bo wonu wolo u hehalaa–puwonto boito maa iloontonganto, yi uito diilalo halapani. Sababu tatoonu tadonggo mohalapu hitua–tuawua udiipo iloontonga?

²⁵ Bo wonu ito mohalapu hitua–tuawua udiipo iloontonganto, yi ito mohima mai o–Lio wolo sabali.

²⁶ Odito olo Rohullah dungga–dungga mai momantu olanto wonu ito molulupuhu. Sababu diila otaawanto woloolo mola ito mamusi moduá; Rohu boito lohihilao modudulaó ode Allahu Taáala u momolohone to Allahu Taáala ode olanto wolo malo odito woloolo tilinggula diilalo mowali wulitolo.

²⁷ Yi Allahu Taáala, tamotota tuango hilaa lomanusia, mongalati u otohilaa lo Rohu boito; sababu Rohu boito momolohone to Allahu Taáala ode umati lo Allahu Taáala, wau motuuúde wolo otohilaa lo Allahu Taáala.

²⁸ Otaawanto deú Allahu Taáala mongatulu mai totoonulalo suáli, tilinggula mongohi tilapulo umopiohe ode tau–tauwalo tamo toliángo o–Lio wau tatilia–Ngio motuuúde wolo lanjana–Lio.

²⁹ Timongolio tamaa tilulaoto Allahu Taáala, matilantu–Lio olo lonto bohulio u lowali ngolupa wolo Wala–lo, deúito–yito ti Isa Almasi. Louú odito Walaó boito lowali tabohulio towolota lomongo wutato dadaata.

³⁰ Odieelo mola Allahu Taáala lotianga olimongolio tamaa tilantu–Lio mai leimulo; wau timongolio tatilia–Ngio

boito, yiluasiasia–Lio muli mopiiohe wo–Lio. Wau timongolio tailuasiasia–Lio muli mopiiohe wolo Allahu Taáala, mohama tayade todelomo tutumulo Allahu Taáala lohihilao.

³¹ Wolo umowali lo@iyanto botia pasali loú ngoáamilalo boito? Wonu Allahu Taáala motiwambaó ode olanto, tatoonu tamowali moluwali olanto?

³² Wala–lo lohihilao diila piloleé–Lio mai, bo tumbaó yiludu–Lio mai u polohuna daá ode olanto ngoáamila; uwalita, Tio diila tamohudu mai de olanto totoonulalo hitua–tuawua uwewolio?

³³ Tatoonu tamowali mongaibu olanto umati tatilulaoto Allahu Taáala wonu Allahu Taáala lohihilao mopo@ilaalo mai deú ito diila ototala?

³⁴ Wolo woluo taóhila mopotala olanto? Deti Isa Almasi tamopo duulua olanto! Tiolo tamailate, wau tumbaó Tiolo tamaaluli pilopo tumu–Lio mai lonto opopate wau maito totambati lo Allahu Taáala taókawasa.

³⁵ Wolo woluo tamowali mongabuta li Almasi momonu mai olanto? Wolo osuusa mowali mongabuta o–Lio, meaalo oototolo, meaalo polo ngalinaya, meaalo

polobiti, meaalo omosikini, meaalo baala, meaalo opopate?

³⁶Todelomo Kitabi tulatulade odie mola, "Ngotupa lodulahu ami tumutumulo todelomo baala lomautu sababu Eeya. Ami pilohutulio debo odelo himba umaa olotolo."

³⁷Diila! Tumbaó todelomo u ngoáamilalo boito ito mamooóhama wolo wimu–wimumuto ngo@aamilalo sababu Tio talomonu olanto!

³⁸Sababu watia palacaya daá deú to ngoilanggubu dunia, mopio opopate meaalo tutumulo, mopio malaíkati meaalo takawa–kawasa, mopio aáan–jamuwalo masaatia botie meaalo aáan–jamuwalo todulahe u madungga–dungga mai meaalo ololoo–towaalo uwewolio;

³⁹mopio susuu–aliyaala u tohulungo, meaalo susuu–aliyaalo u todelomo dunia meaalo penu boli wolo wamba@o uwewolio, ngoáamilalo diila mowali mongabuto Allahu Taáala momonu mai olanto, debo odelo u mapilo bilo–Hio mai lotimbulude li Isa Almasi, Eeyanto.

9¹Wolo u mapolele mai lowatia botie yito otutu sababu watia miliki li Almasi. Watia diila mohimbulo. Hilaa u maloótapu

tinelo Eeya lowatia udilelo lo Rohullah helo poyakini olaatia olo deú loíya lowatia botie otutu.

² Watia moololo daá wau hilaa lowatia dutodutolo

³ sababu mongo wutato lowatia tango bangusa wolaatia. Sababu ode limongoliolo, watia lohihilao iloheela lohilao yilanaátia lo Allahu Taáala wau biluaáala lonto li Almasi.

⁴ Timongolio yito umati taílo tuluoto wau Allahu Taáala lopowali olimongolio mongo wala-lo lohihilao, wau lopoólaalo kawasa-Lio olimongolio. Tio lohutu daantia woli mongolio wau longohi olimongolio butoó lo agama. Allahu Taáala lopoótaa olimongolio woloolo mola timongolio musi motabia wau timongolio olo malo lolimo totoonulalo danti-Lio.

⁵ Timongolio yito wali mai linenemoyanto. Ti Almasi odelo pohuli lomanusia asalii-Lio mai lonto bangusa limongolio. Tio lebe lailaió wolo ngoáamilalo. Ilopujiaalo mola Allahu Taáala u ohiheo-hiheolo maó! Amin.

⁶ Watia diila omakusudu moloíya deú danti lo Allahu Taáala madiilalo ohuna; bo

diila ngoáamila taulo Isiraïlu yito umati tatilulaoto Allahu Taáala.

⁷ Diila ngoáamila wali lei Abraham yito mongo walaó Allahu Taáala. Sababu Allahu Taáala lotahuda odelei Abraham, "Bo wali lei Isihaka wambaño tamaa unteelo walimu."

⁸ Uito boliilio maó deú wali lei Abraham tamowali mongo walaó Allahu Taáala, deúito-yito bo waliilio tapilotutu mai sababu danti lo Allahu Taáala; wau diila ngoáamila waliilio.

⁹ Sababu danti lo Allahu Taáala yito odie mola, "Towakutu u tilantu, Waú mamuli mohualingai, wau ti Sara mamowali owalaái talolaí ngota."

¹⁰ Wau utie olo; ti Ribka helo potutu mai talolaí duulota lonto tiyamo ngota, deúito-yito tei Isihaka tinenemoyanto.

¹¹ Toú wolaó duulota boito diipo pilotutulio, Allahu Taáala malolantu tulao-Tio duólo wumbutio mola. Tulaoto Allahu Taáala boito diila lotiwunela toú wolo u mowali pohutuo lotau, bo lotiwunela to titiango Allahu Taáala lohihilao. Sababu towakutu walaí Ribka mongo lolaí duulota boito diipo mowali

moponaó hitua-tuwaua umopiohe meaalo u moleeto,

¹² Allahu Taáala malo tahuda odeli Ribka, "Tamohuhula mamomaya tawaliyali."

¹³ Todelomo Kitabi tulatulade deú Allahu Taáala lotahuda odie mola, "Tei Yako pilonu-Ú, bo tei Esau yilonúu-Ú."

¹⁴ Wolo pulito lo huhamanto botia? Deú Allahu Taáala boito diila aadili? Maatantu Allahu Taáala yito aadili.

¹⁵ Sababu Allahu Taáala lotahuda odelei Musa, "Waú mamopo bilohei odehu hilao totaa u otohilaa-Ú pobilohela lo odehu hilaa-Ú, wau Waú mamopo bilohei odehu hilao totaa u otohilaa-Ú pobilohela odehu hilao."

¹⁶ Oditolio, putuusani lo Allahu Taáala boito diila wunewunela to iloheela lohilao lomanusia meaalo to tolopani lomanusia, bo to opopiohe hilaa lo Allahu Taáala wambaó totaa tilulao-Tio boito.

¹⁷ Sababu todelomo Kitabi tulatulade, "Allahu Taáala lotahuda odeli onlongia lo Masiri, Waú mopowali olemu onlongia wolo makusudu bo tuwau botie wambaó, deúito-yito alihu wolemu, Waú mopo bilohei okokawasa-Ú wau

mohutu tanggulu–Ú masa–masahulu to ngoilanggubu dunia."

¹⁸ Oditolio, Allahu Taáala modehu hilao ode tahingota–ngotaawa, wonu Allahu Taáala mokahandaki odito. Wau Allahu Taáala olo moósababu ode tahingota–ngotaawa mowali baángiyolo, wonu Allahu Taáala mokahandaki odito.

¹⁹ Naa, Wutato mamoloíya mai olaatia, "Wonu odito yilongola Allahu Taáala donggo ohilaa mopotala tomanusia? Tingga woluo penu boli ngotaa maó tamowali mongabuto u otohilaa lo Allahu Taáala?"

²⁰ Bo, Wutato! Wutato bo manusia wambaó. Wau Wutato diila mowali buheli motuwahe to Allahu Taáala! Tingga mowali poti lo bunga mohintu to talohutu maó olio, "Yilongola yió malohutu mai olaú odie?"

²¹ Wolo taa u mohutu poti lo bunga boito ohaku mohutu maó huta modudangia boito moduduá totoonulalo otohilaalio? Monto ngotopingo huta modudangia ngotopingo, tau boito ohaku mohutu maó dulo dalalo poti lo bunga; tuwau umopiohe wau uwewolio udiila boti mopiohe.

²² Odito olo loú wolo u pilohutu mai lo Allahu Taáala. Tio oniyati u mopomukaái oyiyingo-Lio wau mopo bilohei okokawasa-Lio. Bo Tio sabali olimongolio tamusi hukuu-maniyolo sababu heloó muluka o-Lio.

²³ Allahu Taáala olo oniyati mopo bilohei olanto osanangi tutu udiila o enggadelio u bilongguwa-Tio mai olanto tapilonu-Lio. Ito mapilo dapa-Tio u mololimo osanangi tutu boito.

²⁴ Ito-itolo tamaa tilia-Ngio, diila bo wambaó bangusa lo Yahudi, bo monto babaa-ngusawalo wewo olo.

²⁵ Sababu todelomo buku li Nabi Hosea, Allahu Taáala lotahuda, "Tau-tauwalo tadiila umati-Ú, maúntee-Ú 'Umati-Ú'. Bangusa tadiila pilonu-Ú, maúntee-Ú 'Ilohilaa-Ú'.

²⁶ Wau totambati toutoonuu piloloíya maó totau, 'Timongoli diila umati-Ú,' mota teto tau-tauwala boito maúnteelo mongo walaó Allahu Taáala tatumu-tumulo."

²⁷ Ti Nabi Yesaya lolóíya wolo piduduto tomimbihu bangusa lo Isiraílu, "Penu boli jumulaa bangusa lo Isiraílu daatalio debo odelo hungayo topentadu, bo ngoídi wambaó tamaa moáahu;

²⁸ Sababu Eeya mahuáa mopodehu mai huumani ode tuango dunia."

²⁹ Ti Nabi Yesaya malo loíya odie olo, "Humayaalio Allahu Taáala Taa Laba-labaalo kawasa diila lololaa maó olanto wali, tantu ito ngoáamila malowali debo odelo Sodom wau Gomora."

³⁰ Oditolio, pulito lo huhamaalio duúito-yito utie: Babaa-ngusawalo wewo tadiila Yahudi diila helo tolopani alihu wumbuta limongolio wolo Allahu Taáala muli mowali mopiohu. Bo sababu timongolio palacaya, yi Allahu Taáala lopowoluo mai wumbuta limongolio wo-Lio luli lowali lopiohu.

³¹ Bolíio maó, tau-tauwalo Yahudi laito hemo tolopani modungohe butoó alihu wumbuta limongolio wolo Allahu Taála muli mowali mopiohu. Bo timongolio tumbaó diila ilohaasili.

³² Yilongola timongolio diila ilohaasili? Sababu timongolio helohutu uito diila loli palacaya to Allahu Taáala bo loli tolopani limongolio lohihilao. Sababu uito timongolio lodehu leeteduó to "Botu Oteduó."

³³ Tomimbihu botu boito todelomo Kitabi tulatulade odie, "Poótuota maó utie: To Sion mapilopo dutu-Ú botu tuwau u

mamoó sababu tau meeteduó; deúito–yito botu leidaá tuwau u mamooó sababu tau modehu. Bo taa upalacaya to o–Lio diila taókikiíó lohilao."

10¹ Mongo wutato! Watia mooloolo daá alihu bangusa lowatia poáahuwolo. Wau watia otu–otutuulo maó heloduá to Allahu Taáala ode limongolio.

² Watia buheli moloíya deú timongolio osumangati daá taáluku wau hulumati to Allahu Taáala. Bo sumangati limongolio boito diila patopatoá to pongotota umonto Allahu Taáala.

³ Diila otaawa limongolio pohuliilio lo Allahu Taáala mopowoluo mai wumbuta lomanusia wo–Lio muli mowali mopiohei. Wau sababu timongolio ohilaa moduduá pohuli limongolio lohihilao, yi timongolio diila loduduá topohuli upilotunu mai lo Allahu Taáala.

⁴ Butoó lo agama mapiloó polu mai li Almasi. Oditolio timiídu taa palacaya li Almasi, wumbutalio wolo Allahu Taáala muli mowali mopiohu.

⁵ Tei Musa loluladei deú taa u mopiiohe wolo Allahu Taáala patopatoá tobutoó lo agama, tau boito matumumulo sababu lodungohe tobutoó lo agama boito.

⁶ Bo tomimbihu pohuli lotaa mopiiohe wolo Allahu Taáala patopatoá to palacaya ode Allahu Taáala, Kitabi loíloíya odie, "Sambelolo yió molóíya todelomo hilaamu, 'Tatoonu tamaa mobotula mola ode sologa?' (boliilio maó modelo li Almasi motuhuto),

⁷ meaalo 'Tatoonu tamaa molahe mola ode dunia lotaa mate?' (boliilio maó momintaó li Almasi mobotulai monto opopate).

⁸ Makusudulio yito odie, "Habari monto Allahu Taáala boito membide daá wolemu; to tunggilumu wau todelomo hilaamu." Uitolo habari u pololadei lami; habari deú tau musi palacaya.

⁹ Sababu wonu Wutato mongaku wolo tunggilumu deú "Ti Isa boito Eeya", wau Wutato palacaya todelomo hilaamu deú Allahu Taáala boito malopo tumulai li Isa lonto opopate, yi Wutato mamoaáahu.

¹⁰ Sababu wolo hilaalio tau palacaya, tilunggula Allahu Taáala mololimo olio odelo taa u mopiiohe wolo Allahu Taáala. Wau wolo tunggilio tau mongaku, tilinggula tio poáahuwolo.

¹¹ Todelomo Kitabi tulatulade, "Taa palacaya diila tapo kikiiólio tohilao."

¹² Uito pohupohutu totaa ngoáamila, sababu diaaluo hiheedio towolota taulo Yahudi wolo tau-tauwalo bangusa wewo. Allahu Taáala tatuwau boito yito Eeya ode taa ngoáamila. Tio mongohi balakati u dadaata tutu ode taa ngoáamila tameí tulungi o-Lio.

¹³ Todelomo Kitabi tulatulade, "Ngoáamila taa mongibode ode Eeya, mamoaáahu."

¹⁴ Bo woloolo mola tau mowali mongibode ode Allahu Taáala wonu timongolio diipo palacaya? Wau woloolo mola, timongolio mowali palacaya ode Eeya wonu timongolio diipo loódungohe pasalii-Lio? Odito olo, woloolo mola timongolio moó dungohe pasali lo Eeya, wonu diaaluo tamo pohabari?

¹⁵ Wau woloolo mola tau mowali modelo habari boito wonu timongolio diila yilaolio? Todelomo Kitabi tulatulade odie, "Donggo boli pihio podudungga mai lotau-tauwalo tamodelo Habari Mopiohe monto Allahu Taáala!"

¹⁶ Bo diila ngoáamila tau lololimo Habari Mopiohe boito. Sababu tei Yesaya loloiya, "Eeya, tatoonu tapalacaya tohabari lomongo watotia?"

¹⁷ Uito sababuulio tau-tauwala lowali palacaya sababu timongolio lodungohe habari, wau habari ilodungohe sababu woluo taa u lopohabari pasali li Almasi.

¹⁸ Bo watia lohintu maó: Wolo memangi timongolio diipo loódungohe habari boito? Tantu maloó dungohu! Sababu todelomo Kitabi tulatulade odie, "Suala limongolio mailumolaó ode ngoilanggubu dunia, tataa-heyaaalo limongolio malei dungga demola huudu dunia."

¹⁹ Watia luli lohintu maó: wolo bangusa lo Isiraïlu diipo motota? Huliilo maó yiyintu boito bohu-bohulio tameta lei Musa. Tei Musa loloíya, "Odieelo mola tahuda lo Allahu Taáala, 'Waú mamohutu mai olimongoli mohiihia ode bangusa tuwau tadiila umati Wau Waú mamohutu mai olimongoli moingo ode bangusa tuwau tamohulodu.'"

²⁰ Tei Yesaya lebe buheli maó poli. Tio loloíya, "Odieelo mola tahuda lo Allahu Taáala, 'Tau-tauwalo tadiila mololohe ola-Ú, maloó dungga ola-Ú; wau Waú lopobilohe batanga-Ú olimongolio tadiila helohintu pasali-Ú.'"

²¹ Bo tomimbihu bangusa lo Isiraïlu tei Yesaya loloíya, "Odieelo mola tahuda lo

Allahu Taáala, 'Ngotupa lodulahu Waú helohudu uluúu–Ú ode bangusa tuwau tabaángiyolo wau diila modungohu."

1 1 ¹ Watia mohintu mai: Wolo Allahu Taáala malolapi umati–Lio lohihilao? Tantu diila! Watia lohihilao ngotaalio lo Isiraílu wali mai lei Abraham, wau lonto suku Benyamin.

² Diila! Allahu Taáala diila lolapi umati–Lio tamaa tilulao–Tio tumulalo mai bohulio. Otaawa lo Mongo wutato wolo u tulatulade todelomo Kitabi tomimbihu olei Elia, toú tio lopodulohu suáli lo Isiraílu ode Allahu Taáala. Tei Elia lolóiya,

³ "Oo Eeya, tau–tauwala malomate mongo nabi–Mu yila–yilateelo maó wau helo ngantulu tataa–mbatiyalo hepo dewowalo bake ode Eeya. Taleitolaa bolo batanga lowatotia lohihilao wau timongolio ohilaa momate olo watotia mate–mateelo maó."

⁴ Wolo pilolameto Allahu Taáala odelei Elia? Allahu Taáala lolameto, "Waú malo lolaa maó pitu lolihu lota ode batanga–Ú lohihilao. Timongolio diipo peénta maó helolubo dewa Baáal."

⁵ Odito olo masaatia botie; Woluo ngojumula ngoídi tau–tauwala tamaa

tilulaoto Allahu Taáala sababu odehu hilaa–Lio.

⁶Tio lolulaota olimongolio patopatoá to odehu hilaa–Lio wau diila patopatoá tohuhutu limongolio. Sababu wonu tulaoto Allahu Taáala boito patopatoá tohuhutu lomanusia, yi odehu hilao lo Allahu Taáala boito diilalo odehu hilao utuutu.

⁷Oditolio, woloolo mola? Umati lo Isiraílu diila loótapu wolo u helolohu limongolio. Taloótapu bo ngokaumu kikiió tau–tauwalo tamaa tilulaoto Allahu Taáala. Tawewo ngoáamilalo baángiyolo to titiango Allahu Taáala.

⁸Sababu todelomo Kitabi tulatulade odie, "Allahu Taáala lohutu hilaa wau pikiilangi limongolio lowali abalo; wau tunggula botia mato limongolio diila moóonto wau bulonga limongolio diila moódungohu."

⁹Tei Dauda loloíya olo, "Huliilo maó popoo–tihungguwalo limongolio mowali taalo ode limongolio lohihilao, wau mowali huwango, tambati odehua limongolio wau moáantulu!

¹⁰Huliilo maó bibilohi mongolio mowali modiólomo alihu timongolio diila moóonto; wau huliilo maó timongolio mowali bunggu ohiheo–hiheolo maó."

¹¹ Watia luli lohintu: Toú tauo Yahudi lodehu, wolo uito lotoduo mai alihu timongolio moáantulu? Sama–samaata diila! Bo sababu timongolio odusa, yi bangusa wewo tumbaó piloáahu, tilinggula loósababu tauo Yahudi lohiihia tobangusa wewo boito.

¹² Sababu bangusa lo Yahudi ototala wau diila loduduá otohila lo Allahu Taáala, yi babaa–ngusawalo wewo bilalakatia lo Allahu Taáala. Tidiyolo maó wonu wumbuta bangusa lo Yahudi wolo Allahu Taáala muli mowali mopiohe; tantu lebe udaá poli balakati u mawohi lo Allahu Taáala.

¹³ Bo botia opiohelio watia mobisala mai to Mongo wutato tadiila Yahudi! Ngotilonggadu botie, odelo rasulu duólo babaa–ngusawalo tadiila Yahudi, watia helo polaiá daá tuugasi lowatia.

¹⁴ Watia hemohalapu deú watia mowali mopotoodei hiihia tobangusa lowatia lohihilao, alihu woleeto watia mowali mopoáahu ngotayadu monto olimongolio.

¹⁵ Sababu timongolio pilotouli lo Allahu Taáala, yi wumbuta lodunia wolo Allahu Taáala luli lowali lopiohu; tidiyolo maó wonu timongolio tilolimo Allahu Taáala!

Tantu uito tutuuwauwa wambaío debo odelo taamate muli tumumulai!

¹⁶ Wonu roti ngopita u bohulio mailohi ode Allahu Taáala, uito boliilio ngoáamila rotilio wohi olo ode Allahu Taáala. Wau wonu waáato ayu yito miliki lo Allahu Taáala, uito boliilio tataa-ngolio yito miliki-Lio olo.

¹⁷ Ngotayadu tataa-ngowaalo bungo loáyu jaituni -- deúito-yito tau-tauwalo Yahudi -- maíloyodio. Wau tobakasi oyodio boito piloómbitio maó tango loáyu jaitun udiila topalihala, deúito-yito Mongo wutato tadiila Yahudi. Wutato piloómbitio teto alihu Wutato moólaasa maó ngoáamila u mopiohe monto tutumulo rohu lotau-tauwalo Yahudi.

¹⁸ Masababu uito timongoli diila maó ponganggapu moheelo olimongolio tamaa iloyodio debo odelo tango boito. Musi eela maó limongoli deú timongoli bo tango wambaó. Wau diila tango u mongohi uáalo towaáato, bo waáato u mongohi uáalo ode tango.

¹⁹ Bo Wutato mamoloíya, "Ooó, bo tataa-ngowaalo boito iloyodu alihu watia mowali poómbitolo to batangio!"

²⁰ Uito memangi otutu. Bo timongolio tilapi sababu timongolio diila palacaya. Hiambola Wutato tilolimo sababu Wutato palacaya. Oditolio Wutato diila maó potimenge kalana uito; bo bolíio maó Wutato musí molaasa mohe.

²¹ Sababu wonu Allahu Taáala diila lodehu hilao u molapi taulo Yahudi udebo odelo tataa–ngowaalo pulua boito, diila maó lantobe Tio mamodehu hilao u molapi to Wutato!

²² Oditolio tea ito moóonto donggo boli pihio Allahu Taáala wau donggo boli toheeto olo Tio. Tio lohutu loú moóohuú olimongolio taódusa, bo hilaa–Lio mopiohe ode Wutato -- asali Wutato debo tumutumulo wolo opopio–Hio, wonu diila, yi Wutato olo matapilo–Lio.

²³ Wau tomimbihu tau–tauwalo Yahudi boito, wonu timongolio mohuheli monto píili udiila palacaya, yi timongolio mamuli tolimoo–Lio; sababu Allahu Taáala okawasa u muli mololimo olimongolio.

²⁴ Wutato tadiila asaliilio mai diila monto bangusa lo Yahudi yito debo odelo tango monto bungo lojaitun udiila topalihala. Naa, wonu Wutato, bubuu–lemenga wolo píili lo Wutato, mowali poómbitolo

tobungo lojaitun pulua, tidiyolo maó tau-tauwalo Yahudi tapilo humaya wolo tataa-ngowaalo bungo lojaitun pulua boito. Tantu lebe gambangi poli ode Allahu Taáala u moponguli maó olimongolio tobungo lojaitun limongolio lohihilao.

²⁵ Mongo wutato! Halapuo lowatia timongoli diila maó molaasa mailotota totoonulalo hitua-tuawua. Sababu woluo suáli hitua-tuawua u kilahandaki lo Allahu Taáala, bou diipo ilotaawa lotau. Wau otohilaa lowatia otaawa maó limongoli; deúito-yito odie: Ngotayadu monto taulo Yahudi baaángiyolo, bo píili limongolio boito mapohu-pohutu bo tunggula jumulaa lotau-tauwalo tadiila Yahudi tamonaó mai ode Allahu Taáala malei wimumuto.

²⁶ Odieelo mola ngoáamila taulo Yahudi mamoaáahu. Sababu todelomo Kitabi tulatulade odie, "Olongia Tamoo-poáahua mamei dungga mai monto Sion; Tio mamoluluto ngoáamila u moleeto monto wali mai lei Yako.

²⁷ Waú mamo ngawade daantia botie woli mongolio tou Waú mongambungu duduu-sawaalo limongolio."

²⁸ Sababu taulo Yahudi diila mohuto mololimo Habari Mopiohe monto Allahu Taáala, yi timongolio malowali musu lo Allahu Taáala; wau uito tumbaó maloó paéeda to Mongo wutato tadiila Yahudi. Bo sababu matilulaoto Allahu Taáala, yi tau–tauwalo Yahudi boito debo pilonu lo Allahu Taáala domi tinenemoya limongolio.

²⁹ Sababu wonu Allahu Taáala molulaotai tau wau mobalakati tau boito, Allahu Taáala diila peéenta maó muli mohama wolo umaa pilohutu–Lio.

³⁰ Muloololio mai timongoli diila modungohu to Allahu Taáala. Bo botia Allahu Taáala malo póilaalo deú timongoli lolopato lonto totala, sababu tau–tauwalo Yahudi diila lodungohu.

³¹ Odito olo wolo tau–tauwalo Yahudi boito. Masaatia botie timongolio diila lodungohu to Allahu Taáala, alihu timongoli póilaalolo molopata monto totala. Bo de timongolio olo mapoilaalolo molopato monto totala.

³² Sababu Allahu Taáala malo poluli ngoáamila umati lomanusia kiluwasa lo odiila dungohu, alihu Tio mowali mopo

bilohei odehu hilaa–Lio ode limongolio ngoáamilalo.

³³ Otutu polu–polutuó okokaya lo Allahu Taáala! Otutu udaá tinepo wau pongotota–Lio! Tatoonu tamowali motulete totoonulalo putuusani–Lio? Tatoonu tamowali mongalati dudelo–Lio touú tio mokalaja?

³⁴ Todelomo Kitabi tulatulade odie, "Tatoonu tamotota pikiilangi lo Eeya? Tatoonu tamowali mongohi naseehati o–Lio?"

³⁵ Tatoonu tapeéenta longohi hitua–tuawua to Eeya tilinggula mowali mohile wolo moóohuú balasi–Lio?"

³⁶ Allahu Taáala talo powali totoonulalo u hitua–tuawua. Ngoáamilalo asaliilio mai lonto Allahu Taáala wau duólo Allahu Taáala. Ilopujialo mola Allahu Taáala u ohiheo–hiheolo maó! Amin.

12 ¹ Mongo wutato! Allahu Taáala mopiohe daá olanto, uito sababuulio pohile lowatia louú tióotutua alihu timongoli mopodewo batanga limongoli odelo tuwaulio lobake tutumulo utolomodu duólo Allahu Taáala wau moposanangi hilaa–Lio. Tabiyamu ode Allahu Taáala musiilio odito.

² Diila maó poduduó totoonulalo dudelo lodunia botie. Hulii maó Allahu Taáala tamohutu mai batangamu lohihilao mowali bohu, alihu timongoli molomelo. Lou odito timongoli mambo motota maó u otohila lo Allahu Taáala -- deúito-yito wolo umopiohe wau umoó sanangi hilaa-Lio wau u wimu-wimumuto ngo@aamilalo.

³ Allahu Taáala malongohi mai ponu olaatia. Uito sababuulio watia monaseehati mai to Mongo wutato ngoáamilalo; diila maó polaasa batanga lebe molaió lou otutuulio maó. Mamusi timongoli motiliki owowoluwoa lobatanga limongoli wolo dupadupapa lohilao; ngota-ngota motiliki maó batangalio moduduá omambowa uilohi lo Allahu Taáala olio masababu tio palacaya li Isa.

⁴ To batanganto o dadaata pongawaá. Timiídu pongawaá tingga o kalajaalio.

⁵ Odito olo wolanto. Eleponu ito ngoáamilalo dadaata, bo ito debo odelo batanga tuwau sababu ito tuwau woli Almasi. Wau ito ngota-ngota wuwuumbuta ngota-timongota odelo popoo-ngawa@aalo monto batanga tuwau.

⁶ Ito ngota-ngota o toli@ango momaya u hiwewo-wewoa. Totoo-li@angawalo boito yilohi lo Allahu Taáala olanto loduduá odehu hilaa-Lio. Sababu uito ito musí mopohuna totoo-li@angowalo boito. Taa u otoli@ango u mopohabari habari monto Allahu Taáala, musí mopohabari habari monto Allahu Taáala boito moduduá omambowa lo batangalio lohihilao.

⁷ Taa u otoli@ango u motulungi taawewo, musí otu-otutuulo maó motulungi taawewo. Taa u otoli@ango mongaajali musí otu-otutuulo maó mongajali.

⁸ Taa otoli@ango u mongohi sumangati ode taawewo, musí otu-otutuulo maó mongohi sumangati ode taawewo. Taa okurunia u mongohi ode taawewo wolo u mililikilio, mamusi mohutu maó uito wolo muula lohilao wau paatuti. Taa otoli@ango u mowali taúwa, musí otu-otutuulo maó mowali taúwa. Taa otoli@ango u mopo bilohe odehu hilao ode taawewo, musí mohutu maó uito wolo hilaa sanangi.

⁹ Potoliángaó wolo ihilasi. Lonuí maó u moleeto, wau potidihulo toú wolo u mopiohe.

¹⁰ Mamusi Mongo wutato mototoo-liáanga ngota timongota wolo tataabia

lohilao debo odelo tau–tauwalo tamohutato todelomo ungaalaá, wau wajibulio timongoli tinggai mumuuloa mongohi hulumati.

¹¹ Potiólöhulo mokalaja. Diila maó poti lantingo. Pokalajaalo duólo Eeya wolo sumangati monto Rohullah.

¹² Mamusi Wutato motiwunela to Eeya wolo wengahu, posabalilo todelomo usuusa, wau poti otutuulo moduá.

¹³ Tulungii maó mopotuheta upalaluo lotau–tauwalo Nasara wewo wau tolimoa maó mongo wutato ngoíimani tadiila otaawa lo Wutato, wolo hilaa sanangi todelomo bele limongoli.

¹⁴ Pohilea mola to Allahu Taáala alihu Allahu Taáala mobalakati mai tau–tauwalo tahi palangia to olemu. Ooó, pohilea mola to Allahu Taáala mobalakati mai olimongolio, diila maó polaánati.

¹⁵ Poti wengahulo wolo tau–tauwalo tahi wengahe, wau pohiyongolo woli mongolio tahe hiyonga.

¹⁶ Poti tumulolo wolo mopiohe wau aamani ngota timongota. Diila maó poti batingga lohilao, bo potuuúdelo batangamu wolo tadupa–dupapa huhuloálio. Diila maó ponganggapu

batanga lebe motota wolo u otutuulio maó.

¹⁷ Wonu tau mohutu u moleeto olimongoli, diila maó pomalasi lou moleeto. Pohutua maó wolo uhe anggapuo mopiohe lotaa ngoáamila.

¹⁸ Monto olimongoli, potolo panilo lou tióotutua u tumumulo dame wolo taa ngoáamila.

¹⁹ Mongo wutatuú! Sama–samaata diila maó pomalasi niyati, hulii maó Allahu Taáala tamo hukuumani mai. Sababu todelomo Kitabi tulatulade, "Waúlo tamolontuli. Waú tamamo hukuumani mai, tahuda lo Eeya."

²⁰ Bolíio maó, wonu musumu polaangolo, wohia maó tio uáalo; wau wonu tio mototoángo, wohia maó tio uilumolo. Sababu wolo mohutu maó odito, Wutato mamohutu olio mowali moolito.

²¹ Diila maó polulia batangamu olaahe lou moleeto, bo Wutato mamusi mopo olaaheó u moleeto wolo umopiohe.

13 ¹ Timíidu manusia mamusi modungohe to pomalenta, sababu diaaluo pomalenta udiila moótapu okokawasalio monto Allahu Taáala. Wau pomalenta uwoluo masaatia botie,

moponaó okokawasalio to palenta lo Allahu Taáala.

² Uito sababuulio moluwali pomalenta tutuuwauwa wambaío loú moluwali wolo u matilantu lo Allahu Taáala. Wau taa u hipohutua odito mamololimo hukuumaní.

³ Sababu, taa u hipohutua umopiohe diila palalu moohe to pomalenta. Bo taa u hipohutua u moleeto wambaío tamusi moohe. Wonu Wutato motohilaa alihu Wutato diila molaasa moohe to pomalenta, Wutato mamusi mohutu umopiohe, yi wutato mapujiolio.

⁴ Sababu pomalenta yito wato lo Allahu Taáala tahemo kalaja duólo opopiohi mongoli. Bo wonu Wutato mohutu u moleeto, memangi Wutato musi moohe to pomalenta. Sababu diila palacuma wambaío pomalenta okawasa mohukuumaní maó tau. Pomalenta yito wato lo Allahu Taáala, u mopodehu hukuumaní lo Allahu Taáala ode tau-tauwalo tahipo hutua u moleeto.

⁵ Uito sababuulio Wutato waajibu modungohu to pomalenta -- diila bo sababu Wutato diila mohuto hukuumaniyolo, bo sababu olo suala lohilaamu u malo@otapu tenelo Eeya.

⁶ Uitolo olo alasanilio yilongola Wutato momayali beya, sababu pomalenta yito pogawee lo Allahu Taáala tamoponaó lotuugasi u tolomodu botie.

⁷ Oditolio bayalia maó to pomalenta wolo u mamusi bayalia lo Wutato ode pomalenta. Pomayali maó hasili wonu Wutato musi momayali beya; wau pomayali maó beya wonu Wutato musi momayali beya. Halagai maó timongolio tamusi halagaalo wau hulumatia maó timongolio tamusi hulumatiolo.

⁸ Diila maó pobuli penu boli wolo toólita wambaío, ngopohia biloli toliángo ode ngota–timongota. Sababu tamo toliángo ngota timongotalio, malo poópolu ngoáamila butoée Musa.

⁹ Sababu butoó agama lo Yahudi, deúito–yito: Diila maó pojina, diila maó pomate mate–mateelo maó, diila maó potaó, diila maó potohilaa wolo u tilolo miliki lotaa wewo, u ngoáamilalo boito peé–peéenta wolo bubuu–to@oowalo uwewo, umapilo limbuío lowali butoó tuwau wambaío, deúyito–yito, "Pototoo–liángalo ngota–timongota debo odelo yió motoliángo batangamu lohihilao."

¹⁰Taa u motoliángo taawewo, diila tamohutu u moleeto ode tau boito. Oditolio taa u motoliánga timongotalio yito taamalo poópolu ngoáamila danti butoó lo agama.

¹¹Ngopohia loú ngoáamilalo boito, otaawa limongoli deú masaatia botie yito saaáti limongoli u mobongu monto otuluhe. Sababu wakutuulio olanto u po@aahuwolo malebe lembidei masaatia botie wolo wakutunto boheli palacaya maó.

¹²Hui mangopeé mopaluto; wau ngopeépo madulahu. Oditolio, opiohelio ito mohuheli mohutu totoonulalo huhutu u moleeto. Ito musí mopo wimumuto batanganto wolo sinapangi mobaango.

¹³Ito musí mohutu susuu–aliyaalo uhulu–hulumati debo odelo ubiasaalio hepohutuo lotau toú dulahu; diila maó pohutu potihunggu daá u limba–limbata to omambowa meaalo motihuwoó. Diila maó potihuloto meaalo opíili udiila oádabu. Diila maó poloohulua, meaalo mohiihia.

¹⁴Hulii maó Eeya Isa Almasi tamolantu mai wolo umusi pohutuo limongoli. Wau

diila maó poduduá pĩli lomanusia odusa u bo wambaó mopoluli hilao to napusuulio.

14¹ Taa udiila yakini tou wolo upilala cayalio musi tolimoolo lou mopiohe towolota lo Mongo wutato. Diila maó pobuutola wolio tomimbihu totoonulalo tilihulalio.

² Woluo taa otilihula deú tio mowali molamelo penu boli wolo wambaíó. Bo woluo taawewo tadiila boti yakini; tio molaasa deú tio bo mowali molamela sasaa–yoriyaalo wambaó.

³ Taa u molamelo penu boli wolo wamba@o diila maó ponganggapu dupadupapa taa u hemolamelo bo u@aalo utantu–tantu wambaó; wau taa u molamelo bo u@aalo utantu–tantu wamba@o, diila ma@o olo mopotala taa u hemolamelo totoonulalo u hitua–hituawua, sababu Allahu Taáala malo lolimo olio.

⁴ Tatoonu Wutato tilinggula Wutato musi momutoó wato lotaa wewo? Diila otaawa wato boito modehu meaalo mobongu, uito yito suáli li tuanilio. Wau memangi wato boito matimihula mola motulidu, sababu Eeya mambo mohutu olio timihulo motulidu.

⁵ Woluo taa u molaasa deú dulahee tuwau utantu–tantu lebe polohuna daá wolo duduu–laheyaalo uwewo, hiambola taawewo poli hipo nganggapua deú duduu–laheyaalo boito debo tutuuwauwa. Hulii maó ngota–ngota tau mamolantu tilihulalio lohihilao.

⁶ Taa u mopoúdaá duduu–laheyaalo utantu–tantu, tau boito mohutu odito u mohulumati Eeya. Taa u molamelo tilolahepalo maó, mohutu odito u mohulumati Eeya, sababu tio mosukuru ode Allahu Taáala to u@aalo boito. Odito olo wolo taa bo molamelo uáalo utantu–tantu wambaó; tau boito olo mohulumati Eeya wau mosukuru to Allahu Taáala.

⁷ Diaaluo penu boli ngotaa maó monto olanto tatumumulo duólo batangalio lohihilao; wau diaaluo penu boli ngotaa maó monto olanto mate duólo batangalio lohihilao.

⁸ Wonu ito tumumulo, ito tumumulo duólo Eeya. Wau wonu ito mate, ito mate olo duólo Eeya. Oditolio, tumumulo meaalo mate, ito yito miliki lo Eeya.

⁹ Ti Isa Almasi mailate wau luli tilumumulai. Uito sababuulio Tio lowali

Eeya lotau-tauwalo tahitumula wau olo ode tau-tauwalo tamailate. Oditolio, Mongo wutato!

¹⁰Wolo hunalio mopotala to wutatumu tango iimani? Wau wolo hunalio Wutato monganggapu olio dupadupapa? Ito ngoáamila mamotaalua wolo Allahu Taáala u butoó-Lio.

¹¹Todelomo Kitabi tulatulade, "Tutuulio tutu," tahuda lo Eeya, "ngota-ngota tau mamolubo mosujudu totalu-Ú; wau timiídu tau mamosisi deú Waúlo Allahu Taáala."

¹²Oditolio ito ngota-ngota musu mongohi titihula to@u totoonulalo huhutuunto to Allahu Taáala.

¹³Masababu uito ito diila mowali tinggai mopotala ngota timongota. Boliío maó potolo panilo mola alihu timongoli diila mohutu penu boli hitua-tuawua umoó sababu ngotaalio lowutato ngoíimani oheinga wau mowali odusa.

¹⁴Sababu watia lotituwau woli Isa Eeya, yi watia palacaya daá deú diaaluo penu boli tuwau maó u topato@io najisi; bo suáli boito najisi ode tahingota-ngotaawa, wonu tau boito monganggapu najisi.

¹⁵ Bo wonu loú wolo utamelo lo Wutato, ngotaalio lo Wutato ngoíimani piloó ngongoto hilaalio, yi Wutato diilalo mohutu patopatoá to toliángo. Wonu ti Almasi mailate ode tahingota–ngotaawa, diila maó polulia tau boito polusaa loú wolo utamelo lo Wutato.

¹⁶ Uito sababuulio diila maó polulia wolo u mopiohe olimongoli, anggapuo lotaa wewo diila mopiohu.

¹⁷ Sababu wonu Allahu Taáala momalenta tutumulo lo tahingota–ngotaawa, wolo umowali tamelolio meaalo yilumolo, diilalo polohuna daá. U polohuna daá yito deú tau boito moduduá otohilaa lo Allahu Taáala, molaasa oduóoto hilao wau mololimo wengahé uwohi lo Rohullah.

¹⁸ Taa u momaya li Almasi loú odito, tau boito moósanangi hilaa lo Allahu Taáala, wau hulumatío lotau–tauwalo wewo.

¹⁹ Sababu uito patujunto mamusi laito duólo susuu–aliyalo u mopotoduo mai umopiohe wau dame boli aamani wau tinggai momongu ngota timongota.

²⁰ Diila maó, bo sababu suáli lo u@aalo, Wutato mopolusa wolo u makilalaja lo Allahu Taáala. Ngoáamila uáalo memangi halale tameloolo; bo wonu utamelo lo

Wutato moósababu taawewo mowali odusa, yi Wutato ototala.

²¹ Lebe mopiohe diila maó polamelo tapu meaalo mongilu angguru meaalo mohutu wolo-wolo wonu suáli boito moósababu ngotaalio lowutato ngoiimani mowali odusa.

²² Huliilo maó wolo u pilalacaya lo Wutata boito, pohutuo lo Wutato totalu lo Allahu Taáala wambaó duólo Wutato lohihilao. Taa udiila o alaasani u molaasa ototala tou wolo u ilanggapulio otutu, tau boito sanangi tutu.

²³ Bo taadiila molaasa molawalo u molamelo hitua-tuawua, lapataó debo molamela uáalo boito, tau boito potaala lo Allahu Taáala; sababu tau boito diila lohutu loduduá uilo yakinialio pasali lou otutu wau u talatala. Wau boli wolo u pohutuwo wau diila oyakinia yito dusa.

15 ¹ Ito taótu-otutuulo maó yakini tou wolo upilala cayanto, mamusi mosabali tou totoonulalo kabalatani lotaa diila motoheeto iimanilio. Diila maó potohilaa ito bo wambaó mopo sanangi batanganto lohihilao.

² Boliio maó ito ngota-ngota musu mopo sanangi hilaa lo wutatonto ngota-

timongota duólo opopiohio, alihu uilo yakinialio oduhenga mola toheetio.

³ Sababu ti Almasi olo diila bo hemo mikiilangi osanangi lobatanga–Lio lohihilo. Todelomo Kitabi tulatulade odie, "Ngoáamila aibu u pilomatuju de ole–Mu malodehu to olaú."

⁴ Ngoáamila u tulatulade todelomo Kitabi yito mongaajali olanto. Sababu pongaajali u tolimoonto monto Kitabi mopowali olanto sabali wau molotolo tilinggula ito mowali motiwunela to Allahu Taáala.

⁵ Pohileaala duá Allahu Taáala, tamongohi mai osaabali wau polo liyango tomanusia, motulungi olimongoli tatumu–tumulo wolo tuwau lohilao, moduduó dudelo li Isa Almasi.

⁶ Wolo tuwau lohilao Wutato ngoáamilalo peé–peéenta mowali momuji mola Allahu Taáala, ti Paapa Eeyanto Isa Almasi.

⁷ Sababu uito wajibulio Mongo wutato mololimo maó ngota–timongota wolo hilaa sanangi, tutuuwauwa debo odelo ti Almasi olo lololimo olimongoli u lopolaió Allahu Taáala.

⁸ Sababu, eelai maó deú ti Isa Almasi malomaya taulo Yahudi u lopobilohe deú Allahu Taáala tatapu wau molotolo hilao

todelomo lopoópolu totoonulalo danti–Lio odeli nenemoyanto.

⁹Ti Isa olo malohutu babaa–ngusawalo wewo helo polaió Allahu Taáala sababu opopiohu hilaa–Lio olimongolio.

Todelomo Kitabi tulatulade odie, "Sababu uito watotia mamomuji mola to Eeya towolota lo babaa–ngusawalo watotia mamu polahu mola poloílaalo momuji duólo tanggulo Eeya."

¹⁰Woluo poli tulatulade odie, "Poti wengahulo wolo umati lo Allahu Taáala tatilulao–Tio, wuu babaa–ngusawalo!"

¹¹Wau utie olo, "Pujiaalo mola Allahu Taáala, wuu ngoáamila bangusa, mamusi ngoáamila tau momuji mola Allahu Taáala!"

¹²Wau utie olo uiloíya lei Yesaya, "Monto waliilio lei Isai malumenetai tahingota–ngotaawa tamaa momalenta babaa–ngusawalo; to o–Liolo babaa–ngusawalo boito mamu tiwunelo."

¹³Allahu Taáala yito tambati potiwunela mola limongoli. Pohileaala duá Tio mopoópolu mai hilaamu wolo ngoáamilalo wengahu wau salaamati sababu timongoli palacaya o–Lio, alihu wolo kawasa lo

Rohullah timongoli lebe maó motiwunela mola to Allahu Taáala.

¹⁴ Mongo wutatuú! Watia yakini deú woluo dadaata daá suáli u mopiohe olimongoli. Otaawa limongoli olo totoonulalo u hitua–tuawua wau mowali mongaajali olo ngota–timongota.

¹⁵ Bo tomimbihu susuu–aliyaalo utantu–tantu, poéela mai lowatia olimongoli lou pintalo todelomo tulade botie, sababu Allahu Taáala malongohi mai olaatia tuugasi boito.

¹⁶ Mapiludu–lo watia tamoomayawa li Isa Almasi uilao–Lio ode babaa–ngusawalo tadiila Yahudi. Wau watia helo kalaja odelo iimamu, u lopohabari Habari Mopiohe lonto Allahu Taáala alihu tau–tauwalo tadiila Yahudi mowali dewo tuwau ode Allahu Taáala u mowali tolimoo–Lio. Pohileaala duá Rohullah mohutu olimongolio u tolomodu mowali dewo tuwau ode Allahu Taáala.

¹⁷ Oditolio, sababu watia malo tituwau woli Isa Almasi, yi watia lowali leengahe tokalaja lowatia ode Allahu Taáala.

¹⁸ Watia buheli mobisala mai odito bo tomimbihu wolo u mapilohutu li Isa Almasi lotimbulude olaatia u mopowali

tau-tauwala tadiila Yahudi modungohe to Allahu Taáala. Watia helohutu uito wolo loíya boli wolo huhutu,

¹⁹ udiluduá wolo totoonulalo u moólinggolabe wau susuu–aliyaalo upolu–polutuó; ngoáamilalo boito wolo kawasa lo Rohullah. Habari Mopiohe pasali li Isa Almasi mapilo habari lowatia ngoáamilalo ode tau-tauwala, tumulalo mai lonto Yerusalemu demola Ilirikum.

²⁰ Tita-tita lowatia yito mopohabari Habari Mopiohe monto Allahu Taáala to tataa–mbatiyalo toutoonu tau diipo loódungohe pasali li Isa Almasi. Sababu watia diila mohuto momongu kalaja topandasi u mapilodutu lotaa wewo.

²¹ Todelomo Kitabi tulatulade, "Tau-tauwala tadiipo peéenta maó lololimo habari pasalii–Lio, mamooóonto; wau timongolio tadiipo peéenta maó, loódungohe, mamongalati."

²² Uito sababuulio matingga maito watia ilotaibuta mola mobiilohe woli mongoli.

²³ Bo botia kalaja lowatia to mamaa–dalawaalo madala boito mailapato. Otaataunuwa mola hiheolio watia ohilaa mobiilohe woli mongoli.

²⁴ De wonu watia lumaode mola tokotamu tononaó lowatia ode Spanyol, watia mohalapu bolo modunggaya woli mongoli wau motiwengahe ngopeé mola woli mongoli. Lapataó uito halapuo lowatia timongoli mowali momantu olaatia todelomo nonaó lowatia ode Spanyol boito.

²⁵ Bo masaatia botie watia ohilaa ode Yerusalemu u modelo dembulo ode umati lo Allahu Taáala mola teto.

²⁶ Sababu jajaamaáalo to Makedonia wau Akhaya maákolo u mongohi dembulo tomongo wutato tamosikini towolota umati lo Allahu Taáala mola to Yerusalemu.

²⁷ Wolo hilaa sanangi timongolio malolantu u mohutu maó uito. Memangi otutuulio maó paatuti timongolio momantu mongo wutato tamosikini to Yerusalemu boito; sababu monto tau-tauwalo Yahudilo tau-tauwala tadiila Yahudi boito malo lolimo babaa-lakatiyalo lonto Allahu Taáala. Oditolio, tau-tauwala tadiila Yahudi boito paatuti olo motulungi tau-tauwalo Yahudi wolo babaa-lakatiyalo upango.

²⁸ Wonu watia malo poólapato tuugasi lowatia botie, wau malohudu olimongolio tamola to Yerusalemu boito dembulo u mailimoó boito, yi watia mamó monggata mola odelipu lo Spanyol lumaode tokota limongoli.

²⁹ Wonu watia monaó mai ode limongoli, tantulo maó watia monaó mai wolo dadaata balakati monto li Isa Almasi, ode limongoli.

³⁰ Domi Eeyanto ti Isa Almasi, wau domi ponu uilohi mai lo Rohullah, pohile lowatia tióotutua olimongoli, hinta timongoli olo moduá mola otu–otutuulo maó peé–peéenta lowatia to Allahu Taáala ode laatia.

³¹ Poduáalo mola alihu Allahu Taáala molopatai olaatia monto uluú lotau–tauwalo tadiila palacaya to Yudea, wau alihu tuugasi lowatia u modelo mola dembulo ode Yerusalemu tolimoo umati lo Allahu Taáala wolo hilaa sanangi mola teto.

³² Louú odito, wonu Allahu Taáala mokahandaki, watia moóonaó mai ode limongoli wolo sanangi lohilao. Wau watia mamolaasa liyaliyango tohuungi mongoli.

³³ Pohileaala duá Allahu Taáala, tamongohi mai salaamati ode manusia, peé-peéenta wolo Wutato ngoáamilalo. Amin.

16 ¹ Watia ohilaa mopoótaa mai wutatonto, ti Febe. Tio hemomantu jamaá to Kengkerea.

² Tolimoa maó tio odelo tala ngota umati lo Eeya. Memangi odieelo mola tau-tauwalo tapalacaya ode Allahu Taáala waajibu mololimo ngota timongota. Tulungia maó tio, wonu tio meí tulungi olimongoli, sababu tio lohihilao malomantu taa dadaata -- leituoto olo watia.

³ Potunggula maó salamu lowatia odelei Priskila wolei Akwila, mongo sahabati lowatia tapeé-peéenta hemokalaja odeli Isa Almasi.

⁴ Timongolio bolo ngopeé yilate sababu ohilaa mopoáahu olaatia. Watia helo sukuru mola olimongolio -- wau diila bo wambaó watia, bo ngoáamila jamaá bangusa wewo tadiila Yahudi olo helo sukuru mola olimongolio.

⁵ Potunggula maó olo salamu lowatia ode jamaá tahiámbua tobele limongolio. Salamu odelei Epenetus taótoliángo

lowatia. Tiolo tabohu–bohulio palacaya li Isa Almasi to madala lo Asia.

⁶ Salamu lowatia olo odeli Maria. Tio malo kalaja tióopatea ode limongoli.

⁷ Potunggula maó olo salamu lowatia odelei Andronikus wolei Yunias.

Timongolio ngosuku ngobangusa wolaatia wau mapeéenta tilumuwoto ode tutupa peé–peéenta wolaatia. Toú watia diipo palacaya li Isa Almasi, timongolio maleimulo palacaya. Timongolio otaawa lotaa dadaata towolota lomongo rasulu.

⁸ Salamu odelei Ampliatus taótoliángo lowatia sababu tio peé–peéenta wolaatia malo tituwau wolo Eeya.

⁹ Potunggula maó hulumati lowatia odelei Urubanus, tamaninto tahemo kalaja peé–peéenta wolanto odeli Isa Almasi. Hulumati lowatia olo odelei Stakhis taótoliángo lo watia.

¹⁰ Salamu odelei Apeles. Otatapu wau olootolo hilaalio toli Isa Almasi maílo bukuti. Salamu olo ode ngaalaá lei Aristobulus,

¹¹ wau odeli Herodion. Tio ngosuku ngobangusa wolaatia. Salamu olo ode mongo wutato ngoíimani todelomo ngaalaá lei Narkisus.

¹² Salamu lowatia odelei Tripena wolei Triposa tahemo kalaja tióopate u momaya to Eeya, wau odelei Persis taótoliángo lowatia. Tio olo malo kalaja tióopatea ode Eeya.

¹³ Salamu odelei Rupus wau tiilolio, taólaatia debo odelo tiilo lowatia lohihilao. Tei Rupus yito taa u tilulaoto lo Eeya wau taílo pujia.

¹⁴ Potunggula maó salamu lowatia odelei Asinkritus, Plegon, Hermes, Patrobas, Hermas, wau ngoáamila wutato ngoíimani tapeé-peéenta woli mongolio.

¹⁵ Salamu odelei Pilologus woli Yulia; odelei Nereus wau wutatio taabua; odelei Olimpás wau ode ngoáamila taa palacaya tapeé-peéenta woli mongolio.

¹⁶ Posasaa-lamuwalo wolo tataabia lohilao odelo wutato Nasara. Ngoáamila jamaá li Almasi mopo tunggulai salamu limongolio ode Mongo wutato.

¹⁷ Mongo wutato! Pohile lowatia loú tióotutua: Poódaha-dahaalo maó totau-tauwalo tahemo potoodei owowoluwoa u mopobuu-buáalawa wau mopo puyoóto opopalacaya lotau ode Eeya. Suáli boito bubuu-lemenga loú wolo u mapilo ngaajali

olimongoli. Walahe maó tau–tauwalo debo odelo uito.

¹⁸Sababu tau–tauwalo tahi pohutua odito diila bo mokalaja odeli Isa Almasi Eeyanto, tumbaó bo uhemu potolu lohilao toú wolo u otohila limongolio lohihilao. Wolo pipio wau tataa–heyaalo u mopiohe, timongolio hemo himbulo totau–tauwalo tadiila hitotaawa lolo–lolo.

¹⁹Ngoáamila tau malotota deú timongoli tatapu wau motolo hilao to pongaajali pasali lo Habari Mopiohe ulonto Allahu Taáala. Wau watia sanangi tosuáli boito tomimbihu olimongoli. Otohila lowatia alihu timongoli molinepo tomimbihu susuu–aliyaalo umopiohe, wau mohulodu tomimbihu susuu–aliyaalo u moleeto.

²⁰Allahu Taáala talongohi salaamati ode manusia, mahuáa mopo tambati Ibilisi towalungo lo okokawasamu wau mopo aantulu maó. Pohileaala duá Mongo wutato laito balakatia li Isa Almasi Eeyanto!

²¹Tei Timotius, sahabati lowatia, mopo tunggulai salamulio ode limongoli. Odito olo tei Lukius, Yason wolei Sosipater, tangosuku ngobangusa wolaatia.

²² Talo luladei tuladee botie yito watia, tei Tertius. Watia molapali mai salamu u mohutato olimongoli.

²³ Tei Gayus lolao salamu olimongoli. Watia malo tihangata tobelelio wau jamaá lami olo taáluku wau hulumati mota teto. Tei Erastus, taúwa lo motolodihu doi lokota, lolao salamulio olimongoli. Odito olo wutatonto tei Kwartus.

²⁴ [Pohileaala duá Eeyanto Isa Almasi mobalakati to Wutato ngoáamila. Amin.]

²⁵ Ilopujiaalo mola Allahu Taáala! Tio okawasa mopoó lotolai iimani lo Wutato motuúde wolo Habari Mopiohe monto Allahu Taáala upilo habari lowatia pasali li Isa Almasi. Watia lopohabari mai habari boito lotuúde loú wolo u piloílaalo mai lo Allahu Taáala; deúito–yito tomimbihu lanjana lo Allahu Taáala umahi hetu–hetuto mola lotaunu hiheolio udiila otaawa lotau.

²⁶ Bo botia, topalenta lo Allahu Taáala u ohiheo–hiheolo maó lanjana boito mapilo ilaalo wau piloótaa mai ode ngoáamila bangusa lotimbulude to tutuu–ladeyaalo lomongo nabi, alihu timongolio ngoáamilalo palacaya wau modungohe to Allahu Taáala.

²⁷ Tiolo tatuwa–tuwaulio Allahu Taáala,
Tio laba–labaalo molinepo. Pohileaala duá
Tio polaiólo daá ohiheo–ohiheolo maó
motimbulude li Isa Almasi! Amin. Salamu
lamiaatia, Paulus, wato li Isa Almasi

1 Korintus

1 ¹ Mongo wutato jamaá lo Allahu Taáala to Korintus! Wutato matiliyango Allahu Taáala u lowali umati–Lio sababu Wutato miliki li Isa Almasi, peé–peéenta wolo ngoáamila tau boli toutoonou wambaío tahi poluboa Eeyanto Isa Almasi, deúito–yito Eeya limongolio wau Eeyanto olo. Watia Paulus, wau wutatonto tei Sostenes, mohalapu hinta Allahu Taáala ti Paapanto wau Eeya Isa Almasi mongohi mai balakati wau salaamati olimongoli. Watia loluladei tuladu botie odelo Rasulu li Isa Almasi, tapiluduó Allahu Taáala lohihilao wau to kahandaki–Lio olo.

² (1:1)

³ (1:1)

⁴ Watia laito hemo sukuru ode Allahu Taáala tomimbihu olimongoli, sababu timongoli malo lolimo odehu hilao lonto Allahu Taáala lotimbulude li Isa Almasi.

⁵ Sababu timongoli malowali miliki li Isa Almasi, yi tutumulumu kaya todelomo tilolahepalo suáli. Pongototamu pasali louú totoonulalo u hitua–tuawua modeloma

daá, wau timongoli motota helo ngaajali maó pongotota boito.

⁶ Uito mopobilohe deú habari pasali li Almasi malo odito leituwoto ode delomo hilaamu,

⁷ tilinggula timongoli diila iloóilangia penu boli tuwau maó balakati, toú timongoli donggo hemohima Eeyanto Isa Almasi meidungga mai wau oontonga lotaa ngoáamila.

⁸ Ti Isa Almasi lohihilao mamo pongaku olimongoli tunggula pulitio; alihu toú Tio muli meidungga mai, motapu-Lio timongoli diila oáibu.

⁹ Allahu Taáala mowali palacayalo lou leleaatulo maó. Tiolo Allahu Taáala tamalo tianga olimongoli u lowali tuwau wolo Wala-lo, deúito-yito ti Isa Almasi, Eeyanto.

¹⁰ Mongo wutato! To tanggulo Eeyanto Isa Almasi, pohile lowatia alihu timongoli ngoáamilalo tuwau lohuhama; alihu diaaluo polo hulinggila towolota limongoli. Mamusi timongoli motituwau, ngohilao wau ngopikiilangi.

¹¹ Sababu, tau-tauwalo lonto ngaalaá lei Kloë lopo dulohei to olaatia woluo polo haamawa towolota limongoli.

¹² U milakusudu lowatia yito deú towolota limongoli woluo talo loíya, "Watia moduduá olei Paulus," woluo olo talo loíya, "Watia moduduá olei Apolos," taawewo lolóíya, "Watia moduduá olei Petrus," hiambola taawewo poli lolóíya, "Watia moduduá li Almasi."

¹³ Diila pongalo aakali ti Almasi hitaya-tayade! Tei Paulus diila yilate silalipulio ode limongoli! Timongoli olo diila yilihualio u lowali muri lei Paulus, diila odito?

¹⁴ Bo sukuru watia diila lopolihi penu boli ngotaa maó to wolotamu, ngopohia tei Krispus wolei Gayus.

¹⁵ Penu boli ngotaa maó diila bolo poloíya deú watia malo polihu olio u lowali muri lowatia.

¹⁶ (Oo joo, tei Stepanus wau ungalaálio, memangi watia talo polihu olimongolio. Bo wewolio maó leeto, toéela mola laatia, madidú taawewo tapilolihi lowatia.)

¹⁷ Ti Almasi lolao olaatia dilla u mopolihi tau, bo u mopohabari Habari Mopiohe monto Allahu Taáala; wau uito olo musi pohutuo maó lowatia loú diila momake pongotota mobisala odelo dudelo

lomanusia, alihu kawasa monto opopate li Almasi tosalipu diila mowali dia ohuna.

¹⁸Sababu ode tau-tauawalo tahi dulunga ode obobinasa, habari pasali lo opopate li Almasi to ayu salipu debo odelo latabu wambaó. Bo, to olanto tapoáahuo lo Allahu Taáala, habari boito debo odelo dudelolio lo Allahu Taáala mopo bilohei kawasaa-Lio.

¹⁹Sababu todelomo Kitabi, Allahu Taáala malo tahuda. "Tinepo lotau-tauwalo aaripu mapo ambulatiyo-Ú, wau huhama lotau-tauwalo tao ilimua mapo diaaluwo-Ú."

²⁰Naa, wolo hunalio lotau-tauwalo aaripu boito? Wolo hunalio limongolio tahi o ilimua? Wolo hunalio lotahi ahalia motolo mikiilangi dunia botie? Allahu Taáala malo pobilohei deú tinepo lodunia botie yito bo latabu wambaó!

²¹Sababu penu boli woloolo mola totaalio lomanusia, tio diila mowali moóonuhe Allahu Taáala motimbulude to pongotalio lohihilao. Bo tumbaó sababu Allahu Taáala molinepo, yi Tio lotuhatawa lopoáahu mai tau-tauwalo tapalacaya o-Lio lotimbulude tohabari upilo loladei lamiaatia u heánggapuo lodunia yimbulo.

²² Taulo Yahudi hipohilea loú moóohuú u moólinggolabu odelo bukuti, wau taulo Yunani hemo pouáá tinepo lodunia botie.

²³ Bo ito botie bo hemo pohabari li Almasi tailate tosalipu. Habari boito heloó ngongoto hilaa taulo Yahudi, wau ilanggapulio yimbulo lotau-tauwalo tadiila Yahudi. Wau taa diila Yahudi helo nganggapu uito tuwaulio lo hulodu.

²⁴ Bo ode tau-tauwala tamaa tiliango Allahu Taáala -- mopio taulo Yahudi meaalo taa diila Yahudi -- habari boito debo odelo dudelo-Lio lo Allahu Taáala mopo bilohei kawasa wau tine-Pio.

²⁵ Sababu tabilohelio mohulodu to Allahu Taáala, deúito-yito lebe molinepo wolo otinepo lomanusia; wau tabilohelio molulupuhu to Allahu Taáala, deúito-yito lebe molotola wolo olootolo manusia.

²⁶ Mongo wutato! nte eelai maó woloolo mola owowoluwoa limongoli tou Allahu Taáala lotianga olimongoli. Bo ngoídi wambaío towolota limongoli tamolinepo, meaalo okawasa, meaala o huhuloáa lailaió moduduá to pomilohu lomanusia.

²⁷ Sababu memangi milakusudu Allahu Taáala molulaotai tahe anggapuo lodunia botie mohulodu, alihu tau-tauwalo tahi

tootawa mowali moolito. Wau Allahu Taáala lolulaotai olo tahe anggapuo lodunia botie molulupuhu, alihu tau-tauwalo tahilotola boli buheli daá mowali moolito.

²⁸ Allahu Taáala lolulaotai tahe anggapu dupadupapa, hina, wau tumbaó tahe anggapuo lodunia botie diila oboliilio, alihu Allahu Taáala mongantulu maó u heánga-polohuna daá lodunia.

²⁹ Lou odito diaaluo penu boli ngotaa maó mowali motimenge lobatanga totalu lo Allahu Taáala.

³⁰ Allahu Taáala lohihilaolo tamohutu mai tilinggula Wutato motituwau woli Isa Almasi. Lotimbulude li Isa Almasi, ito pilowali molinepo. Wau lotimbulude o-Lio olo Allahu Taáala lohutu mai olanto luli mopiiohe wolo batanga-Lio, lopowali olanto tolomodu umati-Lio, wau lolopato olanto.

³¹ Oditolio, debo odelo utula-tulade todelomo Kitabi, "Taa ohilaa mopo mangga-mangga, musi motimangga tou wolo u pilohutu mai lo Eeya."

2 ¹ Mongo wutato! Tou watia lonaó mai ode limongoli wau lopohabari olimongoli pasali patuju lo Allahu Taáala

udiipo ilotaawa lodunia, diila pilomake lowatia tinepo lodunia botie meaalo helo bisala wolo loíya ulatabu.

² Sababu watia maílo teekati deú ngotilonggadu watia donggo woluo woli mongoli, watia diila tamopo dudulai wolo-wolo, ngopohia tomimbihu li Isa Almasi; tolomodulio deú Tio mailate tosalipu.

³ Tou watia woluo woli mongoli, watia molulupuhu wau hulu-huluhelio lou moohe.

⁴ Habari upilo tunggulai lowatia ode limongoli, diila pilo tunggulai lowatia wolo tataa-heyaaalo u moheinga moduduá tinepo lomanusia. Watia lopo tunggulai uito wolo pohuli u lopobukuti deú Rohullah okawasa.

⁵ Watia lohutu odito, alihu palacayamu li Almasi diila patopatoá totinepo lomanusia, bo patopatoá tokawasa lo Allahu Taála

⁶ Eleponu odito, towolota lotaa hitumula rohanilio maloontapo, watia memangi helo bisala tomimbihu lotinepo. Bo tinepo botie, diila tinepo lodunia, meaalo tinepo lo tahidihima kawasa tojamani botie, u okokawasalio mamooli.

⁷ Tinepo u tilo@oowoli lowatia boito yito tinepo lonto Allahu Taáala. Tinepo boito diila otaawa lodunia, bo Allahu Taaala mapilo dapatio ode osananginto tutu tou dunia botie diipo pilowali-Lio mai.

⁸ Diaaluo penu boli ngota maó monto tahidihima kawasa tojamani botie tamotota pasali lotinepo boito. Sababu humayaalio, maílotaawa limongolio, tantu timongolio diila tamopo salipu to Eeya talaila@o boito.

⁹ Boliio maó suáli boito yito debo odelo utula-tulade todelomo Kitabi, "Wolo udiila peéenta iloontonga meaalo ilodungohe lomanusia, wau diila peéenta olo tilumoodu todelomo pikilangi lomanusia, ui-uitolo u pilodapato lo Allahu Taáala ode tau-tauwalo tamotoli@ango o-Lio."

¹⁰ Bo Allahu Taáala malo po@ilaalo mai olanto lotimbulude to Rohu-Lio. Rohullah boito motulete totoonulalo u hitua-tuawua, tunggula to lalaa-njanawalo Allahu Taáala u penu boli tutuuá daá wambaío.

¹¹ Sababu tamotota tuango hilaa lo tahingota-ngotaawa yito rohu lotau boito lohihilao, diila odito? Odito olo tomimbihu Allahu Taáala. Tamotota tuango hilaa lo

Allahu Taáala bo Rohu lo Allahu Taáala lohihilao!

¹²Wau ito diila yilohia-Lio mai rohu lodunia botie, bo Rohu ulonto Allahu Taáala, alihu otaawanto ngoáamila u mailohi lo Allahu Taáala olanto.

¹³Sababu uito, wonu amiaatia motombanga susuu-aliyaalo tomimbihu Allahu Taáala totau-tauwalo ta@o Rohullah, amiaatia diila mo@oowoli mai tinepo lomanusia, bo moduduá pongaajali lo Rohullah.

¹⁴Taa diila o Rohullah, diila mowali mololimo u pilo@ilaalo mai lo Rohu boito, sababu ode tau boito susuu-aliyaala boito debo odelo tuwaulio lo ohulodu wambaío. Tau boito diila moó pahaamu o-Lio, sababu susuu-aliyaala boito bo mowali tilikiyolo wolo dudelo lorohani.

¹⁵Taa o Rohullah mowali mongohi peni totoonulalo u hitua-tuawua, bo diaaluo penu boli ngotaa maó ohaku mongohi peni o-Lio.

¹⁶Todelomo Kitabi tulatulade, "Tatoonu tamotota pikiilangi lo Eeya? Wau tatoonu tamowali monaseehati o-Lio?" Ito-itolo taó pikiilangi u tutuuwauwa woli Almasi!

3¹ Mongo wutato, otutuulio maó watia diila mowali mobisala mai wolo Wutato debo odelo taa o Rohullah. Watia bo mowali mobisala woli mongoli debo odelo wolo taa u donggo tumutumulo moduduá u otohilaa loduniawi; debo odelo wolo taa u donggo unge todelomo palacayalio toli Almasi.

² Muloololio mai watia bo mowali mongohi olimongoli uáalo lo taúnge, diila uáalo lotaa léidaá; sababu timongoli diipo botie molotolo woleeto. Penu boli botia olo timongoli debo diipo boti molotolo woleeto,

³ sababu timongoli donggo tumutumulo moduduá pílimu odelo manusia. Sababu wonu timongoli donggo hemohiihia wau hemolohulua ngota timongota, wolo uito diila mopo bilohei deú timongoli donggo hitumula moduduá píili lomanusia, debo odelo tau-tauwalo tadiila hitootawa to Allahu Taáala?

⁴ Wonu woluo tamoloíya, "Amiaatia moduduá olei Paulus," wau taawewo moloíya, "Watia moduduá olei Apolos," wolo uito diila mopo bilohei deú Wutato opíili, debo odelo tau-tauwalo dunia?

⁵ Otutuulio maó tatoonu tei Apolos boito? Wau tatoonu tei Paulus? Amiaatia bo tahi pomayawa to Allahu Taáala, tamaa lodelo olimongoli u lomalacaya li Almasi. Amiaatia bo hemo ponaó lokalaja uiludu mai lo Eeya olamiaatia ngota-ngota.

⁶ Watia tamopomulo wau tei Apolos tamomuhuto, bo Allahu Taáala lohihilaolo tamopowali pilomulolio boito mobutu.

⁷ Oditolio, u polohuna daá yito Allahu Taáala, sababu Tiolo tamopobutu mai. Tamopomulo wau tamomuhuto diila polohuna daá;

⁸ duduuluwolo yito ngodalajati. Ngota-ngota mamololimo wuupa moduduá tolopanilio u tioopatea.

⁹ Amiaatia yito tau-tauwalo tapeé-peéenta hipo kalajawa ode Allahu Taáala; wau timongoli yito debo odelo halabolu lo Allahu Taáala. Mongo wutato yito debo odelo hudungu lo Allahu Taáala olo.

¹⁰ Wolo pongotota uilohi mai lo Allahu Taáala, watia odelo ahali loú momongu malo podutu maó pandemeni ode hudungu boito, wau taawewo momongu toitaato pandemeni boito. Timíidu tau musi mopoó tuoto tióotutua woloolo mola tio momongu toitaato pandemeni boito.

¹¹ Sababu Allahu Taáala lohihilao malopo tambati li Isa Almasi debo odelo tatuwa–tuwaulo pandemeni lohudungu boito; diaaluo pandemeni uwewo.

¹² Woluo tamomongu toitaato pandemeni boito loú momake hulawa, woluo tamomake talaá, woluo tamomake botu polioto, woluo olo tamomake ayu, huóyoto mohengu meaalo laato.

¹³ Kalaja lotaa ngota–ngota demaa oontonga to@u ti Almasi muli meidungga mai. Sababu todulahee boito tulu mamohutu maó kalaja lotaa ngota–ngota maóontonga. Tulu u motesi wau molantu mutu lokalaja boito.

¹⁴ Wonu hudungu u bilongu lotau toitaato pandemeni boito moó tahangi lotulu, tau boito mamololimo palasenilio.

¹⁵ Bo wonu kalaja lotau boito mopobu, tio maaluhi; tio lohihilao mamoáahu, bo debo odelo taloáahu lolibaya totulu.

¹⁶ Tingga otaawa lo Wutato deú timongoli yito Bele lo Allahu Taáala? Wau deú Rohullah bilubiluloá todelomi mongoli?

¹⁷ Wonu woluo taa u mongantulu Bele lo Allahu Taáala, Allahu Taáala olo mamo ngantulu tau boito. Sababu Bele lo Allahu

Taáala yito tolomodu ode Allahu Taáala wambaó, wau timongolilo bele boito.

¹⁸ Penu boli ngota diila maó pohimbulo to batangalio lohihilao. Wonu woluo tau to wolotamu molaasa batangalio molinepo moduduá tuuúdu lodunia botie, tau boito musi mowali mohulodu, alihu tio mowali otu–otutuulo maó molinepo.

¹⁹ Sababu tahe anggapuo molinepo lodunia yito mohulodu to bibilohu Allahu Taáala. Todelomo Kitabi tulatulade, "Allahu Taáala mohentobu tau–tauwalo tahi tinepa todelomo ootoa limongolio lohihilao."

²⁰ Woluo olo tulatulade odie, "Otaawa lo Eeya deú pikiilangi lotau–tauwalo tahi tinepa yito pikilangi udiila ohuna."

²¹ Sababu uito, penu boli ngotaa maó diila mowali momuji–muji tomanusia, sababu totoonulalo u hitua–tuawua mailohi–Lio mai lowali miliki limongoli.

²² Tei Paulus, tei Apolos, tei Petrus, dunia botie, tutumulo wau opopate, jamani botie, meaalo jamani umamei dungga mai, totoonulalo u hitua–tuawua yito milikimu.

²³ Wau timongoli yito miliki li Almasi, wau ti Almasi miliki lo Allahu Taáala.

4 ¹ Anggapualo maó amiaatia tahi pomayawa li Almasi, tatihu–tihula mopohabari lalaa–njanawalo Allahu Taáala udiipo otaawa lodunia.

² Ubohu–bohulio pohileelo wolo mo@oohu@u monto tamoomayawa u odito yito deú tio musi tatapu wau molotolo hilao toli tuanilio.

³ Olaatia, diila mowali suáli wolo u timongoli -- meaalo penu boli tatoonu -- olo pikiilangia maó pasali lobatanga laatia. Tumbaó wolo u pilikilangi laatia tomimbihu batanga laatia lohihilao olo diila mowali suáli.

⁴ Watia diila molaasa ototala penu boli todelomo suáli wolo wambaño, bo uito diila mopo bukuti deú watia memangi diila ototala. Eeya lohihilaolo tamolantu mai deú watia ototala meaalo diila.

⁵ Sababu uito, sababu diipo wakutuulio, timongoli diila maó polamemeto molantu deú tahingota–ngotaawa yito ototala meaalo diila. Wimailo tunggula Eeya de meidungga mai. Eeyaalo tamamomuó ngoáamila hitua–tuawua u malakusudu hetuu@olo u tuutu@o todelomo u modiólomo. Eeyaalo tamamo monggali ngoáamila niyati uleitahu todelomo hilaa

lomanusia. Tou boito timiïdu tau bolo mololimo monto Allahu Taáala polo@ilaalo momuji upaatuti tolimoolio.

⁶ Mongo wutato! Duólo polohuna daá batanga limongoli, watia malomake ngoáamilalo boito tolei Apolos wau tobatanga laatia lohihilao. Makusudu laatia alihu monto obaaya lamiaatia boito timongoli mowali mopo@olaato wolo boli lolóïya, "Potidihulo towuúdu uwoluo." Lou odito diaaluo penu boli ngotaa maó limongoli tamopo mangga–mangga lo tahingota–ngotaawa, lapataó mohina taawewo.

⁷ Tatoonu talo powali to Wutato lebe lou taawewo? Wolo totoonulalo hitua–tuawua u tilolimo lo Wutato diila lonto Allahu Taáala? Oditolio, yilongola ohilaa motimenge lobatanga, debo odelo wolo uwoluo to Wutato boito diila tuwaulio uilohi?

⁸ Memangi timongoli diilalo momalalu wolo–wolo! Timongoli makilaya! Timongoli malowali onlongia! Wau amiaatia diila. Donggo boli pihio wonu timongoli otu–otutuulo maó malowali onlongia, alihu amiaatia mowali momalenta woli mongoli.

⁹Sababu moduduá huhaama laatia, amiaatia mongo rasulu, mapilowali mai lo Allahu Taáala odelo hepobiilohe lotau totalu lomanusia wau mamaa-laíkatiyalo. Amiaatia debo odelo tahe hinawa u dilehuwa hukumani mate totalu lotaa dadaata wau hehila-hilantiá lodunia.

¹⁰Sababu ti Almasi, amiaatia yito taa u mohulodu, wau timongoli taulo Nasara tahi tootawa! Amiaatia hilupuhe wau timongoli hilotola! Amiaatia hilenteío, wau timongoli hepuji-pujiyolio!

¹¹Tunggula saaáti botie amiaatia heódungga lopolobiti wau totoángo; boó lamiaatia bolo towawaó wambaío; tau hemo posikisa olamiaatia; amiaatia diila otambati upoti tatapuwalo;

¹²amiaatia malo tióopatea helo tolopani. Wonu amiaatia laánatialio, amiaatia hemomalasi wolo balakati; wonu amiaatia alinayaalio, hesabalia lamiaatia;

¹³wonu tau hemo poóleeta olamiaatia, amiaatia momalasi wolo tataa-heyaalo u molumboyoto. Amiaatia diila lebe louú puputo lodunia botie; tunggula saaáti botie amiaatia donggo he anggapuolio debo odelo bountu lohuta.

¹⁴ Watia loluladei utie olimongoli diila u mopoóolito olimongoli, bo u monaseehati olimongoli debo odelo mongo walaó laatia lohihilao.

¹⁵ Sababu watiaalo talowali tiyamo limongoli, eleponu otanu odelo taulo Nasara, timongoli maógulu mopulu lihu lota. Todelomo tutumulumu odelo tau-tauwalo tamo tituwau woli Almasi, watia talowali tiyamo limongoli, sababu watia talodelo mai Habari Mopiohe pasali li Almasi ode limongoli.

¹⁶ Sababu uito pohile lowatia tióotutua moduduá obaaya laatia.

¹⁷ Woleeto boito watia malolao mai olei Timotius ode limongoli. Odelo muri li Almasi, tio tutuuwauwa debo odelo walaó laatia lohihilao taa otoliángo laatia. Tio walaó tamowali palacayalo. De tio tamamo poéelaó olimongoli tomimbihu dudelo u hediluduá laatia lapatio maó watia palacaya li Almasi, deúito-yito dudelo lotutumulo u pilo ngaajali maó laatia ode timíidu jamaá penu boli touútonu wambaío.

¹⁸ Dengolo lota towolota limongoli malowali sombongi, sababu timongoli

hemo lantobu olaatia diila tamonaó mai ode limongoli.

¹⁹ Bo wonu Eeya mopoluasi olaatia, watia mamonaó mai olo ode limongoli diilalo mohiheo. De tou boito watia mamooónto olo wolo u mowali pohutuo lotau–tauwalo tahi sombongia boito; diila bo loíya limongolio wambaño.

²⁰ Sababu wonu Allahu Taáala momalenta tutumulo lo tahingota–ngotaawa, suáli boito pobukutiola lo olootolo tutumulo lotau boito, diila bo wolo loíya.

²¹ Oditolio tulaotilo maó wolo ulebe otohilaa limongoli! Wolo timongoli motohilaa watia monaó mai mongaajali olimongoli wolo pakusa meaambo wolo molumboyoto wau toliángo?

5 ¹ Watia otutuulio maó malo lolimo dudulohu deú towolota limongoli woluo totoonulalo huhutu huloto ulaba–labaalo: Woluo towolota lo Wutato tahe lojina wolo tiilolio watoó. Penu boli tau–tauwalo tadiila hitootawa to Allahu Taáala olo diila hipohutua debo odelo uito!

² Eleponu odito, Wutato debo donggo ohilao batingga. Boliño maó Wutato wajibulio suukali lohilao, wau mopo hinggi

maó towolota lo Wutato taa u hipohutua suáli boito.

³ Debo odelo lahiri watia molaminga monto olimongoli, bo debo odelo batini watia woluo tohuungi mongoli. Oditolio, watia ohilaa mohutu debo odelo watia woluo towolota limongoli, "To tanggulo Eeya Isa Almasi, watia mopoilaalo mai de@u taa u malohutu huhutu umalo odito kotololio, musi hukuu-maniyolo!" Wonu timongoli motiámbu anggapuwalo deú watia woluo towolota limongoli, wau wolo kawasa li Isa Eeyanto,

⁴ (5:3)

⁵ timongoli musi mohudu maó tau boito ode Ibilisi alihu batanga lotau boito binasa wau loú odito rohulio po@aahuwolo tou Eeya muli meidungga mai.

⁶ Diila paatuti timongoli molaasa sombongi. Otanu timongoli malotota pohumaya botie, "Ragi ungoídi moóhutu ngoáamila ulaulio momatango!"

⁷ Tapilapo ragi udeedelo boito, deúito-yito ragi lodusa, alihu timongoli mowali debo odelo uúulau ubohu, belesi monto ragi lodusa udeedelo, wau otaawa maó laatia deú timongoli memangi odito. Sababu, lameyangi lo Paskanto mapilo

dapato, sababu ti Almasi talowali odelo himba lo Paskanto, mapilopo bakelio.

⁸Oditolio, dulo ito mopolame potihungunto boito wolo roti udiila oragi, deúito-yito roti u motomaya mai omuluni wau ngoáamila u motuhatawa to hilaa lo Allahu Taáala. Diila maó polameyanto potihunggu lo Paska boito wolo roti uwanto-wantohe ragi udeedelo, deúito-yito ragi lodusa wau ololeeto.

⁹Todelomo tuladu lowatia uilalu maó, watia lopoótaa mai olimongoli alihu diila maó poáawota wolo taa huloto.

¹⁰U milakusudu lowatia diila taa huloto meaalo tamaá, meaalo tamoo-himbuloa meaalo tamooluboa balaahala u sama-samaata diila motota Allahu Taáala. Diila! Diila milakusudu lowatia timongolio; sababu wonu timongoli musi mopoó lamingaó olimongolio, yi tantulo maó timongoli palalu lumualaó sama-samaata monto dunia botie.

¹¹Makusudu lowatia yito, deú timongoli diila maó poáawota wolo taa u hemongaku batangalio taulo Nasara, bo tau boito huloto, meaalo tamaá, meaalo tamooluboa balaahala, meaalo taóhilaa mopoó leeto taawewo, meaalo tahi huwoáalo,

tamootaówa. Boli motihuloáa molamela wolo tau boito olo diila mowali!

¹² Memangi momutoó tau-tauwalo tadiila Nasara diila su@ali lowatia. Allahu Taáala lohihilaolo tamaa momutoó olimongolio. Bo tomimbihu popoo-ngawa@aalo jamaá limongoli, diila maa timongoli lohihilao tamusi momutoó olimongolio? Todelomo kitabi tulatulade, "Polahia maó taa moleeto towolota limongoli."

¹³ (5:12)

6 ¹ Yilongola woluo towolota limongoli tabuheli monaó odeli hakimu tadiila motota lo Allahu Taáala, u mopo dulohu wutato ngoíimani, wonu tio mohahaamawa wolo wutatio boito? Yilongola tio diila lohile umati lo Allahu Taáala tamo poólapato palakala boito?

² Yilongola diila otaawa limongoli deú umati lo Allahu Taáala tamaa momutoó dunia botie? Oditolio, wonu memangi timongoli mabutoó lodunia botie, wolo timongoli diila mambo mopoó lapato totoonulalo palakala lo bubutoó udiila oboliilio?

³ Wolo diila otaawa limongoli deú ito mamomutoó mamaa-laíkatiyalo?

Lebe-lebe maó poli totoonulalo palakala lo tutumulo ungohui-ngohui!

⁴ Yi wonu tumoodei totoonulalo palakala debo odelo uito, wolo timongoli mohudu maó totau-tauwalo tadiila o huhuloáa sama-samaata todelomo jamaá?

⁵ Otutu moóolito! Tantu to wolotamu woluo tahingota-ngotawa taódito molinepo u mopoó lapato hulinggila towolota lomongo wutato tasama-sama Nasara!

⁶ Bo bolíio maó ngotaalio lo Nasara lonaó ode taa diila Nasara u lopodulohe palakalalio to wutatio taa Nasara.

⁷ Oditopo monaó mota mohutu palakala ode taa diila Nasara; woluolio totoonulalo hulinggila towolota limongoli olo madebo odelo tuwaulio lo ololuhi limongoli. Lebe mopiohe@o timongoli pohutuwolo diila aadili; meaalo poluhiyolo!

⁸ Bo timongoli lohihilao tumbaó tahemohutu taawewo diila aadili. Timongoli lohihilao olo talo poóluhi taawewo. Wau uito tumbaó hepilohutu limongoli ode mongo wutato ngoíimani!

⁹ Wolo diila otaawa limongoli deú tau-tauwalo tadiila hipoduduá u otohilaa lo Allahu Taáala diila tamowali pongawaá

umati lo Allahu Taáala? Diila bolo oimbuloalio! Tau-tauwalo tahi pohutua huloto, tau-tauwalo tahi poluboa balaahala, tahi pojinawa, mongolo lai hisuntalia tahi pohutua huhutu umoóolito ode timongota pangelio,

¹⁰ tahi potaówa, tahi tamaáawa, tahi huwoáalo, tahi ohilaowa mopoóleeto taawewo, wau tahi pohamawa pa@eeda ulaba-labaalo ode taawewo -- ngoáamila taa debo odelo uito diila mowali pongawaá umati lo Allahu Taáala.

¹¹ Dengolo lota towolota limongoli muloololio mai opíili debo odelo uito. Bo botia timongoli pilo@ilaalo belesi lonto dusa. Timongoli malowali tolomodu haku lo Allahu Taáalanto. Timongoli maluli mopiiohe wolo Allahu Taáala, sababu timongoli palacaya to Eeya Isa Almasi wau sababu kawasa lo Rohu lonto Allahu Taáala.

¹² Woluo talo loíya deú timíidu tau mowali mohutu totoonulalo u hitua-tuawua. Bo olaatia diila ngoáamilalo ohuna. Oditolio eleponu watia mowali mohutu penu boli wolo, bo watia diila mohuto mopoluli batanga lowatia kawasaalio penu boli loolo.

¹³ Woluo olo talo loíya deú uáalo yito duólo ombongo, wau ombongo yito duólo uáalo. Bo duduuluwolo mapo diaaluo lo Allahu Taáala. Batanga lomanusia diila mowali pomake u mopowoluo mai wumbuta u huloto, bo duólo momaya to Eeya wambaó. Wau Eeya mamolaala batanga boito.

¹⁴ Allahu Taáala malo potumulai li Isa Eeya lonto opopate, odito olo Allahu Taáala mamopo tumulai olanto wolo kawasaa–Lio.

¹⁵ Otaawa lo Mongo wutato deú batanga limongoli yito pongawaá batanga li Almasi. Oditolio, wolo watia mowali mohama maó tuwau pongawaá batanga li Almasi lapataó powaliyolo pongawaá batanga lo tasuuntali ngota? Sama–samaata diila!

¹⁶ Meaalo tanu diipo otaawa limongoli deú taa moúlawota wolo tasuuntali ngota, mowali tuwau wolo tasuuntali boito! Sababu todelomo Kitabi tulatulade, "Duduulotalo mowali tuwau."

¹⁷ Bo taa mopotuwau batangalio wolo Eeya, Rohu lo Eeya wolo Rohu lotau boito mowali tuwau.

¹⁸ Pohalaheó monto totoonulalo huhutu u huloto. Sababu ngoáamila dusa wewo

u pilohutu lotau, lotoduo to bulemengo batanga lotau boito. Bo taa mohutu u huloto, boliilio maó mohutu dusa ode batangalio lohihilao.

¹⁹ Musi otaawa maó limongoli deú batangamu yito tambati potibiluloá lo Rohullah. Rohu boito bilubiluloá todelomi mongoli. Wau Allahu Taáala lohihilaolo talongohi mai Rohu boito olimongoli. Batanga lo Wutato diila haku limongoli. Uito yito haku lo Allahu Taáala.

²⁰ Allahu Taáala malotali olimongoli wau malo wimumuto bilayali. Sababu uito, pomakea maó batangamu odito lakulio tilinggula Allahu Taáala polai@oolo.

7¹ Botia watia ohilaa mobisala mai tomimbihu suáli u ilunte limongoli todelomo tuladu limongoli. Wonu talolaí ngota diila monika, uito mopiohu.

² Bo alihu diila o aangalio u mohutu susuu–aliyaalo udiila paatuti, lebe mopiohe timiídu talolaí odilelio lohihilao wau timiídu taabua odilelio lohihilao olo.

³ Dile talolaí musu mopoópolu uwajibu olio odelo dile todilelio, wau dilelio taabua musu mopoópolu uwajibu olio odelo dile todilelio; ngota–ngota musu mopoópolu maó uwajibu olio ode tawewo.

⁴ Dile taabua diila okawasa to batangalio lohihilao; taókawasa to batangalio yito dilelio. Odito olo dile talolaí diila okawasa to batangalio lohihilao; taókawasa to batangalio yito dilelio.

⁵ Diila maó pahalahu ngota timongota odelo motolodile. Mowali bo u ngopeé mola, asali duduulotalo malo akoloa. Louú odito ngota-ngota mowali moduá mola louú diila otaibuto. Bo lapatio maó, timongoli mamusi tinggai muli moduudula odelo motolodile. Wonu diila odito, de timongoli maó piyowa lorohu u moleeto, sababu timongoli diila molotolo mongotongo napusu.

⁶ Watia moloíya mai utie diila odelo palenta, bo odelo naseehati.

⁷ Otutuulio maó watia lebe motohilaa wonu ngoáamila tau mowali debo odelo watia. Bo ngota-ngota malo lolimo tolomodu ponu lonto Allahu Taáala. Ngotaalio oponu utie, wau taawewo oponu uito.

⁸ Totau-tauwalo tadiipo helonika wau tomongobua tamahi jaandawa, utieelo naseehati lowatia: Lebe mopiohe Wutato tumutumulo debo odelo watia.

⁹ Bo wonu Wutato diila moó otongo napusu, Wutato mamusi monika. Lebe mopiohe Wutato monika loú napusu lobilahimu wali-walihuhu.

¹⁰ To limongolio tamalonika, utieelo palenta lowatia: (Otutuulio maó diila watia tamongohi mai palenta botie, bo Eeya.) Taabua ngota tamalonika diila mowali mololaa maó dilelio.

¹¹ Bo wonu tio malo lolaa maó olio, tio musi debo diila odile, meaalo muli mohualinga ode dilelio. Wau ngotaalio lodile talolaí diila mowali motalaki dilelio.

¹² To uwewo-wewolio, naseehati lowatia yito: -- utie naseehati laatia lohihilao, diila Eeya -- wonu ngotaalio lo Nasara odile ngotaalio taabua tadiila palacaya li Almasi, wau dilelio taabua akolo u tumumula peé-peéenta wolio, yi tau boito diila mowali motalaki dilelio taabua.

¹³ Wau wonu ngotaalio taabua Nasara odile ngotaalio tadiila palacaya li Almasi, wau dilelio taabua akolo u tumumula peé-peéenta wolio, yi dile talola boito diila mowali motalaki dilelio.

¹⁴ Sababu dile talolai tadiila palacaya poluasialio u mowali pongawaá umati lo Allahu Taáala sababu nikalio wolo

dile tamalowali miliki lo Allahu Taáala. Odito olo dile taabua tadiila palacaya poluasialio u mowali pongawaá umati lo Allahu Taáala, sababu nikalio wolo dile talolai tamalowali miliki lo Allahu Taáala. Wonu diila odito, mongo walaí mongolio tantulo maó debo odelo mongo walaó kaapiru, lebe–lebe pomaó mongo walaó boito ilanggapu odelo pongawaá umati lo Allahu Taáala.

¹⁵ Bowonu taa diila palacaya boito mololaa maó dilelio taabua meaalo dilelio talolai taulo Nasara, diila maó pongotongo olio. Todelomo suáli botie dile taabua meaalo dile talolai boito molopato, sababu Allahu Taáala motohilaa alihu Wutato tumumula wolo mopiohe wau dame.

¹⁶ Sababu Wutato odelo dile taabua -- tamalo malocaya to Eeya -- woloolo mola mowali otaawa lo Wutato loú tantu deú Wutato diila mowali mopo@aahu dilemu taabua? Odito olo Wutato odelo dile talolai Nasara, woloolo mola mowali otaawa lo Wutato loú tantu deú Wutato diila mowali mopo@aahu dilemu taabua?

¹⁷ Mamusi ngota–ngota mongatulu tutumulio moduduá potuhata lo Eeya debo odelo u matilantu mai lo Allahu Taáala olio

toú Allahu Taáala lotianga olio u palacaya to o–Lio. Ui–uitolo wuúdu u hepilo ngaajali lowatia totimiídu jamaá.

¹⁸ Humayaalio, wonu tahingota–ngotaawa matilunatio toú lololimo titiango Allahu Taáala, yi tau boito diila maó potolopani moluluta tutuuotalo lotuuna boito. Odito olo wonu tahingota–ngotaawa diipo tiluuna toú tio lololimo titiango Allahu Taáala, tau boito diila maó peítuuna.

¹⁹ Sababu moduduá wuúdu lotuuna meaalo diila moduduó, duduuluwolo tutuuwauwa diila oboli wolo–wolo. U polohuna daá yito moduduá totoonulalo palenta lo Allahu Taáala.

²⁰ Mamusi timiídu tau debo tumutumulo todelomo owowoluwoa debo odelo toú tio lololimo titiango Allahu Taáala.

²¹ Wonu towakutu Wutato tiliyango, Wutato yito ngotaalio lowato, sambelolo Wutato suusa–suusa momikiilangi suáli boito. Bo dewonu Wutato ohiyango u mowali molopato, pohunawa maó hiyango boito.

²² Sababu ngotaalio lowato tamalo malacaya to Eeya, deúito–yito taulo Eeya talo lopato. Wau tamo lopata ngota tamalo

malacaya to Eeya, deúito–yito wato li Almasi.

²³ Allahu Taáala malotali to Wutato wau malo wimumuto bilayalia–Lio. Sababu uito, Wutato diila maó pohudu batanga u mowali wato lomanusia.

²⁴ Oditolio, Mongo wutato, penu boli woloolo mola owowoluwoa limongoli toú tiliyango, mamusi Wutato debo tumutumulo debo odelo uito peé–peéenta wolo Allahu Taáala.

²⁵ Botia tomimbihu tau–tauwalo tadiipo helonika. Tomimbihu suáli boito, watia diila lololimo palenta wolo–wolo lonto Eeya. Bo odelo taa u sababu odehu hilao lo Eeya paatuti palacayalo, watia ohilaa mongohi mai naseehati lowatia.

²⁶ Moéela mola totoonulalo osuusa u monganjamu masaatia botie, to pongolaasa laatia lebe mopiohe wonu tau debo moponaó lo tutumulo debo odelo owowoluwoalio u masaatia.

²⁷ Wonu Wutato maódile taabua diila maó potolopani molopato monto dile boito. Wonu Wutato diipo odile diilalo pololohe dile.

²⁸ Bo wonu Wutato monika, uito diila odusa. Odito olo wonu tadulahu ngota

monika, diila oboliilio deú tio odusa. Bo, timongolio talonika boito mamotaalua lou suusa dadaata. Wau watia ohilaa Wutato moóohei monto totoonulalo usuusa boito.

²⁹ Makusudu lowatia odie, Mongo wutato: Ito diilalo owakutu dadaata. Tumulalo mai botia, timiídu tamaó dile taabua mamusi tumumula debo odelo diila odile;

³⁰ taa u humoyongo, tio tumutumula debo odelo diila ilosuusawa lohilao; taa u moííi, tio debo odelo diila meengahe; taa u malotali, tio debo odelo diila motolo miliki wolo–wolo;

³¹ wau taa u umoliyo@o todelomo susuu–aliyaala lodunia, tio mamusi tumumula debo odelo diila pilo puusingi lo susuu–aliyaalo boito. Sababu diilalo mohiheo dunia botie, todelomo owowoluwoalio u botia, mamooli!

³² Otohilaa lowatia alihu Wutato molopato monto usuusa. Taa diila odile taabua mamopo dulunga pikiilangilio to susuu–aliyaalo tomimbihu Eeya, sababu tio ohilaa mopo sanangi hilaa lo Eeya.

³³ Bo tamaa ilodile taabua mamomikiilangi dadaata susuu–aliyaala lodunia botie, sababu tio ohilaa mopo sanangi hilaa lodilelio;

³⁴ akibatilio polotuotio hitaya–tayade. Taabua ngota tadiila odile, meaalo tadulahu ngota, mamo mikiilangi dadaata susuu–aliyalo tomimbihu Eeya, sababu tio ohilaa alihu batanga wau nyawalio mowali miliki lo Allahu Taáala. Bo taabua ngota tamaa odile, mopo dulungo pikiilangilio ode susuu–aliyaala lodunia botie, sababu tio ohilaa mopo sanangi hilaa lodilelio.

³⁵ Watia loluladei ngoáamilalo boito ode opopiohumu lohihilao, diila wolo makusudu modini utie wau modini uito. U otohilaa lowatia bo wambaó alihu Wutato mohutu u otutu wau paatuti, wau alihu Wutato mowali mopo dulungo pikiilangimu ode Eeya.

³⁶ Wonu tahingota–ngotaawa molaasa diila hemo ponaó u patutilio ode tilantahio, wonu tio diila moó otongo napusulio, wau tio molaasa palalu monika wolo tadulahu boito, huliilo maó tio mohutu wolo u to pongolasalio mopiohu. Tio diila odusa, wonu timongolio monika.

³⁷ Bo wonu tahingota–ngotaawa malolantu ma@o todelomo hilaalio udiila monika wolo tilantahio wau u tilantulio boito diila pakusa, yi upilo hutulio

boito mopiohu, asali tio molotolo hilao mopohutu maó.

³⁸ Ilaalolio taa u monika mopiohe huhutuulio, wau taa u diila monika lebe mopiohe poli huhutuulio.

³⁹ Taabua ngota tamalo nika leitihuto todilelio bo ngotilonggadu dilelio tumutumulo. Wonu dilelio mailate, taabua boito molopato muli monika wolo taa otohilaalio; asali nika boito nika lo Nasara.

⁴⁰ Bo tio malebe opa@eeda wonu tio diilalo monika. Uito huhaama lowatia lohihilao, bo to pongolaasa lowatia deú uiloíya mai lowatia boito yito wolo kawasa lo Rohullah.

8¹ Botia tomimbihu uáalo uwohi odelo dewo ode balaahala. Memangi otutu debo odelo loíya lotau, "Ito ngoáamilalo malotota." Bo pongotota moóhutu totau sombongi, hiambola toliángo momongu batanga lotau.

² Taa u molantobe deú dadaata u otaawalio, otutuulio maó diipo motota u mode–modelomolo maó.

³ Bo taa u otu–otutuulo maó motoliángo to Allahu Taáala, tio otaawa lo Allahu Taáala.

⁴ Pasali suáli loú molamelo uáalo umapilo dewo ode balaahala, otaawanto deú balaahala mopobayahei hitua–tuawua u otutuulio maó diaaluo. Wau otaawanto olo deú Allahu Taáala bo tuwau; diaaluo tawewo.

⁵ Memang dadaata olo wolo u iluntelio ila wau eeya; mopio uwoluo tohulungo boli uwoluo toitaato dunia.

⁶ Bo olanto, Allahu Taáala bo tuwau. Tio Allahu Taáala talo powali mai totoonulalo u hitua–tuawua. Ode o–Liolo ito tumumulo. Wau Eeya bo tuwau olo, deúito–yito ti Isa Almasi. Lotimbulude o–Lio totoonulalo u hitua–tuawua pilopowali, wau sababu Tioolo yi ito tumutumulo.

⁷ Penu boli odito, diila ngoáamila taa motota losuáli boito. Woluo taa muloololio mai biasaalio hemolubo balaahala. Oditolio, sababu uito tunggula botia olo timingolio donggo molaasa deú uáalo, u mapilo dewo ode balaahala, deúito–yito uáalo lo balaahala. Yi wonu timongolio molamela uáalo boito, timongolio molaasa odusa; sababu iimani limongolio diipo molotolo.

⁸ Otutuulio maó uáalo lohihilao diila moóhutu wumbutanto wolo Allahu Taáala

mowali lebe mohulango daá. Wonu ito molamela uáalo boito, ito diila moótapu paéeda wolo-wolo. Boliño maó wonu ito diila molamela uáalo boito, ito olo diila luhi wolo-wolo.

⁹ Bo, poódaha-dahaalo maó! Diila bolo motoduo mai ode taawewo mowali odusa -- sababu iimanilio diipo molotolo -- masababu Wutato molopato penu boli mohutu wolo wambaño.

¹⁰ Makusudu laatia odie: Humayaalio Wutato, taó iimani molotolo, donggo hulohuloáa hemo lamela tokuili lo balaahala. Lapataó tahingota-ngotaawa moóonto to Wutato hulohuloáa hemo lamela teto. Wonu iimani lotau boito diila molotolo, diila maúito u mamohutu tau boito buheli molamela uáalo u mapilodewo ode balaahala boito?

¹¹ Wau sababu uito, yi iimani lo Wutato mamóohutu taa u diila molotolo iimanilio boito mowali lapalolo. Lebe-lebe pomaó ti Almasi yilate ode tau boito olo.

¹² Wau wonu Wutato mohutu totala debo odelo uito ode mongo wutato Nasara -- deúito-yito Wutato moluusa iimani limongolio u molulupuhu -- yi Wutato odusa toli Almasi.

¹³ Uito sababuulio, wonu uáalo moósababu wutato lowatia ilodusa, yi watia sama–samaata diilalo molamela tapu. Sababu diila bolo wutato lowatia odusa sababu watia.

9¹ Diila mawatia tau bebasi? Diila mawatia rasulu? Wolo watia diipo peéenta maó loóonto li Isa Eeyanto? Wolo timongoli diila tilapulo kalaja lowatia duólo Eeya?

² Eleponu tau–tauwala wewo diila mohuto momasisi olaatia odelo rasulu, pulito ngoídilio tolo akuwo limongoli uito! Sababu tutumuli mongoli odelo taulo Nasara yito tuotio deú watia ngotaalio lo Rasulu.

³ Wonu tau mongaibu olaatia, watia mamolametaó odie:

⁴ Wolo diila ohaku watia mololimo uáalo wau uilumolo sababu kalaja lowatia?

⁵ Wolo watia diila ohaku modelo ngotaalio dile taabua lo Nasara peé–peéenta wolaatia tononaó lowatia, debo odelo u pilohutu lomongo wutati Isa Eeya wau lomongo rasulu wewolio, leiwaito tei Petrus?

⁶ Meaalo bo tei Barnabas wau watia wambaó tapilo wajibu mopeehu rijiki lohihilao?

⁷ Diaaluo pongawaá lo suludadu tamusi mongonggosi batangalio lohihilao todelomo diti lopopaatea! Diaaluo tamoomengia tamo pomulo angguru to ilengilio tulusi diila molamelo tilapulo angguru monto ilengi boito! Diaaluo diiti tamolaala himba, lapataó diila mongilu susu monto himbalio boito!

⁸ Tiloóowoli mai lowatia uito diila bo patopatoá toú biasa todelomo u helaasalo ngohui-ngohui, bo sababu Kitabi loóowoli mai suáli boito olo.

⁹ Todelomo Buku lei Musa tulatulade, "Sapi udonggo hemo lumbe-lumbetaáa pale u mohinggi bili lopale monto panggeangio, diila maó tongguúma tunggilio." Wolo sapi u poótuoto lo Allahu Taáala?

¹⁰ Meaalo uito pilo dulungio mai olanto? Memangi uito leituladei ode olanto. Sababu tamokalaja halabolu wau tamopo belesi palelio mapatutilio mokalaja wolo halapani u mololimo ngobutaó monto tilapulo kalajaalio.

¹¹ Amiaatia malo muáyade bili lorohani todelomo tutumuli mongoli. Yi wonu amiaatia molipu babaa-lakatiyalo upango monto olimongoli, wolo uito boliilio

amiaatia mohile wolo moóohuú lebe dadaata monto olimongoli?

¹²Wonu tau–tauwalo wewo ohaku mohalapu maó utie monto olimongoli, wolo amiaatia diila lebe ohaku poli woli mongolio? Bo watia diipo lopohuna maó haku boito. Boliío maó watia lebe motohilaa momanta totoonulalo u hitua–tuawua loú mopotoodei suáli tuwau u mongabuto polo loladu Habari Mopiohe pasali li Almasi.

¹³Tantu otaawa lo Wutato deú taa u mokalaja todelomo Bele lo Allahu Taáala mololimo uáalo limongolio monto bele lo Allahu Taáala. Wau tau–tauwalo tahi pongulusia tambati podewowalo bake, moótapu ngobutaío lo bake upilo dewolio teto.

¹⁴Odito olo Eeya mamolantu mai deú tamo pohabari Habari Mopiohe boito musi moótapu lijikilio monto polo habari boito.

¹⁵Bo diipo peéenta watia lomake penu boli tuwau maó monto hahaa–kuwaalo boito. Wau watia loluladei tulade botie diila olo wolo makusudu alihu susuu–aliyaalo boito pohutuwola botia to olaatia. Lebe mopiohe watia mate loú oolia losuáli u hepomangga lowatia boito.

¹⁶ Sababu, wonu uito bo suáli mopohabari Habari Mopiohe monto Allahu Taáala, yi watia diila ohaku mopo mangga–mangga lohilao, sababu Allahu Taáala malo malentai olaatia u lohutu uito. Matopotala watia, wonu watia diila mopohabari Habari Mopiohe boito!

¹⁷ Wonu humayaalio watia moponaó lokalaja boito moduduá toú otohila lowatia lohihilao, yi watia mowali mohalapu u moótapu wuupa. Bo watia mopohabari Habari Mopiohe boito tumbaó sababu pilowajibu. Watia pilalentai lo Allahu Taáala u mohutu uito.

¹⁸ Wonu odito, wolo wuupa lowatia? Utie wuupalio: deú watia mowali mopololadu Habari Mopiohe boito loú diila mopobuheto penu boli ngotaa maó u mongonggosi olaatia, sababu watia diila mohile wolo moóohuú haku lowatia odelo tamopo habaria Habari Mopiohe boito.

¹⁹ Watia botie diila wato penu boli lita; watia lolopato. Eleponu odito, watia malo powali batanga lowatia botie wato ode taa ngoáamila. Pilohutu lowatia uito alihu watia moóhaama lebe dadaata maó tau odeli Almasi.

²⁰ To taulo Yahudi, watia lotihutu debo odelo taulo Yahudi alihu watia mowali moóhaama taulo Yahudi odeli Almasi. To tau-tauwalo tahitumula hipo duduáawa butoée Musa, watia lotihutu debo odelo watia leitihuto tobutoó boito, eleponu watia otutuulio maó diila leitihuto woleeto. Pilohutu lowatia uito alihu watia mowali momantango olimongolio mowali muri li Almasi.

²¹ To taa diila Yahudi, watia lotihutu debo odelo ngotaalio tadiila Yahudi, tatumu-tumulo to bulemengo butoée Musa. Pilohutu lowatia uito alihu watia mowali momantango olimongolio mowali muri li Almasi. Bo uito diila oboliilio deú watia diila modungohe totoonulalo palenta lo Allahu Taáala; watia tumbaó kiluwasa mai lo totoonulalo palenta li Almasi.

²² Tohuungo lotau-tauwala tadiila boti yakini, watia olo lotihutu debo odelo ngotaalio tadiila boti yakini alihu watia mowali momantango olimongolio mowali muri li Almasi. Limbuío maó, watia mowali totoonulalo u hitua-tuawua ode ngoáamila tau alihu wolo dalalo u penu

boli woloolo mola olo watia mowali mopoáahu ngotayadi mongolio.

²³ Ngoáamila boito pilohutu lowatia duólo Habari Mopiohe monto Allahu Taáala boito, alihu watia olo peé–peéenta balakatia–Lio.

²⁴ Tantu otaawa lo Wutato deú todelomo u mobaalia ngoáamila tahiduduá moduduá tumeteá olo, bo wambaó ngota tamololimo palaseni. Masababu uito teteóolo odito lupalio tilinggula Wutato mololimo palasenilio.

²⁵ Timíidu tau tadonggo todelomo teleeneni musi mongotongo batanga todelomo toonulaalo suáli. Tio mohutu uito sababu tio motohilaa pobuóhelo bunga ujuuwala, deúito–yito bunga u mahuáa mololante. Bo ito botie mongotongo batanga todelomo totoonulalo suáli sababu ito motohilaa pobuóhelo lobunga udiila tamololante.

²⁶ Uito sababuulio watia tumeteá wolo dulunga u tantutantu. Debo odelo todelomo baalia loú mobuntunga, watia diila momate wolo majanunu.

²⁷ Poluli maó laatia wawaó laatia latiolio wolo moóohuú tunggula watia moó kawasa maó. Watia mohutu odito, sababu

watia diila mohuto tunggula motoduo mai deú lapataó watia moheinga taawewo moduduá todelomo baalia boito, watia lohihilao diila tolimoolio.

10¹ Mongo wutato! Wutato patutilio moéela mola wolo u mailowali toli nenemoyanto toú timongolio loduduá olei Musa. Timongolio ngoáamila yililunga loheengo, wau wolo loáahu lobalango Deheta Meela.

² U mowali muri lei Musa, timongolio ngoáamilalo yilihualio todelomo heengo wau todelomo deheta boito.

³ Timongolio ngoáamilalo helo lamela uáalo rohu u tutuuwauwa,

⁴ wau longilu minumani rohu u tutuuwauwa. Timongolio ngoáamilalo longilu lonto huídee botu lorohani upeé-peénta woli mongolio; huídee botu boito yito ti Almasi lohihilao.

⁵ Eleponu odito, Allahu Taáala diila sanangi ode ododaata limongolio, wau uitolo sababuulio mimii-lateyaalo limongolio bolo hipule-pulepeyalo maó tohuta luasi u delita.

⁶ Ngoáamilalo boito mowali obaaya olanto, u mopoéela olanto alihu diila

motohilaa susuu–aliyaalo u moleeto debo odelo timongolio.

⁷ Odito olo alihu ito diila maó molubo balaahala debo odelo u hepilohutu loú ngotayadi mongolio. Todelomo Kitabi tulatulade, "Yi bangusa boito lolumulo lolamela longilu wau longelungo u lolubo balaahala."

⁸ Ito diila mowali mohutu susuu–aliyaalo u huloto debo odelo u hepilohutu loú ngotayadi mongolio. Sababu, dulo pulaa tololihi lota lonto olimongolio yilate tou ngohui sababu helohutu uito.

⁹ Ito diila mowali mohimontala to Eeya debo odelo u hepilohutu loú ngotayadi mongolio muloololio mai, tilinggula timongolio yilate tilopango tulidee obisa.

¹⁰ Ito olo diila mowali motihungoto; debo odelo u hepilohutu loú ngotayadi mongolio muloololio mai, tilinggula timongolio pilate yila–yilateelo maó lo Malaíkati Opopate.

¹¹ Ngoáamila suáli boito lotoduo to limongolio u mowali obaaya ode tau–tauwalo wewo. Wau ngoáamilalo boito tulatulade olo u mowali poéela olanto. Sababu ito botia tumutumula topulito lojamani.

¹² Taa u molantobe batangalio tihutihula motoheeto, mamusi mopoódaha–dahaalo maó; tio diila bolo modehu.

¹³ Timíidu yimontala uilolaasa lo Wutato yito yimontala ubiasa heólaasawa lomanusia. Bo Allahu Taáala tatapu wau molotolo hilao todanti–Lio. Tio diila tamopoluli to Wutato yimontalalio lebe loú omambowamu. Toú Wutato odungga loimontala, Tio mamongohi mai dalalo olemu alihu Wutato mowali molotolo wau moó tahangi.

¹⁴ Masababu uito, Mongo wutato taa otoliángo lowatia, mamusi timongoli molonuó molubo balaahala.

¹⁵ Watia mobisala mai olimongoli debo odelo ode tau–tauwalo tamolinepo. Mamusi timongoli moluuúde mola lohihilao loíya lowatia botie.

¹⁶ Toú ito mongilu angguru loú molapali mola sukuru ode Allahu Taáala, wolo uito diila mopotuhata mai deú ito motituwau woli Almasi to opopate–Lio? Wau toú ito molaya–layade roti u tamelola peé–peéenta, wolo uito diila mopotuhata mai deú ito motituwau todelomo batanga li Almasi?

¹⁷ Masababu bo woluo roti ngobotu, wau ito ngoáamila molamela monto roti u ngobotu boito olo, yi ito taa dadaata botie debo odelo ngobatanga.

¹⁸ Nte poótuota maó tau-tauwalo Yahudi. Timongolio tahe lolamelo uáalo u pilodewo toitaato tambati podewowala lobake, deúito-yito tahe lotituwau wolo tambati boito.

¹⁹ Wolo makusudu lowatia woleeto? Balaahala meaalo uáalo u pilodewo ode balaahala boito diila oboliilio sama-samaata.

²⁰ Wolo u podewolo totambati lobake ode balaahala diila podewolo ode Allahu Taáala, bo ode roroo-huwaalo u moleeto. Wau watia diila mohuto timongoli motituwau wolo rohu u moleeto.

²¹ Timongoli diila mowali mongilu monto hakati angguru lo Eeya, wau peéntalo maó monto hakati angguru lorohu u moleeta olo. Timongoli diila mowali molamela tomeja lo Eeya, wau tomeja lorohu umoleeta olo.

²² Meaalo ito ohilaa mohutu to Eeya mohiihia? Wolo ito lebe molotolo wolo Eeya?

²³ Loíya lotau, "Ito mowali mohutu boli wolo u otohilaanto." Otutu! Bo diila ngoáamila u otohilaanto boito ohuna. "Ito mowali mohutu boli wolo u otohilaanto" -- bo diila ngoáamila u otohilaanto boito momongu tutumulonto.

²⁴ Boli ngotaa diila maó pohipate u polohuna daá lo batangalio lohihilao wambaó. Timíidu tau musi mohipate u polohuna daá lo taawewo.

²⁵ Timongoli mowali molamela penu boli wolo u hepo taliilio topaatali lotapu. Diilalo maó tuletea meimulo, eleponu woluo tadiila akolo todelomo hilao u maloótapu tinelo Eeya de olemu.

²⁶ Sababu todelomo Kitabi tulatulade, "Dunia botie wolo tuangio ngoáamila yito miliki lo Eeya."

²⁷ Wonu timongoli tod Woolio molamela lo ngotaalio tadiila Nasara, wau tilolimo limongoli totoduo boito, tamela maó wolo upilo hintalio olimongoli. Diilalo maó tuletea monto utoonu asaliilio mai loú aalo boito, alihu diaaluo tadiila akolo todelomo hilaa u maloótapu tinelo Eeya de olemu.

²⁸ Bo wonu woluo tamolóiya olimongoli, "Uáalo botie mapilodewo ode balahala," diila maó tamela uáalo boito, sababu

mopoó tuotaó polohuna daá lotau boito, wau sababu suala lohilaa u maloótapu tinelo Eeya.

²⁹ Makusudu lowatia diila suala lohilaa u maloótapu tinelo Eeya limongoli, bo suala lohilaa u maloóotapu tinelo Eeya lotau boito. Tanu woluo tamohintu, "Wei yilongola obebasi lowatia musi enggadelo losuala hilaa u maloótapu tinelo Eeya lotaa wewo?"

³⁰ Wonu watia molamela uáalo wolo mosukuru mola ode Allahu Taáala, yilongola tau musi mohenteá olaatia tou aalo boito, hiambola watia malo sukulu mola to Allahu Taáala woleeto?"

³¹ Penu boli wolo upohutuo lo Wutato -- Wutato molamela meaalo mongilu -- pohutua maó ngoáamilalo boito u mopolaió Allahu Taáala.

³² Potitumulolo odito rupalio tilinggula Wutato diila moósababu taawewo mohutu dusa; wolo timongolio taulo Yahudi meaalo tadiila Yahudi, meaalo jamaá lo Allahu Taáala.

³³ Potitumulolo debo odelo watia. Watia helo tolopani mopo sanangi hilaa lotaa ngoáamila todelomo totoonulalo u hitua-tuawua, loú diila omakusudu u polohuna

daá batanga lohihilao. Patuju lowatia yito bo alihu timongolio ngoáamilalo mowali poáahuwolo.

1 1 ¹ Duduí maó obaaya lowatia, debo odelo watia olo heloduduá obaaya li Almasi.

² Watia momuji olimongoli sababu timongoli laito hemoéela olaatia wau heloduduá pongaajali uilohi laatia olimongoli.

³ Bo watia motohilaa timongoli motota maó suáli tuwau poli, deúito-yito deú tamowali taúwa totimiídu mongo loláí yito ti Almasi; Tamowali taúwa todile taabua yito dile talolai, wau Tamowali taúwa toli Almasi yito Allahu Taáala.

⁴ Wonu taloláí ngota toú moduá meaalo toú mopo tunggulo habari monto Allahu Taáala totalu lotaa dadaata, momake taúbu lunggongo, yi tau boito mohina li Almasi.

⁵ Wau wonu taabua ngota toú moduá meaalo toú mopo tunggulo habari monto Allahu Taáala totalu lotaa dadaata, diila momake taúbu lunggongo, yi taabua boito mohina dilelio talowali taúwa to batangalio. Uito tutuuwauwa wambaó

debo odelo lunggongo taabua boito maa iluluhelio.

⁶ Sababu wonu taabua ngota diila mohuto momake taúbu lunggongo lebe mopiohe huwoío huntingalo. Bo wonu taabua ngota uluhelo lunggongio meaalo huntingalo huwoío, yi uito tuwaulio polohina de olio. Masababu uito lebe mopiohe tio momake taúbu lunggongo.

⁷ Talolaí diila palalu momake taúbu lunggongo, sababu tio mopobayahu watade hihilao wau odudaá lo Allahu Taáala. Bo taabua mopobayahu odudaá lo talolaí,

⁸ sababu talolaí diila pilowali mai monto taabua, taabualo tapilowali mai monto talolaí.

⁹ Talolaí olo diila pilowali mai u polohuna daá lotaabua, bo taabua pilowali mai u polohuna daá lotalolaí.

¹⁰ Sababu uito, u mopo sanangi to maaa-laíkatiyalo, yi taabua ngota musi momake taúbu lunggongo odelo tuoto deú tio to walungo okokawasa lodilelio.

¹¹ Eleponu odito todelomo tutumulonto odelo taulo Nasara, taabua diila tihutihula tutuwau, molopato monto talolaí, wau

talolaí olo diila tihutihula tutuwau molopato monto taabua.

¹² Sababu eleponu taabua bohulo pilowali mai monto talolaí, bo lapataó uito talolaí pilotutulio mai lotaabua; wau totoonulalo u hitua–tuawua asaliilio mai monto Allahu Taáala.

¹³ Nte toneáa mola lo Mongo wutato lohihilao suáli botie: Wolo mopiohu taabua ngota moduá ode Allahu Taáala totalu lotaa dadaata, loú diila momake taúbu lunggongo?

¹⁴ Monto u ilolaasawa lotaa dadaata, timongoli maa ilajalilio deú wonu talolaí ohuwoó tale–talenga, uito tuwaulio udiila paatuti.

¹⁵ Bo ode taabua, huwoó yilohi olio u molaúbe lunggongio wau huwoó u hayahaya yito moóbangga olio.

¹⁶ Naa, wonu woluo taóhilaa mobuutola pasali losuáli botie, tuwa–tuwaulo umowali loíya mai lowatia yito deú mopio ito meaalo jajaa–maáalo lo Allahu Taáala wewolio, odaáalio bo woluo tuwaulio obobiasa boito todelomo jamaá; wewolio maó leeto diaaluo.

¹⁷ Tomimbihu u wumbutio mola botie, watia diila momuji olimongoli.

Dudunggaya lo potabia limongoli diila poótapulalo u mopiohu, bo udiila mopiohu.

¹⁸ Bohu–bohulio watia loódungohu, deú todelomo totoonulalo dudunggaya limongoli woluo popoo–lemboáawalo tau tinggai bubuu–lemenga. Wau tolantobu laatia ngoídilio habari boito otutu.

¹⁹ Memangi mapatutilio tumoodei suáli mobubuuála towolota limongoli, alihu de oontonga tatoonu–toonu taulo Nasara pulua.

²⁰ Bo toú timongoli helo tiámbu, upilohutu limongoli boito diila Totamelo Eeya.

²¹ Sababu toú hipolamela, timongoli ngota–ngota wawaahua mohama uáalolio lohihilao, dilumutu woluo tadiila loótapu wolo–wolo, hiambola tawewolio bolo hehuwoáalo.

²² Yilongola odito? Wolo Wutato maóbele? Wutato mowali molamela wau mongilu teto! Meaalo Wutato ohilaa mohina jamaá lo Allahu Taáala wau mopoóolito tahi mosikinia? Wolo umusi loíya mai laatia olimongoli? Wolo mapatutilio watia momuji olimongoli? Diila! Sama–samaata watia diila tamomuji olimongoli.

²³ Sababu u pilo ngaajali mai lowatia olimongoli, uito tilolimo lowatia lonto Eeya lohihilao: deú toú hui boito toú ti Isa, Eeyanto hiliyanatilio, Tio lohama maó roti, ²⁴ wau lapataó Tio lolapali mola sukuru ode Allahu Taáala to roti boito, Tio lomita–mitangaó roti boito wolo uluú–Lio, tulusi lotahuda, "Utieelo batanga–Ú u yiludu ode limongoli. Pohutua maó utie u mopoéela ola–Ú."

²⁵ Odito olo lapataó lolamela, Tio lohama maó hakati lo angguru tulusi lotahuda, "Angguru botie yito daantia bohu lo Allahu Taáala, u silaaha wolo duhu–Ú. Timíidu timongoli mongilu utie, pohutua maó utie u mopoéela ola–Ú."

²⁶ Memangi timíidu timongoli molamela roti wau mongilu angguru botie, timongoli mopohabari opopate lo Eeya, dilumutu Tio meidungga mai.

²⁷ Masababu uito, tamo lamela roti lo Eeya meaalo mongilu angguru lo Eeya wolo dudelo udiila paatuti, tau boito odusa to Eeya tamalo pobake batanga wau duhu–Lio.

²⁸ Oditolio, timíidu tau musi motuletepo batangalio meimulo, bolo tio mowali molamela roti wau mongilu angguru boito.

²⁹ Sababu wonu taa molamela roti wau mongilu angguru diila momandungi deú totamelo boito motuhatawa wolo batanga lo Eeya, yi tau boito molamelo wau mongilu u mololimo hukuumanio lo Allahu Taáala to batangalio lohihilao.

³⁰ Uitolo sababuulio dadaata monto olimongoli tamo ngongoto wau molulupuhu, wau woluo olo tailate.

³¹ Bo wonu ito motuletepo batanganto meimulo, ito diila tahukuumanio lo Allahu Taáala.

³² Bo wonu ito hukuumanio lo Allahu Taáala, Tio mamó muboáa olanto, alihu ito diila maó otuhata lo hukuumanio peé–peéenta wolo dunia botie.

³³ Masababu uito, Mongo wutatuú, wonu timongoli motiámbu u molamela totamelo Eeya, timongoli musi mohihiimawa.

³⁴ Wonu woluo tapola–polango, tio musi molamelopo tobele. Wonu timongoli momandungi suáli botie, totoonulalo dudunggayá lo potabia limongoli diila tamopo dungga mai hukuumanio monto Allahu Taáala tobatanga limongoli lohihilao. Tomimbihu susuu–aliyaalo uwewo, matombanga lowatia ode limongoli, de wonu watia muli monaó mai.

12¹ Botia tomimbihu popoo-nuwaalo uilohi mai lo Rohullah. Tomimbihu uito, otohilaa lowatia otaawa maó lo Mongo wutato u otutuulio maó.

² Eelai mola deú toú timongoli diipo motota lo Allahu Taáala, timongoli iloáanga u moduduá to balaahala u madodo.

³ Musi otaawa maó limongoli deú tatilaúwa lo Rohullah diila mowali moloíya, "Malaá-laánatilo ti Isa!" Odito olo penu boli ngotaa maó diila mowali moloíya, "Ti Isaalo Eeya!" wonu tau boito diila tilaúwa lo Rohullah.

⁴ Woluo hidala-dalaala ponu monto Rohullah, bo ngoáamilalo yilohi mai lo Rohu u tuwau.

⁵ Woluo hidala-dalaala kalaja u momaya to Eeya, bo Eeya tabayaalo boito, Eeya tatuwau olo!

⁶ Woluo hidala-dalaala dudelo u mokalaja kalaja lo Eeya, bo tamongohi mai lotolo boito ode timíidu tau yito Allahu Taáala tatuwau olo.

⁷ Ode opopiohunto ngaááamila, Rohullah mokalaja mai totimíidu tau wolo dudelo lotaa ngota-ngota.

⁸ To tangotaalio, Rohu boito mopomambo mai olanto u mobisala wolo tilihula. Ode tawewo Rohu u tutuwauwa boito mopomambo mai olanto u mopo@opatato pasali lo Allahu Taáala.

⁹ Rohu u tuwau boito olo mongohi ode taa u ngota, mopomambo olio u palacaya upolu-polutuó toli Almasi; hiambola ode tawewo Rohu boito mongohi kawasa u mopoóluli tau.

¹⁰ To ngotaalio yilohia kawasa u mohutu moólinggolabe wau ode tawewo yilohi ponu u mopoótaa totoonulalo lanjana lo Allahu Taáala. Ode tawewo poli Rohu boito yilohi mopomambo olio u mopo hihiihede toonu ponulo Rohullah wau toonu udiila. Woluo tailohia u mambo mobisala wolo bahasa hidala-dalaala u moólinggolabe, wau woluo olo tailohia u mambo motombango boliilo babaa-hasaawalo boito.

¹¹ Ngoáamilalo boito kilalaja lo Rohu u tuwau boito olo; ngota-ngota, tau yilohia ponu uwiwi-wiwi moduduá otohilaa lo Rohu boito lohihilao.

¹² Ti Almasi yito debo odelo batanga lomanusia; batanga boito tuwau, bo tilitangoa loú pongawaá dadaata.

Ngoáamila pongawaá boito, penu boli dadaata, bo ngobatanga wambaío.

¹³ Odito olo ito ngoáamila, mopio taulo Yahudi meaalo taa diila Yahudi. Mongo wato meaalo taa molopato; ito ngoáamila mailihua lo Rohu u tutuuwauwa boito, alihu ito powaliyolo tuwau tobatanga li Almasi boito. Ito ngoáamila olo moólaasa Rohu u tuwau boito lealeaatulo maó.

¹⁴ Sababu batanga boito lohihilao diila bo o pongawaá tuwau wambaío bo dadaata pongawaálio.

¹⁵ Wonu oáato moloíya, "Waú diila uluú, sababu uito waú diila waito lobatanga," uito diila oboliilio deú oáato boito diila waito lobatanga.

¹⁶ Wau wonu bulonga moloíya, "Sababu waú diila mato, yi waú diila waito lobatanga," uito olo diila oboliilio deú bulonga boito diila waito lobatanga.

¹⁷ Humayaalio ngangaawaálo boito mowali mato wambaío, woloolo mola batanga boito mowali modungohu? Meaalo wonu ngangaawaálo boito mowali bulonga wambaío, woloolo mola batanga boito moóobo?

¹⁸ Oontonganto deú Allahu Taáala talopo tambati popoo-ngawa@aalo

boito tobatanga. Tinggai pilo tambati to tambatilio lo Allahu Taáala loduduá kahandaki-Lio.

¹⁹ Wonu ngoáamilalo bo ngopo ngaawa@a wambaío, toonu u iluntelio batanga?

²⁰ Oditolio memangi woluo dadaata pongawaá, bo batanga tuwau wambaío.

²¹ Masababu uito, mato diila mowali moloíya ode uluú, "Waú diila momalalu olemu!" Meaalo lunggongo moloíya ode oáato, "Waú diila momalalu olemu!"

²² Bolíio maó popoo-ngawa@aalo batanga u helantobulo molulupuhu boito, palaluwonto daá;

²³ wau popoo-ngawa@aalo u helantobunto diila botie ohalaga, tumbaó uito yito popoo-ngawa@aalo u hehalaganto lebe dadaata maó. Popoo-ngawa@aalo batanga udiila oontonga gaga, tumbaó lebe poótuotonto.

²⁴ Popoo-ngawa@aalo batanga umaa iloontonga mopiohu, diila palalu poótuotonto. Allahu Taáala malo huludu mai batangaanto odito rupalio tilinggula popoo-ngawa@aalo udiila boti ohalaga yilohia halaga lebe dadaata maó.

²⁵ Louú odito batanga boito diila hitaya–tayade; timiídu pongawaá tinggai mopoótuoto tuwau wau uwewolio.

²⁶ Wonu pongawaá tuwau modutolo, ngoáamila pongawaá uwewolio modutola olo; wonu pongawaá tuwau pujiolio, ngoáamila pongawaá uwewolio moduduá motiwengahe.

²⁷ Wutato ngoáamilalo peé–peéenta yito batanga li Almasi wau timongoli olo ngota–ngota yito pongawaá monto batanga boito.

²⁸ Odito olo todelomo jamaá, Allahu Taáala malolantu mai tambati lotau tahidala–dalaala: Bohu–bohulio mongo rasulu; oluolio, mongo nabi, otolulio guguu–ruwaalo, lapataó timongolio tamohutu totoonulalo u moólinggolabu, lapataó timongolio tailohia ponu u mopoóluli tau, meaalo u motulungi taawewo, meaalo u motitaúwa, meaalo u mobisala wolo bahasa hidala–dalaala u moólinggolabe.

²⁹ Timongolio diila ngoáamilalo rasulu, meaalo nabi, meaalo guru. Diila ngoáamilalo okawasa u mohutu u moólinggolabe,

³⁰ meaalo u mopoóluli tau, meaalo u mobisala wolo bahasa hidala–dalaala u moólinggolabe, meaalo motohuwale babaa–hasawaalo boito.

³¹ Sababu uito, mamusi timongoli motolopani otu–otutuulo maó u moótoduo mai popoo–nuwaalo ulebe polohuna daá. Bo wumbutio mola botie watia mopo tuhata mai ode limongoli dalalo ulaba–labaalo mopiohu.

13 ¹ Eleponu watia mowali mobisala wolo bahasa lomanusia u hidala–dalaala, tumbaó wolo bahasa lo malaíkati wambaío, bo watia diila motoliángo taawewo, yi loíya lowatia boito bo tingohe u moóohuú diila oboliilio.

² Eleponu watia motota mopo tunggulo habari monto Allahu Taáala, wau mongalati ngoáamila suáli u modelo–delomolo maó, wau motota totoonulalo u hitua–tuawua wau palacaya daá to Allahu Taáala tilinggula mowali mohutu huíde molimbata, bo watia diila motoliángo tau–tauwalo wewo, yi watia diila oboliilio wolo–wolo!

³ Eleponu ngoáamila u mililiki lowatia, posadakalo ode tamosikini, wau watia mohudu maó batanga u pobuolio, bo

watia diila motoliángo tau–tauwalo wewo, yi ngoáamilalo boito diila ohunalio sama–samaata.

⁴Taa u motoliángo tau–tauwalo wewo, sabali wau mopiohe hale. Tio diila lepalepata loú mohiihia, diila moloíya ulatabu, diila sombongi.

⁵Tio diila batingga, diila bangganga, tio diila momakusa taawewo moduduá u otohilaalio lohihilao, diila olo huáa mopalato hilao, wau diila moniyati.

⁶Taa u motoliángo tau–tauwalo wewo, diila sanangi loú moleeto, tio bo sanangi loú mopiohu.

⁷Tio tatapu owowoluwoalio motaalua wolo totoonulalo u hitua–tuawua wau motohilaa palacaya toú wolo ulebe mopiohe daá uwoluo totimiídu tau; todelomo owowoluwoa u penu boli woloolo mola olo taa u motoliángo boito diila peéenta maó oolia lo halapanilio wau sabali mohima totoonulalo u hitua–tuawua.

⁸Diila peéenta maó mawoluo saaáti toútoonu tau diila palalu mototoo–liángo. Masaatia botie woluo taa u motota mopo tunggulo habari monto Allahu Taáala, bo tio de mamó huheli mopo tunggulo

habari boito. Masaatia woluo tamotota mobisala todelomo bahasa hidala-dalaala u moólinggolabe, bo de tio mamó huheli mobisala todelomo babaa-hasawaalo boito. Masaatia woluo taa u motota loú dadaata suáli, bo de wolo u otaawa limongolio boito malipatolio.

⁹Sababu, pongototanto wau omambowanto u mopo tunggulo habari monto Allahu Taáala, debo diipo boti molimomoto ngoáamilalo.

¹⁰De mamei dungga wakutuulio Allahu Taáala mohutu mai ngoáamilalo molimomoto ngoáamilalo, wau udiila molimomoto boito mamooli.

¹¹Toú watia donggo taúkikiiái, watia mobisala debo odelo taúkikiió, watia opongolaasa debo odelo taúkikiió wau watia opikiilangi debo odelo taúkikió. Bo botia watia mailudaá, pñiili lowatia udonggo kikiiái matilapi lowatia.

¹²Wolo u oontonganto masaatia botie yito debo odelo wolilu u modiólomo toinggilua. Bo ito de mahuáa moóonto loú mopatato. Botia diipo otaawa lowatia totoonulalo u hitua-tuawua, bo de maótaawa maó lowatia totoonulalo u hitua-tuawua tutuuwauwa debo odelo

Allahu Taáala motota totoonulalo u hitua–tuawua tomimbihu batanga lowatia.

¹³ Oditolio, tosaaáti botie woluo tolo suáli u debo musi pohutuwonto; palacaya, mohalapu wau mototoo–líango. Ulebe polohuna daá loú toto–totolulo boito yito motoliángo tau–tauwalo wewo.

14 ¹ Mamusi timongoli motolopani u motoliángo tau–tauwalo wewo. Wau potolo panilo olo u mololimo popoo–nuwaalo uilohi mai lo Rohullah, lebe–lebe maó tutu omambo u mopo tunggulo lalaa–njanawalo Allahu Taáala tomanusia.

² Taa u mobisala todelomo bahasa u moólinggolabe, tau boito diila mobisala tomanusia; tio mobisala to Allahu Taáala. Diaaluo taa mongalati wolo u yiloíyaalio, sababu Rohullah tamoó sababu olio moloíya susuu–aliyaalo u bo otaawa lo Allahu Taáala.

³ Boliío maó taa umopo tunggulo habari monto Allahu Taáala, mopo tunggulaó ode manusia; u mopoó lotolo olimongolio, u mongohi sumangati olimongolio wau u moliyango olimongolio.

⁴ Taa u mobisala todelomo bahasa u moólinggolabe bo mopoó lotolo

batangalio lohihilao wambaó, hiambola taa umopo tunggulo habari monto Allahu Taáala momantu jamaá mowali molaió.

⁵ Donggo boli pihio wonu Wutato ngoáamila mowali mobisala wolo bahasa hidala–dalaala u moólinggolabe. Bo ulebe mopiohe daá yito wonu Wutato mowali mopohabari lalaa–njanawalo Allahu Taáala. Sababu taa umopo tunggulo habari monto Allahu Taáala, lebe udaá maó wolo taa u mobisala todelomo bahasa hidala–dalaala u moólinggolabe; wewo suáliilio wonu taa mobisala todelomo bahasa hidala–dalaala u moólinggolabe boito moó tombangaó wolo u yilóiyaalio boito, alihu ngoáamila jamaá moótapu hunalio.

⁶ Wonu watia humayaalio monaó mai ode limongoli wau watia mobisala todelomo bahasa hidala–dalaala u moólinggolabe, wolo hunalio uito ode limongoli? Diaalo hunalio penu boli ngoídi maó! Wewo suáliilio, wonu watia mopo@ilaalo mai tuwaulio lo poloíya monto Allahu Taáala, meaalo watia motombanga hitua–tuawua pasali lo Allahu Taáala, meaalo watia mopo tunggulo habari monto Allahu Taáala, meaalo watia mongaajali.

⁷ Pakaa-kasiyaalo musiki udiila onyawa penu boli ngoídi maó, debo odelo humayaalio tulali wau kocapi, wonu nada-nadalio diila poitohulo loú mopatato, woloolo mola otaawa lotau lahu wolo u piloitochio?

⁸ Tuwaulio lo obaaya uwewo poli; wonu torompeti potingohulo wolo majanunu, tatoonu tamamo tidapato u mopaatea?

⁹ Odito olo loú omambowa limongoli u mobisala wolo bahasa hidala-dalaala u moólinggolabe. Wonu wutato loú omambowa boito molapali tataa-heyalo udiila mopatato, diaaluo penu boli ngotaa maó tamowali mongalati wolo uiloíya lo Wutato. Totoonulalo loíyamu boito mamooli diila ota-otaa maó.

¹⁰ Todunia botie woluo odito daatalio lobahasa, bo diaaluo maó penu boli tuwau monto babaa-hasawaalo boito udiila oboliilio.

¹¹ Bo wonu watia diila mongalati bahasa uiloíya lotaa hingota-ngotaawa, yi taa u lomake bahasa boito debo odelo tau deli to olaatia; odito olo watia to olio.

¹² Tomimbihu olimongoli lohihilao, otaawa lowatia timongoli motohilaa daá moótoduo mai popoo-nuwaalo

monto Rohullah. Bo lebe polohuna daá, mamusi timongoli motolopani u momake omambowa boito momantu jamaá mowali molaió.

¹³ Uito sababuulio taa umobisala todelomo bahasa u moólinggolabe, mamusi momolohone monto Allahu Taáala alihu Tio pomamboó-Lio mai olo u motombangaó wolo u yiloíyaalio boito.

¹⁴ Sababu wonu watia moduá wolo bahasa u moólinggolabe, roroo-huwaalo memangi moduá, bo pikiilangi lowatia diila mokalaja.

¹⁵ Oditolio, wolo umusi pohutuo lowatia? Utie u mapohutuo lowatia: Watia mamoduá wolo rohu lowatia, bo watia mamoduá olo wolo pikiilangi lowatia. Watia mamopolahu mola wolo rohu lowatia, bo watia olo ohilaa mopolahu mola wolo pikiilangi lowatia.

¹⁶ Sababu wonu Wutato molapali mola oduólo ode Allahu Taáala wolo rohumu wambaó, wau woluo taawewo tadiila mongalati lo bahasa moólinggolabe u monto Rohullah boito, yi tau boito diila mowali molóíya, "Watia akolo" todú lo sukurumu boito; sababu diila otaawalio wolo uiloíya lo Wutato.

¹⁷ Eleponu duá sukuru lo Wutato ode Eeya boito mopiohe daá, bo duá boito diila ohunalio sama-samaata ode taawewo.

¹⁸ Watia mosukuru mola ode Allahu Taáala sababu watia lohihilao mowali mobisala todelomo bahasa hidala-dalaala u moólinggolabe mongilaboto lo Wutato ngoáamila.

¹⁹ Bo, todelomo totoonulalo dudunggaya u molubo to Eeya, watia lebe motohilaa momake limo lotahe umowali pahamua lotau loú momake hilihu-lihua tahe todelomo bahasa u moólinggolabe. Watia lebe motohilaa odito alihu watia mowali mongaajali tau.

²⁰ Mongo wutato! Diila maó pomikiilangi odelo taúkekeí. Todelomo suáli u moleeto, mamusi timongoli tatapu debo odelo taúkikiió. Bo todelomo pikiilangi, mamusi timongoli debo odelo taa u maleídaá.

²¹ Todelomo Kitabi tulatulade odie, "Eeya lotahuda, 'Loú motimbuludei totau-tauwala tahipo bisalawa wolo bahasa wewo wolo uwewolio, Waú mamotahuda mai to umati botie. Tumbaó wolo motimbulude totau-tauwalo tahi deelia, Waú mamotahuda mai to umati-Ú;

boli odito, timongolio diila mohuto modungohe tahuda-Ú."

²² Oditolio ponu u mobisala wolo bahasa hidala-dalaala u moólinggolabe yito odelo tuoto ode taa u diila palacaya, diila ode taa u palacaya. Wau ponu u mopoótaa lanjana lo Allahu Taáala tomanusia yito tuoto ode taa palacaya, diila ode taa diila palacaya.

²³ Sababu uito, wonu humayaalio todelomo dudunggaya lojamaá, ngoáamila jamaá mobisala todelomo bahasa hidala-dalaala u moólinggolabe, lapataó monaó mai dengolo lota tauo bulemengio, meaalo tau-tauwalo tadiila Nasara, tantu tau-tauwalo boito mamó lantobu olimongoli mabiliyongo ngoáamilalo!

²⁴ Bo wonu Wutato ngoáamilalo mopo tunggulo habari monto Allahu Taáala, lapataó monaó mai ngotaalio tadiila Nasara meaalo ngotaalio lo bulemengio, yi susuu-aliyaalo u pohabario lo Wutato ngoáamilalo mamó potuhata duduu-sawaalo tau boito wau mohutu olio mamongalati to duduu-saalio.

²⁵ Susuu-aliyaalo u tuutuó todelomo hilaalio mapo ilaalolo, tilinggula tio mamó tidupapa batanga lapataó molubo Allahu Taáala. Tio mamongaku deú Allahu

Taáala otu–otutuulo maó woluo tohuungi mongoli.

²⁶ Oditolio, Mongo wutato, wolo boliilio u ngoáamilalo boito? Wonu timongoli moámbuwa u molubo Eeya, woluo tamo polahu, woluo tamo ngaajali, woluo tamo poótaa hitua–tuawua monto Allahu Taáala, woluo tamo bisala todelomo bahasa u moólinggolabe, wau woluo tamo tombango wolo u yiloíyaalio boito. Bo ngoáamilalo boito mamusi pohutuwola u mongaajali wau u opopiohu ngoáamilalo.

²⁷ Wonu woluo taóhilaa mobisala todelomo bahasa u moólinggolabe, mamusi duulota meaalo odaatalio toulota wambaó u bubuulota mobisala. Wau musi woluo tamopoó patataó wolo uiloíya lotaa hemo bisala boito.

²⁸ Wonu diaaluo tamowali mopoó patataó, yi tau–tauwalo tahipo bisalawa todelomo bahasa u moólinggolabe boito musi motipoóyo todelomo dudunggaya boito. Huliilo maó timongolio mobisala bo todelomo hilaa wambaó ode Allahu Taáala.

²⁹ Duulota meaalo toulota taóhabari monto Allahu Taáala mamusi mopo tunggulo habari boito tou taawewo

donggo hemo mikiilangi mola mopio–mopiohulo ma@o u molanto wolo uiloíya boito.

³⁰ Bo wonu humayaalio habari monto Allahu Taáala meidungga to ngotaalio wewo tahulo–huloáa to dudunggayá boito, yi taa donggo hemobisala, musi mohuheli.

³¹ Wolo dudelo u odito, Mongo wutato ngoáamilalo, ngota–ngota, mowali mopo tunggulo habari monto Allahu Taáala; alihu ngoáamilalo mowali mololimo pongaajali wau mowali helebe palacaya maó.

³² Ponu monto Rohu u mopo tunggulo habari monto Allahu Taáala mowali podulungo lotaa mopo tunggulo habari boito.

³³ Allahu Taáala yito Allahu Taáala tamo tohilaa loú talatibu; Tio diila Allahu Taáala tamo tohilaa u mopuyoóto. Debo odelo upohu–pohutu todelomo ngoáamila jamaá lo Allahu Taáala,

³⁴ mongobua musi motipoóyo to dudunggayá lojamaá. Timongolio diila luasialio mobisala. Timongolio diila mowali modihu taúwa; uito motuuúde wolo butoó lo agama.

³⁵ Wonu timongolio ohilaa motota ma@o hitua–tuawua, timongolio musu mohintu uito todile limongolio tobele. Moóolito daá wonu taabua ngota mobisala todelomo dudunggaya lojamaá.

³⁶ Wolo tahuda lo Allahu Taáala meidungga mai monto olimongoli? Meaalo bo de olemu wambaó tahuda boito pilopo tunggulo?

³⁷ Wonu woluo tamolaasa oponu umopo tunggulo habari monto Allahu Taáala, meaalo tio oponu uwewolio monto Rohullah, tau boito musu mongalati deú wolo u tiluladei lowatia botie yito palenta lonto Eeya.

³⁸ Bo wonu woluo tadiila mololimo utie, diila maó poótuota tio.

³⁹ Masababu uito, Mongo wutato, potolo panilo u mopo tunggulo habari monto Allahu Taáala, bo diila maó podini taa motohilaa mobisala todelomo bahasa hidala–dalaala u moólinggolabe.

⁴⁰ Bo ngoáamilalo musu pohutuwola wolo mopiohu wau aáatulu.

15 ¹ Wau botia, Mongo wutato, otohilaa lowatia timongoli mamuli moéela mola Habari Mopiohe monto Allahu Taáala upilo habari lowatia muloololio mai

olimongoli. Timongoli lololimo uito, wau palacaya li Almasi sababu Habari Mopiohe boito.

² Wonu timongoli motidihima tutu tou wolo upilo habari mai lowatia boito, yi Habari Mopiohe boito mopoáahu olimongoli; ngopohia wonu Wutato palacaya bo diila ohuhama.

³ Wolo upilo tunggulai lowatia ode Mongo wutato yito u matilolimo mai lowatia olo. U lebe polohuna daá, debo odelo u tulatulade todelomo Kitabi, watia mopo tunggulai ode limongoli deú ti Almasi yilate sababu totoonulalo dusanto;

⁴ deú Tio yilobungio, bo lapataó luli pilopo tumu-Lio mai todulahee otolulio. Uito olo tulatulade todelomo Kitabi.

⁵ Watia mopoótaa mai olo olimongoli deú ti Almasi taluli pilopo tumu-Lio mai boito lopobilohe batanga-Lio olo odelei Petrus, wau lapataó to tamopulaa duulota rasulu.

⁶ Lapataó uito Tio lopobilohe batanga poli totaa lebe lou limo lohetuto lota tahiduduá o-Lio peéntalo maó. Odaata limongolio boito masaatia donggo hitumula, bo dengolo lota mailate.

⁷ Lapataó uito ti Almasi lopobilohe batanga-Lio olo odelei Yakobus lapataó to ngoáamila rasulu.

⁸ Pulitio daá Tio lopobilohei batanga-Lio to olaatia olo -- watia tadebo odelo taúnge u pilotutulio diila to wakutuulio!

⁹ Watia yito rasulu lo Eeya tadupa-dupapa daá. Watia diila paatuti unteelo rasulu, sababu watia malo ngalinaya jamaá lo Allahu Taáala.

¹⁰ Bo sababu odehu hilao lo Allahu Taáala watia lowali debo odelo owowoluwoa lowatia botia. Wau diila paracuma Allahu Taáala longambungu mai olaatia. Boli tumbaó wawaa-tiyalo tahelo kalaja lebe tióopatea wolo ngoáamila rasulu wewolio. Bo uito otutuulio maó diila tolopani lowatia; uito tolopani lo Allahu Taáala talomonu mai olaatia wau talo kalaja peé-peéenta wolaatia.

¹¹ Oditolio, penu boli monto olita timongoli mololimo Habari Mopiohe boito -- wolo uito monto olaatia meaalo monto mongo rasulu wewo -- uito diila mowali suáli. U polohuna daá yito amiaatia mopohabari Habari Mopiohe boito wau Wutato palacaya.

¹² Wonu upilo habari mai lamiaatia boito yito ti Almasi maluli pilopo tumu-Lio mai lonto opopate, yilongola woluo to wolotamu tahi polo'iyawa deú taamate diilalo potumulo-Lio mai?

¹³ Wonu otutu taamate diilalo potumulo-Lio, uito boliilio ti Almasi olo diilalo pilopo tumu-Lio mai lonto opopate.

¹⁴ Wau wonu humayaalio ti Almasi diilalo pilopo tumu-Lio lonto opopate, yi diaaluo hunalio amiaatia mopohabari lolo-lolo wau diaaluo hunalio olo timongoli palacaya, sababu opopalacaya limongoli boito diila opatoáa wolo-wolo.

¹⁵ Lebe maó leeto, malo ilaalo deú amiaatia lohimbulo tomimbihu Allahu Taáala, sababu amiaatia helo pohabari deú Allahu Taáala maluli lopo tumulai li Almasi lonto opopate, lebe-lebe pomaó Allahu Taáala diilalo lopo tumulai o-Lio wonu memangi otutu tamailate diilalo pilopo tumu-Lio mai.

¹⁶ Sababu wonu taamate diilalo pilopo tumu-Lio mai, yi ti Almasi olo diilalo pilopo tumu-Lio mai lonto opopate.

¹⁷ Wau wonu ti Almasi diilalo pilopo tumu-Lio mai yi opopalacaya limongoli bo wambaó tohiilopo; uito boliilio timongoli

donggo todelomo owowoluwoa lodusa wau diila ohalaapani sama–samaata.

¹⁸Uito boliilio olo deú tau–tauwalo Nasara tamailate, olo diila ohalaapani.

¹⁹Wonu halaapaninto toli Almasi ponto–pontolo to tutumulonto todelomo dunia botie wambaó, yi to ngoilanggubu umati lomanusia todelomo dunia botie, ito–itolo talaba–labaalo nahati!

²⁰Bo malo papatai ti Almasi maluli pilopo tumu–Lio mai lonto opopate. Utieelo batululio deú tau–tauwalo tamailate mamuli potumulo–Lio mai.

²¹Sababu opopate tilumuwoto ode delomo dunia lotimbulude totaa ngota, odito olo muli tumumulai monto opopate yilohi–Lio mai tomanusia lotimbulude totaa ngota olo.

²²Debo odelo ngoáamila manusia mate sababu leituwoto tuwau wolei Adamu, odito olo ngoáamila mapo tumulo–Lio mai sababu leituwoto tuwau woli Almasi.

²³Bo ngota–ngota mapo tumulo–Lio mai moduduá tayadio; bohu–bohulio ti Almasi; lapataó de toú Tio muli meidungga mai, tayadio lotau–tauwalo tahi tuwota miliki li Almasi.

²⁴ Lapataó uito mamotoduo mai kiama. Tou boito ti Almasi mamopo taáluku ngoáamila pamalenta, ngoáamila okokawasa wau ngoáamila olootolo; lapataó Tio mamohudu okokawasa–Lio odelo Olongia, to Allahu Taáala, ti Paapanto.

²⁵ Ti Almasi musi tulusi momalenta dilumutu Allahu Taáala mohutu mai ngoáamila musu li Almasi taáluku toli Almasi.

²⁶ Musu u pulitio umapo taálukuo–Lio yito opopate.

²⁷ Todelomo Kitabi tulatulade odie, "Allahu Taáala malohutu mai totoonulalo u hitua–tuawua taáluku to o–Lio." Malo patatai deú u pilatuju lou "totoonulalo u hitua–tuawua" uito diila leituwoto Allahu Taáala lohihilao, tamohutu totoonulalo u hitua–tuawua boito taáluku toli Almasi.

²⁸ Bo lapataó ngoáamilalo pilo taáluku–Lio to walungo palenta li Almasi, yi Tio lohihilao, deúito–yito Walaó Allahu Taáala, mamopo taáluku batanga–Lio to Allahu Taáala tamalo powali mai totoonulalo hitua–tuawua taáluku to o–Lio. Yi Allahu Taáala lohihilao olo mamomalenta ngoáamilalo.

²⁹ Wonu taamate diilalo pilopo tumu–Lio mai, yilongola woluo tailihua duólo taamate? Pongoola timongolio mohutu maó suáli boito? Wonu memangi taamate sama–samaata diilalo pilopo tumu–Lio mai, pongoola timongolio mohutu maó suáli boito?

³⁰ Wau pongoola olo amiaatia ohilaa motaalua wolo umoó topotala timiídu saaáti?

³¹ Mongo wutato! Timiídu dulahu watia sabali hemo dutolo sababu watia meengahe to tutumuli mongoli sababu timongoli máilo iimani toli Almasi, Eeyanto.

³² Wonu uito bo monto bibilohu lomanusia wambaó, wolo pa@eedalio olaatia u mohipate debo odelo moluwali bibii–natangiyalo mongantau tokota botie, to Epesus? Wonu memangi taamate diilalo pilopo tumu–Lio mai, lebe mopiohe ito moduduá pohumaya botie: "Dulo ito molamela mongilu wau motisana–sanangi, sababu loombu ito debo maamate."

³³ Diila bolo o wimbuloalio! Oáawota u mobulilo mopolusa pīli u mopiohe.

³⁴ Pongalatilo botia, wau diilalo pohutu dusa. Patutilio timongoli musi moolito,

deú towolota limongoli woluo tadiipo motota lo Allahu Taáala.

³⁵ Tanu woluo tamohintu, "Woloolo mola taamate muli potumulo–Lio mai? Batanga u woloolo mola uwahi ode limongolio, tou timongolio muli potumulo–Lio mai?"

³⁶ Mohulode daá! Wonu Wutato mopomulo bili todelomo huta, bili boito diila tamobutu, wonu bili boito diipo mateepo.

³⁷ Wau bili upomulo lo Wutato todelomo huta boito -- tanu bili lopale meaalo bili wewolio -- deúito–yito botu lobili boito wambaó, diila ngoáamila pilomulolio u de mamobutu mai.

³⁸ Allahu Taáala lohihilao tamamongohi mai tobili boito moodeli u moduduá to pomilo–Hio mopiohu ode pilomulo boito. Ode timiídu bili ngodalaala, Allahu Taáala mongohi mai moodeli to pilomulo–Lio wiwi–wiwi.

³⁹ Batanga lo mamaa–halukuwalo u onyawa diila ngoáamilalo tutuwauwa. Manusia obatanga ngodalaala, bibinaa–tangiyalo obatanga ngodalaala uwewo; bubuu–lungiyalo obatanga ngodalaala uwewo, wau totoolawalo olo tingga ngodalaala poli batangalio.

⁴⁰ Odito olo wolo totoonulalo upango u tohulungo wau totoonulalo upango todunia. Timiïdu upango u tohulungo tinggai woluo ogaagalio lohihilao, wau totoonulalo upango utodunia odito olo.

⁴¹ Ogaaga lodulahu wewo wolo ogaga lohulalo. Popoo–liyamalo olo tinggai woluo ogaagalio. Tumbaó timiïdu Popoo–liyamalo boito tinggai hiwewo–wewoa olo ogaagalio.

⁴² Odito olo de suáliilio wolo tau–tauwalo tamaate u muli potumulo–Lio mai. Batanga u yilobungo boito yito batanga u mowali mohutodu, bo batanga umuli potumulo–Lio mai yito batanga udiila mowali moluusa.

⁴³ Toú batanga boito yilobungo, batanga boito mobulilo wau molulupuhu; bo toú tio muli potumulo–Lio mai, tio yito batanga u mopiohu wau molotolo.

⁴⁴ Toú lobungolo, batanga boito batanga monto dunia; bo toú muli potumulo–Lio mai, yi batanga boito batanga uilohi lo Rohullah. Woluo botanga u monto dunia, woluo olo batanga u monto Allahu Taáala.

⁴⁵ Todelomo Kitabi tulatulade odie, "Manusia tabohulio, yito tei Adamu, lowali

mahaluku tatumu–tumulo," bo tei Adamu tapulitio yito Rohu u mongohi tutumulo.

⁴⁶ U meidungga mai meimulo yito upanaa, diila u rohu. U rohu meidungga meiwooli.

⁴⁷ Tei Adamu tabohulio pilowali mai monto huta, bo tei Adamu oluolio asaliilio mai monto sologa.

⁴⁸ Tau–tauwalo dunia botie yito debo odelo tei Adamu bohulio, pilowali mai monto huta, bo tau–tauwalo sologa yito debo odelo Tio tamei dungga mai monto sologa.

⁴⁹ Odelo woloolo mola ito botia yito debo odelo tei Adamu tapilowali mai monto huta, yi de ito mamowali odelo Tio tamonto sologa boito.

⁵⁰ Makusudu lowatia, Mongo wutato, deúito–yito: batanga upilowali mai monto duhu wau tapu, diila mowali tumuwoto ode Dunia Bohu lo Allahu Taáala; wau batanga umowali mate diila mowali bakaa.

⁵¹ Poótuota maó hitua–hituawua u milakusudu botie: Diila ngoáamilalo ito mate, bo ito ngoáamilalo mamobolió.

⁵² Suáli boito debo mamo toduwolo mola loú ngoíntalo mato, toú torompeti potingohulo u mapulitio. Sababu toú

moó dungohe tingohu torompeti boito, tau-tauwalo tahe lopunungo mamuli potumulo–Lio mai wolo batanga ubakaa, wau ito ngoáamilalo mabolió–Lio.

⁵³ Batanganto u mowali mate botie musu tuloáalo wolo batanga udiilalo mate, wau batanga u monto dunia musu tuloáalo wolo batanga u monto sologa.

⁵⁴ Wonu batanga u mowali mate matiluloá wolo batanga udiilalo mate, wau batanga u monto dunia matiluloá wolo batanga ulonto sologa, toú boito bolo motoduwolo mai wolo u tulatulade todelomo Kitabi, "Opopate mapilopo diaaluo; ohohaama máilo dungga!"

⁵⁵ "Wuu mautu, toútoonu ohohaamamu? Wuu mautu, toútoonu bisaamu?"

⁵⁶ Bisa lomautu yito dusa, wau dusa loponaó duludelio lotimbulude tobutoó lo agama.

⁵⁷ Bo sukuru to Allahu Taáala; Tio longohi mai olanto ohohaama lotimbulude li Isa Almasi Eeyanto!

⁵⁸ Masababu uito, Mongo wutato taa otoliánguú, mamusi timongoli molotolo wau diila moétu. Pokalajalo tulusi ode Eeya loú otu–otutuulo maó, sababu

otaawa limongoli deú ngoáamila u kalajaa limongoli ode Eeya, ohunaliao.

16¹ Botia tomimbihu doi u otohilaa posadaka limongoli ode timongota taulo Nasara, poáhu mai lowatia alihu pohutua maó limongoli motuuúde wolo potuhata uilohi mai laatia to jajaamaáalo to Galatia.

² Todulahee bohulio timiíidu ahadi, mamusi Wutato ngoáamilalo mopohetu maó doi, ngota-ngota motuuúde wolo tilapulio. Tahua maó doi boito dilumutu watia monaó mai, alihu towakutu boito diilalo palalu yimoóolo.

³ De wonu watia meidungga mai, watia mamolao tau-tauwalo tamaa ilakoloa limongoli. Watia mamongohi olimongolio tulade podepito, alihu timongolio modelo mola doi losadaka boito ode Yerusalemu.

⁴ Wau wonu to pomilohio mopiohe deú watia monaó olo woli mongolio, yi watia mamonaó peé-peéenta woli mongolio.

⁵ Watia mamomilohe olimongoli lapataó mohepitopo to Makedonia, sababu watia oniyati u molinto mola.

⁶ Mowaliilio watia mamo tibiluloá ngopeé mola woli mongoli, tanu ngotilonggadu sembo lopolo huhulo. Lapataó uito

timongoli mowali momantu olaatia mopo tolonga mola lononaó lowatia ode tambati u wumbutio mola.

⁷ Watia diila mohuto mai momilohe olimongoli bo mohepito wambaó. Wonu poluasias lo Eeya, watia ohilaa motibiluloá mohiheo ngopeé woli mongoli.

⁸ Tou odito watia mamotibiluloá tokota botie, to Epesus, dilumutu dulahe Pentakosta.

⁹ Ohiyangio dadaata tewe ode totoonulalo kalaja u ohuna, eleponu dadaata olo taa u motehengi.

¹⁰ Wonu tei Timotius monaó mai, tolimoa maó tio lou mopiohu alihu tio molaasa sanangi towolota limongoli, sababu tio olo debo odelo watia hemokalaja ode Eeya.

¹¹ Diila bolo wولو tadiila momandungi olio. Bantui maó tio alihu tio mowali mopo tolonga mola lononaólio muli mohualingai ode laatia wolo moáahu, sababu watia mohima nonaólio mai peé-peéenta wolo mongo wutato wewolio.

¹² Pasali lo wutatonto tei Apolos, mapoó-poóngoolo watia helo poáhu olio alihu tio peé-peéenta wolo wutato tawewolio monaó mola momilohe olimongoli. Bo tio diipo molaasa yakini deú tio musi monaó

botia. Bo wonu de ohiyangio, tantu tio mamonaó mai.

¹³ Mamusi timongoli mopoódaha wau sabali todelomo tutumuli mongoli odelo taulo Nasara. Pokalajalo wolo buheli wau powalilo molotolo.

¹⁴ Ngoáamila u pohutuo limongoli, pohutua maó wolo toliángo.

¹⁵ Tantulo maó otaawa lo Wutato tei Stepanus wau ngaalaálio; timongolio tabohu-bohulio lowali Nasara to Akhaya. Timongolio loú lealeaatu lohilao hemo kalaja tomodu momaya umati lo Allahu Taáala.

¹⁶ Watia mopoáhu mai loú otu-otutuulo maó alihu timongoli moduduá taúwa lotau-tauwalo tadebo odelo uito, wau tau-tauwalo wewo tamo kalaja huhuuyula wau momaya peé-peéenta woli mongolio.

¹⁷ Watia sanangi to podudungga mai lei Stepanus, lei Portunatus wolei Akhaikus. Timongolio debo odelo poluloá olimongoli odelaatia.

¹⁸ Timongolio malohutu hilaa lowatia lowali leengahe, debo odelo timongolio helo poéengahe hilaa limongoli. Tau-tauwalo debo odelo uito wajibu halagaalo.

¹⁹Jajaa–maáalo to Asia lopo tunggulai salamu limongolio toli mongoli. Tei Akwila wolei Priskila wau jamaá tahiámbua tobele limongolio olo lolao salamu Nasara wolo wengahu lohilao.

²⁰Ngoámila wutato teea mopo tunggulai salamu ode limongoli. Posasaa–lamuwalo wolo tataabia daá lohilao odelo wutato Nasara.

²¹Watia moduhengai teea salamu u tiluladu lowatia lohihilao: Salamu lonto olaatia, Paulus.

²²Taa udiila motoliángo to Eeya, huliilo maó tio laálaánati! Maranatha -- Eeya lomongo watotia, podunggalo mai!

²³Pohileaala duá Eeya Isa mobalakati to Wutato.

²⁴Salamu toliángo to Wutato ngoáamilalo talo tituwau woli Isa Almasi. Hulumati lamiaatia, Paulus

2 Korintus

1 ¹ Mongo wutato jamaá lo Allahu Taáala to Korintus wau ngoáamila umati lo Allahu Taáala to ngoilanggubu Akhaya. Watia, Paulus, rasulu li Almasi, tapiludu-‘lo to kahandaki lo Allahu Taáala peé-peéenta wolo wutatonto Timotius,

² mohalapu hinta Allahu Taáala ti Paapanto wau Eeya Isa Almasi mongohi mai balakati wau salaamati ode limongoli.

³ Ilopujiaalo mola Allahu Taáala, ti Paapa lo Eeyanto Isa Almasi. Tio ti Paapa talaba-labaalo ohilaa mopiohu, wau Tio Allahu Taáala talongohi olootolo hilaa tomanusia.

⁴ Tio helo poólotolo hilaa lamiaatia totimiídu odungga loú suukali, u ilolaasawa lamiaatia alihu wolo olootolo u tilolimo lamiaatia lonto Allahu Taáala boito, amiaatia olo mowali mopoó lotolo hilaa lotaa ngoáamila todelomo suukali.

⁵ Totoonulalo polodutolo u ilolaasawa li Almasi madilaata ilolaasawa lamiaatia olo. Wau lotimbulude li Almasi olo, hilaa lamiaatia piloóoloto-Lio daá.

⁶ Wonu amiaatia moótoduo usuukali, uito yito u mopoó lotolo hilaa limongoli, domi opoáahu limongoli. Wonu hilaa lamiaatia poó-lotoloolo, yi timongoli olo moduduá poó-lotoloolo tilinggula timongoli moótahangi todelomo susuu-kaliyaalo debo odelo u hedilutola lamiaatia olo.

⁷ Amiaatia laito yakini wau diila peénta maó molingu tomimbihu Wutato, sababu otaawa lamiaatia deú timongoli moduduá modutolo wolamiaatia. Wau sababu uito timongoli olo moduduá poó-lotoloolo peé-peénta wolamiaatia.

⁸ Mongo wutato! Otohilaa lamiaatia otaawa limongoli pasali loú suukali u ilolaasawa lamiaatia tomadala lo Asia. polodutolo u bilanta lamiaatia boito malo odito buhetio helodeehe olamiaatia, tilinggula amiaatia diilalo ohalapani tumumulo;

⁹ Iasaalio debo odelo madilehua hukumani mate wambaío. Bo suáli boito lotoduo alihu amiaatia diila tamo tiwunela to olootolo batanga lohihilao, boto Allahu Taáala tamopo tumulai taamate.

¹⁰ Tiolo tamalo poáahu mai olamiaatia lonto baala opopate u moóti hela hapato boito. Wau Tiolo olo tamamo poáahu mai

olamiaatia de todulahee momooli, sababu to Oliolo amiaatia hemo tiwunelo.

¹¹ Amiaatia yakini deú wolo duduu-aawalo limongoli olamiaatia, Allahu Taáala mamuli mopoáahu mai olamiaatia monto baala. Allahu Taáala lotuhatawa lotalakati mai olamiaatia odelo totameta toú dadaata duá ode lamiaatia, wau sababu uito dadaata tamamo lapali mola sukuru ode Allahu Taáala.

¹² Amiaatia meengahe, sababu hilaa lamiaatia helo poyakini olamiaatia deú tutumulo lamiaatia todunia botie -- lebe-lebe maó wumbuta lamiaatia wolo Wutato -- mapilo ponaó lamiaatia wolo ihilasi wau hilaa belesi. Hepilohutu lamiaatia uito, diila wolo tinepo lomanusia, bo wolo omambo uilohi mai lo Allahu Taáala.

¹³ U tiluladei lamiaatia olimongoli yito bo tomimbihu susuu-aliyaalo u mowali pobaca wau opahaamua limongoli. Botia timongoli diila mongalati olamiaatia wolo lea-leaatulo maó, bo watia mohalapu de timongoli mamongalati otu-otutuulo maó olamiaatia. Lou odito, toú ti Isa Eeya demei dungga mai, timongoli mameengahu to olamiaatia, odelo woloolo mola olo amiaatia meengahe toli mongoli.

¹⁴(1:13)

¹⁵Sababu oyaakini boitolo yi watia tou bohulio olanjana u mobiilohe woli mongoli alihu timongoli moótodo mai balakati poóluo piúwa.

¹⁶Watia omakusudu mobiilohe woli mongoli todelomo nonaó lowatia ode Mekedonia wau muli mohepitaó olimongoli todelomo wuwalingai lowatia, alihu timongoli mowali momantu olaatia mopo tolonga mola lononaó ode Yudea.

¹⁷Bo watia malomolió niyati lowatia boito; naa, wolo uito mopobilohe deú huhama lowatia diila motoheeto? Tou mohutu lanjana, wolo watia mohutu lanjana moduduá u otohilaa lowatia lohihilao, u ngopeé mola moloíya, "Joo" wau ngopeé mola, "Diila"?

¹⁸Domi Allahu Taáala tamowali palacayalo, danti lowatia to Wutato diila "Joo" wau "Diila".

¹⁹Sababu ti Isa Almasi, Walaó Allahu Taáala, Tapilo habari mai olimongoli lei Silas, Timotius, wau laatia lohihilao diila tau "Joo" wau "Diila". Boliño maó Tio debo odelo totametai, "Ooó" monto Allahu Taáala.

²⁰ Sababu lotimbuludei o–Lio Allahu Taáala malo tahuda mai "Ooó" ode ngoáamila danti–Lio. Patopatoá leeto boitolo ito moloíya "Amin" to Allahu Taáala sababu ti Isa Almasi. Amiaatia lohutu odito alihu Allahu Taáala polaióolo.

²¹ Allahu Taáala lohihilaolo talo powali mai olamiaatia wau Wutato molotolo motituwau woli Isa Almasi; Tiolo olo talo lulaota olanto tomodu ode batanga–Lio.

²² Woleeto Allahu Taáala malo posaaha mai olanto lowali hakuu–Lio wau Rohu–Lio todelomo hilaanto odelo pongaku deú Tio mamongohi mai olanto ngoáamila upilo danti–Lio.

²³ Allahu Taáala sakusi lowatia -- sababu otaawa–Lio tuango hila lowatia -- deú watia diila lomata lonaó ode Korintus, sababu watia diila mohuto mopo suukali hila limongoli.

²⁴ Watia diila momakusa olimongoli tomimbihu wolo u musi palacaya limongoli, sababu timongoli malo malacaya tióotutua toli Almasi. Watia bo mohuuyula woli mongoli alihu timongoli helebe sanangi tutu.

2 ¹ Masababu uito watia malohutu putuusani u diilalo monaó mai ode

limongoli wolo mobiilohe u bo moósuukali hilaa limongoli.

² Sababu wonu watia moósuukali hilaa limongoli, yi tatoonu poli tamowali moliyanga olaatia, wonu diila tau-tauwala boito olo tamaa pilosuukali lowatia hilaalio?

³ Uito sababuulio watia loluladei tulade boito ode limongoli. Watia diila mohuto mai mobiilohe woli mongoli, lapataó posuukalia limongoli hilaa laatia lebe-lebe pomaó timongolilo tawajibulio mopo wengahe olaatia. Sababu watia yakini deú wonu watia meengahe, yi Wutato ngoáamilalo meengahe olo.

⁴ Watia loluladei olimongoli wolo hilaa u suukali wau mobuheeto wau wolo buyu-buyuhuto ponu dadaata. Makusudu lowatia diila alihu timongoli mowali suukali lohilao, bo alihu timongoli mongalati deú watia laba-labaalo motoliáangi mongoli.

⁵ Wonu woluo taa umoó sababu mowali suukali lohilao, yi suáli boito pilohutulio diila ode laatia, bo ode Wutato ngoáamilalo meaalo ngódilio ode ngotayadio lo Wutato. Watia diila mohuto mohama loú pakusa to olio.

⁶ Ode taa udebo odelo uito, hukuumani u podehuwolo to olio loú odaata towolota lo Wutato, malo tuuheta.

⁷ Botia timongoli musi mongambungu olio wau muli mohuntula olio alihu tio diila botie suukali daá lohilao tunggula yilooli halapani.

⁸ Sababu uito pohile lowatia, alihu timongoli muli mopo biloheó olio deú timongoli tióotutua motoliánga olio.

⁹ Watia loluladei tulade boito ode limongoli wolo makusudu u motesi olimongoli, wolo timongoli laito mohuto moduduá totoonulalo potuhata monto olaatia.

¹⁰ Wonu timongoli mongambungu tamaa ilotala olimongoli yi watia olo mamo ngambungu tau boito. Sababu wolo umaa ilambungu lowatia -- wonu memangi woluo tapalalu ambunguwolo, uito ambunguo maó lowatia totalu li Almasi ode opopiohi mongoli.

¹¹ Pilohutu lowatia uito alihu Ibilisi diila ohiyango u motolo kawasa olanto; sababu otaawanto totoonulalo lanjanalio.

¹² Toú watia leidungga mola to Troas wolo makusudu mola mopohabari Habari

Mopiohe pasali li Almasi, Eeya malomuó dalalo olaatia u lokalaja totambati boito.

¹³ Bo watia diila sanangi sababu diila lodunggaya wolo wutatonto tei Titus mola teto. Yi watia malohintu lohualingo totau-tauwalo totambati boito tulusi lonaó ode Makedonia.

¹⁴ Bo sukuru ode Allahu Taáala! Tio laito hemodelo olamiaatia u loduduá ngopo@ambua tau ohohaama li Almasi sababu amiaatia tumutumula lotituwau wo-Lio. Allahu Taáala lomake olamiaatia alihu habari tomimbihu li Almasi mololadu debo odelo boolo monu u moloópolo mola ode utoonulalo maó.

¹⁵ Sababu amiaatia yito debo odelo boolo alama u monu, u tilumbila li Almasi ode Allahu Taáala. Ode tau-tauwalo tadonggo hidulunga ode obobinasa, amiaatia botie debo odelo boolo opopate u momate mateelo maó; bo ode tau-tauwala tadonggo hepo aahuwolo, amiaatia debo odelo boolo monu u modelo ode tutumulo. Naa, tatoonu tamowali mopoópolu tuugasi botie?

¹⁶ (2:15)

¹⁷ Amiaatia diila debo odelo taa dadaata u hemohutu habari monto Allahu Taáala

debo odelo balangi lo daahangi wambaó. Papaa–tjuwalo lamiaatia yito moolango, sababu amiaatia tilugasia mai lo Allahu Taáala. Wau Allahu Taáala lohihilao loóonto deú amiaatia lopo tunggula habari boito odelo mongo wato li Almasi.

3¹ Wolo utie oontonga maó deú amiaatia debo odelo hemomuji–muji batanga lamiaatia poli? Meaalo mowaliilio amiaatia momalalu tulade poloílaalo momuji ode limongoli, meaalo monto olimongoli, debo odelo upalaluo lotau–tauwalo wewo?

² Wutato lohihilaolo tulade poloílaalo momuji lamiaatia, u leitulade todelomo hilaa lamiaatia wau u mowali otaawa wau pobaca lotimiídu tau.

³ Timongolio lohihilao mowali moóonto deú Wutato debo odelo tulade u tiluladu li Almasi, uilao lotimbulude olamiaatia. Tulade boito tiluladu diila wolo mangiti, bo wolo Rohullah tatumu–tumulo; diila olo toitaato botulei, bo todelomo hilaa lomanusia.

⁴ Amiaatia loloíya odito sababu iimani lamiaatia ode Allahu Taáala lotimbulude li Almasi.

⁵ Amiaatia diila o alasan boli bo tuwau maó u mopobilohé deú amiaatia mambo

mohutu kalaja botie, bo Allahu Taáala talo pomambo olamiaatia.

⁶Tiolo talo pomambo olamiaatia lowali tamomayawa ode tuwaulio lo daantia u bohu; daantia u motiwunela to Rohullah, diila tobutoó u tulatulade. Sababu u tulatulade boito modelo ode mautu, hiambola Rohullah boito mongohi tutumulo.

⁷Toú daantia u modelo ode mautu boito pilohutu wau iluukili tobotu, tinelo Allahu Taáala lotinela loú motilango tutu tobaya lei Musa. Tine-Lio malo odito tilangio tilinggula bangusa lo Isiráilu diila mambo momilohe baya lei Musa, eleponu tinelo tobayalio boito mahelo tambutió toú boito. Naa, wonu pilohutua daantia u modelo ode mautu boito pilosaaha wolo tinelo motilango tutu u odito udaálio,

⁸tantu pilohutua daantia uilohi mai lo Rohullah, pilosaaha lebe loú tinelo motilango tutu poli.

⁹Wonu daantia u mohukuumani mai manusia boito motinelo laba-labaalo mobaango, tantu lebe maó motinelo mobaango tutu poli daantia u mopoówali manusia mopiiohe wolo Allahu Taáala.

¹⁰ Mowali loiyalo deú wolo u muloololio mai motinelo mobaango tutu, madiilalo motinelo mobaango tutu poli sababu otinelo mobaango tutu u masaatia botie.

¹¹ Wonu hitua-tuawua u moó tahangi bo ngopeé mola, odito motinelo mobaango tutu, tantu hitua-tuawua ubakaa lebe maó motinelo mobaango tutu poli.

¹² Masababu amiaatia o halapani debo odelo uito, yi amiaatia buheli mobisala odito.

¹³ Amiaatia diila debo odelo tei Musa talo meleúto bayalio wolo beleúto alihu bangusa lo Isiraílu diila moóonto tinelo Eeya udonggo patepate wau yilooli to bayalio.

¹⁴ Pikiilangi limongolio maloheúto. Wau dilumutu todulahe botie olo pikiilangi limongolio donggo heúheúta wolo beleúto toú timongolio mobaca bubuu-kuwaalo pasali loú daantia u muloolo boito. Beleúto boito bo mowali mohuó wonu tau motituwau woli Almasi.

¹⁵ Penu boli botia olo, wonu timongolio mobaca bubuu-kuwaalo lei Musa, beleúto boito donggo tanggu-tanggu to pikiilangi limongolio.

¹⁶ Bo wonu tahingota–ngotaawa monaó mai motaalua lo Eeya, beleúto boito olo bintaó–Lio mola monto baya lotau boito.

¹⁷ Naa, Eeya tamila–kusudu tewe yito Rohu. Wau touútoonu Rohu lo Eeya woluo, teto olo woluo oloolopato.

¹⁸ Masaatia bayanto ngoáamila diila tilaúbe lo beleúto, wau ito mopo bulilangaó otinelo mobaango tutu li Isa Eeya. Wau masababu uito ito mololaalaaita boliólo mowali debo odelo Tio; lebe hihiiheo maó ito mowali helebe motinelo mobaango tutu. Otinelo mobaango tutu boito monto Rohu, wau Rohu boito yito Eeya.

4 ¹ Amiaatia helo ponaó kalaja botie sababu omuura hilaa lo Allahu Taáala. Uito sababuulio amiaatia diila yooli halapani.

² Amiaatia diila lomake totoonulalo dudelo modiólomo u moóolito. Amiaatia diila mohuto mokalaja wolo dadaata aakali u moleeto meaalo mopo bobooliá tahuda lo Allahu Taáala. Amiaatia hemomaya Allahu Taáala wolo hilaa u malo@otapu tinelo Eeya kahandaki–Lio. Sababu uito, amiaatia mohalapu ngoáamila tau motiliki

olamiaatia lou mopiohe todelomo hilaalio u malo@otapu tinelo Eeya.

³ Wonu Habari Mopiohe u pohabario lamiaatia boito debo donggo woluo olo diipo ilopahamua, yi bo tau-tauwalo tadonggo hiludunga ode obobinasa wambaio tadiila moó pahamu maó.

⁴ Ila moleeto umotolo kawasa dunia botie moheúta pikiilangi lotau-tauwalo tadiila palacaya boito. Tiolo tamo monto-montola olimongolio alihu timongolio diila moóonto tilango monto Habari Mopiohe boito tomimbihu odudaá li Almasi, tadebo odelo bayahu lo Allahu Taáala.

⁵ Habari upilo tunggulai lamiaatia boito diila habari pasali lamiaatia lohihilao. Habari boito yito habari pasali li Isa Almasi; deú Tio yito Eeya; wau amiaatia yito mongo wato limongoli sababu Tio.

⁶ Allahu Taáala talo tahuda, "Mamusi monto delomo diólomo mobutu mai tilango," Allahu Taáala boitolo olo tamo pobutu mai tilango boito todelomo hilaanto, alihu pikiilanginto, mowali mobaangai u momaahamu otinelo mobaango tutu lo Allahu Taáala u tinetinelo tobaya li Almasi.

⁷ Bo halata rohu u gaaga da@a boito dilelo lamiaatia tobatanga lamiaatia udiila ohalaga botie upilohutu lonto huta. Lou odito loilaalo mai deú odudaá lokawasa boito dudutuulio to Allahu Taála wau diila to lamiaatia.

⁸ Amiaatia tiluhulio lonto totoonulalo tutulio, bo amiaatia diila leihupeto. Amiaatia lolingu, bo diila tunggula luwali.

⁹ Dadaata talo luwali olamiaatia, bo diipo peénta maó amiaatia lotibiluloá tutuwau. Wau eleponu amiaatia tingga maito pateelio tunggula modehu, bo amiaatia diila yilate.

¹⁰ Laito amiaatia moólaasa opopate li Isa tobatanga lamiaatia, alihu tutumu-Lio olo mowali mo@ilaalo tobatanga lamiaatia.

¹¹ Ngotilonggadu amiaatia tumutumulo, amiaatia laito heáanjamuo lo opopate sababu ti Isa, alihu lou odito tutumuli Isa olo mowali poilaaloolo tobatanga lamiaatia upanaa botie.

¹² Utie boliilio deú todelomo batanga lamiaatia opopate donggo moólohu moponaó lo duludelio, bo amiaatia meengahe deú tutumuloolo udonggo moóloohu todelomo batanga limongoli.

¹³ Todelomo Kitabi woluo loíya utie, "Watia palacaya, uito sababuulio watia lobisala," Naa, wolo sumangati palacaya udebo odelo uito olo, amiaatia helo bisala sababu amiaatia palacaya.

¹⁴ Amiaatia yakini deú Allahu Taáala tamaaluli lopotumulai li Isa Eeya, mamopo tumulai olamiaatia olo woli Isa, wau modelo olimongoli wau olamiaatia ode talu–Lio.

¹⁵ Ngoáamilalo boito yito ode polohuna daá olimongoli. Sababu helebe dadaata mola tamoólaasa ponu lo Allahu Taáala, helebe dadaata mola olo duá sukuru u potunggulolo ode Allahu Taáala; loú odito Allahu Taáala polai@oolo.

¹⁶ Uitolo sababuulio amiaatia diila lotombodu. Eleponu amiaatia debo odelo sipati lobatanga he oduhenga mola lusaalio, bo debo odelo sipati lorohu amiaatia pilowali mai bohu timíidu dulahu.

¹⁷ Wau osuusa udiila de mangolo botie, u ilolaasawa lamiaatia u donggo pohanu–pohutu, mamongohi mai tilapulo olamiaatia tuwaulio osanangi tutu upolu–polutu@o wau bakaa. Osanangi tutu boito lebe udaá maó wonu pobandingio mola wolo osuusa boito lohihilao.

¹⁸ Sababu amiaatia diila mopoótuoto suáli u oóonto, bo tumbaó udiila oóonto. U oóonto bo moó tahangi ngopeé mola, bo udiila oóonto boito ohiheo–hiheolo maó ohiheo–hiheolo maó.

5 ¹ Sababu otaawa lamiaatia deú wonu bele -- deúito–yito batanga -- u biluloáanto todunia botie onggalolio, Allahu Taáala mamopohetu olanto bele ngowale tosologa, upilohutu lo Allahu Taáala lohihilao wau moó tahangi ohiheo–hiheolo maó.

² Todelomo bele u masaatia botie, ito mopoílaali suusa sababu ito moloolo daá motibiluloá todelomo belento u tosologa boito.

³ Bele boitolo batanganto u bohu.

⁴ Ngotilonggadu ito donggo bilubiluloá todelomo bele u monto dunia botie, ito mopoílaalo suusa sababu bantaanto mobuheeto. Diila kalana ito ohilaa molopato monto batanganto u monto dunia botie, bo sababu ito ohilaa momake batanga u monto sologa boito, alihu batanganto u mowali mate botie kawasaalio loú tutumulo.

⁵ Tamopo dapato olanto boito yito Allahu Taáala lohihilao, wau Eeya lohihilao

mongohi mai Rohu-Lio ode olanto odelo pongaku.

⁶ Sababu uito hilaa lamiaatia laito molaasa molotolo. Otaawa lamiaatia deú ngotilonggadu amiaatia donggo bilubiluloá todelomo batanga lamiaatia botie, amiaatia molaminga monto bele umaa potibiluloá lamiaatia wolo Eeya.

⁷ Sababu amiaatia tumutumulo patopatoá to palacaya li Almasi, diila patopatoá tou wolo u oontonga,

⁸ uito sababuulio hilaa lamiaatia sabali. Lebe otohilaa lamiaatia molopato monto batanga lamiaatia botie, alihu mowali motibiluloá wolo Eeya.

⁹ Sababu uito amiaatia motolopani tióotutua u mopo sanangi hilaa-Lio, mopio tou amiaatia donggo tobele lamiaatia teea, meaalo mola teto.

¹⁰ Sababu tantuulo maó ito ngoáamila mawuduwolio ode talu lo bubutoó li Almasi, wau ngota-ngota mamooótapu balasiilio motuuúde wolo huhutuulio todunia botie -- huhutu mopiohe meaalo u moleeto.

¹¹ Otaawa lamiaatia wolo boliilio moohe to Eeya; uito sababuulio amiaatia hipo tolopania mopoyakini totau tomimbihu

batanga lamiaatia. Allahu Taáala motota olamiaatia loú tióotutua, wau halapuo lowatia timongoli olo motota olamiaatia todelomo hilaa limongoli.

¹²Woleewe botie amiaatia diila mohile alihu timongoli momuji batanga lamiaatia. Amiaatia bo ohilaa mongohi alaasani tuwau u mopiohe ode limongoli u mowali moéengahe to olamiaatia, alihu otaawa limongoli woloolo mola timongoli musi molameta tau–tauwalo tahemo pomangga daá laku lotau wau diila pĩliilio.

¹³Wonu amiaatia memangi oontonga maó mabiliyongo, uito yito domi polohuna daá Allahu Taáala. Wau wonu amiaatia oontonga maó oáakali mopiohe, uito domi polohuna daá olimongoli.

¹⁴Ponu li Almasilo u motolo kawasa olamiaatia; wau amiaatia mongalati deú wonu ngotaalio mailate ode taa ngoáamila, yi uito boliilio deú ngoáamila tau mailate.

¹⁵Ti Almasi yilate ode taa ngoáamila, alihu tau–tauwalo tahitumula, diilalo tumumulo ode batangalio lohihilao, bo tumbaó odeli Almasi tamailate wau luli pilotumu–Lio mai domi polohuna daá olimongolio.

¹⁶ Masababu uito, amiaatia diilalo motiliki tau moduduá tuúde lomanusia. Memangi amiaatia mapeéenta lotiliki li Almasi lonto bibilohio lomanusia, bo botia diilalo.

¹⁷ Taa umalo tituwau woli Almasi, mowali manusia bohu sama–samaata. U deedelo madiduú -- ngoáamilalo malowali bohu.

¹⁸ Ngoáamilalo boito kilalaja lo Allahu Taáala. Lotimbulude li Almasi Allahu Taáala lopowali olanto luli lopiiohe wo–Lio, lapataó longohi tuugasi olanto alihu tau–tauwalo wewo powaliyola mopiiohe olo wolo Allahu Taáala.

¹⁹ Amiaatia helo pohabari deú lotimbulude li Almasi, Allahu Taáala lohutu mai manusia luli lopiiohe wolo batanga–Lio. Allahu Taáala lohutu mai lo@u diila lopoilaalo suusa totoonulalo totala u mapilohutu lomanusia ode batanga–Lio. Wau amiaatia maa tilugasia lo Allahu Taáala u lopohabari habari boito.

²⁰ Oditolio amiaatia yito mongo utolia li Almasi. Lotimbulude olamiaatia Allahu Taáala lohihilao talopo tunggulai tahuli–Lio. To tangguli Almasi, amiaatia wolo tióotutua mohalapu, tolimowalo wuwudu uluú lo Allahu Taáala talo poówali mai olimongoli luli lopiiohe wo–Lio.

²¹ Ti Almasi diila odusa, bo Allahu Taáala lohutu mai o–Lio lomanta dusanto, alihu ito muli mopiiohe wolo Allahu Taáala sababu lotituwau woli Almasi.

6 ¹ Sababu amiaatia hemo kalaja peé–peéenta wolo Allahu Taáala, yi halapuo lamiaatia loú tióotutua diila maó polemea limongoli opopiohu hilaa lo Allahu Taáala boito.

² Todelomo Kitabi, Allahu Taáala lotahuda, "Towakutu upilopo tuhata, Waú malo dongohei olemu, wau todulahe o@aahu, Waú malo tulungi mai olemu." Eelai maó tióotutua, masaatia botieelo wakutu upilopo tuhata boito. Masatia botieelo dulahee u po@aahuwalo boito!

³ Amiaatia diila mohuto bubaya lamiaatia potalaalio. Sababu uito amiaatia motolopani diila mongohi alaasani penu boli to ngotaalio u mohutu maó suáli boito.

⁴ Bolíio maó, todelomo ngoáamila suáli, amiaatia helo pobilohe deú amiaatia yito mongo wato lo Allahu Taáala. Sababu totoonulalo osuukali u hidala–dalaala madilutola lamiaatia loú sabali;

⁵ amiaatia silikisalio, tilutupalio, wau pilo patealio; amiaatia helo kalaja tióopatea;

tingga maito diila motuluhu wau tingga maito didu o uáalo.

⁶Wolo huhutu motulidu wau molinepo, sabali wau mopiohe hale, amiaatia helo pobiloheó deú amiaatia yito wato lo Allahu Taáala. Wau olo loú helo tiwunela toponu lo Rohullah, wau wolo toliángo u ihilasi,

⁷wau loú helo pohabari habari ulonto Allahu Taáala wau wolo kawasa lo Allahu Taáala, amiaatia helo pobiloheó deú amiaatia botie yito mongo wato lo Allahu Taáala. Amiaatia helo tidihu to kahandaki lo Allahu Taáala odelo sinapangi lamiaatia umoluhu meaalo mopoduulua batanga.

⁸Amiaatia hilurumatilio, bo hilinalio olo; pilujilio, wau pilitanalio olo. Eleponu hilaa lamiaatia motulidu amiaatia pilo tuludelio mohimbuloa.

⁹Amiaatia ilanggapulio diila masa-masahulu, bo amiaatia otaawa lotaa ngoáamila. Amiaatia yilantobio yilate, bo loilaalo amiaatia donggo tumutumulo. Eleponu amiaatia ilalinayalio amiaatia diila yilate.

¹⁰Eleponu hilaa lamiaatia pilopo suukalilio, bo amiaatia laito motiwengahu olo. Oontonga maó amiaatia mosikini, bo amiaatia maloó kaya totaa dadaata.

Oontonga maó amiaatia diila owolo–wolo, bo tutuulio tutu amiaatia motolo miliki totoonulalo u hitua–tuawua.

¹¹ Mongo wutato ta@otoliángo to Korintus! Amiaatia mawolo juujuru olimongoli. Ngoáamila tuango hilaa lamiaatia matiloóowoli mai lamiaatia.

¹² Amiaatia diila moheúto hilaa lamiaatia ode limongoli, bo timongolilo talo heúto hilao ode lamiaatia.

¹³ Botia, poluliyalo mai watia mobisala debo odelo tomongo walaó lowatia lohihilao. Huóoilo mola olo hilaamu ode lamiaatia.

¹⁴ Diila maó pohuto mowali waito lotau–tauwala tadiila palacaya li Isa; uito diila motuhatawa. Diila pongalo aakali u mopiohe mowali tuwau wolo u moleeto! Diila pongalo akali u mobaango mowali tuwau wolo u modiólomo.

¹⁵ Diila pongalo aakali ti Almasi moheeluma wolo Ibilisi. Wolo otutuu–wauwalio towolota taulo Nasara wolo taa diila Nasara?

¹⁶ Wolo wumbutalio towolota Bele lo Eeya wolo bele lo balaahala? Ito botie Bele lo Eeya, deúito–yito Allahu Taáala tatumu–tumulo. Allahu Taáala lohihilao

lotahuda, "Wau mamó tibiluloá tohuungi mongolio, wau tumumulo peé-peéenta woli mongolio. Wau mamowali Allahu Taáala limongolio, wau timongolio mamowali umati-Ú.

¹⁷Sababu uito, tolailo maó tau-tauwalo tadiila hitootawa to Allahu Taáala boito, wau buáala maó batangamu monto olimongolio. Diila maó pohumbuta sama-samaata wolo tanajisi, yi Wau mamololimo olimongoli.

¹⁸Wau mamowali ti Paapamu, wau timongoli mamowali mongo walaúu-Ú, odieelo mola tahuda lo Eeya Taa Laba-labaalo kawasa."

7¹ Mongo wutato ta@otoliángo!
 Ngoáamila danti boito pilodulungo ode olanto. Masababu uito wajibulio ito mopo belesi batanga monto totoonulalo umoó kootolo jiwa wau batanganto. Mamusi ito mohe to Allahu Taáala, alihu ito mowali tumumulo tolomodu ode o-Lio loú molimomoto ngo@aamilalo.

²Yimai maó amiaatia todelomo hilaamu. Amiaatia diila ototala penu boli to ngotaalio, wau diila peéenta maó woluo tau tapiloluhi lamiaatia. Amiaatia sama-

samaata diila helopeehu pa@eeda penu boli lonto olita.

³ Watia loloiya odito, diila u mopotala olimongoli. Sababu, debo odelo u mailoiya mai lowatia omooomolu, amiaatia motoliango tutu olimongoli, wau ito yito mongo sahabatilo maó ngotupa lo tutumulo tunggula mate.

⁴ Watia mopowunela opopalacaya lea-leaatulo maó olimongoli. Tumbaó watia meengahe daá olimongoli! Eleponu amiaatia hemoó toduo dadaata usuusa, hilaa lowatia iloliyango daá sababu timongoli. Hilaa lowatia otutu meengahu!

⁵ Tou amiaatia penu boli leidungga mola to Makedonia, amiaatia sama-samaata diila ilohiangio lohuheli. Lonto totoonulalo tutulio amiaatia heloótapu totolo: lonto wimbihu uwewo polo hahaamawa, lonto delomo hilaa lohihilao owowohe.

⁶ Bo sukurululo mola, Allahu Taála laito hemo poudaá hilaa lotaa didu ohalapani; Tio lopoóluli hilaa lamiaatia wolo nonaó mai lei Titus.

⁷ Hilaa lamiaatia leipalongo diila bo sababu tei Titus malonaó mai, bo sababu tio olo malo podulohu woloolo mola hilaalio ilopalonga limongoli. Tio lopoótaa

mai olamiaatia deú timongoli moololo daá modunggayá wolaatia; deú timongoli hileéya to huhutuumu omoóomolu wau botia iloheela lohilao mopodulua olaatia. Suáli boito lebe loéengaheó olaatia.

⁸ Eleponu tuladu lowatia loóhutu hilaa limongoli lowali siluukali, watia diila loleée loluladei tulade boito. Memangi toú watia loóonto maó deú tuladu lowatia boito bo moó suukali olimongoli -- eleponu osuukali limongoli boito bo ngopeé mola -- watia odito leéleée olo.

⁹ Bo watia sanangi masaatia -- diila bo sababu hilaa limongoli lowali siluukali, bo sababu osuukali limongoli boito loóo boli@o píilimu. Memangi osuukali limongoli boito ngopo naówa wolo kahandaki lo Allahu Taáala. Oditolio, amiaatia diila mopoluhi olimongoli.

¹⁰ Sababu osuukali debo odelo uito moótoduo mai hilaa mowali mobolió wau mopodungga mai oáahu. Wau taa u diila tamoleée tosuáli boito. Boliño maó, osuukali u bo ngopo naówa wolo kahandaki lomanusia moótoduo opopate.

¹¹ Nte poótuota maó limongoli wolo tilapulio olimongoli loú osuukali ungopo naówa wolo kahandaki lo Allahu Taáala!

Tilapulio yito timongoli tióotutua motolopani u mopo wolangaó u moliliúlo! Timongoli mamolonuó todusa, timongoli moohe, timongoli moololo, timongoli mamowali osumangati, timongoli iloheela lohilao mohukuumani taótotala! Todelomo ngoáamila suáli botie timongoli malo pobiloheó deú timongoli diila ototala.

¹² Oditolio, eleponu watia malo luladei tulade boito, watia lolulade diila sababu taa ototala boito. Diila olo sababu taa hidutola masababu totala boito. Watia loluladei tulade boito alihu totalu lo Allahu Taáala, timongoli lohihilao mongalati deú odito udaálio pikiilangi mongoli to lamiaatia.

¹³ Uitolo sababuulio hilaa lamiaatia ilopalonga. Ngopohia ilopalonga, amiaatia tidiyolo maó poli pilopo wengahio sababu loóonto owengahee Titus; hilaalio lopalongo sababu mongo wutato ngoáamila.

¹⁴ Memangi watia mahelo pomangga-mangga olimongoli to olio. Sukurululo mola, timongoli diila lopoóolito olaatia. Ngoáamila u mapeéenta pilolele mai lamiaatia olimongoli yito otutu. Odito olo wolo u hepo mangga-mangga lamiaatia

pasali limongoli odelei Titus malo ilaalo otutu olo.

¹⁵ Masaatia tio helebe motoliángo olimongoli, sababu ileelalio woloolo mola Wutato ngoáamilalo lohuto loduduá to taúwalio wau woloolo mola timongoli lololimo olio wolo hulumati wau modungohu.

¹⁶ Watia sanangi daá sababu timongoli mowali palacayalo todelomo toonulalo suáli.

8¹ Mongo wutato, otohilaa lamiaatia otaawa maó limongoli olo pasali woloolo mola pihio lo Allahu Taáala to jajaa–maáalo to Makedonia.

² Timongolio matilesi wolo osusuu–kaliyaalo u hibuuheta. Bo tohuungo lo osusuu–kaliyaalo boito, timongolio hiwengahe wau muura daá lohilao todelomo hemongohi sadaka u motulungi taa wewo, eleponu timongolio mosikini daá.

³ Watia lowali lolantu maó deú timongolio longohi u omamboia limongolio, tumbaó bo lebe maó. Diaaluo tahe lopoáhu,

⁴ timongolio lohile tióotutua to lamiaatia wonu mowali timongolio moduduá

momantu mongohi sadaka to umati lo Allahu Taáala to Yudea.

⁵ Timongolio longohi lebe maó loú hehalapuo lamiaatia. Timongolio bohu-bohulio lohudu batanga ode Eeya, lapataó to lamiaatia olo, lotuuúde wolo kahandaki lo Allahu Taáala.

⁶ Uito sababuulio amiaatia lopoáhu tióotutua olei Titus -- tamo lumulaó tolopani botie -- alihu tio mopo tolonga mola tolopani u mopiohe botie towolota limongoli olo.

⁷ Timongoli lebe lailaió todelomo totoonulalo u hitua-tuawua: Timongoli lebe lailaió todelomo suáli palacaya, todelomo suáli mopoilaalo lohuhama, todelomo suáli lopongota, todelomo totoonulalo tolopani u hidala-dalaala, wau todelomo toliángumu to lamiaatia. Sababu uito, mopiohe olo wonu timongoli lebe lailaió todelomo tolopani u mopiohe botie.

⁸ Watia diila mopoáhu mai uito odelo tuwaulio lopalenta. Bo loú mopo bilohei deú malo odito oloohio taawewo motulungi timongotalio, watia olo ohilaa motota deú demola utoonu toliángumu.

⁹ Sababu otaawa limongoli tutu deú ito otoliángo daá li Isa Almasi Eeyanto. Tio

kaya bo Tio lohutu batanga-Lio lowali mosikini ode polohuna daá limongoli, alihu wolo omosikini-Lio boito, timongoli mowali kaya.

¹⁰ Moduduá huhaama lowatia, to tambatiliolo timongoli mopoó lapato wolo u matilumula limongoli totaunu uilalu maó. Sababu timongolilo tabohu-bohulio helo mikiilangi wau lolumulaó tolopani botie.

¹¹ Naa, botia timongoli mamusi mopo tolonga mola moduduá omambo limongoli. Mamusi timongoli osumangati u mopoó lapato tolopani boito, debo odelo timongoli omoóomolu olo osumangati helo lanjana maó.

¹² Wonu timongoli iloheela lohilao mongohi, yi Allahu Taáala mamololimo uilohi limongoli boito patopatoá tou wolo udiaaluo toli mongoli.

¹³ Watia sama-samaata diila omakusudu mopobebasi taa wewo monto u tihutihula olio, wau mopobuheta olimongoli. Bo sababu timongoli masaatia botie todelomo owowoluwoa ngoáamilalo tutuheta, yi mapatutilio timongoli mopotuheta u odiaaluo limongolio. De wonu timongoli odiaaluwoa, wau timongolio todelomo

owowoluwoa ngoáamilalo tutuuheta, yi timongolio mamomantu olimongoli. Lou odito duduuluwolo peé–peéenta yintaalio.

¹⁴ (8:13)

¹⁵ Todelomo Kitabi tulatulade, "Taa otilapulo dadaata, diila olebelio, wau taa otilapulo ngoídi, diila odiaaluwoa."

¹⁶ Donggo boli sukurulio amiaatia to Allahu Taáala sababu Tio malohutu olei Titus debo odelo olohu lamiaatia u motulungi olimongoli!

¹⁷ Sababu tei Titusi diila bo iloheela lohilao mopoópolu hihile lamiaatia, bo tio olo odito olohu ohilaa motulungi olimongoli tunggula to ilohilaalio lohihilao olo tio lolantu u lonaó mola ode limongoli.

¹⁸ Peé–peéenta wolio amiaatia lolao mola olo wutato ngota tahe hulumatío daá lo ngoáamila jamaá sababu kalajaalio helo pohabari Habari Mopiohe lonto Allahu Taáala.

¹⁹ Ngopohia maó leeto, tau boito maa tilulaotio olo wau tilantu maó lo jajaa–maáalo u motamania wolamiaatia todelomo nonaó lamiaatia. Sababu amiaatia mamohuwato u mopo tunggulo sadaka boito, alihu Eeya polaíoolo wau

alihu timongoli moóonto deú amiaatia iloheela lohilao motulungi.

²⁰ Amiaatia malo hemo poódaha–dahaalo maó alihu diaaluo tamo potala olamiaatia tosuáli mopo tunggulo sadaka u hulinta botie.

²¹ Amiaatia ohilaa mokalaja loú juujulu diila bo totalu lo Eeya, bo totalu lomanusia olo.

²² Peé–peéenta wolei Titus wau wutato boito, amiaatia olo lolao ngotaalio lowutato tawewo. Amiaatia malotesi olio poó–poódaata wau malo ilaalo tio laito ohilaa motulungi. Wau botia, tio lebe maó ohilaa motulungi olimongoli sababu tio lopo wunela halapani u udaá toli mongoli.

²³ Tomimbihu olei Titus, tio yito tamani lowatia, tahemo kalaja wolaatia u motulungi olimongoli. Wau pasali lowutato duulota boito, talonaó peé–peéenta wolio, timongolio yito tailao lo jajaa–maáalo wau lowali owengahi Almasi.

²⁴ Halapuo lamiaatia timongoli mopobilohe toliáangi mongoli ode limongolio, alihu ngoáamila jamaá motota deú timongoli motoliáangi mongolio wau deú wolo u hepomangga lamiaatia tomimbihu olimongoli yito otutu.

9¹ Otutuulio maó diilalo palalu watia moluladei ode limongoli pasali lodembulo udonggo uilao ode umati lo Allahu Taáala to Yudea.

² Otaawa lowatia timongoli ohilaa motulungi, wau watia malo pomangga olimongoli ode tau–tauwalo to Makedonia. Watia lolóiya maó olimongolio deú anggadu taunu uilalu maó mongo wutata to Akhaya malo tidapato u mongohi dembulo. Wau sumangati limongoli malo powalihuhu olo sumangati ngotayadio daá limongolio.

³ Botia watia lolao mai olei Titus wau towutato duulota boito ode limongoli alihu wolo u hepo mangga–mangga lamiaatia tomimbihu olimongoli diila debo odelo toongi wambaío. Oditolio, timongoli wajibulio malo tidapato, sababu watia lolóiya ode limongolio deú timongoli malo tidapato woleeto.

⁴ Watia molawalo wonu bolo woluo tau–tauwalo Makedonia tamoduduá peé–peéenta wolaatia de toú watia monaó mai ode limongoli. Wau wonu odungga limongolio deú timongoli diipo lotidapato, wei donggo boli de wolitio lamiaatia, sababu malolóiya deú amiaatia palacaya

daá olimongoli. Wau penu boli timongoli lohihilao olo mamoolito.

⁵ Uitolo sababuulio watia molaasa palalu molao mai olimongolio boito ode limongoli meimulo u mongulusipo dembulo u pilodanti limongoli boito. Watia lohutu maó uito alihu de wonu watia monaó mai, u wohi limongoli boito mapilo dapato. Lou odito, malo ilaalo deú uwohi limongoli boito yilohi wolo hilaa sanangi, wau diila kalana pakusa.

⁶ Poótoloma maó! Taa u momuáyade bili ngoídi–ngoídi mamohimoáa tilapulo bo ngoídi olo. Bo taa u momuáyade bili laba–labaalo dadaata mamohimoáa tilapulo dadaata olo.

⁷ Timíidu tau musi mongohi moduduá oleela hilaalio. Tio diila mowali mongohi lou panggu–panggu meaalo kalana pakusa, sababu Allahu Taála momonu taa u mongohi wolo hilaa sanangi.

⁸ Allahu Taála okawasa mongohi mai olimongoli balakati ulaba–labaalo daatalio, alihu timongoli laito o woluwowa lou wolo upalaluo limongoli; tumbaó timongoli maa olebealio u mohutu mopiohe wau o amaali.

⁹Todelomo Kitabi tulatulade odie pasali lo Allahu Taáala. "Tio momuá-muáyade mopoloópo ode taa mosikini; opopiohe hilaa-Lio ohiheo-hiheolo maó ohiheo-hiheolo maó."

¹⁰Allahu Taáala tamopo dapato bili ode tamoo-muáyadea wau uáalo olanto. Tio olo mamopo dapato wau mopoó daata wolo u huáyadu limongoli, alihu tilapulo loú omuura hilaa limongoli oduhenga mola olo.

¹¹Loú odito timongoli mamotuheta ngoáamilalo todelomo totoonulalo suáli tilinggula timongoli laito mowali mongohi wolo muura lohilao. Wau totoonulalo wowohi limongoli utaya-tayadu maó lamiaatia, moósababu dadaata tamolapali mola oduóolo ode Allahu Taáala.

¹²Sababu huhutu mopiohe u pohutuo limongoli botie diila bo wambaó mopotuheta odiaaluo umati lo Allahu Taáala, bo olo mamooó sababu dadaata tau molapali mola oduóolo ode Allahu Taáala.

¹³Wau monto hitua-tuawua umopodungga mai opopiohu u pobiloheó limongoli boito, dadaata taulo Nasara to Yudea mamomuji mola Allahu Taáala sababu timongolio moóonto otatapu

wau olootolo hilaamu to Habari Mopiohe pasali li Almasi tahe duduá limongoli boito. Wau olo, timongolio momuji mola Allahu Taáala, sababu timongoli muura daá lohilao u molaya–layadeó olimongolio wau ode ngoáamila taawewo wolo uwoluo tolimongoli.

¹⁴ Yi timongolio mamoduá mola olimongoli wolo laasa toliángo sababu Allahu Taáala mopiohe daá hilaa–Lio tolimongoli.

¹⁵ Mamusi ito mosukuru mola ode Allahu Taáala to wowohi–Lio upolu–polutuó boito!

10 ¹ Botia watia, Paulus, ohilaa moóowoli mai hitua–tuawua olimongoli. Watia botie, moduduá heloíya lotau, molumboyoto hale wonu motaalua woli mongoli, bo buheli wonu lalaaminga. Naa, sababu olumboyoto hale wau opopiohe hilaa li Almasi,

² halapuo da@a lowatia, diila maó pakusai watia mohutu u bangganga olimongoli de wonu watia monaó mai. Sababu watia oniyaati u mohutu wolo pintalo ode tau–tauwalo tahipo loíyawa deú amiaatia hipo kalajawa wolo papaa–tjuwaalo tomimbihu dunia.

³ Amiaatia memangi donggo tumutumula todelomo dunia, bo amiaatia diila mohipate patopatoá topatuju tomimbihu dunia.

⁴ Titii-ngolowalo u pilohuna lamiaatia todelomo polohipate lamiaatia diila tingolo dunia botie, bo titii-ngolowalo Allahu Táala taókawasa. Wolo titii-ngolowalo boito amiaatia helo ngantulu totoonulalo bintengi; amiaatia lolame polo hahaa-mawaalo.

⁵ wau helo ngantulu totoonulalo bintengi lo osombongi u bilongu motehengi pongotota pasali lo Allahu Taáala. Amiaatia helo tawalo pikiilangi lotau-tauwalo wau lohutu olimongolio taáluku toli Almasi.

⁶ Wau wonu timongoli malo dungohe wolo lea-leaatulo maó, amiaatia dapadapato u mohukuumani ngoáamila taa u diila modungohu.

⁷ Mamusi timongoli mongalati to owowoluwoa u otutuulio maó. Wonu tahingota-ngotawa yakini deú tio miliki li Almasi, mamusi tio mopoéelaó batangalio lohihilao wau mongalati deú amiaatia olo miliki li Almasi debo odelo tio.

⁸ Watia diila moolito wonu watia musi lebe dadaata mopomangga-mangga okokawasa umailohi mai lo Eeya ode lamiaatia, sababu okokawasa boito yilohi-Lio mai u momongu olimongoli, diila u mopo aantulu.

⁹ Watia diila mohuto u timongoli molaasa deú watia hemo powoohe-woohe olimongoli wolo tutuu-ladeyaalo laatia.

¹⁰ Tau hipoloíyawa, "Tutuu-ladeyaalo lei Paulus boito pintalo wau otilihula, bo wonu tio lohihilao woluo to huungonto, batangalio lohihilao molulupuhu wau ngoáamila loíyalió diila oboliilio wolo-wolo!"

¹¹ Mamusi taa debo odelo uito mongalati deú wonu amiaatia woluo tohuungi mongoli, huhutu lamiaatia tuhata debo odelo wolo u tiluladei lamiaatia todelomo tutuu-ladeyaalo lamiaatia.

¹² Tantulo maó amiaatia diila buheli mopo bandingi mola meaalo mopo tambati batanga lamiaatia ngodalajati wolo tau-tauwala tahipo nganggapua batangalio lailaió. Donggo boli hulodi mongolio! Timongolio mohutu tuuúdu hihilao wau motiliki batanga hihilao wolo tuuúdu boito.

¹³ Amiaatia diila odito. Wonu amiaatia mopo mangga–mangga, amiaatia diila lebe lo@u enggadelio. Amiaatia debo todelomo enggade lomadala pokalajalo u matilantu mai lo Allahu Taáala olamiaatia. Wau timongoli tuwotuwoto todelomo madala boito.

¹⁴ Oditolio, tou amiaatia mobiilohe woli mongoli wau modelo Habari Mopiohe pasali li Almasi ode limongoli, otutuulio maó amiaatia diila lumuala monto eenggade lomadala pokalajawa lamiaatia.

¹⁵ Amiaatia diila momuji batanga tokalaja lotaa wewo tawoluo to bulemengo lo enggadelio u matilantu mai lo Allahu Taáala olamiaatia. Boliio maó amiaatia debo todelomo enggade u matilantu mai lo Allahu Taáala olamiaatia wau moharapu deú timongoli helebe maó palacaya li Almasi, alihu amiaatia mowali moponaó lokalaja ulebe udaá towolota limongoli.

¹⁶ Louú odito amiaatia mowali mopohabari olo Habari Mopiohe boito to lili–puwaalo wewo louú diila wajibu mopoúda–udaá lobatanga tokalaja u mapilohutu tomadala lobubaya lotaa wewo.

¹⁷ Todelomo Kitabi tulatulade, "Taa u motohilaa mopomangga u hitua–tuawua,

mamusi mopomangga maó wolo u mapilohutu mai lo Eeya."

¹⁸Sababu taa u ilopujia yito taa u piluji lo Eeya, diila taa u momuji batangalio lohihilao.

1 1 ¹Popoluasia mai watia motihutu debo odelo taa mohulode ngopeé. Wolo mowali odito?

²Watia moololo olimongoli, debo odelo Allahu Taála lohihilao olo moololo olimongoli. Timongoli yito debo odelo tadulahu ngota tadonggo mantali u mapilo danti mai lowatia u ponikaalo wolo dile ngota, deúito–yito ti Almasi.

³Bo watia molawalo pikiilangi limongoli maa owaingalio udiilalo tatapu wau molotolo hilao toli Almasi, debo odelo ti Hawa omoóomolu olo ilowainga lo aakali moleeto lo tulidu.

⁴Sababu oontonga maó timongoli sanangi wambaío mololimo taa monaó mai ode limongoli wau mongaajali pasali li Isa uwewo -- diila ti Isa tapilo ngotaawa mai lamiaatia toli mongoli. Wau timongoli olo ohilaa mololimo rohu wau "habari mopiohe" u sama–samaata wiwiihede wolo Rohullah wau Habari Mopiohe u peéenta tilolimo limongoli lonto olaamiatia.

⁵ Watia sama–samaata diila molaasa lebe dupadupapa wolo "mongo rasulu" tapolu–polutuó boito!

⁶ Tanu watia diila botie motota mobisala, bo tomimbihu pongotota, watia diila taa mohulodu. Uito mapilo bukuti mai lamiaatia olimongoli todelomo totoonulalo suáli.

⁷ Tou watia helo pohabari Habari Mopiohe lonto Allahu Taáala olimongoli, diila pilohile lowatia deú timongoli tamongongosi olaatia penu boli ngoídi maó; wau loú odito watia lohutu batanga lowatia lowali dupadupapa. Pilohutu lowatia uito u mopolaió olimongoli. Wolo uito tuwaulio lototala laatia olimongoli?

⁸ Tou watia lomaya olimongoli, watia ilonggosia lo jajaa–maáalo wewo. Mowali loíyalo watia helo poluhi jajaa–maáalo boito alihu moó tulungi olimongoli.

⁹ Wonu tou boito watia ilokulangia, watia diila peéenta maó helo poósuusa penu boli ngotaalio limongoli. Ngoáamila upalaluo lowatia hepilopo dapato lomongo wutato talei dungga mai lonto Makedonia. Watia modaha mopio–piohuulo maó alihu watia diila moposuusa olimongoli penu boli

todelomo suáli wolo wambaío, wau watia mamodaha tulusi alihu uito debo odito.

¹⁰ Owengahu lowatia botie diila mowali lulutolo penu boli touútoonu olo to ngoilanggubu lipu lo Akhaya, sababu pongaajali li Almasi u otutu woluo tolaatia.

¹¹ Yilongola watia moloíya odito? Wolo masababu watia diila motoliáangi mongoli? Otaawa lo Allahu Taáala watia motoliáangi mongoli!

¹² Wolo upilohutu lowatia botia matulusi pohutuo lowatia alihu "mongo rasulu" uwewo boito diila o alaasani mopoúda–udaá lobatanga wau moloíya deú timongolio hemokalaja debo odelo amiaatia.

¹³ Tau–tauwalo tadebo odelo uito yito mongo rasulu paaluti. Timongolio tahi pokalajawa umopo lapalo tau wolo molomelo baya odelo mongo rasulu li Almasi.

¹⁴ Diila moólinggolabe wonu timongolio mohutu odito, sababu Ibilisi lohihilao olo hemo lomelo baya debo odelo malaíkati mobaango!

¹⁵ Oditolio diila moólinggolabe olo wonu tahi pomayawa to Ibilisi molomelo baya odelo tahi pomayawa tamohutu kahandaki

lo Allahu Taáala. Pulitio maó timongolio olo mamololimo tontuli u motuuúde wolo totoonulalo huhutu limongolio.

¹⁶Peéentapo wulia mai lowatia: Diila bolo woluo tamo nganggapu olaatia mohulodu. Bo wonu timongoli debo monganggapu olaatia odito, poluasia mai watia tamo hulode botie motiwengahe penu bo ngoídi.

¹⁷Wumbutio mola botie matanggulo mai lowatia obobangga laatia, bo diila Eeya talo poáhu olaatia moloíya uito. Todelomo suáli botie watia tióotutua mobisala mai debo odelo taa mohulodu.

¹⁸Memangi woluo dadaata taa umopo mangga susu–aliyaalo tomimbihu dunia, oditolio watia ohilaa mopo mangga–mangga olo.

¹⁹Timongoli wolo hilaa sanangi mosabali totaa u hihuulode, sababu timongoli molaasa batanga limongoli mototaa daá!

²⁰Timongoli hemo poluli wambaó wonu tau mopowato olimongoli, meaalo tahi pohamawa paéeda daata daatalo maó monto olimongoli, wau molaasa batanga lebe molaió woli mongoli wau buheli molambali olimongoli.

²¹ Watia moolito momasisi deú amiaatia laba–labaalo molulupuhu u mohutu debo odelo uito. Bo wolo u buheli hepo mangga lotaa wewo, watia buheli olo! (Watia mobisala debo odelo taa mohulodu.)

²² Taulo Ibrani timongolio? Watia olo taulo Ibrani. Taulo Isiraílu timongolio? Watia olo taulo Isiraílu. Wali mai lei Abraham timongolio? Watia olo odito!

²³ Tahi pomayawa li Almasi timongolio? Odungohe maó watia debo odelo tamaa iloolia lo aakali, bo watia memangi tamoomayawa talebe mopiohe woli mongolio ngoáamilalo! Watia helo kalaja lebe loóohuú, tingga maito watia hetuwotolio ode tutupa, watia poó–poódaata hesilikisa wau laito bolo ngopeé mate.

²⁴ Mapoóolimo watia hesikisaa taulo Yahudi wolo biluboálio poóotolo pulaa tio.

²⁵ Poóotolu watia biluboá tau–tauwalo Roma; maito olo watia paíyolio lobotu. Poóotolu watia heloó laasa kapali loáhumo todeheto, wau peéenta watia lantungaó–lantungaó todeheto dulo pulaa pato jamu hiheolio.

²⁶ Poó–poódaata watia helo potolonga mola lononaó umoó topotala, heáanjamuo

lobaala taluhe daá daá, baala lo tamoo-lambatawa, baala lonto taulo Yahudi meaalo tadiila Yahudi, baala todelomo kota, baala to bulemengo kota, baala todeheto, wau baala lonto tau-tauwala tahemo podudulai lobatanga odelo wutato Nasara lebe-lebe pomaó diila.

²⁷Watia helo kalaja loóohuú wau helo hipate tióopatea; maito diila motuluhu, diila molamelo, diila mongilu, poó-poódaata bolo iloloihia todelomo upola-polaango, mohuhulo sababu diila oboó wau diila obiluloá.

²⁸Uwewolio leeto ngoáamilalo boito, timiídu dulahu watia duidoito olo to owowoluwoa lo ngoáamila jamaá.

²⁹Wonu woluo tamo lulupuhu watia olo molaasa molulupuhu. Wonu woluo tamodehu ode delomo dusa, hilaa lowatia olo moduduá moáantulu.

³⁰Naa, wonu watia musi mopomangga u hitua-tuawua, yi watia mopomangga susuu-aliyaalo u mopobilohe olulupuhu lowatia.

³¹Allahu Taáala, ti Paapa li Isa Eeya motota deú watia diila mohimbulo. Ilopujiaalo mola tanggu-Lio ohiheo-hiheolo maó.

³² Toú watia mola to Damusiki, ti gubolonulu taókawasa mota teto to walungo lo pamalenta li Olongia Aretas, helo poáhu suludadu lodaha huhebu lokota boito u moheúpa olaatia.

³³ Bo wolo kalanji tuwau watia yilaahio mola ode walungo loli tala tuwau lohuango to dingingo meeseli. Odieelo mola watia loólahi lonto uluú li gubolonulu boito.

12 ¹ Memangi diaaluo pa@eedalio u motimangga. Bo watia ohilaa mopomangga susu–aliyaalo upilopo bilohei lo Allahu Taáala olaatia todelomo wahi meaalo todelomo bibilohu.

² Otaawa lowatia taulo Nasara ngota tou mopulaa pato lotaunu yilalu maó bilinta–lo ode tambati pulito langgatio tosologa. (Diila otaawa lowatia wolo batangalio otu–otutuulo maó leibintaá mola meaalo uito bo tuwaulio lobibilohu -- Allahu Taáala wambaó tamotota.)

³ Peéentapo wulio mai lowatia: Otaawa lowatia deú tau boito bilinta–lo mola tilumuwoto ode Pirdaus. (Diila otaawa lowatia wolo otu–otutulo maó batangalio leibintaá mola meaalo uito bo tuwaulio lobibilohu -- Allahu Taáala wambaó tamotota.) Mola teto tau boito lodungohe

susuu–aliyaalo udiila mowali loíya lomanusia wau diila olo poluasialio manusia u moloíya maó.

⁴(12:3)

⁵Tomimbihu tau boitolo taóhilaa pomangga lowatia, diila tomimbihu batanga laatia lohihilao. Tomimbihu batanga laatia, bo susuu–aliyaalo umopo bilohe olulupuhu lowatia boitolo, u otohilaa pomangga lowatia.

⁶Humayaalio watia motohilaa olo mopo mangga u hitua–tuawua, watia diila mohuto mowali tamoo–tabibowa u toongi; watia mamoloíya u otutu. Bo watia mongotongo batanga lowatia, alihu diaaluo tamo nganggapu olaatia lebe loú wolo umaa iloontongalio pilohutu lowatia meaalo maílo dunghelio yiloíya lowatia.

⁷Bo alihu watia diila botie sombongi sababu totoonulalo bibilohu upolu–polutuó boito, watia yilohia–Lio mai odelo tuwaulio longongoto tobatanga lowatia udebo odelo pakaakasi lo Ibilisi. Ngongoto boito yilohi–Lio mai momate olaatia alihu watia diila mowali sombongi.

⁸Poóotolu watia heloduá mola ode Eeya alihu ngongoto boito bintaó–Lio monto olaatia.

⁹ Bo Eeya lotahuda mai, "Wau' momonu olemu wau uito malo tuu'ude olemu; sababu kawasaa-U' tumba'ó laba-labaalo lotolo wonu yio' molulupuhu." Uito sababuulio watia lebe sanangi mopomangga totoonulalo olulupuhu lowatia, sababu wonu watia molulupuhu, yi tumba'ó tou' boitolo watia molaasa ti Almasi modu'olai olaatia wolo olotoo-Lio.

¹⁰ Oditolio watia leengahe wolo totoonulalo olulupuhu lowatia. Watia olo leengahe wonu masababu ti Almasi watia pilitanalia, watia helo'ó laasa ileepita heila-yilapitalio wau watia helo'ó laasa usuukali. Sababu wonu watia molulupuhu, yi tou' boitolo tumba'ó watia molotolo.

¹¹ Otutu watia malo tihutu debo odelo taa mohulodu -- bo timongolilo tahelohutu olaatia lowali odito. Otutuulio ma'ó timongolilo tamusi momuji olaatia. Sababu eleponu watia diila oboliilio wolo-wolo, watia sama-samaata diila mowali olaahe lo "mongo rasulu" tapolu-polutu'ó boito!

¹² Ngo'amila mo'olinggolabu wau susuu-aliyaalo upolu-polutu'ó boito wau ngo'amila kalaja u duduula'a mapilo pobilohei wolo sabali toli mongoli u

lopobukuti maó deú watia ngotaalio lo rasulu.

¹³Todelomo suáli wolo timongoli diila boti piloótuoto, wonu pobandingio mola wolo jajaa–maáalo wewolio? Mowali loíyalo deú mailaba bo todelomo suáli utie; deú watia diila helo poósuusa olimongoli u longonggosi olaatia. Bolo maáapu tou totala lowatia boito!

¹⁴Masaatia botie maa u otolulio watia dapadapato u mola mobiilohe woli mongoli. Wau watia diila mopoósuusa olimongoli, sababu u otohilaa laatia diila wolo u mililiki limongoli, bo batanga limongoli. Sababu diila taúkekeí tamusi mopeehu rijiki tomongo dulaálio, bo mongo dulaálio tamusi mopeehu rijiki tomongo walaío.

¹⁵Sababu uito, wolo hilaa sanangi watia iloheela lohilao mopobake totoonulalo u hitua–tuawua olimongoli, tumbaó batanga lowatia lohihilao olo. Wonu watia odito motoliánga olimongoli, wolo timongoli paatuti diila boti motoliánga olaatia?

¹⁶Naa, timongoli akolo deú watia diila peéenta maó lopoósuusa olimongoli. Bo boli odito woluo talo loíya deú watia botie oáakali dadaata u moleeto; deú watia

hemohama pa@eeda monto olimongoli sababu wimbulo u hidala-dalaala lowatia.

¹⁷Diila pongalo aakali! Wolo motimbulude totau-tauwalo taheilao lowatia ode limongoli boito watia helohama u pa@eeda toli mongoli?

¹⁸Watia malo poáhu olei Titus lonaó mola lobiilohe woli mongoli, wau watia lopoáhu wutato Nasara tawewo boito lonaó peé-peéenta wolio. Wolo tei Titus malohama pa@eeda toli mongoli? Bo amiaatia duulota tahemo kalaja wolo makusudu u tutuuwauwa wau hemohutu wolo dudelo u tutuuwauwa!

¹⁹Mowaliilio timongoli hemo lantobe olamiaatia ngotilonggadu botie donggo hemo tolopani mopodulua batanga toli mongoli? Matilala daá timongoli! Otaawa lo Allahu Taáala deú ngoáamila uiloíya lamiaatia boito yito loduduá kahandaki li Almasi. Wau ngoáamila u pilohutu lamiaatia yito u momongu tutumulo rohu limongoli.

²⁰Watia molawalo deú tou watia de mola mobiilohe woli mongoli, odungga lowatia diila debo odelo wolo u hehalapuo lowatia, wau timongoli olo mamooó dungga olaatia diila debo odelo u hehalapuo limongoli.

Diila bolo de woluo tamolohulua, mohiihia, hilaa mopatu, polohuna daá batanga lohihilao, mopipii-tanawa, mopo totoodei hilao lotau alihu moingo, sombongi wau motolonggalo.

²¹ Watia moophe diila bolo to@u watia de monaó mai Allahu Taáala mamopo dupapa olaatia totalu limongoli wau watia mahumoyongo sababu dadaata towolota limongoli taódusa muloololio mai, diila helo bolió wau diila lohuheli hemohutu totoonulalo huhutu limongolio u huloto, kootolo wau diila paatuti.

13 ¹ Utie yito u otolulio watia monaó mai mobiilohe woli mongoli. Todelomo Kitabi tulatulade, "Timíidu palakala musi osakusi duulota meaalo toulota, bolo palakala boito saaha."

² Tau-tauwala utoú yilalu maó malohutu dusa wau ngoáamila taa wewolio, maleimulo piloéela lowatia toú watia mola lobiilohe woli mongoli u oluolio. Botia, toú watia donggo malaminga woli mongoli, watia muli mopoéelai olimongoli deú wonu watia muli monaó mai, diaaluo penu boli ngotaa maó limongolio tamaa moólahi monto hukuumani.

³ Yi timongoli mamoo'tapu maó ngoáamila bukuti u otohila limongoli deú ti Almasi otu-otutuulo maó helo tahuda lotimbuludei olaatia. Wonu ti Almasi mohutu ode limongoli, Tio diila mohutu moti lumboyoto, bolíio maó Tio mopo biloheó kawasaa-Lio towolota limongoli.

⁴ Memangi toú Tio silalipulio, Tio molulupuhu, bo botia Tio tumutumulo sababu kawasa lo Allahu Taáala. Amiaatia olo molulupuhu todelomo tutumulo lamiaatia u motituwau woli Almasi, bo wonu motaalua woli mongoli, amiaatia olo mamolotolai peé-peéenta woli Almasi sababu kawasa lo Allahu Taáala.

⁵ Nte, tesia maó limongoli batanga limongoli lohihilao wonu timongoli tióotutua tumutumulo patopatoá to palacaya li Almasi! Tantu timongoli mongalati deú ti Isa Almasi woluo todelomo mongoli! -- wewo suáliilio wonu memangi timongoli diila tióotutua palacaya.

⁶ Halapuo lowatia timongoli mongalati deú amiaatia diila bo odelo taa u diila moó tahangi to tesi.

⁷ Amiaatia moduá mola ode Allahu Taáala bolo pataala Eeya ohilaa motulungi mai

olimongoli alihu diila mohutu totala. Diila u mopo biloheó deú amiaatia botie memangi motota moponaó lotuugasi, bo alihu timongoli mohutu maó wolo u otohilaa lo Allahu Taáala -- penu boli oontonga maó amiaatia diila ilotilapulo, diila mongola!

⁸ Sababu amiaatia diila mowali mohutu penu boli wolo u bubuu-lemenga louú otutu; amiaatia musi moduduá u otutu.

⁹ Amiaatia sanangi wonu amiaatia molulupuhu, wau timongoli molotolo. Amiaatia moduá mola olo alihu timongoli mowali wimu-wimumuto ngoáamilalo.

¹⁰ Uitolo sababuulio watia loluladei tuladee botie touú watia dipooluo tohuungi mongoli. Louú odito, wonu watia de monaó mai, sambelolo watia mohutu wolo moohuú olimongoli wolo mopohuna okokawasa uilohi mai lo Eeya olaatia. Okokawasa boito yilohi-Lio mai u momongu olimongoli, bo diila u mopo aantulu.

¹¹ Pulitio maó, Mongo wutato, mamusi timongoli motiwengahe, wau potolo panilo mowali wimu-wimumuto ngoáamilalo. Tolimowalo ngoáamila naseehati lowatia. Mamusi timongoli ngohilao wau tumumula

mopiohe wau dame. Allahu Taáala Taa Laba-labaalo ponu wau tamoo-podamea boito mapeé-peéenta woli mongoli.

¹² Posasaa-lamuwalo ngota timongota wolo tataabia lohilao odelo wutata Nasara. Ngoáamila umati lo Allahu Taáala lolao salamu olimongoli.

¹³ Eeya Isa Almasi mobalakati mai olimongoli, Allahu Taáala momonu olimongoli, wau Rohullah peé-peéenta woli mongoli ngoáamilalo! Hulumati lamiaatia, Paulus

¹⁴ (13:13)

Galatia

1 ¹ Mongo wutato jajaa-maáalo tomadala lo Galatia, watia, Paulus, wau ngoáamila wutato Nasara tawolaatia, mohalapu pohileaala duá Allahu Taáala ti Paapanto wau Eeya Isa Almasi mongohi mai balakati wau salaamati olimongoli. Watia lowali rasulu diila lotimbulude loli manusia meaalo sababu piluduó lomanusia, bo sababu ti Isa Almasi wau Allahu Taáala ti Paapanto tamaaluli lopotumulai o-Lio lonto opopate.

² (1:1)

³ (1:1)

⁴ Modungoheó u otohilaa lo Allahu Taáala ti Paapanto, ti Almasi lohudu mai batanga-Lio lowali bake ode duduu-saanto, alihu ito poáahuwolo monto jamani u moleeto botie.

⁵ Ilopujiaalo mola Allahu Taáala ohiheo-hiheolo maó! Amin.

⁶ Watia lolinggolabe pasali lo Mongo wutato! Timongoli tiliyango Allahu Taáala masababu odehu hilaa li Almasi, bo botia timongoli odito lolamemeto lobulemenga

to Allahu Taáala wau loduduá "habari mopiohe" uwewo wolo Habari Mopiohe ulonto Allahu Taáala.

⁷ Otutuulio maó diaaluo "habari mopiohe uwewo". Bo woluo tau-tauwalo talo pohabari olimongoli "habari mopiohe" pasali li Almasi upilopo boboolió limongolio, tilinggula loó puyoóto olimongoli.

⁸ Taa u mopohabari "habari mopiohe" uwewo wolo Habari Mopiohe u mapilo habari lamiaatia, huliilo maó tio hukuumanio mai lo Allahu Taáala -- eleponu tau boito amiaatia lohihilao meaalo maláikati monto sologa!

⁹ Amiaatia malo loíya mai omoóomolu, masaatia watia muli molóiya mai peéentapo; Taa u mopohabari olimongoli "habari mopiohe" uwewo wolo Habari Mopiohe u matilolimo limongoli lonto olamiaatia, tau boito wajibulio hukuumanio lo Allahu Taáala!

¹⁰ Wolo tingga woleeto boito watia oontonga maó debo odelo méi pasisi tomanusia? Sama-samaata diila! Watia bo motiwunelo pasisio mai lo Allahu Taáala. Wolo watia donggo hemo tolopani mohama hilaa lomanusia alihu aahudu

lotau? Wonu watia donggo hemohutu odito, watia diila wato li Almasi.

¹¹ Mongo wutato musu motota maó deú Habari Mopiohe upilopo habari lowatia boito asaliilio mai diila lonto manusia.

¹² Watia diila lololimo habari boito lonto manusia, wau diaaluo penu boli ngotaa maó tahe longajali olaatia. Ti Isa Almasi lohihilaolo talo tombangai tuangio lo Habari Mopiohe boito olaatia.

¹³ Tantu timongoli maloó dungehe pasali tutumulo lowatia omoóomolu odelo ngotaalio tahelo duduá agama lo Yahudi. Otaawa limongoli woloolo mola palangilio watia helo pohutu jamaá lo Allahu Taáala wau woloolo mola ohuúlio watia helo tolopani u mopo aantulu maó.

¹⁴ Todelomo suáli moponaó agama lo Yahudi, watia mongilaboto wolo odaata taulo Yahudi tango–hilaide lowatia. Watia osumangati daá todelomo susuu–aliyaalo tomimbihu uúdu linenemoya lamiaatia.

¹⁵ Bo sababu opopiohu hilaa lo Allahu Taáala, Tio lolulaotai olaatia toú watia diipo pilotutulio mai wau lotianga olaatia u lomaya o–Lio.

¹⁶ Allahu Taáala lopoílaalo mai lo Wala–lo olaatia alihu Habari Mopiohe pasali lo

Wala-ílo mowali pohabario lowatia totaa diila Yahudi. Tou boito watia diila lonaó penu boli ode olita u lohile naseehati.

¹⁷Watia olo diila lonaó ode tau-tauwalo to Yerusalemu tamalei mulo wolaatia lowali rasulu. Bo watia malonaó ode lipu lo Arabi, tulusi lonteeto luli lohualinga ode Damusiki.

¹⁸Tolo taunu mola lapatio maó, watia lonaó ode Yerusalemu mola loótaawa wolei Petrus. Watia lotibiluloá wolio bo mopulaa limohui mola hiheolio.

¹⁹Watia diila lodunggaya wolo mongo rasulu wewo, ngopohia tei Yakobus, wutato Eeya.

²⁰Wolo u tiluladei lowatia botie otutu. Otaawa lo Allahu Taála deú watia diila lohimbulo.

²¹Lapataó uito watia ode mamaa-lawaalo to Siria wau Kilikia.

²²Dilumutu tosaaáti boito jajaa-maáalo Nasara to Yudea debo diipo huáa lotota olaatia.

²³Timongolio bo lodungohu tau hipoloíyawa, "Taa u muloololio mai helo ngalinaya olamiaatia, masaatia hemo pohabari opopalacaya u muloololio mai ohilaa pobinasalo."

²⁴ Yi timongolio malomuji Allahu Taáala sababu watia.

2 ¹ Mopulaa pato lotaunu mola lapatio maó, watia luli lohualinga mola ode Yerusalemu peé-peéenta wolei Barnabas, wau lodelo olei Titus olo.

² Watia lonaó mola ode Yerusalemu sababu Allahu Taáala malo po@ilaalo mai olaatia deú watia musí monaó mola. Wau todelomo dudungaya tuwau u tolomodu wolo mongo taúwa mola teto, watia helopoó papataó Habari Mopiohe upilo habari lowatia ode tau-tauwalo tadiila Yahudi. Sababu watia diila mohuto deú tolopani lowatia u muloololio mai, meaalo u masaatia, diila ohuna wambaío.

³ Tei Titus, talo tamania wolaatia, deúito-yito ngotaalio lo Yunani, bo tio diila pilakusa loduduá wuúdu lotuna,

⁴ eleponu woluo tau-tauwalo tahipo huntulawa suáli boito. Timongolio yito tau-tauwalo tahelo tiwantoá todelomo kaumunto wau lotihutu debo odelo wutato. Timongolio tilumuwota lou poó-poóoyo u motulete ololopato uwoluo to olanto sababu ito lotituwau woli Isa Almasi. Timongolio ohilaa mopo

walingaó olanto ode delomo owowoluwoa u muloololio mai odelo wato,

⁵ bo amiaatia diila lotaáluku penu boli ngoídi maó toli mongolio, sababu amiaatia ohilaa modaha alihu Habari Mopiohe boito debo mantali ode limongoli.

⁶ Bo boli odito, diaaluo susuu–aliyaalo bohu u pilohile laatia wolo mo@oohu@u lonto tau–tauwalo tahe anggapuolio hulu–hulumati -- to olaatia diaaluo hiheedio wonu timongolio hulu–hulumati meaalo diila, sababu Allahu Taáala diila momilohe baya.

⁷ Boliío maó, tau–tauwalo tahe anggapuola hulu–hulumati boito lo tolongaku deú Allahu Taáala malongohi mai tuugasi olaatia u lopohabari Habari Mopiohe boito totaa diila Yahudi, tutuuwauwa debo odelo Tio malongohi tuugasi olei Petrus u lopohabari Habari Mopiohe boito to taulo Yahudi.

⁸ Sababu Allahu Taáala talopo mambo olei Petrus lowali rasulu taulo Yahudi, lopomambo mai olaatia olo lowali rasulu totaa diila Yahudi.

⁹ Tei Yakobus, tei Petrus wolei Yahya, taóontonga maó mowali mongo taúwa lojamaá, helo masisi deú Allahu Taáala

malongohi mai olaatia tolomodu tuugasi botie. Yi timongolio malodaatia wolei Barnabas wau watia odelo tuoto lopolo sahabati. Tulusi timongolio wau amiaatia loákoloa maó deú amiaatia mamokalaja towolota lo babaa-ngusawalo tadiila Yahudi, wau timongolio towolota taulo Yahudi.

¹⁰ Tuwa-tuwaulo hihile limongolio yito alihu amiaatia mopoó tuotaó taa mosikini. Wau watia tumbaó sanangi helohutu suáli boito.

¹¹ Tou tei Petrus lonaó mai ode Antiokhia, watia lotehengi olio wolo mopatato wau moilaalo tutu, sababu huhutuulio tilala.

¹² Bohu-bohulio tio lotihuloá lolamela peé-peéenta wolo mongo wutato tadiila Yahudi. Bo tou mongo utolia lei Yakobus leitungga mai, tio lopo walaheó batangalio lonto mongo wutato tadiila Yahudi wau diilalo lohuto lolamela woli mongolio, sababu moohe totau-tauwalo taóhila alihu ngoáamila tau tunaalo.

¹³ Mongo wutato lo Yahudi wewo olo helo duduá osikapu munapiki debo odelo tei Petrus, tilinggula tei Barnabas olo iloáangalio u opĩli debo odelo timongolio.

¹⁴ Odito iloontonga maó lowatia deú timongolio diila opíili tutuuúde wolo obobanali lo Habari Mopiohe boito, watia malo loíya odelei Petrus totalu lotaa ngoáamila tawoluo teto, "Wonu Wutato odelo taulo Yahudi maa tilumumulo debo odelo taa diila Yahudi, yilongola Wutato botia ohilaa momakusa tau-tauwalo wewo tumumulo debo odelo taulo Yahudi?"

¹⁵ Memangi moduduá ilowali mai lamiaatia, amiaatia yito taulo Yahudi wau diila "taa diila Yahudi u odusa".

¹⁶ Eleponu odito otaawa lamiaatia deú tau muli mopiohe wolo Allahu Taáala bo sababu palacaya li Isa Almasi, wau diila kalana moponaó butoó lo agama. Amiaatia lohihilao olo palacaya li Isa Almasi, alihu amiaatia mopiohe wolo Allahu Taáala motimbulude to iimani lamiaatia boito, diila kalana amiaatia moponaó butoó lo agama. Sababu wolo moponaó butoó lo agama, diaaluo penu boli ngota maó muli mopiohe wolo Allahu Taáala.

¹⁷ Amiaatia hemo tolopani muli mopiohe wolo Allahu Taáala moli tutumulo motituwau woli Almasi. Bo wonu lapatio maó mohutu u odito, mamopatato amiaatia donggo, "tau-tauwalo odusa",

olo debo odelo tau-tauwalo diila Yahudi, wolo utie boliilio deú ti Almasilo taloó sababu olamiaatia odusa? Tantulo maó diila!

¹⁸ Wonu watia muli molumula mopotihulaó pola butoó lo agama umaa ilaantulu lowatia, yi watia mopobiloheó deú watia malowali tamoo-lambangawa tobutoó.

¹⁹ Bo watia mailate tobutoó lo agama -- pilopatelio lobutoó boito lohihilao -- alihu watia mowali tumumulo ode Allahu Taáala. Watia maa silalipulio peé-peénta woli Almasi.

²⁰ Botia diilalo watia tatumu-tumulo, boti Almasi tatumu-tumulo todelomo batanga lowatia lohihilao. Tutumulo botie u tomimbihu tutumulo laatia botia yito tutumula lo iimani ode Walaó Allahu Taáala talomonu mai olaatia wau tamalo pobake batanga-Lio ode laatia.

²¹ Watia diila lopoleme odehu hilaa lo Allahu Taáala. Wonu wumbuta lotau wolo Allahu Taáala mowali muli mopiohe sababu moponaó butoó lo agama, uito boliilio opopate li Almasi diila ohunalio!

3 ¹ Mongo wutato tau-tauwalo Galatia! Timongoli otutu mohulodu! Diila

otaawa wonu timongoli maílo tuhata heingo lotatoonu? Opopate li Almasi tosalipu matilo–mbangai laatia lopata–patatolo maó olimongoli!

² Nte poótaa mai olaatia suáli tuwau botie: Wolo timongoli malo lolimo Rohullah sababu loponaó butoó lo agama, meaalo sababu timongoli lodungohe Habari Mopiohe lonto Allahu Taáala wau palacaya li Almasi?

³ Yilongola odito hulodi mongoli? Timongoli malo lumulaó tutumulo bohu wolo Rohullah, diila pongalo aakali timongoli botia ohilaa mongaato owowoluwoa u wimu–wimumuto ngoáamilalo wolo lotolumu lohihilao?

⁴ Wolo diila ohuna wambaío ngoáamila umaa ilolaasawa limongoli boito? Diila pongalo aakali diila ohuna!

⁵ Allahu Taáala longohi mai Rohu–Lio olimongoli wau lopowoluo totoonulalo moólinggolabe towolota limongoli. Wolo Allahu Taáala lohutu mai uito sababu timongoli loponaó butoó lo agama meaalo sababu timongoli lodungohe Habari Mopiohe boito wau palacaya li Almasi?

⁶ Uito tutuwauwa debo odelo u tulatulade todelomo Kitabi tomimbihu

olei Abraham -- odie, "Tei Abraham palacaya to Allahu Taáala, wau sababu opo-palacayalio boito tio tilolimo lo Allahu Taáala odelo taa mopo sanangi hilaa lo Allahu Taáala."

⁷ Oditolio mamusi timongoli mongalati deú taa u otu-otutuulo maó wali lei Abraham yito taa u palacaya, to Allahu Taáala.

⁸ Kitabi maleimulo loóonto deú Allahu Taáala mopoluasi tau-tauwalo diila Yahudi muli mopiiohe wolo Allahu Taáala, wonu timongolio palacaya o-Lio. Habari Mopiohe boito piloótaa-Lio leimulo odelei Abraham todelomo danti botie, "Motimbuludei olemu, Allahu Taáala mamó balakati mai ngoáamila umati lomanusia todunia."

⁹ Tei Abraham palacaya, yi tio bilarakati-Lio. Odito olo ngoáamila taa palacaya mabalakatia-Lio peé-peéenta wolei Abraham.

¹⁰ Tau-tauwalo tahemo tiwunela tobutoó lo agama, ngoáamilalo hitumula towalungo laánati. Sababu todelomo Kitabi tulatulade, "Taa diila tióotutua moponaó ngoáamila u hitulade todelomo

Buku Butoó lo Agama, laánatia lo Allahu Taáala!"

¹¹ Diaaluo penu boli ngotaa maó tamopiohe wolo Allahu Taáala makalana moponaó butoó lo Agama. Suáli boito mapilo patatio mai todelomo Kitabi, "Bo taa palacaya to Allahu Taáala tilinggula wumbutalio wolo Allahu Taáala muli mowali mopiohe, matumumulo!"

¹² Bo butoó lo agama diila patopatoá to iimani. Todelomo Kitabi tulatulade deú tamoponaó butoó lo agama, matumumulo sababu butoó boito.

¹³ Boti Almasi lopo lopato mai olanto lonto laánati butoó lo agama. Tio lohutu uito loú lopoluli mai batanga-Lio laálaánati sababu ito. Sababu todelomo Kitabi tulatulade, "Malaá-laánatilo tailate ntilayango towolihi lo ayu."

¹⁴ Ti Almasi lohutu odito alihu balakati u pilodanti mai lo Allahu Taáala odelei Abraham wohi olo ode taa diila Yahudi. Loú odito ito olo tapalacaya to Allahu Taáala mowali mololimo Rohu upilo danti mai lo Allahu Taáala boito.

¹⁵ Mongo wutato! Lebe mopiohu watia momake obaaya monto he olaasawa ngohui-ngohui. Wonu taa mohutu tala

tuwau danti wau danti boito masilaaha, yi diaaluo penu boli ngotaa maó tadiila mopomata daantia boito, meaalo moduhenga penu boli tuwau maó.

¹⁶ Dadaa-ntiyaalo Allahu Taáala pilohutu lo Allahu Taáala odelei Abraham wau ode wali mai lei Abraham. Todelomo Kitabi diila tulatulade "wau ode tau-tauwala wali mai lei Abraham", u boliilio maó dadaata tau. U tulatulade teto yito "wau ode tau walimu mola", u bolilio maó bo ngota wambaó, deúito-yito ti Almasi.

¹⁷ U ohilaa toóowali mai lowatia teea yito utie: danti lo Allahu Taáala mapilohutu wau silaaha mai leimulo. Butoó lo agama uilohi mai wopato hetuto tolo pulu lotaunu lapatio maó diila moólomelo saahalio wau moluluto danti lo Allahu Taáala boito.

¹⁸ Sababu wonu wowohi lo Allahu Taáala bo wunewunela tobutoó lo agama, yi uito diilalo wowohi upilo danti mai. Tumbaó sababu Allahu Taáala malodanti mai tolei Abraham, yi Allahu Taáala longohi mai uito to olio.

¹⁹ Wonu odito, pongola butoó lo agama yilohi mai? Totametio yito deú butoó boito pilo duhengo u mopoílaalo totala lomanusia. Butoó lo agama boito

pohupohutu bo dilumutu podunggalio mai lo ngotaalio wali mola lei Abraham, tailunte todelomo danti lo Allahu Taáala tolei Abraham. Butoó lo agama boito pilopo tunggulai lo mamaa–laíkatiyalo lotimbulude tomanusia ngota.

²⁰ Naa, musí woluo mohu–mohuwalia, bolo palalu ngotaalio potimbuludelo. Bo Allahu Taáala diila momaralu potimbuludelo, sababu Tio lohihilao tamohutu maó.

²¹ Wolo uito boliilio deú butoó lo agama bubuu–lemenga wolo danti lo Allahu Taáala? Tantulo maó diila! Sababu wonu butoó lo agama yilohi u mongohi tutumulo to manusia, yi manusia mowali mopiiiohe wolo Allahu Taáala motimbulude tobutoó lo agama.

²² Bo todelomo Kitabi tulatulade deú ngoáamila umati lomanusia to walungo kawasa lodusa. Sababu uito, wowohi u dilanti patopatoá topalacaya li Isa Almasi yilohi toli mongolio tapalacaya.

²³ Toú diipo meidungga wakutuulio u palacaya li Almasi, ito dilaha modetoó lobutoó agama; ito debo odelo ilulungio dilumutu iimani boito poílaalolo.

²⁴ Louú odito, butoó lo agama mowali odelo pongimato olanto dilumutu ti Almasi meidungga u mohutu olanto muli mopiiohe wolo Allahu Taáala sababu ito palacaya li Almasi.

²⁵ Masaatia, sababu mawakutuulio manusia moó palacaya li Almasi, yi ito diilalo ilimatoa butoó lo agama.

²⁶ Sababu timongoli palacaya li Isa Almasi, yi timongoli lotituwau wo-Lio; wau masababu uito timongoli mowali mongo walaó Allahu Taáala.

²⁷ Timongoli ngoáamilalo mapilo lihulio to tangguli Almasi, oditolio timongoli malo lolimo tobatanga limongoli pipii-iliyaalo li Almasi lohihilao.

²⁸ Todelomo suáli botie diilalo pilopo woluo polohiheede towolota taulo Yahudi wau taa diila Yahudi, towolota lowato wau taa lolopato, towolota talolaí wau taabua. Wutato ngoáamilalo tuwau sababu ti Isa Almasi.

²⁹ Wonu timongoli miliki li Almasi, yi timongoli yito wali lei Abraham. Wau timongoli mamololimo wolo upilo danti mai lo Allahu Taáala.

4 ¹ Bo palalu pintalo mai lowatia: notilonggadu ngotaalio lo ahali warisi

donggo to walungo lo umulu, woluo taa u mongimato olio wau mongulusi totoonulalo polohuna daá olio dilumutu tio moóoma umulu utilantu liyamolio. Tio pohutulio tutuuwauwa debo odelo wato ngota, eleponu tutuulio tutu tio taa ohuúwo loú ngoáamilalo halata boito.

² (4:1)

³ Odito olo wolanto; ngotilonggadu ito diipo leidaá, ito pohutulio wato lo roroo-huwaalo motolo kawasa todunia botie.

⁴ Bo tosaaátilio utuhata, Allahu Taáala molao mai Wala-ílo ode dunia. Wala-ílo boito potutulio mai lotaabua ngota wau tumumula to walungo okokawasa butoó lo agama.

⁵ Loú odito Tio mopo lopato tau-tauwalo tahitumula to walungo lo okokawasa butoó lo agama; alihu ito olo mowali mongo walaó Allahu Taáala.

⁶ Sababu timongoli yito mongo walaó Allahu Taáala, Allahu Taáala lopoáhu mai Rohu lo Wala-ílo tilumuwoto ode delomo hilaa lo Wutato wau hilaa lowatia, deúito-yito Rohu u mongibode, "Paapa, oo Paapaú."

⁷ Oditolio, timongoli diilalo wato, bo walaó. Wau sababu timongoli walaó Allahu Taáala, yi Allahu Taáala mamongohi mai olimongoli totoonulalo u hitua-tuawua upilo dapato-Lio ode mongo wala-ílo.

⁸ Muloololio mai timongoli diila motota lo Allahu Taáala, uito sababuulio timongoli lowali wato lo kakaa-wasaalo u ilanggapu odelo ila bo otutuulio maó diila Allahu Taáala sama-samaata.

⁹ Bo botia timongoli motota lo Allahu Taáala, meaalo lebe tuhata maó, Allahu Taáala motota olimongoli. Naa, yilongola timongoli mohuto muli mohualinga ode roroo-huwaala lodunia botie, u molulupuhu wau mosikini? Yilongola timongoli mohuto muli pohutulio wato lo roroo-huwaalo boito?

¹⁰ Timongoli hemo polame duduu-laheyaalo tantutantu huhuu-lalowaalo u tantutantu, tataa-wunuwaalo u tantutantu.

¹¹ Watia molawalo, diila bolo tolopani wolo kalaja tióopatea lowatia olimongoli diila ohunalio wambaó.

¹² Mongo wutato! watia mohalapu lou tióotutua alihu timongoli mowali debo odelo watia. Sababu watia olo malowali debo odelo timongoli. Timongoli diila

helohutu penu boli tuwau maó utilala olaatia.

¹³Tantu donggo oéela mola limongoli wolo uloó sababu toú bohulio mai watia helo pohabari Habari Mopiohe boito olimongoli. Sababuulio yito kalana watia ilodungga longongoto.

¹⁴Toú boito timongoli diila molaasa molonuó olaatia, eleponu owowoluwoa batanga lowatia debo odelo yimontala uleidaá olimongoli. Timongoli tumbaó lololimo olaatia debo odelo malaíkati lo Allahu Taáala meaalo debo odelo lololimo li Isa Almasi lohihilao.

¹⁵Timongoli sanangi tutu toú boito. Bo botia, toútoonuu osanangi tutu boito? Otaawa lowatia deú toú boito timongoli iloheela lohilao moluóhe mato limongoli lohihilao u wohi limongoli olaatia, wonu uito mowali pohutuwolo.

¹⁶Wolo timongoli botia malo nganggapu olaatia debo odelo musu, sababu watia helo poílaalo mai u otutu olimongoli?

¹⁷Tau-tauwala wewo boito wolo lealeaatu lo sumangati hemo lolohe olimongoli, bo mamaa-kusuduwalo limongolio boito diila mopiohe. Timongolio bo motohilaa mopowalahu wumbuta limongoli

wolamiaatia, alihu timongoli moduduá olimongolio wolo sumangati ulealeaatu.

¹⁸Memangi mopiohe u osumangati todelomo susuu–aliyaalo umopiohe, asali laito odito wau diila bo wonu watia woluo peé–peéenta woli mongoli.

¹⁹Mongo walaúúú taa otoliánguú! Watia masaatia botie luli lodutolo sababu timongoli. Watia helo dutolo debo odelo tiilo ngota lodutolo toú mamó potutu mai. Watia mamó dutolo tulusi wonu píili li Almasi diipo meilodungo tobatanga limongoli!

²⁰Watia moololo daá woluo tohungi mongoli masaatia, alihu watia mowali mobisala toli mongoli wolo suala uwewo, sababu madiilalo otaawa lowatia wolo umuli pohutuo lowatia, woli mongoli!

²¹Mongo wutato tamo tohilaa tumumulo to walungo okokawasa bubuu–toówaalo agama, ntali dungohi mai watia! Mapoótaa mai lowatia olimongoli wolo ututuulio–tutu u tulatulade todelomo Kitabi Butoée Musa.

²²Teto tulatulade deú tei Abraham owalaó duulota: Tiilo lowalaó tangota yito ngotaalio lowato, wau tiilo lowalaó wewolio boito yito tangota bebasi.

²³ Walaó lo taabua talowali wato pilotutu biasa sababu loduduá u otohila lomanusia. Bo walaó lo taabua lolopato, pilotutu sababu pilodanti mai lo Allahu Taáala.

²⁴ Utie mowali pomake odelo bayalo. Mongobua duulota boito yito debo odelo dulo daantia: u tuwaulio asaliilio lonto Huídee Sinai ui–uitolo ti Hagar; mongo walaío pilotutu mai odelo wato.

²⁵ Oditolio ti Hagar boitolo Huídee Sinai, tolipu lo Arabi. Tio mopo bayahei kota lo Yerusalemu wolo ngoáamila tuango lipu u masaatia botie malowali wato.

²⁶ Bo Yerusalemu u tosologa boito yito Yerusalemu ubebasi, wau tiolo tiilanto.

²⁷ Sababu todelomo Kitabi tulatulade, "Potiwengahulo yió wuu taabua hunusa, tadiila peéenta maó lopotutu mai! Potiwengahulo wau potingala–ngalaóolo mola wolo meengahu wuu yió tadiila peéenta maó loólaasa ngongotio loú motutu! Sababu taabua tatilola maó lodilelio mamooótapu walaó lebe dadaata wolo taabua tatumu–tumuulo wolo dilelio."

²⁸ Mongo wutato! Timongoli lohihilao yito mongo walaó Allahu Taáala tapilotutu

sababu danti lo Allahu Taáala; timongoli tutuuwauwa debo odelo tei Isihaka.

²⁹Toú boito walaó tapilotutu loduduá u otohilaa lomanusia, longalinaya walaó tapilotutu mai sababu loduduá u otohilaa lo Rohullah. Odito olo botia.

³⁰Bo wolo u tulatulade todelomo Kitabi? Teto tulatulade odie: "Popolahia maó wato taabua boito peé–peéenta wolo walaío, sababu walaó lowato taabua boito diila tamowali ahali warisi peé–peéenta wolo walaó lotaabua bebasi boito."

³¹Oditolio, mongo wutato, ito botie diila mongo walaó lowato taabua ngota boito, ito yito mongo walaó lotaabua bebasi.

5¹Ito botia lolopato, sababu ti Almasi malo polopato mai olanto! Sababu uito polo bintengiyalo lolopato limongoli, diila maó potohilaa muli pohutuolio wato.

²Eelai maó, wonu timongoli méituuna, uito boliilio ti Almasi diila ohunalio olimongoli. Talo loíya mai utie yito watia lohihilao, Paulus.

³Peéentapo watia mopoéelai Totaa u méituuna, deú tio wajibu moponaó ngoáamila butoó lo agama!

⁴Wonu timongoli motolopani mopiiohe wolo Allahu Taáala motimbulude tobutoó

lo agama, uito boliilio wumbuta limongoli woli Almasi malobunto. Lou' odito timongoli tumutumulo to bulemengo odehu hilaa lo Allahu Ta'ala.

⁵ Bo olamiaatia, amiaatia motiwunela de' wolo polo tulungi lo Rohullah wau patopatoa' topalacaya lamiaatia li Almasi, Allahu Ta'ala lopoluasi mai olamiaatia lopiiohe wo-Lio.

⁶ Sababu wonu ito malo tituwau woli Isa Almasi, su'ali modudu' mealo diila modudu' wu'udu lotuuna diilalo mowali su'ali. U polohuna da' bo palacaya wamba' li Almasi, wau uito oontonga todelomo toli'angonto ode taawewo.

⁷ Muloololio mai timongoli helo hipate lou' mopiohe! Botia yilongola timongoli diilalo modungohe tou' otohilaa lo Allahu Ta'ala? Tatoonu tamalomiyo olimongoli?

⁸ Tantu talohutu uito diila Allahu Ta'ala tamalo tianga olimongoli!

⁹ "Ragi ungo'idi mamoo' matango ngo'amila labu popo@oolo," lo'iya lotau.

¹⁰ Eleponu odito watia donggo palacaya de' timongoli diila tamodudu' huhama wewo, sababu ito malo tituwau woli Almasi. Wau watia yakini de' penu boli tatoonu tamopo ambulati pikiilangi

limongoli, mahukuu-manio lo Allahu Taáala.

¹¹ Tomimbihu olaatia, Mongo wutato, yilongola watia tulusi wambaío milusulio wonu watia donggo hemo pohabari deú wuúdu lotuuna boito palalu? Wonu watia memangi helo pohabari odito, yi upilo pohabari laatia tomimbihu salipu li Almasi diila mopotoodei suáli.

¹² Lebe mopioheó tau-tauwalo tamopo ambulati pikiilangi limongoli boito huáa lumualo wambaío peéentalo monto jamaá!

¹³ Wutato matilia-Ngio u lowali talo lopato. Bo diila maó pomakea ololopato limongoli boito u mololaalaita mohutu wolo wambaío u otohila pohutuo limongoli. Bolíio maó, timongoli musi mototooliánga wau momamaayawa.

¹⁴ Ngoáamila butoó lo agama malei tuwoto todelomo palenta u tuwau botie, "Mamusi yió motoliángo timongotamu manusia debo odelo yió motoliángo batangamu lohihilao."

¹⁵ Bo wonu timongoli tinggai áawuta, poódahai, de timongoli peé-peéenta moáantulu.

¹⁶ Makusudu lowatia odie: Huliilo maó Rohu modelo olimongoli wau diila maó

potitumulo moduduá u otohílaa píili lomanusia.

¹⁷ Sababu u otohílaa lomanusia bubuu-lemenga loú otohílaa lo Rohullah, wau u otohílaa lo Rohullah bubuu-lemenga loú otohílaa lomanusia. Duduuluwolo tinggai bubuu-lemenga, tilinggula timongoli diila moóhutu wolo u otohílaa limongoli.

¹⁸ Bo wonu Rohullah modelo olimongoli, yi timongoli diila kiluwasa lobutoó agama.

¹⁹ U otohílaa watade lomanusia oontonga todelomo huhuu-lotowaalo, kootolo, wau diila paatuti;

²⁰ todelomo polubowa balaahala wau ilimi mongisimu; todelomo mumuusua, molohulua, mohiihia, ngoínta moingo, wau polohuna daá batanga lohíhilao; owowoluwoa hipo@o-po@oowa wau hemo tiwa-tiwambaó,

²¹ wau hílaa mongiri, hemo tihu-tihuwoó, hemo poti-potihungua wau wewolio maó. Ode ngoáamilalo boito poéela mai lowatia botia debo odelo u piloéela laatia olimongoli omoóomolu olo, deú tau-tauwalo tamohutu susuu-aliyaalo debo odelo uito diila tamowali pongawaá umati lo Allahu Taáala.

²² Boliño maó, wonu tau–tauwalo dilelo lo Rohullah, tilapulio yito: Timongolio mototoo–liánga, timongolio meengahe, timongolio oduóota lohilao, timongolio sabali wau obudi, timongolio mopiohe ode taa wewo, timongolio tatapu wau molotolo hilao,

²³ timongolio dupadupapa lohilao, wau laito mambo motolo kawasa batanga. Diaaluo butoó lo agama u modini susuu–aliyaalo debo odelo uito.

²⁴ Tau–tauwalo tamalowali miliki li Isa Almasi, tau–tauwala boito malo popate píili lo manusialio wolo totoonulalo napusu wau u otohilaalio.

²⁵ Rohullah malongohi mai olanto tutumulo u bohu; masababu uito Tiolo olo tamusi motolo kawasa mai tutumulonto.

²⁶ Ito diila mowali batingga, wau mopo papaalata tohilao, wau ohilao mohiihia ngota timongota.

6 ¹ Mongo wutato! Wonu hingota–ngotaawa odungga hemohutu dusa, mamusi timongoli tatumu–tumulo hiduduá to Rohullah, modelo tau boito mohualingaó ode dalalo u otutu. Bo timongoli mohutu uito wolo hilaa

molumboyo, wau dahai maó diila bolo timongoli lohihilao olo oheingalio.

² Mamusi mobabaantua momanta banta lotau, alihu loú odito timongoli modungohe palenta li Almasi.

³ Wonu hingota–ngotaawa molantobe batangalio polohuna daá lebe–lebe pomaó diila, yi tau boito mohimbulo batangalio lohihilao.

⁴ Timiídu tau musi momalakisaó lohihilao wolo watadelio boito mopiohe meaalo diila. Wonu mopiohe, tio mowali molaasa meengahe tosuáli boito. Bo diila mowali tio mopo bandingi maó loú wolo u pilohutu lotaa wewo.

⁵ Sababu ngota–ngota musi momanta titihulalio lohihilao.

⁶ Taa u mololimo pongaajali li Almasi, wajibulio molayade wolo gurulio ngoáamila u mopiohe uwoluo to olio.

⁷ Diila bolo o aakalialio. Allahu Taáala diila mowali poitohu! Wolo u pomulo, ui–uitolo u tipuwolo.

⁸ Wonu tau mopomulo moduduá píili lo manusialio, tio mamongotolo opopate monto píiliilio boito. Bo wonu tio mopomulo moduduá tilaúwa lo Rohullah,

tio mamongotolo tutumulo tutu wau ohiheo-hiheolo maó monto Rohullah.

⁹Sababu uito, ito diila maó potolu mohutu susuu-aliyaalo u mopiohe; sababu wonu ito diila mohuheli mohutu susuu-aliyaalo boito peénta mai ito mamongo ngotolo tilapulio.

¹⁰Oditolio, ngotilonggadu ito ohiyangio, mamusi ito mohutu u mopiohe ode ngoáamila tau, laba-labaalo mopiohu ode mongo wutatonto tangoíimani.

¹¹Poótuota maó tióotutua suáli botie u tiluladei lowatia lohihilao wolo hurupu u duduulaá.

¹²Tau-tauwalo taóhilaa mopolebe lobatanga wolo susuu-aliyaalo ulahiri, timongoliolo tahipo tolopania momakusa olimongoli moduduá wuúdu lotuuna. Bo timongolio mohutu uito bo alihu timongolio diila alinaya taulo Yahudi masababu salipu li Almasi.

¹³Tau-tauwalo tahemo duduó wuúdu lotuuna olo diila helo ponaó wuúdu lo agama. Bo otohilaa limongolio timongoli tuunaalo, alihu timongolio mowali mopomangga deú timongoli helo duduá wuúdu boito.

¹⁴ Watia sama-samaata diila mohuto mopomangga penu boli wolo wambaño, ngopohia Eeyanto Isa Almasi tamailate tosalipu. Sababu tumbaó karana Tio mailate tosalipu, yi dunia diilalo oboliilio wolo-wolo olaatia. Wau duólo dunia botie, watia olo debo odelo tamailate.

¹⁵ Tiluuna meaalo diila tiluuna, uito diila polohuna daá. U polohuna daá yito mowali manusia bohu.

¹⁶ Duólo tau-tauwalo tahitumula wolo huhaama boito, wau odito olo duólo ngoáamila umati lo Allahu Taáala, watia motiwunela ode Allahu Taáala tamaa mongohi mai salaamati wau odehu hilaa-Lio.

¹⁷ Wumbutio mola, penu boli ngotaa maó diilalo poósuusawa watia, sababu tobatanga lowatia woluo bubuu-kutiyaalo deú watia muri li Isa.

¹⁸ Pohileaala duá Eeyanto Isa Almasi laito mobalakati mai Mongo wutato. Amin. Hulumati lamiaatia, Paulus

Efesus

1 ¹ Umati lo Allahu Taáala to Efesus, taa tatapu wau molotolo hilao toli Isa Almasi!

² Watia, Paulus, rasulu li Isa Almasi to kahandaki lo Allahu Taáala, motiwunela hinta Allahu Taáala ti Paapanto wau Eeya Isa Almasi mongohi mai balakati wau salaamati olimongoli.

³ Ilopujialo mola Allahu Taáala, ti Paapa Eeyanto Isa Almasi! Tio labalakati mai olanto wolo totoonulalo balakati rohu todelomo sologa, sababu ito lotituwau woli Almasi.

⁴ Tou diipo dunia botie pilowali-Lio mai, Allahu Taáala malo lulaota olanto lotimbulude li Almasi wolo makusudu alihu ito mowali tomodu miliki-Lio tadiila oáibu totalu-Lio. Sababu ponu lo Allahu Taáala,

⁵ yi Tio malolantu leimulo deú lotimbulude li Isa Almasi, Tio mamomuduó olanto mowali mongo wala-lo lohihilao. Wau memangi ui-uitolo u otohila pohutuo-Lio.

⁶ Ilopujialo mola Allahu Taáala tamolaío, sababu lotimbulude to Wala-ío tapilonu-Lio Tio lomonu tutu olanto.

⁷ Sababu, lo opopate li Almasi, ito yilopatio lo Allahu Taáala, bolilio maó Tio malo ngambungu olanto lonto duduu-saanto.

⁸ Tio lohutu mai uito sababu laba-labaalo ponu-Lio olanto, wau ponu boito bilanguwa-Tio mai olanto wolo otinepo lealeaatulo maó wau huhaama mopio.

⁹ Loduduá otohila-Lio lohihilao, Allahu Taáala lopoótaa mai olanto hitua-tuawua u milakusudu hetuuó lolanjana-Lio; Tio malolantu deú lanjana-Lio boito mapoó lapato-Lio motimbulude li Almasi.

¹⁰ Lanjana boito yito alihu totoonulalo u hitua-tuawua, mopio u tosologa meaalo u todunia, mowali tuwau woli Almasi odelo taúwa. Wau suáli boito mapoó lapato lo Allahu Taáala wonu malei dungga wakutuulio.

¹¹ Allahu Taáala helo kalaja mai totoonulalo u hitua-tuawua loduduá otohila-Lio, wau putuusani-Lio lohihilao. Tumulalo mai bohulio Tio malo lulaota olanto sababu Tio motohila alihu ito

mowali umati-Lio sababu motituwau woli Almasi.

¹² Huliilo maó ito, tabohu-bohulio motiwunela toli Almasi, momuji mola Allahu Taáala sababu ololai-ío!

¹³ Timongoli olo malowali umati lo Allahu Taáala toú timongoli lodungoheó tahuli lo Allahu Taáala, deúito-yito Habari Mopiohe umoóaahu olimongoli. Timongoli palacaya li Isa Almasi, sababu uito Allahu Taáala longohi mai tuoto miliki-Lio toli mongoli, deúito-yito Rohu-Lio upilo danti-Lio mai.

¹⁴ Rohu boi-boitolo u pongaku deú ito mamololimo wolo u mapilo danti mai lo Allahu Taáala to umati-Lio. Utie moó yakini olanto deú Allahu Taáala mamopo lopato umati-Lio. Ilopujialo mola Allahu Taáala sababu ololai-ío!

¹⁵ Sababu uito, anggadu watia loódungohe deú timongoli palacaya li Isa Eeya, wau timongoli motoliángo ngoáamila umati lo Allahu Taáala,

¹⁶ watia diila obunto-buntolio helo sukuru mola ode Allahu Taáala tomimbihu olimongoli. Laito watia hemo langgulo tangguli mongoli toú watia moduá.

¹⁷ Watia lomolohone mola alihu Allahu Taáala Eeyanto Isa Almasi, ti Paapa

tamolaió, mongohi Rohu-Lio olimongoli. Rohu boito mamopowali olimongoli molinepo, wau mamopo ilaalo mai Allahu Taáala olimongoli tilinggula timongoli mototaa-Lio.

¹⁸ Watia lomolohone mola alihu Allahu Taáala momuó pikiilangi limongoli tilinggula mowali mobango; alihu timongoli mongalati wolo u mowali halapuo limongoli monto Allahu Taáala tamotianga olimongoli. Olo alihu otaawa maó limongoli donggo boli daatalio babaa-lakatiyalo u mopiohe upilo dapato Allahu Taáala ode umati-Lio;

¹⁹ wau donggo boli polutuío Allahu Taáala helo kalaja wolo polupolu kawasa todelomo olanto tapalacaya. Kawasa lo Allahu Taáala boito tutuuwauwa debo odelo kawasa upolu-polutuó,

²⁰ u pilomake-Lio tou luli lopo tumulai li Almasi lonto opopate wau longohi o-Lio huhuloáa lebe lolaió daá peé-peéenta wolo Allahu Taáala tosologa.

²¹ Huhuloáa li Almasi boito lebe lolaiá daá wolo huhuloáa lou ngoáamila pomalenta, ngoáamila takawasa, ngoáamila taúwa, ngoáamila mongo tuani wau boli tatoonu tamai lohia-Lio huhuloáa u lailaiá; mopio

tatumu–tumulo tojamani botie meaalo
tatumu–tumulo tojamani umamei dungga
mai,

²²Allahu Taáala lopo taáluku maó
ngoáamilalo to walungo okokawasa
li Almasi, wau lohudu li Almasi ode
jamaá odelo taúwa lo totoonulalo u
hitua–tuawua.

²³Jamaá yito batanga li Almasi,
ngoáamilalo pilo wimumuto lo Allahu
Taáala ngoáamilalo tamopo wimumuto
totoonulalo u hitua–tuawua penu boli
tóutoonu olo.

2¹Muloololio mai timongoli yilate odelo
dudelo lorohu sababu timongoli odusa
wau lolambanga papaa–lentawalo Allahu
Taáala.

²Toú boito timongoli loduduá wuwuu–
uduwaalo dunia botie; boliilio maó
timongoli lodungohe takawa–kawasa
tobangio daá, deúito–yito rohu u botia
motolo kawasa hilaa lotau–tauwalo tadiila
modungohe to Allahu Taáala.

³Muloololio mai ito ngoáamila
tutuuwauwa olo woli mongolio; ito
tumutumulo loduduá píili lo manusiaanto
wau helohutu wolo ulooó sanangi batanga
wau pikiilanginto. Toú boito ito yito tahe

ilotuhata muluka lo Allahu Taáala olo, tutuuwauwa debo odelo tau–tauwalo wewo.

⁴ Bo donggo boli udaáalio omuura hilaa lo Allahu Taáala! Tio odito momonu mai olanto,

⁵ tilinggula tou ito donggo hipatea delo dudelo lorohu sababu totoonulalo totalanto, Tio luli lopotumulai olanto peé–peéenta woli Almasi. Oditolio, bo sababu opopiohu hilaa lo Allahu Taáala wambaío, timongoli piloáahu–Lio.

⁶ Sababu ito lotituwau woli Isa Almasi, Allahu Taáala muli mopo–tumulai olanto peé–peéenta wo–Lio, alihu ito momalenta olo peé–peéenta wo–Lio todelomo sologa.

⁷ Allahu Taáala mohutu uito alihu tojamani u mamei dungga, manusia mowali moóonto donggo boli udaáalio ponu lo Allahu Taáala. Ponu boito pilo ilaalo lo Allahu Taáala loli opopiohu hilaa–Lio olanto lotimbulude li Isa Almasi.

⁸ Allahu Taáala momonu olimongoli, uito sababuulio Tio mopoáahu olimongoli sababu timongoli palacaya li Isa. Oáahu limongoli boito diila tilapulo tolopani limongoli lohihilao. Uito yito wowohi lo Allahu Taáala. Oditolio, diaaluo penu boli

ngota maó tamowali moti sombongi lo batangalio tomimbihu suáli boito.

⁹(2:8)

¹⁰Ito yito pilowali lo Allahu Taáala, wau lotimbulude li Isa Almasi, Allahu Taáala lopoópiohu mai olanto alihu ito mohutu maó susuu-aliyaalo u mopiohe umaa pilohetu-Lio olanto.

¹¹Mongo wutato tadiila taulo Yahudi! Eelai mola owowoluwoa limongoli tou muloololio mai: Timongoli iluntelio "taa diila otuuna", lo taulo Yahudi talongaku batangalio matiluuna (makusudulio tamaa loótapu maó tuoto upilohutu lomanusia tobatanga limongolio).

¹²Tou boito timongoli diila lotituwau woli Almasi, timongoli yito tau deli tadiila leituwoto umati tilulaoto Allahu Taáala. Timongoli diila leituwoto tobuuhuta lo daantia upilohutu lo Allahu Taáala wolo umati-Lio. Timongoli tumutumulo todelomo dunia botie lou dia halapani wau lou dia Allahu Taáala.

¹³Bo botia, sababu timongoli malo tituwau woli Isa Almasi, timongoli tou muloololio mai walawalahu, mapilopo dudulo lo opopate li Almasi.

¹⁴ Sababu ti Almasi lohihilao yito talo podame olanto. Tio helo potuwau tau–tauwalo Yahudi wau tau–tauwalo diila Yahudi lowali bangusa tuwau. Dingingo uloo walahe towolota limongolio, deúito–yito polomuusua, maa ilantulu li Almasi loú lopo bake batanga–Lio lohihilao.

¹⁵ Butoó agama lo Yahudi wolo papaa–lentawalo wau wuwuu–udulio mailuluto li Almasi alihu dulo bangusa boito mowali ngobangusa manusia bohu, talo tituwau wo–Lio. Wolo pohuli boitolo ti Almasi lopowoluo mai polodame.

¹⁶ Wolo opopate–Lio tosalipu, ti Almasi lopotuwau dulo bangusa boito, wau lopodame olimongolio wolo Allahu Taáala, tilinggula yiloolilo polomuusua boito.

¹⁷ Uito sababuulio ti Almasi dungga–dungga mai u lopohabari Habari Mopiohe pasali lo polodame boito olimongoli; mopio toli mongoli tadiila taulo Yahudi tamuloololio mai wala–walahe monto Allahu Taáala, meaalo taulo Yahudi tamodudulo to Allahu Taáala.

¹⁸ Wolo lotimbulude li Almasi, ito ngoáamila -- mopio taulo Yahudi meaalo tadiila Yahudi -- wolo Rohullah u tuwau mowali modudulo odeli Paapa.

¹⁹ Sababu uito, timongoli diilalo leituwoto tau deli meaalo taulo bulemengio. Timongoli botia yito peé–peéenta waito umati lo Allahu Taáala. Timongoli yito popoo–ngawaáalo ngaalaá lo Allahu Taáala.

²⁰ Timongoli olo bilongulio toitaato wumbato u pilodutu lomongo rasulu wau mongo nabi woli Isa Almasi odelo botu ulaba–labaalo mopiohu.

²¹ Tiolo tamopo woludu ngoáamila hudungu boito mowali Bele lo Allahu Taáala u tolomodu duólo Eeya.

²² Sababu tumutumulo motituwau woli Almasi, timongoli olo donggo hebongulolo peé–peéenta wolo tau–tauwalo wewo mowali bele ngowale duólo Allahu Taáala; teto Allahu Taáala motibiluloá wolo Rohu–Lio.

3¹ Uito sababuulio watia, Paulus, tilutupalio sababu ti Isa Almasi ode polohuna daá limongoli tadiila taulo Yahudi.

² Tantu timongoli maloó dungohe deú Allahu Taáala, sababu opopiohu hilaa–Lio, malongohi mai olaatia tuugasi botie domi polohuna daá limongoli.

³ Allahu Taáala lomuó hitua-tuawua u milakusudu hetuu@olo lanjana-Lio wau piloótaa-Lio mai olaatia. (Tomimbihu suáli botie matiluladei lowatia toitaato wolo limbu-limbuó,

⁴ wau wonu timongoli mopobaca maó, timongoli mamongalati hitua-tuawua u milakusudu hetuu@olo tomimbihu li Almasi debo odelo watia longalati maó).

⁵ Muloololio mai hitua-tuawua u milakusudu hetuu@olo boito diila peénta maó piloótaa tomanusia, bo botia Rohullah malopo ilaalo mai tomongo rasulu wau mongo nabi-Lio.

⁶ Hitua-tuawua u milakusudu hetuu@olo boito yito utie: motimbulude to Habari Mopiohe boito, tadiila taulo Yahudi moduduá moólaasa totoonulalo balakati lo Allahu Taáala u muloololio mai pilohetu bo ode taulo Yahudi. Tau-tauwalo diila taulo Yahudi malowali pongawaá lobatanga u tutuuwauwa, wau loduduá lololimo wolo upilo danti mai lo Allahu Taáala lotimbulude li Isa Almasi.

⁷ Allahu Taáala longohi mai olaatia ponu -- deúito-yito tuugasi -- u mopololadu Habari Mopiohe boito. Tilolimo lowatia ponu boito lotimbulude tokawasa lo

Allahu Taáala u kalakalaja todelomo batanga lowatia.

⁸Towolota loú ngoáamila umati lo Allahu Taáala, wawaatiyalo talaba-labaalo hina. Bo penu odito Allahu Taáala longohi mai olaatia ponu botie: tuugasi u mopohabari totau-tauwalo tadiila taulo Yahudi Habari Mopiohe tomimbihu okokaya li Almasi udiila opulitio;

⁹wau olo alihu motimbuludei olaatia ngoáamila tau motota maó woloolo mola Allahu Taáala, Talopowali ngoilanggubu aalamu botie, moponaó lanjana-Lio u anggadu muloololio mai daá hitua-tuawua u milakusudu hetuuólo duólo dunia.

¹⁰Makusudu lo Allahu Taáala yito alihu botia, motimbuludei tojamaá, ngoáamila tahidihima kawasa todulente motota otinepo Allahu Taáala todelomo tilolahepe modeliilio.

¹¹Allahu Taáala lohutu mai uito lotuuúde wolo lanjana-Lio u ohiheo-hiheolo ma@o, upilo ponaó-Lio lotimbulude li Isa Almasi Eeyanto.

¹²Loú palacaya li Almasi wau sababu lotituwau wo-Lio ito lo@otapu ololopato u motahude Allahu Taáala wolo opopalacaya lealeaatulo maó.

¹³ Sababu uito, hihile lowatia yito: diila maó polawalo tomimbihu wolo u dilutola lowatia sababu timongoli, sababu ngoáamilalo boito yito duólo opopiohu limongoli.

¹⁴ Masababu uitolo watia loti bonggohuú mola totalu li Paapa.

¹⁵ Monto o–Liolo timíidu ngaalaá tosologa wau todunia mololimo tolomodu píllii–Lio.

¹⁶ Watia moduá mola bolo potala Allahu Taáala talaba–labaalo lailai@o motuhatawa u mopoó lotolo hilaa limongoli wolo Rohu–Lio.

¹⁷ Pohileaalo duá sababu timongoli palacaya li Almasi, ti Almasi motibiluloá todelomo hilaa limongoli, wau tutumuli mongoli pilopo daasali wau kiluwasa lo toliángo.

¹⁸ Watia mohile duá bolo potala peé–peéenta wolo ngoáamila umati lo Allahu Taáala, timongoli moó toneáa deú donggo boli luasilio wau hayaío wau langgatio wau delomio ponu li Almasi, u wolo aakali lomanusia diila opahamua modelo–delomolo maó.

¹⁹ Pohileaala duá timongoli motota ponu li Almasi boito, tilinggula timongoli

mopolu lopiili lo Allahu Taáala u ngo@aamilalo wimu–wimumuto.

²⁰Wolo kawasa lo Allahu Taáala u moólohe mokalaja todelomo batanganto, Allahu Taáala mowali mohutu mai lebe dadaata da@a loú wolo umowali pohilento mola meaalo pikiiliyolo.

²¹Wajibulio Allahu Taáala polai@oolo wawaalia mola todelomo jamaá, motimbulude li Isa Almasi. Ilopujialo mola Allahu Taáala ohiheo–hiheolo maó! Amin.

4¹Uito sababuulio watia -- tau ngota lotutupa, taú tataahangi sababu hemomaya to Eeya -- mohile loú tióotutua olimongoli: poti tumulolo motuuúde wolo huhuloáa limongoli debo odelo taamaa tiliyango Allahu Taáala.

²Mamusi timongoli laito motidupapa lohilao, molumboyoto, wau sabali. Pobilohe maó toliáangi mongoli loú momantu ngota timongota.

³Potolo panilo tióotutua tumumula wolo dame alihu otuuwau u pilowali mai lo Rohullah debo taataalo.

⁴Bo woluo batanga tuwau, wau Rohu tuwau. Odito olo timongoli tiliyango duólo tuwau halapani u tutuuwauwa.

⁵ Bo woluo tuwau Eeya, tuwau iimani, tuwau popolihua,

⁶ wau tuwau Allahu Taáala, talowali ti Paapa lotaa ngoáamila. Tiolo Eeya ngoilanggubu aalamu, tahelo kalaja lotimbulude toú ngoáamilalo, wau okawasa todelomo ngoáamilalo.

⁷ Ito ngota-ngota lololimo tuwaulio lo wowohi loduduá wolo uilohi mai li Almasi.

⁸ To delomo Kitabi tulatulade, "Toú Tio mobotula mola ode tambati u molanggato daá, Tio modelo dadaata tawalo; wau Tio mongohi totoonulalo wowohi tomanusia."

⁹ Naa, wonu loíloíya "Tio lobotulo" boliilio maó toú bohu-bohulio Tio malo tuhutai demola tambati u wopa-wopaalo maó todunia botie.

¹⁰ Wau Tio tamalo tuhutai boito, Tiolo olo talo botula demola tambati ulebe molanggato daá monto ngoáamila hulungo tilinggula ngoilanggubu aalamu ilotuanga lo ilowoluwoa-Lio.

¹¹ Tiolo "talongohi mai totoonulalo wowohi tomanusia"; ngotayadu piludu-ílo lowali rasulu, tawewo lowali nabi; tawewolio poli lowali Tamo pohabaria Habari Mopiohe boito, wau tawewo poli

piludu-ílo lowali guguu-ruwaalo wau tamolaalawa jamaá.

¹² Utie pilohutu-Lio alihu umati lo Allahu Taáala powimumutola loú lealeaatulo maó alihu mowali momaya to Eeya wau momongu batanga li Almasi.

¹³ Louú odito ito ngoáamila mowali tuwau sababu iimani u tutuuwauwa wau huhaama u tutuuwauwa tomimbihu Walaó Allahu Taáala. Wau ito mowali tau-tauwalo tamoontapo u hihii-heolio maó helebe oduhenga mola ngoáamilalo wimu-wimumuto debo odelo ti Almasi.

¹⁴ Yi ito diilalo mowali mongo walaó tahepo bale-baleangio wau heó delo-delowalio odito mota odia mai lo pongaajali u hidala-dalaala lotahi o aakalia dadaata u moleeto. Timongolio hemopoó lapala tau wolo yimbulo u hidala-dalaala limongolio.

¹⁵ Diila! Bolíio maó ito musi mopo biloheó susuu-aliyaalo u otutu wolo hilaa ulealeaatu motoliángo, tilinggula todelomo totoonulalo suáli ito hihii-heolio maó helebe mowali mola wimu-wimumuto ngoáamilalo debo odelo ti Almasi talowali taúwanto.

¹⁶To walungo lo totaúwa–Lio, ngoáamila pongawaá lobatanga boito leisusungi mopiohe, wau tinggai pilopo wumbutio lotimiídu leleetualio. Wau wonu timiídu pongawaá boito mokalaja debo odelo u patutilio, yi ngoilanggubu batanga boito mamobutu mowali leidaá wau molotolo moli toliángo.

¹⁷Sababu uito domi tanggulo Eeya, uti–utieelo u mapolele wau popidudutai lowatia: diilalo potitumulo debo odelo tau–tauwalo tadiila hitootawa to Allahu Taáala, wau momikiilangi udia–diaaluo maó.

¹⁸Pikiilangi limongolio malo diólomo. Timongolio diila motota lo tutumulo uilohi mai lo Allahu Taáala, sababu timongolio sama–samaata diila o pongotota wolo–wolo pasali lo Allahu Taáala. Timongolio odito, sababu baángiyolo.

¹⁹Timongolio madiilalo owoolito, tilinggula timongolio helo duduá totoonulalo ilohilao moóohuú limongolio, wau tumutumulo huloto loduduá totoonulalo otohilaa lohilao.

²⁰Boti Isa Almasi taótaawa limongoli diila odito!

²¹ Timongoli malo dungohe tomimbihu o–Lio! Wau odelo tahiduduá o–Lio, timongoli máílaajali olo pasali píili lo Allahu Taáala u woluo to o–Lio!

²² Sababu uito yinggila maó manusia deedelo wolo pohuli tutumulo deedelo udonggo herusaalio loú totoonulalo ilohilaalio umopo lapalo.

²³ Pikiilangi wau hilaa limongoli mamusi pobohuwalo ngoáamilalo.

²⁴ Mamusi timongoli tumumulo odelo manusia bohu u pilowali moduduá gambali lo Allahu Taáala; deúito–yito wolo píili u otutu, motulidu wau mantali.

²⁵ Sababu uito Mongo wutato ngoáamilalo, diilalo pohimbulo. Potiwalilo juujulu ode ngota timongotalio, sababu ito ngoáamila yito tutuuwauwa pongawaá lobatanga li Almasi.

²⁶ Wonu timongoli moingo, diila maó polulia oyiyingo boito moó sababu olimongoli odusa. Diila maó poingo ngotupa lodulahu.

²⁷ Alihu Ibilisi diila ohiyango.

²⁸ Taa u biaasa motaó musi mohuheli motaó. Bolíio maó tio musi mokalaja alihu moó tapu rijiki wolo hilaa motulidu wau moó tulungi tahi odiaaluwoa.

²⁹ Wonu timongoli mobisala, diila maó pomake tataa–heyaalo u kootolo. Pomakea maó wambaío tataa–heyaalo umopo dulungo wau u motulungi taa wewo. Tataa–heyaalo debo odelo uito mamooó toduo mai u mopiohu titau–tauwalo tamo dungoheó.

³⁰ Diila maó posuukalia hilaa lo Rohullah. Timongoli masilaaha–Lio wolo Rohu, lowali miliki lo Allahu Taáala. Rohu boito olo debo odelo pongaku deú Dulahu Polobebasi mamei dungga mai ode limongoli.

³¹ Yinggila maó totoonulalo umoó ngongoto hilao; niyati wau moingo. Diilalo potiwati–watió wau momua–muayo. Diilalo powoluwoa pongolaasa umolonuó meaalo pongolaasa wewolio debo odelo uito.

³² Boliío maó, mamusi timongoli o hilao u mopiohe wau modehu hilao ode ngota–timongota, wau mongaa–ngambungua tutuwauwa debo odelo Allahu Taáala olo longambungu mai olimongoli lotimbulude li Almasi.

5 ¹ Timongoli yito mongo walaó Allahu Taáala tapilonu–Lio, sababu uito

timongoli musi motolopani moduduá obaaya lo Allahu Taáala.

² Tutumuli mongoli mamusi napasialo wolo toliángo, debo odelo ti Almasi olo lomonu olanto. Tio lopo bake batanga–Lio olanto, odelo tuwaulio lodewo umoonu wau moósanangi hilaa lo Allahu Taáala.

³ Timongoli yito umati lo Allahu Taáala. Sababu uito totoonulalo huhutu u huloto wau diila paatuti, meaalo olanggamu diila paatutilio woluo tohungi mongoli. Diila bolo taa wewo o alaasani u moloíya deú timongoli helohutu susuu–aliyaalo odelo uito.

⁴ Diila paatuti olo olimongoli moloíya tataa–heyaalo u kootolo, u huloto wau udiila paatuti. Boliño maó mamusi timongoli molapali mola sukuru ode Allahu Taáala.

⁵ Poótuota maó tióotutua: taa u opíili huloto, meaalo diila paatuti, meaalo langgamu (píili debo odelo uito tutuuwauwa wambaño loú molubo balaahala), tau boito diila mowali pongawaá umati tapilalenta li Almasi wau Allahu Taáala.

⁶ Diila maó timongoli o aakalia lo loloo–iyaalo utoongi. Sababu susuu–aliyaalo

botieelo u mopotoodei muluka lo Allahu Taáala totau-tauwalo tadiila hidungohe o-Lio.

⁷ Oditolio, diila maó pohumbuta sama-samaata wolo tau-tauwalo debo odelo uito.

⁸ Timongoli lohihilao mulooloalio todelomo diólomo. Botia timongoli malowali umati lo Eeya, oditolio timongoli woluo todelomo mobaango. Masababu uito timongoli musi tumumulo todelomo mobaango.

⁹ Sababu monto mobaango boitolo mobutu mai totoonulalo huhutu umopiohe hidala-dalaala, aadili wau tuulusi to bibilohu Allahu Taáala.

¹⁰ Potolo panilo u motota maó wolo umoó sanangi hilaa lo Eeya.

¹¹ Diila maó pohutua totoonulalo huhutu udiila ohuna u hepohutuo lotau-tauwalo tahitumula todelomo diólomo. Boliio maó mamusi tióotutua yinggila maó limongoli susuu-aliyaalo debo odelo uito.

¹² (Sababu susuu-aliyaalo u pohutuo limongolio wolo tuuáaó-tuuáaó boito, u bisalaalo olo maloóolito.)

¹³ Tootoonulalo hitua-tuawua u tinelalo todelomo mobaango, maóontonga wolo mopatato.

¹⁴ Sababu ngoáamila u mowali oontonga wolo mopatato, deúito-yito mobaango. Uitolo sababuulio loíloíya "Pobongulo, wuu yió tatuutuluhu, wau pobongulo monto opopate! Ti Almasi mamotinelai toitaatumu."

¹⁵ Sababu uito, poótuota maó tióotutua dudelo tutumuli mongoli. Diila maó potitumulo debo odelo tau-tauwalo tahi hulode, poti tumuloolo debo odelo tau-tauwalo molinepo.

¹⁶ Pohunawa maó loú tióotutua timíidu hiango uwoluo toli mongoli, sababu maasa botie yito maasa u moleeto.

¹⁷ Diila maó potihulodu, bo tuletea maó wolo u otohila lo Eeya.

¹⁸ Diila maó potihuwoó lo angguru timongoli, sababu uito mamooóluusa olimongoli. Bolíio maó, mamusi timongoli kiluwaasa lo Rohullah.

¹⁹ Pomakea maó tataa-heyaaalo monto Jaburu, lahu puji poloílaalo momuji wau lahu lorohu, todelomo bibii-salawaalo limongoli. Mamusi timongoli wolo hilaa

meengahe mopolahu mola puji poloílaalo momuji ode Eeya.

²⁰ Mololaita wau tomimbihu penu boli wolo olo, mamusi timongoli molapali mola oduólo ode Allahu Taáala ti Paapa, to tangguli Isa Almasi Eeyaanto.

²¹ U mohulumati li Almasi, paatutilio timongoli taáluku ngota timongota.

²² Dile taabua, tuúdio motaáluku todile talolai limongoli, tutuuwauwa debo odelo to Eeya.

²³ Sababu dile talolai yito taúwa todilelio, tutuuwauwa debo odelo toli Almasi olo talowali taúwa tojamaá wau Tio lohihilaolo olo Olongia Tamoo-po@aahua duólo jamaá talowali batanga-Lio.

²⁴ Tutuuwauwa debo odelo jamaá olo taáluku toli Almasi, odito olo todelomo ngoáamila suáli dile taabua musi taáluku todilelio.

²⁵ Wuu dile talolai, toliáangi maó dilemu, tutuuwauwa debo odelo ti Almasi momonu jamaá wau lopo bake batanga-Lio ode jamaá boito.

²⁶ Ti Almasi lohutu mai uito alihu Tio moó pobelesi jamaá boito wolo pongaajali-Lio wau moli taluhu popolihu, alihu lapata@o

uito Tio mowali wuduo-Lio ode Allahu Taáala.

²⁷ Louú odito ti Almasi mohutu jamaá boito tihutihula wolo lailai@o wau belesi totalu-Lio, diila oáaibu meaalo wenteá penu boli loolo.

²⁸ Odito olo dile talolai musí motoliángo dilelio debo odelo tio motoliángo batangalio lohíhilao.

²⁹ (Diila peéenta maó woluo taa u molonuó batangalio lohíhilao. Boliño maó, tio molaala wau modaha olio debo odelo ti Almasi olo molaala jamaá-Lio.

³⁰ Otaawanto uito, sababu ito yito popoo-ngawa@aalo batanga li Almasi.)

³¹ Todelomo Kitabi tulatulade, "Sababu uito talolaí ngota mamololaa maó tiilo wau tiyamolio u motituwau wolo dilelio, wau duduulotalo mamowali tuwau."

³² Ayati boito wanto-wantohe boliilio u modelomo. Wau poáayito maó lowatia uito wolo wumbuta wolota li Almasi wau jamaá.

³³ Bo ayati boito o wumbutio olo woli mongoli: Mamusi timíidu dile talolai motoliángo dilelio debo odelo tio motoliángo batangalio lohíhilao wau

mamusi timiídu dile taabua motolopani u mohulumati dilelio.

6¹ Taúkekeeí! Odelo muri li Almasi, dungohi maó mongo dulaáamu, sababu uitolo upaatuti pohutuwo.

² "Hulumatia maó tiyamamu wau tiilamu" uito yito palenta bohulio monto Allahu Taáala wolo danti,

³ deúito–yito: "Alihu yió sanangi tutu wau hayahaya tutumulumu todunia."

⁴ Mongo wutato tamowali tiyamo! Diila maó pohutuo mongo walaúmu odito rupalio tilinggula timongolio mowali moingo. Boliío maó, pouááawa mola timongolio wolo taratibu wau pongaajali lo Eeya.

⁵ Mongo wutato tamowali wato! Duduí maó palenta lituanimu todunia botie. Pohutua maó uito wolo laasa hulumati boli modungohe wau loú tióotutua debo odelo pohutuo maó limongoli toli Almasi lohihilao.

⁶ Diila maó potihutu odito bo tou timongoli he imatowalo, bo u moótapu poloílaalo pujio lomanusia. Bo timongoli mamusi mopohutu maó odelo wato li Almasi tadonggo hemoduduá otohila lo Allahu Taáala wolo lealeaatu lohila.

⁷ Kalaja u pohutuo limongoli odelo wato boito, mamusi kalajaa maó limongoli wolo hilaa u meengahe debo odelo Eeyaalo tahe bayawa limongoli, wau diila bo manusia.

⁸ Poótoloma maó deú timiídu tau, mopio wato meaalo taa molopato, mamololimo pahala monto Eeya to susuu–aliyaalo u mopiohe upilo hutulio.

⁹ Mongo wutato tamowali tuani! Mamusi timongoli ohuhaama odito olo ode mongo watomu. Diilalo maó pomakea aáan–jamuwaalo. Eelai deú timongoli wau mongo watomu boito, tutuuwauwa otuani ngota, deúito–yito Eeya tatosologa. Tio diila momilohe baya.

¹⁰ Pulitio maó, mamusi timongoli mowali molotolo wolo olootolo u lotapu limongoli lonto kawasa lo Eeya, sababu timongoli lotituwau wo–Lio.

¹¹ Pomakea maó ngoilanggubu pahi wumumuto lo popaatea uilohi mai lo Allahu Taáala olimongoli, alihu timongoli moó tahangi moluwali aáa–kaliyaalo u moleeto monto Ibilisi.

¹² Sababu ito mohipate diila moluwali manusia, bo moluwali ngoáamila olootolo lo lalaa–tiyaalo u motolo kawasa jamani u moleeto botie. Ito moluwali olootolo

roroo–huwaalo moleeta u motolo kawasa dulente daá.

¹³ Sababu uito, botia, pomakea maó ngoáamila pahi wimumuto popaatea lo Allahu Taáala, alihu todulahe u moleeto timongoli mambo moluwali tutuu–huwaalo musu. Wau alihu lapataó timongoli mohipate demola pulitio, timongoli donggo molotolo wau buheli.

¹⁴ Mamusi timongoli mopoó daha–dahaalo maó. Pomakea maó otatapu wau molotolo hilao duólo Allahu Taáala odelo bintolo wohuta, wau otuulusi odelo boó watemu.

¹⁵ Mamusi oleela u mopohabari Habari Mopiohe umodelo ode salaamati mowali sapatumu.

¹⁶ Timíidu wakutu pomakea maó palacayamu to Eeya odelo tingolo polame; wolo iimani boito timongoli mowali momate ngoáamila walaó pana otulu monto lbilisi.

¹⁷ Hamawa maó oáahu odelo helemu waja, wau tahuda lo Allahu Taáala odelo wamilo lo Rohullah.

¹⁸ Pohutuwalu maó ngoáamilalo boito sambela moduá mola u méi tulungi mai monto Allahu Taáala. To timíidu ohiyango,

poduáalo odelo woloolo mola Rohullah helodelo olimongoli. Mamusi timongoli laito dapadapato wau diila maó potaáluku. Poduáalo laito duólo umati lo Allahu Taáala.

¹⁹Wau duái mola watia olo, alihu towakutu watia mobisala, Allahu Taáala mongohi mai olaatia loíya u tuhata. Wau alihu watia loú buheli mowali mopoótaa hitua–tuawua u milakusudu hetuuolo Habari Mopiohe boito.

²⁰Sababu Habari Mopiohe boitolo, watia lowali ngotaalio lo utolia, wau botia woluo todelomo tutupa. Poduáalo mola alihu watia buheli mobisala pasali lo Habari Moiohe boito, odelo woloolo mola watia musi mobisala.

²¹Tei Tikhikus, wutatonto wau tamoomayawa taa tatapu wau molotolo hilao todelomo kalaja lo Eeya, mamopoótaa mai olimongoli totoonulalo u hitua–tuawua pasali lowatia, alihu otaawa limongoli owowoluwoa lowatia wau kalaja lowatia.

²²Uitolo sababuulio watia lolao mai olio odeli mongoli u mopoótaa owowoluwoa lamiaatia olimongoli ngoáamilalo, alihu moó udaá hilaa limongoli.

²³ Pohileaala duá Allahu Taáala, wau Eeya Isa Almasi mopoluasi mai ngoámila jamaá u motituwau wau mototoo-liánga wau debo palacaya li Almasi.

²⁴ Pohileaala duá Allahu Taáala mobalakati Wutato ngoámila tamo toliángo Eeyanto Isa Almasi wolo toliángo udiila mowali mooli. Hulumati lamiaatia, Paulus

Filipi

1 ¹ Mongo wutato umati lo Allahu Taáala ngoáamilalo tahi biluloáawa to Pilipi, wau tamalowali tuwau woli Isa Almasi. Olo mongo wutato taúwa wau tamoo–mantua jamaá! Watia, Paulus, wolei Timotius, mongo wato li Isa Almasi,

² mohalapu pohileaala duá Allahu Taáala ti Paapanto wau Eeya Isa Almasi mongohi mai balakati wau salaamati olimongoli.

³ Timíidu watia moó eela mola olimongoli, watia hemo lapali mola oduólo ode Allahu Taáala.

⁴ Wau timíidu watia moduá mola to Wutato ngoáamilalo, watia hemoduá wolo sanangi lohilao.

⁵ Watia helo lapali mola oduólo ode Allahu Taáala sababu anggadu bohulo dulahu dilumutu botia, timongoli malomantu olaatia lopo–loladu Habari Mopiohe lonto Allahu Taáala.

⁶ Allahu Taáala lohihilao talo lumula kalaja u mopiohe boito olimongoli, wau watia yakini Tio mamopo tolonga mola

kalaja boito dilumutu aahua todulahee ti Isa Almasi muli meidungga mai.

⁷Memangi to tambatilio watia o pongolaasa debo odelo uito olimongoli, sababu Wutato ngoáamilalo laito modudula to hilaa lowatia. Wau olo sababu timongoli moduduá mololimo peé–peéenta wolaatia, ponu uilohi mai lo Allahu Taáala olaatia; mopio masaatia botie toú donggo watia todelomo tutupa boli toú watia woluo to bulemengio u mopodulua wau momintengi Habari Mopiohe boito.

⁸Otaawa lo Allahu Taáala deú watia otutu mooloolo daá olimongoli wolo laasa toliángo tataabia lohilao monto li Isa Almasi lohihilao.

⁹Utieelo duá lowatia olimongoli: pohileaala duá timongoli lebe motoliángo Allahu Taáala wau timongotalio wau he oduhenga mola laito pongotota u otutu wau huhaama u molinepo.

¹⁰Loú odito otaawa limongoli molulaota wolo ulebe mopiohe daá, wau tutumuli mongoli mamobelesi monto aibu meaalo potulude penu boli wolo wambaño todulahee muli podungga mai li Almasi.

¹¹ Tutumuli mongoli mamolepata wolo huhutu u otu-otutuulo maó mopiohe u bo mowali pohutuo maó otilapulo li Isa Almasi lohihilao; yi Allahu Taáala mapolaiólo wau piluji boli puji.

¹² Otohila lowatia timongoli motota maó, deú susuu-aliyaalo umalo toduo mai olaatia tumbaó loósababu lebe dadaata maó tau lodungohe wau palacaya to Habari Mopiohe boito.

¹³ Akibatilio, ngoáamila tamoo-kawalia bele biluloá saaha li olongia wau tau-tauwalo wewolio tokota botie motota deú watia tilutupalio sababu watia hemomaya li Almasi.

¹⁴ Wau pilo tutupawa olaatia maloó sababu odaata lonto tau-tauwalo Nasara tokota botie lowali lebe yakini poli to Eeya, tilinggula timongolio lebe buheli helo pohabari tahuli lo Allahu Taáala lou diila wohe-wohe.

¹⁵ Memangi woluo dengolo lota towolota limongolio tahelo pohabari li Almasi sababu mohiihia wau mohuto mohahaamawa, bo tawewolio helo pohabari li Almasi o makusudu u mantali.

¹⁶ Tau-tauwala botie helohutu uito sababu timongolio motoliángo Allahu

Taáala wau olaatia, sababu otaawa limongolio deú Allahu Taáala malo poáhu mai olaatia u mopo biloheó deú Habari Mopiohe boito otutu.

¹⁷ Bo taawewo helo pohabari li Almasi wolo makusudu udiila mopiohe; timongolio helo pohabari li Almasi wolo makusudu u polohuna daá batanga hihilao. Woleeto boito timongolio hemo halapu u lebe mopoó suusa olaatia todelomo tutupa.

¹⁸ Bo diila mongola! Sababu penu boli woloolo mola olo, mopio uito pilohutu wolo makusudu u mantali meaalo wolo makusudu u talatala, bo debo ti Almasi tapilo habarilio olo; oditolio watia sanangi. Wau watia madebo molaasa odito,

¹⁹ sababu otaawa lowatia deú wolo duduu–aawaalo limongoli wau loú bilantua mai lo Rohu li Isa Almasi, watia malopatolio.

²⁰ U tióotutua otohilaa wau halapuo lowatia yito alihu watia sama–samaata diila bolo dia ohuna todelomo tuugasi lowatia. Boliío maó watia hemo halapu timíidu saaáti, laba–labaalo mopiohe daá masaatia, watia mowali opíili buheli tilinggula wolo jiwa wau batanga

lealeaatulo maó lowatia -- mopio watia tumutumulo mealo watia mate maó -- ti Almasi polaiólo.

²¹ Sababu olaatia, dulungo lo tutumulo laatia boti Almasi wambaó! Wau mate boliilio maó untungi.

²² Bo wonu wolo tutumulo todunia botie, watia mowali mohutu maó kalaja ulebe ohuna, yi diila otaawa lowatia toonu umusi tulaoto lowatia.

²³ Watia bilantangalio monto mohu-mohuwalia. Otohilaa daá lowatia mololaa maó dunia botie wau mola motibiluloá woli Almasi, sababu uitolo ulaba-labaalo mopiohu;

²⁴ bo, ode polohuna daá limongoli, deúito-yito lebe mopioheó wonu watia debo bilu-biluloá todunia.

²⁵ Watia yakini tosuáli boito. Uito sababuulio otaawa lowatia deú watia madebo motibiluloá wolo Wutato ngoáamilalo, alihu moó tulungi olimongoli mowali helebe molotolo wau helebe sanangi todelomo palacaya to Eeya.

²⁶ Sababu uito, wonu watia de mohualingai ode limongoli, timongoli tamalo tituwau woli Isa Almasi maa

oálasani lebe dadaata maó poli u molaasa meengahu tobatanga laatia.

²⁷ Naa, u polohuna daá botia yito deú timongoli tumumulo motuuúde lou wolo u pohile wolo moóohuú lo Habari Mopiohe pasali li Isa Almasi boito. Lou odito, diila otaawa laatia donggo moó dunggaya woli mongoli meaalo diila, watia mamó dungoheó deú timongoli molotolo motituwau wau mohipate peé–peéenta bo u makusudu tuwau wau tuwau ilohilaa; deúito–yito to opopalacaya u motuuúde wolo Habari Mopiohe monto Allahu Taáala boito.

²⁸ Mamusi timongoli laito buheli; diila maó oohe to tahi potuwalia olimongoli. Lou odito timongoli mopo biloheó deú timongolio tantu maólaahe, wau timongoli mamóohaama, sababu Allahu Taáala lohihilaalo talo poóhaama olimongoli.

²⁹ Sababu Allahu Taáala malongohi mai ponu olimongoli diila bo u palacaya li Almasi wambaó, bo u modutolo olo odeli Almasi.

³⁰ Masaatia timongoli olo moduduá wolaatia todelomo polohipate u tutuuwauwa; deúito–yito u peéenta iloontonga limongoli hipo hipatea laatia

mulooolio mai, wau udebo donggo hipo hipatea laatia dilumutu botia, debo odelo umaa ilodungohe limongoli botia.

2 ¹ Timongoli molotolo, sababu timongoli lotituwau woli Almasi. Wau timongoli iloliyango sababu ti Almasi lomonu olimongoli! Timongoli dilelo lo Rohullah, wau timongoli olo totooliánga wau lodehu hilao ngota timongota.

² Naa, ntali timongoli tióotutua moposanangi mai hilaa lowatia wolo susuu–aliyaalo botie: Poti tumulolo ngohilao wolo toliángo u tutuuwauwa, wolo pikiilangi u tutuuwauwa wau patuju u tutuuwauwa.

³ Diila maó pohutu hitua–tuawua sababu yiluntula lo polohuna daá batanga lohihilao, meaalo u mopo sombongi lobatanga. Boliño maó mamusi timongoli ngota–ngota wolo dupadupapa lohilao monganggapu taawewo lebe mopiohe wolo batanga lohihilao.

⁴ Poótuota maó polohuna daá lotaa wewo; diila bo polohuna daá batanga lohihilao.

⁵ Mamusi timongoli o himuúdu debo odelo ti Isa Almasi.

⁶To dasalilio Tio tutuuwauwa wolo Allahu Taáala, bo Tio diila molaasa deú owowoluwoa–Lio u ilahi boito musí poti bintengia–Lio.

⁷Bolíio maó, yilopa–Tio ngoáamilalo lapataó lowali tutuuwauwa debo odelo ngotaalio lowato. Tio lowali debo odelo manusia, wau oontonga tumutumulo debo odelo manusia.

⁸Tio lotidupapa lobatanga, wau tumutumulo wolo lodungohu to Allahu Taáala dilumutu yilate -- deúito–yito yilate tosalipu.

⁹Sababu uitolo Allahu Taáala lomuduá o–Lio lolai–laióolo maó, wau longohi o–Lio okokawasa ulebe udaá maó wolo ngoáamila okokawasa uwewo.

¹⁰Yi u mohulumati li Isa, ngoáamila mahaluku u tosologa, wau u todunia, wau u to walungo dunia mamolubo o–Lio.

¹¹Timongolio ngoáamilalo mamomasisi deú ti Isa Almasilo Eeya; loú odito Allahu Taáala ti Paapa polai@olo.

¹²Sababu uito, Mongo wutato taa otoliángo, odelo woloolo mola timongoli laito modungohe olaatia toú watia donggo tohuungi mongoli, yi lebe–lebelo maó botia toú lalaaminga, mamusi timongoli

debo modungohe olaatia. Timongoli mapilo aahu mai lo Allahu Taáala, yi potolo panilo tulusi alihu osalaamati limongoli mowali wimu-wimumuto ngo@aamilalo. Pohutua maó uito wolo hulumati wau paatuti ode Allahu Taáala, ¹³ sababu Allahu Taáala lohihilao tamokalaja mai todelomo batanga limongoli u mohutu olimongoli iloheela lohilao mowali mopo sanangi hilaa lo Allahu Taáala.

¹⁴ Kalajai maó totoonulalo u hitua-tuawua loú diila hili-hilimuta meaalo mohaamawa.

¹⁵ Louú odito timongoli mopo biloheó deú timongoli yito mongo walaó Allahu Taáala tadiila oáaibu, tatumu-tumula wolo hilaa tuulusi wau otutu tohuungo lotaa moleeto wau odusa. Wau touú timongoli mopo tunggulaó olimongolio habari u mongohi tutumulo, mamusi timongoli mowali ode limongolio debo odelo tinelo u molinelai mopobaango dunia. Wonu timongoli tumumulo debo odelo uito, de woluo alaasani olaatia u molaasa meengahe tomimbihu olimongoli touú ti Isa Almasi muli meidungga mai. Uito bukutilio deú

pilo tipaatea lowatia ilohuna wau tolopani lowatia otilapulio.

¹⁶(2:15)

¹⁷Tanu watia mapateelio mate-mateelo maó wau duhu laatia mowali debo odelo bake pilopaó toitaato loú wolo u pilodewo limongoli ode Allahu Taáala odelo tuoto deú timongoli palacaya to o-Lio. Wonu memangi uito musu odito, watia mosukuru mola tosuáli boito wau moduduá motiwengahe woli mongoli.

¹⁸Odito olo patutilio timongoli olo molaasa sanangi wau moduduá motiwengahe wolaatia.

¹⁹Watia palacaya deú wolo polo tulungi li Isa Eeya, watia huáa loólao mai olei Timotius ode limongoli, alihu watia oliyanga lohabari tomimbihu olimongoli.

²⁰Bo tei Timotiusilo tatuwa-tuwaulo taa u ngohilao wolaatia, wau tióotutua momikiilangi osanangi tutu limongoli.

²¹Noááámila tawewolio bo hemo ngulusi polohuna daá batanga lohihilao wambaño, diila polohuna daá li Isa Almasi.

²²Timongoli lohihilao maloóonto bukutilio deú tei Timotius ohuna. Tio malo kalaja tióopatea wolaatia u lopololadu Habari Mopiohe lonto Allahu Taáala.

Amiaatia duulota debo odelo walaó wolo tiyamo wambaó.

²³ Masababu uito, lolamemeta tou ilotaawa lowatia woloolo mola palakala lowatia de mopulitaó, watia mamolao olio ode limongoli.

²⁴ Watia palacaya deú wolo polo tulungi lo Eeya, watia lohihilao olo diilalo mohiheo mamola mobiilohe woli mongoli olo.

²⁵ Tomimbihu wutatonto tei Epaproditus tailao mai limongoli lomantu olaatia, watia molaasa palalu u muli meí walinga mola olio ode limongoli. Tio malohiyo olaatia tokalaja wau polohipate lowatia.

²⁶ Tio mooloolo daá to Wutato ngoáamilalo, wau tio balisa sababu timongoli maloótapu habari deú tio mongongoto.

²⁷ Memangi otutu tio mongongoto tunggula ngopeé yilate. Bo Allahu Taáala lomonu olio; wau diila bo to olio wambaó, bo to olaatia olo, alihu watia diilalo lebe suukali maó.

²⁸ Uito sababuulio lebe he@udaá mola olo hilaa lowatia u muli mopoáhu olio ode limongoli, alihu timongoli muli meengahe wonu timongoli modunggaya wolio, wau hilaa lowatia olo mowali moduóto.

²⁹ Oditolio, yimai maó tio wolo hilaa lealeaatu sanangi odelo ngotaalio lowutato ngoíimani. Halagai maó ngoáamila taa udebo odelo tio.

³⁰ Duólo polohuna daá tokalaja li Almasi, tio bolo ngopeé yilate; tio helo podutu nyawalio u longohi tulungi olaatia to tangguli mongoli.

3 ¹ Pulitio maó, Mongo wutatatuú, mamusi timongoli motiwengahu sababu timongoli malo tituwau wolo Eeya. Watia diila molaasa mobuheto u monguli mai wolo umaa tiluladei lowatia olimongoli toú dipolulio mai; sababu suáli boito mopiohe duólo o@aahu limongoli.

² Poódaha–dahaalo maó totau–tauwalo tahi pohutua susuu–aliyaalo u moleeto, tau–tauwalo tapaatuti unteelo 'apula'. Timongolio hipo huntulawa alihu tau–tauwala tunaalo.

³ Lebe–lebe pomaó itolo tau–tauwalo tamaa lololimo tuuna u tutuulio–tutu, diila timongolio. Ito lolubo Allahu Taáala loú dilelo lo Rohullah lohihilao, wau ito losukuru sababu ito tumutumulo lotituwau woli Almasi Isa. Ito diila lotiwunela toú u@uupaa–calawalo u osipati lahiri.

⁴ Tutuulio tutu watia mowali motiwunela wambaó toú u@uupaa-calawalo boito. Sababu wonu woluo tahingota-ngotaawa tamolaasa tio o alaasani u motiwunela to upacala u osiipati lahiri, yi watia lebe maó leeto.

⁵ Watia tiluuna toú oúmulu walu hui. Watia pilotutulio mai odelo ngotaalio lo Isiraílu, lonto suku bangusa Benyamin; watia taulo Ibrani pulua. Todelomo suáli ototaaáti todelomo bubuu-toóowalo agama lo Yahudi, watia yito pongawaá kaumu lo Parisi.

⁶ Watia tumbaó odito osumangati tilunggula watia helo ngalinaya jamaá. Wonu bilohela monto wimbihu Butoó agama lo Yahudi, watia tamopiohe ngota tadiila oáaibu.

⁷ Bo sababu ti Almasi, yi ngoáamilalo u omoóomolu he ilanggapu lowatia odelo tuwaulio umoó pa@eeda, botia lowali tuwaulio umoóluhi.

⁸ Diila bo wambaó susuu-aliyaalo boito; bo tumbaó totoonulalo u hitua-tuawua he ilanggapu lowatia odelo susuu-aliyaalo u bo moóluhi wambaío. U mililiki lowatia masaatia botie yito lebe ohalaga: deúito-yito motota li Isa Almasi, Eeyaaú.

Sababu ti Almasi, yi mailopato lowatia totoonulalo u hitua–tuawua. Ilanggapu lowatia ngoáamilalo boito odelo puputo wambaó, alihu watia mowali moótapu li Almasi,

⁹ wau otu–otutuulo ma@o motituwau wo–Lio. Wumbuta u mopiohe wolo Allahu Taáala diilalo tilolopani laatia lohihilao loú modungohe tobutoó lo agama. Masaatia watia owumbuta u mopiohe wolo Allahu Taáala, sababu watia palacaya li Almasi. Oditolio, wumbuta u mopiohe boito dungga–dungga mai monto Allahu Taáala, patopatoá to palacaya li Isa Almasi.

¹⁰ Tuwa–tuwaulo u otohila lowatia yito alihu watia motota li Almasi, wau moótodo kawsa u mopotumula o–Lio monto opopate. Otohila lowatia moduduá modutolo wo–Lio wau mowali tutuuwauwa debo odelo Tio todelomo suáli lo opopate–Lio.

¹¹ Wau watia mohalapu deú watia lohihilao mamuli potumulo–Lio mai monto opopate.

¹² Watia diila moloíya mai deú watia maílo tilapulo, meaalo malowali loiwimumuto ngo@aamilalo. Bo watia tulusi wambaó hemo tolopani mohama palaseni u pilopo

dapato li Isa Almasi. Woleeto boitolo Tio malohama olaatia wau lopowali olaatia miliki–Lio.

¹³Tantuulo ma@o, Mongo wutato, watia tutuulio ma@o diila molaasa deú watia maílo tilapulo loóhama palaseni boito. Bo woluo suáli tuwau u pohutuo lowatia, deúito–yito watia molipataó wolo uwoluo to wulea laatia wau motolopani tióotutua moóoma wolo uwoluo totalu.

¹⁴Uito sababuulio watia tumete@o tulusi motidulunga ode patuju pulitio umoó toduo ohohaama, deúito–yito tutumulo tosologa; woleeto boitolo Allahu Taáala lotianga olanto lotimbulude li Isa Almasi.

¹⁵Ito ngoáamila tamaa loontapo odelo dudelo lorohu, mamusi opíili odito. Bo wonu towolota limongoli woluo taa ohuhama wewo, yi Allahu Taáala mamó poópatatai olo olimongoli.

¹⁶Bo suáli botie wajibulio poótuotolo: Ito musi debo tumumulo moduduá wuúdu uma diluduáanto dilumutu botia.

¹⁷Mongo wutato ngoáamilalo! Duduí maó obaaya lowatia. Amiaatia malongohi mai obaaya u otutu, sababu uito poótuota maó tióotutua tahiapo duduáawa obaaya lamiaatia boito.

¹⁸ Watia matingga maito helo poótaa mai olimongoli, wau botia muli wulio mai lowatia olimongoli wolo hiyo–hiyongo, deú woluo dadaata taa u tutumulio mopoluusa boli lo opopate li Almasi tosalipu.

¹⁹ Tutumulo lotau–tauwala debo odelo uito pulitio maó mabinasa, sababu ila limongolio yito loduduó ilohilaa lobatanga limongolio lohihilao. Susuu–aliyaalo u moóolito tumbaó ui–uitolo u hepomangga limongolio; sababu timongolio bo hemo mikiilangi susuu–aliyaalo u motuhatawa wolo dunia botie wambaío.

²⁰ Bo ito yito walaga lipu losologa. Montetolo olo Olongia Tamoo–po@aahua olanto, Eeya Isa Alamasí, mamei dungga mai. Tiolo taheimaanto loú mooloolo.

²¹ Batanganto u molulupuhu wau mowali moáantulu botie, mamowali debo odelo batanga–Lio lohihilao u molai@o. Tio mowali mohutu mai uito sababu Tio motolo miliki kawasa umopo taáluku totoonulalo u hitua–tuawaua.

4 ¹ Sababu uito, Mongo wutatuú tatoliángo, odi–odieelo mola wajibulio timongoli tumumulo wolo tióotutua palacaya ode Eeya. Hilaa lowatia mooloolo

olimongoli! Timongolilo tamoó bangga olaatia wau talo eengahe olaatia.

² Wutato ti Euodia wau Wutato ti Sintike! Pohile lowatia tióotutua alihu Wutato ngohilao odelo tau–tauwalo tango iimani.

³ Duólo sahabati lowatia taa tatapu wau molotolo hilao, pohile lowatia olo alihu Wutato momantu taabua duulota boito. Timongolio malo kalaja tióotutua wolaatia helo pohabari Habari Mopiohe lonto Allahu Taáala; tutuuwauwa debo odelo tei Klemen wau ngoáamila taa wewolio tahemo kalaja peé–peéenta wolaatia. Tataa–nggulalo limongolio woluo todelomo Kitabi Taa Tumutumulo.

⁴ Pohileaala duá timongoli laito meengahu sababu timongoli matilu mumulo lotituwau wolo Eeya. Peéentapo watia moloíya mai: poti wengahulo!

⁵ Mamusi ngoáamila tau mowali moóonto pĩilimu ohale mopiohu. Sababu diilalo mohiheo Eeya mamei dungga mai.

⁶ Diila polawalo tomimbihu penu boli wolo. Todelomo totoonulalo suáli, poduáalo wau wudua mola hihilemu ode Allahu Taáala. Wolo palaluo limongoli, poótaa maó uito laito ode Allahu Taáala wolo molapali mola oduólo.

⁷ Yi salaamati monto Allahu Taáala udiila pongalo aakali opahamua lomanusia, mamodaha hilaa wau pikiilangi limongoli umalo tituwau woli Isa Almasi.

⁸ Pulitio maó, Mongo wutato, tuangi mola pikiilangi limongoli wolo susuu–aliyaalo u oboliilio, u paatuti pujiolo, deúito–yito susuu–aliyaalo u otutu, uhulu–hulumati, u aadili, mantali, molamahu, wau mopiohe.

⁹ Ponaówa maó wolo upilo balajali wau tilolimo limongoli lonto olaatia; mopio lonto tataa–heyaalo boli lonto totoonulalo huhutu lowatia. Allahu Taáala tapilo butua mai loú salaamati, mawoli mongoli.

¹⁰ Todelomo tutumulo laatia u lotituwau wolo Eeya, watia molaasa donggo boli sanangi tutu, sababu lapataó odito hiheolio, botia timongoli luli ilohiyango lotolo mikiilangi mola owowoluwoa lowatia. Makusudu lowatia deú diila pitualio timongoli malo lipata olaatia; timongoli memangi hemo poótuoto olaatia, bo timongoli diila ilohiyango u lopo biloheó.

¹¹ Tiloóowoli mai lowatia utie diila kalana watia ilodiaá, sababu watia malo balajali lolaasa sanangi loú wolo uwoluo.

¹² Watia maloólaasa tilumumulo ilodiaá sama–samaata, wau olo tilumumulo loú lebe–lebe. Maílotaawa lowatia lahasialio u motaalua lo owowoluwoa u penu boli odelo woloolo mola olo; mopio owowoluwoa maámulu meaalo owowoluwoa mosikini, mopio owowoluwoa dadaata ngoáamilalo meaalo owowoluwoa ilodiaá.

¹³ Wolo kawasa uilohi mai li Almasi odelaatia, watia loótoduo mai lotolo u lotaalua wolo totoonulalo owowoluwoa u hidala–dalaala.

¹⁴ Bo timongoli malo tulungi olaatia todelomo watia usuusa; wau wolo upilohutu limongoli boito memangi mopiohu.

¹⁵ Mongo wutato taulo Pilipi! Otutu otaawa limongoli lohihilao deú toú watia omoóomolu lololaa maó Makedonia, toú Habari Mopiohe boito pilo pololadu lowatia ubohulio, timongolilo tuwa–tuwaulo jamaá tahelo mantu olaatia; timongoli tuwa–tuwaulo taloduduá loólaasa paéeda wau luhilio peé–peéenta wolaatia.

¹⁶ Toú watia to Tesalonika wau leíbantu, malebe loú peéenta timongoli helolao dembulo odelaatia.

¹⁷ Uito diila oboliilio deú watia bo wambaó ohilaa mololimo wowohi. U otohilaa lowatia yito alihu watia mowali moóonto titii–lapuwaalo u moduhengo paéeda olimongoli.

¹⁸ Watia malo lolimo ngoáamilalo -- tumbaó lebe loú motuuheta! Ngoáamila wowohi uilao mai limongoli olaatia, matilolimo lowatia lonto olei Epaproditus. Botia watia maílo woluwoa lo ngoáamila upalaluo lowatia. Ngoáamila wowohi lonto olimongoli boito yito debo odelo boolo moonu lo bake u pilodewo ode Allahu Taáala wau u tilolimo lo Allahu Taáala wolo hilaa sanangi.

¹⁹ Allahu Taáala tahe tuboo lowatia, taleta–letaaó wolo okokaya todelomo li Isa Almasi, mamó poópolu mai totoonulalo upalaluo limongoli.

²⁰ Ilopujjalo mola Allahu Taáala ti Paapanto ohiheo–hiheolo maó! Amin.

²¹ Potunggula maó salamu lowatia ode ngoilanggubu umati lo Allahu Taáala talo tituwau woli Isa Almasi. Wau tolimoa maó olo salamu lonto mongo wutato tawoluo peé–peéenta wolaatia teea.

²² Ngoáamila umati lo Allahu Taáala tokota botie, laba–labaalo mopiohu

timongolio talonto bele biluloá li Kaisari,
lolao salamu olimongoli.

²³ Pohileaala duá Eeya Isa Almasi
mobalakati mai Wutato ngoáamilalo.
Hulumati lamiaatia, Paulus wolei Timotius

Kolose

1 ¹ Mongo wutato umati lo Allahu Taáala to Kolose, taa tatapu wau molotolo hilao motituwau woli Almasi!

² Odelo rasulu li Isa Almasi, -- to pilomuduá lo Allahu Taáala -- watia, Paulus, peé-peéenta wolo wutatonto Timotius, momolohone pohileaala duá Allahu Taáala ti Paapanto mongohi mai balakati wau salaamati olimongoli.

³ Amiaatia maloó dungohu deú timongoli palacaya li Isa Almasi wau timongoli motoliánga ngoáamila umati lo Allahu Taáala. Uitolo sababuulio toú amiaatia heloduá mola olimongoli, amiaatia laito molapali oduólo ode Allahu Taáala, ti Paapa Eeyanto Isa Almasi.

⁴ (1:3)

⁵ Timongoli palacaya wau timongoli motoliángo, sababu timongoli hemo tiwunela toú wolo umaa podapato lo Allahu Taáala tosologa olimongoli. Timongoli maloó dungohu pasali losuáli boito, toú Habari Mopiohe u otutu pilo tunggulai ode limongoli.

⁶ Habari lonto Allahu Taáala lololadulo mola ode ngoilanggubu dunia, wau tutumulo tau tulusi bilalakatia lohabari boito, tutuuwauwa debo odelo tutumuli mongoli bala–balakati tumulalo mai tosaaáti timongoli loódungohe pasali odehu hilaa lo Allahu Taáala wau tióotutua lo toloéelaó.

⁷ Suáli boito pilo tunggulai ode Wutato lei Epapras, sahabati taa otoliángo lamiaatia. Tio yito tahemo kalaja duóli Isa wau tahemo kalaja ode polohuna daá olanto.

⁸ Lonto o–Liolo amiaatia lodungohe deú wolo kawasa lo Rohullah timongoli lowali lo totooliánga.

⁹ Uitolo sababuulio amiaatia laito heloduá mola olimongoli anggadu amiaatia loódungohe tomimbihu olimongoli. Pilolohone lamiaatia ode Allahu Taáala alihu Rohullah mongohi mai tinepo wau huhama tilinggula timongoli motota maó loú wimu–wimumuto ngoáamilalo wolo u otohilaa lo Allahu Taáala.

¹⁰ Loú odito timongoli mowali tumumulo moduduá otohilaa lo Allahu Taáala, wau laito moposanangi hilaa–Lio, tilinggula todelomo totoonulalo u hitua–tuawua timongoli moówohi tilapulo to susuu–

aliyaalo u mopiohe. Wau pongotota limongoli pasali lo Allahu Taáala olo maa oduhenga mola olo.

¹¹ Pohileaala duá wolo kawasa lo Allahu Taáala u udaá, timongoli polooto-lo-Lio mai tilinggula timongoli mambo modutolo totoonulalo u hitua-tuawua wolo sabali wau sanangi lohilao

¹² wau wolo lapali oduólo odeli Paapa. Sababu ti Paapa boitolo talohutu mai olimongoli paatuti mololimo wolo upilo dapato lo Allahu Taáala ode umati-Lio todelomo yilaidia-Lio u mobaango.

¹³ Tio malo lopata olanto lonto kawasa u modiólomo wau lopo limbata olanto ode delomo bele biluloá saaha li onlongia lo Wala-ílo tapilonu-Lio.

¹⁴ Lo Wala-ílo boito ito yilopa-Tio; boliilio maó duduusaanto maa ilambungu-Lio.

¹⁵ Ti Almasi yito bayahu u moílaalo monto batanga lo Allahu Taáala udiila oontonga; Ti Almasi yito Walaó tamohuhula daá, lebe polohuna daá lotoonula u pilowali mai.

¹⁶ Sababu lotimbulude o-Liolo Allahu Taáala lopowali totoonulalo u hitua-tuawua tosologa wau toitaato dunia, totoonulalo u hitua-tuawua u oontonga wau udiila oontonga, leituwoto olo

ngoáamila rohu u okawasa wau u hemo malenta. Ngoilanggubu aalamu botie pilowali-Lio mai lotimbulude li Almasi wau odeli Almasi.

¹⁷Toú totoonulalo u hitua-tuawua dipoluo, ti Almasi maleimulo mai woluo. Wau sababu Tiolo olo yi totoonulalo u hitua-tuawua tinggai woluo to tambatilio.

¹⁸Tiolo taúwa lo batanga-Lio, deúito-yito jamaá, sababu Tiolo pilobutua mai lo tutumulo jamaá boito. Tiolo Walaó tamohuhula daá, tabohu-bohulio luli pilotumulai lonto opopate, alihu Tio lohihilao wambaó tamowali laba-labaalo polohuna daá loú totoonulalo u hitua-tuawua.

¹⁹Allahu Taáala lohihilaolo talo kahandaki alihu totoonulalo hitua-tuawua uwoluo tobatanga lo Allahu Taáala, woluo olo wolo wimu-wimumuto tobatanga lo Wala-ílo.

²⁰Wau lotimbulude to Walaó boito olo Allahu Taáala lolantu mai u lohutu totoonulalo u hitua-tuawua muli mopiiohe wo-Lio -- mopio totoonulalo hitua-tuawua u todunia, boli u tosologa. Allahu Taáala lohutu mai uito lotimbulude to opopate lo Wala-ílo to ayu salipu.

²¹ Mulooolio mai timongoli walawalahe monto Allahu Taáala. Timongoli helo muusu o-Lio sababu pĩli wau pikiilangi limongoli u moleeto.

²² Bo botia, wolo opopate lo Wala-ílo, Allahu Taáala lohutu mai wumbuta limongoli wo-Lio lowali luli lopiohe. Wolo dudelo boito timongoli lowali dilelo-Lio lotaalua Allahu Taáala todelomo owowoluwoa u mantali, belesi wau diila oáabu.

²³ Bo tantu timongoli debo musu tatapu wau molotolo hilao palacaya wau tihutihula motoheto to opopalacaya limongoli. Diila bolo timongoli mopo lopato harapani u mailohi-Lio mai olimongoli tou timongoli mololimo Habari Mopiohe monto Allahu Taáala. Habari boito mapilo habarilio ode timiídu tau to ngoilanggubu dunia. Wau woleeto boito olo watia, Paulus, malowali tamoomayawa.

²⁴ Botia watia sanangi modutolo ode polohuna daá limongoli. Sababu wolo dudutolo lowawaó laatia, watia mopo wimumuto wolo udonggo musu dutola li Almasi ode jamaá-Lio, deúito-yito batanga-Lio.

²⁵ Allahu Taáala lopoáhu olaatia lowali tamoomayawa jamaá–Lio u polohuna daá limongoli. Watia musi mopo tunggulo habari lo Allahu Taáala, ngoáamilalo;

²⁶ deúito–yito habari u ngotilonggadu hehetu–hetuto lotaunu yilalu mola hetiluó lo Allahu Taáala ode taa ngoáamila, bo botia piloílaalo mai ode umati–Lio.

²⁷ To umati–Lio boito Allahu Taáala ohilaa mopoílaalo donggo boli piohio wau udaáalio hitua–tuawua u milakusudu tiluu–ílo boito ode ngoáamila umati lomanusia. Hitua–tuawua u milakusudu tiluuó boito yito: ti Almasi woluo todelomo batanga limongoli, ubolilio maó timongoli mamoduduá moólaasa odudaá lo Allahu Taáala.

²⁸ Ti Almasi boitolo tahe pohabario lamiaatia ode timiídu tau. Amiaatia helo poéela wau longaajali olimongolio ngoáamilalo wolo totoonulalo tinepo. Patuju lamiaatia yito alihu timiídu tau mowali deloolo ode Allahu Taáala, odelo taa u moontapo todelomo susuu–aliyaalo rohu, sababu malo tituwau woli Almasi.

²⁹ U mongaato suáli boito watia helo kalaja tióopatea. Watia helo hipate wolo ngoáamila lotolo uilohi mai li Almasi

olaatia wau ukala–kalaja todelomo batanga laatia wolo polupolu lokawasa.

2¹ Otohilaa lowatia timongoli motota maó woloolo mola polutuio watia helo hipate ode limongoli wau ode limongolio tato Laodikia wau ngoáamila tadiila motota olaatia delo dudelo hihilao.

² Ngoáamilalo botie hepilohutu lowatia alihu hilaa limongolio mowali molotolo wau timongolio mototooliánga tilinggula timongolio moáita tutu mowali tuwau. Lou odito timongolio tióotutua mongalati boli yakini wau motota hitua–tuawua u milakusudu tiluuó Allahu Taáala, deúito–yito ti Almasi lohihilao.

³ Ti Almasilo talomuó totoonulalo tinepo wau pongotota lo Allahu Taáala u muloololio mai tutuuó.

⁴ Poótaa mai lowatia utie alihu timongoli diila bolo o aakalia penu boli lotatoonu olo lotaa bo mopiohu totunggilo toli mongoli.

⁵ Sababu eleponu watia molaminga woli mongoli, anggapuwalo deú watia woluo towolota limongoli. Wau watia meengahu moóonto olimongoli tuwau lohilao wau palacaya tutu li Almasi.

⁶ Mongo wutato malo lolimo li Isa Almasi odelo Eeya. Sababu uito mamusi timongoli tumumulo motituwau wo–Lio,

⁷ wau monguwaáta to o–Lio. Mamusi timongoli momongu tutumuli mongoli woli Almasi odelo patoío. Mamusi timongoli lebe palacaya maó li Almasi, moduduá wolo u mapilo ngaajali olimongoli. Wau mamusi hilaa limongoli daata–daatalo maó wolo lapali oduólo.

⁸ Mamusi timongoli mopoó daha–dahaalo maó, diila bolo woluo tamoheinga olimongoli wolo totoonulalo palasapa lomanusia udiila ohuna, bo moó lapalo wambaío. Tootoonulalo palasapa boito diila lonto li Almasi, bo lonto pongotota lomanusia wambaó wau lonto roro–huwaalo ukawa–kawasa todunia.

⁹ Sababu ngoáamila watade lo Allahu Taáala bilu–biluloá toli Almasi, deúito–yito to omanusia–Lio.

¹⁰ Wau kalana tumutumulo lotituwau woli Almasi, timongoli olo yilohia–Lio tutumulo lealeaatulo maó. Sababu ti Almasi yito taúwa lo timíidu rohu u okawasa wau u hemomalenta.

¹¹ Sababu lotituwau woli Almasi, timongoli matiluuna, diila wolo tuuna

upilohutu lomanusia, bo wolo tuuna u pilohutu li Almasi, talopo lopato olimongoli lonto kawasa lo watade u odusa.

¹² Sababu tou timongoli yilihualio, timongoli yilobungio peé-peéenta woli Almasi; wau wolo popolihi boito olo, timongoli loduduá luli pilotumu–Lio mai peé-peéenta woli Almasi karana timongoli palacaya tokawasa lo Allahu Taála tamalo potumulai li Almasi lonto opopate.

¹³ Muloololio mai, timongoli mailate delo dudelo lorohu kalana timongoli odusa, wau kalana timongoli diila tiluuna delo dudelo lahiri. Bo botia Allahu Taála lopotumulai olimongoli peé-peéenta woli Almasi. Allahu Taála malo ngambungu mai totoonulalo dusaanto,

¹⁴ wau diila lopomata tuladu lo bilolinto, u longanjamu olanto wolo dadaa-ntiyaalo u mobuheeto. Wolo lopo salipu maó tulade boito to ayu salipu, Allahu Taála lolulutaó ngoáamila daúwa ode olanto.

¹⁵ Tosalipu boito ti Almasi helohutu ngoáamila roroo-huwaalo u hemomalenta wau okawasa lowali diilalo okawasa. Timongolio pilowali hepo bibiilohe lotaa dadaata tou ti Almasi lodelo olimongolio

debo odelo tawalo todelomo nonaó lo polemboá tutuuyuta lo ohahama–Lio.

¹⁶Sababu uito diila maó polulia tau mopotala olimongoli tomimbihu uáalo wau minuumani, meaalo tomimbihu duduu–laheyaalo buka lo agama, meaalo totoonulalo lameyangi hulala bohu, meaalo tomimbihu dulahu Saabati.

¹⁷Ngoáamilalo boito bo wolilu wambaó monto susuu–aliyaalo u mamei dungga mai, bo loílaalo lo susuu–aliyaalo boito yito ti Almasi!

¹⁸Diila maó polulia batanga limongoli popoluhio lotaa u diila tióotutua motidupapa lobatanga wau tamolubo mamaa–laíkatiyalo. Tau boito batingga wolo pipii–kilangilio tomimbihu dunia wau u tolomodu hemo pomangga–mangga bibii–bibiilohio,

¹⁹tilinggula diilalo motidihu toli Almasi talowali taúwa. To walungo taúwa li Almasi, ngangaawaálo maó tataalo wau pilo potuwau lotoonula leleetualio, wau mobutu moduduá otohilaa lo Allahu Taáala.

²⁰Timongoli mailate peé–peéenta woli Almasi, wau mailopato lonto roroo–huwaalo ukawa–kawasa aalamu botie.

Naa, yilongola timongoli hitumula debo odelo taa donggo kiluwaasa lodunia botie? Yilongola timongoli taáluku tou wuwuu-uduwaalo debo odelo utie,

²¹ "Diila maó podedeta utie", "Diila maó polamita uito", "Diila maó polenggula utie"?

²² Ngoáamila wuúdu boito yito tomimbihu susuu-aliyaalo u odito pomake diilalo ohuna. Uito bo wuúdu wau totoonulalo pongaajali u pilohutu lomanusia.

²³ Memangi oontonga maó suáli boito molinepo, wolo nasehatilio alihu tau molubo malaíkati, mopodupapa batanga, wau moposikisa batanga; bo ngoáamilalo boito diila ohuna u mongotongo napusu lomanusia.

3 ¹ Timongoli maluli pilotumu-lai peé-peéenta woli Almasi. Sababu uito mamusi timongoli motolopani u moótapu susuu-aliyaalo u tosologa, touótonu ti Isa hemo malenta peé-peéenta wolo Allahu Taáala.

² Podulunga maó pikiilangi limongoli to susuu-aliyaalo uteto, diila to susuu-aliyaalo u todunia.

³ Sababu timongoli mailate, wau tutumuli mongoli tutuuó peé-peéenta woli Almasi todelomo Allahu Taáala.

⁴ Naa, pobutua mai lo tutumulo tutu limongoli yito ti Almasi wau de wonu Tio oontonga, timongoli olo mamó tibilohé peé-peéenta wo-Lio todelomo odudaá-Lio!

⁵ Sababu uito, pateilo maó totoonulalo otohílaa lodunia u laito mopoósuusa batanga limongoli, debo odelo polohuloto, susuu-aliyaalo udiila paatuti, ohílaa moóhuú, ohílaa u moleeto, wau ololanggamu (sababu ololanggamu yito tutuuwauwa wolo molubo balaahala).

⁶ Susuu-aliyaalo debo odelo uitolo u mopotoodei muluka lo Allahu Taáala totau-tauwalo tadiila hipo dungohe o-Lio.

⁷ Mulooololio mai timongoli lohíhilao olo hipoduduá totoonulalo ilohílaa boito, toú timongoli kiluwasalio.

⁸ Bo botia mamusi timongoli molapi maó susuu-aliyaalo u moleeto monto batanga limongoli: diilalo poingo, meaalo molilau meaalo o pongolaasa molonuó ode taa wewo. Diila maó poluwala sama-samaata monto tunggíli mongoli loíya u momuayo meaalo loíya u kootolo.

⁹ Diila maó pohimbulo ngota timongota, sababu tutumulo udeedelo wolo ngoáamila watadelio mailinggi limongoli.

¹⁰ Timongoli botia mailohia-Lio mai tutumula bohu. Timongoli yito manusia bohu, tadonggo hepo bohua-Lio mololaalaaita lo Talopowali mai olio, deúito-yito Allahu Taáala, loduduá rupa-Lio lohihilao. Makusudulio yito alihu timongoli motota lo Allahu Taáala wolo wimu-wimumuto ngo@aamilalo.

¹¹ Odelo akibati leeto boito madiduú ngoáamila polo hiihede towolota taulo Yahudi wau diila Yahudi, taa tiluuna wau taa diila tiluuna, diduú polo hiihede towolota lotaa deli wau taa diila oádabu, towolota lowato wau taa lolopato, sababu ti Almasi yito ngoáamilalo sama-samaata wau Tio lotituwau woli mongolio ngoáamilalo!

¹² Wutato yito umati lo Allahu Taáala. Allahu Taáala lomonu olimongoli wau lolulaota olimongoli u tolomodu lowali miliki-Lio. Uitolo sababuulio timongoli musi mopo biloheó modehu hilao, timongoli musi ohilaa mopiohe, motidupapa lohilao, molumboyoto lohilao, wau tahangi modutolo.

¹³ Timongoli musi sabali ngota timongota, wau moááámbungua wonu woluo taa oniyati ode taawewo. Eeya wolo hilaa sanangi longambungu olimongoli, oditolio timongoli olo musi mohuto mongambungu ngota timongota.

¹⁴ Wau ulebe polohuna daá, deúito–yito: Timongoli musi mototooliánga sababu toliángo boitolo u mopotuwau tutu to Mongo wutato ngoáamilalo tilinggula mowali wimu–wimumuto ngo@aamilalo.

¹⁵ Mamusi totoonulalo putusani limongoli tantuo maó lo odudame uilohi mai li Almasi todelomo hilaa limongoli. Sababu Allahu Taáala lotianga olimongoli u lowali pongawaá loú ngobatanga, alihu timongoli tumumulo todelomo odudame monto li Almasi boito. Mamusi timongoli mosukuru mola.

¹⁶ Mamusi totoonulalo pongaajali li Almasi u polupolu lobalakati meitahu ode delomo hilaa limongoli. Mamusi timongoli moááájalia wau tinggai mongohi nasehati wolo molinepo daá. Popolahua mola Jaburu wau puji poloílaalo momuji wau lalaahuwala lorohu; Popolahua mola ode Allahu Taáala wolo pongo laasa sukuru to delomo hilaa limongoli.

¹⁷ Ngoáamila wolo upohutuo meaalo loíya limongoli, mamusi uito pohutuwola wau loíyaalo to tangguli Isa Eeya. Posukurulo mola ode Allahu Taáala ti Paapa tou wolo u pilohutu li Isa olimongoli.

¹⁸ Mongo wutato tamowali dile taabua! Podungohulo to dilemu, sababu odi-odieelo mola patutilio pīlimu odelo taulo Nasara.

¹⁹ Mongo wutato tamowali dile talolaí! Toliáangi maó dilemu. Diila maó banggangai timongolio.

²⁰ Mongo walaó! Deúito-yito uwajibu olimongoli odelo taulo Nasara u laito modungohe tomongo dulaámu, sababu ui-uitolo umoó sanangi hilaa lo Allahu Taáala.

²¹ Mongo wutato tamowali tiyamo! Diila maó pongongoto hilaa lomongo walaúmu tilinggula timongolio mowali oolia lo halapani.

²² Mongo wutato tamowali wato! Todelomo toonulalo suáli, mamusi timongoli modungohe toli tuanimu u todunia botie. Diila maó podungohe to limongolio bo tou timongolio donggo hemongimato olimongoli, sababu timongoli ohilaa pujiolo. Dungohi maó

timongolio wolo hilaa u ihilasi, sababu timongoli mohulumati Eeya.

²³ Penu boli kalaja wolo u wohilio olemu, mamusi kalajai maó limongoli wolo hilaa u lealeaatu, debo odelo Eeyaalo tahe bayawa limongoli, wau diila bo manusia.

²⁴ Poótoloma maó deú timongoli mamololimo wuupa monto Eeya. Wolo upilopo dapato lo Eeya ode umati–Lio, uitolo u mawohi–Lio mai olemu. Sababu tuani taótutuulio maó donggo hebayawa limongoli yito ti Almasi lohihilao.

²⁵ Wau penu boli tatoonu tamohutu totala, mamomanta totoonulalo totalalio boito; sababu Eeya diila momilohe baya.

4 ¹ Mongo wutato tamowali tuani! Mamusi timongoli mopohutu maó mongo wato limongoli loú otutu wau aadili. Poótoloma maó deú timongoli olo otuani ngota tosologa.

² Mamusi timongoli moduá mola wolo moóolohu wau motidapa–dapatolo maó, sambela molapali oduólo ode Allahu Taáala.

³ Poduáalo mola olo ode lamiaatia alihu Allahu Taáala mongohi hiyango u mopiohe olamiaatia umopo loladu habari hitua–hituawua u milakusudu hetuuólo

pasali li Almasi. Sababu suáli boitolo yi watia masaatia botie woluo todelomo tutupa.

⁴ Poduáalo mola alihu watia mowali motombangai hitua-tuawua u milakusudu hetuuólo boito loú mopata-patatolo maó odelo woloolo mola patutilio.

⁵ Todelomo wumbuta limongoli wolo tau-tauwalo tadiila palacaya, mamusi timongoli tumumula molinepo wau momake timíidu hiyangio loú mopio-piohulo maó.

⁶ Mamusi susuu-aliyaalo uiloíya limongoli laito moósanangi wau moóheinga. Mamusi otaawa maó limongoli woloolo mola patutilio molameta totoonulalo yiyintu lotau.

⁷ Tei Tikhikus, wutatonto taa otoliángo, mamó poótaa mai olimongoli totoonulalo u hitua-tuawua pasali lowatia. Tio tatapu wau molotolo hilao mokalaja peé-peéenta wolamiaatia duólo Eeya.

⁸ Watia molao mai olio ode limongoli wolo alaasani alihu otaawa limongoli owowoluwoa lamiaatia wau timongoli oliyanga.

⁹ Tei Onesimus mamonaó peé-peéenta wolei Tikhikus; tio ngotaalio lowaiti

mongoli. Tio taa utatapu wau molotolo hilao, wau amiaatia motoliángio. Tio wolei Tikhikus mamó poótaa mai olimongoli totoonulalo u hitua-tuawua uilowali totambati lowatia botie.

¹⁰ Tei Aristarkus, tawoluo todelomo tutupa peé-peéentaa wolaatia, lolao salamu ode limongoli. Odito olo tei Markusi, walaó mohutato wolei Barnabas. (Timongoli mailaolaa habari u molutulaó olio wonu tio monaó mai ode limongoli).

¹¹ Salamu olo lonto olei Isa tailunte Yustus olo. Lonto tau-tauwalo Yahudi tamalo malacaya li Isa Eeya, bo timongolio toulota wambaío tabotia hemokalaja peé-peéenta wolaatia u hemoponaó tuugasi lonto Allahu Taáala. Timongolio tióotutua loótulungi daá olaatia.

¹² Salamu lonto olei Epapras. Tio olo lonto waiti mongoli. Tio wato li Isa Almasi, talaito hemoduá mola loú tatapu wau molotolo hilao ode limongoli. Hepilo hilelio wolo tióotutua to Allahu Taáala alihu iimani limongoli mowali molotolo wau timongoli tióotutua mowali moontapo, alihu timongoli loú wimu-wimumuto ngoáamilalo modungohe tou otohilaa lo Allahu Taáala.

¹³ Hesilakusia lowatia lohihilao deú tio malo kalaja tióotutua ode limongoli wau ode tau-tauwalo to Laodikia wau Hierapolis.

¹⁴ Ti Dokuteri Lukasi, taa otoliángonto, wau tei Demas lolao salamu olimongoli.

¹⁵ Potunggula maó salamu lamiaatia ode mongo wutato Nasara to Laodikia; olo odelei Nimpa, wau tojamaá tahe motabia tobelelio.

¹⁶ Lapataó tulade botie pobacalio maó olimongoli, tolo paniyalo alihu uito pobacaalo olo tojamaá u to Laodikia. Odito olo timongoli lohihilao musi mobaca maó tulade umaa laololio mai monto Laodikia ode limongoli.

¹⁷ Wau polelea maó olei Arkhipus, "Poólapata maó tuugasi uilohi mai olemu huna momaya to Eeya."

¹⁸ Salamu lonto olaatia, Paulus. Watia lohihilao talo luladei tulade botie. Diila maó lipata deú watia donggo todelomo tutupa! Pohileaala duá Eeya mobalakati mai olimongoli. Hulumati lamiaatia, Paulus

1 Tesalonika

1 ¹ Mongo wutato jamaá to Tesalonika, talowali umati lo Allahu Taáala wau Eeya Isa Almasi: Amiaatia, deúito–yito Paulus, Silas wolei Timotius momolohone bolo potala Allahu Taáala ti Paapanto wau Eeya Isa Almasi mongohi mai balakati wau salaamati olimongoli.

² Amiaatia laito hemo sukuru mola ode Allahu Taáala sababu Wutato ngoáamilalo. Timíidu amiaatia moduá mola ode Allahu Taáala wau ti Paapanto, amiaatia laito hemoéela olimongoli. Amiaatia laito hemoduá mola olimongoli. Ileela lamiaatia woloolo mola timongoli helo pobiloheó todelomo huhutu deú timongoli palacaya li Almasi, woloolo mola timongoli helo toliángo taa wewo tilinggula lomaya olimongolio, wau woloolo mola timongoli helo tiwunela lou motoheeto to Eeyanto Isa Almasi.

³ (1:2)

⁴ Otaawa lamiaatia, Mongo wutato, deú Allahu Taáala lomonu olimongoli wau

malo lulaota olimongoli lowali u tolomodu miliki–Lio.

⁵ Sababu amiaatia mopo tunggulai Habari Mopiohe tolimongoli diila wolo loíya wambaó, bo olo wolo kawasa wau wolo Rohullah. Wau amiaatia mayakini daá lou u obobanari lo Habari Mopiohe boito. Otaawa limongoli woloolo mola amiaatia tumutumulo ode polohuna daá limongoli tou amiaatia woluo tohuungi mongoli.

⁶ Timongoli loduduá obaaya lamiaatia wau obaaya lo Eeya. Eleponu timongoli lodutolo daá, timongoli lololimo maó wolo wengahe habari upilo habari lamiaatia olimongoli. Owengahe boito yilohi mai lo Rohullah.

⁷ Woleeto timongoli lowali obaaya ode ngoáamila taulo Nasara u to Makedonia wau Akhaya.

⁸ Sababu tumulalo maó monto olimongoli, habari pasali lo Eeya malo loladu demola Makedonia wau Akhaya. Wau diila bo uito wambaío; tumbaó habari pasali woloolo mola timongoli palacaya to Allahu Taála malei dungga ode utoonulalo maó, tilinggula amiaatia diilalo palalu moloíya wolo–wolo.

⁹ Ngoáamila tau boito hemobisala pasali woloolo mola timongoli lololimo olamiaatia tou amiaatia omoóomolu lonaó mai ode limongoli. Timongolio helo bisala tomimbihu woloolo mola timongoli lololaa maó totoonulalo balaahala wau lonaó mai ode Allahu Taáala tuwa-tuwaulo tatumu-tumulo u motiwato to o-Lio.

¹⁰ Timongolio helo bisala olo pasali woloolo mola timongoli motiwunela to podungga mai lo Walaó Allahu Taáala monto Sologa, deúito-yito ti Isa Almasi, tamaa pilotumulai lo Allahu Taáala lonto opopate. Ti Isa boitolo olo tamopo aahu olanto monto muluka lo Allahu Taáala u mamei dungga mai.

2 ¹ Mongo wutato! Otaawa limongoli lohihilao deú nonaó mai lamiaatia ode limongoli ohunalio.

² Otaawa limongoli deú tou amiaatia diipo lonaó mai ode limongoli to Tesalonika, amiaatia maa ilalinaya wau hilinalio to Pilipi. Bo eleponu dadaata tahelo tehengi olamiaatia, Allahu Taáalanto malongohi mai olamiaatia obobuheli u lopohabari olimongoli Habari Mopiohe u asaliilio mai lonto o-Lio.

³ Titiango lamiaatia olimongoli diila tuwaulio lototala; diila olo wolo makusudu udiila mantali meaalo u mohimbulo.

⁴ Diila! Amiaatia diila mobisala u mopo sanangi hilaa lotau, bo u mopo sanangi hilaa lo Allahu Taáala, talotesi hilaa lamiaatia. Sababu amiaatia ilanggapu paatuti lo Allahu Taáala u mopo loladu Habari Mopiohe boito.

⁵ Otaawa limongoli lohihilao deú diila peénta maó amiaatia oloíya mopio meaalo mopolapalo olimongoli u moluu@o totoonulalo makusudu u langgamu. Allahu Taáala sakusi–Lio!

⁶ Amiaatia diila olo hipo tolopania u moótapu poloilaalo momuji monto tau -- mopio monto olimongoli meaalo monto taa wewo. Otutuulio maó odelo rasulu li Almasi, amiaatia mowali wamba@o mohile wolo moóohuú u hitua–tuawua monto olimongoli.

⁷ Bo amiaatia lotihutu osikapu molumboyoto lohilao toú woluo tohuungi mongoli debo odelo tiilo ngota hemolaala mongo walaío.

⁸ Sababu toliángo lamiaatia, amiaatia dapadapato mongohi mai olimongoli diila bo wambaó Habari Mopiohe u monto

Allahu Taáala boito, bo tutumulo lamiaatia olo. Sababu amiaatia motoliángo daá olimongoli!

⁹Tantu donggo oéela limongoli woloolo mola sikisaalio amiaatia helo tolopani wau lohipate. Hui wau dulahu amiaatia hipo kalajawa alihu amiaatia diila mopoósuusa penu boli ngotaa maó limongoli tou amiaatia mopo lolade Habari Mopiohe monto Allahu Taáala boito olimongoli.

¹⁰Amiaatia tumutumula lou mantali, otutu wau diila oáaibu toli mongoli tamalo malacaya li Almasi. Timongolilo mongo sakusi lamiaatia, odito olo Allahu Taáala.

¹¹Otaawa limongoli deú amiaatia lopohutu olimongoli ngota-ngota debo odelo tiyamo ngota helo pohutu maó tomongo waláio.

¹²Amiaatia monaseehati mai olimongoli, amiaatia mongohi mai sumangati olimongoli wau amiaatia mohuntulai alihu timongoli tumumulo odito rupalio tunggula moó sanangi hilaa lo Allahu Taáala. Sababu Allahu Taáala malo tianga olimongoli u lowali walaga Dunia Bohu lo Allahu Taáala wau mo@olaasa oduduá-Lio.

¹³ Donggo Woluo poli suáli tuwau uwewo ulohutu olamiaatia lolapali oduólo ode Allahu Taáala. Suáli boito yito, deú tou amiaatia lopo tunggulai habari lonto Allahu Taáala olimongoli, timongoli lodungohe wau lololimo habari boito diila odelo habari lonto manusia, bo odelo habari u tutuulio tutu lonto Allahu Taáala. Tiolo tadonggo kalakalaja todelomo batanga limongoli tapalacaya li Almasi.

¹⁴ Mongo wutato, suáli uilaasa limongoli máilo laasawa olo lo jajaa-maáalo Allahu Taáala to Yudea talowali miliki li Almasi. Timongoli loólaasa polodutolo lonto wimbihu bangusa limongoli lohihilao, tutuwauwa debo odelo ilolaasawa lo jajaa-maáalo Allahu Taáala to Yudea boito towimbihu tau-tauwalo Yahudi.

¹⁵ Tau-tauwala boito talomate li Isa Eeya wau mongo nabi yila-yilateelo maó, wau helo ngalinaya olamiaatia. Miluusuu limongolio ngoáamila tau, wau Allahu Taáala sama-samaata diila sanangi olimongolio.

¹⁶ Tumbaó timongolio helo monto-montolo olamiaatia u mopohabari to babaa-ngusawalo diila Yahudi habari umoó aahu babaa-ngusawalo boito.

Loú odito tau-tauwalo Yahudi boito he iloduhenga mola tulusi duduu-sawaalo limongolio dilumutu jumulaalio wimu-wimumuto. Wau botia timongolio pulitio ilodungga muluka lo Allahu Taáala!

¹⁷Bo mongo wutato, tumulalo mai amiaatia lobuáala ngopeé mola woli mongoli -- lobuáala tomato bo diila tohilao -- amiaatia bo lebe mooloolo olimongoli wau helo tolopani tióotutua u muli modunggayaya woli mongoli!

¹⁸Amiaatia oniyati u mobiilohe wolimongoli; wau watia, malo himontala peéenta poóoluo, bo Ibilisi helo montolo olamiaatia.

¹⁹Otutu timongolilo halapani wau oweengahe lamiaatia. Sababu de wonu ti Isa Eeya meidungga mai, wau ito motaalua wo-Lio, yi timongolilo tamamowali obobangga lamiaatia!

²⁰Memangi timongolilo obobangga wau oweengahe lamiaatia!

3¹Pulitio maó owoooloolo lamiaatia diilalo iloótonga. Sababu uito amiaatia lomikiilangi mola lebe mopiohe amiaatia tolaalio tutuwau to Atena,

²toú amiaatia donggo molao mota wutatonto tei Timotius. Tio ngotaalio

tamoomayawa Allahu Taáala tahemo kalaja peé–peéenta wolamiaatia u hemo pohabari Habari Mopiohe pasali li Almasi. Amiaatia molao mai olei Timotius ode limongoli alihu tio mopolotolo olimongoli wau mohuntula olimongoli u lebe palacaya li Almasi.

³ Louú odito diaaluo penu boli ngotaa maó monto olimongoli tatumouli sababu totoonulalo polo dutolonto botie. Otaawa limongoli lohihilao deú totoonulalo polodutolo boito leituwoto tolanjana lo Allahu Taáala ode olanto.

⁴ Touú amiaatia donggo peé–peéenta woli mongoli, amiaatia malo poótaa mai olimongoli leimulo deú ito mamodutolo. Wau uito memangi tutuulio tutu malotoduo; otaawa limongoli lohihilao uito.

⁵ Uitolo sababuulio watia molao mai olei Timotius, sababu watia ohilaa daá motota woloolo mola ololañi mongoli todelomo suáli palacaya li Almasi. Watia molawalo bolo Ibilisi moó heinga olimongoli tilinggula ngoáamila tolopani tioopate daá lamiaatia mowali dia ohuna.

⁶ Botia tei Timotius malo hualingai wau malo potunggulai olamiaatia habari

moéengahe pasali woloolo mola timongoli palacaya li Almasi wau totooliánga. Tio lopoótaa mai olamiaatia deú timongoli laito hemoéela u mopiohe olamiaatia todelomo hilaa limongoli. Wau timongoli ohilaa modunggayá wolamiaatia, debo odelo amiaatia olo ohilaa modunggayá woli mongoli.

⁷ Uitolo sababuulio, Mongo wutato, todelomo totoonulalo u mototolo wau polodutolo lamiaatia, amiaatia iloliyanga lohabari pasali limongoli. Palacaya limongoli toli Almasi mopoúdaá hilaa lamiaatia,

⁸ tilinggula botia amiaatia molaasa otu-otutuulo maó tumutumulo, asali timongoli debo tihutihula molotolo, motituwau wolo Eeya.

⁹ Donggo boli udaálio pongolaasa sukuru lamiaatia ode Allahu Taáala toú ngoáamila oweengahe u ilolaasawa lamiaatia totalu-Lio sababu timongoli.

¹⁰ Hui dulahu amiaatia helo molohone mola to Eeya wolo lealeaatu lohilao, alihu amiaatia mowali modunggayá lohihilao woli mongoli u mopo wimumuto wolo upalaluo limongoli ode palacaya toli Almasi odelo woloolo mola patutilio.

¹¹ Pohileaala duá Allahu Taáala ti Paapanto lohihilao, wau Eeyanto Isa mopo payadu mai dalalo olamiaatia u modunggaya woli mongoli!

¹² Pohileaala duá Eeya mohutu mai olimongoli lebe motoliánga ngota timongota wau lebe motoliángo ngoáamila tau, tilinggula toliáangi mongoli boito hemo duduuhenga mola tutuuwauwa debo odelo toliángo lamiaatia olimongoli.

¹³ Louú odito Eeya mamó poóloto lai hilaa limongoli, tilinggula timongoli mantali wau diila oáaibu totalu lo Allahu Taáala ti Paapanto, tou Eeyanto Isa meidungga mai peé-peéenta wolo ngoáamila taa lowali miliki-Lio.

4 ¹ Pulitio maó Mongo wutato, amiaatia malongohi mai obaaya olimongoli tomimbihu woloolo mola timongoli musi tumumulo u moposanangi hilaa lo Allahu Taáala. Memangi timongoli maa tilumumulo debo odelo uito. Bo botia tokawasa li Isa Eeya, amiaatia mohile louú tióotutua olimongoli wau mohuntulai alihu timongoli lebe motolopani maó todelomo suáli boito!

² Sababu maílotaawa limongoli popoo-tuhatawalo u mailohi mai lamiaatia olimongoli tokawasa li Isa Eeya.

³ Uti-utieelo kahandaki lo Allahu Taáala: Alihu timongoli tumumulo tolomodu ode o-Lio, mantali, mopo walaheó totoonulalo huhutu u huloto.

⁴ Timíidu mongo loláí towolota limongoli musi motota woloolo mola tumumulo wolo dilelio, wolo dudelo umoó sanangi hilaa lo Allahu Taáala wau manusia.

⁵ Diila maó potitumulo moduduá u otohilaa lonapusu ode dilemu, debo odelo u hepilohutu lotaa diila hitootawa lo Allahu Taáala.

⁶ Todelomo suáli debo odelo uito, diila maó pohutu totala penu boli ngotaa towutatio, meaalo mohimbulo olio. Omoóomolu amiaatia malo poéelai lou moóohuú olimongoli, deú Eeya mamu huumani mai tahipo hutua totala debo odelo uito.

⁷ Allahu Taáala motianga olanto, diila alihu ito tumumulo huloto, bo alihu ito tumumula wolo dudelo u moéengahe hilaa-Lio.

⁸ Taa diila mololimo pongaajali botie, diila bo potouli lomanusia, bo olo diila

mololimo Allahu Taáala talongohi mai Rohu-Lio u mantali olimongoli.

⁹Diilalo palalu olamiaatia moluladei olimongoli pasali woloolo mola timongoli musi motoliánga mongo wutato tango iimani. Timongoli lohihilao maílaajali lo Allahu Taáala u mototooliángo.

¹⁰Wau suáli botie mapilo biloheó limongoli ode ngoáamila wutato ngoíimani to ngoilanggubu Makedonia. Bo, Mongo wutato, amiaatia mohile lou tióotutua, alihu tutumuli mongoli mowali lebe mopioheó.

¹¹Potolo panilo mola tumumulo lou duoduóoto wau diila motutuu-wanga wolo suáli lotaa wewo. Mamusi timongoli mokalaja mopeehu lijiki lohihilao, odelo woloolo mola u mapilo malentai lamiaatia omoóomolu olimongoli.

¹²Wonu timongoli tumumulo odito, timongoli diila motiwunela penu boli olo tatoonu, wau tau-tauwalo tadiila palacaya li Almasi, mamu hulumati olimongoli.

¹³Mongo wutato, amiaatia motohilaa alihu timongoli motota maó u otutulio tomimbihu tau-tauwalo tamailate; alihu timongoli diila motisukari lohilao debo odelo tau-tauwala wewo tadiila oharapani.

¹⁴ Ito palacaya deú ti Isa mailate wau luli tilumumulai. Uito sababuulio ito palacaya olo deú Allahu Taáala mamuli mopo tumulai ngoáamila taa palacaya li Isa wau tamailate, alihu timongolio tumumulo peé-peéenta wo-Lio.

¹⁵ Tomimbihu suáli boito, uti-utieelo pongaajali lo Eeya u ohilaa potunggulo mai lamiaatia olimongoli: Tou ti Isa Eeya meidungga mai, ito tadonggo hitumula diila tameimulo wolo tau-tauwalo tamailate leimulo.

¹⁶ De malaíkati udaá mamó ngibode mola wolo suala u moóohuú wau torompeti lo Allahu Taáala potingohulo odelo tuoto lopalenta. Lapataó ti Isa Eeya lohihilao mamó tuhutai monto sologa, wau tau-tauwalo Nasara tamailate mapo tumulo-Lio mai meimulo.

¹⁷ Lapataó uito, ito tadonggo tumutumulo tou boito mapeé-peéenta bintaó-Lio woli mongolio ode delomo heengo mola modunggayá wolo Eeya todulente. Lapataó ito mamó tibiluloá wolo Eeya ohiheo-hiheolo maó.

¹⁸ Sababu uito, mamusi timongoli mopopoóo lotolaó lohilao, lou momake tataa-heyaalo botie.

5 ¹ Mongo wutato, diila palalu amiaatia moluladei olimongoli omolua wakutuulio utuhata susuu–aliyaala boito mamotoduo mai.

² Sababu otaawa limongoli lohihilao loú mopatato deú Dulahu podudungga mai lo Eeya boito mamei dungga debo odelo tamootaówa meidungga toú hui.

³ Wonu bolo tau moloíya, "Ngoáamilalo aamani wau moduóto," yi toú boitolo debolo timongolio maódungga loú obobinasa, wau diaaluo penu boli ngotaa maó tamoólahi. Suáli boito debolo motoduwolo mola, debo odelo laasa mongongoto u meidungga ode taabua ngota tamamo potutu mai.

⁴ Bo timongoli diila taa hitumula todelomo u modiólomo, tilinggula dulahe boito moó salabangu olimongoli debo odelo podudungga mai lo tamootaówa.

⁵ Wutato ngoáamilalo yito taa hitumula todelomo u mobaango; timongoli leituwoto todulahe u mobaango. Ito diila taa hitumula todelomo u modiólomo, meaalo tatuwo–tuwoto toú hui u modiólomo.

⁶ Sababu uito ito diila mowali bo hituluhe wambaó debo odelo taawewo. Ito musi

mopoódaha wau pikiilanginto musí mobaango.

⁷ Toú hui tau motuluhi, wau toú hui olo tau mowali huwoáalo.

⁸ Bo ito botie tau-tauwalo tahituwota todulahe u mobaango; sababu uito pikiilanginto musí mobaango. Ito musí debo palacaya to Eeya wau motoliángo tau-tauwalo wewo wau motiwunela louú yakini deú Allahu Taáala aahu mai olanto. Uitolo tingolo u moduólai olanto todelomo mohipate moluwali u modiólomo.

⁹ Allahu Taáala lolulaotai olanto diila u hukuu-maniyolo, bo u poáahuwolo, motimbulude to Eeyanto Isa Almasi.

¹⁰ Tio yilate ode olanto alihu toú Tio demei dungga mai -- diila otaawa ito donggo hitumula, diila otaawa ito mailate -- ito mowali tumumulo peé-peéenta wo-Lio.

¹¹ Sababu uito, mamusi timongoli debo mohu huuntula wau mopopoóo lotolaó, tutuuwauwa debo odelo udonggo hepohutuo limongoli masaatia botie.

¹² Mongo wutato, pohile lamiaatia louú tióotutua alihu halagai maó limongoli tau-tauwalo tahipo kalajawa tohuungi mongoli; deúito-yito timongolio

tamaa tilulaoto Eeya u motitaúwa wau monaseehati olimongoli.

¹³ Pohutua maó timongolio loú ohuluhumatilo maó wau wolo laasa toliángo sababu moéela mola wolo u hepilohutu limongolio. Poti tumulolo laito loú mopiohe wau dame.

¹⁴ Pohile lamiaatia olo, Mongo wutato, poéela maó loú mopiohe wau dame taa diila mohuto mokalaja; potatapua wau poólotola maó hilaa lotaa hiwoohea; tulungia maó taa palalu tulungialo wau posabalilo totaa ngoáamila.

¹⁵ Poódahai maó alihu diila bolo woluo tamomalasi u moleeto wolo u moleeto. Potolo panilo laito mohutu umopiohe, ngota timongotalio wau ode taa ngoáamila.

¹⁶ Mamusi timongoli laito motiwengahu,

¹⁷ wau poduáalo mola laito.

¹⁸ Todelomo totoonulalo owowoluwoa mamusi timongoli mosukuru, sababu uitolo u otohilaa lo Allahu Taáala monto olimongoli odelo taa tumu–tumulo motituwau woli Isa Almasi.

¹⁹ Diila maó enggadea Rohullah.

²⁰ Diila maó anggapua gambangi hahaa–baliyaalo uilohi mai lo Rohullah.

²¹ Totoonulalo u hitua–tuawua musi tesiyolo, wau umopiohe musi duduálo.

²² Tolai maó totoonulalo u moleeto.

²³ Pohileaala duá Allahu Taáala lohihilao talongohi olanto salaamati, mopowali mai olimongoli taa u tióotutua tumumulo tolomodu ode Allahu Taáala. Pohileaala duá Allahu Taáala modaha mai batanga limongoli ngoilanggubulo maó, mopio rohu, nyawa meaalo wawaí mongoli, tilinggula diila o aibulio toú Eeyanto Isa Almasi muli meidungga mai.

²⁴ Allahu Taáala, tamalo tianga olimongoli, mamohutu mai suáli boito sababu Tio tatapu wau molotolo hilao.

²⁵ Duái mola amiaatia, Mongo wutato!

²⁶ Posasaa–lamuwalo ngoáamila wolo tataabia lohilao odelo wutato Nasara.

²⁷ Tokawasa lo Eeya, pohile laatia lou tióotutua alihu timongoli mopobaca maó tulade botie ode ngoáamila wutato tango–iimani.

²⁸ Pohileaala duá Eeyanto Isa Almasi mobalakati mai olimongoli. Hulumati lamiaatia, Paulus

2 Tesalonika

1 ¹ Mongo wutato jamaá to Tesalonika, talowali umati lo Allahu Taáala ti Paapanto wau Eeya Isa Almasi! Amiaatia, deúito–yito Paulus, Silas wolei Timotius.

² Motiwunela pilopodehu duá Allahu Taáala ti Paapanto wau Eeya Isa Almasi mongohi mai balakati wau salaamati olimongoli.

³ Mongo wutato, amiaatia laito musi molapali mola oduólo ode Allahu Taáala sababu timongoli. Wau memangi patutilio amiaatia mohutu maó odito, sababu timongoli helebe palacaya li Almasi, wau timongoli helebe motoliánga ngota timongota.

⁴ Uitolo sababuulio yilongola amiaatia hemobisala pasali limongoli timiídu amiaatia mobiilohe wolo jajaa–maáalo Allahu Taáala. Wolo weengahe amiaatia helo hungguli maó woloolo mola timongoli debo tióotutua palacaya li Almasi todelomo polo ngalinaya wau polodutolo u ilolaasawa limongoli.

⁵ Wau teteeyelo loilaalo donggo boli aadiliilio pomutoó Allahu Taáala: Timongoli malo dutolo sikisa sababu Dunia Bohu lo Allahu Taáala, wau sababu uito timongoli maa áanggapu paatuti u tumuwoto ode delomio.

⁶ Tio mamohutu mai wolo u aadili, wau mamolontuli polodutolo totaa helohutu olimongoli lodutolo.

⁷ Wau toli mongoli u masaatia botie dutodutolo -- odito olo to lamiaatia -- Allahu Taáala mamongohi mai olulia todulahu Eeya Isa motuhutai monto sologa wau mopobilohei batanga-Lio wolo mamaa-laíkati-Lio tamolotolo boli buheli daá

⁸ wau wolo tulu uléi-léiita. Tio motuhutai u mohukuumani tau-tauwalo tadiili hipo mandungia Allahu Taáala wau tadiila motohilaa tumumulo motuuúde wolo Habari Mopiohe pasali li Isa Eeyanto.

⁹ Tau-tauwala boito mamololimo hukuumani obobinasa ohiheo-hiheolo maó, tapilo-Lio ode bulemengio monto ulawota lo Eeya wau monto kawasa-Lio udaá;

¹⁰ ngoáamilalo boito mamotoduo todulahe de Tio meidungga mai u

poúdaáalo lo umati-Lio wau u hulumatío lo ngoáamila taa palacaya. Boli timongoli olo maamaito towolota umati lo Allahu Taáala boito, sababu timongoli malo malacaya tohabari upilopo tunggulai lamiaatia ode limongoli.

¹¹ Uitolo sababuulio amiaatia laito hipo duáawa mola olimongoli. Amiaatia heloduá mola alihu Allahu Taáala mopowali olimongoli paatuti u tumumulo moduduá kahandaki-Lio; ode ui-uitolo Tio motianga olimongoli. Pohileaala duá Allahu Taáala, wolo kawasaa-Lio mopoópolu mai u otohílaa limongoli u mohutu mopiohe wau mopo wimumuto ngoáamila kalaja u hepohutuo limongoli sababu palacaya li Almasi.

¹² Louú odito Eeyanto Isa poúdaa mola limongoli, wau timongoli olo podaá li Isa sababu opopiohe hílaa lo Allahu Taáalanto wau Eeya Isa Almasi.

2 ¹ Tomimbihu podudungga mai lo Eeyanto Isa Almasi, wau tomimbihu olanto maámbuolio u motibiluloá wo-Lio, uti-utieelo upohile laatia louú tíóotutua olimongoli:

² Diila maó polamemeto molingu meaalo balisa sababu woluolio habari deú

malei dungga dulahio lo Eeya Isa muli meidungga mai. Tanu habari boito asaliilio mai monto tuwaulio lo nubuwati, meaalo monto tuwaulio lo pongaajali, meaalo mowaliilio woluo tamoloíya deú amiaatia mapeéenta lolulade u odito todelomo tala tuwau lotulade lamiaatia.

³ Penu boli woloolo mola olo, diila maó polulia tau mohimbulo olimongoli. Sababu tou diipo meidungga mai Dulahe boito, mamusi motoduwopo mai suáli botie: Dadaata taa mamolapi iimanilio, momaahu li Almasi; wau Manusia Moleeto tamaa leimulo tilantu mai lo Eeya u tumuwoto ode nalaka, mamopo bilohei lobatanga.

⁴ Lou sombongi tio mamoluwali wau mopolaió lobatanga toitaato ngoáamila u hetuboo lomanusia, meaalo ngoáamila balaahala u heánggapuo lomanusia Allahu Taáala. Tumbaó tio mamo tihuloáa todelomo Bele lo Allahu Taáala wau mopo malalumu deú tio yito Allahu Taáala.

⁵ Eelai maó deú watia mapeéenta lopoótaa mai ngoáamilalo boito tou watia donggo peé-peéenta woli mongoli.

⁶ Wau otaawa limongoli wolo u masaatia botie donggo hemo ngabuto ngoáamilalo boito motoduo mai. De towakutu u

matilantu mai lo Allahu Taáala, Manusia Moleeta boito mamó tibilohéi.

⁷ Olootolo u mokalaja maó ololeeto boito malo lumula lokalaja wolo depu-depuhu, bo donggo heóto-otongalio. De wonu tahemo ngotonga olio boito mailinggi,

⁸ deúito oontonga Manusia Moleeto boito. Yi wonu Eeya Isa meidungga mai Tio mamomate mateelo maó Manusia Moleeto boito wolo napasi monto ngango-Lio wau mopobinasa olio wolo opolutuó owoluwoa-Lio.

⁹ Manusia Moleeto boito mamoti bilohei wolo kawasa tuwau uleidaá monto Ibilisi. Tio mamopo woluo mai totoonulalo moólinggolabe u hidala-dalaala wau susuu-aliyaalo polu-polutuó u polupolu loimbulo.

¹⁰ Tio mamomake tilolahepalo yimbulo u moleeto u mopo lapalo tau-tauwalo tamaa binasa. Timongolio mabinasa sababu diila mololimo wau diila motohilaa habari u otutu monto Allahu Taáala umowali mopoáahu olimongolio.

¹¹ Uitolo sababuulio Allahu Taáala mopodungga mai olimongolio kawasa tuwau umoó lapalo, tilinggula timongolio palacaya tou wolo udiila otutu.

¹² Akibatilio, ngoáamila tau u motohilaa lodusa wau diila palacaya toú otutu boito, mahukuumanio–Lio.

¹³ Mongo wutato tapilonu lo Eeya! Amiaatia laito musí molapali mola oduólo ode Allahu Taáala tomimbihu olimongoli, sababu toú bohuliolo mai Allahu Taáala malo lulaota olimongoli u piloáahu. Suáli boito lotoduo mai toú wolo u kilalaja lo Rohullah olimongoli u lopowali olimongoli umati lo Allahu Taáala tamantali wau masababu timongoli palacaya tohabari u otutu lonto Allahu Taáala.

¹⁴ Woleeto boitolo Allahu Taáala lotianga olimongoli lotimbulude to Habari Mopiohe u pilohabari mai lamiaatia olimongoli. Allahu Taáala lotianga olimongoli, sababu otohilaa–Lio alihu timongoli moduduá moólaasa maó odudaá lo Eeyanto Isa Almasi.

¹⁵ Masababu uito, Mongo wutato, tihuloolo motoheeto wau potidihulo tulusi to popoo–ngajaliyalo u mailohi mai lamiaatia olimongoli, mopio wolo imala meaalo wolo leituladu.

¹⁶ Pohileaala duá Eeyanto Isa Almasi lohihilao, wau Allahu Taáala ti Paapanto moliyango wau mopoó lotolo hilaa

limongoli, alihu timongoli mowali mokalaja wau mopohabari wolo u mopiohe. Sababu Allahu Taáala momonu olanto, wau sababu opopiohu hilaa-Lio Tio mohutu mai olanto tatapu wau molotolo hilao, wau mohalapu u mopiohe.

¹⁷(2:16)

3¹ Pulitio maó, Mongo wutato, poduáalo mola ode lamiaatia. Poduáalo mola alihu habari monto Eeya mowali mololadu tulusi wolo molamemeta wau tolimoolio loú mopiohe, tutuuwauwa debo odelo u mailowali olimongoli omoómolulio mai.

² Poduáalo mola olo alihu Allahu Taáala mopoáahu olamiaatia monto tau-tauwalo tahiruusawa wau moleeto. Sababu diila ngoáamila taa palacaya tohabari monto Eeya boito.

³ Bo Eeya tatapu wau molotolo hilao, Tio mamó poólotolai olimongoli wau moduóla olimongoli monto Ibilisi.

⁴ Wau amiaatia palacaya tióotutua ode Eeya tomimbihu olimongoli, deú timongoli donggo hemohutu wau matulusi mopohutu maó wolo u ilahulai lamiaatia olimongoli.

⁵ Pohileaala duá Eeya modelo olimongoli u lebe mongalati maó deú Allahu Taáala

momonu olimongoli wau deú ti Almasi mopoó lotolai olimongoli.

⁶ Mongo wutato, tokawasa lo Eeya Isa Almasi, poáhu mai lamiaatia alihu timongoli motiwalahe monto ngoáamila wutato, tahitumula hemo tila-tilantingo, wau tadiila moduduá totoonulalo pongaajali uilohi mai lamiaatia olimongolio.

⁷ Otaawa limongoli lohihilao deú timongoli musi moóbaaya olamiaatia. Amiaatia diila helo tila-tilantingo tou amiaatia woluo tohuungi mongoli.

⁸ Amiaatia diila helo lamelo uáalo lotau lou diila lomayali maó. Boliio maó hui dulahe amiaatia helo kalaja tióopatea alihu amiaatia diila mopoósuusa penu boli tatoonu towolota limongoli.

⁹ Amiaatia lohutu maó uito diila sababu amiaatia diila ohaku mohile wolo moóohuú alihu timongoli motulungi mai olamiaatia, bo sababu amiaatia ohilaa mowali obaayawa limongoli.

¹⁰ Tou amiaatia donggo woluo tohuungi mongoli, amiaatia longohi mai wúdu botie, "Taa u diila mohuto mokalaja, diila mowali molamelo."

¹¹ Amiaatia moloíya mai utie sababu ilodungohe lamiaatia deú woluo tau-tauwala towolota limongoli tahitumula hemo tila-tilantingo. Timongolio diila helohutu penu boli u hitua-tuawua, ngopohia bo motolo pusingi moulambohe to ulusani lotaa wewo.

¹² Tokawasa lo Eeya Isa Almasi poáhu mai lamiaatia tau-tauwala boito wau mopoéelaó, alihu timongolio mokalaja wolo aamani wau mopeehu lijiki limongolio lohihilao.

¹³ Bo timongoli diila maó potolu mohutu u mopiohe.

¹⁴ Tanu de woluo taa diila mohuto moduduá wolo uiloíya lamiaatia todelomo tulade botie. Poódahai maó totaa debo odelo uito, wau diila maó poáawota wolio alihu tio moolito.

¹⁵ Bo diila pohutua tio debo odelo muusu; bo naseehatia maó tio odelo ngotaalio lowutato.

¹⁶ Eeya yito pobutua mai loú osalaamati olanto. Pohileaala duá Eeya laito mongohi mai salaamati olimongoli todelomo toonulalo suáli. Pohileaala duá Eeya peé-peéenta wolo Wutato ngoáamilalo.

¹⁷ Salamu lonto olaatia, Paulus. Watia lohihilao talo luladei bagiyangi botie. Uti-utieelo tuotio u watia mopodutu maó pali lo uluú toú ngoáamila tuladu lowatia.

¹⁸ Pohileaala duá Eeyanto Isa Almasi mobalakati mai Wutato ngoáamilalo. Hulumati lamiaatia, Paulus

1 Timotius

1 ¹ Timotius, walaúuú utuutu todelomo Eeya! Tulade botie lonto olaú, Paulus, rasulu li Isa Almasi topoáhu lo Allahu Taáala, Tamoo-poáahua olanto wau topoáhu li Isa Almasi, halapaninto. Pohileaala duá Allahu Taáala ti Paapanto wau ti Isa Almasi Eeyanto mongohi mai balakati, odehu hilao wau salamati olemu.

² (1:1)

³ Otohilaau alihu yió debo motibiluloá to Epesus debo odelo u mailoíyaú mai olemu tou waú lonaó ode Makedonia. Sababu, to Epesus woluo dengolo lota tahi pololade pongaajali udiila otutu, wau yió musi mopo huheli maó olimongolio.

⁴ Polelea maó olimongolio alihu timongolio diilalo mopoó tuoto tou totoo-mbiluwalo wau wuwuu-ngguliyalo asalilio mai udiila obunto-buntolio. Ngoáamilalo boito bo mopotoodei polohaamawa wambaío, wau diila mopolaiá lanjana lo Allahu Taáala u bo otaawa motimbulude palacaya to o-Lio.

⁵ Patuju lo naseehatiú boito yito alihu tau mowali motolo miliki hilaa ubelesi wau hilaa u maloótapu tenelo Eeya u mantali, wau tióotutua palacaya to Eeya, wau loú odito timongolio mowali motoliánga timongotalio.

⁶ Woluo ngotayadu tau madiilalo hitumula debo odelo uito, wau yilapalo todelomo polo hahaamawa hamawa udiila ohunalio.

⁷ Timongolio motohilaa mowali guguu-ruwaalo lo agama, lebe-lebe pomaó timongolio lohihilao diila paahamu tataa-heyaalo u hepilomake limongolio meaalo susuu-aliyaalo u tiloóowoli limongolio loú odito yakini.

⁸ Otaawanto deú butoó lo agama yito mopiohe, wonu pohunaalo toú patutilio.

⁹ Tantulo maó musi eelaalo deú butoó boito pilohutu diila ode taa mopiohe, bo ode tahipo lambangawa butoó, tahileeta, taa loluusa, ode taa odusa, taa diila o agama, taa osiipati dunia, ode taa momate tiilo wau tiyamolio mate-mateelo maó, tabiasaalio tahi pomatea mate-mateelo maó,

¹⁰ ode tau-tauwalo tahi hulotowa, homoseki, tamootaówa, tamoo himbulowa, mongo sakusi yimbulo,

wau boli tatoonu wambaño tahipo hutua susuu–aliyaalo u bubuu–lemenga wolo pongaajali u otutu.

¹¹ Pongaajali boito woluo todelomo Habari Mopiohe upolo loladio pilo malacayalio olaatia, deúito–yito Habari Mopiohe monto Allahu Taáala taúdaá wau paatuti pujiolo.

¹² Watia molapali mola oduólo odeli Isa Almasi Eeyanto. Tio malongohi mai lotolo olaatia u lomaya o–Lio, wau Tio longanggapu olaatia lotuuúde ode tuugasi boito,

¹³ eleponu omoóomolu watia helo pitana wau longalinaya wau lohina o–Lio. Bo Allahu Taáala lomonu mai olaatia, sababu toú boito watia diipo palacaya, oditolio diila otaawa laatia wolo umusi pohutuo laatia.

¹⁴ Wau tumbaó watia hiluntua daá odehu hilaa lo Eeyanto. Tio longohi mai owalia laatia u palacaya o–Lio wau motoliángo ngota timongota. Owalia boito yilohi–Lio olanto ngoáamila tamalo tituwau woli Isa Almasi.

¹⁵ Otutu banari loíya botie -- sababu uito paatuti tolimoolo wau palacayalo tióotutua --: "Ti Isa Almasi leidungga mai ode dunia

botie u lopoáahu taa odusa." Wau watiaalo taa odusa wau tamoleeta daá.

¹⁶ Bo tumbaó masababu uitolo Allahu Taáala lomonu mai olaatia, alihu ti Isa Almasi mowali mopo bilohei ngoáamila osabali-Lio olaatia, taa odusa daá botie. Wau utie mowali tuwaulio obaaya ode ngoáamila tau u demaa palacaya to o-Lio wau moótapu tutumulo tutu wau ohiheo-hiheolo maó.

¹⁷ Allahu Taáala, Olongia lo totoonulalo jamani, paatuti hurumatiolo wau pujiolo laito, sababu Tiolo taó hiheo-hiheolo maó, tadiila oontonga wau tatuwa-tuwaulo! Amin.

¹⁸ Timotius, walaúuú! Tuugasi botie pomalacayaú mai olemu, u moéela mola tahuli lo Allahu Taáala upilo tunggulai lomongo nabi todelomo jamaá tomimbihu batangamu. Mamusi tahuli boito mowali tomeú olemu todelomo polo hipate u mopiohe.

¹⁹ Pohipatelo loú motidihu to opopalacaya u otutu wau wolo hilaa u maloótapu tinelo Eeya umantali. Woluo tau-tauwalo tadiila hipo mandungia suala lohilaa u maloótapu tinelo Eeya olio, tunggula loáantulu lomaó opopalacaya limongolio.

²⁰To wolotalio yito tei Himeneus wolei Aleksander. Taduulota boito mahi lukuumaniú loú lohudu olio ode Ibilisi, alihu timongolio mobalajali maó u mohuheli momuayo Allahu Taáala.

2 ¹Bohu-bohulio, pohile lowatia wolo tióotutua alihu polohone, tabia, wau duá sapaaáti wau lapali oduólo potunggulolo ode Allahu Taáala duólo ngoáamila tau;

²ode mongo onlongia wau ode ngoáamila taa u hidihima kawasa. Pohilelo mola alihu ito mowali tumumula duóduóoto wau aamani ode Allahu Taáala wolo píili upaatuti.

³Ui-uitolo umopiohe wau moósanangi hilaa lo Allahu Taáala, Tamoo-po@aahua olanto.

⁴Otohilaa lo Eeya alihu ngoáamila tau po@aahuwolo wau motota u otutu.

⁵Sababu, bo woluo tuwau Allahu Taáala, wau bo woluo ngota tamoo-wolotawa towolota Allahu Taáala wolo manusia, deúito-yito ti Isa Almasi.

⁶Tio ngotaalio lomanusia tamalohudu batanga-Lio u lolopato ngoáamila tau lonto duduu-sawaalo limongolio. Woleeto Allahu Taáala lopobilohu towakutu u

tiluhata, deú Tio ohilaa alihu ngoáamila tau po@aahuwolo.

⁷Wau uitolo sababuulio watia ilahula lonaó ode tau-tauwalo tadiila Yahudi u lopololadu olimongolio habari pasali lo opopalacaya u otutu. U tiloówoli mai laatia botie yito otutu, watia diila mohimbulo.

⁸Otohilaa lowatia alihu penu boli toutoonuu kaumu mongo lolaí modua mola wolo hilaa u mantali, diaaluo oyiyingo meaalo polo buutola.

⁹Mamusi kaumu mongobua modadai batangalio wolo motuuúde wau momake boó oáadabu. Diila maó pomake putu lohuwoó umowali potuuwota lotau meaalo papaa-keyaalo hulawa meaalo mutiaala, meaalo boó u himahalea.

¹⁰Boliío maó, mamusi taabua modadai batangalio wolo totoonulalo huhutu u mopiohe odelo woloolo mola upaatuti ode taabua u motabia ode Allahu Taáala.

¹¹Taabua musi mobalajali lou motipoóyo batanga wau modungohu.

¹²Watia diila mopoótutu taabua mongaajali meaalo momalenta mongo lolaí; timongolio musi motipoóyo.

¹³ Sababu tabohu–bohulo pilowali mai yito tei Adamu wau lapatio maó bolo ti Hawa.

¹⁴ Wau diila tei Adamu, bo taabuwalo wambaó táilo yimbuloa, tilinggula lolambanga palenta lo Allahu Taáala.

¹⁵ Eleponu odito, taabua mamoaáhu lou mopotutu mai walaó, asali tio wolo moti dupapa lohilao debo palacaya li Almasi wau debo motoliángo taa wewo wau tumumulo tomodu ode Allahu Taáala.

3 ¹ Otutu banari loíya botie, "Taa mohuto mowali tamoo–ngimatoa jamaá, ilohilaa tuwaulio lokalaja ulaba–labaalo ohalaga."

² Ngotaalio tamoo–ngimatoa jamaá mamusi taa diila oáaibu, bo ngota dilelio bua, motota mongotongo batanga, molinepo, wau taratibu; tio ohilaa mololimo tau to belelio, wau mowali mongaajali tau;

³ diila tahe huwoáalo, meaalo tamohuto moloohulua. Boliño maó, tio musi molumboyoto hilao wau mohuto lou dame. Tio diila mowali bo momilohe doi.

⁴ Tio musi motota mongatulu dileaalio lou mopiohe, wau mongaajali mongo walaño u modunghe wau mohulumati olio.

⁵ Sababu wonu taa diila motota mongatulu dileaallo lohihilao, woloolo mola tio mowali mongatulu jamaá lo Allahu Taáala?

⁶ Ngotaallo tamoo-ngimatoa jamaá diila mowali taa u boheli lowali Nasara, sababu de tio mowali sombongi lapataó odungga lolaáanati debo odelo Ibilisi muloololio mai.

⁷ Tio mamusi taa otilanggula mopiohe todelomo ulipu; sababu wonu diila odito, yi tio mahinaa lotau, tilinggula modehu to uluú lo Ibilisi.

⁸ Tamoo mantua jamaá mamusi olo taa u mopiohe wau tuulusi; diila bo momilohe doi wau diila mohuto mongilu angguru laba-labaalo daata.

⁹ Timongolio musi motidihu motoheeto wolo hilaa u maloótapu tinely Eeya belesi to pongaajali opopalacaya lo Nasara u mapilo ilaalo mai lo Allahu Taáala.

¹⁰ Patutilio timongolio tesiyopo meemulo wau wonu lo ilaalo timongolio diila oáaibu, deúito timongolio mowali momantu todelomo jamaá.

¹¹ Dile limongolio taabua olo mamusi taa mopiohu, diila taa motohilaa mopo loladu loíya udiila ohunalio. Musi otaawa

maó limongolio mongotongo batanga wau juujulu todelomo ngoáamila suáli.

¹²Tamoo mantua jamaá musí bo odile taabua ngota. Musí otaawalio mongatulu mongo walaío wau dileaalio loú mopiohu.

¹³Tau-tauwalo tahi pomantua loú mopiohu todelomo jamaá, mahulumatiolo wau mowali helebe buheli mobisala tomimbihu opopalacaya limongolio toli Almasi.

¹⁴Waú mohalapu diilalo mohiheo waú mamobiilohe wolemu. Eleponu odito, waú moluladei olo tulade botie olemu,

¹⁵alihu wonu waú langgali mai, maílo taawamu woloolo mola ito musí tumumulo, odelo ngaalaá lo Allahu Taáala, deúito-yito jamaá lo Allahu Taáala tatumu-tumulo. Jamaá botieelo tadebo odelo wolihi potihulo wau pobowo pongaajali u otutu monto Allahu Taáala.

¹⁶Diaaluo penu boli ngotaa maó mowali momaahu, malo odito uda@aalio hitua-tuawua u milakusudu hetuu@o lo agamaanto; Tio lopo bilohei batanga todelomo rupa lomanusia, wau pilo@ilaalo otutu lo Rohullah, wau iloontonga lo mamaa-laíkatiyalo. Habarilio pilopo toliyongo towolota lo babaa-ngusawalo,

wau Tio pilalacaya to ngoilanggubu dunia wau bilinta-‘lo mola ode sologa.

4¹ Rohullah wolo pintalo lotahuda mai deú to mamaa-sawaalo umamei dungga mai, ngotayadu tau mamolapi iimanilio, momaahe li Almasi. Timongolio mamó dungohe to roroo-huwaalo umopo lapalo wau moduduá popoo-ngajaliyalo lorohu u moleeto,

²upilopo tunggulai lotimbulude totau-tauwalo munapiki tamoo-himbuloa. Hilaa u maloótapu tinelo Eeya lotau-tauwala boito malo diólomo.

³Timongolio mongaajali tau u diila monika wau diila molamelo uáalo utantu-tantu. Lebe-lebe pomaó uáalo boito pilowali mai lo Allahu Taáala u mowali tameloolo wolo polo lapali oduólo o-Lio lotau-tauwalo tamalo malacaya li Almasi wau malotota pongaajali u otutu lonto Allahu Taáala.

⁴Totoonulalo hitua-tuawua u pilowali mai lo Allahu Taáala boito mopiohe, wau diaaluo penu boli tuwau maó u musi anggapuolo halamu wonu matilolimo wolo lapali oduólo ode Allahu Taáala.

⁵ Sababu balakati monto Allahu Taáala wau duá mohutu uáalo boito mowali halale.

⁶ Wonu yió mopoáajali maó ngoáamilalo boito tomongo wutato ngoíimani, yió mamowali tamoomayawa li Isa Almasi tahemo kalaja wolo mopiohu. Wau yió malaito molaala hilaamu wolo tahuda lo Allahu Taáala u pilalacayanto, wau wolo totoonulalo pongaajali u otutu umaa diluduámu ngotilonggadu botie.

⁷ Walahe maó sisii-litawalo tahayulu udiila ohuna. Mamusi latiyolo batangamu ode tutumulo u otabia.

⁸ Latihani lobatanga bo ngoídi hunalio, bo latihani lorohu ohuna todelomo totoonulalo suáli, sababu wanto-wantohe danti ode tutumulo tomaasa botie wau maasa u mamei dungga mai.

⁹ Suáli boito otutu wau paatuti tolimoolo wau palacayalo tióotutua.

¹⁰ Uitolo sababuulio ito mohipate wau mokalaja moóohuú, sababu ito motiwunela lealeaatulo maó ode Allahu Taáala tatumu-tumulo; deúito-yito Tamoo-po@aahua ngoáamila tau, laba-labaalo daá tau-tauwalo tapalacaya.

¹¹ Pongaajalia maó ngoáamilalo boito wau ahulilo tau-tauwala moduduó.

¹² Diila maó polulia penu boli ngota monganggapu olemu dupadupapa sababu yió donggo muda. Boliio maó, mamusi yió mowali obaayawa lotau-tauwalo palacaya todelomo loiyamu wau piilimu, todelomo dudelomu motoliánga ngota timongota wau palacaya li Isa Almasi, wau wolo tutumulumu ubelesi.

¹³ Sambela uito, dilumutu waú de monaó mai, yió musu motióotutua mopobaca maó Kitabi ode tau-tauwalo, wau mohuntulo boli mongaajali olimongolio.

¹⁴ Diila maó palongamu momake ponu monto Rohullah uilohi-Lio mai olemu tou mongo taúwa lojamaá mopodutu lo uluú limongolio toitaato lunggongumu, wau mongo nabi mopo tunggulai tahuli lo Allahu Taáala tomimbihu batangamu.

¹⁵ Kalajai maó ngoáamilalo boito lou tióotutua alihu ololaiúmu oontonga lotaa ngoáamila.

¹⁶ Imatowalo batangamu wau imatowa maó olo pongajalimu. Mamusi yió tatapu wau molotolo hilaa mohutu ngoáamilalo boito, sababu lou odito yió mamu poáahu

mopio batangamu lohihilao meaalo tau-tauwalo tamo dungohe olemu.

5¹ Diila maó oingowamu loú palangi taa lebe mohuhula wolemu bo heinga maó tio modungohe totoonulalo loíyamu debo odelo tio tiyamamu. Pohutua maó tau-tauwalo tahi muudawa odelo wutato,
² wau mongobua tamohuhula odelo tiilamu. Mongobua tahi-muudawa mamusi pohutuwomu odelo tawali-yalimu, wolo hilaa ubelesi.

³ Hulumatia maó mongo janda ta@otu-otutuulo ma@o tumutumulo tutuwau.

⁴ Bo wonu ngotaalio lojanda omongo walaó meaalo mongo wombu, timongolio boitolo tamusi bohu-bohulio wohiyalo huhama deú timongolio wajibu mopoó tuotaó kaumu ngaalaá limongolio, wau momaalasi budi lomongo dulaá wau linene limongolio. Sababu suáli uitolo umoó sanangi hilaa lo Allahu Taáala.

⁵ Janda taótu-otutuulo ma@o tutuwau, wau diaaluo maó penu boli tatoonu tamowali molaala olio, bo wambaó hemo tiwunela to Allahu Taáala. Hui wau dulahu tio tulusi moduá ode Allahu Taáala uméi tulungi o-Lio.

⁶ Bo janda taa ohilaa tumumulo motisana-sanangi, mailate penu boli tio donggo tumutumulo.

⁷ Potunggula maó totoonulalo potuhata botie olimongolio, alihu timongolio tumumulo diila oáaibu.

⁸ Bo wonu woluo taadiila molaala mongo ilatolio, lebe-lebe maó ngaalaálio lohihilao, tau boito momaahe opo-palacayalio; tio lebe moleetaó wolo taa diila palacaya.

⁹ Bo janda tamo poópolu dadaa-ntiyaalo u wumbutio mola botie tamowali potuwotolo ode delomo daputali lomongo janda; umululio musu diila ilangi loú wolomo pulu lotaunu, muloololio mai bo peéenta lonika,

¹⁰ otaawa lo ulipu odelo taabua tahemohutu susuu-aliyaalo u mopiohe odelo humayaalio: malo poudaá mola mongo walaño loú mopiohe, sanangi mololimo tataa-muwaalo tamo hepito ode belelio, mohinta tau-tauwalo tapalacaya, tau-tauwalo momantu tahi suusawa, wau mohutu loú otu-otutuulo ma@o totoonulalo kalaja mopiohe u hidala-dalaala.

¹¹ Diila maó potuwota ode delomo daputali boito mongo janda tadonggo himuudawa. Sababu wonu timongolio molaasa obirahi yi timongolio mowali molotolai daá, wau timongolio ohilaa muli monika, wau mololaa maó li Almasi.

¹² Yi timongolio ototala sababu diila moéela danti uilohi olimongolio.

¹³ Donggo poli timongolio mopo loya-loyaali wakutu lou tumuwoto lumualo bele lotau. Wau ulebe mobulilo poli, deúito-yito deú timongolio mobalajali mopitana tanggulo taawewo moulambohe uluusani lotau wau mobisala susuu-aliyaalo udiila paatuti bisalaalo.

¹⁴ Uitolo sababuulio otohilaá alihu mongo janda himuudawa muli monika, umoó toduo mai walaó wau mongulusi dileaalio, alihu totoonulalo diila ohiyango u mopobuli-buliilo tanggulunto.

¹⁵ Saababu woluo mongo janda tamai lapalo loduduá Ibilisi.

¹⁶ Bo wonu ngotaalio taabua Nasara o pongawaá ngaalaá tamalowali janda, tio musu momantu janda boito; diila maó polulia jamaá tamomanta olimongolio. Lou odito jamaá mowali momantu maó

mongo janda tasama-samaata diila omongo ilaato.

¹⁷ Taúwa lojamaá tamohutu tuugasilio loú mopiohe, paatuti halagaalo poóoluo piúwa, lebe-lebe daá timongolio tamoólohu mohutuba wau mongaajali.

¹⁸ Sababu todelomo Kitabi tulatulade, "Sapi udonggo hemo lumbe-lumbetaá pale u mohinggi botu lopale monto panggeangio, diila maó tongguúma tunggilio", olo, "Tamokalaja ohaku mololimo wuupalio".

¹⁹ Diila maó tolimowa potuludu ode ngotaalio taúwa lojamaá, ngopohia wonu poó tohetola losakusi duulota meaalo lebe maó.

²⁰ Taa u mohutu dusa, mamusi diniyolo totalu lo ngoáamila jamaá, alihu taa wewo mamoohe.

²¹ Totalu lo Allahu Taáala, Isa Almasi, wau mamaa-laíkatiyalo táilo tulaota, pohileú tióotutua alihu yió moduduá totoonulalo potuhata botie loú diila olantobu penu boli olo tatoonu, loú diila motiwamba-wambaó.

²² Diila maó polamemeta daá mopodutu lo oluú ode tahingota-ngotaawa huna moposaaha pomuduálo olio odelo

tamoomayawa to Eeya. Wonu taa wewo odusa, diila maó poduduá odedeálio ode delomo dusa boito. Dahai maó batangamu alihu debo belesi.

²³ Diilalo pongilu taluhu wambaío; pongilulo olo ngoídi angguru u momantu hihilinga loú aalo todelomo ombongumu, sababu yió tingga maito mongongoto.

²⁴ Dusa ngobutaó lotau, toú diipo adiliyola, maa iloontonga loú mopatato. Bo dusa lotaa wewo bolo otaawa lapatio maó.

²⁵ Odito olo totoonulalo huhutu u mopiohu huáa oontonga. Wau penu boli udiila gambangi oontonga, diila mowali tulusi meituuó.

6 ¹ Tau-tauwalo Nasara tamowali wato, musi monganggapu deú tituani limongolio paatuti hulumatiolo, alihu tau diila mowali mopobulilo tanggulo Allahu Taáala meaalo pongajalinto.

² Mongo wato u tituanilio taulo Nasara, diila mowali mopoleme oli tuanilio sababu timongolio tinggai taulo Nasara. Tumbaó timongolio wajibulio momaya oli tuani limongolio boito wolo lebe mopioheó, sababu tituani tabilaya loú mopiohe boito yito peé-peénta taa palacaya tapilonua.

Ngoáamilalo botie mamusi pongaajalimu wau ponasehatia maó.

³Titaalo–tita mongaajali maó pongaajali uwewo woleeto wau diila akolo louú pongaajali u otutu monto Eeyanto Isa Almasi, wau wolo pongaajali lo agamaanto,

⁴deúito–yito taa sombongi wau diila motota lolo–lolo! Ngongotio yito motohilaa mohaamawa wau motaameta tomimbihu totoonulalo istila tilinggula mopotoodei hilaa mohiihia, polo buálawa, pitana, molantobu u diila mopiohe,

⁵wau polo hiihede huhama udiila opulitio. Dalalo pikiilangi lotau–tauwala boito malo puntuhu wau diilalo otutu. Timongolio molantobe mowali kaya monto agama.

⁶Memangi agama mongohi paeeda u leidaá, wonu tau olulia louú wolo mililikiilio.

⁷Sababu diaaluo penu boli hitua–tuawua u dilelonto mai ode delomo dunia botie, wau diaaluo olo penu boli hitua–tuawua umowali deloonto lumualo!

⁸Oditolio, wonu woluo uáalo wau boó, uito malo tuheta.

⁹Bo taa motohilaa mowali kaya, oheinga wau ohentobe louú hilaa u hidala–dalaala

u mohulodu wau u moluusa. Tilolahepe otohilaa boito mohutu tau mowali moáantulu wau topotala.

¹⁰Sababu monto hilaa lodoi boitolo, tumoodei totoonulalo u moleeto. Woluo ngobutaó tau u bo mohilapita doi tilunggula madiilalo loduduá pongaajali lo Nasara, lapataó timongolio ilodungga loú polodutolo dadaata ulopo áantulu hilaa limongolio.

¹¹Bo yió yito miliki lo Allahu Taáala, oditolio yió musi mopo halaheó ngoáamilalo boito. Potolo panilo mowali taa otutu tomato lo Allahu Taáala, tamotiwato to Allahu Taáala, palacaya li Almasi, motoliánga timongotalio, sabali todelomo polodutolo, wau opíili molumboyoto.

¹²Pohipatelo tióotutua u tumumulo odelo taulo Nasara alihu yió moówahu pahala lo tutumulo u tutuulio tutu wau ohiheo-hiheolo maó. Sababu woleeto boitolo Allahu Taáala motianga olemu tou yió momasisi maó totalu lotaa dadaata deú yió palacaya li Almasi.

¹³Wau botia totalu lo Allahu Taáala talongohi mai nyawa ode totoonulalo u hitua-tuawua, wau totalu li Isa Almasi

talongohi sakusi u otutu tolei Pontius Pilatus, pohileú utie monto olemu:

¹⁴ Dungohe maó ngoáamila palenta boito wolo hilaa belesi wau diila oáaibu dilumutu todulahe muli podungga mai li Isa Almasi Eeyanto.

¹⁵ Podunggaa–Lio mai matantuwo lo Allahu Taáala lohihilao towakutu u tuhata. Tiolo Takawasa tuwa–tuwaulo; Tio udaá, Olongia lo totoonulalo olongia, wau Eeya lo totoonulalo tuani.

¹⁶ Tiolo wambaó tadiila mowali kawasaalio lo opopate; Tio tumutumulo todelomo tinelo udiila mowali tahudelo boli lo tatoonu. Diaaluo penu boli ngotaa maó manusia tamaa peéenta loóonto o–Lio, meaalo mowali moóonto o–Lio. To o–Liolo hulumati wau kawasa u ohiheo–hiheolo maó! Amin.

¹⁷ To tau–tauwalo tahi kayawa todunia botie, mamusi pohilemu maó alihu timongolio diila maó sombongi wau diila maó poharapu toú babaa–langiyalo udiila tatapu -- debo odelo suáliilio wolo okokaya. Timongolio musi motiwunela to Allahu Taáala talongohi mai totoonulalo u hitua–tuawua olanto loú laba–labaalo daatalio alihu olaasanto maó.

¹⁸ Pohilea maó olimongolio u mopobilohu umopiohe, u mohutu dadaata susuu-aliyaalo umopiohu muura lohilao wau motohilaa mongohi.

¹⁹ Louú odito timongolio mohimoá halata umowali pohongi u mopiohe ode maasa u mamei dungga mai. Wau woleeto timongolio mamooótapu tutumulo u ohiheo-hiheolo maó, deúito-yito tutumulo u tutuulio tutu.

²⁰ Wolo umapilo malacaya olemu, dahai maó uito tióotutua, Timotius! Walahe maó totoonulalo loíya udiila ohuna wau polo hahaamawa tomimbihu susuu-aliyaalo u wolo talatala tilanggula "Pongotota".

²¹ Sababu woluo tahi poloíyawa deú timongolio motolo miliki pongotota boito, tilinggula timongolio lopalinga lonto popoo-ngajaliyalo lo Nasara u pilalacaya limongolio muloololio mai. Pohileaala duá Eeya mobalakati mai to Mongo wutato. Hulumati lamiaatia, Paulus

2 Timotius

1 ¹ Timotius, walaúuú taa otoliángo!
Waú, Paulus, moluladei tulade botie olemu, wau motiwunela hinta Allahu Taála ti Paapa wau Eeyanto Isa Almasi mongohi mai balakati, odehu hilao wau salaamati olemu. To kahandaki lo Allahu Taáala, waú piluduó lowali rasulu li Isa Almasi wau yilao–Lio u mopohabari pasali lo tutumulo upilo danti mai lo Allahu Taáala. Tutumulo boito tolimonto sababu motituwau woli Isa Almasi.

² (1:1)

³ Waú molapali mola sukuru ode Allahu Taáala tahe bayaú wolo hilaa u maloótapu tinelo Eeya u belesi debo odelo upilohutu linenemoyaaú toú muloololio mai. Waú laito molapali oduólo ode Allahu Taáala motiídu waú moéela mola olemu todelomo duá, mopio dulahu meaalo hui.

⁴ Waú moéela mola osuukali lohilaamu. Uitolo sababuulio waú ohilaa daá modungaya wolemu alihu waú tióotutua mowali meengahu.

⁵ Iloéelaú mola to opo–palacayamu u tióotutua toli Almasi, tutuuwauwa debo odelo opo–palacaya linenemu Loisa wau tiilamu Eunike. Wau waú yakini yió olo palacaya debo odelo uito.

⁶ Sababu uito waú mopoéelai olemu u mopotumulo ponu uilohi mai lo Allahu Taáala olemu toú waú lopodutu maó lo uluúúú toitaatumu.

⁷ Sababu Rohu uilohi mai lo Allahu Taáala olanto, diila Rohu u mopowali olanto mowali moohe. Boliño maó Rohullah boito mopowali olanto mowali molotolo, polupolu lo toliángo wau mowali mongotongo batanga.

⁸ Sababu uito diila maó poolito mosakusi pasali lo Eeyanto, wau diila maó poolito olo pasaliú, tatilu tupaalio sababu Tio. Boliño maó, mamusi yió wolo olootolo monto Allahu Taáala, moduduá modutolo ode Habari Mopiohe boito.

⁹ Allahu Taáala lopoáahu olanto wau lomonu olanto alihu mowali umati–Lio lohihilao. Tio lohutu mai uito diila patopatoá toú wolo umaa kilalajanto, bo patopatoá to lanjana–Lio lohihilao wau odehu hilaa–Lio. Tio longohi mai odehu

hilaa-Lio lotimbulude li Isa Almasi tou dunia botie diipo pilowali-Lio mai.

¹⁰Wau masaatia, Allahu Taála lopo bilohei odehu hilaa-Lio boito olanto wolo pilodungga mai li Olongia Tamoo-poáhua olanto ti Isa Almasi. Ti Isa lopo olaaheó kawasa lo opopate wau lodelo tutumulo ubakaa lotimbulude to Habari Mopiohe boito.

¹¹U mopohabari Habari Mopiohe boitolo Allahu Taála lomuduá olaú lowali rasulu wau guru.

¹²Uitolo sababuulio waú helo dutolo ngoáamilalo botie, bo waú debo yakini, sababu otaawaú tutu tatoonu taa pilalacayaú. Waú yakini deú wolo u mapilo malacaya-Lio mai olaú, Tio olo mambo modaha mai dilumutu to Dulahe Kiama.

¹³Duduí maó lou tióotutua pongaajali u otutu u mailohiú mai olemu. Wau mamusi yió debo motidihu to iimani wau toliángo u malowali milikinto sababu lotituwau woli Isa Almasi.

¹⁴Lou bilantua lo Rohullah tatumu-tumulo todelomo olanto, mamusi poódahamu maó tióotutua susuu-aliyaala ohalaga u mapilo malacaya mai olemu.

¹⁵ Otaawamu deú ngoáamila taa tomadala lo Asia malo lolaa maó olaú, leituwota olo tei Pigelus wau tei Hermogenes.

¹⁶ Bo ngaalaá lei Onesiporus mapoó-poóngolo loéengahe hilaaú. Pohileaala duá Eeya motuhatawa mopo bilohei odehu hilao ode limongolio. Eleponu waú todelomo tutupa, tei Onesiporus diila moolito to owowoluwoú boito.

¹⁷ Odito leitungga mola to Roma, tulusi tio helo tolopani malo lolohe olaú tunggula tio lodunggaya wolaú.

¹⁸ Wau otaawamu deú to Epesus tio poó-poódaata lotulungi olaú. Pohileaala duá Eeya mopo bilohei odehu hilao olio todulahe Eeya momutoái ngoilanggubu umati lomanusia.

2 ¹ Timotius, walaúuú! Mamusi yió mowali molotolo wolo odehu hilao uilohi mai de olanto, sababu ito lotituwau woli Isa Almasi.

² Pongajali u omoómolu maílo dungohemu lonto olaú totalu lotaa dadaata, mamusi pomalacayamu maó ode tau-tauwala tamowali palacayalo wau tamotoló mongajali taa wewo.

³ Yió musi moduduó modutolo odelo pajule li Isa Almasi taatapu wau molotolo hilao.

⁴ Pajule ngota tadonggo otuugasi, diila tamotolo pusingi batangalio wolo uúu-luasanilio lohihilao, sababu tio ohilaa mopo sanangi hilaa li eeyanggulio.

⁵ Olaragawani ngota diila tamowali juala todelomo mobaalia, wonu tio diila modungohe wuwuu-uduwaalo.

⁶ Tamoomengia tamalo kalaja moóohuú, tio-tiolo tabohu-bohulio ohaku moótapu tilapula loú pilomulio.

⁷ Toloéelai mola wolo u tiloówoliú mai boito, sababu Eeya mamongohi mai olemu owalia u mongalati ngoáamilalo.

⁸ Poótoloma maó utie: Habari Mopiohe upilo habariú mai boito yito habari pasali li Isa Almasi, wali lei Dauda; Tiolo ti Almasi tamaaluli tilumumulai lonto opopate.

⁹ Sababu helo pohabari Habari Mopiohe boitolo, waú lodutolo; tumbaó dilumutu yilantealio debo odelo ngotaalio lo tamoleeto. Bo tahuda lo Allahu Taáala diila mowali lantealo.

¹⁰ Uitolo sababuulio waú sabali helomanta ngoáamilalo boito duólo polohuna daá ode tau-tauwalo tamaa

tilulaoto Allahu Taáala, alihu timongolio olo moótodo oáahu uilohi lotimbulude li Isa Almasi, wau u tilunuhe lo odudaá ubakaa.

¹¹ Otutu banari loíya botie, "Wonu ito mailate peé-peéenta wo-Lio, ito matumumula olo peé-peéenta wo-Lio.

¹² Wonu ito debo sabali, ito mamomaalenta olo peé-peéenta wo-Lio. Wonu ito momaahe o-Lio, Tio olo mamomaalento.

¹³ Wonu ito diila tatapu wau molotolo hilao, Tio debo tatapu wau molotolo hilao, sababu diila mowali Tio mobulemenga wolo batanga-Lio lohihilao."

¹⁴ Mamusi yió mopoéelaó tau-tauwala tomimbihu ngoáamilalo botie. To talu lo Allahu Taáala, naseehatia maó timongolio alihu diila mohaamawa tomimbihu totoonulalo istila. Uito diila ohunatio, tumbaó bomoó tolonggalo totau-tauwalo tamo dungeheó.

¹⁵ Yió mamusi motolopani tióotutua alihu toloákuwo lo Allahu Taáala odelo taa patuti mokalaja duólo Allahu Taáala. Potolo panilo alihu yió diila moolito tomimbihu kalajamu, bo mongaajali maó

loú tuhata totoonulalo pongaajali u otutu monto Allahu Taáala.

¹⁶Walahe maó bibii-salawaalo udiila ohunalio wau u mohina Allahu Taáala. Bibii-salawaalo debo odelo uito bo mohutu totau helebe moleetaó.

¹⁷Pongaajali lotau-tauwala boito moloópo debo odelo ngongoto kankeri utilahuó. Towolota limongolio leiwaito tei Himeneus wolei Piletus.

¹⁸Timongolio malo palingo lonto pongaajali u otutu, wau lopo ambulati opopalacaya lotaa ngobutaó. Timongolio hipo loíyawa deú obobongu monto opopate malo toduo.

¹⁹Bo daasali motoheeto u pilohutu mai lo Allahu Taáala diila mowali etuwolo. Toitaatio tulatulade utie, "Eeya moóonuhu tau-tauwalo miliki-Lio", wau "Taa u moloíya deú tio miliki lo Eeya, tau boito musi mohuheli mohutu huhutu utalatala".

²⁰Todelomo bele uleidaá woluo pakaakasi u hidala-dalaala. Woluo upilohutu monto talaá meaalo hulawa, bo woluo olo u monto ayu meaalo huta. Woluo upomake to opopalalu upolu-polutuó, wau woluo olo upomake to opopalalu biasa.

²¹ Taa umopo belesi maó batangalio monto ngoáamila u moleeto, tau boito mapomake to opopalalu upolu–polutuó. Tio mowali miliki u tolomodu wau ohuna odeli tuanilio. Tio pilodapato u pomake totimíidu kalaja umopiohe.

²² Walahe maó totoonulalo osanangi lotaa himuudawa. Potolo–panilo mola u tumumulo moduduá u otohilaa lo Allahu Taáala, tatapu wau molotolo hilao to pongaajali–Lio wau motoliángo timongotalio, wau ohilao tantalamu. Poti tumulolo odito peé–peéenta woli mongolio tahi pongibode meí tulungi to Eeya wolo hilaa ubelesi.

²³ Diila maó poduduá todelomo polo haamawa lotaa hihuulode tadiila motota lolo–lolo. Otaawamu deú ngoáamila boito bomoó toodei polo taameta.

²⁴ Tamo kalaja ode Eeya diila paatuti motaameta; tio musi aaluti ode taa ngoáamila wau mowali mongaajali tau lou mopio wau sabali.

²⁵ Tio musi wolo molumboyoto mongaajali tau–tauwalo taóhilaa moluwali; pohileaala duá Allahu Taáala mongohi hiyango ode tau–tauwala boito u molilihu

to duduu–sawaalo limongolio wau motota lo pongaajali u otutu.

²⁶ Louú odito timongolio mowali muli mongalati batangalio wau molopato monto hentobu lo Ibilisi umalo tawalo olimongolio wau lomakusa olimongolio loduduá otohilaalio.

3 ¹ Poótolama maó utie: To duduu–laheyaalo pulitio mamotoduo mai dadaata u moósuusa.

² Manusia mamo polohuna daá batangalio lohihilao, opíili mato lodoi, sombongi wau yinao molatabu. Timongolio ohilaa mohina tau, mopalakala wolo mongo dulaá, diila motota mosukuru, wau molonuó susuu–aliyaalo u rohu.

³ Timongolio diila motoliánga ngota timongotalio, diila motohilaa mongohi ambungu, timongolio motohilaa mopoó–poóleeto tanggulo taa wewo, motohilaa momakusa, timongolio palangiyolo, wau diila motohilaa u mopiohe.

⁴ Timongolio motohilaa mohiyanati, sombongi wau diila opikiilangi hayahaya. Timongolio lebe motohilaa to osanangi lodunia loú moduduá to Allahu Taáala.

⁵ Eleponu dudelo lahiri, timongolio moduduá moponaó uwajibu to agama,

bo diila mololimo tuwango monto agama boito lohihilao. Walahe maó tau-tauwalo debo odelo uito.

⁶ Woluo towolota limongolio tamaa tilumuwoto ode bebee-leyaalo, lapataó helo heinga mongobua molulupuhu taódusa dadaata daá wau kiluwaasa lo ilohilaa hidala-dalaala.

⁷ Mongobua boito mololaalaaita meí aajali, bo diila peéenta maó motota lo pongaajali u otutu monto Allahu Taáala.

⁸ Odelo woloololio mola tei Yanes wolei Yambres loluwali olei Musa tou muloololio mai, odito olo tau-tauwala boito moluwali pongaajali lo Allahu Taáala. Pikiilangi limongolio maloluusa, wau iimani limongolio malo ahumo.

⁹ Bo timongolio diila tamoó aata wolo-wolo, sababu ohulodi mongolio maótaawa lotaa ngoáamila, debo odelo u ilolaasawa lei Yanes wolei Yambres olo.

¹⁰ Bo yió malo duduá popoo-ngaajaliú, watadeú, wau patuju lo tutumuluú. Yió lohihilao maloóonto woloolo mola waú tióotutua palacaya li Isa Almasi wau motoliánga timongota lomanusia. Otaawamu olo osaabali wau otaabaú.

¹¹ Yió maloóonto olaú ilalinayalio wau waú lodutolo. Otaawamu ngoáamila u lotoduo mai olaú to Antiokhia, to Ikonium, wau to Listra; wau otaawamu ngoáamila u dilutolaú! Bo Eeya lopoáahu mai olaú lonto ngoáamilalo boito.

¹² Memangi ngoáamila taóhilaa tumumulo motabia wau motituwau woli Isa Almasi maa alinayaalio,

¹³ Hiambola tau–tauwalo tahileeta wau tau–tauwalo tahipo himbuloa malebe moleetaó. Timongolio mohimbulo totaa wewo lebe–lebe pomaó penu boli timongolio lohihilao ilowimbuloa olo.

¹⁴ Bo tomimbihu olemu, Timotius, mamusi yió debo motidihu toú popoo–ngajaliyalo u otutu umaa pilongajali mai olemu wau u pilalacayamu otu–otutuulo maó; sababu otaawamu tatoonu guguurumu.

¹⁵ Musi eelamu mola deú tumulalo mai yió donggo kikiiái malotota lo Kitabi. Kitabi boito mowali mongohi olemu pongotota umoó toduo oáahu motimbulude to iimani odeli Isa Almasi.

¹⁶ Ngoáamila u tulatulade todelomo Kitabi ililihami mai lo Allahu Taáala wau ohuna u mongaajali u otutu, u modini wau

mopoópiohe utilala, wau u mongaajali maó manusia alihu tumumulo moduduá u otohilaa lo Allahu Taáala.

¹⁷Wolo Kitabi boito taa u momaya to Allahu Taáala mowali poimumutolo wolo ngoáamilalo wimu-wimumuto ode tilolahepe kalaja u mopiohe.

4 ¹Ti Isa Almasi mamuli meidungga mai ode dunia botie u momutoó tau-tauwalo tahitumula wau tamailate; wau Tio mamei dungga u momalenta odelo Olongia. Masababu uito pohileú lou tíóotutua olemu totalu lo Allahu Taáala wau li Isa Almasi:

²Mamusi yió mopohabari habari monto Allahu Taáala boito, wau tulusi mohuntulo alihu tau modungoheó, wolo timongolio mohuto meaalo diila. Mamusi yió mopoyakini tau, mopoéelaó totala, wau mohuntula olimongolio. Aajalia maó tau lou sabali daá.

³Sababu mamei dungga wakutuulio tau diilalo mohuto mololimo pongaajali u otutu. Boliío maó, timongolio mamo duduá u otohilaa limongolio lohihilao, wau mohimoá dadaata guru huna aajaliolo maó susuu-aliyaalo umopiohe dungohe lobulonga limongolio.

⁴ Timongolio mamolaúbe bulonga tou otutu, bo mamopotalaó bulongalio ode totoonulalo tombilu.

⁵ Eleponu odito, yio musimongaawasa batangamu todelomo owowoluwoa penu boli woloolo mola olo. Posabalilo todelomo polodutolo, pohutua maó kalajamu odelo tamopohabaria Habari Mopiohe boito wau ponaówalo lou mopio-piohulo maó uwajibu olemu odelo tamoomayawa Allahu Taála.

⁶ Tomimbihu batangaú, malei dungga wakutuulio waú maamate odelo bake ode Allahu Taála. Bolo ngopeé mola waú mamololaa maó dunia botie.

⁷ Waú maloduduá lobaalia lou lopiopiohulo maó wau maloóoma pilito pulitio. Waú debo molotolo hilao toli Almasi demola pulitio.

⁸ Wau masaatia wuupa lo ohohaama hemohima olaú. To Dulahe Kiama, Eeya, Hakimu taádili boito mamohudu mai wuupa boito olaú, sababu waú tumutumula lopiiohe wolo Allahu Taála. Wau diila bo waú wambaó tamaa mololimo wuupa boito, bo olo ngoáamila tahi wimawa podudungga mai lo Eeya wolo hiwoloola daá.

⁹ Potolo panilo u molinggahei daá ode olaú,

¹⁰ sababu tei Demas malo lolaa maó olaú sababu motoliángo dunia botie. Tio malonaó ode Tesalonika. Tei Kreskes malonaó ode Galatia, wau tei Titus ode Dalmatia.

¹¹ Bo tei Lukasi talo titolaa maó wolaú. Yimailo maó tei Markusi wau delowa mai tio wolemu, sababu tio mowali momantu kalajaú.

¹² Waú malo poáhu olei Tikhikus lonaó ode Epesus.

¹³ Wonu yió monaó mai, delowa mai jaketi u tilolaú maó to Troas tobele lei Karpus. Delowa mai olo bukuú, lebe–lebe maó bubuu–kuwaalo u pilohutu monto alipo kalatasi.

¹⁴ Tei Alexander, tamoodupawa tombaha boito malohutu susuu–aliyaalo u moleeto daá to olaú. Eeya mamo lontuli mai olio moduduá huhutuulio.

¹⁵ Yió lohihilao musi mopoódaha–dahaalo maó to olio, sababu tio motehengi daá habari monto olanto.

¹⁶ Tou waú bohulio daá loóowoli poduulua lo batangaú, diaaluo penu boli ngota tawolaú; ngoáamilalo lololaa maó

olaú. Pohileaala duá Allahu Taáala diila mopotala olimongolio todelomo suáli botie!

¹⁷ Bo Eeya wolaú. Tio longohi mai lotolo tilinggula waú mambo helo pohabari ngoáamilalo Habari Mopiohe boito, alihu odungohe lotaa ngoáamila tadiila Yahudi. Wau waú lolopato lonto opopate.

¹⁸ Memangi Eeya mamopo lopato olaú monto motiídu tolopani u moleeto ode olaú. Tio mamodelo olaú wolo moáahu ode delomo yilaidia–Lio tosologa. Mamusi Tio pouádaáalo ohiheo–hiheolo maó! Amin.

¹⁹ Salamuú odelei Priskila wau Akwila wau ode ngaalaá lei Onesiporus.

²⁰ Tei Erastus bilubiluloá to Korintus, wau tei Tropimusi matilolaau maó todelomo maaneá to Miletus.

²¹ Potolo panilo tióotutua u monaó mai tou diipo sembo lohuhulo. Tei Ebulus, tei Pudes, tei Linus, wau ti Klaudia lolao salamu limongolio to olemu; odito olo ngoáamila wutato ngoímani wewolio.

²² Pohileaala duá Eeya wolemu. Pohileaala duá Eeya mobalakati mai mongo wutato! Hulumati lamiaatia, Paulus

Titus

1 ¹ Walaúuú Titusi! Waú, Paulus, moluladei tulade botie odelo wato lo Allahu Taáala wau rasulu li Isa Almasi. Waú tilulaoto wau yilao-Lio u motulungi totau-tauwalo tatilulaoto Allahu Taáala alihu mowali molotolo todelomo iimani limongolio. Waú olo musí modelo olimongolio alihu motota lo pongaajali u otutu u pilo ngaajali lo agamanto.

² Pongaajali boito patopatoá to halapani deú ito mamololimo tutumulo u tutuulio tutu wau ohiheo-hiheolo maó. Allahu Taáala malo danti mai tutumulo boito tou diipo bohulo jamani -- wau Allahu Taáala diila pongalo aakali mohimbulo.

³ Towakutu u tiluhata Allahu Taáala lopoílaalo mai danti-Lio boito todelomo tahulii-Lio. Tahuli boito mapilo malacaya-Lio mai olaú, wau waú lopohabari uito topalenta lo Allahu Taáala Tamoo-poáahua olanto.

⁴ Titusi, yió yito otu-otutuulo maó walaúuú, sababu yió wau waú peé-peéenta malo malacaya li Almasi. Waú

motiwunela bolo potala Allahu Taáala ti Paapa wau Isa Almasi Olongia Tamoo-poáahua olanto, mongohi mai balakati wau salaamati olemu.

⁵ Waú mololaa maó olemu to Kreta alihu yió mowali mongulusi susuu–aliyaalo udonggo palalu atuluwolo. Olo, alihu yió momuduáaó mongo taúwa lojamaá to motiídu kota. Wau poótoloma maó popoo–tuhataú botie:

⁶ Taúwa ngota lojamaá mamusi ngotaalio tadiila oáaibu; Tio musi bo odile taabua ngota; mongo waláio patutilio malo malacaya li Almasi wau diila otaawa lotau laputalo wau tadiila mowali atuluwolo.

⁷ Tamoo–ngimatoa jamaá yito taa u mongulusi kalaja lo Allahu Taáala, tio diila mowali oáaibu. Tio diila mowali sombongi meaalo moingowa, meaalo hehuwoáalo meaalo yinao moloohulua, meaalo bo momilohe doi.

⁸ Tio musi sanangi mololimo tau tobelelio, motohilaa loú susuu–aliyaalo u mopiohe, mowali mongotonga batanga, juujulu, mantali wau talatibu.

⁹ Tio musi motidihu daá to pongaajali u mowali palacayalo, debo odelo umaa pilongajali maó olio. Loú odito tio mambo

monaseehati tau patopatoá to pongaajali u otutu, wau mopoéela maó totala lotau-tauwalo tamo tehengi olio.

¹⁰Sababu dadaata tau taóhilaa momalakala, laba-labaalo mopiohe tau-tauwalo taa engontielio o agama Yahudi; timongolio hemo himbulo taawewo wolo latabu limongolio.

¹¹Tau-tauwalo tadebo odelo uito musi pambolalo tunggilio, sababu timongolio mopo tolonggalo dadaata ngaalaá wolo popoo-ngajaliyalo diila pongalo aakali. Timongolio mohutu uito bo sababu motohilaa mololohe paéeda udiila paatuti!

¹²Peéenta ngotaalio lonabi limongolio lohihilao, taáasalilio mai lonto Kreta olo, lolóiya, "Tau-tauwalo Kreta laito hemo himbulo, wau debo odelo binatangi mongantau u motula wau lantingalo."

¹³Wolo uiloíya lonabi boito memangi otutu. Uito sababuulio yió musi modini olimongolio loú moóohuú; alihu timongolio debo motidihu to pongaajali u otutu,

¹⁴wau diilalo motidihu to tilolahepe tombilu lo Yahudi meaalo tilolahepe wuúdu u pilohutu lotau-tauwalo tadiila mololimo pongaajali u otutu boito.

¹⁵ Tootoonulalo u hitua–tuawua yito mantali ode tau–tauwalo tamantali. Bo ode tau–tauwalo tahi opikilangia kootolo wau diila o iimani diaaluo penu boli tuwau maó umantali, sababu pikiilangi wau hilaa u maloótapu tinelo Eeya limongolio malo kootolo!

¹⁶ Timongolio hipo loíyawa deú timongolio motota lo Allahu Taáala lebe–lebe pomaó huhutu limongolio momaahu o–Lio. Timongolio moólonuó, wau timongolio diila mohuto modungohu; timongolio yito tau–tauwalo tadiila himambooa mohutu u hitua–tuawua umopiohe.

2 ¹ Bo yió, Titusi, mamusi yió mopoájali maó pongaajali u motuhatawa.

² Naseehatia maó mongo lolaí tahi huulanga, alihu timongolio mongotongo batanga, molinepo wau tumumulo odelo taa upaatuti hulumatiolo. Timongolio olo musi motidihu to pongaajali u otutu monto Allahu Taáala, motoliángo wolo wimu–wimumuto ngo@aamilalo wau modutolo wolo sabali.

³ Odito olo yió mamusi monaseehati maó mongobua tahi huulanga alihu píili limongolio motuuúde loú wolo upaatuti

duólo taa u hitumula tolomodu ode Allahu Taáala. Timongolio diila mowali mopitana taa wewo, wau diila mowali otolonga lo minumani umoó huwoó. Timongolio musi mopoájali maó susuu–aliyaalo u mopiohe, ⁴ alihu woleeto timongolio mowali mopoópiohe mongobua tahi muudawa u motoliánga dile wau taúkekeei,

⁵ mowali molinepo, tumutumulo mantali mowali tiilo to dileya umopiohu wau taáluku todilelio. Loú odito diaaluo taa mowali mohenteá habari monto Allahu Taáala.

⁶ Odito olo, nasehatia maó tahi muudawa alihu timongolio mowali molinepo.

⁷ Todelomo totoonulalo suáli, mamusi yió mowali obaayawa topíili u mopiohe. Wonu yió mongaajali, yió musi juujulu wau otu–otutuulo ma@o.

⁸ Pomakea maó tataa–heyaalo u molinepo, udiila mowali henteó lotau, alihu lawanimu mowali moolito sababu diaaluo susuu–aliyaalo mobulilo u mowali loíya limongolio pasalinto.

⁹ Mongo wato musi taáluku toli tuanilio, wau mopo sanangi hilaalio todelomo

totoonulalo suáli. Timongolio diila mowali mobuutola,

¹⁰ meaalo motaó. Mamusi timongolio mopo biloheó deú timongolio laito opíili mopiohe wau tatapu molotolo hilao; alihu wolo píili limongolio boito tau momuji pongajali pasali lo Allahu Taáala, Tamoo-po@aahua olanto.

¹¹ Sababu Allahu Taáala malo pobilohei odehu hilaa-Lio huna mopo@aahu ngoilanggubu umati lomanusia.

¹² Odehu hilaa lo Allahu Taáala boito mongaajali olanto alihu diilalo tumumulo bubuu-lemenga wolo kahandaki lo Allahu Taáala wau diila moduduá otohila siipati lodunia. Ito ilajari-Lio mai u tumumulo todelomo dunia botie loú motota mongotongo batanga, tuulusi wau tatapu molotolo hilao to Allahu Taáala.

¹³ Botia ito donggo hemohima Dulahe u hehalaa-puwonto boito; to Dulahe boito dunia mamooóonto odudaá li Isa Almasi, deúito-yito Allahu Taáala Taa Laba-labaalo udaá, wau Olongia Tamoo-po@aahua olanto.

¹⁴ Tio malo pobake batanga-Lio olanto u lolopato olanto lonto totoonulalo u hileeta, wau lopowali olanto umati tuwau talo

lopato lonto dusa wau talowali miliki–Lio wambaó, wau tamoólohu mohutu u mopiohe.

¹⁵ Pongaajalia maó ngoáamilalo boito, wau nasehatia boli dinia maó tau–tauwalo tahi podungohe olemu wolo lealeatu tilihula. Diila maó polulia penu boli ngotaalio momilohe olemu dupadupapa.

3 ¹ Poéela maó pongawaá lo jajaa–maáamu alihu timongolio taáluku tomongo taúwa wau tamotolo kawasa lipu, wau modungohe boli motidapato mohutu motiídu suáli u mopiohe.

² Polelea maó olimongolio alihu diila mopitana meaalo motaameta penu boli wolita, bo tumbaó odudelo aaluti. Mamusi timongolio laito odudelo molumboyo to ode taa ngoáamila.

³ Sababu muloololio mai ito lohihilao olo mohulodu, yilapalo wau diila modungohu. Ito pilowato lonapusu hidala–dalaala wau u otohila; ito hitumula wolo tilolahepe ninii–yaitaalo u moleeto wau mohiihia, wau tinggai mololoonuá.

⁴ Bo Allahu Taáala, Tamoo–poáhua olanto lopo bilohei ponu wau opopiohe hilaa–Lio olanto.

⁵ Tio lopoáahu mai olanto, diila sababu ito malohutu hitua–tuawua umopiohe, bo sababu Tio lohihilao momonu olanto. Tio lopoáahu mai olaanto lotimbulude to Rohullah, talongohi mai olanto pilotutu bohu wau tutumulo bohu wolo dalala lopobelesi olanto.

⁶ Allahu Taáala loluwatai Rohu–Lio to olanto loú lotimbulude li Isa Almasi Olongia Tamoo–poáhua olanto,

⁷ alihu wolo odehu hilaa li Isa, ito muli mopiiohe wolo Allahu Taáala wau ito moótodo mai tutumulo u tutuulio tutu wau ohiheo–hiheolo maó u hehala–halapuwonto.

⁸ Loíya botie otutu banari. Otohilaáú yió mopo piduduto susuu–aliyaalo botie, alihu tau–tauwalo tapalacaya to Allahu Taáala tióotutua motolopani u mohutu totoonulalo kalaja u mopiohe wau ohuna ode taa ngoáamila.

⁹ Walahe maó totoonulalo polo buutola udiila ohuna, totoonulalo silita asali uusulu, polo hamawa wau polohuulua tomimbihu butoó lo agama. Ngoáamilalo boito diaaluo hunalio wau diaaluo paéedalio.

¹⁰Taa umoó sababu polobuáya todelomo jamaá, mamusi diniyomu maó peéenta poóoluo; lapataó uito didu maó poáawota wolio.

¹¹Otaawamu deú taa debo odelo uito taloluusa wau duduu–saalio mopo–bukuti deú tio ototala.

¹²Molamemeto lapatio maó waú molao mai olei Artemas meaalo olei Tikhikus ode olemu, huáa potolo panilo u monaó mai de olaú to Nikopolis, sababu waú oniyati motibiluloá mola teto ngotilonggadu sembo lo huhulo.

¹³Potolo panilo tióotutua u momantu olei Jenas ahali lobutoó boito, wau tei Apolos, alihu timongolio mowali momonggato wau diila okulangia lolo–lolo.

¹⁴Tau–taunto musu mopoóolato mohutu susuu–aliyaalo u mopiohe alihu mowali mopoópolu totoonulalo koporluani ulaba–labaalo palaluwolo; diila bolo timongolio tumumulo diila ohuna.

¹⁵Ngoáamila wutato tawoluo peé–peéenta wolaú, lolao salamu olemu. Potunggula maó salamu lami tomongo waitunto tango iimani. Pohileaala duá Eeya mobalakati mai Mongo wutato ngoáamila Hulumati lamiaatia, Paulus

Filemon

1 ¹ Wutato Pilemon, tamani wau waito lami! Waú, Paulus, ngotaalio lotutupa sababu ti Isa Almasi, peé-peéenta wolo wutatonto Timotius; loluladei tulade botie olemu

² wau ode jamaá tahiámbua tobelemu; olo to wutatonto, ti Appia wau tamani tangopo hipate, tei Arkhipusi.

³ Ami motiwunela pohileaala duá Allahu Taáala ti Paapanto wau Eeya Isa Almasi mongohi mai balakati wau salaamati olemu.

⁴ Timíidu watia moduá, watia hemo langgulaó tanggulo Wutato wau molapali mola oduólo ode Allahu Taáala.

⁵ Sababu watia lodungohe deú Wutato tióotutua palacaya to Eeya Isa wau motoliánga ngoáamila umati lo Allahu Taáala.

⁶ Watia moduá mola pohileaala duá potolo wutatonto odelo tau-tauwalo palacaya mamooó toduo mai huhaama ulebe udaá maó to ngoáamilalo balakati u mililikinto sababu lotituwau woli Almasi.

⁷ Wutato Pilemon, toliángumu ode ngoáamila umati lo Allahu Taáala, loéengahe olaatia wau lohuntulo olaatia! Ngoáamila umati lo Allahu Taáala malowali leengahu sababu Wutato.

⁸ Masababu uito, odelo ngotaalio lowutato tango iimani, watia mowali wambaío momalentai to Wutato u mohutu maó wolo u musi pohutuo lo Wutato.

⁹ Bo sababu watia motoliánga to Wutato, watia bo mohile wambaó. Watia botie taa panggola ngota wau botia donggo tataahangi todelomo tutupa sababu ti Isa Almasi.

¹⁰ Watia Paulus, moóowoli mai lo hihiiile tuwau olemu tomimbihu olei Onesimus, walaó watia todelomo li Almasi. Sababu todelomo tutupa botie watia malowali tiyamo lo rohulio.

¹¹ Omoóomolu tio diila ohuna olemu, bo botia tio ohuna olemu, diila bo olemu wambaó bo tolaatia olo.

¹² Botia taa u otoliángo lowatia boito muli laolo mai lowatia olemu.

¹³ Otutuulio maó watia ohilaa molahangi olio peé-peéenta wolaatia debo odelo pobulotalo wolemu, alihu tio mowali momantu olaatia, ngotilonggadu watia

tataahangi todelomo tutupa botie sababu helo pohabari Habari Mopiohe lonto Allahu Taáala.

¹⁴ Bo watia diila mohuto motohilaa wolo–wolo wonu Wutato diipo akolo. Watia lebe motohilaa Wutato mohutu uito wolo iloheela lohilao lohihilao; watia diila motohilaa momakusa olemu.

¹⁵ Tanu tei Onesimus mobuá monto Wutato u ngopeé mola alihu Wutato mowali muli moótapu olio u ohiheo–hiheolo maó.

¹⁶ Masaatia tio diila bo ngotaalio lowato duólo Wutato; tio lebe maó leeto. Tio yito timongota taulo Nasara táilo toliángo. Tio ohuna daá olaatia, tidiyolo maó olemu! Tantu tio ohuna daá mopio odelo wato meaalo odelo wutata ngota todelomo Eeya!

¹⁷ Masababu uito, sababu Wutato monganggapu olaatia tamani timongota lo Nasara, muli tolimowa maó tei Onesimus tutuuwauwa debo odelo Wutato malo lolimo olaatia.

¹⁸ Wonu tio ototala meaalo obiloli olemu, huliilo maó de watia tamaa momanta ngoáamilalo boito.

¹⁹ Naa, mopiohulo watia moluladeó lohihilao tewe: Watia, Paulus, mamomayali

maó ngoáamilalo. (Tantu diila palalu watia mopoéelai deú Wutato lohihilao obiloli olaatia, deúito–yito tutumulumu u bohu odelo taulo Nasara.)

²⁰ Sababu uito, domi Eeya ntali tulungia mai watia, powengahe mai hilaa lowatia odelo wutato todelomo li Almasi.

²¹ Watia loluladei tulade botie sababu yakini deú Wutato mamohutu wolo u pohile lowatia. Tumbaó otaawa lowatia Wutato mamohutu lebe maó leeto.

²² Sambela uito, tulungia maó mopodapato huwali olaatia tobelemu, sababu watia motiwunela to Allahu Taáala modungohe duá lo Mongo wutato ngoáaamilalo wau modelo olaatia muli mohualingai ode limongoli.

²³ Tei Epapras, tawoluo peé–peéenta wolaatia todelomo tutupa sababu ti Isa Almasi, lolao salamulio olemu.

²⁴ Tolimowa maó olo salamu lomongo tamani lowatia; Markusi, Aristarkus, Demas wolei Lukasi.

²⁵ Pohileaala duá Eeya Isa Almasi mobalakati mai olimongoli. Hulumati lamiaatia, Paulus

Ibrani

1 ¹ Tojamani muloololio mai poó-poódaata Allahu Taáala helo tahuda mai odeli nene mayanto lotimbulude tomongo nabi wolo lomake dudelo u hidala-dalaala.

² Bo tojamani pulitio botie Tio lotahuda mai olanto wolo lotimbulude to Wala-ílo. Lotimbulude to Wala-ílo botieelo Allahu Taáala lopowali mai ngoilanggubu aalamu. Wau Allahu Taáala malolantu maó deú Wala-ílo botieelo olo taóhaku motolo miliki totoonulalo u hitua-tuawua.

³ Tiolo tamopo tinelai odudaá lo Allahu Taáala ulaba-labaalo mobaango; Tiolo gambali u moilaalo monto batanga lo Allahu Taáala lohihilao. Tiolo olo tamolaalai otuwau lo ngoilanggubu aalamu botie wolo kawasa lotahuda-Lio ulaba-labaalo okawasa. Lapataó Tio mopoluasi manusia taa u lopatolo monto duduu-sawaalo limongolio, Tio mamó tihuloá tobele biluloá lo pamalenta to sologa peé-peéenta wolo Allahu Taáala, Tamongawasa ulaba-labaalo malaió.

⁴Walaó boito loótapu huhuloá ulebe lolaiá daá wolo malaíkati, wau tanggulo uilohi lo Allahu Taáala o-Lio olo lebe hulu-hulumati daá wolo tanggulo uilohi ode malaíkati.

⁵Diila peénta maó Allahu Taáala helo tahuda odie penu boli ode ngotaalio lo malaíkati, "Yióolo Wala-Ú; todulahe botie Waú mowali ti Paapamu." Diila peénta maó Allahu Taáala helo tahuda odie penu boli tomimbihu malaíkati toonu olo, "Waú mamowali ti Paapa-Lio, wau Tio mamowali Wala-Ú."

⁶Bo tosaaáti Allahu Taáala lolao mai Wala-Ío tamohuhula daá ode dunia botie, Allahu Taáala lotahuda odie, "Ngoáamila malaíkati wajibu molubo Walaó boito."

⁷Tomimbihu maaaa-laíkatiyalo, Allahu Taáala lotahuda odie, "Allahu Taáala mohutu maaaa-laíkati-Lio mowali dupoto, wau tahi pomayawa o-Lio mowali léito tulu."

⁸Bo to Walaó boito, Allahu Taáala lotahuda maó, "Bele biluloáa-Mu, oo Allahu Taáala, mabakaa ohiheo-hiheolo maó! Pamalenta-Mu yito pamalenta u aadili.

⁹Yió mamotohilaa u aadili, wau mamolonuó udiila juujulu; uitolo sababuulio Allahu Taáala, Allahu Taáala-Mu, molulaota ole-Mu wau mongohi ole-Mu ohulumati u moótodo weengahe, mongilabota lomongo sahabati-Mu."

¹⁰Allahu Taáala lotahuda olo, "Yió, Eeya, toú bohulio lopowali mai dunia, wau Yió lohihilao talo powali hulungo.

¹¹Ngoáamilalo boito mamooli, wau mowali panggola debo odelo boó; bo Yió diila tamobolió.

¹²Ngoilanggubu aalamu botie mapiúwo-Mu debo odelo boó, wau matuloá-Mu wolo uwewo. Bo Yió diila peéenta maó tamobolió, wau tutumulu-Mu diila taópulitio."

¹³Allahu Taáala diila peéenta maó lotahuda odie penu boli ode ngotaalio lo malaíkati, "Huloóolo towimbihu olowala-Ú, dilumutu mumuusú-Mu potaálukuwo-Mu de ole-Mu."

¹⁴Wonu odito, otutuulio maó maaa-láikatiyalo boito tatoonu? Timongolio yito roroo-huwaalo tahi pomayawa to Allahu Taáala, wau taílahula lo Allahu Taáala u momantu tau-tauwalo tamaa mololimo oáahu.

2 ¹ Uitolo sababuulio ito musi lebe tióotutua motidihu to popoo-ngajaliyalo umaílo dungohento, alihu ito diila maó mololaa iimaninto.

² Tataa-huliyalo upilo tunggulai lo maaa-láikatiyalo toli nenemoyanto malo ilaalo otutu, wau taa u diila moduduó meaalo modungoheó mololimo hukuumani u motuúde.

³ Tidiyolo maó wolo oáahu ulebe polu-polutuó monto tataa-huliyalo boito! Wonu ito diila mopoótuota to oáahu boito, ito tantu diila tamolopato monto hukuumani. Sababu Eeya lohihilaolo tabohu-bohulio lopo malalumu oáahu boito, wau tau-tauwalo tamulomulo lodungoheó malo pobukuti u otutuulio to olanto.

⁴ Ngopohia maó leeto, Allahu Taáala loduduá lopoó toheeto osakusi lotau-tauwala boito loú lopowoluo totoonulalo u moólinggolabe wau susuu-aliyaalo upolu-polutuó wau lolaya-layadeó totoonulalo wowohi lonto Rohullah loduduá otohilaa-Lio lohihilao.

⁵ Maaa-láikatiyalo diila loótapu kawasa lonto Allah Taáala u momalenta dunia

bohu umamei dungga mai, deúito–yito dunia udonggo hebisalanto botie.

⁶ Boliño maó to bagiyangi tuwau todelomo Kitabi tulatulade odie mola, "Manusia boito wolo, oo Allahu Taáala, tilinggula Allahu Taáala ohilaa moéela mai olio? Manusia bo manusia wambaño, bo Eeya hemo poóuotai olio!

⁷ Bo wolo ngoínta lomato Eeya lopowali mai olio lebe dupadupapa ngopeé wolo malaíkati. Eeya longohi mai olio huhuloá u lailaió wau hulu–hulumati,

⁸ wau lopowali olio takawa–kawasa tou totoonulalo u hitua–tuawua." Naa, wonu loíyalo deú Allahu Taáala mopowali mai manusia "takawa–kawasa tou totoonulalo u hitua–tuawua", uito boliilio diaaluo penu boli tuwau maó udiila to walungo kawasa lomanusia. Eleponu odito, ito diila moóonto botia manusia okawasa tou totoonulalo u hitua–tuawua.

⁹ Bo ito maloóonto li Isa okawasa! Tio pilo powali lebe dupadupapa ngopeé wolo malaíkati todelomo wakutu u ngoínta lomato, alihu to opopiohu hilaa lo Allahu Taáala Tio mowali mate duólo ngoáamila umati lomanusia. Ito moóonto o–Lio botia yilohia huhuloá u molamahu wau

hulu-hulumati sababu Tio malo dutolo tunggula yilate.

¹⁰Memangi mapatutilio Allahu Taáala -- talo powali mai totoonulalo u hituatuawua ode makusudu-Lio lohihilao -- lohutu li Isa Tamoo-poáahua u wimu-wimumuto tutu lotimbulude topolo dutolo. Woleeto Allahu Taáala mowali moheinga taa dadaata u moduduá poudaáalo peé-peéenta woli Isa. Sababu Tiolo pomuó dalalo olimongolio u mowali poáahuwolo.

¹¹Ti Isa lopo belesi manusia lonto duduu-sawaalo limongolio; wau Tio talo pobelesi, wau timongolio tapilo belesi boito peé-peéenta o Allahu Taáala tuwa-tuawulo. Uitolo sababuulio ti Isa diila loolito longaku olimongolio boito odelo mongo wuta-Tio.

¹²Ti Isa lolóiya ode Allahu Taáala, "Waú mamopo pohabari tomongo wutatu-Ú pasali lo Allahu Taáala. Waú mamomuji mola Allahu Taáala todelomo dudunggaya limongolio."

¹³Ti Isa lolóiya olo, "Waú mamopo wunela halapani-Ú ode Allahu Taáala." Wau Tio lolóiya olo, "Uti-utieelo Waú peé-peéenta

wolo mongo walaó tamailudu mai lo Allahu Taáala de Olaú."

¹⁴ Masababu tau-tauwalo walaá boito, deúito-yito mahaluku lomanusia tamowali mate, yi ti Isa lohihilao lowali tutuuwauwa woli mongolio wau tumutumulo todelomo owowoluwoa lomanusia. Tio lohutu odito, alihu wolo opopate-Lio Tio mowali mopoántulu Ibilisi u motolo kawasa to opopate.

¹⁵ Wolo pohuli boito Tio lopo lopato tau-tauwalo tangotupa lo tutumulo pilohutulio wato sababu moohe to opopate.

¹⁶ Malo ilaalo deú diila malaíkati tatilulungia-Lio, bo wali lei Abraham.

¹⁷ Utie boliilio deú Tio musu mowali motutuwau wolo mongo wuta-Tio todelomo totoonulalo suáli. Wau woleeto boito Tio mowali limamu Daá taatatapu wau molotolo hilao wau odehu hilao. Wolo bubayaa-Lio boito dusa lomanusia lowali ilambungu.

¹⁸ Wau sababu Tio lohihilao mapeéenta lodutolo wau yilimontala, Tio loó tulungi tau-tauwalo tahe ilotuhata loimontala, sababu Tio lohihilao mapeéenta yilimontala wau lodutolo.

3¹ Mongo wutato timongota lo Nasara tamaa tiliango olo lo Allahu Taáala! Nte pikiilangia mola tióotutua tomimbihu li Isa botie! Allahu Taáala lolao mai o–Lio tolomodu u mowali limamu Da@a todelomo agama u heduduáto.

² Tio tatapu wau molotolo hilao to Allahu Taáala tamalo lulaoto o–Lio duólo kalaja boito, debo odelo tei Musa olo omoóomolu tatapu wau molotolo hilao moponaó lo tuugasilio tobele lo Allahu Taáala.

³ Boti Isa paatuti moótapu hulumati ulebe udaá maó wolei Musa. Sababu tamomongu bele musi moótapu hulumati lebe udaá maó wolo bele boito wambaó.

⁴ Memangi timiídu bele woluo tamomongu maó, bo tamomongu totoonulalo u hitua–tuawua yito Allahu Taáala lohihilao.

⁵ Tei Musa tatapu wau molotolo hilao odelo tamoomayawa todelomo bele lo Allahu Taáala wau mo po tunggulo susuu–aliyaalo u mapoótaa lo Allahu Taáala todulahe u mamei dungga mai.

⁶ Boti Isa Almasi tatapu wau molotolo hilao odelo Walaó tatihu–tihula duólo Bele lo Allahu Taáala. Wau ito botieelo Bele lo

Allahu Taáala, wonu ito debo osumangati wau debo yakini u moótapu mai wolo u hehalaa-puwonto.

⁷ Sababu uito, debo odelo tahuda lo Rohullah, "Wonu todulahe botie timongoli modungohe suala lo Allahu Taáala,

⁸ timongoli diila maó potibaáangi, debo odelo loluhurumu, toú timongolio lomalakala to Allahu Taáala wau lotesi Allahu Taáala tohuta hungayo u luasi daá.

⁹ 'Mola teto loluhurumu lohimontala Ola--Ú wau lotesi Ola-Ú,' tahuda lo Allahu Taáala, 'lebe-lebe pomaó timongolio maloóonto huhutuu-Ú wopato pulu lotaunu mola hiheolio.'

¹⁰ Uitolo sababuulio Waú lomuluka olimongolio wau Waú lotahuda, 'Timongolio laito diila tatapu wau molotolo hilao, wau mopanggu modungohe totoonulalo palentaa-Ú?'

¹¹ Waú lomuluka wau lotadia, 'Timongolio diila tatumuwoto odelipu boito u moó huheli peé-peéenta wola-Ú.'"

¹² Mongo wutato, poódaha-dahaalo maó diila bolo woluo to wolotamu ngotaalio tahilaalio odito leetio wau diila o iimani, tilinggula tio mobale wau mohalahe monto Allahu Taáala tatumu-tumulo!

¹³ Oditolio, alihu diaaluo penu boli ngotaa maó to wolotamu u oimbulowa lodusa, tilinggula motehengi to Allahu Taáala, mamusi timongoli monanaa–sehatia timiídu dulahu ngotilonggadu ito donggo tumutumulo todelomo jamani u ilunte "Dulahe Botie" todelomo Kitabi.

¹⁴ Ito ngoáamila yito tamani ngopo hipate woli Isa Almasi, asali ito demola pulitio modihu tióotutua oyoyakini u mililikinto toú bohulio mai.

¹⁵ Uti–utieelo u tulatulade todelomo Kitabi, "Wonu todulahe botie timongoli modungohe suala lo Allahu Taáala, timongoli diila maó potibaáangi, debo odelo loluhurumu, toú timongolio lomalakala to Allahu Taáala."

¹⁶ Naa, tatoonu tau–tauwalo tahe lodungohe suala lo Allahu Taáala lapataó lomalakala to o–Lio? Ui–uitolo ngoáamila tau tadilelo lei Musa yilumualai lonto Masiri, diila odito?

¹⁷ Wau to olita Allahu Taáala helo muluka wopato pulu lotaunu mola hiheolio? Ode limongolio taódusa, tailate to huta datahu luasi daá u delita, diila odito?

¹⁸ Toú Allahu Taáala lotadia odie, "Timongolio diila tatumuwoto odelipu

boito umoó huheli peé-peéenta wola-Ú" tingga malo tita poli tapilatuju lo Allahu Taáala? Tapilatuju yito tau-tauwalo tahe momalakala to Allahu Taáala, diila odito?

¹⁹ Botia ito mongalati deú timongolio diila moó tuwoto, sababu timongolio diila palacaya to Allahu Taáala.

4 ¹ Naa, danti lo Allahu Taáala donggo pohu-pohutu, wau ito mawohia-Lio pohuhelia upilo danti-Lio mai. Oditolio, mamusi ito modaha alihu diila bolo woluo penu boli ngota maó towolota limongoli u meinaasaó diila moórasa huheli upilo danti-Lio mai boito.

² Sababu Habari Mopiohe boito mapilo habari mai olanto tutuwauwa debo odelo tolimongolio. Bo toli mongolio, habari boito diila ohunalio. Sababu tou timongolio lodungoheó, timongolio diila palacaya.

³ Bo ito tapalacaya malo lolimo pohuhelia upilo danti mai lo Allahu Taáala boito. Uito lotuúde loú wolo upilo tahuda mai lo Allahu Taáala, odie, "Wau muluka wau motadia, 'Timongolio diila tatumuwoto umoó huheli peé-peéenta wola-Ú.'" Allahu Taáala lotahuda odito eleponu kalajaa-Lio

mailapato tumulalo mai Tio lopowali dunia botie.

⁴ Sababu pasali lodulahe opitulio, woluo tulatulade todelomo Kitabi odie. "Todulahe opitulio Allahu Taáala lohuheli lonto ngoáamila kalajaa–Lio."

⁵ Tomimbihu suáli boito tiluladio poli odie, "Timongoli diila tatumuwoto odelipu boito u mohuheli peé–peéenta wola–Ú."

⁶ Oditolio timongolio tabohu–bohulio lodungohe habari pasali lo Habari Mopiohe boito, diila mololimo pohuhelia boito, sababu timongolio diila palacaya. Wonu odito malo patato deú woluo tau–tauwalo wewo tamohulodu mololimo pohuhelia boito.

⁷ Sababu matilantu mai lo Allahu Taáala toú dulahe tuwau uwewo poli, u ilunte "Dulahe Botie". Ota–otaunuwalio mola lapatio maó Allahu Taáala lotahuda mai tomimbihu suáli boito lotimbulude tolei Dauda, todelomo ayati u hilmalio engonti, "Wonu todulahe botie timongoli modungohe suala lo Allahu Taáala, timongoli diila maó potibaáangi."

⁸ Wonu humayaalio tei Yosua malongohi ode tau–tauwala boito pohuhelia upilo danti mai lo Allahu Taáala, yi Allahu Taáala

madiilalo motahuda pasali loú tuwaulio lodulahe uwewo.

⁹Oditolio, duólo umati lo Allahu Taáala donggo woluo danti u mohuheli debo odelo Allahu Taáala lohuheli todulahe opitulio boito.

¹⁰Sababu taa u mololimo pohuhelia upilo danti mai lo Allahu Taáala to olio boito, mamohuheli olo monto ngoáamila kalajaalio, tutuwauwa debo odelo Allahu Taáala.

¹¹Sababu uito, duloolo ito motolopani tióotutua u mololimo pohuhelia upilo danti mai lo Allahu Taáala boito. Diila bolo penu boli ngotaa maó monto olanto diila otilapulo debo odelo timongolio omoóomolu, sababu diila palacaya to Allahu Taáala.

¹²Tahuda lo Allahu Taáala yito tahuda utumu–tumulo wau molotolo; lebe molalito wolo wamilo u omato dulo. Tahuda boito mometuó demola eenggade towolota lonyawa wau rohu; demola eenggade towolota lo leleetua wau tulalo yilonta, tilinggula motota loú modelo–delomolo maó pikiilangi wau niyati hilaa lomanusia.

¹³ Diaaluo maó penu boli mahaluku tuwau utuutuó monto bibilohu Allahu Taáala. Totoonulalo u hitua–tuawua hilaalawa wau hibuáde totalu–Lio. Wau ito musi mongohi titihulanto to o–Lio.

¹⁴ Uitolo sababuulio ito musi mopoó toheeto modihu toú pilongakua opopalaacayanto. Sababu ito o limamu Da@a uleidaá, tamaa tilumuwoto demola ode talu lo Allahu Taáala -- Tiolo ti Isa Walaó Allahu Taáala.

¹⁵ Ti limamu Daáanto boito diila iimamu tadiila moó duduá molaasa maó totoonulalo oluluu–puhunto. Boliío maó, Tio maili montala todelomo totoonulalo suáli, tutuwauwa debo odelo ito lohihilao; bo Tio diila helohutu dusa!

¹⁶ Sababu uito, duloolo ito wolo lealeaatu obobuheli modudulaó ode Allahu Taáala tahe momalenta wolo hilaa mopiohe. Allahu Taáala mamomonu mai olanto wau mobalakati olanto alihu ito moótapu tulungi tuhata to wakutuulio.

5 ¹ Timíidu iimamu daá tilulaoto towolota lo umati, wau piluduó u momaya Allahu Taáala odelo wakili limongolio. Tuugasilio yito mopodewo ode Allahu

Taáala wowoo–hiyaalo wau babaa–keyaalo u pongambunguwalu dusa.

² Ti limamu da@a boito lohihilao molulupuhu todelomo dadaata suáli, wau sababu uito tio mowali motihutu molumboyoto lohilao totau–tauwalo tadiila hitootawa lolo–lolo wau tailapalo dalalio.

³ Wau sababu tio lohihilao molulupuhu, yi tio musi mopodewo bake, diila bo sababu duduu–sawaalo lo umati, bo olo sababu duduu–saalio lohihilao.

⁴ Diaaluo penu boli ngotaa maó tamomuduá batangalio lohihilao mowali iimamu da@a. Taa mowali iimamu da@a, wonu Allahu Taáala motianga olio woleeto boito -- tutuuwauwa debo odelo tei Haruuna.

⁵ Odito olo ti Almasi. Tio diila lomuduá batanga–Lio lohihilao lowali limamu Da@a. Allahu Taáala lohihilaolo talo muduá o–Lio. Allahu Taáala lotahuda maó o–Lio, "Yióolo Wala–Ú; todulahe botie Waú mowali ti Paapa–Mu."

⁶ Totambati uwewo Allahu Taáala lotahuda olo, "Yió yito limamu ohiheo–hiheolo maó, debo odelo ti limamu Melkisedek."

⁷ Tomaasa li Isa tumutumulo todunia botie, Tio helodua wau lomolohone wolo watiwaatio wau hiyongo ode Allahu Taála, tamambo lopo@aahu o-Lio lonto opopate. Wau sababu Tio taaluku to Allahu Taála wolo hulumati u lealeaatulo maó; yi Tio dilungohe-Lio.

⁸ Ti Isa yito Walaó Allahu Taála, bo eleponu odito Tio helo balajali lowali lodungohe lotimbulude to dudutoo-Lio.

⁹ Yi lapatio maó Tio pilopowali tamoo-po@aahua tawimu-wimumuto tutu, Tio lowali pilobutua mai lo o@aahu u hiheo-hiheolo ma@o ode ngoáamila tau tamo dungohe o-Lio,

¹⁰ wau Allahu Taála olo lopo@ilaalo o-Lio odelo limamu Da@a, debo odelo ti limamu Melkisedek!

¹¹ Tomimbihu huhuloá li Isa odelo limamu Da@a, maito dadaata upalalu poótaa mai lamiaatia olimongoli, bo mototolo u motombangai sababu timongoli moboyu daá mongalati.

¹² Otutuulio maó mawakutuulio timongoli mowali guru, bo malo ilaalo timongoli debo donggo palalu mobalajali monto taa wewo pasali dadaa-saliyalo bohulo pongaajali lo Allahu Taála. Timongoli

diipo mowali mololimo uáalo u motoheeto; timongoli donggo musi mongilu susu wambaó.

¹³Taa udonggo hipongiluma susu, boliilio tio donggo unge; tio diipo loólaasa pasali wolo u otutu wau wolo u talatala.

¹⁴Uáalo u motoheeto yito ode taa leida@a u sababu pongalamani, maloó pohihiideó toonu u mopiohe wau toonu u moleeto.

6¹ Sababu uito, duloolo ito molaiá ode totoonulalo pongaajali u wumbutio mola leeto pasali omoontapo tutumulo lo Nasara, wau diila bo wambaó mopoótuoto dadaa–saliyalo bohulo pongaajali lo agamanto. Diilalo maó wuliyonto dasali lo pongaajali deú tau musi mohuheli mohutu susuu–aliyaalo udiila ohuna wau musi palacaya to Allahu Taáala,

²meaalo dasali lo pongaajali tomimbihu polihu meaalo mopodutu lo uluú toitaato lotau, meaalo tomimbihu muli tumumulai toú mailate maó meaalo hukuumani u ohiheo–hiheolo maó.

³Duloolo ito, wonu luasias lo Allahu Taáala, molaiá ode totoonulalo pongaajali u wumbutio mola!

⁴Sababu, tau–tauwalo tamaa lomaathe iimani, diila pongalo aakali muli deloolo.

Timongolio omoóomolu mailoluo todelomo tilango lo Allahu Taáala, wau maílo laasawa limongolio wowohi–Lio. Timongolio olo maloduduá kiluwasa lo Rohullah.

⁵ Otaawa limongolio lonto pongalamani limongolio deú tahuda lo Allahu Taáala boito mopiohe, wau timongolio maloólaasa popoo–nuwaalo upolupolu kawasa lonto jamani umamei dungga mai.

⁶ Lapataó uito timongolio momaahe iimani! Diila pongalo aakali muli modelo olimongolio umuli molilihu monto duduu–sawaalo limongolio. Sababu timongolio donggo hipo salipua poli Walaó Allahu Taáala wau helohutu o–Lio hilinaa totalu lotaa dadaata.

⁷ Huta u mongintopa taluhu didi u tingga maito molaaha mola toitaatio, lapataó mongohi tilapulo totoonulalo pilomulo u ohuna ode tamo kelakela maó, huta boito balakatia lo Allahu Taáala.

⁸ Bo wonu huta boito mongohi tilapulo papaa–dengowalo wau pilomulo oduhi, yi huta boito diila ohunalio wau demaa laánatia lo Allahu Taáala wau pulitio maó maahu tumbilalo.

⁹ Bo Mongo wutato taa otoliángo, eleponu amiaatia moloíya mai odito, bo amiaatia yakini tomimbihu olimongoli. Amiaatia yakini deú timongoli malo lolimo susuu–aliyaalo ulebe mopiohe, deúito–yito babaa–lakatiyalo udebo odelo bagiyangi lo oáahu limongoli.

¹⁰ Allahu Taáala diila bo Allahu Taáala tadiila aadili. Tio diila molipato wolo u kilalaja limongoli de o–Lio, wau toliángo upilo biloheó limongoli o–Lio toú lotulungi mongo wutato ngoímani, omoóomolu wau botia.

¹¹ Amiaatia motohilaa daá alihu timongoli ngota–ngota osumangati tulusi demola pulitio tilinggula timongoli mololimo wolo u hehala–halapuo limongoli boito.

¹² Amiaatia diila mohuto timongoli mowali lantingalo. Bo otohilaa lamiaatia alihu timongoli tumumulo debo odelo tau–tauwalo tahi pololimoa wolo upilo danti mai lo Allahu Taáala, sababu palacaya o–Lio wau sababu hipo himawa lou sabali.

¹³ Toú Allahu Taáala lodanti odelei Abraham, Tio lotadia deú Tio mamohutu mai wolo u mapilo danti–Lio. Wau sababu

diaaluo talebe molaiá wolo Allahu Taáala, yi Tio malo tadia totanggu-Lio lohihilao.

¹⁴Tio lotahuda, "Wau modanti mamó balakati olemu wau mohutu walimu mola mowali dadaata."

¹⁵Tei Abraham helohima wolo sabali, yi tio lololimo wolo upilo danti lo Allahu Taáala olio.

¹⁶Wonu tau motadia, tio motadia totanggulo taa wewo talebe molaiá wolio, yi tadia boito mopoó pulitaó totoonulalo batata.

¹⁷Allahu Taáala ohilaa mopo pinalai ode tau-tauwalo tahi pololimoa danti-Lio, deú Tio diila tamo lomelo lanjána-Lio. Uitolo sababuulio Tio loduhengaó tadia todanti-Lio boito.

¹⁸Dulo suáli boito diila mowali mobolió: Allahu Taáala diila pongalo aakali mohimbulo tomimbihu danti wau tadia-Lio. Sababu uito, ito tamaa lotiduóla to Allahu Taáala, yiluntula-Lio daá u motidihu tióotutua to halapani ubuá-buáadu to talunto.

¹⁹Harapaninto boito debo odelo jangga ulei pantongo demola delomio daá wau debo odelo didihu u motoheeto wau aamani duólo tutumulonto. Halapani

boito lolaapata to lalante lo Huwali Leidaa Laba-labaalo mantali to Bele lo Eeya tosologa.

²⁰Ti Isa malomuó dalalo ode tambati boito olanto, wau maa tilumuwota mola odito lowali limamu Daá olanto u ohiheo-hiheolo maó, debo odelo ti limamu Melkisedek.

7¹ Tei Melkisedek botie yito onlongia lonto Salem wau iimamu lo Allahu Taáala Taa Laba-labaalo molaiá. Tou tei Abraham lohualingai lonto popaatea lopo olaaheó mongo onlongia, tei Melkisedek mai lolutulo olio wau lobalakati maó olio.

²Yi tei Abraham longohi maó olei Melkisedek ngotayade mopulu louú totoonulalo wolo uilambatio mai. (Tanggulei Melkisedek boliilio maó, bohu-bohulio, "Olongia Uáadili"; wau sababu tio onlongia lonto Salem yi tanggulio boliilio maó olo "Olongia Salaamati.")

³Tomimbihu olei Melkisedek botie diaaluo maó tombango penu boli toutoonnu deú tio otiyamo meaalo otiilo meaalo onene moya; diaaluo olo tombango pasali pilotutua olio, meaalo opopatelio. Tio tutuuwauwa debo odelo

Walaó Allahu Taáala; tio yito iimamu tabakaa.

⁴ Oditolio, oontonganto tewe deú odito udaáalio tei Melkisedek botie; tio odito udaá tilinggula tei Abraham, ti Paapa loluhuru lo bangusanto, longohi maó olio ngotayade mopulu lonto totoonulalo hitua–tuawua u lotapulio mai lonto popaatea boito.

⁵ Todelomo butoó lo agama Yahudi matilantu deú mongo iimamu wali lei Lewi musi momulutaó ngotayade mopulu monto tilapulo umati lo Isiraílu, deúito–yito mongo wutati mongolio lohihilao, eleponu timongolio tutuuwauwa wali mai lei Abaraham.

⁶ Tei Melkisedek diila wali mai lei Lewi, penu odito tio lololimo olo ngotayade mopulu lonto totoonulalo u ilohama mai lei Abraham, wau lobalakati maó olo olei Abraham u tumbaó malo lolimo dadaa–ntiyaalo lonto Allahu Taáala.

⁷ Memangi diila mowali pobutolalo deú taa bilalakatia yito lebe dupadupapa wolo taa lobalakati olio.

⁸ Mongo iimamu tamololimo ngotayade mopulu boito yito taa u mowali mate. Bo moduduá to Kitabi, tei Melkisedek talo

lolimo wowohi ngotayade mopulu boito yito taa u debo tumutumulo.

⁹ Mowali loíyaalo, deú tei Lewi -- tawaliilio mai hipo mulutawa ngotayade mopulu monto umati lo Isiráilu -- lomayali olo tayade boito loli olei Abraham, toú tei Abraham lomayali maó odelei Melkisedek.

¹⁰ Eleponu tei Lewi diipo pilotutulio mai, bo mowali loíyaalo tio mailoluo todelomo batanga lei Abraham tinenemoyalio, toú tei Melkisedek lodunggaya wolei Abraham.

¹¹ To walungo taúwa lomongo iimamu Lewi, butoó agama lo Yahudi yilohilio mai ode umati lo Isiráilu. Sababu mongo iimamu Lewi omoóomolu boito diila mowali mohutu loú wimu–wimumuto tutu wolo u musi kalajaalio, yi musi woluo iimamu wewo, deúito–yito tadebo odelo ti iimamu Melkisedek, wau diilalo monto kaumu li iimamu Haruuna!

¹² Naa, wonu huhuloáa lomongo iimamu mobolió, butoó agama lo Yahudi olo musi mobolió olo.

¹³ U pilatuju tewe yito Eeyanto; Tio lonto suku wewo, wau diipo peéenta penu boli ngotaa maó lonto suku–Lio otuugasi odelo iimamu.

¹⁴ Ngoáamila tau motota deú Eeyanto asalii-Lio mai lonto suku lo Yahuda; wau tei Musa diila peéenta maó lolanggula suku boito toú tio lobisala pasali lomongo iimamu.

¹⁵ Suáli u bilisala botie lowali lebe lopatato poli, toú piloluneta mai ngotaalio li iimamu wewo tadebo odelo tei Melkisedek.

¹⁶ Tio piluduño lowali iimamu, diila patopatoá to wuwuu-uduwaalo manusia, bo patopatoá to tutumu-Lio u okawasa wau udiila opulitio.

¹⁷ Sababu todelomo Kitabi loíloíya, "Yió yito iimamu ohiheo-hiheolo maó, debo odelo ti iimamu Melkisedek."

¹⁸ Oditolio, botia wuúdu u deedelo mailinggi, sababu diila motoheeto wau diila ohuna.

¹⁹ Butoó agama lo Yahudi diila mowali mohutu penu boli hitua-tuawua mowali wimu-wimumuto tutu. Uito sababuulio ito botia yilohia halapani tuwau ulebe mopioheó; woleeto ito mowali mohimbide Allahu Taáala.

²⁰ Donggo poli, ngoáamilalo boito tilunuhe wolo tadia lonto Allahu Taáala.

Diaaluo tadia debo odelo uito toú mongo iimamu wewo boito piluduó.

²¹ Boti Isa piludu–lo lowali iimamu lomake tadia, toú Allahu Taáala lotahuda maó o–Lio, "Eeya malotadia, wau Tio diila tamo lomelo tilihula–Lio, 'Yió yito iimamu ohiheo–hiheolo maó.'"

²² Woleea botie olo ti Isa mowali pongaku ode daantia tuwau ulebe mopioheó.

²³ Woluo olo suáli tuwau: mongo iimamu wewo boito dadaata, sababu ngota–ngota timongolio yilate, tilinggula diila mowali mopo tolonga mola huhuloálio.

²⁴ Boti Isa tumutumulo ohiheo–hiheolo maó, oditolio huhuloá–Lio odelo iimamu diila lolimbata ode taawewo.

²⁵ Masababu uito u ohiheo–hiheolo maó ti Isa mowali mopoáahu tahi ponaówa mai ode Allahu Taáala motimbulude to o–Lio, sababu Tio tumutumulo ohiheo–hiheolo maó u moóowoli mola polohone ode Allahu Taáala duólo tau–tauwala boito.

²⁶ Oditolio, ti Isa boitolo ti iimamu Daá tapalaa–luwonto. Tio mantali, to o–Lio diila odungga totala meaalo penu boli dusa wolo. Tio pilohalahu lonto tahi oduusawa, wau pilobotulo demola tambati

ulebe molanggato wolo ngoáamilalo hulungo.

²⁷ Tio diila debo odelo mongo iimamu daá uwewo, u timíidu dulahe musí mopodewo bake sababu duduu–saalio lohíhilao omoóomolu, bolo kalana duduu–sawaalo umati. Ti Isa mopodewo bake bo wambaó peéenta u ohiheo–hiheolo maó, tou Tio lopodewo batanga–Lio lohíhilao odelo bake.

²⁸ Butoó agama lo Yahudi momuduó tau udiila wimu–wimumuto tutu daá iimamu molamahu. Bo lapatio maó lobutoó boito, Allahu Taáala lohutu mai danti wolo tadia deú Tio momuduó odelo limamu Daá, Walaó tamaa pilowali Tamoo–poáahua tawimu–wimumuto tutu u ohiheo–hiheolo maó.

8¹ Bungo lou ngoáamilalo bisalanto botie yito: Ito o limamu Daá tadebo odelo uito, tahulo–huloá hemomalenta peé–peéenta wolo Allahu Taáala Laba–labaalo udaá tosologa.

² Tio helo kalaja maó tuugasi odelo limamu Daá to Huwali Leidaá Laba–labaalo mantali, deúito–yito todelomo kema lo Allahu Taáala u tutuulio tutu, upilo tihulo Eeya, diila lo manusia.

³ Timiïdu iimamu daá piluduó u mopodewo bake meaalo dewo ode Allahu Taáala. Odito olo li Imamunto Daá; Tio musi o hitua–tuawua u podewolo.

⁴ Humayalio Tio woluo todunia botie, Tio diila tamowali iimamu, sababu mailoluo iimamu talo podewo bake u pilohile wolo moóohuú todelomo butoó agama lo Yahudi.

⁵ Kalaja u pilohutu limongolio odelo iimamu boito otutuulio maó bo tala tuwaulio lobayahu wau wolilu loú wolo uwoluo tosologa. Uito mapiloótaa lo Allahu Taáala odelei Musa omoóomolu, toú tei Musa ohilaa mopotihulo Kema lo Eeya. Allahu Taáala lotahuda odie odelei Musa. "Poótoloma maó! Ngoáamilalo boito mamusi pohutuwomu moduduá gambali upilo bilohei olemu toitaato huïdu."

⁶ Bo botia ti Isa loótapu tuugasi iimamu ulebe molaio daá loú hekilalaja lomongo iimamu boito. Sababu daantia upilo woluo–Lio mai towolota lo Allahu Taáala wau manusia, deúito–yito dantia ulebe mopiohu sababu patopatoá todanti ode susuu–aliyaalo ulebe mopiohe.

⁷ Humayaalio diaaluo ililangi to daantia ubohulio, yi diila palalu powoluwolo daantia u oluolio.

⁸ Bo Allahu Taáala maloó dungga totala to umati-Lio, tilinggula Allahu Taáala lotahuda, "Eelai maó, mamei dungga wakutuulio, Waú mamó powoluo mai daantia ubohu wolo bangusa lo Isiráilu, wau wolo bangusa lo Yehuda.

⁹ Diila debo odelo daantia u pilohutu-Ú wolo loluhuru limongolio tou lodelo olimongolio yilumualo lonto lipu lo Masiri. Timongolio diila tatapu wau molotolo hilao to daantia u pilohutu-Ú woli mongolio; uitolo sababuulio Waú diila momandungi olimongolio.

¹⁰ Bo botia utieelo daantia u mapo hutuwo-Ú wolo umati lo Isiráilu. to duduu-laheyaalo u mamei dungga mai, tahuda lo Eeya: Waú mamó podutu butoóo-Ú todelomo pikiilangi limongolio, wau moluladeó todelomo hilaa limongolio. Waú mamowali Allahu Taáala limongolio, wau timongolio mamowali umati-Ú.

¹¹ Timongolio diilalo palalu mongaajali tinggai waitio, meaalo mopoótaa to wutatio, 'Oonuhelo maó Eeya.' Sababu

timongolio ngoáamila, kikiió wau leídaá mamooónuhe ola-Ú.

¹² Waú mamó ngambungu totoonulalo totala limongolio, wau diilalo moéela totoonulalo dusa limongolio."

¹³ Wolo loóowoli mai tuwaulio daantia u bohu, Allahu Taáala lohutu daantia ubohulio boito lowali deedelo wau loodulo; wau wolo u madeedelo, mahuáa mooli olo.

9¹ Daantia ubohulio o wuwuu-uduwaalo potabiaalo, wau olo o tambati potabiaalo huhutu lomanusia.

² Kema tuwau bilongu u ambahu talulio ilunte Huwali Leidaá Mantali. Teto woluo pakaakasi polumude tohe, wau woluo olo meja wolo roti upodewo ode Allahu Taáala.

³ To ambahu delomio, deúito-yito to dibalaka lolalante u oluolio, woluo huwali leidaá u ilunte Huwali Leidaá Laba-labaalo mantali.

⁴ Todelomo huwali leidaá boito woluo mesba upilohutu lonto hulawa u pomobuwalo dupa, wau woluo olo Bulua Daantia u ngoáamilalo woluwolude wolo hulawa. Todelomo Bulua boito woluo ulongo hulawa tuatunga roti maana,

tunggudu lei Haruna umaa ilotumbingo, wau dulo pita botulei uitaatio tulatulade mopulo palenta monto Allahu Taáala.

⁵Toitaato Bulua boito woluo dulo malaikati opolipió, deúito–yito mahaluku opolipió u mopobayahe owoluo lo Allahu Taáala. Polipió loú dulo mahaluku boito oá–oáabu toitaato taúbu Bulua, deúito–yito tambati ponga–mbunguwalo dusa. Bo ngoáamilalo boito diila mowali tombangalo botia loú motoyunuto.

⁶Odieelo mola ngoáamilalo ilatululio. Timíidu dulahe mongo iimamu tumuwoto ode delomio to ambahu talu lokema boito u moponaó tuugasi limongolio.

⁷U tumuwotaó ode ambahu delomio daá lokema boito boti iimamu molamahu wambaó. Tio mohutu uito bo peéenta ngotaunu. Uito pohutuolio loú modelo duhu u podewolo ode Allahu Taáala sababu batangalio lohihilao wau sababu duduu–sawaalo u pilohutu loú diila mongalati lo umati–Lio.

⁸Wolo wuúdu boito, Rohullah mopo bilohei wolo mopatato deú, ngotilonggadu kema to ambahu talu boito donggo tihutihulo, dalalo tumuwoto ode delomo

Huwali Leidaá Laba-labaalo mantali boito diipo mohuó.

⁹ Utie mopobayahei jamani botia; boliilio maó deú dedee-wowaalo wau babaa-keyaalo bake lo binatangi u podewolo ode Allahu Taáala, diila mowali mopo wimumuto tutu hilaa u maloótapu tinelo Eeya lotaa u hemodelo dewo.

¹⁰ Sababu uúupa-calawaalo boito bo motuhatawa loú aalo, minumani wau upacala hidala-dalaala u pomantaliyalo. Ngoáamilalo bo wuwuu-uduwaalo lahiri u pohanu-pohutu dilumutu saátilio pobohua mai lo Allahu Taáala.

¹¹ Boti Almasi malei dungga mai odelo limamu Daá lonto susuu-aliyaalo u mopiohe u mawoluo. Kema lo Eeya toutoonu Tio loponaó lotuugasi-Lio odelo limamu Daá yito kema ulebe udaá wau lebe wimu-wimumuto tutu. Uito diila pilohutu lomanusia; bolilio maó asaliilio mai diila lonto dunia u pilopowali botie.

¹² Ti Almasi tilimuwoto ode Huwali Leidaá Laba-labaalo mantali ode delomo kema boito bo wambaó peéenta ohiheo-hiheolo maó. Tou boito Tio diila lodelo duhu lobatade ulaí meaalo duhu lowalaó sapi u pilodewo; Tio lodelo duhu-Lio lohihilao,

wau woleeto Tio lopo lopato mai olanto u ohiheo–hiheolo maó.

¹³ Duhu monto batade wau sapi ulái wau peahuó bake lowalaó sapi, pomake u pomutata totaa hinajisia moduduá wuúdu lo agama alihu timongolio mowali belesi.

¹⁴ Naa, wonu duhu wau peahuó boito moó pobelesi onajisi lo tau–tauwalo boito, tidiyolo maó duhu li Almasi! Lotimbulude to Rohu ubakaa ti Almasi lopodewo batanga–Lio lohihilao ode Allahu Taáala odelo bake wimu–wimumuto tutu.

Duhu–Lio lopobelesi hilaa u maloótapu tinelo Eeya de olanto lonto upacala lo agama udiila ohuna, alihu ito mowali momaya Allahu Taáala tatumu–tumulo.

¹⁵ Uitolo sababuulio ti Almasi lowali Pilo timbulude ode tuwaulio lodaantia u bohu, alihu taa uma tiliyango Allahu Taáala moó tolimo babaa–lakatiyalo ubakaa uma pilodanti mai lo Allahu Taáala. Ngoáamilalo boito mowali motoduo sababu mailoluo tailate, deúito–yito ti Almasi; wau opopate–Lio boito helo polopato tau lonto totoonulalo totala u pilohutu limongolio toú dantia ubohulio donggo pohupohutu.

¹⁶ Wonu woluo tuladu warisi, musi olo woluo bukutiilio deú taa u lohutu tulade boito mailate.

¹⁷ Sababu tuladu Warisi diila ohuna ngotilonggadu taa u lohutu maó donggo tumu–tumulo. Tulade boito pohu–pohutu bo wonu tau boito mailate.

¹⁸ Sababu uito daantia ubohulio olo musi saahaalo wolo duhu.

¹⁹ Bohu–bohulio tei Musa lopo tunggulai ngoáamila palenta lobutoó Allahu Taáala tobangusa lo Isiráilu. Lapataó uito tei Musa lohama maó duhu lowalaó sapi wau walaó batade ulái, tulusi ilulaulio wolo taluhu, lapataó pilomutatio maó to Kitabi lo Bubuu–toówaalo lonto Allahu Taáala wau to ngoilanggubu bangusa lo Isiráilu wolo lomake huóyoto u hidala–dalala lohispopi wau lambuto himba lakulio meela molonihe.

²⁰ Sambela hemohutu uito tei Musa lolóiya, "Uti–utieelo duhu u moposaaha daantia lo Allahu Taáala umusi dungohe limongoli."

²¹ Lapataó wolo dudelo u tutuuwauwa, tei Musa lopomutato duhu boito olo ode Kema lo Eeya wau to ngoáamila pakaakasi u potabiaalo.

²² Memangi moduduá butoó agama lo Yahudi, ngopeé ngoáamilalo u hitua-tuawua pomantaliyolo wolo duhu; wau dusa bo mowali ambunguolo wonu woluo duhu pohuwatolo.

²³ Wolo dudelo debo odelo uitolo babaa-langiyalo umopo bayahei susuu–aliyaalo u tosologa, palalu pomantaliyolo. Bo duólo susuu–aliyaalo u tosologa boito lohihilao palaluwolo bake ulebe mopiohe daá.

²⁴ Sababu ti Almasi diila tilumuwoto ode Huwali Leidaá Mantali huhutu lomanusia, u bo mopo bayahei Mantali u otutuulio maó. Ti Almasi tilimumwota mola ode sologa tutuwau; mola teto Tio masaatia lotahudeó ode Allahu Taáala ode polohuna daá olanto.

²⁵ Ti iimamu daá lo Yahudi timíidu taunu tumuwoto ode Huwali Leidaá Laba–labaalo mantali todelomo Bele lo Eeya wolo modelo duhu lo binatangi tuwau. Boti Almasi diila tilumuwoto u lopodewo batanga–Lio wuwuulia.

²⁶ Sababu wonu odito, uito boliilio maó Tio malo wuwuulia lodutolo tumulalo mai dunia botie pilowali. Bo ilaalolio maó, masaatia tojamani pulitio botie, Tio dungga–dungga mai bo peénta wambaño

mai moluluta dusa wolo mopobake batanga-Lio lohihilao.

²⁷ Allahu Taáala malo potatapu mai deú manusia mate bo peéenta wambaío wau lapataó uito aadilio lo Allahu Taáala.

²⁸ Odito olo ti Almasi bo peéenta wamabaó pilodewo odelo bake u moluluta dusa lotaa dadaata. Tio mamuli meidungga mai tou oluolio, diila mai mopoó lapato pasali lodusa, bo mai mopoáahu totau-tauwalo tahi pohimawa podungga-Lio mai.

10 ¹ Butoó agama lo Yahudi bo mopo bayahei udiila mopatato pasali lo susuu-aliyaalo umopiohe u mamei dungga mai, wau diila bayahu u otutuulio maó lo susuu-aliyaalo boito. Diila pongalo aakali butoó boito mowali mopo wimumuto tutu taa u monaó mai molubo Allahu Taáala lou modelo podewo, eleponu timiídu taunu tulusi hepilodewo babaa-keyaalo u tutuuwauwa.

² Humayaalio tau-tauwalo tahi polubowa Allahu Taáala boito tióotutua mapiloó belesi lonto dusa, yi timongolio diilalo opongolaasa odusa, wau bake diilalo podewolo olo.

³ Bo ilaalolio babaa-keyaalo u pilodewo timiïdu taunu boito tumbaó mopoéela tau to duduu-sawaalo limongolio.

⁴ Sababu memangi duhu losapi wau duhu lobatade ulaí diila mowali moluluta dusa.

⁵ Uitolo sababuulio tou ti Almasi tilumuwotai ode delomo dunia, Tio lobisala ode Allahu Taáala, "Eeya diila mokahandaki bake wau dewo; boliïo maó Eeya malo podapato batanga de ola-Û.

⁶ Allahu Taáala diila motuhatawa wolo bake yilalango meaalo bake u pongambungualo dusa.

⁷ Lapataó Watia loloíya, 'Boti-botieelo Watia, oo Allahu Taáala! Watia monaó mai mohutu kahandaki lo Allahu Taáala, debo odelo u leitulade pasali batanga Laatia todelomo Kitabi."

⁸ Bohu-bohulio ti Almasi loloíya, "Allahu Taáala diila mokahandaki bake wau dewo; Allahu Taáala diila motuhatawa wolo bake lo binatanggi upilobu odelo dewo wau to bake u pongambungualo dusa." Ti Almasi loloíya odito, eleponu babaa-keyaalo boito pilodewo loduduá butoó agama lo Yahudi.

⁹ Lapataó uito ti Almasi loloíya. "Boti-botieelo Watia, oo Allahu Taáala! Watia

monaó mai u mohutu kahandaki lo Allahu Taáala." Oditolio Allahu Taáala lolulutaó babaa-keyaalo udeedelo boito, wau lopotuloó maó wolo bake li Almasi.

¹⁰Ti Isa Almasi malohutu wolo u kilahandaki lo Allahu Taáala wau lopodewo batanga-Lio odelo bake. Wolo dewo boito, u pilohutu-Lio bo peéenta wamabaío u ohiheo-hiheolo maó, ito ngoáamila pilobelesi lonto dusa.

¹¹Timiïdu iimamu lo Yahudi moponaó tuugasilio odelo iimamu timiïdu dulahu, wau wuwuulia tio hemo podewo babaa-keyaalo u tutuuwauwa. Bo babaa-keyaalo boito sama-samaata diila mowali moluluta dusa.

¹²Boliïo maó, ti Almasi lopodewo bo tuwau bake u pongambungualo dusa, wau bake boito pohupohutu u ohiheo-hiheolo maó. Lapataó lopodewo bake boito, ti Almasi lotihuloá to ambahu olowala lo Allahu Taáala wau momalenta peé-peéenta wo-Lio.

¹³Wau masaatia ti Almasi hemohima dilumutu Allahu Taáala mohutu mumuusulu-Lio taáluku to o-Lio.

¹⁴ Oditolio wolo bake tuwau, ti Almasi lopoó wimumuto tutu tau-tauwalo tamaa pilobelesi lonto dusa.

¹⁵ Tomimbihu suáli boito Rohullah longohi olo osakusii-Lio to olanto. Rohullah lotahuda,

¹⁶ "Utieelo daantia umaa pohutuwo-Ú woli mongolio to duduu-laheyaalo u mamei dungga,' tahuda lo Eeya, 'Waú mamó podutu bubuu-toóo-Ú todelomo hilaa limongolio, wau moluladeó todelomo pikiilangi limongolio."

¹⁷ Allahu Taáala olo lotahuda, "Waú mamó malongaó duduu-sawaalo wau totoonulalo ololeeti mongolio."

¹⁸ Oditolio, duduu-sawaalo wau totoonulalo ololeeto boito maa ilambungu, yi diilalo palalu mopodewo bake u pongambungualo dusa.

¹⁹ Naa, Mongo wutato, wolo opopate li Isa boito ito botia buheli tumuwoto ode Huwali Leidaá Laba-labaalo mantali.

²⁰ Ti Isa malomuó dalalo tuwau u bohu de olanto, deúito-yito dalalo u mongohi tutumulo. Dalalo boito moli lalante, deúito-yito batanga li Isa lohihilao.

²¹ Wau ito masaatia o ngotaalio iimamu taúdaá, tatihu-tihula duólo Bele lo Allahu Taáala.

²² Sababu uito, duloolo ito mohimbide Allahu Taáala wolo hilaa motulidu wau iimani motoheeto; wolo hilaa umaa pilomantali monto pongolaaasa utilala, wau wolo batanga u mapiloó belesi wolo taluhe u mantali.

²³ Mamusi ito motidihu tióotutua to halapani upilo ngakuwanto, sababu Allahu Taáala mowali palacayalo wau Tio mamoéelai danti-Lio.

²⁴ Wau mamusi ito mopoó tutuuwoto, alihu ito mowali mohuhuuntula u motoliángo ngota timongota wau mohutu susuu-aliyaalo u mopiohe.

²⁵ Mamusi ito debo moámbua peé-peéenta, wau diila maó pomalongo debo odelo taawewo. Ito tumbaó musí lebe tatapu wau molotolo hilao wau mopoó lolootolo, sababu otaawanto deú diilalo mohiheo Eeya mamei dungga mai.

²⁶ Sababu wonu habari u otutu monto Allahu Taáala mapilo tunggulio mai olanto, bo ito debo hemohutu dusa wambaño wolo makusudu, yi diduú bake u moluluta dusaanto.

²⁷ Tuwa-tuwaulo uwoluo to olanto yito motaalua wolo bubutoó Allahu Taáala wau tulu omulukaa-Lio umaa momobu tunggula maahu totau-tauwalo tahi polowalia o-Lio!

²⁸ Taa diila modungohe butoó uilohi mai lei Musa, hukuu-maniyolo mate loú diila o ambungulio, wonu to osakusi lo taduulota meaalo toulota, tio ilobukuti ototala.

²⁹ Malo lebe mobuuhetaó hukuumani u musi podehuwolo totaa u hemo dutadutaá Walaó Allahu Taáala. Tau boito hemo nganggapu hina duhu daantia lo Allahu Taáala, deúito-yito opopate li Almasi tamo poóbelesi monto dusa. Tio mohina Rohu tamoongohia odehu hilaó.

³⁰ Otaawanto tatoonu Tio talo tahuda, "Waú mamó lontuli! Waú mamó hukuumani!" wau talo tahuda, "Eeya mamó mutoái umati-Lio."

³¹ Malo moótihela hapato wonu modehu to uluú lo Allahu Taáala Taa Tumutumulo!

³² Eelai maó woloolo mola owowoluwoa lo Mongo wutato tou yilalu maó. Tou boito, lapataó tinelo Allahu Taáala lolinelai olimongoli, timongoli helo dutolo dadaata; bo penu odito timongoli debo lohipate tióotutua.

³³ Tingga maito timongoli hilinalio wau hepilo hutulio loú diila mopiohe totalu lotaa dadaata. Tingga maito olo timongoli loduduá lodutolo woli mongolio tahe pilohutulio odito,

³⁴ wau timongoli loduduá loólaasa osuukali hilao lotaa tilutupalio. Wau tou ngoáamila u mililiki limongoli yilambatio, timongoli lololimo uito wolo hilaa sanangi sababu otaawa limongoli deú donggo woluo hitua–tuawua ulebe mopiohe, umoó tahangi ohiheo–hiheolo maó.

³⁵ Masababu uito, diila maó potombolu, sababu wonu timongoli debo palacaya, yi woluo wuupa udaá woleeto!

³⁶ Timongoli palalu mosabali, alihu timongoli mowali mohutu kahandaki lo Allahu Taáala wau loú odito mololimo wolo upilo dantia–Lio mai.

³⁷ Sababu todelomo Kitabi tulatulade, "Bo ngopeé mola poli wambaío, yi Tio tamaa meidungga boito, mahuáa meidungga; Tio diila tamo polohu–lohudu podungga–Lio mai.

³⁸ Wau umati–Ú taótutu mapalacaya wau tumumulo; bo wonu woluo towolota limongolio tatumouli, yi Waú diila tasanangi olio"

³⁹ Ito botie diila umati tatoutouli wau yilapalo. Boliño maó, ito yito umati tapalacaya to Allahu Taáala wau tapilo aahu.

1 1 ¹ O iimani boliilio maó yakini tióotutua to susuu–aliyaalo uhe halapuwolo, boliilio o tantuulio to susuu–aliyaalo udiila oontonga.

² Sababu o iimani, yi tau–tauwalo tojamani yilalu maó aahudu lo Allahu Taáala.

³ Sababu o iimani, yi ito mongalati deú aalamu botie pilowali wolo tahuda Allahu Taáala; oditolio, wolo u mowali oontonga, yilowali mai monto wolo udiila mowali oontonga.

⁴ Sababu o iimani, yi tei Habel lopodewo ode Allahu Taáala bake ulebe mopioheó wolo bake lei Kain. Sababu iimanilio boito, tei Habel tilolimo lo Allahu Taáala odelo taa u mopiohe, sababu malo ilaalo deú Allahu Taáala lololimo pilodewolio. Tei Habel mailate, bo sababu iimanilio boito, yi tio donggo bisabisala dilumutu botia.

⁵ Sababu o iimani, yi tei Heno diila yilate, bo tumbaó bilintaá mola wau dilelo ode Allahu Taáala. Diaaluo penu boli ngotaa maó taloó dungga olio, sababu

tio mabilintaá mola ode Allahu Taáala. Todelomo Kitabi tulatulade deú tou tei Heno bilintaá mola, tio lopo sanangi hilaa lo Allahu Taáala.

⁶Diila o iimani, diaaluo penu boli ngotaa maó tamowali mopo sanangi hilaa lo Allahu Taáala. Sababu tamonaó mai ode Allahu Taáala musu palacaya deú Allahu Taáala woluo, wau deú Allahu Taáala momalasi mai totaa u hemololohe o-Lio.

⁷Sababu o iimani, yi tei Noho piloótaa lo Allahu Taáala pasali lo susuu-aliyalo u mamotoduo mai lapatio maó, udiila mowali oontongalio. Tei Noho lodungohe to Allahu Taáala tilinggula tio lohutu kapali tuwau u lapatio maó loilaalo lopoáhu batangalio wolo ngaalaálio. Lou odito dunia hilukuumani, hiambola tei Noho lohihilao sababu iimanilio piloilaalo lo Allahu Taáala odelo taa mopiohe.

⁸Sababu o iimani, yi tei Abraham lodungohe Allahu Taáala tou Allahu Taáala lotianga olio wau lopoáhu olio lonaó ode lipu upilo danti lo Allahu Taáala olio. Lapataó tei Abraham lomonggato wolo diila otaawa maóde utoonu ponaówalio.

⁹Lou o iimani, tei Abraham lotibiluloá odelo tau deli tolipu upilo danti lo Allahu

Taáala olio boito. Tei Abraham lotibiluloá mota teto todelomo kema. Odito olo tei Isihaka wolei Yako, talo lolimo danti u tutuuwauwa lonto Allahu Taáala.

¹⁰ Sababu tei Abraham donggo hemohima kota uilanjana wau bongulo lo Allahu Taáala wolo wapidio motoheeto.

¹¹ Sababu o iimani, yi tei Abraham loótoduo wali lonto oli Sara, eleponu tei Abraham mapanggola daá, wau ti Sara lohihilao hunusa. Tei Abraham yakini deú Allahu Taáala mamó poópolu mai danti-Lio.

¹² Eleponu tei Abraham toú boito debo odelo taa mailate batangalio, bo tio debo loótoduo mai wali dadaata, udaata diilalo olekenia -- debo odelo daatalio lopoliama wau hungayo tobiihu pentadu.

¹³ Ngoáamila tau boito debo o iimani tunggula yilate. Timongolio diila lololimo susuu-aliyaalo upilo danti lo Allahu Taáala, bo helo milohe wau lohima lonto u molamingo. Wau woleeto timongolio mopo biloheó deú timongolio bo tau deli wambaño wau taa u hipo peehuma tutumulo todunia botie.

¹⁴Taa u moloíya odito mopoilaalo lou mopatato deú timongolio donggo hemo lolohe lipu u mamowali huta limongolio.

¹⁵Diila lipu u matilolaa maó limongolio boito uhe pikiilangio limongolio. Sababu wonu odito, yi maa ilohiango dadaata toli mongolio umuli mohualinga odelipu boito.

¹⁶Bo malo ilaalo, timongolio mooloolo lipu tuwau ulebe mopioheó, deúito-yito lipu u tosologa. Uitolo sababuulio Allahu Taáala diila moolito wonu timongolio mongunte o-Lio Allahu Taáala limongolio, sababu Allahu Taáala malo podapato kota tuwau olimongolio.

¹⁷Sababu o iimani olo, yi tei Abraham lopodewo olei Isihaka odelo bake tou tio tilesi lo Allahu Taáala. To olei Abrahamulo Allahu Taáala longohi danti-Lio, penu odito tei Abraham iloheela lohilao lohudu walaño tatuwa-tuwaulo boito.

¹⁸Allahu Taáala malo tahuda odelei Abraham, "Motimbulude tolei Isihaka botieelo yio mamootapu mai wali upilo danti-U mai olemu."

¹⁹Tei Abraham yakini deú Allahu Taáala mambo muli mopo tumulai olei Isihaka monto opopate -- oditolio, mowali

loíyaalo, tei Abraham maluli lololimo olei Isihaka lonto opopate.

²⁰ Sababu o iimani, yi tou tei Isihaka lodanti maó babaa-lakatiyalo odelei Yako wolei Esau duólo dulahe momooli.

²¹ Sababu o iimani, yi tou tei Yako diipo yilate, tio longohi balakatilio ode mongo walaée Yusu -- wolo lotidenela to lunggongo lo tunggudio wau lolubo Allahu Taáala.

²² Sababu o iimani, yi tei Yusu -- tou wimbideó mate -- lobisala pasali umati lo Isiraílu yilumualai lonto Masiri, wau lololaa maó tahuli pasali wolo u musi pohutuwole to milatelio.

²³ Sababu o iimani, yi mongo dulaá lei Musa loluuá olio tolohula mola hiheolio lapataó pilotutulio mai. Iloontonga maó limongolio deú tio walaó ngota tamopio, wau timongolio diila yiloohe loluwali palenta li onlongia.

²⁴ Sababu o iimani, yi tei Musa yinta-yinta maléidaá mola diila lohuto unteelo walaó lipuusili onlongia lo Masiri.

²⁵ Tio lebe motohilaa modutolo peé-peéenta wolo umati lo Allahu Taáala lou u ngopeé mola moólaasa osanangi lo tutumulo u odusa.

²⁶ Tei Musa molaasa deú lebe ohalaga daá u moótapu polohina domi ti Olongia Tamoo–poáhua upilo danti mai lo Allahu Taáala boito wolo moótapu ngoáamila halata lipu lo Masiri, sababu tei Musa hemo halapu wuupa todulahe momooli.

²⁷ Sababu o iimani, yi tei Musa lololaa maó Masiri loú diila lolaasa yiloohe to oyiyingo li olongia. Tei Musa lomaju lotidulunga ode patujulio debo odelo tio maloóonto Allahu Taáala tadiila oontonga boito.

²⁸ Sababu o iimani, yi tei Musa lohutu Paska wau lomalentaó alihu mopo mutataó loduhu totimiídu huhebu taulo Isiraílu alihu Malaíkati lomautu diila momate–mateelo maó taú kekeéi mohuhula daá limongolio.

²⁹ Sababu o iimani, yi tau–tauwalo Isiraílu lowali lobalango to Auhu Meela, debo odelo timongolio lononaó toitaato huta u mohengu, hiambola tau–tauwalo Masiri loáhumo tiloloolo lo auhe boito, tou timongolio lohimontala lobalanga olo.

³⁰ Sababu o iimani, tau–tauwalo Isiraílu helohutu didii–ngingowalo meeseli lo Yerikho loloohubu lapataó hilelili

limongolio ngotilonggadu pitu hui mola hiheolio.

³¹ Sababu o iimani olo, yi ti Rahabi, taabua suuntali boito, diila loduduá ilopatea yila-yilateelo maó peé-peéenta wolo tau-tauwalo tahi poluwalia Allahu Taáala; sababu tio malo lolimo wolo hilaa mopiohe tahi pohehulawa lonto Isiráilu.

³² Naa, watia mowali wambaío mobisala mai mololaalaita, bo wakutu lowatia diila moótuheo. Sababu watia diipo poli longunte olei Gideon, Barak, Simson, Yepta, Dauda, Semuel, wau mongo nabi.

³³ Sababu o iimani, yi timongolio malo poólaaheó totoonulalo bele biluloá saaha li onlongia. Timongolio lohutu wolo u otutu, tilinggula lololimo wolo upilo danti mai lo Allahu Taáala. Timongolio loheúto tutung-gilowalo singa,

³⁴ lomate tulu upolu-polutuó, ileleehia lonto bituó lowamilo. Timongolio molulupuhu, bo malowali lolotolo; timongolio molotolo boli buheli daá todelomo popatea tilinggula loólaaheó suludadu lobangusa hideelia.

³⁵ Sababu o iimani, yi mongobua luli loótapu maó tau-taulio tamailate. Woluo olo ta iloheela lohilao silikisaa tunggula

yilate, wau diila mololimo u lopatolo, sababu ohilaa muli potumulolo duólo tutumulo tuwau ulebe mopioheó.

³⁶ Woluo tahe hila–hilantiálio, biluboálio, ilawadu wolo lante wau pilopo tuotio ode delomo tutupa.

³⁷ Timongolio pilaílio lobotu tunggula yilate, woluo olo táiloyodu wolo halahadi, wau tapilate yila–yilateelo maó wolo wamilo. Timongolio helonaó ode utoonulalo maó wolo boó lonto walito himba meaalo walito batade; timongolio mosikini, ilalinayalio wau silikisaalio.

³⁸ Dunia botie diila tambati u tuúdio ode limongolio. Timongolio helonaó ode utoonulalo maó tohuta datahu wau luasi udelita wau to huhuu luduwaalo, wau helo tibiluloá todelomo gogoowaalo wau todelomo huhuu–wangowalo huta.

³⁹ Donggo boli udaálio paéeda uilotapu lotaa ngoáamila boito sababu iimani limongolio! Bo penu odito timongolio diila lololimo wolo upilo danti lo Allahu Taáala,

⁴⁰ sababu Allahu Taáala o lanjana ulebe mopioheó to olanto. Lanjana–Lio yito deú bo peé–peéenta wolanto, timongolio mamowali wimu–wimumuto tutu.

12¹ Naa, tomimbihu olanto lohihilao, to palitunto woluo dadaata daá sakusi! Sababu uito, duloolo ito molapi ngoáamila umoó buheeto olanto wau dusa utulusi dembi-dembinga to olanto. Wau duloolo ito wolo moóolohu maju moluhu polo taadenga u woluo totalunto.

² Mamusi bibilohunto duludulunga odeli Isa, sababu Tiolo talo pobongu mai iimaninto wau lolaalaó toú bohuliolo mai dilumutu pulitio. Ti Isa tatapu owowoluwoalio lodutolo to ayu salipu! Tio diila paduli deú mate to ayu salipu boito yito tala tuwau suáli umoóolito. Tio bo hemoéela mola oweengahe umaa olasaa-Lio lapatio maó. Masaatia Tio hulohuloá to ambahu olowala totambati huhuloálo Allahu Taáala wau hemo malenta peé-peéenta wo-Lio.

³ Nte pikiilangia maó woloolo mola sikisaa-Lio li Isa lotaalua wolo tau-tauwalo tahi oduusawa tahe loluwali o-Lio loú polu-polutuó! Sababu uito diila maó pokikió hilao wau motombolu.

⁴ Sababu todelomo poti pateyamu moluwali dusa, diipo peéenta maó timongoli lohipate dilumutu musi mopotolohe duhu.

⁵ Wau diila maó lipata naseehati lo Allahu Taáala botie, uilohi–Lio mai olemu odelo mongo wala–lo: "Walaú–Ú, poótuota maó tióotutua pongaajali lo Eeya, wau diila pokikiió hilao wonu Tio momuluka mai olemu.

⁶ Sababu Eeya momate timíidu taa upilonu–Lio, wau Tio momuboá timíidu taa u ilaku–Lio odelo wala–lo."

⁷ Mamusi timongoli mololimo buboá monto Allahu Taáala odelo tuwaulio lo pongaajali monto oliyamo ngota. Sababu tingga woluo walaó ngota diila hukuumanio liyamolio wonu tio ototala?

⁸ Wonu timongoli diila moduduó hukuumaniyolo debo odelo ngoáamila walaío uwewo botie, boliilio maó timongoli diila walaó saaha, bo walaó udiila saaha.

⁹ Ito otiyamo todunia. Tio mongaajali olanto, wau ito mohulumati olio. Naa, tidiyolo maó toli Paapa lo rohunto tatosologa, tantu ito musi lebe maó poli taáluku to o–Lio alihu ito tumumulo.

¹⁰ Mongo dulaáanto u todunia mongaajali olanto bo todelomo wakutu u eéenggade, moduduá wolo ulaasaa limongolio mopiohu. Bo Allahu Taáala mongaajali

olanto duólo opopiohunto lohihilao, alihu ito mowali mantali peé-peéenta wo-Lio.

¹¹ Memangi tou ito ilajari-Lio, hukuumani boito diila moósanangi hilaanto bo tumbaó moósuukali wambaío. Bo lapatio maó woleeto, to olanto tamaa ilajari-Lio, hukuumani boito moósababu tutumulonto moduduá u otohilaa lo Allahu Taáala, wau moótoduo mai pongolaasa salaamati to olanto.

¹² Sababu uito, poólotola mola uluúmu u molulupuhu wau huúmu u hulu-huluhelio boito!

¹³ Ponaóolo laito todalalo upaya-payadu, alihu oáatumu u penggo boito diila moheede, bo tumbaó mowali moluli.

¹⁴ Potolo panilo u tumumulo loú mopiohe wau dame wolo taa ngoáamila. Potolo panilo olo u tumumulo mantali, tolomodu ode Eeya. Sababu diaaluo penu boli ngotaa maó mowali moóonto Eeya wonu tio diila tumumulo debo odelo uito.

¹⁵ Poódahai diila bolo woluo penu boli ngotaa maó talumualo monto opopiohu hilaa lo Allahu Taáala, alihu diaaluo tamowali debo odelo pilomulo u opedi tohuungi mongoli tilinggula mopotoodei

usuukali wau mopoluusa taa dadaata wolo pedilio.

¹⁶ Poódahai maó alihu diila bolo woluo tatumumulo huloto meaalo diila motolongaku susuu–aliyaalo urohu, debo odelo u pilohutu lei Esau. Tio lopotali hakuulio odelo walaó tamohuhula daá, bo duólo uáalo ngomanggo.

¹⁷ Otaawa limongoli deú lapatio maó tei Esau ohilaa moótapu balakati boito monto oliyamolio, bo tio diila tilolimolio. Sababu eleponu wolo hiyongo tio mololohe dalalo u mopoópiohe totalalio, bo hiyango woleeto madiduú.

¹⁸ Mongo wutato diila mai motaalua loú hitua–tuawua debo odelo utilalua lobangusa Isiraílu omoóomolu. Timongolio lotaalua wolo hitua–tuawua u mowali tontalolo, deúito–yito Huíde Sinai wolo tululio uhinta–hintalabu; timongolio lotaalua wolo modiólomo, diila boti motilango wau dutalo;

¹⁹ timongolio lotaalua wolo tingohu torompeti, wau tingohu suala ulaba–labaalo. Touú tau–tauwalo Isiraílu loódungohe suala boito, timongolio lohile loú tióotutua alihu suala boito diilalo mobisala mai ode limongolio.

²⁰ Sababu timongolio diila moótahangi modungohe palenta upilo tunggulai losuala boito. Sababu suala boito lotahuda, "Ngoáamila tamo dedeta huíde botie, diila paduli wolo uito binatangi meaalo penu boli tatoonu olo, musi páiyola lobotu tunggula mate."

²¹ Wolo u iloontonga lotau-tauwalo Isiraílu boito odito polu-polutuó dilumutu tei Musa lolóiya, "Watia moohe wau hulu-huluhelio!"

²² Bolíio maó, timongoli malonaó mai ode Huíde Sion wau kota lo Allahu Taáala u tumutumulo, deúito-yito Yerusalemu u tosologa wolo hilihu-lihua malaíkati-Lio.

²³ Timongoli moduduá tuwaulio lo dudunggaya ulame daá -- dudunggaya lomongo walaó Allahu Taáala tamohuhula daá, u tataa-nggulio leidupatali todelomo sologa. Timongoli monaó mai motaalua lo Allahu Taáala, Hakimu lo ngoilanggubu umati lomanusia. Timongoli motaalua wolo roroo-huwaalo lotau-tauwalo tamopiohu, tamaa pilowali wimu-wimumuto tutu.

²⁴ Timongoli monaó mai motaalua li Isa, Potimbuludelo ode daantia u bohu boito; timongoli motaalua lo putato duhu u

pongaku to susuu–aliyaalo ulebe mopiohe daá loú pilongakua loduhu lei Habel.

²⁵ Sababu uito, poódaha–dahaalo maó diila bolo timongoli diila mohuto modungohe o–Lio tahe lotahuda mai boito. Timongolio tadiila mohuto modungohe o–Lio tamei dungga mai ode dunia wau mopo tunggulo habari monto Allahu Taáala, diila mowali mopolahi lobatanga. Tidiyolo maó ito botie tamo dungohe o–Lio u motahuda mai monto sologa! Wonu ito diila mohuto modungohe o–Lio, diila pongalo akali ito mowali moáahu!

²⁶ Touú boito sualaa–Lio mopo geegeli dunia. Bo botia Tio lodanti mai. "Peéentapo Waú mamopo geegeli diila bo wambaó dunia bo hulungo olo."

²⁷ Tahuda "peéentapo" mopoílaalo mai deú ngoilanggubu dunia umaa pilowali mapolo taúlolo wau yinggilolo, alihu u meitolaa bo udiila mowali molotaúlo.

²⁸ Sababu uito, mamusi ito molapali mola oduólo ode Allahu Taáala, sababu ito mololimo monto o–Lio tuwaulio lo bele biluloá saaha li onlongia udiila mowali molotaúlo. Mamusi ito molapali mola oduólo wau motabia to Allahu Taáala wolo

hulumati wau moohe, moduduá pohuli u otohila–Lio lohihilao.

²⁹ Sababu Allahu Taáalanto debo odelo tulu umoópobu.

13 ¹ Mamusi timongoli debo motoliánga ngota timongota odelo tau–tauwalo Nasara tamohutato.

² Diila maó popanggu mololimo tau tobelemu tau–tauwalo tadiipo otaawa limongoli. Sababu wolo mohutu u odito, peéenta woluo tau, loú diila ilolaa–sawalio, malo lolimo malaíkati tobelelio.

³ Poótoloma maó tau–tauwala u todelomo tutupa, debo odelo timongoli olo woluo todelomo tutupa peé–peéenta woli mongolio. Wau tau–tauwalo tahe pilohutu totoonulalo otohilaa lohilao, mamusi timongoli moéela olimongolio debo odelo timongoli olo hepilo hutulio odito.

⁴ Ngoáamila tau musi mopo biloheó sikapu hulumati topolo nikawa, uito sababuulio mamusi tamo tolodile tatapu wau molotolo hilao ngota timongota. Taa u huloto wau taa u mojina maa aadilio lo Allahu Taáala.

⁵ Diila maó tutumulumu okawasa loú motoliángo todoi, bo mamusi timongoli olulia lohilao loú wolo uwoluo toli mongoli.

Sababu Allahu Taáala malo tahuda, "Wau diila tamo poluli meaalo mamololaa maó olemu."

⁶Sababu uito ito buheli moloíya, "Eeya yito Tamoo–tulungia olaú, wau diila moohe. Wolo u mowali pohutuo lomanusia olaú?"

⁷Diila maó lipata tomongo taúwamu talopo tunggulai tahuli lo Allahu Taáala olemu. Poótuota maó woloolo mola timongolio tumutumulo wau woloolo mola timongolio yilate, wau duduí maó iimani limongolio.

⁸Ti Isa Almasi debo tutuuwauwa, mopio muloolo, masaatia, wau tunggula ohiheo–hiheolo maó.

⁹Diila maó polulia totoonulalo pongaajali u hidelia wau mopolapalo olimongoli. Hilaanto musi poólotolola lo opopiohu hilaa lo Allahu Taáala, uitolo u mopiohe; diila maó bo sababu wuwuu–uduwaalo lo uáalo. Tau–tauwala tamuloololio mai helo dungohe wuwuu–uduwaalo boito diila loótapu hunalio.

¹⁰Ito o mesba tuwau upodewowalo bake ode Allahu Taáala. Wau mongo iimamu tahe mohinta todelomo Kema lo Eeya, diila

ohaku molamelo bake uwoluo toitaato mesba boito.

¹¹ Duhu lo binatangí u podewolo odelo bake u pongambungualo dusa, dilelo li iimamu daá ode Huwali Leidaá Laba-labaalo mantali, bo pate lo binatangí boito lohíhilao tilumbilalio to bulemengo kema.

¹² Uitolo sababuulio ti Isa olo yilate to bulemengo huhebu lo kota u lopoó belesi umati-Lio lonto dusa wolo duhu-Lio lohíhilao.

¹³ Sababu uito, duloolo ito monaó ode o-Lio to bulemengo kema wau peé-peéenta hinaalio wo-Lio.

¹⁴ Sababu todunia botie diaaluo tambati poti biluloáalo u ohiheo-hiheolo maó olanto; ito mololohe tambati poti biluloáalo u mamei dungga mai.

¹⁵ Sababu uito, loú motimbulude li Isa, mamusi ito laito momuji boli puji to Allahu Taáala; uito debo odelo bake lo sukurunto to o-Lio, u podewonto moli lapali biihunto u mopolaió tanggu-Lio.

¹⁶ Diila maó lipata mohutu u mopiohe wau motutuu-lungia sababu uti-utieelo babaa-keyaalo umoó sanangi hilaa lo Allahu Taáala.

¹⁷ Duduĩ maó palenta lomongo taúwamu, wau potaálukulo toli mongolio. Sababu timongolio laito hemo poótuoto nyawamu, wau timongolio musu tihutihula duólo Allahu Taáala. Wonu timongoli modungohe olimongolio, timongolio moó kalaja wolo hilaa sanangi; wonu diila, yi timongolio mamokalaja wolo hilaa suukali, wau uito diila moó pa@eeda olimongoli.

¹⁸ Poduáalo mola tulusi ode lamiaatia. Amiaatia yakini hilaa u maloótapu tinelo Eeya lamiaatia belesi, sababu todelomo totoonulalo suáli amiaatia laito ohilaa mohutu wolo u otutu.

¹⁹ Tolomodulio watia momolohone lou tióotutua, alihu timongoli moduá mola olaatia alihu Allahu Taáala huáa modelo olaatia muli mohualingai ode limongoli.

²⁰ Allahu Taáala malo potumulai li Isa Eeyanto lonto opopate. Sababu opopate-Lio boito Tio masaatia lowali Diti Daá de olanto, deúito-yito hihii-mbaa-Lio. Opopate-Lio boito olo loposaaha mai daantia ohiheo-hiheolo maó u pilohutu lo Allahu Taáala wolanto.

²¹ Pohileaala duá Allahu Taáala pobutua mai salaamati boito mopo wimumutai

olimongoli wolo totoonulalo umopiohe upalaluo limongoli u mohutu kahandaki-Lio. Pohileaala duá motimbulude li Isa Almasi, Allahu Taáala mokalaja todelomo olanto, wolo u otohila-Lio. Mamusi ti Almasi pujiolo ohiheo-hiheolo maó! Amin.

²² Watia mohalapu alihu timongoli mopoó tuotaó nanaa-sehatiyalo laatia botie loú sabali, sababu tuladu lowatia botie diila boti hayahayaó.

²³ Mamusi otaawa maó limongoli deú wutatonto tei Timotius mailopatio lonto tutupa. Wonu tio malonaó mai odia ode tambati lowatia botie, madeloo mola lowatia tio toú watia de mobiilohe woli mongoli.

²⁴ Potunggula maó salamu lamiaatia ode ngoáamila taúwa limongoli wau ode ngoáamila umati lo Allahu Taáala. Tolimowalo olo salamu monto mongo wutato to Italia.

²⁵ Pohileaala duá Eeya mobalakati mai mongo wutato ngoáamilalo.

Yakobus

1 ¹ Mongo wutato umati lo Allahu Taáala ngoáamilalo taloó–loóopo to ngoilanggubu dunia! Salamu lonto olaatia, Yakobus, wato lo Allahu Taáala wau wato lo Eeya Isa Almasi.

² Mongo wutato! Wonu timongoli moótodo yimontala u hidala–dalaala, mamusi timongoli molaasa opaéeda.

³ Sababu otaawa limongoli, deú wonu timongoli debo palacaya to Eeya tou moótodo yimontala, akibatilio yito: timongoli mowali taaba.

⁴ Poódahai maó alihu otaaba lohilaamu boito tulusi molaió dilumutu timongoli tióotutua mowali wimu–wimumuto tutu wau diila okulangia penu boli todelomo suáli loolo.

⁵ Wonu woluo ngotaalio to wolotamu diila botie molinepo, mamusi tio mohile monto Allahu Taáala, yi Allahu Taáala mamongohi mai tinepo olio; sababu ode timíidu tau, Allahu Taáala mongohi mai wolo muula lohilao wau wolo pongolaasa hilaa hilao.

⁶ Bo taa umohile musu palacaya; tio diila mowali molawalo. Sababu tamolawalo yito debo odelo buóolo todeheto u hiliipa lodupoto odito mota odia mai.

⁷ Taa udebo odelo uito diila moduóto pikiilangilio; tio diila mowali mohama putuusani wolo–wolo todelomo totoonulalo u hitua–tuawua u pohutuwoilio. Sababu uito, tio diila maó olo pahalapu u moótapu mai wolo–wolo monto Eeya.

⁸ (1:7)

⁹ Taulo Nasara tamosikini mamusi molaasa meengahe wonu Allahu Taáala mopolaiá olio.

¹⁰ Wau taulo Nasara takaya mamusi molaasa meengahe olo, wonu Allahu Taáala mopo dupapa olio. Sababu taa kaya mamooli debo odelo bunga lohuóyoto.

¹¹ Toú mato lodulahu mobutu mai wolo patulio u mailaba, yi huóyoto boito mamowali mololante tilinggula moduduulahu mola bungalio wau moolilo mola ogagaalio. Odito olo wolo taa kaya; tio mamóantulu toú tio donggo hemoponaó lokela–kelaalio.

¹² Potisanangilo tutu taa sabali toú tio odungga loimontala. Sababu lapataó tio moó tahangi toimontala boito, tio

mamolimo wuupalio, deúito-yito tutumulo u mapilo danti mai lo Allahu Taáala totau-tauwalo tamo toliángo Allahu Taáala.

¹³ Wonu tahingota-ngotawa oheinga mohutu dusa wolo ijimontala loimontala udebo odelo uito, diila maó poloíya tio, "Yimontala botie dudunggalio mai monto Allahu Taáala," sababu Allahu Taáala diila mowali oheinga mohutu dusa wolo u moleeto, wau diila olo moheingo mohutu dusa penu boli ngotaalio.

¹⁴ Bo tau oheingalio mohutu dusa wonu tio bantanga wau opiyowa loú otohilaalio lohihilao.

¹⁵ Lapataó, wonu hilaa u moleeto boito duduáalo, yi mamotoduo mai dusa; wau wonu dusa maloontapo, yi akibatilio yito opopate.

¹⁶ Diila bolo owimbulowa timongoli, Mongo wutatuú taa otoliángo!

¹⁷ Timíidu wowohi u mopiohe wau wuupa u wimu-wimumuto tutu dudunggalio mai monto sologa, tiluhutai lo Allahu Taáala, Talopowali totoonulalo u mobaango tohulungo. Tiolo Allahu Taáala tadiila mobolió, wau diila olo moósababu penu boli odiólomo wolo.

¹⁸Toú hila–Lio lohihilao Tio lopowali mai olanto mongo wala–lo lotimbulude to tahudaa–Lio u otutu. Tio lohutu mai uito alihu ito moótapu tambati ulaba–labaalo mopiohu towolota lo ngoáamila mahaluku u pilowali–Lio.

¹⁹Poótuota maó utie loú tióotutua, Mongo wutato taa otoliángo! Timiídu tau musi molinggahu u modungohu, bo moboyu u mobisala wau moboyu u moingo.

²⁰Taa u moingo diila mowali mohutu umopiohe, umopo sanangi hila lo Allahu Taáala.

²¹Sababu uito, tapilalo timiídu aadati u moleeto wau kootolo. Tolimowalo wolo dupa–dupapa lohilao tahuda uilodungo lo Allahu Taáala todelomo hilaamu, sababu tahuda boito o olootolo u mopoáahu olimongoli.

²²Mamusi timongoli mohutu maó wolo upilo tahuda mai lo Allahu Taáala, diila bo modungohe wambaño, tilinggula loú odito timongoli mohimbulo batanga lohihilao.

²³Taa u modungohe tahuda lo Allahu Taáala, bo diila mopohutu uito debo odelo taa donggo hemomilohe bayalio u otutuulio maó totalu loinggilua.

²⁴ Lapataó piloó tuotio tíootutua, tio olo malonaó wau lato lolipataó woloolo mola laku lobayalio boito.

²⁵ Butoó lo Allahu Taáala wimu–wimumuto tutu wau o olootolo u mopo lopato manusia. Wau taa u motulete wau mopoó tuoto tíootutua wau moponaó bubuu–toówaalo boito, wau diila bo modungohe wambaó lapataó momalongo, yi tau boito mabalakatia lo Allahu Taáala to timíidu suáli upilo hutulio.

²⁶ Wonu woluo tahingota–ngotawa u molaasa batangalio taungota ohilaa moduduó palenta lo agama, bo tio diila modaha dilalio, yi tio mongaakali batangalio lohihilao; tabiaalio diila ohunalio.

²⁷ Ododungohu to agama ubelesi wau u tutuuliotutu moduduá bibilohu lo Allahu Taáala ti Paapa yito; motulungi taúkekeei tadidu otiilo otiyamo wau mongo janda tahi dutola, wau modaha batanga lohihilao alihu diila maó antuluo lodunia botie.

2¹ Mongo wutatuú! Odelo taa u palacaya to Eeya Isa Almasi, Eeya Taa Laba–labaalo molamahu, diila maó popo hihiihede limongoli tau bo patopatoá to susuu–aliyaalo ulahiri.

² Sababu wonu woluo taa kaya ngota tamomake huálimo hulawa wau boó mopiohe monaó mai ode dudunggayamu, lapataó monaó mai olo tamosikini ngota tapake-pake boó u hiánta-antanga,

³ yi timongoli lebe mohulumati totaa pakepake boó u mopiohe boito. Timongoli mamoloíya olio, "Toduwolo Tuani motihuloá tokadela ugaaga daá botie." Bo totaa u mosikini timongoli moloíya maó, "Tihuloolo teto mola," meaalo "Huloóolo to wumbato teea."

⁴ Louú mohutu u odito, timongoli mopo hiihede towolota timongotamu wau motiliki tau bo patopatoá to pikiilangi u moleeto.

⁵ Poótoloma maó! Mongo wutato taa otoliángo! Taa mosikini todunia botie, tilulaoto Allahu Taáala u mowali taa kaya todelomo iimani. Tau-tauwala boito mamowali ngaalaá umati lo Allahu Taáala debo odelo u pilodanti mai lo Allahu Taáala totaa motoliánga o-Lio.

⁶ Bo timongoli tumbaó hemohina taa mosikini, lebe-lebe pomaó tau-tauwalo tahi kayawa tahelo deehe olimongoli wau lodedeá olimongoli ode bubutoó!

⁷ Timongoliolo tahelo hina tanggulo u hulu-hulumati utilolimo limongoli lonto Allahu Taáala!

⁸ Timongoli mohutu u otutu, wonu timongoli moponaó butoó lo yilaidia uwoluo todelomo ayati lo Kitabi botie, "Toliánga maó timongotamu debo odelo timongoli motoliángo batangamu lohihilao."

⁹ Bo wonu timongoli mopo hihihede tau patopatoá to susuu-aliyaalo ulahiri, timongoli lohutu dusa, wau butoó lo Allahu Taáala mopoilaalo mai deú timongoli yito tamoo-lambangawa butoó.

¹⁰ Taa u molambanga tala tuwau bubuu-toówaalo Allahu Taáala, boliilio maó malo lambanga ngoáamilalo.

¹¹ Sababu tamoloíya, "Diila maó pojina," tiolo olo talo loíya, "diila maó pomate-mateelo maó." Oditolio, wonu timongoli diila lojina, bo lomate-mateelo maó, yi timongoli yito tamoo-lambangawa butoó olo.

¹² Pobisalalo wau pohutuwalo odelo taa umaa aadiliyo-Lio moduduá butoó Allahu Taáala umopo lopato manusia.

¹³ Sababu Allahu Taáala diila tamopo bilohei odehu hilao ode taa udiila motota

modehu hilao. Bo modehu hilao lebe molotolo wolo hukuumani.

¹⁴ Mongo wutato! Wolo hunalio tau moloíya, "Watia taa u palacaya", wonu tio diila mopo biloheó wolo huhutuulio? Tingga mowali iimani debo odelo uito mopoáahu olio?

¹⁵ Humayaalio ngotaalio lowutato meaalo wutati momalalu boó wau diila o uáalo tutuuheta ungohui-ngohui,

¹⁶ wolo hunalio timongoli moloíya maó olio, "Salaamati momake boó u mopatu wau salaamati molamelo!" -- wonu timongoli diila mongohi maó olio wolo u palaluwolio ode tutumulo?

¹⁷ Oditolo olo wolo iimani, wonu diila poílaalolo wolo huhutu, yi iimani boito diila ohunalio.

¹⁸ Tanu woluo tamoloíya, "Woluo taa u motiwunela to iimanilio wau woluo olo taa u motiwunela to huhutuulio." Watia mamolametaó, "Pobilohe mai olaatia woloolo mola tau mowali o iimani loú diila ohuhutu wau watia mamopo biloheó wolo huhutu deú watia o iimani."

¹⁹ Timongoli palacaya deú Allahu Taáala bo tuwau, diila odito? Naa, roroo-huwaalo

u moleeto olo palacaya wau timongolio hulu–huluhelio loú moohe!

²⁰ Timongoli mohulode daá! Wolo palalu pobukutiyolo olemu deú diila ohunalio o iimani loú diila wolo huhutu?

²¹ Bilohilo maó tei Abraham tinenemoyanto. Tio tilolimo–Lio loú mopiohe lo Allahu Taáala sababu huhutuulio, deúito–yito toú tio lopodewo olei Isihaka, walaío, ode Allahu Taáala toitaato mesba.

²² Lopatatolo maó tewe deú iimani musi pobilohulo wolo huhutu alihu mowali wimu–wimumuto tutu.

²³ Uito lotuuúde wolo ayati lo Kitabi botie, "Tei Abraham palacaya to Allahu Taáala, wau sababu iimanilio boito Allahu Taáala lololimo olio odelo taa lohutu kahandaki lo Allahu Taáala." Uito sababuulio tei Abraham ilunte, "Sahabati lo Allahu Taáala."

²⁴ Malo patato botia, deú tau tolimoo–Lio loú mopiohe lo Allahu Taáala kalana wolo u pilohutu lotau boito, wau diila bo sababu iimanilio wambaó.

²⁵ Bilohi maó olo ti Rahab, taabua suuntali boito. Tio tilolimo loú mopiohe lo Allahu Taáala sababu huhutuulio, deúito–yito toú

tio lololimo todelomo belelio ngoolo lota tamoo–hehulawa bangusa lo Isiraílu wau lotulungi olimongolio leí teteó loli dalalo wewo.

²⁶ Naa, debo odelo batanga diila o rohu yito batanga uilate, odito olo iimani diila ohuhutu yito iimani uilate.

3¹ Mongo wutato! Diila maó podaatawa to wolotamu tamohuto mowali guru. Otaawa limongoli deú ito tamowali guru mabutoólio lebe moóohuú wolo taa wewo.

² Ito ngoáamila laito hemohutu totala. Bo taa diila peénta maó helohutu totala wolo loloo–iyaalio, tio taa u wimu–wimumuto tutu, tamoó kawasa ngoilanggubu batangalio.

³ Wonu ito mopohuli lo tongguúmo to tunggilo wadala alihu wadala boito moduduá u otohilaanto, yi ito mowali mongatulu ngoáamila wawaó wadala boito.

⁴ Hamaawa maó olo kaapali odelo obaaya. Eleponu kaapali yito tuwaulio u odito udaá wau dilelo lodupoto moóohuú, bo kaapali boito podulungo lokamudi ukikiió daá, moduduá u otohilaa lo julumudi.

⁵ Odito olo wolo dilanto; eleponu dilanto boito kikiió, bo dila boito mowali mopo

sombongi batanga pasali lo susuu-aliyaalo u duduulaá. Nte pikiilangia mola malo odito udaálio oáyua u mowali tumbila lotulu ukikiiá daá!

⁶ Dila tutuuwauwa wolo tulu. To batanganto, dila debo odelo bungo louú moleeto u mopoloópo u moleeto ode ngoilanggubu lo batanganto. Wolo tulu u asaliilio mai monto nalaka, tio moópobu ngoilanggubu tutumulonto.

⁷ Totoonulalo binatanggi mongantau u hidala-dalaala, bulungi, binatanggi hiálapa wau tola mowali poluwamolo, wau olo mapilo luwamo lomanusia.

⁸ Bo dila lomanusia diila mowali poluwamolo penu boli lo tatoonu. Dila boito moleeto wau diila mowali kawasaalo; polupolu lopeedi umoópate.

⁹ Ito mopohuna maó dila u molapali oduólo ode Eeya wau ti Paapanto, bo olo u molaánati ngota timongotanto tamaa pilowali-Lio mai loduduá gambali lo Allahu Taáala.

¹⁰ Monto tunggilo u tutuuwauwa lumualai tataa-heyaalo oduólo wau olo tataa-heyaalo laánati. Patutilio diila odito!

¹¹ Tingga woluo butu lotaluhu umopo pentelai taluhe udiila olamita wau taluhe u mopaáato monto ali u tutuuwauwa?

¹² Bungo lo ara, Mongo wutatuú, diila mowali momungo mai hungo lojaituni, wau bungo lo angguru diila mowali momungo mai hungo lo ara. Butu lotaluhe u mopanggelo diila mowali olo mopolualai taluhe diila olamita.

¹³ Wonu to wolotamu woluo taa molinepo wau obudi, mamusi tio mopo biloheó wolo tutumulo mopiohe wau loú mohutu susuu-aliyaalo umopiohe, wau tunutunuhu lohilao dupadupapa wau tinepo.

¹⁴ Bo wonu timongoli mohiihia, mopalato hilao, wau mopolohuna daá batanga lohihilao, diila maó pomanggawa tinepo boito, sababu woleeto timongoli mopo boboolió habari u otutu monto Allahu Taáala.

¹⁵ Tinepo debo odelo uito asaliilio mai diila lonto sologa. Bo asaliilio mai lonto dunia, lonto napusu lomanusia, wau lonto lati!

¹⁶ Toútoonu ohilao mohiihia wau píili mopolohuna daá batanga lohihilao, teto

olo woluo tolonggalo wau totoonulalo huhutu u moleeto.

¹⁷ Bo taa o tinepo u asalilio mai monto yitaato, tio tabohu–bohulio daá belesi, lapataó ohilaa modaamea, mopiohe hale, wau tamoo–dungohea. Odehu hilaalio lealeaatu wau mongohi tilapulo toú totoonulalo huhutu u mopiohe. Tio diila motiwambaó wau diila munapiki.

¹⁸ Memangi opopiohe yito hungo lou dame upilo muáyadu lotaa ohilaa dame!

4 ¹ Monto utoonu asaliilio mai lou totoonulalo umoó loohulua wau moó buutola to wolotamu? Diila maa uito u asaliilio mai lou totoonulalo otohilaamu u wambaó tulusi hemopaatea todelomo batangamu u moótapu osanangi todunia!

² Timongoli mohuto, bo diila moótapu, yi timongoli ohilaa momate–mateelo maó! Timongoli osumangati, bo diila moótoduo wolo u helolohu limongoli, yi timongoli mobuutola wau moloohulua. Timongoli diila moótapu wolo–wolo, sababu timongoli diila mohile ode Allahu Taáala.

³ Wau wonu boli timongoli malohile maó, timongoli debo diila moótapu mai, sababu patuju lo hihilemu tilala; wolo upohile

limongoli yito duólo osanangi batanga lohihilao!

⁴ Timongoli yito taa u diila tatapu wau molotolo hilao! Wolo otaawa limongoli deú wonu timongoli mowaita wolo dunia, yi timongoli mowali musu lo Allahu Taáala? Oditolio titaalo tita motohilaa mowali sahabati lodunia botie, tio mowali musu lo Allahu Taáala.

⁵ Diila maó polantobu deú Kitabi lou diila o alaasani moloíya, "To delomo batangaanto Allahu Taáala lopo tambati mai rohu umoóohuú otohilaalio."

⁶ Eleponu odito, odehu hilaa lo Allahu Taáala uilohi-Lio mai olanto lebe molotolo lou ilohilaa lo rohunto boito. Uitolo sababuulio todelomo Kitabi tulatulade olo, "Allahu Taáala motehengi taa sombongi, bo boliño maó Tio momonu taa udupa-dupapa lohilao."

⁷ Sababu uito, potaálukulo to Allahu Taáala wau tuwalia maó Ibilisi, yi Ibilisi mamolahi monto olimongoli.

⁸ Tahudeelo Allahu Taáala, wau Allahu Taáala olo mamó tahudei olimongoli. Pobelesia maó uluúmu, timongoli taa odusa! Powolanga mola hilaamu, timongoli u tango-tango lohilao.

⁹ Mamusi timongoli tióotutua moleée wau humoyongo boli mohilimuta; mamusi ñimu mowali hiyongo wau owengahumu mowali osuukali!

¹⁰ Mamusi timongoli mopodupapa batanga totalu lo Eeya, yi Eeya mamo polaiá olimongoli.

¹¹ Mongo wutato, diila maó poheheenteá meaalo tinggai mopotala. Tamohenteá wau mopotala wutatio timongota Nasara, tio mohenteá wau mopotala butoó Allahu Taáala. Wau wonu timongoli mopotala butoó Allahu Taáala, uito boliilio maó diila moduduá bubuu-toówaalo boito, bo mowali hakimulio.

¹² Lebe-lebe pomaó bo ngota taóhaku mongohi mai butoó tomanusia wau momutoó manusia. Uitolo Allahu Taáala taókawasa mopoáahu wau mopobinasa. Oditolio, tatoonu timongoli, tilinggula timongoli mohuto mopotala timongota lomanusia?

¹³ Mongo wutato tahi poloíyawa, "Dulahe botie meaalo loombu amiaatia momonggato ode kota anu wau motibiluloá mola teto ngotaunu mola hiheolio u modahangi wau mopeehu doi," -- dungohi maó naseehati lowatia botie.

¹⁴Wolo u mamotoduo mai wolo tutumuli mongoli loombu, penu boli timongoli lohihilao olo diila motota! Timongoli bo debo odelo poloó u bo ngopeé mola oontonga, lapataó mooli.

¹⁵Patutilio timongoli moloíya odie, "Wonu Eeya potala motuhatawa, amiaatia matumumulo wau mohutu utie meaalo uito."

¹⁶Bo botia timongoli sombongi wau molatabu. Ngoáamila latabu debo odelo uito tilala.

¹⁷Sababu uito, taa u motota wolo umopiohe umusi pohutuolio bo diila pilohutulio, yi tau boito odusa.

5¹ Mongo wutato, tau-tauwalo tahi kayawa! Dungohi maó naseehati lowatia. Mamusi timongoli humoyongo wau mohilimuta sababu timongoli mamodutolo sikisa.

² Okokayamu malo hutodu. Pakeyangimu maíliila lowale.

³ Hulawa wau talaámu matilaúbe lotaato; taatio mamowali sakusi moluwali olimongoli wau maa aloolio mopulito batangamu debo odelo tulu. Timongoli malomuntu halata tojamani mapulitio.

⁴ Timongoli diila hemo mayali wuupa lotau-tauwalo tahemo kalaja to halabolumu. Botia dungohilo poloílaalo suusa limongolio! Tau-tauwalo tahipo himoá tilapula lo halabolumu hiwatiá meí tulungi wau wuwaatíi mongolio maílo dungohe lo Allahu Taáala, Eeya Taa Laba-labaalo kawasa.

⁵ Timongoli matilumumulo lebe lou woluo wau maloólaasa osanangi todunia botie. Timongoli debo odelo donggo hemo poólingohu batanga duólo dulahe pongolotalo.

⁶ Timongoli hemo huumani wau momate-mateelo maó tau-tauawalo tadiila ototala, wau timongolio diila moluwali olimongoli.

⁷ Sababu uito, posabalilo mola Mongo wutatuú, dilumutu Eeya meidungga mai. Bilohilo woloolo mola sabaliilio tamoomengia ngota mohima dilumutu hutalio mongohi tilapulo u ohalaga olio. Wolo sabali tio mohima didi losembo polodehua wau didi sembo lobunga.

⁸ Mamusi timongoli olo mosabali wau ohilaa daá, sababu dulahe podudungga mai lo Eeya malembidu.

⁹ Diila maó potihungoto wau tinggai mopotala, alihu timongoli diila hukuumanio lo Allahu Taáala. Eelai maó! Hakimu malembidu, dapadapato u meidungga mai.

¹⁰ Mongo wutato, eelai mola mongo nabi tahelo bisala totanggulo Eeya. Timongolio sabali wau taaba helo dutolo. Oditolio, hamaalo maó timongolio odelo obaaya.

¹¹ Timongolio ilunte sanangi tutu sababu timongolio taaba. Timongoli maloó dungehe pasali osabali lei Ayuba, wau otaawa limongoli woloolo mola Eeya tou pulitio lobalakati olio. Sababu lodehu daá hilaa lo Eeya wau mopiohe hale.

¹² Ulebe polohuna daá, deúito-yito: Diila maó potadia, mopio domi hulungo, meaalo domi dunia, meaalo penu boli domi wolo wambaio. Loíyaalo maó "Joo" wonu patujumu joo, wau "Diila" wonu patujumu diila; alihu timongoli diila maó podehuwalo hukuumani lo Allahu Taáala.

¹³ Wonu to wolotamu woluo tadonggo suusa, mamusi tio moduá. Wonu woluo tameengahe, mamusi tio mopolahu mola momuji Allahu Taáala.

¹⁴ Wonu woluo tamo ngongoto, mamusi tio motianga mongo tauwa lojamaá. Wau

mamusi mongo taúwa boito moduá mola totaa mongongoto boito wau moleaapu wolo winulo to tanggulo Eeya.

¹⁵ Wonu duá limongolio potunggulo wolo yakini, Eeya mamó poóluli mai tamo ngongoto boito, wau mongambungu duduú-sawaalo u mapilo hutulio.

¹⁶ Sababu uito, mamusi timongoli mongaa-ngaakua totala wau moduu-duuáwa mola, alihu timongoli poóluli-Lio mai. Duá lotaa umoduduá u otohila lo Allahu Taáala okawasa daá.

¹⁷ Tei Elia tutuuwauwa wolo manusia debo odelo ito. Tio heloduá loú tióotutua alihu didi diila modehu mai, yi didi olo diila lodehu ngotilonggadu tolo taunu wau ngoputu hiheolio.

¹⁸ Lapataó tio luli loduá mola, tulusi hulungo lopo tuhutai didi tilinggula huta lopowoluo mai tilapulio olo.

¹⁹ Mongo wutatuú! Wonu to wolotamu woluo tahingo-ngotaawa tadiilalo moduduá pongaajali monto Allahu Taáala tulusi ngotaalio wewo mohutu maó tau boito muli mohualinga ode Allahu Taáala,

²⁰ eelai maó ayati botie: Taa u mohutu maó taa odusa muli mohualingai monto dalalio u talatala, tau boito mopoáahu jiwa

lotaa odusa boito monto opopate wau
moósababu daata lodusa ambunguolo.
Hulumati lamiaatia, Yakobus

1 Petrus

1 ¹ Mongo wutato umati tatilulaoto Allahu Taáala taloó-loóopo tolipu wewo tambati popeehumolo tutumulo tomadala lo Pontus, Galatia, Kapadokia, Asia, wau Bitinia! Watia, Petrus, rasulu li Isa Almasi, motiwunela pohileaala duá Allahu Taáala mongohi mai balakati wau salaamati olimongoli loú daata-daatalo maó. Timongoli tilulaoto lowali umati lo Allahu Taáala lotuúde wolo lanjana lo Allahu Taáala ti Paapa. Wau Rohullah malo powali olimongoli umati tamantali, tolomodu duólo Allahu Taáala, alihu timongoli modungohe li Isa Almasi wau pomantaliyo wolo duhu-Lio.

² (1:1)

³ Duloolo ito mosukuru mola ode Allahu Taáala, ti Paapa Eeyanto Isa Almasi! Malo odito ponu-Lio olanto, uito sababuulio Tio longohi mai olanto tutumulo bohu, loú luli lopotumulai li Isa Almasi lonto opopate. Utie mongohi mai olanto halapani u motoheeto.

⁴ Ito motiwunelo u motolo miliki babaa-lakatiyalo upilo dapato lo Allahu Taáala ode umati-Lio, deúito-yito balakati utilahu-Lio tosologa, tilinggula diila mowali moluusa, meaalo mowali mohutodu meaalo moluluto.

⁵ Ngoáamilalo boito yito ode limongoli sababu timongoli palacaya to Allahu Taáala. Yi timongoli dilaha-Lio wolo kawasa lo Allahu Taáala alihu timongoli mololimo oáahu udapa-dapato poilaaloolo de topulito lojamani.

⁶ Sababu uito mamusi timongoli motiwengahe lohilao, eleponu botia u bo wakuu ngopeé mola timongoli musi mowali suukali sababu timongoli moótodo yimontala u hidala-dalaala.

⁷ Patujulio yito u mopo bukuti maó wolo timongoli tióotutua palacaya to Eeya meaalo diila. Hulawa u mowali moluusa olo, tesiyola wolo tulu. Naa, iimani limongoli yito lebe maó ohalaga wolo hulawa, oditolio musi tesiyola olo alihu mowali motoheeto. Wau loú odito timongoli mapujio wau hulumatiolo boli polaióolo todulahe podudungga mai li Isa Almasi.

⁸ Timongoli motoliánga o–Lio, eleponu muloololio mai timongoli diila loóonto o–Lio. Wau timongoli palacaya to o–Lio eleponu botia timongoli diila moóonto olio. Uito sababuulio timongoli motiwengahe, wau molaasa hilaa meengahe u udaá wau diilalo mowali loíyaalo.

⁹ Sababu dulungo lo iimani limongoli iloáata, deúito–yito oáahu lojiwa limongoli.

¹⁰ Oáahu botieelo u tilulete wau ilimatoa lomongo nabi, wau timongolio helo laamali pasali lo balakati uilohi mai lo Allahu Taáala ode limongoli.

¹¹ Timongolio helo ngimato woloolo mola wau omolua suáli boito mamotoduo, u milakusudu lo Rohu li Almasi uwoluo todelomo batanga limongolio. Tou boito Rohu–Lio lonubuwati mai ode limongolio pasali totoonulalo polodutolo umusi olaasawa li Almasi wau pasali lo odudaáa–Lio umamo hunuhei lapataó uito.

¹² Tomongo nabi boito Allahu Taáala lopoótaa deú wolo u pilohutu limongolio diila bo upolohuna daá olimongolio, bo ode olemu; deúito–yito susuu–aliyaalo u masaatia botie u ilodungohe limongoli

wolo mopatato monto tamoo-delowa Habari Mopiohe pasali li Isa Almasi. Timongolio lopo tunggulai susuu-aliyaalo boito olemu wolo kawasa lo Rohullah uilohi-Lio mai lonto sologa. Tumbaó penu boli maaaa-laíkatiyalo ohilaa olo motota habari u pilohabari limongolio boito.

¹³ Sababu uito, mamusi timongoli dapadapato. Poódahai maó wau poti wunelolo lealeaatulo maó to balakati u mawohi-Lio mai olemu tou ti Isa Almasi de meidungga mai.

¹⁴ Podungohulo to Allahu Taáala wau diila maó potitumulo moduduá hilaamu u omoóomolu, tou timongoli diipo motota lo Allahu Taáala.

¹⁵ Bolíio maó, mamusi timongoli mantali todelomo totoonulalo hitua-tuawua u pohutuo limongoli, tutuuwauwa debo odelo Allahu Taáala tamalo tianga olimongoli boito mantali.

¹⁶ Todelomo Kitabi tulatulade, "Mamusi timongoli mantali, sababu Waú mantali."

¹⁷ Timongoli mongunte Allahu Taáala boito ti Paapa towakutu timongoli moduá mola to o-Lio. Naa, Allahu Taáala boitolo tamomutoó manusia motuuúde wolo huhutu longota-ngota lou diila momilohe

baya. Sababu uito tou timongoli donggo woluo todunia botie, mamusi timongoli mopoúdaá mola Allahu Taáala todelomo tutumulumu.

¹⁸Otaawa limongoli wolo umapilo mayali u lopo lopato olimongoli lonto tutumulo udiila ohuna upilo walisi mai linene moyamu. Bayaliilio diila hitua–tuwaua umowali moluusa debo odelo talaá meaalo hulawa,

¹⁹bo hitua–tuawua u ohalaga daá; deúito–yito batanga li Almasi lohihilao, ulowali odelo himba u pilobake ode Allahu Taáala lou diila o aibu wau henteó.

²⁰Ti Almasi tilulaoto Allahu Taáala tou dunia botie diipo pilowali mai. Wau to duduu–laheyaalo meidungga mai pulito lojamani botie, Tio meidungga mai ode dunia alihu timongoli poáahuwolo.

²¹Motimbulude o–Liolo timongoli palacaya to Allahu Taáala tamaaluli lopotumulai o–Lio lonto opopate wau lopoúdaá o–Lio. Oditolio, Allahu Taáalaalo taílaku maó limongoli wau to Allahu Taáalaalo olo timongoli mopowunelo halapani.

²²Sababu timongoli lodungohe to pongaajali lo Allahu Taáala, yi timongoli

lopo belesi batanga wau timongoli lotoliánga tau–tauwalo tango iimani loú ihilasi. Sababu uito, mamusi timongoli motoliánga ngota timongota wolo lealeaatu lohilao.

²³ Sababu motimbulude totahuda lo Allahu Taáala tatumu–tumulo wau ubakaa boito, timongoli mapilowali manusia bohu u diila pilotutu mai lomanusia, bo li Paapa tabakaa.

²⁴ Todelomo Kitabi tulatulade odie mola, "Ngoáamila umati lomanusia debo odelo huóyoto, wau ngoáamila odudaálio debo odelo bunga lohuóyoto. Huóyoto mololante, bungalio olo modulahu;

²⁵ bo tahuda lo Eeya debo u ohiheo–hiheolo maó." Tahuda boito Habari Mopiohe umapilo habarilio mai olemu.

2 ¹ Sababu uito, yinggilalo monto batangamu totoonulalo u moleeto; diilalo pohimbulo, wau diila maó poti munapiki. Diila maó pohiihia, wau diila maó pohina taa wewo.

² Mamusi timongoli mowali debo odelo ta@unge u boheli pilotutu mai, laito mototoángo losusu lorohu u puluwa. Loú odito timongoli matumumulo wau po@aahuwolo.

³ Todelomo Kitabi tulatulade odie, "Timongoli maloólaasa lohihilao malo odito piohio lo Eeya."

⁴ Sababu uito, ponaóolo mai ode Eeya. Tio debo odelo botu utumu-tumulo, botu utilapi lomanusia sababu he anggapuwolo diila ohuna; bo tumbaó tilulaoto Allahu Taáala odelo botu u ohalaga.

⁵ Timongoli debo odelo boboo-tuwaalo utumu-tumulo. Sababu uito mamusi timongoli mohuto pomakelio u momongu bele lo Allahu Taáala u rohu. Lou odito timongoli mowali mongo iimamu tatumu-tumulo tolomodu ode Allahu Taáala, wau u motimbulude li Isa Almasi mopodewo ode Allahu Taáala, bake lorohu u motuhatawa tohilaa lo Allahu Taáala.

⁶ Sababu todelomo Kitabi tulatulade odie, "Wau malo lulaota botu tuwau u ohalaga, upilopo tambati-Ú to Sion odelo botu laba-labaalo mopiohu; wau taa palacaya o-Lio diila ta@okikii@o lohilao."

⁷ Botu boito ohalaga daá ode limongoli tapalacaya. Bo ode tau-tauwalo tadiila palacaya, pohu-pohutulo áaa-yatiyaalo Kitabi odie mola, "Botu udiila ilopomakea lo papaa-niyaalo hudungu boito malo

ilaalo lowali botu u ulaba-labaalo mopiohu."

⁸ wau "Uitolo botu umoó teduó totau, botu u moóodehu olimongolio." Timongolio meiteduó sababu timongolio diila palacaya totahuda lo Allahu Taáala. Odieelo mola matilantu mai lo Allahu Taáala tomimbihu olimongolio.

⁹ Bo timongoli yito bangusa tatilulaoto, mongo iimamu tamomaya li olongia, bangusa tamantali, tolomodu duólo Allahu Taáala, umati lo Allahu Taáala lohihilao. Allahu Taáala lolulaota olimongoli wau lotianga olimongoli yilumuwaló lonto u modiólomo u tumuwoto ode delomo baa-Ngio ulaba-labaalo mobaango, wolo makusudu alihu timongoli mopololadu habari pasali lo totoonulalo huhutuu-Lio upolu-polutuó.

¹⁰ Omoóomolu timongoli diila umati lo Allahu Taáala, bo botia timongoli yito umati lo Allahu Taáala. Omoóomolu timongoli diila pilonu lo Allahu Taáala bo botia timongoli mololimo odehu hilaa-Lio.

¹¹ Mongo wutato taa ta@otoliángo! Timongoli yito tau deli wau tamoo-leleyangia todunia botie. Sababu uito watia mohile loú tióotutua alihu timongoli

diila maó moduduá napusu lomanusia
ulaito mopaatea moluwali jiwa.

¹² Píili limongoli towolota lotaa udiila
motota lo Allahu Taáala mamusi mopiohe
daá, tilinggula wonubolo timongolio
mopitana olimongoli odelo taa moleeto,
timongolio debo musu motolo akuwo
huhutumumu u mopiohe, tilinggula
timongolio mamomuji Allahu Taáala
todulahe podungga–Lio mai.

¹³ Domi Eeya, mamusi timongoli taáluku
ode timíidu tamoo–kawasawa manusia:
mopio toli Kaisari tamoo–kawasawa
ulaba–labaalo mopiohe,

¹⁴ meaalo toli Gubolonulu tatilunu maó
li Kaisari u mohukuumani tahi pohutua
moleeto wau u mohulumati maó taa u
hipohutua mopiohe.

¹⁵ Sababu Allahu Taáala motohilaa alihu
wolo totoonulalo huhutuumu u mopiohe
timongoli mongunti tunggilo lotaa u
mohulodu mobisala.

¹⁶ Mamusi timongoli tumumulo odelo taa
bebasi, bo diila maó pomakea obebasimu
boito u modepuhe ololeeto, bo tumbaó
potitumulolo odelo wato lo Allahu Taáala.

¹⁷ Halagai maó ngoáamila tau, toliánga
maó mongo wutatumu timongota Nasara.

Poohelo mola to Allahu Taáala wau hulumatia maó ti Kaisari.

¹⁸ Mongo wutato tamowali wato, potaálukulo toli tuanimu wolo ohulu–hulumatilo maó; diila bo toli mongolio tamopiohu hale wau moó aaluti, bo olo toli mongolio tadiila omanusia.

¹⁹ Allahu Taáala mamó balakati mai olimongoli, wonu timongoli sababu mongalati toú otohila lo Allahu Taáala, sabali modutolo topolo huhutu udiila aadili.

²⁰ Sababu wolo polutuóio wonu timongoli sabali modutolo hukuumaní u patutilio bantawa limongoli sababu ototala? Bo wonu timongoli wolo sabali momanta polodutolo u motoduo mai olimongoli sababu mohutu u otutu, yi Allahu Taáala mamó balakati mai olimongoli.

²¹ Maa uitolo Allahu Taáala lotianga olimongoli. Sababu ti Almasi lohihilao malo dutolo ode limongoli, wau woleeto Tio longohi olimongoli tuwaulio obaaya, alihu timongoli moduduá baáa–Tio.

²² Tio diila peéenta maó helohutu dusa, wau diila peéenta maó olo penu boli ngotaa loódungohe o–Lio helo himbulo.

²³ Toú Tio hepilu–piluwayolio, Tio diila lomalasi wolo puwayo. Toú Tio dutodutolo, Tio diila helo nganjamu; Tio bo lohudu mola palakala–Lio ode Allahu Taáala, Hakimu taádili boito.

²⁴ Ti Almasi lohihilao talomanta totoonulalo dusaanto tobatanga–Lio toitaato ayu salipu, alihu ito molopato monto okokawasa lodusa, wau tumumulo moduduá u otohilaa lo Allahu Taáala. Papaa–liyaalo li Almasi boitolo u lopoóluli olimongoli.

²⁵ Omoóomolu timongoli debo odelo himba uilapalo, bo botia timongoli maluli dilelo–Lio u loduduá Diti wau Tamoo–laalawa nyawa limongoli.

3 ¹ Odito olo timongoli, mongo dile taabua, musi taáluku todile talolaí alihu wonu towolota limongolio woluo tadiila palacaya tohabari monto Allahu Taáala, pīilimu moóhutu olimongolio mowali palacaya. Wau diila palalu timongoli moloíya wolo–wolo olimongolio,

² sababu timongolio moóonto pīilimu ubelesi wau saale.

³ Ogaagamu boito diila bo ogaaga to bulemengio, debo odelo humayaalio

modadai huwoó mealo momake polomu, mealo momake boó u himahalea.

⁴ Boliio maó, mamusi ogaagamu tumoodei monto delomo hilao, pīili u molumboyoto wau moduóoto; uitolo ogaaga ubakaa u ohalaga daá moduduá to bibilohu Allahu Taáala.

⁵ Wolo dudelo utieelo tojamani muloololio mai mongobua o agama tahemo halapu to Allahu Taáala helo poógaaga batangalio loú taáluku todile limongolio.

⁶ Ti Sara odito olo, tio lodungohu tolei Abraham wau longunte olio tituanilio. Wutato botia yito mongo walái Sara, wonu timongoli mohutu susuu–aliyaalo u mopiohe wau diila moohe toú wolo wambaío.

⁷ Wau timongoli olo, mongo dile talolaí, mamusi tumumulo wolo lealeaatu lo huhama todilemu, wau wolo motota lobatanga hihilao deú timongolio yito kaumu tamo lulupuhu. Pohutua maó timongolio wolo hulumati, sababu timongolio peé–peéenta woli mongoli, mamololimo ponu lo tutumulo ututuulio tutu monto Allahu Taáala. Pohutua maó utie, alihu diaaluo tamo ngabuto duámu.

⁸ Limbuño maó yito: mamusi Mongo wutato ngopikii–langi wau ngopongolaasa. Mamusi timongoli mototoo–liánga debo odelo tau–tauwalo tamohutato. Wau mamusi timongoli tinggai modehu hilao wau opopoli dupadupapa lohilao.

⁹ Diila maó pomalasi u moleeto wolo u moleeto, meaalo puwayo wolo puwayo; bolíio maó balasia maó wolo momolohone mola balakati monto Allahu Taáala. Sababu Allahu Taáala motianga olimongoli tumbaó alihu timongoli mololimo balakati monto o–Lio.

¹⁰ Todelomo Kitabi tulatulade odie, "Taa u ohilaa molaasa maó tutumulo wau ohilaa moótodo mai duduu–laheyaalo u mopiohu, musi modaha tunggilio alihu diila mobisala susuu–aliyaalo u moleeto wau diila molapali susuu–aliyaalo uimbulo.

¹¹ Tio musi mopo walaheó u moleeto wau mohutu u mopiohu; mamusi tio mohipate tióotutua umoó todo mai polodame.

¹² Sababu Eeya laito mopoótuoto tau–tauwalo tamoduduá otohilaa–Lio, wau Eeya laito modungohe duduu–awaalo limongolio; bo Eeya moluwali tau–tauwalo tahi pohutua u moleeto."

¹³ Tatoonu tamo tohilaa mohutu u moleeto olimongoli, wonu timongoli sanangi mohutu u mopiohu?

¹⁴ Bo eleponu timongoli musi modutolo sababu hemohutu susuu-aliyaalo u mopiohe, timongoli o pa@eeda! Diila maó oohe penu boli olo tatoonu, wau diila maó polawalo.

¹⁵ Bo todelomo hilaamu, mamusi timongoli mongohi li Almasi polo hulumati u tolomodu umotuúde wolo huhuloá-Lio odelo Eeya. Wau mamusi timongoli laito dapadapato mongohi tameto to timiídu taa mohintu tomimbihu halapani u mililiki limongoli.

¹⁶ Bo pohutua maó uito wolo molumboyoto wau hulumati. Wau musi hilaamu u malo@otapu tenelo Eeya beresi, alihu wonu timongoli pitanaalio sababu timongoli tumutumulo loú mopiohe odelo muri li Almasi, yi taa u mopitana boito mamowali moolito lohihilao.

¹⁷ Lebe mopioheó modutolo sababu hemohutu u mopiohu -- wonu uito yito otohilaa lo Allahu Taáala -- loú modutolo sababu hemohutu u moleeto.

¹⁸ Sababu ti Almasi lohihilao yilate bo peéenta wambaó, u ohiheo–hiheolo maó sababu dusa lomanusia -- ngotaalio tadiila ototala, yilate ode taa ototala. Ti Almasi lohutu uito alihu Tio mowali modelo olimongoli ode Allahu Taáala. Tio pilatelio yila–yilateelo maó delo pohuli lobatanga, bo luli pilotumulai delo pohuli lo rohu.

¹⁹ Todelomo owowoluwoa lo rohu Tio lonaó helo pohabari habari lonto Allahu Taáala to roro–huwaalo tatilu tupaalio:

²⁰ deúito–yito rohu lotau–tauwalo tadiila helo dungohe to Allahu Taáala tojamani lei Noho. Toú boito Allahu Taáala lohima loú sabali toú tei Noho ngotilonggadu hemohutu kapaliilio. Bo tau–tauwalo tawoluo tokapali wambaó -- ngoáamilalo walu lota -- tapilo@aahu loli taluhe daá boito.

²¹ Naa, ilowali boito debo odelo pohumaya lo popolihi u masaatia botie mopoáahu olimongoli. Popolihi botie diila tala tuwau lo upacala mopoó belesi wawaó monto ngoáamila u hikootoloa, bo debo odelo dantimu to Allahu Taáala monto hilaa u maloótapu tinelo Eeya u mopiohu. Popolihi boito mopoáahu olimongoli

sababu ti Isa Almasi maluli tilumumulai lonto opopate,

²² wau malo botula mola ode sologa.

Masaatia Tio okawasa peé-peéenta wolo Allahu Taáala wau hemo malenta ngoáamila malaíkati, ngoáamila ta@okawasa wau ngoáamila olootolo.

4 ¹ Sababu ti Almasi malo dutolo delo pohuli lobatanga, timongoli olo musi mopolotolo batanga wolo tilihula udebo odelo uito. Sababu taa u modutolo delo pohuli lobatanga diilalo mohutu dusa.

² Sababu uito, mamusi timongoli tumumulo wumbutio mola todunia botie moduduá otohilaa lo Allahu Taáala wau diila moduduá otohilaa lomanusia.

³ Toú yilalu mola, timongoli malotuúde hiheolio helohutu wolo u otohilaa pohutuo lotau-lotauwalo tadiila hitootawa to Eeya. Timongoli tumutumulo diila mopiohe. Timongoli helo duduá napusu limongoli; hemo tihuwo-huwoó, hemo poti-potihungu, hemo ngilu-ngilu wau hemolubo balaahala u bo moólonuó tutu.

⁴ Botia taa u diila motota lo Eeya, hilinggolabe deú timongoli diila loduduá tutumulo debo odelo timongolio, heloólaasa dusa lou diila o eenggadelio.

Uitolo sababuulio timongolio helohina olimongoli.

⁵ Bo timongolio de musí mongohi maó titihula to Allahu Taáala tamalo tidapato u momutoó taa u tumutumulo wau tamalate.

⁶ Uitolo sababuulio Habari Mopiohe mapilo habarilio olo ode tau-tauwalo tahelo punungo. Makusudulio alihu timongolio, tamaa bilutoó todelomo owowoluwoa lobatanga -- debo odelo suáliilio lotaa ngoáamila uma butoólo -- mowali tumumulo delo pohuli lorohu, moduduá kahandaki lo Allahu Taáala.

⁷ Totoonulalo u hitua-tuawua malembidei opopulitio, sababu uito mamusi timongoli motolo kawasa maó batanga wau mopoódaha, alihu timongoli moóduá.

⁸ Lebe maó loú totoonulalo u hitua-tuawua, mamusi timongoli tióotutua motoliánga ngota timongota, sababu wolo mototoo liánga boito timongoli mamoti dapato olo u mongangaa-mbungua.

⁹ Mamusi timongoli mololimo ngota-timongota tobele longota-ngota, loú diila mopoílaalo suusa.

¹⁰ Ngota-ngota Timongoli malo lolimo wowoo-hiyaalo u hihe-hiheedeá lonto Allahu Taáala. Sababu uito odelo

tamoóolawa tamopiohe monto wowoo-hiyaalo lo Allahu Taáala, mamusi pohuna maó limongoli omaambo boito duólo polohuna daá peé-peéenta.

¹¹ Taa umopo tunggulo habari, mamusi mopo tunggulaó habari monto Allahu Taáala; taa umomaya taa wewo, mamusi momaya wolo olootolo u monto Allahu Taáala, alihu todelomo totoonulalo suáli, Allahu Taáala mowali pouádaáalo motimbulude li Isa Almasi. Tiolo taókawasa wau paatuti pouádaáalo u ohiheo-hiheolo maó. Amin.

¹² Mongo wutato taa otoliángo! Timongoli masaatia modutolo daá sababu donggo hetesiyolo. Bo diila maó polinggolabu, debo odelo woluo hitua-tuawua upolu-polutuó lotoduo mai olimongoli.

¹³ Tumbaó, timongoli mamusi molaasa sanangi sababu moduduá modutolo peé-peéenta woli Almasi. Yi de wonu odudaá li Almasi poilaalolo, timongoli mamu tiwengahu.

¹⁴ Timongoli opaéeda wonu timongoli hinaalio sababu timongoli muri li Almasi. Uito boliilio maó Rohu u molamahu, deúito-yito Rohullah, woluo toli mongoli.

¹⁵ Diila maó penu boli ngotaalio monto wolota limongoli modutolo sababu tio tamoomatea mate-mateelo maó, meaalo motaówa, meaalo tamoleeto, meaalo sababu tio moulambohe to ulusani lotaa wewo.

¹⁶ Bo wonu timongoli modutolo sababu timongoli tauo Nasara, diila maó poolito sababu suáli boito. Posukurulo mola ode Allahu Taáala, deú timongoli lodelo tangguli Almasi.

¹⁷ Malei dungga wakutuulio Allahu Taáala momutoái dunia. Wau umati lo Allahu Taáala lohihilaolo tamaa butoóolo meimulo. Naa, wonu Allahu Taáala mamolumula wolanto, de woloolo mola waliilio wolo tau-tauwalo tadiila palacaya to Habari Mopiohe monto Allahu Taáala boito?

¹⁸ Todelomo Kitabi tulatulade odie, "Wonu tau-tauwalo tamopiohe olo malo odito totolo u poáhulo, tidiyolo maó u mamotoduo mai wolo tau-tauwalo tahi odusawa tadiila motota lo Eeya!"

¹⁹ Sababu uito, wonu woluo tau-tauwalo tamo dutolo sababu Allahu Taáala mokahandaki odito, mamusi tau-tauwala boito tumumulo lou otutu wau mopo

palacaya lobatanga to Talo powali mai olimongolio. Tio malaito moéelai danti-Lio.

5 ¹ Pohile laatia tomongo taúwa lojamaá limongoli mopoó tuotaó. Watia loluladei tulade botie odelo tamani sama-sama taúwa wau odelo taa umalo sakusi lohihilao polodutolo lo Almasi, wau tamamo duduá olo poudaáalo, wonu bolo odudaá Almasi pobilohulo ode manusia. Pohile laatia loú tióotutua

² alihu timongoli mohimbala himbala lohimba uiludu mai lo Allahu Taáala olimongoli. Himbalai maó timongolio wolo sanangi lohilao odelo woloolo mola u otohilaa lo Allahu Taáala, wau diila maó wolo buheeto hilao. Diila maó pohutua olo kalajamu bo huna moótapu paéeda, bo sababu timongoli tióotutua ohilaa momaya.

³ Diila maó pohutu odelo tamotolo kawasa olimongolio tapilo malacaya de olemu, bo powaliilo obaaya ode limongolio.

⁴ Wau touú Diti Daá boito de meidungga mai, timongoli mamó lolimo makuta ulaba-labaalo mobaango, udiila tamouéle obaangio laba-labaalo.

⁵ Odito olo Wutato, tau-tauwalo tahumula. Potaálukulo totau-tauwalo tahi hulanga. Mongo wutato ngoáamilalo musi motidupapa lobatanga wau momaa-maayawa wolo dupadupapa lohilao. Sababu todelomo Kitabi tulatulade odie mola, "Allahu Taáala motehengi taa sombongi, bo momonu tadupa-dupapa lohilao."

⁶ Sababu uito, podu papaawa mola batangamu to walungo uluú lo Allahu Taáala u molotolo, alihu Tio mopolaiá olimongoli wonu mawakutuulio.

⁷ Wuduwalo mola totoonulalo ololawalumu ode Allahu Taáala sababu Tio momandungi mai olemu.

⁸ Mamusi timongoli mopoódaha wau motidapato! Sababu Ibilisi yito balimu. Tio debo odelo singa naó mota naó mai sambela hemo heuwaango mololohe mangusaalio.

⁹ Tuwalia maó tio wolo iimani motoheeto, sababu otaawa limongoli deú mongo wutato timongota lo Nasara wewolio to ngoilanggubu dunia olo modutolo debo odelo timongoli.

¹⁰ Bo lapatio maó timongoli modutolo ngopeé mola, Allahu Taáala lohihilao

mamohutu mai olimongoli mowali wimu-wimumuto tutu. Tio mamopo tihula wau mopoó lotolo olimongoli wau mopotoheto olimongoli. Sababu Tio yito Allahu Taáala tamopiohe daá hilaa-Lio, tamalo tianga olemu u loduduá helolaasa odudaáa-Lio ubakaa lotimbulude toli Almasi.

¹¹ Tiolo taókawasa tunggula ohiheo-hiheolo maó! Amin.

¹² Tuladu laatia ulimbu-limbuá botie tiluladei laatia olimongoli loú bilantua lei Silas, taa ilanggapu laatia ngotaalio lowutato Nasara taatatapu wau molotolo hilao. Watia ohilaa mohuntulai olimongoli wau mopoyakini olimongoli deú wolo u tiluladei laatia botie habari u otutu tomimbihu ponu lo Allahu Taáala. Mamusi timongoli motidihu tióotutua to ponu boito.

¹³ Mongo tamani ngojamaá to Babiloni, taólo tilulaoto Allahu Taáala, lolao salamu olemu; odito olo walaúuú tei Markusi taa taótoliángo.

¹⁴ Posasaa-lamuwalo ngota timongota wolo toliángo u lealeaatulo maó odelo Wutato Nasara. Pohileaalo duá Eeya mongohi mai salaamati to Wutato

ngoáamilalo tamowali miliki li Almasi.
Hulumati lamiaatia, Petrus

2 Petrus

1 ¹ Mongo wutato taótu-otutuulo maó palacaya debo odelo amiaatia! Ti Isa Almasi, deúito-yito Allahu Taáala wau Olongia Tamopo-poáahua olanto, lopoluasi mai olanto palacaya to o-Lio, sababu Tio helohutu u otutu. Tulade botie lonto olei Simon Petrus, ngotaalio lowato wau rasulu li Isa Almasi.

² Pohileaala duá Allahu Taáala mongohi mai balakati wau salaamati olimongoli wolo daata-daatalo maó, sababu timongoli motota lo Allahu Taáala wau li Isa, Eeyanto.

³ Allahu Taáala malomake kawasa ilahi-Lio u longohi mai to olanto totoonulalo hitua-tuawua u palaluwolo ode tutumulo potabiaalo. Tio lohutu mai utie loli wolo u otaawanto pasali li Isa Almasi, tamalo tianga olanto u molaasa maó odudaá wau opopio-Hio.

⁴ Wolo dudelo boitolo Allahu Taáala longohi mai olanto babaa-lakatiyalo upolu-polutuó daá wau ohalaga umapilo danti-Lio mai. Wolo babaa-lakatiyalo

boito timongoli mowali molopato monto totoonulalo ilohilaa moleeto moporuusa todunia botie, wau timongoli mololimo piili u ilahi.

⁵ Masababu uito, potolo panilo tióotutua alihu timongoli debo palacaya li Almasi wau palacayamu boito tilumudu lo tutumulo umopiohe. Ngopohia lo tutumulo umopiohe, timongoli palalu olo mowali taa opongotota,

⁶ wau ngopohia lo pongotota, timongoli olo musi mowali mongawasa batanga, wau ngopohia mowali mongawasa batanga mamusi timongoli olo mopolingohu batanga u taaba motaalua lo totoonulalo u hitua–tuawua. Ngopohia sabali motaalua lo totoonulalo u hitua–tuawua, timongoli olo musi tumumulo moduduá u otohilaa lo Allahu Taáala.

⁷ Wau tumumulo moduduá u otohilaa lo Allahu Taáala musi olo poimumutolo wolo modehu hilao tomongo wutato ngoíimani. Wumbutio mola mamusi toliángumu tomongo wutato ngoíimani duhengalo wolo toliángo ode taa ngoáamila.

⁸ Ngoáamilalo boito yito pipii–iliyaalo upalaluo limongoli. Wonu pipii–iliyaalo boito woluo to olemu wolo daata–daatalo

maó, timongoli mamowali moólohu wau otilapulo, wau motota li Isa Almasi Eeyanto loú lebe mopioheó poli.

⁹Bo taa udiila o pipii-iliyaalo boito, bibilohio meepito; tio diila mowali moóonto wau tio molipato deú duduu-saalio uilalu maó mapilo belesi.

¹⁰Sababu uito, Mongo wutato, potolo panilo tióotutua alihu titiango Allahu Taáala wau tulao-Tio to batangamu boito mowali helebe motoheetaó. Wonu timongoli mohutu maó uito, timongoli diila tamomahe iimani.

¹¹Loú odito timongoli mawohia-Lio haku polupolu u tumuwoto ode bele biluloá saaha li onlongia u ohiheo-hiheolo maó monto Eeya wau Olongia Tamopo-poáahua olanto Isa Almasi.

¹²Sababu uito, watia laito hemo poéelai olimongoli pasali losuáli boito, eleponu timongoli malotota maó wau palacaya daá to pongaajali lonto Allahu Taáala umaa tilolimo limongoli boito.

¹³Ngotilonggadu watia tumutumulo, watia molaasa wajibu mopoéelai olimongoli to susuu-aliyaalo boito.

¹⁴Sababu otaawa lowatia deú diilalo mohiheo watia mamololaa maó dunia

botie, sababu Eeyanto Isa Almasi malo poótaa mai loú lopatato olaatia.

¹⁵Yi watia mamó tolopani alihu lapataó watia mate maó, timongoli laita muli moéela mola susuu-aliyaalo botie.

¹⁶Toú amiaatia lopoótaa mai olimongoli malo odito uda@a alio podudungga mai lo Eeyanto Isa Almasi, amiaatia diila lotiwunela toú totoonulalo tombilu lomanusia u bo latabu. Oduda@a li Almasi boito maa iloontonga lamiaatia wolo mato lunggongo lohihilao.

¹⁷Amiaatia woluo teto mola toú Tio hilulumati wau pilopo uda@a lo Allahu Taáala ti Paapa. Toú boito dungo-dungohei suala lonto Taa Laba-labaalo molamahu, u lotahuda ode o-Lio, "Botieelo Wala-Ú tapilonu-Ú. Tio mopo sanangi hilaa-Ú!"

¹⁸Amiaatia lohihilao loódungohe suala boito dungga-dungga mai lonto sologa toú amiaatia woluo peé-peéenta wo-Lio toitaato huíde u mantali boito.

¹⁹Uito sababuulio amiaatia lebe yakini poli to tahuli lo Allahu Taáala u pilohabari lomongo nabi. Opiohelio timongoli mopoó tuoto tahuli boito, sababu tahuli boito debo odelo tohe u tinetinela totambati

modiólomo tunggula dulahe mamobutu mai, wau tinelyo poliyama tiimuru tinetinela todelomo hilaamu.

²⁰ Laba–labaalo mopiohe da@a mamusi eela mola limongoli utie: Tahuli lo Allahu Taáala upilo tunggulai lomongo nabi diila mowali tombangalo moduduá huhama lohihilao.

²¹ Sababu diila peénta maó tahuli monto Allahu Taáala pilopo habari bo moduduá otohilaa lomanusia. Bo Rohullah motolo kawasa totaa umopo tunggulo tahuli monto Allahu Taáala lohihilao.

2 ¹ Touú yilalu maó towolota umati lo Allahu Taáala mailumeneto mongo nabi paluti. Odito olo to wolotamu malumenetai guguu–ruwaalo paluti. Timongolio mamopo tuwotai totoonulalo pongajali udiila otutu, umoó binasa tau. Wau timongolio mamomaahu taókawasa tamalo pobevasi olimongolio. Louú odito timongolio mopodungga mai obobinasa tobatanga lohihilao, u mamodeehe olimongolio louú molamemeto.

² Eleponu odito, dadaata tau mamoduduá dudelo lo tutumulo guguu–ruwaalo paluti boito uhe kiluwasa lonapusu limongolio. Wau huhutu lo guguu–ruwaalo boito

mamohutu dadaata tau mohina Dalaalo Banari udulu–dulunga ode Allahu Taáala.

³ Sababu timongolio manjanunu, yi guguu–ruwaalo paluti boito mamosilita maó totoonulalo silita olemu u kilalangilio lohihilao u moótapu untungi monto olimongoli. Bo bubutoó u mopodehu lohukumani to limongolio malohiheo pilopo dapato, wau obobinasa u matilantu–Lio mai olimongolio donggo hemohima olimongolio.

⁴ Mamaa–laíkatiyalo taódusa olo diila poluli lo Allahu Taáala molopato monto hukumani, bo debo pomahu–Lio ode delomo naraka. Timongolio potuwoto–Lio ode delomo pangato u modiólomo u tahangia–Lio mola teto dilumutu Dulahe Pomutoálo.

⁵ Odito olo wolo dunia tojamani muloololio mai. Allahu Taáala diila lopoluli maó lolopata lonto hukumani. Allahu Taáala lalao mai taluhe daá ode dunia totau–tauwalo tahileeta tou boito. Bo tei Noho peé–peéenta wolo tapitu lota wewolio wambaó tapiloáahu–Lio, sababu tei Noho helopo lolade habari tomimbihu tutumulo u lotuhatawa to hilaa lo Allahu Taáala.

⁶Tutuuwauwa olo suálilio wolo kota Sodom wau Gomora: Allahu Taáala lopo binasa kokootawalo boito wolo tulu alihu mowali obaaya pasali loú wolo u mamotoduo mai wolo tau-tauwalo tahileeta.

⁷Bo tei Loti tapiloáahu, sababu tio loduduá u otohilaa lo Allahu Taáala; tio lodutolo laba-labaalo sababu píili udiila lotuúde wolo tau-tauwalo tahi ruusawa.

⁸Tohungo lotau-tauwala debo odelo uito tei Loti tamopiohe boito tumutumulo wolo hilaa sikisikisa, sababu motíidu dulahu tio hemoóonto wau hemoó dungohe totoonulalo huhutu limongolio u moleeto.

⁹Oditolio otaawa lo Eeya woloolo mola mopoáahu tau-tauwalo tahipo duduáawa u otohilaa-Lio wonu timongolio motaalua wolo totoonulalo nahati. Wau otaawa lo Eeya woloolo mola molahu tau-tauwalo tahileeta u sikisaalo to Dulahe Pomutoálo,

¹⁰tolomodulio tau-tauwalo tahipo duduáawa u otohilaa lonapusu limongolio ukootoro wau tamohina okokawasa lo Allahu Taáala. Odito buheli wau sombongilio guguu-ruwaalo paluti boito tilinggula penu boli totoonulalo mahaluku

umolamahu tosologa timongolio diila mopo pangu-pangu mohina!

¹¹ Hiambola mamaa-laikatiyalo talebe molotolo daá wau okawasa wolo guguru-ruwaalo paluti boito, diila helo potuludu totoonulalo mahuluku umolamahu boito wolo tataa-heyalo umohina totalu lo Eeya.

¹² Bo guguru-ruwaalo boito, mailaba! Timongolio debo odelo binatangi upilotutu mai u waúpolo wau pateelo mate-mateelo maó wambaño. Timongolio diila hemo mikilangi bo wambaó mohutu moduduá naluri, tilinggula timongolio heloluhu susuu-aliyalo udiila o pahamualio wolo tataa-heyalo umohina. Sababu uito ode huhuu-hutuwaalo limongolio lohihilao, timongolio mabinasa debo odelo totoonulalo binatangi mongantau.

¹³ Odelo wuupa to polodutolo umaa ilosababua limongolio, timongolio mamodutolo sikisa. Ode limongolio, suáli umoó sanangi hilao yito mohutu maó penu boli wolo wambaño toú dulahu huna mopoóluli hilao to ilohilaa lobatanga limongolio. Wonu timongolio hulohuloáa peé-peéenta woli mongoli todelomo potihunggu lo totamelo, píili limongolio

moólunuó sababu timongolio hehuwoáalo wolo wuntulo hilao u moóohuú.

¹⁴Timongolio diila mopotolu-tolu mohutu dusa wau u otohilaa limongolio yito molontonga taabua huloto. Wau taa u boheli palacaya maó wau donggo diipo boti yakini, heáanga limongolio. Hilaa limongolio malali biliyasa wolo ototamaá. Timongolio yito tau-tauwalo tahi laánatia!

¹⁵Sababu timongolio diila mohuto moduduá dalalo motulidu, yi timongolio mailapalo. Timongolio lohama dalalo u diluduá lei Bileam walaée Beor omoóomolu. Tei Bileam botie ohilaa daá moótapu doi monto huhutuulio u moleeto.

¹⁶Bo tio pilopo eelalio tióotutua to ololeetio boito, toú kolodailio helo bisala wolo suala lomanusia. Yi nabi boito pilakusario u lopohuheli maó huhutuulio u biyongo boito.

¹⁷Guguu-ruwaalo paluti boito yito debo odelo butu lotaluhu u mohengu, wau debo odelo wambulo u hiliipa lodupoto huloyongo. Allahu Taáala malo podapato olimongolio tambati tuwau u modióloma tutu.

¹⁸Timongolio helohutu poopolo-ilaalowalo u hilangga-langgata wau

toongi; napusu u huloto pilomake limongolio huna mopo topotala totau-tauwalo taboheli wambaó lolopato lonto awoota lotaa hitumula yilapalo.

¹⁹Guguu-ruwaalo paluti boito lodanti polobebasi totau-tauwala boito, hiambola timongolio lohihilao hepilowato lo totoonulalo uúdu u moporuusa manusia. Sababu wonu tau olaahelio loú hitua-tuawua, yi tio wato lotamo olaaheó olio boito.

²⁰Taa u motota lo Eeya wau Tamoo-poáahua olanto Isa Almasi malo lopato lonto totoonulalo kawasa lodunia ulopo kootolo manusia. Bo wonu lapatio maó tio muli owantobe tilinggula olaahe lo totoonulalo kawasa boito, yi owowoluwoa lotau boito toú pulitio maó lebe moleeta loú owowoluwoa dipolulio mai.

²¹Lebe mopiohe tau-tauwalo debo odelo uito diila peéenta maó motota dalalo u otutu monto Allahu Taáala, loú timongolio motota maó, bo lapataó diila mohuto moduduá papaa-lentawalo uilohi mai lo Allahu Taáala to limongolio.

²²Wolo u pilohutu limongolio mopobukuti obobanali lo pohumaya botie, "Apula mamuli monga umaa

pilotuólio," wau "Boi umaa yilihualio, mamuli molilii-liide todelomo lataó."

3 ¹ Mongo wutatuú ta@otoliángo! Utieelo tuladu laatia u oluolio ode limongoli. Todelomo oluo lotulade botie, watia motolopani momongu totoonulalo pikiilangi ubelesi tolimongoli.

² Watia mopoáhu mai alihu timongoli mamoeéla mola loloo-iyaaalo u muloololio mai yiloíya lomongo nabi lo Allahu Taáala, wau palenta lo Eeya, Olongia Tamoo-po@aahua, upilo tunggulio olimongoli lotimbulude tomongo rasulu.

³ Bohu-bohulio, musu otaawa maó limongoli deú to duduu-laheyaalo pulitio malumenetai tau-tauwalo tatutumulio he kiluwasa lonapusu limongolio lohihilao. Timongolio mamososero olimongoli

⁴ loú moloíya odie, "Ualio Eeya lodanti mamei dungga mai! Botia toonu Tio? Mongo tiyamo loluhurunto mailate, bo totoonulalo u hitua-tuawua donggo tutuuwauwa wambaó debo odelo anggadu ilowalia mai lo aalamu!"

⁵ Timongolio sangaja diila mohuto momasisi deú muloololio mai daá Allahu Taáala lopowali mai hulungo wau dunia

lo pilimani-Lio. Dunia pilowali-Lio mai monto taluhu, wau wolo taluhu;

⁶ wau wolo taluhu olo -- deúito-yito taluhu monto taluhu daá tutu -- dunia muloololio mai daá boito pilobinasa.

⁷ Bo hulungo wau dunia uwoluo masaatia botie, tilaala lo pilimani Allahu Taáala boito olo u de mopobinasa wolo tulu. Botia hulungo wau dunia donggo taataalo dilumutu todulahe tau-tauwalo tahileeta hukuumanio wau pobinasaalo.

⁸ Bo mongo wutatuú, suáli tuwau botie diila maó lipata limongoli; deú todelomo bibilohu Eeya, ngohui diila ohiihedio wolo ngolihi lotaunu -- duduuluwolo tutuuwauwa wambaó o-Lio.

⁹ Eeya diila moboyu mongohi mai wolo u madilanti-Lio eleponu woluo tahemo lantobe odito. Bolíio maó, Tio sabali to olemu, sababu Tio diila mohuto penu boli ngotaa maó binasa. Tio motohilaa alihu ngoáamila tau molilihi monto totoonulalo dusalio.

¹⁰ Bo Dulahe podudungga mai lo Eeya mamei dungga debo odelo tamootaówa. To Dulahe boito, hulungo mamooli wolo tingohu bulonggodu, wau u@uu-pangowalo tohulungo mamaahu mopobu,

wau dunia wolo totoonulalo uwoluo todelomio mamooli.

¹¹ Sababu ngoáamilalo boito maa antuluo–Lio wolo dudelo u odito. Tingga woloolo mola wajibulio timongoli tumumulo? Timongoli musi tumumulo mantali wau tolomodu duólo Allahu Taáala,

¹² ngotilonggadu timongoli mohima wau moololo dudunggalio mai Dulahu Allahu Taáala. To dulahe boito hulungo mamaahu mopobu, wau sababu patulio, yi u@uu–pangowalo to hulungo mamowali taluhu.

¹³ Bo ito mohima wolo umapilo danti mai lo Allahu Taáala, deúito–yito hulungo u bohu wau dunia u bohu, toútoonuu woluo u aadili.

¹⁴ Sababu uito, Mongo wutato taótoliángo, toú timongoli donggo hemohima Dulahe boito, potolo panilo tióotutua u tumumulo mantali wau diila oáaibu totalu lo Allahu Taáala. Wau taalai maó wumbuta u mopiohe wolo Allahu Taáala.

¹⁵ Anggapuwalo osaabali lo Eeyanto odelo hiyango uilohi–Lio mai olimongoli alihu mowali moáahu. Tei Paulus,

wutatonto taótoliángo, maloludei odito olo olimongoli. Tio loluladei uito wolo tinepo uilohi lo Allahu Taáala olio.

¹⁶Todelomo ngoáamila tuladio, tei Paulus laito hemoluladu pasali losuáli boito. Memangi woluo dengolo suáli u mototolo todelomo totoonulalo tuladio boito. Wau to bagiyangi boito pilopo boboolió lotau-tauwalo tadiila hitootawa lolo-loolo wau diila motoheeto iimanilio. Suáli boito diila moólinggolabe, sababu bagiyangi wewo lo Kitabi pilohutu limongolio odito olo. Wolo u pilohutu limongolio boito bo moó sababu obobinasa olimongolio lohihilao.

¹⁷Bo timongoli, Mongo wutato taótoliángo, malotota pasali losuáli boito. Sababu uito, poódahailo maó, diila bolo timongoli odelowa ode dalalo umoó lapalo lotau-tauwalo tahi luusawa pílilio tilinggula timongoli modehu monto tambati potidutaá limongoli u motoheeto.

¹⁸Mamusi timongoli helebe moólaasa ponu li Isa Almasi, Eeya wau Olongia Tamoo-po@aahua olanto, wau mamusi timongoli olo helebe motota o-Lio. Ilopujiaalo mola Tio, botia wau dilumutu

ohihea-hiheolo maó! Amin. Hulumati
lamiaatia, Petrus

1 Yohanes

1 ¹ Tuango tulade botie tomimbihu tahuda u mongohi tutumulo, deúito-yito tahuda u mawoluo anggadu bohulio mai daá. Amiaatia maloó dungohe@o, wau maloóonto ma@o uito wolo mato lamiaatia lohihilao. Amiaatia malo miloheó wau malodihu maó wolo uluú lamiaatia.

² Touú tutumulo boito pilo@ilaalo mai, amiaatia loóonto maó. Uitolo sababuulio amiaatia mongohi mai ososakusi tomimbihu olio. Amiaatia mopohabari mai olimongoli pasali lo tutumulo u tutuulio tutu wau ohiheo-hiheolo maó, uwoluo peé-peéenta wolo Allahu Taáala, wau u mapilo ilaalo mai olamiaatia.

³ Wolo umaa iloontonga wau ilodungohe lamiaatia, uitolo olo u pohabario mai lamiaatia olimongoli, alihu timongoli peé-peéenta wolamiaatia moduduá molaasa hitua-tuawua todelomo hilao to tutumulo motituwau woli Paapa wau wolo Wala-lo Isa Almasi.

⁴ Amiaatia loluladei utie alihu hilaanto tióotutua meengahe.

⁵ Uti–utieelo habari umaa ilodungohe lamiaatia lonto Wala–‘lo wau u potunggulo mai lamiaatia olimongoli: Allahu Taáala boito mobaango, wau to Allahu Taáala diaaluo u modiólomo sama–samaata.

⁶ Wonu ito moloíya deú ito tumutumulo motituwau wo–Lio, lebe–lebe pomaó ito tumutumulo todelomo u modiólomo, yi ito mohimbulo mopio wolo loíya meaalo wolo huhutu.

⁷ Bo wonu ito tumutumulo todelomo mobaango odelo woloolo mola Allahu Taáala woluo todelomo mobaango, yi ito tumutumulo moáaita tutu, mopiohe wau dame ngota timongota, wau duhu li Isa, Wala–‘lo, mopobelesi olanto monto ngoáamila dusa.

⁸ Wonu ito moloíya deú ito diila odusa ito mohimbulo batanganto lohihilao; wau Allahu Taáala diaaluo todelomo hilaanto.

⁹ Bo wonu ito motolo akuo duduu–saanto to Allahu Taáala, Tio mamoeélai danti–Lio wau mohutu wolo u aadili. Tio mamoe ngambungu duduu–saanto wau mopobelesi olanto monto totoonulalo huhutuunto utilala.

¹⁰ Bo wonu ito moloíya deú ito diila odusa, ito o anggapu tutuuwauwa tutu suáliilio

wolo Allahu Taála tamoo–himbuloa wau ito diila molahu tahuda lo Allahu Taála todelomo hilaanto.

2¹ Mongo walaú! Watia moluladei utie ode limongoli alihu timongoli diila maó mohutu dusa. Bo wonu woluo tamohutu dusa, yi ito o ngotaalio tamo poduulua, deúito–yito ti Isa Almasi taáadili boito; Tio mamó molohone mola olanto totalu lo Allahu Taála.

² Loú motimbulude li Isa Almasi boitolo duduu–saanto ilambungu–Lio. Wau diila bo duduu–saanto wambaó, tumbaó dusa ngoilanggubu umati lomanusia olo.

³ Wonu ito modungohe papaa–lentawalo Allahu Taála, uito tuotio deú ito motota lo Allahu Taála.

⁴ Taa umoloíya deú, "Watia motota lo Allahu Taála," bo diila modungohe to papaa–lentaa–Lio, tau boito mohimbuloa, wau Allahu Taála diaaluo todelomo hilaalio.

⁵ Bo taa u modungohe tahuda lo Allahu Taála, tau boito motoliángo Allahu Taála loú wimu–wimumuto tutu. Uitolo tuotio deú ito tumutumulo motituwau wolo Allahu Taála.

⁶Titaalo tita moloíya deú tio tumutumulo motituwau wolo Allahu Taáala, tio musi tumumulo moduduá liyodu li Almasi.

⁷Mongo wutato taótoliángo! U tiluladei laatia botie diila odelo palenta u bohu. Utie palenta deedelo umapilo tunggulai olimongoli anggadu timongoli tumulalo mai palacaya li Almasi; uitolo habari monto Allahu Taáala umaa ilodungohe limongoli tou dipolulio mai.

⁸Eleponu odito, palenta u tiluladei laatia botie bohu olo; sababu obanaliilio mowali oontonga tobatanga li Almasi wau tobatanga limongoli. Sababu u modiólomo helebe mooli wau tinelo u otutu malo tinelai.

⁹Taa umoloíya deú tio woluo todelomo mobaango bo tau boito donggo molonuó wutatio, tau boito donggo woluo todelomo u modiólomo dilumutu botia.

¹⁰Taa u motoliángo wutatio, tumutumulo todelomo mobaango tilinggula diaaluo penu boli hitua–tuawua to olio u mamoo sababu taawewo modehu ode delomo dusa.

¹¹Bo taa u molonuó wutatio, woluo todelomo modiólomo. Tio monao todelomo modiólomo, wau diila otaawalio

ode utoonu ponaówalio, sababu modiólomo boito mohutu olio diila mowali moóonto.

¹² Watia loluladei olimongoli, Mongo walaó, sababu dusa limongoli maa ilambungu sababu ti Almasi.

¹³ Watia loluladei olimongoli, Mongo dulaá, sababu timongoli mototaa-Lio tamawoluo tumulalo mai bohulio daá. Watia loluladei olimongoli Taa himuudawa, sababu timongoli malo poólaaheó Taa Moleeto.

¹⁴ Watia loluladei olimongoli Mongo walaó, sababu timongoli motota lo Allahu Taáala ti Paapa. Watia loluladei olimongoli, Mongo dulaá, sababu timongoli motota lo Tahuda umawoluo tumulalo mai bohulio daá. Watia loluladei olimongoli, taa himuudawa, sababu timongoli molotolo. Tahuda lo Allahu Taáala woluo todelomo hilaa limongoli, wau maa ilolaheó limongoli Taa Moleeto.

¹⁵ Diila maó potoliángo dunia botie, meaalo penu boli wolo uwoluo todelomo dunia botie. Wonu timongoli motoliángo dunia, timongoli diila motoliángo Allahu Taáala.

¹⁶ Totoonulalo hitua–tuawua uwoluo todelomo dunia botie -- u otohilaa pīli lomanusia u odusa, u oontonga tulusi otohilao wau uhepo mangga–mangga -- ngoáamilalo boito asalilio mai diila lonto Allahu Taáala, bo lonto dunia.

¹⁷ Dunia wau totoonulalo hitua–tuawua todelomio u otohilaa lomanusia, mamooli. Bo tamoduduá u otohilaa lo Allahu Taáala, debo tumutumulo dilumutu ohiheo–hiheolo maó.

¹⁸ Mongo walaú, pulito lojamani malembidei! Mapiloótaa olimongoli tou dipolulio mai deú Musu li Almasi mamei dungga mai; wau botia mailumeneto dadaata tau tahelo musu li Almasi. Uito tuotio deú pulito lojamani malembidei.

¹⁹ Mumuu–suwaalo li Almasi boito yito tau–tauwalo tamaa lololaa maó olanto, sababu timongolio otutuulio maó memangi diila taunto. Wonu timongolio taunto, tantu timongolio debo peé–peéenta wolanto. Bo timongolio lololaa maó olanto, alihu mopatatolo mai deú diaaluo penu boli ngotaa maó limongolio tatióotutua meituwoto to kaumunto.

²⁰ Bo timongoli malo lolimo Rohullah u tiluwataí dadaata daá li Isa Almasi wau

uito sababuulio timongoli ngoáamilalo motota lo pongaajali u otutu.

²¹ Oditolio watia loluladei utie olimongoli diila kalana timongoli diila motota lo pongaajali u otutu; bo tumbaó sababu timongoli malotota maó, wau otaawa limongoli olo deú diaaluo yimbulo todelomo pongaajali u otutu boito.

²² Tamohimbulo yito taa u moloíya deú ti Isa diila Olongia Tamoo–poáahua tapilo danti mai lo Allahu Taáala. Tau boito musu li Almasi; tio diila motolo akuo li Paapa meaalo to Walaó.

²³ Taa diila motolo akuo to Walaó, boliilio maó diila mololimo li Paapa olo. Wau taa motolo akuo to Walaó boliilio maó mololimo li Paapa olo.

²⁴ Sababu uito, habari umaa ilodungohe limongoli anggadu timongoli bohu–bohulio mai palacaya mamusi dahai limongoli tióotutua todelomo hilao. Wonu habari boito poótuoto limongoli tióotutua, timongoli malaito tumumulo motituwau wolo Walaó wau woli Paapa.

²⁵ Wau utieelo upilo danti mai li Almasi lohihilao to olanto; tutumulo u tutuulio tutu wau ohiheo–hiheolo maó.

²⁶ Tiluladei laatia utie olimongoli tomimbihu tau-tauwalo tadonggo hipo tolopania mohimbulo olimongoli.

²⁷ Bo tomimbihu olimongoli lohihilao, ti Almasi malo luwatai dadaata daá Rohu-Lio olimongoli. Wau ngotilonggadu Rohu-Lio woluo toli mongoli, diila palalu woluo taawewo mongaajali olimongoli. Sababu Rohu-Lio mongaajali olimongoli pasali lo totoonulalo u hitua-tuawua; wau wolo u pilo ngaajali-Lio boito otutu, diila bo yimbulo. Sababu uito, mamusi timongoli modungohe toú wolo u pilo ngaajali mai lo Rohu boito, wau mamusi timongoli debo tumutumulo motituwau woli Almasi.

²⁸ Oditolio, mongo walaú, poti tatapulo tumumulo motituwau woli Almasi, alihu de toú Tio meidungga mai, ito motaalua wo-Lio wolo obobuheli u lealeaatu, wau diila motituuó sababu moolito.

²⁹ Maílotaawa limongoli deú ti Almasi tilumumulo loduduá u otohilaa lo Allahu Taáala. Sababu uito musí otaawa maó limongoli olo deú timiídu tatumumulo moduduó otohilaa lo Allahu Taáala yito walaó Allahu Taáala.

3 ¹ Bilohi maó malo odito ponu lo Allahu Taáala olanto, tilinggula ito ilaku-Lio

odelo mongo wala-’lo. Wau memangi ito yito mongo walaó Allahu Taáala. Uitolo sababuulio dunia u moleeto botie diila motota olanto, sababu dunia diila motota lo Allahu Taáala.

² Mongo wutato taótoliángo! Ito botia yito mongo walaó Allahu Taáala, bo owowoluwonto de diipo mopatato. Bo otaawanto deú wonu ti Almasi meidungga mai, ito mamowali debo odelo Tio, sababu mamooóonto o-Lio todelomo owowoluwoa-Lio u otutuulio maó.

³ Ngoáamila tau u ohalapani utie toli Almasi, modaha batangalio alihu otu-otutuulo maó mantali, belesi monto dusa odelo woloolo mola ti Almasi mantali olo.

⁴ Taa u mohutu dusa, molambanga butoó Allahu Taáala; sababu dusa yito totala tobutoó Allahu Taáala.

⁵ Otaawa limongoli deú ti Almasi meidungga mai moluluta dusa lomanusia, wau deú diaaluo dusa todelomo batanga-Lio.

⁶ Ngoáamila tau tatumu-tumulo motituwau woli Almasi, diila mololaalaaita mohutu dusa. Taa u mohutu dusa

mololaalaaita, diila peéenta maó moóonto li Almasi meaalo mototaa-Lio.

⁷ Mongo walaú, diila maó polulia penu boli tatoonu tamopo lapalo olimongoli. Taa u mohutu kahandaki lo Allahu Taáala yito walaó Allahu Taáala debo odelo ti Almasi yito Walaó Allahu Taáala.

⁸ Bo taa u mohutu dusa mololaalaaita yito walaó Ibilisi, sababu Ibilisi odusa tumulalo mai bohulio. Masababu uitolo Walaó Allahu Taáala meidungga, deúito-yito mai mongantulu kalaja lo Ibilisi.

⁹ Taa u malowali Walaó Allahu Taáala, diila mololaalaaita mohutu dusa, sababu píili lo Allahu Taáala lohihilao woluo to olio. Wau sababu Allahu Taáala boito ti Paapalio, yi tio diila mowali mololaalaaita mohutu dusa.

¹⁰ Utieelo hiheedio towolota lomongo walaó Allahu Taáala wolo mongo walaó Ibilisi; titaalo tita diila mohutu kahandaki lo Allahu Taáala, meaalo diila motoliángo wutatio, yi tio diila walaó Allahu Taáala.

¹¹ Tumulalo mai bohulio mapilo tunggulio mai habari botie olimongoli; Ito musi motoliánga ngota timongota.

¹² Diila maó potihutu ito debo odelo tei Kain, tamalowali walaó Ibilisi wau lomate

wutatio lohihilao yila-yilateelo maó. Wolo sababuulio tei Kain lomate wutatio yila-yilateelo maó? Sababu susuu-aliyaalo u pilohutulio yito tilala, bo susuu-aliyaalo u pilohutu lowutatio boito otutu.

¹³ Sababu uito, mongo wutatuú, diila maó polinggolabu wonu taulo dunia botie molonuó olimongoli.

¹⁴ Otaawanto deú ito mailumualo lonto opopate, wau lolimbata ode tutumulo. Otaawanto uito, sababu ito motoliángo timongota lo wutatonto. Taa u diila motoliángo, boliilio maó donggo ilokawasa lo opopate.

¹⁵ Taa u molonuó wutatio yito tamoomatea mate-mateelo maó, wau otaawa limongoli deú ngotaalio lo tamoomatea mate-mateelo maó diila otutumulo u otutuulio tutu wau ohiheo-hiheolo maó.

¹⁶ Wolo dalalo botieelo otaawanto dudelo loú motoliángo ngota timongota: Ti Almasi malohudu mai tutumu-Lio olanto. Sababu uito, ito olo musi mohudu tutumulonto ode mongo wutatonto!

¹⁷ Wonu ngotaalio talebe-lebe moóonto wutatio u ilodiaáa, bo diila mohuto motulungi wutatio boito, woloolo mola tau

boito mowali moloíya deú tio motoliángo Allahu Taáala?

¹⁸ Mongo walaú! Ito diila maó potoliángo bo totunggilo meaalo bo toloíya wambaó. Mamusi ito motoliángo wolo toliángo u tutuulio tutu, u pobukutiolo wolo huhutuunto.

¹⁹ Odieelo mola dudelolio ito motota deú ito tuwo–tuwoto mongo walaó Allahu Taáala taótutu, wau hilaanto mowali moduóoto totalu lo Allahu Taáala.

²⁰ Otaawanto, deú wonu ito potaala lo hilaanto, pongotota lo Allahu Taáala lebe udaá wolo pongotota lo hilaanto, wau deú otaawa–Lio totoonulalo u hitua–tuawua.

²¹ Oditolio, mongo wutatuú, taótoliángo, wonu hilaanto diila mopotala olanto, ito mowali motaalua lo Allahu Taáala wolo obobuheli.

²² Wau wolo u pohilento monto o–Lio, mamu tapunto, sababu ito modungohe papaa–lenta–Lio wau mohutu wolo umoó sanangi hilaa–Lio.

²³ U pilomalanta–Lio mai to olanto yito: Ito musu palacaya to Wala–lo, deúito–yito ti Isa Almasi, wau ito musu mototoo–liánga, debo odelo uma pilomalentai li Almasi to olanto.

²⁴ Ngoáamila taa u modungohe totoonulalo palenta lo Allahu Taáala, tumumulo motituwau wolo Allahu Taáala, wau Allahu Taáala motituwau woli mongolio. Wau otaawanto deú Allahu Taáala tumutumulo lotituwau wolanto, sababu Tio malongohi mai Rohu–Lio to olanto.

4 ¹ Mongo wutato taótoliángo! Diila maó palacayai to ngoáamila tau tahi pongakua o Rohullah, bo tesiyopo timongolio u motota maó wolo Rohu uwoluo toli mongolio boito asaliilio mai lonto Allahu Taáala meaalo diila. Sababu dadaata nabi paluti mabolo to utoonulalo.

² Odieelo mola pohuliilio timongoli motota maó wolo uito Rohullah meaalo diila: Taa umotolo akuo deú ti Isa Almasi dungga–dungga mai ode dunia odelo manusia, tau boito o Rohu udungga–dungga mai monto Allahu Taáala.

³ Bo taa diila motolo akuo suáli botie tomimbihu li Isa, diila o Rohullah. Tau boito o rohu monto Musu li Almasi. Wutato malo dungohu deú rohu boito mamei dungga mai, wau botia tio mawoluo todelomo dunia botie.

⁴ Bo Mongo walaú, timongoli haku lo Allahu Taáala. Timongoli malo olaaheó tomongo nabi paluti; sababu Rohu uwoluo toli mongoli lebe okawasa wolo rohu uwoluo totau–tauwalo miliki lodunia botie.

⁵ Mongo nabi paluti boito helo bisala pasali susuu–aliyaalo lodunia, wau dunia lodungohe loíya limongolio, sababu timongolio miliki lodunia.

⁶ Bo ito yito mongo walaó Allahu Taáala; wau taa u motota lo Allahu Taáala, modungohe loíyanto. Taa u diila miliki lo Allahu Taáala, diila modungohe loíyanto. Odieelo mola dudelolio ito motota maó hiheedio towolota lo Rohu u mongohi pongaajali u otutu, wau rohu umopo lapalo.

⁷ Mongo wutato taótoliángo! Duloolo ito motoliánga ngota timongota, sababu toliángo asaliilio mai monto Allahu Taáala. Taa u motoliángo, deúito–yito walaó Allahu Taáala wau tio motota Allahu Taáala.

⁸ Taa u diila motoliángo, diila motota lo Allahu Taáala; sababu Allahu Taáala yito ponu.

⁹ Allahu Taáala malo pobilohei deú Tio lomonu olanto wolo lolao mai Wala–lo

tatuwa-tuwaulo ode delomo dunia alihu ito moótoduo tutumulo motimbulude to Wala-ílo boito.

¹⁰ Utieelo toliángo: Diila ito tamalo toliángo Allahu Taáala, bo Allahu Taáala talomonu mai olanto wau lolao Wala-ílo alihu motimbulude to o-Lio ito moótapu ambungu monto duduu-saanto.

¹¹ Mongo wutato taótoliángo, wonu Allahu Taáala momonu daá olanto ito olo musi motoliánga ngotaa timongota.

¹² Diaaluo penu boli ngota maó tapeéenta loóonto Allahu Taáala, bo wonu ito mototoo-liánga, Allahu Taáala motituwau wolanto wau ponu-Lio mowali wimu-wimumuto tutu todelomo batanganto.

¹³ Masababu Allahu Taáala malongohi mai olanto Rohu-Lio, yi otaawanto deú ito maa tilumumulo lotituwau wolo Allahu Taáala, wau Allahu Taáala tilumumulo lotituwau wolanto.

¹⁴ Amiaatia lohihilao maloóonto Walaó Allahu Taáala, wau amiaatia helo pohabari deú Tio yilao mai lo Allahu Taáala u lowali Olongia Tamoo-poáhua dunia botie.

¹⁵ Titaalo tita tamotolo akuwo deú ti Isa boito Walaó Allahu Taáala, Allahu Taáala

tumumulo motituwau wolo tau boito, wau tau boito olo tumumulo motituwau wolo Allahu Taáala.

¹⁶ Ito lohihilao motota wau palacaya toponu lo Allahu Taáala ode olanto. Allahu Taáala boito ponu. Taa u tutumulio kiluwasa lo toliángo, tau boito lotituwau wolo Allahu Taáala wau Allahu Taáala lotituwau wolio.

¹⁷ Ponu pilowali–Lio mai wimu–wimumuto tutu todelomo batanganto, alihu woluo buhelinto to Dulahe Pomutoáalo. Woluo buhelinto, sababu tutumulonto todunia botie tutuuwauwa debo odelo tutumuli Almasi.

¹⁸ Taa u moólaasa ponu lo Allahu Taáala, diila motota loú moohe; sababu ponu u wimu–wimumuto tutu mopo hinggi totoonulalo pongolaasa u moohe. Oditolio malo ilaalo deú taa diipo loólaasa maó ponu lo Allahu Taáala wolo wimu–wimumuto tutu wonu tau boito moohe motaalua wolo Dulahe Pomutoáalo.

¹⁹ Ito motoliángo, sababu Allahu Taáala maleimulo lomonu mai olanto.

²⁰ Wonu ngotaalio moloíya, "Watia motoliángo Allahu Taáala," bo tio diila motoliángo wutatio, tau boito

mohimbuloa. Sababu taa udiila motoliángo wutatio tailoo–ntongalio, diila pongalo aakali mowali motoliángo Allahu Taáala tadiila iloontongalio.

²¹ Sababu uito, utieelo palenta uilohi mai li Almasi to olanto: Titaalo tita tamo toliángo Allahu Taáala musí olo motoliángo wutatio.

5 ¹ Taa u palacaya deú ti Isa yito Olongia Tamoo–po@aahua tapilo dantia mai lo Allahu Taáala, tau boito walaó Allahu Taáala. Taa u motoliángo ngotaalio lotiyamo, motoliángo walaío olo.

² Wolo dalalo botieelo otawaanto maó deú ito motoliángo mongo walaó Allahu Taáala: Ito motoliángo to Allahu Taáala wau modungohe totoonulalo palenta–Lio.

³ Sababu, motoliángo to Allahu Taáala boliilio maó modungohe totoonulalo palentaa–Lio. Wau totoonulalo palenta–Lio diila mobuheeto olanto.

⁴ Sababu timiídu walaó Allahu Taáala mambo mopoólaahe dunia u moleeta botie. Wau ito mopoólaahe dunia wolo iimaninto.

⁵ Tatoonu tamowali mopoólaahe dunia? Bo taa palacaya deú ti Isa yito Walaó Allahu Taáala.

⁶ Ti Isa Almasilo tamei dungga mai ode dunia wolo taluhu popolihu-Lio wau wolo duhu lo opopate-Lio. Tio meidungga mai diila bo wolo taluhu wambaó, bo wolo taluhu wau duhu. Wau Rohullah lohihilao tamongohi sakusi deú uito otutu, sababu Rohu diila peéenta maó mohimbulo.

⁷ Mohelu totolu sakusi: Rohullah, taluhu wau duhu -- toto-totooolulo boito mongohi sakusi u tutuuwauwa.

⁸ (5:7)

⁹ Ito palacaya to ososakusi lomanusia, bo ososakusi lo Allahu Taáala lebe motoheeto. Wau uitolo ososakusi u mailohi mai lo Allahu Taáala pasali lo Wala-ílo.

¹⁰ Sababu uito, taa palacaya to Walaó Allahu Taáala, malo lolimo ososakusi boito todelomo hilaalio; bo taa diila momalacaya to Allahu Taáala, malo nganggapu tutuuwauwa tutu suáliilio wolo Allahu Taáala tamoo-himbuloa, sababu tio diila palacaya toú wolo upilo tahuda mai lo Allahu Taáala pasali lo Wala-ílo.

¹¹ Uti-utieelo ososakusi boito: Allahu Taáala malongohi mai olanto tutumulo u tutuulio tutu wau ohiheo-hiheolo

maó, wau Wala-ílo yito pilobutua mai lo tutumulo boito.

¹²Taa o Walaó Allahu Taáala, o tutumulo boito; wau taa diila o Walaó Allahu Taáala, diila o tutumulo boito.

¹³Watia loluladei olimongoli tapalacaya to Walaó Allahu Taáala, alihu otaawa limongoli deú timongoli maílo tutumulo u tutuulio tutu wau ohiheo-hiheolo maó.

¹⁴Wau ito buheli motaalua wolo Allahu Taáala sababu ito yakini Tio modungohe duáanto, wonu ito mohile penu boli wolo u motuuúde wolo kahandaki-Lio.

¹⁵Sababu otaawanto deú Tio modungohe olanto wonu ito momolohone o-Lio, yi otaawanto olo deú Tio mongohi mai olanto wolo u polohonento mola o-Lio.

¹⁶Wonu oontonga maó limongoli tala ngota lo timongota Nasara mohutu dusa udiila moósababu tau boito oolia lo tutumulo u tutuulio tutu wau ohiheo-hiheolo maó, mamusi timongoli moduá mola ode Allahu Taáala; wau Allahu Taáala mamongohi mai tutumulo boito olio. Utie motuhatawa woli mongolio u dusalio diila moósababu olimongolio oolia lo tutumulo boito. Bo woluo dusa umoó sababu tau oolia lo tutumulo boito. Pasali losuáli boito

watia diila moloíya mai deú timongoli musí moduá mola ode Allahu Taáala.

¹⁷ Ngoáamila huhutu u talatala yito dusa, bo woluo dusa udiila moósababu tau oolia lo tutumulo u tutuulio tutu wau ohiheo–hiheolo maó boito.

¹⁸ Otaawanto deú ngoáamila tau tamalowali mongo walaó Allahu Taáala, diila molo–laalaita hipohutua dusa, sababu Walaó Allahu Taáala moduólai olio, wau Taa Moleeto diila mowali mohutu wolo–wolo to olio.

¹⁹ Otaawanto deú ito haku lo Allahu Taáala, eleponu ngoilanggubu dunia botie to walungo kawasa lo Taa Moleeto.

²⁰ Otaawanto deú Walaó Allahu Taáala malei dungga mai wau malongohi pongotota to olanto, alihu ito motota lo Allahu Taáala taótutu. Ito tumutumulo motituwau wolo Allahu Taáala taótutu, wau tumutumulo motituwau wolo Wala–lo Isa Almasi. Utieelo Allahu Taáala taótutu, wau utieelo tutumulo u tutuulio tutu wau ohiheo–hiheolo maó.

²¹ Mongo walaú, powalahe maó batanga limongoli monto totoonulalo balaahala!

2 Yohanes

1 ¹ Odeli Ibu tatilulaoto Allahu Taáala, wau ode mongo walaí Ibu. Tulade botie lonto olaatia, taúwa lojamaá tatióotutua motoliángo olimongoli. Diila bo watia wambaó, bo ngoáamila taa u motota lo Allahu Taáala taótutu, motoliángo olimongoli olo.

² Sababu Allahu Taáala bilubiluloá todelomo hilaanto, wau malaito woluo wolanto ohiheo–hiheolo maó.

³ Pohileaala duá ito wohia–Lio mai balakati, odehu hilaó wau salaamati lo Allahu Taáala ti Paapanto, wau li Isa Almasi Walaí Paapa boito. Pohileaala duá ngoáamilalo boito milikiyonto wolo hilaa tióotutua wau belesi wau wolo toliángo.

⁴ Watia leengahe daá lotota deú woluo mongo walaí Ibu tahitumula loduduá pongaajali lo Allahu Taáala, debo odelo umapilo malentai lo Allahu Taáala to olanto.

⁵ Sababu uito, Ibu, pohile lowatia lou tióotutua alihu ito ngoáamila mototoo–liánga. U tiloóowoli mai lowatia botie diila

tuwaulio lopalenta u bohu; palenta botie mailohi mai olanto tumulalo bohulio ito palacaya.

⁶ Motoliángo boliilio maó tumumulo moduduá totoonulalo palenta lo Allahu Taáala. Wau palenta umaa ilodungohe limongoli tumulalo mai bohulio yito deú timongoli musi tumumulo loú motoliánga ngota timongota.

⁷ Dadaata tamoo-himbuloa malo loóopo ode ngoilanggubu dunia. Timongolio yito tau-tauwalo tadiila motolo akuo deú ti Isa Almasi meidungga mai ode dunia odelo ngotaalio lomanusia. Taa udebo odelo uito yito tamoo-himbuloa, wau Musu li Almasi.

⁸ Sababu uito, poódahailo diila bolo timongoli oolia loú wolo umaa tilolopani mai lamiaatia olimongoli. Potolo panilo alihu timongoli mololimo monto Allahu Taáala wuupamu ngoáamilalo.

⁹ Taa u diila motidihu to pongaajali li Almasi, bo tumbaó molambanga tou wolo u pilo ngaajali li Almasi, tau boito diila o Allahu Taáala. Taa u debo todelomo pongaajali li Almasi, bolilio maó motolo miliki mopio Allahu Taáala ti Paapa bolito Walaó.

¹⁰ Sababu uito wonu woluo tamonaó mai wau mopohabari olimongoli pongaajali udiila pilo ngaajali li Almasi, diila maó tolimoa tau boito todelomo belemu meaalo mongohi salamu olio.

¹¹ Sababu tamongohi salamu totaa debo odelo uito moduduá olo peé-peéenta wolo tau boito todelomo mohutu huhutu u moleeto.

¹² Dadaata daá upalalu poótaa mai lowatia olimongoli, bo lasaalio lebe mopiohu diila maó moli tuladu. Watia mohalapu moó biilohe wau mobisala lohihilao woli mongoli, alihu hilaa limongoli tióotutua meengahe.

¹³ Mongo walaó monto wutato taabua li Ibu tatilulaoto olo lo Allahu Taáala, lolao salamu odeli Ibu.

3 Yohanes

1 ¹ Wutato Gayus taótoliángo!
Watia, taúwa lojamaá, tatióotutua
motoliángumu,

² moduá mola pohileaala duá Wutato
seseehati, wau ngoáamilalo hipiiöhe
wolemu, tutuuwauwa debo odelo
nyawamu piopiohe wambaío.

³ Watia sanangi daá tou dengolo lota
wutato Nasara leidungga mai wau helo
poótaa olaatia malo odito tatapu wau
molotolo hilao lo Wutato to Allahu Taáala
taótutu, sababu memangi Wutato laito
tumutumulo moduduá pongaajali lo
Allahu Taáala.

⁴ Diaaluo ulebe moéengahe olaatia, lou
loódungohe deú mongo walaó lowatia
hitumula loduduá pongaajali lo Allahu
Taáala.

⁵ Wutatuú! Wutato odito tatapu wau
molotolo hilao todelomo kalaja u pilohutu
lo Wutato ode mongo sahabati timongota
lo Nasara; tumbaó taulo Nasara tadiipo
otaawa lo Wutato olo, hebilaya lowutato.

⁶Timongolio malo poótaa tojamaá totambati lamiaatia tomimbihu toliángumu. Tulungia maó timongolio alihu mowali mopo tolonga mola lononaó limongolio wau loú odito moó sanangi hilaa lo Allahu Taáala,

⁷sababu todelomo nonaó limongolio u momaya li Almasi, timongolio diila mololimo bubantu penu boli wolo monto tau–tauwalo tadiila motota lo Allahu Taáala.

⁸Sababu uito, ito tau–tauwalo Nasara musu motulungi maó mongo sahabati timongota lo Nasara tadebo odelo uito, alihu ito mowali moduduá todelomo tolopani limongolio umopo loladu pongaajali u otutu monto Allahu Taáala.

⁹Watia malo luladeó tulade ulimbu–limbu ode jamaá, bo tei Diotrepes taóhilaa mowali taúwa todelomo jamaá, diila mohuto moduduá olaatia.

¹⁰De wonu watia monaó mai, watia mamu monggali totoonulalo hitua–tuawaua umaa pilohutulio, deúito–yito pasali lo susu–aliyaalo u moleeto wau yimbulo u yiloiyalio pasali olamiaatia! Bo ngoáamilalo boito diipo motuuúde to olio. Toú mongo sahabati timongota lo Nasara

boito lonaó mai, tio diila lohuto lololimo olimongolio. Tumbaó tio helodini tahi huutowa mololimo mongo wutato boito, wau tio helo poáhu tau-tauwala boito yilumualo lonto jamaá!

¹¹ Wutato taótoliángo, diila maó duduí wolo u moleeto. Duduí maó wolo u mopiohe. Taa hipohutua umopiohe yito miliki lo Allahu Taáala. Wau taa hipohutua u moleeto diipo motota lo Allahu Taáala.

¹² Ngoáamila tau hipomujia olei Demetrius. Tumbaó Allahu Taáala olo helomuji olio. Amiaatia olo lomuji olio, wau otaawa lo Wutato deú wolo upilo tunggulai lamiaatia mowali palacayalo.

¹³ Dadaata daá upalalu loíya mai laatia olemu, bo laasa lowatia lebe mopiohu diila moli tuladu.

¹⁴ Watia mohalapu diilalo mohiheo poli mamó dunggaya wolemu, wau ito maalato mobiisalawa. (1-15) Pohileaala duá Eeya mobalakati mai to Wutato. Mongo sahabatimu totambati lowatia botie lolao salamu olemu. Potunggula maó salamu laatia ode ngoáamila sahabatinto ngota-ngota.

Yudas

1 ¹ Mongo wutato tamaa tiliango wau tapilonua daá lo Allahu Taáala ti Paapa, wau dilaaha duóli Isa Almasi. Odelo wato li Isa Almasi watia -- Yudas -- wutatee Yakobus,

² mohalapu; Pohileaala duá Allahu Taáala mongohi mai balakati, odehu hilao wau salaamati olimongoli loú laba-labaalo daatalio.

³ Mongo wutato taótoliango! Watia tióotutua omakusudu moluladei tulade ode limongoli tomimbihu oáahu upeé-peéenta máilo laasanto. Bo botia watia molaasa ilowuntula u monaseehati mai olimongoli wolo tulade botie alihu timongoli tulusi mohipate duólo iimani u mapeéenta yilohi mai lo Allahu Taáala u ohiheo-hiheolo maó ode umati-Lio.

⁴ Sababu loú diila otaawanto, woluo tau-tauwalo omakusudu utantu-tantu u tumuwotai ode huunginto. Timongolio yito tahi luusawa u hemo poboboolió habari pasali odehu hilao lo Allahu Taáalanto, u moótapu hiyango mopomukaó wuntulo

hilao u moóohuú limongolio. Wau timongolio diila mololimo li Isa Almasi, tuwa–tuwaulo taókawasa wau Eeyaanto. Anggadu muloololio mai hukuumani ode limongolio maa nilubuwati lo Kitabi.

⁵ Ngoáamilalo boito mailotaawa limongoli. Bo watia ohilaa mopoéelai olimongoli tomimbihu woloolo mola Eeya lopoáahu umati lo Isiráilu lonto lipu lo Masiri, bo lapatio maó helo pobinasa tau–tauwalo tadiila palacaya towolota limongolio.

⁶ Eelai mola olo mamaa–laíkatiyalo tailimbata eenggade lo okokawasa limongolio, tilinggula lonaó lololaa maó tambati pilo tibiluloá limongolio. Allahu Taáala lomungu mamaa–laíkatiyalo boito wolo lante ubakaa, todelomo tambati u modiólomo to walungo huta. Mola teto timongolio tataahangi tulusi dilumutu hukuumani podehuwolo odeitaati mongolio de to Dulahe upolu–polutuó boito.

⁷ Eelai mola olo kota lo Sodom wau Gomora wau kokoo–tawaalo topalitio, u tuangio helohutu susuu–aliyaalo debo odelo u pilohutu lo mamaa–laíkatiyalo boito. Timongolio helohutu susuu–

aliyaalo u huloto wau moleeto, tilinggula timongolio silikisaa wolo hukuumani lotulu u ohiheo–hiheolo maó, u powaliyolo odelo poéela duólo taa ngoáamila.

⁸Odito olo tau–tauwala boito hipo aáangania tilinggula timongolio helohutu dusa tobatanga limongolio lohihilao. Timongolio momilohe dupadupapa okokawasa lo Allahu Taáala wau hemohina to motiídu mahaluku u molamahu tosologa.

⁹Tei Mikhael lohihilao, taataú–taúwa to maaaa–laíkatiyalo, diipo peéenta maó helohutu debo odelo uito. Touú tio lotataameta wolo Ibilisi todelomo polo hiihede pasali lo tatoonu tamaa moótapu maó milate lei Musa, tei Mikhael diila buheli momutoó Ibilisi wolo loíya u mohina. Tei Mikhael bo lolóiya maó, "Eeya mamó ngantingai olemu!"

¹⁰Bo wolo popoolo–hinawalo, tau–tauwala boito heloluhu totoonulalo hitua–tuawua udiila opahamua limongolio. Timongolio tutuuwauwa debo odelo bibii–natangiyalo udiila o aakali, u motota susuu–aliyaalo wolo wuntulo hilaalio. Bo tumbaó susuu–aliyaalo boitolo uloó aantulu olimongolio.

¹¹ Tilopotala timongolio! Timongolio malo duduá dalaalio lei Kain. Alihu moótapu doi, timongolio helopo topotala batanga ode lumbaya umoó lapalo, tutuuwauwa debo odelo tei Bileam. Wau timongolio olo ilaantululio sababu helo malakalo debo odelo tei Korah.

¹² Tou timongoli mohutu potihunggu lo totamelo, píili lotau–tauwala boito moólonuó to wolotamu. Sababu timongolio helo lamela wolo motula lou diila wolitaó–wolitaó, wau bo mopolohuna daá batanga lohihilao. Timongolio debo odelo heengo u hiliipa lodupoto, bo diila mopo tuhutai didi. Timongolio olo debo odelo bungo lo ayu udiila momungo eleponu sembo lou momungo; bubuu–ngowaalo ayu umaa bilunggato waátio wau mailate sama–samaata.

¹³ Tutuuwauwa debo odelo buóolo moóhuú daá todeheto mopotoodei putiio, odito olo timongolio mopoó putió totoonulalo huhutu u moóolito. Timongolio yito debo odelo bibii–natangiyalo u helonaó ode utoonulalo maó udiila otatapua poti biluloáalo umaa pilopo dapato tambatilio lo Allahu

Taáala todelomo diólomo ulaba-labaalo moóti hela hapato u ohiheo-hiheolo maó.

¹⁴ Tei Henokh, wali opitulio lei Adamu, tou muloololio mai mapeéenta lonubuwati mai pasali lotau-tauwalo boito. Tei Henokh lolóiya, "Bilohi, Eeya mamei dungga mai wolo hilihu-lihua malaíkati-Lio tamantali,

¹⁵ mai momutoó ngoáamila tau. Eeya mamu hukuumani tau-tauwala moleeto sababu totoonulalo huhutu limongolio u hiluusawa. Wau Tio mamu hukuumani taódusa wau tajuluhaka sababu ngoáamila lolóiya u mohina uilóiya limongolio."

¹⁶ Tau-tauwalo boito laito wambaó hihungota wau hemo potala taa wewo. Timongolio tumutumulo hipo duduáawa totoonulalo otohila limongolio u odusa. Timongolio hipo latabua tomimbihu batanga lohihilao, wau hipohamawa hilaa lotau alihu moótapu paéeda.

¹⁷ Bo mongo wutatuú taótoliángo, eelai mola mawolo u muloololio mai uilóiya lomongo rasulu lo Eeyaanto Isa Almasi.

¹⁸ Timongolio lopoótaa mai leimulo olemu deú topulito jamani malumenetai tau-tauwalo tamaa mohenteá olimongoli, deúito-yito tahitumula loduduá totoonulalo otohila limongolio u odusa.

¹⁹ Timongolio botieelo tau–tauwalo tahemo potoodei polobuálawa. Timongolio diila kiluwasa lo Rohullah, bo loú totoonulalo otohílaa lowatedo tomimbihu dunia.

²⁰ Bo timongoli, Mongo wutatuú, taala maó tulusi tutumulumu patopatoáa to palacayamu li Isa Almasi. limanimu boito mantali daá. Sambela uito poduáalo mola wolo kawasa lo Rohullah,

²¹ wau poti tumulolo laito todelomo ponu lo Allahu Taáala ngotilonggadu timongoli hemohima odehu hilao li Isa Almasi Eeyaanto, tamaa mongohi mai olimongoli tutumulo u tutuulio tutu wau ohiheo–hiheolo maó.

²² Ode tau–tauwalo tahilingua hilaalio, mamusi timongoli mopo biloheó odehu hilao.

²³ Dedeáalo tau lumuwalo monto delomo tulu u mopoáahu olimongolio. Ode tau–tauwalo wewolio mamusi timongoli mopo biloheó odehu hilao tunuhela loú laasa moohe, bo lonuí maó tumbaó boó limongolio olo umaa kilotolo limongolio wolo ilotohilaa limongolio u odusa.

²⁴ Allahu Taáala, tamambo modaha mai alihu timongoli diila modehu, wau

tamambo modelo olimongoli ode talu-Lio u molamahu wolo weengahe wau loú diila oáaibu.

²⁵ Tiolo Allahu Taáala tuwa-tuwaulo, Tamoo-poáahua olanto motimbulude li Isa Almasi Eeyaanto. Tiolo Allahu Taáala tamolamahu, udaá, okawasa wau otilihula anggadu muloololio mai daá dilumutu botia wau u ohiheo-hiheolo maó! Amin.

Wahyu

1 ¹ Tuango buku botie tomimbihu wolo u piloílaalo li Isa Almasi pasali popoo–louútyalo u mamotoduo mai. Allahu Taáala lopoótaa li Almasi alihu Tio mopo biloheó tomongo wato lo Allahu Taáala wolo umusi huáa motoduo mai. Ti Isa Almasi malolao malaíkati–Lio odelei Yahya, wato–Lio mola lopoótaa popoo–louútyalo boito olio.

² Yi tei Yahya olo helo hungguli mai ngoáamila u iloontongalio boito; wau utieelo dudulohuhio tomimbihu tahuli lo Allahu Taáala upiloó toheeto li Isa Almasi lotimbulude to ososakusi–Lio.

³ Potisanangilo tutu taa u mopobaca wau taa u modungohe habari nubuwati lobuku botie wau taaáti tou wolo u tulatuladu todelomio. Sababu diilalo mohiheo ngoáamilalo boito mamotoduo mai.

⁴ Mongo wutato tawoluo to opitu jamaá tomadala lo Asia! Watia, Yahya, mohalapu olimongoli ponuwa mai lo balakati wau moáahu monto Allahu Taáala -- deúito–yito Tio tawoluo, tamawoluo,

wau tawoluo mololaalaita, -- wau olo monto opitu rohu uwoluo totalu lotambati huhuloá li olongia lo Allahu Taáala,

⁵ wau monto li Isa Almasi sakusi taa tatapu wau molotolo hilao. Tiolo tabohu-bohulio muli pilotumulai monto opopate wau Tio olo taókawasa tomongo olongia lodunia. Ti Isa momonu olanto, wau wolo opopate-Lio Tio lopo lopato olanto lonto duduusaanto,

⁶ wau lopowali olanto tala tuwau bangusa tolomodu lowali mongo iimamu, tamomaya Allahu Taáala, ti Paapa-Lio. Ti Isa Almasi boitolo taúdaá wau okawasa u ohiheo-hiheolo maó. Amin!

⁷ Bilohi, Tio dunga-dungga mai yilanggube loheengo! Ngoáamila tau mamooónto o-Lio, leituwoto olo timongolio tamalo mituáa o-Lio. Totoonulalo bangusa todunia mamohilimuto sababu Tio. Yaa, tantu! Amin!

⁸ "Waúlo tabohulio wau tapulitio," tahuda lo Allahu Taáala tawoluo, tamawoluo, wau tawoluo mololaalaita, Taa Laba-labaalo kawasa.

⁹ Watia, Yahya, wutatumu tango paladu woli mongoli todelomo polodutolo u ilolaasawa lotimiidu tahiduduá li Almasi.

Ito taaba modutolo odelo umati miliki-Lio. Watia pilomaílio ode pulo Patmos sababu watia helo pololadu tahuli lonto Allahu Taáala, upiloó toheto li Isa lotimbulude to ososakusi-Lio.

¹⁰To dulahe Eeya, watia kiluwaasa lo Rohullah tulusi watia loódungohe suala daá -- debo odelo tingohu torompeti -- hemo tahuda mai towulea lowatia.

¹¹Suala boito lotahuda mai, "Tulade maó wolo u iloontongamu, wau lawola mola buku boito ode pitu jamaá deúito-yito: ode Epesus, Smirna, Pergamus, Tiatira, Sardis, Piladelpia, wau Laodikia."

¹²Watia loili maó ode wulea u momilohe tatoonu uito tahemo bisala mai olaatia. Lapataó watia loóonto pitu oáato tohe u pilohutu lonto hulawa.

¹³Tohuungo oáato totoo-heyaaalo boito tihutihulo ngotaalio taóontonga debo odelo manusia. Tio pakepake jumba u hayaío demola oáato. Toduhe-Lio Tio pakepake taúbu duhelo hulawa.

¹⁴Huwo-lo moputió debo odelo lambuto himba, debo odelo putiío pini. Mato-Lio leíleíta debo odelo tulu;

¹⁵ oáa-Tio moputió leíleíta debo odelo tombaha u tilumbila. Sualaa-Lio debo odelo bulontungo taluhu podehu uleidaá.

¹⁶ Uluú-Lio olowala dihudihu pitu poliyama, wau monto ngango-Lio yilumualai wamilo tuwau molalito u omato duluso. Baya-Lio motinelo debo odelo mato lodulahu toú mohulonuu tutu.

¹⁷ Toú watia loóonto maó o-Lio, watia leidambaó totalu-Lio debo odelo tailate. Bo Tio lopodutu mai uluú-Lio olowala olaatia tulusi lotahuda, "Diila maó oohe! Waúlo tabohulio wau tapulitio.

¹⁸ Waúlo Tio tatumu-tumulo! Waú mailate, bo bilohilo, Waú tumutumulo u ohiheo-hiheolo maó. Waú okawasa to opopate, wau todunia lotaamate.

¹⁹ Sababu uito, tulade maó susuu-aliaaalo u iloontongamu, deúito-yito susuu-aliaaalo uwoluo masaatia botie, wau susuu-aliaaalo u de mamotoduo mai.

²⁰ Utieelo hitua-hituawua u milakudu hetuuólo loú pitu poliyama u iloontongamu to uluú olowala-Ú, wau monto opitu oáato tohe hulawa boito: Pitu poliyama boito yito maaaa-laíkatiyalo opitu jamaá, wau pitu oáato tohe boito yito opitu jamaá boito."

2¹ "To malaikati lojamaá to Epesus, tulade mola odie: Utieelo tahuli monto o-Lio tadihu-dihu opitu poliyama to uluú olowala-Lio, wau lonaó towolota lo opitu oáato tohe hulawa boito.

² Otaawa-Ú wolo u hepohutuo limongoli: Timongoli hipo kalajawa tióotutua wau timongoli sabali daá. Otaawa-Ú deú timongoli diila mongohi hilao totaa moleeto. Wau tau-tauwalo tahi pongakua batangalio rasulu lebe-lebe pomaó diila, matilesi limongoli, wau lotapu limongoli deú timongolio mohimbuloa.

³ Timongoli sabali wau timongoli helo dutolo sababu Waú, wau timongoli diila lopulito halapani.

⁴ Bo utie kabalatani-Ú to olemu; Timongoli diilalo motoliánga ola-Ú debo odelo u bohulio mai.

⁵ Sababu uito, poótoloma maó malo odito lamingio odudehu limongoli! Polilihulo monto duduusaamu, wau pohutuwalu wolo u hepilohutu limongoli toú bohulio mai. Wonu diila, yi Waú mamonaó mai ode olemu wau momahuto oáato tohemu boito monto tambatilio.

⁶ Bo woluo hitua-tuawua u mopiohe olimongoli, deúito-yito: timongoli

molonuó huhutu lo tahiduduá olei Nikolaus, tailonuúu-Ú olo.

⁷Titaalo tita tamoó dungohu, mamusi mopoótuoto wolo u tilahuda mai lo Rohullah ode jajaa-maáalo! Timongolio tamoóhaama, mapoluasiyo-Ú molamela hungo monto bungo lo ayu tutumulo to ilengi lo bubuu-ngawaalo Allahu Taáala."

⁸"To malaíkati lojamaá to Smirna, tulade mola odie: Utieelo tahuli monto o-Lio tabohulio wau tapulitio -- tamailate wau luli tilumumulai.

⁹Otaawa-Ú totoonulalo polodutolo limongoli; otaawa-Ú timongoli mosikini -- bo otutuulio maó timongoli kaya! Otaawa-Ú pipii-tanawalo u pilomukaío olimongoli lotau-tauwalo tahi pongakua batangalio Yahudi, lebe-lebe pomaó diila; timongolio yito umati lo Ibilisi!

¹⁰Diila maó oohe to dudutolo udiilalo mohiheo musi olaasawa limongoli. Eelai maó, Ibilisi mamopo tuwoto ngotayadi mongoli ode delomo tutupa u mohimontala olimongoli. Timongoli mamodutolo mopulu hui mola hiheolio. Mamusi timongoli tatapu wau molotolo hilao to ola-Ú tunggula mate, yi Waú mamongohi mai olemu tutumulo u

tutuulio tutu wau ohiheo-hiheolo maó odelo palaseni lo ohohaama.

¹¹ Titaalo tita tamoó dungohe, mamusi mopoó tuoto wolo u tilahuda mai lo Rohullah to jajaa-maáalo! Timongolio tamoóhaama, sama-samaata diila tamo dutola wolo-wolo to opopate u oluolio."

¹² "To malaíkati lojamaá to Pergamus, tulade mola odie: Utieelo tahuli monto o-Lio tadihu-dihu wamilo molalito omato dulo.

¹³ Otaawa-Ú touútoonu pilo tibiluloá limongoli, deúito-yito totambati huhuloá lo Ibilisi. Timongoli tatapu wau molotolo hilao to ola-Ú. Tumbaó tou tei Antipas, sakusii-Ú taatapu wau molotolo hilao boito, pilatelio yila-yilateelo maó totalumu tomalakasi lo Ibilisi, timongoli diila lomahe deú timongoli palacaya to ola-Ú.

¹⁴ Bo boli odito woluo dengolo suáli udiila moósanangi ola-Ú monto olimongoli: woluo ngotayadu tau towolota limongoli tamalo duduá wolo u pilo ngaajali lei Bileam. Tei Bileam helo ngaajali olei Balak woloolo mola mopodehu umati lo Isiráilu ode delomo dusa; wolo lomiyo olimongolio lolamela uáalo u mapilo

dewolio ode balaahala wau lohutu
susuu–aliyaalo u huloto.

¹⁵ Odito olo woluo towolota limongoli
tahe lotidihi to pongaajali lo tahiduduá
olei Nikolaus.

¹⁶ Sababu uito, polilihulo monto duduu–
sawaalo limongoli! Wonu diila, bolo
ngopeé mola Waú mamei dungga mai ode
limongoli wau mai moluhu tau–tauwala
boito wolo wamilo uwoluo to tunggilu–Ú.

¹⁷ Titaalo tita tamoó dungohu, mamusi
mopoó tuoto wolo u tilahuda mai lo
Rohullah to jajaa–maáalo! Timongolio
tamoóhaama, mapoluasiyo–Ú molamela
manna u tutuuó, wau ngota–ngota
mamololimo monto ola–Ú botu moputió
tuwau. To botu boito tulatulade tanggulo
tuwau u bohu, udiila otaawa penu boli
lotatoonu, ngopohia lotaa mololimo maó."

¹⁸ "To malaíkati lojamaá to Tiatira, tulade
mola odie: Utieelo tahuli monto Walaó
Allahu Taáala, taamato–Lio léiléíta debo
odelo tulu, wau oáa–Tio moputió léiléíta
debo odelo tombaha tilumbila.

¹⁹ Otaawa–Ú ngoáamila u pilohutu
limongoli -- Otaawa–Ú timongoli
motoliángo timongotamu, timongoli
tatapu wau molotolo hilao, timongoli

hemo kalaja, wau timongoli sabali modutolo. Otaawa-Ú timongoli botia lebe dadaata maó helo kalaja loú muloololio mai.

²⁰ Bo utie kabalaatani-Ú olimongoli: Timongoli helongohi hilao toli ljebel, talongaku taabua tailahula mai lo Allahu Taáala boito. Madilaata mongo wato-Ú taílaa-kaliilio wau ilajaliilio u helohutu huloto wau lolamelo uáalo umaa pilodewo ode balaahala.

²¹ Mailohi-Ú mai olio waktu u molilihu monto duduu-saalio, bo tio diila lohuto lohuheli helohutu susuu-aliyaalo u huloto boito.

²² Poótoloma maó! Waú mamopo banti olio tunggula mongongoto totambati potuluhelo. Teto tio wau tau-tauwalo tahi pojinawa wolio mamó dutolo daá. Ngoáamilalo boito mapo hutuwo-Ú mai botia -- ngopohia wonu timongolio mohuheli mohutu susuu-aliyaalo u moleeto peé-peéenta wolio.

²³ Tahiduduá olio mapate-Ú olo mate-mateelo maó alihu ngoáamila jamaá mongalati deú Waúlo Tio moloneá pikiilangi wau hilaa lomanusia. Timongoli

mabalasiya–Ú moduduá huhutu limongoli ngota–ngota.

²⁴ Bo timongoli tawewo–wewolio to Tiatira diila helo duduá pongaajali u moleeta boito, wau diila helo balajali totoonulalo ilimi lo Ibilisi. Waú motahuda mai deú Waú diila tamo duhengai olemu banta umopoó buheeto olemu.

²⁵ Bo tunggula de toú Waú meidungga mai, mamusi timongoli debo moduduá wolo umaa mililiki limongoli.

²⁶ Timongolio tamoóhaama, wau u demola pulitio debo hemohutu wolo u kilahandaki–Ú, mawohiya–Ú mai kawasa u tutuuwauwa debo odelo u tilolimo–Ú mai lonto li Paapa–Ú. Timongolio mamololimo kawasa monto ola–Ú u momalenta babaa–ngusawalo wolo tunggudu wate, wau u mopo aantulu babaa–ngusawalo boito debo odelo ulongo huta.

²⁷ (2:26)

²⁸ Timongolio mamololimo poliyama tiimuru monto ola–Ú.

²⁹ Titaalo tita tamoó dungohu, mamusi mopoó tuoto wolo u tilahuda mai lo Rohullah to jajaa–maáalo!"

3 ¹ "To malaíkati lojamaá to Sardis, tulade mola odie: Utieelo tahuli monto

o-Lio taa ohuúwo lo opitu rohu monto Allahu Taáala wau opitu poliyama boito. Otaawa-Ú wolo upilohutu limongoli. Ualio maó timongoli tumutumulo, lebe-lebe pomaó timongoli yilate!

² Sababu uito, pobongulo, wau poótoheeta maó wolo udonggo woluo toli mongoli toú uito diipo yilate sama-samaata. Sababu malotapu-Ú deú wolo u pilohutu limongoli, dipoolu penu boli tuwau maó u wimu-wimumuto tutu totalu lo Allahu Taáala.

³ Oditolio, muli poótoloma maó wolo u mapilo ngaajali olimongoli muloololio mai wau wolo umaa ilodungohe limongoli. Ponaówa maó uito wau polilihulo monto duduusaamu. Wonu timongoli diila mobongu, Waú mamei dungga mai debo odelo tamootaówa; wau diila taótaawa limongoli omolua wakutuulio Waú meidungga mai.

⁴ Bo tohuungi mongoli to Sardis donggo woluo tau tahidahawa alihu boólio debo belesi. Timongolio boito mamonaó peé-peéenta wola-Ú wolo mohiboó lou moputió, sababu timongolio motuuúde woleeto.

⁵ Toli mongolio tamoóhaama mapakealio jumba moputió. Bo timongolio diila taluluto-Ú monto Buku lo Taa Tumutumulo. Wau totalu li Paapa-Ú, wau maaa-laíkati-Lio Waú mamotolo akuo deú timongolio yito miliki-Ú.

⁶ Titaalo tita tamoó dungohu, mamusi mopoó tuoto wolo u tilahuda mai lo Rohullah to jajaa-maáalo!"

⁷ "To malaíkati lojamaá to Piladelpia, tulade mola odie: Utieelo tahuli monto o-Lio tamantali wau u tutu. Tiolo tadihudihu uúnti u mililiki lei Dauda; wonu Tio momuó diaaluo penu boli ngotaa maó tamoó heúto, wau wonu heúta-Lio diaaluo penu boli ngotaa maó tamowali momuó.

⁸ Otaawa-Ú wolo u pilohutu limongoli. Otaawa-Ú deú diila ngoolo maó lotoli mongoli; timongoli malo duduá pongaajali-Ú wau tatapu wau molotolo hilao to ola-Ú. Toli mongoli mahiluó-Ú huhebu tuwau, wau penu boli tatoonu diila mowali moheútaó.

⁹ Poótoloma maó utie: Tau-tauwalo talowali umati lo Ibilisi boito, mohimbuloa, tahi pongakua batangalio Yahudi lebe-lebe pomaó diila, mapo hutuwo-Ú tilinggula timongolio mai mosujudu

totalumu. Wau maótaawa maó limongolio deú Waú momonu olemu.

¹⁰ Masababu timongoli malo duduá palenta-Ú alihu moóolohu, Waú olo mamoduólai olemu monto maasa lou mototolo u mamolemba ngoilanggubu dunia. Suáli boito mamotoduo mai u mohimontala ngoáamila tau todunia.

¹¹ Waú huáa meidungga mai! Poódahai tióotutua wolo u mililiki limongoli, alihu diaaluo penu boli ngotaa maó tamohehu palaseni u ilohaamamu.

¹² Taa u moóhaama, mapo waliyo-Ú odelo wolihi todelomo Bele Mantali lo Allahu Taáala-Ú, wau tio mamoti biluloá teto ohiheo-hiheolo maó. Tanggulo Allahu Taáala-Ú, wau tanggulo kota lo Allahu Taáala-Ú -- deúito-yito Yerusalemu bohu umamo tuhutai monto sologa, monto Allahu Taáala-Ú -- matuladu-Ú maó tobatanga lotau boito. Tanggulu-Ú u bohu olo matuladu-Ú maó to batangalio.

¹³ Titaalo tita tamoó dungohu, mamusi mopoó tuoto wolo u tilahuda mai lo Rohullah to jajaa-maáalo!"

¹⁴ "To malaíkati lojamaá to Laodikia, tulade mola odie: Utieelo tahuli monto Sangi Amin, Sakusi taatatapu wau

molotolo hilao wau otutu, pilobutua mai lo totoonulalo hitua-tuawua u pilowali mai lo Allahu Taáala.

¹⁵ Otaawa-Ú wolo u pilohutu limongoli: Otaawa-Ú timongoli diila mohuhulo wau diila olo mopatu. Patutilio timongoli tala tuwaulio!

¹⁶ Bo timongoli mohihilonu; diila mopatu, mohuhulo olo diila. Uitolo sababuulio timongoli mapotuóo-Ú ode bulemengio monto delomo ngango-Ú.

¹⁷ Timongoli hipoloíyawa, 'Amiaatia kaya wau matuuheta ngoáamilalo; amiaatia diila ilodiaá lolo-loolo.' Bo diila otaawa limongoli malo odia sikisaalio wau malo odia suukalilio owowoluwomu! Timongoli mosikini, hilaalawa, wau hipiitoá.

¹⁸ Sababu uito Waú monasehati mai olimongoli alihu motali maó monto ola-Ú hulawa, deúito-yito hulawa tutu, alihu timongoli mowali kaya. Potalilo olo boó moputió monto ola-Ú alihu timongoli oboó molanggu owowoluwoa limongoli ulaalala wau moóolito. Wau potalilo olo wunemo u pomadeta tomatomu alihu timongoli mowali moóonto.

¹⁹ Tau-tauwalo tapilonu-Ú mai, timongoliolo tadiniyo-Ú wau tabuboáa-

Ú. Sababu uito mamusi timongoli osumangati, wau polilihulo monto duduusaamu.

²⁰ Bilohi! Waú tihutihula totalu lohuhebu wau hemongokoó. Wonu woluo taa u modungohe sualaa-Ú, wau momuó maó huhebu, Waú matumuwoto modunggaya wolio; Waú mamó lamela peé-peéenta wolio wau tio molamela peé-peéenta wola-Ú.

²¹ Timongolio taloóhaama, mapo luasiyo-Ú motihuloáa totambati lo huhuloáa-Ú peé-peéenta wola-Ú, tutuuwauwa debo odelo Waú lohihilao olo maloóhaama wau masaatia hulohuloáa peé-peéenta woli Paapa-Ú totambati lo huhuloáa-Lio.

²² Titaalo tita tamoó dungohu, mamusi mopoó tuoto wolo u tilahuda mai lo Rohullah to jajaa-maáalo!"

4¹ Lapataó uito watia luli loótoduo mai bibilohe. Iloontonga mola lowatia huhebu tuwau yilohuó tosologa, lapataó luli dungo-dungohei suala u touú bohulio malo tahuda mai olaatia debo odelo tingohu torompeti. Suala boito lotahuda, "Dulo pobotulai odia. Waú mamopo bilohei olemu wolo u de mamotoduo mai."

² Lolametolo mola watia kiluwaasa mai lo Rohullah. Tulusi watia loóonto mola tosologa woluo tambati tuwau huhuloá li olongia, wau woluo tahingota-ngotaawa hulohuloá totambati lo huhuloá li olongia boito.

³ Baya lotau boito motinelo debo odelo botu poliyoto lakulio baiduri ponda wau botu poliyoto meela. Tuwaulio duhi lobutu debo odelo botu poliyoto lakulio moidu ohalaga daá totambati lo huhuloá li olongia boito.

⁴ Todelomo moodeli linggari topalito tambati huhuloá li olongia boito woluo dulo pulaa pato tambati huhuloá li olongia uwewo. Teto hulohuloáa dulo pulaa pato taúwa tahipakea moputió, wau makuta hulawa.

⁵ Monto tambati huhuloá li olongia boito pukapukaái tinelo ilato wau yilumualai tingohu bulonggodu u hula-hulabio. Wau totalu lotambati huhuloá li olongia boito woluo pitu morongo u hilaíta; ui-uitolo opitu Rohullah.

⁶ Woluo olo totalu lotambati huhuloá li olongia boito hitua-tuawua u oontonga debo odelo ahu lo winggililua, moolango debo odelo kristali. Topalito tambati

huhuloá li onlongia, totimiídu biihio, woluo wopato mahaluku, u towimbihu talu wau towimbihu wulealio polupolu wolo mato.

⁷ Mahaluku u bohulio oontonga debo odelo singa. U oluolio, debo odelo sapi ulaí. U otolulio, oontonga obaya debo odelo baya lomanusia. U opatio, oontonga debo odelo bulungi rajawali udonggo tomo-tomboto.

⁸ Opato mahaluku boito, tinggai opolipió wolomo, wau topalitio wau to ambahu delomio polupolu wolo mato. Hui wau dulahe mamaaha-lukuwaalo boito diila mopo huhe-huheli hemo polahu mola, "Mantali, mantali, mantalilo Eeya, Allahu Taáala Laba-labaalo kawasa; tawoluo, tamawoluo, wau tawoluo malolaalaita."

⁹ Opato mahaluku boito hemo polahu lalaa-huwaalo poloílaalo momuji, hulumati wau sukuru to o-Lio tahulo-huloáa totambati huhuloá li onlongia boito, deúito-yito Tio tatumu-tumulo u ohiheo-hiheolo maó. Wau toú maaaa-halukuwalo boito hipolahua mola,

¹⁰ odulo pulaa pato taúwa boito leidambaólo mola totalu lotaa hihuloáa totambati huhuloá li onlongia boito, tulusi lolubo maó o-Lio tatumu-tumulo u

ohiheo–hiheolo maó. Lapataó timongolio lopo mahulo maaaa–kutawaalo limongolio ode talu lotambati huhuloá li olongia boito wau lolóíya,

¹¹ "Oo Eeya, oo Allahu Taáala lomongo watotia! Eeyaalo wambaó tapaatuti mololimo poloílaalo momuji, hulumati wau kawasa. Sababu Eeyaalo talo powali mai totoonulalo u hitua–tuawua, wau to kahandaki lo Eeya olo totoonulalo u hitua–tuawua boito malotoduo mai wau tumutumulo."

5 ¹ Lapataó watia loóonto mola lilibu buku tuwau to uluú–Lio lo tahulo–huloáa totambati huhuloá li olongia boito. Buku boito polupolu lotulade tomohu–mohuwalialio wau mete–metelai wolo pitu seeheli.

² Lapataó watia loóonto mola ngotaalio lo malaíkati tamolotolo boli buheli daá hemo ngibo–ngiibode wolo suala udaá, "Tatoonu tapaatuti momoó maó sesee–heliyaalo botie wau momuó buku botie?"

³ Bo mopio tosologa, meaalo todunia, meaalo towalungo dunia penu boli ngotaa maó diila ilodungga taamambo momuó buku boito wau momilohe ode delomio.

⁴ Yi watia mahilu moyongo loú mopo tidetideó sababu diaaluo penu boli ngotaa maó tapaatuti momuó buku boito, wau momilohe ode delomio.

⁵ Lapataó tala ngota towolota lomongo taúwa boito malo loíya mai olaatia, "Diila hiyongo! Bilohi! Singa lonto suku bangusa lo Yahudi, wali mai lei Dauda taúdaá, maloóhaama. Tio mambo momoó pitu seeheli wau momuó buku boito."

⁶ Lapataó watia loóonto mola Walaó Himba tuwau tihutihula tohuungo tambati huhuloá li onlongia boito, pilalito lo opato mahaluku wau ngoáamila taúwa boito. Walaó Himba boito oontonga debo odelo maíloloto. Tio o tunge pitu wau pitu mato: deúito-yito pitu rohu lonto Allahu Taáala u mailawo ode ngoilanggubu dunia.

⁷ Lapataó Walaó Himba boito lomaju wau lohama lilibu buku boito lonto uluú olowala lotaa hulohuloó toitaato tambati huhuloá li onlongia.

⁸ Tou Walaó Himba boito donggo hemohutu odito, malei dambaólo mola opato mahaluku wau odulo pulaa pato taúwa boito totalulio. Timongolio ngota-ngota hidihuma kocapi wau manggo

hulawa u tuatunga alama, deúito-yito duduuáwaalo umati lo Allahu Taáala.

⁹Timongolio hemo polahu mola lahu tuwau u bohu: "Yió paatuti mohama maó buku boito wau momoó sesee-heliilio. Sababu Yió mapilatelio yila-yilateelo maó, wau wolo opopate-Mu, manusia monto totoonulalo suku, bahasa, lipu wau bangusa matilali-Mu ode Allahu Taáala.

¹⁰Yió malo powali olimongolio bangusa tuwau tomodu lowali mongo iimamu, alihu timongolio momaya Allahu Taáalanto, wau momalenta toitaato dunia!"

¹¹Lapataó watia luli loóonto mola. Watia loódungohe suala lo maláikati hilihu-lihua wau hejuta-jutawa daatalio. Timongolio tihutihula hipalita totambati huhuloá li olongia wau opato mahaluku wolo mongo taúwa boito.

¹²Wau timongolio hipolahua wolo suala moóohuú, "Walaó Himba umaa iloloto boito, patuti u mololimo kawasa, okokaya, tinepo wau olootolo; Tio paatuti hulumatiolo, poudaáalo wau pujiolo boli puji!"

¹³Lapataó watia loódungohe totoonulalo mahaluku tohulungo, todunia, to

walungo dunia wau todelomo deheto -- limbuío maó totoonulalo mahaluku to ngoilanggubu aalamu botie -- hipolahua, "Tio tahulo-huloó toitaato tambati huhuloá li olongia, wau Sangi Walaó Himba boito, deúito-yito ilopujia, wau hulu-hulumati boli udaá wau okawasa u ohiheo-hiheolo maó!"

¹⁴Yi opaato mahaluku boito lolametai, "Amin!" Wau mongo taúwa boito olo leidambaólo mola wau lolubo.

6¹Lapataó uito watia loóonto mola Walaó Himba boito lomoó seeheli bohulio towolota opitu seeheli boito. Tulusi watia loódungohe tuwau towolota lo opaato mahaluku boito lolóiya mai, "Dulo!" Tingohu suaalio boito debo odelo tingohu bulonggodu.

²Yi watia lomilohe, tulusi nilaasa mai wadala tuwau moputió. Jokilio boito dihudihu buutió tuwau, wau to olio yilohialio makuta tuwau. Tio lomaju odelo ngotaalio taloóhaama u lonaó lohehu ohohaama.

³Lapataó Walaó Himba boito lomoó seeheli u oluolio. Wau watia loódungohe mahaluku u oluolio lolóiya mai, "Dulo!"

⁴ Lapataó wadala tuwau uwewo yilumualai poli. Wadala boito mela lakulio. Jokilio boito yilohialio kawasa mopodiaá owowoluwoa loú dame monto dunia, alihu manusia mopapaatea mate-mateelo maó. Yi tio yilohialio maó wamilo tuwau uleidaá.

⁵ Lapataó Walaó Himba boito lomoó seeheli u otolulio. Wau watia loódungohe mahaluku u otolulio loloíya, "Dulo!" Watia lomiloheó, yi nilaasa mai wadala tuwau moitomo. Jokilio boito dihudihu titimenga ngopanggalo to uluúlio.

⁶ Wau watia loódungohe hitua-tuawua u odungohe debo odelo suala hemo ngiibodu tohuungo opaato mahaluku boito. Suala boito loloíya mai "Pale ngoliteri u mopiohe ngohalaga lowuupa ngohui, wau tolo literi pale ngohilaide wewo ngohalaga lowuupa ngohui olo. Bo diila maó poluusawa bubuu-ngowaalo jaitun wau ilengi lo angguru!"

⁷ Lapataó Walaó Himba boito lomoó seeheli u opaatio. Wau watia loódungohu mahaluku u opaatio loloíya mai, "Dulo!"

⁸ Watia lomiloheó yi nilaasa mai wadala tuwau u motambutió. Jokilio ilunte Mautu. Monto wulea, weweembide tio tilunuhe Aalamu Mautu. Okokawasa

to ngotayade wopato lodunia botie yiludu ode limongolio, alihu timongolio mowali momate mate-mateelo maó moli popaatea, moli sembo lo polobiti, moli wembelo longongoto wau moli bibii-natangiyalo u mongantau.

⁹Lapataó uito Walaó Himba boito lomoó seeheli u olimolio. Yi watia loóonto to walungo mesba woluo hihii-muúduwalo lotau-tauwalo tailate ilopatea yila-yilateelo maó, sababu timongolio helo poótoheeto tahuli lo Allahu Taáala loli ososakusi limongolio.

¹⁰Timongolio hiwaatiá wolo suala moóohuú, "Oo Eeya Taa Laba-labaalo kawasa, tamantali wau otutu! Ngoolo maó poli hiheolio bolo Eeya momutoái tuanga dunia wau mohukuumani olimongolio sababu malomate yila-yilateelo maó tomongo watotia?"

¹¹Timongolio ngota-ngota yilohialio jumba ngopata u moputió. Lapataó timongolio pileí huhelialio ngopeé mola poli, dilumutu malei wimumuto jumulaa lomongo tamani ngopo hipate wau mongo wutati mongolio tamaa pateelio mate-mateelo maó debo odelo timongolio.

¹² Tulusi watia loóonto mola Walaó Himba boito lomoó seeheli u olomio. Yi lotoduwolo mola liluhe udaá tutu. Mato lodulahu lowali loitomo debo odelo kaingi moitomo u bangganga, wau hulalo lowali yileela debo odelo duhu.

¹³ Popoo-liyamalo helo duduulahei lonto hulungo ode yitaato dunia debo odelo hungo lo ara udiipo moloheto hipo duduulahua lonto bungolio toú hileulo daá lodupoto moóohuú.

¹⁴ Hulungo yilooli debo odelo kalatasi yililibio, wau ngoáamila huídee wau pulo hileilio lonto tambatilio.

¹⁵ Lapataó mongo olongia todunia, taduduulaá lolipu, mongo eyaanggu, tahi okawasawa, tahi kayawa, wau tau-tauwalo wewolio, mopio wato meaalo talo lopato, ngoáamilalo lotituuó todelomo gogoowaalo wau tohiyango botu lohuídu.

¹⁶ To huhuu-ideyaalo wau boboo-tuwaalo boito, timongolio hiwaatiá, "Tambaalo mai amiaatia! Popotuuálo mai amiaatia tobibilo-Hio lo tahulo-huloó toitaato tambati huhuloá li olongia, wau monto omuluka lo Walaó Himba boito!

¹⁷ Dulahee u moótihela hapato malei dungga mai, botia timongolio hemo

pomukaó yiyingo limongolio, wau diaaluo penu boli ngotaa maó mambo moó taahangi totalu limongolio!"

7¹ Lapataó uito, watia loóonto mola wopatota malaíkati hitihula to opaato dulungo dunia. Timongolio helo ngotongo opaato mato lodupoto todunia alihu diaaluo dupoto u mohiipa totudulio meaalo todeheto, meaalo to bubuu-ngowaalo ayu.

² Lapataó watia loóonto mola malaíkati ngota uwewolio yilumenetai lonto tiimuru. Tio delodelo seeheli lonto Allahu Taáala tatumu-tumulo. Wolo suala daá malaíkati boito lotianga opaato malaíkati tamaa loótapu kawasa lonto Allahu Taáala u mopoluusa deheto wau tudulio.

³ Malaíkati boito loloíya mai "Diipo maó poluusawa tudulio meaalo deheto, meaalo bubuu-ngowaalo ayu wonu ami diipo longohi tuoto seeheli tobaya lomongo wato Allahu Taáala."

⁴ Lapataó piloótaalio mai olaatia deú woluo ngojumula ngohetuto wopato pulaa pato lihulota tailohialio tuoto seeheli lo Allahu Taáala tobaya limongolio. Tau-tauwala boito hilama-Lio lonto tamopulaa dulo suku bangusa lo Isiraílu;

⁵ Lonto timiïdu suku mopulaa dulo lihu lota. Deúito-yito lonto suku Yehuda, Ruben, Gad,

⁶ Asyer, Naputali, Manasye,

⁷ Simeon, Lewi, Isakhar,

⁸ Jebulon, Yusu, wau Benyamin.

⁹ Lapataó uito watia luli lomilohe, tulusi nilaasa mai auhu lo manusia ulaba-labaalo daatalio -- diaalu penu boli ngotaa maó tamoó yiaapo jumulaalio. Timongolio yito tau-tauwalo monto timiïdu bangusa, suku, lipu wau bahasa. Wolo hipakea jumba u hipuutiá wau hidihuma walaó tataa-ngowaalo bungo lo ayu paalemu to uluú, tau-tauwalo dadaata boito hitihula talutalu ode tambati huhuloá li onlongia wau talutalu ode Walaó Himba boito.

¹⁰ Lapataó wolo suala daá timongolio helo ngiibodu, "Oáahunto dudunggaalio mai lonto Allahu Taáala, tahulo-huloá toitaato tambati huhuloá li onlongia, wau lonto Walaó Himba boito!"

¹¹ Ngoáamila maláikati hitihula lomalito tambati huhuloá li onlongia wolo mongo taúwa wau opaato mahaluku boito. Mamaa-laíkatiyalo boito leidambaólo mola totalu tambati huhuloá li onlongia tulusi lolubo Allahu Taáala.

¹² Timongolio helo ngiibode, "Amin! Ilopujialo mola Allahu Taáalanto taúdaá wau molinepo. Tio paatuti wohiyalo daata-daatalo maó lapali sukuru wau polo hulumati. Tio okawasa wau molotolo u ohiheo-hiheolo maó! Amin."

¹³ Tala ngota lomongo taúwa boito lohintu mai olaatia "Tau-tauwalo tahi jumbawa loú moputiá botie, tatoonu timongolio wau lonto utoonu mai timongolio?"

¹⁴ "Diila otaawa lowatia, Tuani. Ti Tuani lohihilao tamotota," tametaó lowatia. Yi ualio mai olaatia, "Utieelo tau-tauwalo tamaa loáahu loli maasa lo alinaaya ulaba-labaalo tutu. Timongolio malo moboáa jumba limongolio wau lohutu maó lowali loputió wolo duhu lo Walaó Himba boito.

¹⁵ Uitolo sababuulio timongolio tilimihulaó totalu tambati huhuloá lo Allahu Taáala, wau helo tabia to o-Lio hui dulahu todelomo Bele lo Allahu Taáala. Wau Tio tahulo-huloá toitaato tambati huhuloá li onlongia boito mamei woluo woli mongolio u moduóla olimongolio.

¹⁶ Timongolio diilalo moólaasa polangolo meaalo mototoángo; mato lodulahu

meaalo patulio uhinta–hintalabu diilalo moópobu olimongolio,

¹⁷ sababu Walaó Himba tahulo–huloá tohuungo tambati huhuloá li olongia boito mamowali diti limongolio. Tio mamodelo olimongolio ode butu lotaluhu u mongohi tutumulo. Wau Allahu Taáala mamomaide ngoáamila ponu monto mato limongolio."

8 ¹ Tou Walaó Himba boito lomoó seeheli u opitulio, sologa lowali loliilo hiheolio otanu ngoputu lojamu.

² Lapataó watia loóonto mola pitu lota malaíkati hitihula totalu lo Allahu Taáala, wau timongolio yilohia pitu torompeti.

³ Ngotaalio lo malaíkati wewo, tadelodelo podupawa hulawa tuwau, lonaó mai wau tilimihula totalu lomesba. To olio yilohia dadaata daá alama u pomuyuhuto to duduu–aawaalo lo ngoáamila umati lo Allahu Taáala wau u podewolo tomesba hulawa uwoluo totalu tambati huhuloá li olongia.

⁴ Peé–peéenta wolo duduu–aawaalo uúu–matiyaalo umati lo Allahu Taáala, poloó lodupa udonggo léiléita boito lohubulo lobotula mola lonto uluú lo malaíkati tatihu–tihula totalu lo Allahu Taáala.

⁵ Lapataó malaíkati boito lohama podupawa boito, wau loluango wolo tulu lonto mesba, tulusi lopo mahula odeitaato dunia. Yi bulonggodu olo hula-hulaubio wau ilato malo lawode-molawode mai wau lotoduwolo mola liluhu.

⁶ Lapataó uito, pitu lota malaíkati tadihudihi pitu torompeti boito dapa-dapato u mohiipaó.

⁷ Malaíkati bohulio lohiipo torompetilio, yi didi lo esi wau tulu ula-ulau loduhu lodehu wolo polodu ode dunia. Ngotayade totolu lodunia yilaahu lotulu, odito olo ngotayade totolu bubuu-ngowaalo ayu wau timiídu huóyoto umoidu.

⁸ Lapataó malaíkati oluolio lohiipo torompetilio, yi hitua-tuawua uleidaá tutu u oontonga debo odelo huíde uléi-leíta pilomahulio mola ode delomo deheto. Ngotayade totolu lodeheto loboliólo mola lowali duhu,

⁹ wau lopoowatelo mola ngotayade totolu totoonulalo mahaluku todeheto; odito olo bilinasaalo mola ngotayade totolu kakaa-paliyaalo.

¹⁰ Lapataó malaíkati otolulio lohiipo torompetilio, yi poliyama tuwau uleidaá, uléi-leíta debo odelo morongo, lodehu

mai lonto hulungo, tulusi lolemba ngotayade totolu lo duduu–tulawaalo wau butu lotaluhu.

¹¹ (Tanggulo poliyama boito "Mopaáto".) Yi ngotayade totolu lotaluhu lowali lapaáto, wau yilateelo mola taa dadaata sababu helongilu taluhu u malowali lopaáto boito.

¹² Lapataó malaíkati opatio lohiipo torompetilio. Yi ilotambalia ngotayade totolu mato lodulahu, ngotayade totolu hulalo, wau ngotayade totolu popoo–liyamaalo tilinggula yiloolilo mola ngotayade totolu lonto lotolo tineli mongolio. Wau olo ngotayade totolu dulahu diila lotilangai wau odito olo ngotayade totolu loú hui.

¹³ Lapataó watia lomilohe mola, yi watia loódungohe bulungi rajawali tuwau udonggo tombo–tomboto molanggato todulente longiibodu, "Topotala! Topotala! Tilopo–talaalo ngoáamila taa todunia wonu bolo modungohe otolu malaíkati wewolio de mohiipaó torompetilio!"

9¹ Lapataó malaíkati olimolio lohiipo torompetilio, wau watia loóonto mola poliyama tuwau lodehu mai lonto hulungo

ode dunia. Poliyama boito yilohia uúunti pangato lomautu.

² Yi poliyama boito malomuó pangato lomautu boito, tulusi poloó yilumualai lonto delomio debo odelo poloó lonto tihengo uleidaá. Mato lodulahu wau baangio daá lowali lodiólomo lopoloó lonto pangato boito.

³ Lapataó lonto delomo poloó boito yilumualai bubuu-litaalo u lolahe mola ode dunia. Bubuu-litaalo boito yilohia kawasa u tutuuwauwa debo odelo uilohi ode bambau.

⁴ Timongolio dilini mopoluusa huóyoto, meaalo totoonulalo bungo lo ayu meaalo totoonulalo pilomulo wewolio. Timongolio bo mowali moluhu tau-tauwalo u tobayalio diila o tuoto seeheli monto Allahu Taáala.

⁵ Bubuu-litaalo boito diila yiluwasia momate tau-tauwala boito mate-mateelo maó, bo mopo sikisaa wambaó olimongolio ngotilonggadu limo lohula mola. Lilintolo uloó sababu sikisaa upilo akibati lo bubuu-litaalo boito tutuuwauwa debo odelo lilintolo u ilakibati pantongio lobambau.

⁶ Touú limo lohula mola boito tau-tauwala boito motolopani alihu mate, bo

timongolio diila mowali mate; timongolio ohilaa mate bo mautu molaminga monto olimongolio.

⁷ Laku lobulita boito debo odelo wadala udapa-dapato mopaatea. To lunggongo bubuu-litaalo boito woluo hitua-tuawua u oontonga debo odelo makuta hulawa. Baya lo bubuu-litaalo boito debo odelo baya lomanusia.

⁸ Huwoó lo bubuu-litaalo boito debo odelo huwoó taabua, wau dungitio debo odelo dungito singa.

⁹ Duhelo bubuu-litaalo boito taútaúbu loú hitua-tuawua udebo odelo boó wate. Suala polipió lo bubuu-litaalo boito debo odelo suala lo ngojumula daá kakaa-letawaalo wadala u hemoluhu todelomo popaatea.

¹⁰ Bubuu-litaalo boito o patahu wau opantongio debo odelo bambau. Wau topatahu lo bubuu-litaalo boitolo woluo lotolio u mopo sikisaa manusia ngotilonggadu limo lohula mola hiheolio.

¹¹ Bubuu-litaalo boito o olongia u hemo malenta olimongolio, wau olongia boito yito malaíkati tamoo-ngimatoa pangato lomautu. Tanggulio todelomo bahasa lo Ibrani yito Abadon; wau todelomo

bahasa lo Yunani Apolion (uboliilio maó "Tamoo-poluusawa").

¹² Baala ubohulio malo paluto. Lapataó uito donggo woluo poli dulo baala umusi meidungga.

¹³ Lapataó malaíkati taólomio lohiipo torompetilio. Yi watia loódungohe suala lonto opato tutulo mesba hulawa u totalu lo Allahu Taáala.

¹⁴ Suala boito loloíya maó to malaíkati olomio boito, "Hulia maó opaato malaíkati tapungu-pungu to Dutulaa lo Eperat boito!"

¹⁵ Opaato malaíkati boito olo hilulialio. Timongolio mapilo dapatio tomodu ode jamu, dulahe, hulalo wau taunu boito u momate mateelo maó ngotayade totolu ngoilanggubu umati lomanusia.

¹⁶ Piloótaalio mai olaatia deú jumulaa lo papaa-sukaniyalo owadala daatalio dulo hetuto juta.

¹⁷ Wau todelomo bibilohu, watia loóonto mola wawaa-dalawaalo boito wau jojookilio. Jojookilio boito hipakea boó wate u lakulio meela hileíta, debo odelo iintani lakulio moidu debo odelo botu lonilamu, wau molalahu walirangi. Lunggongo wawaa-dalawaalo boito

debo odelo lunggongo singa, wau lonto tunggilio yilumualai tulu, poloó, wau walirangi.

¹⁸ Ngotayade totolu lonto umati lomanusia ilopatea yila-yilateelo maó lootolo baala boito; deúito-yito tulu, poloó, wau walirangi uilumualai monto tunggilo wawaa-dalawaalo boito.

¹⁹ Olootolo wawaa-dalawaalo boito woluo to tunggilio wau olo topatahio. Papaatahio debo odelo tulidu olunggongo. Wolo patahio boito, wawaa-dalawaalo boito helo posikisaa manusia.

²⁰ Bo labito umati lomanusia tadiila ilopatea yila-yilateelo maó lo babaa-lawaaloo boito olo, diila olo lololaa maó huhuu-hutuwaalo uluú limongolio lohihilao. Timongolio debo diila lohuheli hemolubo roroo-huwaalo u moleeto wau totoonulalo balaahala hulawa, talaá, tombaha, botu wau ayu udiila mowali moóonto meaalo modungohe, meaalo monaó.

²¹ Timongolio diila olo lololaa maó huhuu-hutuwaalo limongolio u moleeto, deúito-yito moomatea mate-mateelo maó, ilimi mongisimu, huloto wau mootaówa.

10¹ Lapataó watia loóonto mola malaíkati ngota tamolotolo boli buheli daá uwewo u lotuhutai lonto sologa. Tio yilanggube loheengo, wau duhi lobutu tuwau libu–libude to lunggongio. Bayalio tine–tinelo debo odelo mato lodulahu, wau oáatio wolihi tulu.

² To uluúlio woluo ngopolilibu buku kikiiá ubuá–buáade. Oáatio olowala dutadutaá todeheto wau oáatio oloihi dutadutaá totudulio.

³ Lapataó tio longiibode wolo suala daá debo odelo wuongo lo sisii–ngawaalo. Lapatio maó malaíkati boito longiibode, opitu bulonggodu lolametaó wolo suala hula–hulaubio.

⁴ Odito opitu bulonggodu boito lotuwahu, watia ohilaa moluladeó, bo watia loódungohei suala lonto sologa lotahuda, "Tuuá maó wolo uiloíya mai lo opitu bulonggodu boito; diila maó tulade!"

⁵ Lapataó malaíkati u iloontonga lowatia lotidutaá todeheto wau totudulio boito wau lomintaá mola uluúlio olowala ode hulungo.

⁶ Tio lotadia domi tanggulo Allahu Taáala tatumu–tumulo ohiheo–hiheolo maó, talo powali mai hulungo, dunia wau

deheto wau totoonulalo hitua-tuawua uwoluo todelomio. Malaíkati boito loloíya, "Wakutuulio diilalo lohuduwolo.

⁷ Bo wonu bolo malaíkati opitulio mohiipaó torompetilio, Allahu Taáala mamoponaó lanjana-Lio u tutuuó debo odelo u mapiloótaa-Lio mai tomongo wato-Lio, deúito-yito mongo nabi."

⁸ Lapataó suala umaa ilodungohe lowatia lonto sologa boito luli lotahuda mai olaatia. Tio lotahuda, "Ponaólo mota hamaawa mai lilibu buku u huáhuáato to uluú lo malaíkati taduta-dutaá todeheta wau totudulio boito."

⁹ Yi watia olo malonaó mota ode malaíkati boito wau lohile alihu tio mongohi mai lilibu kikiió boito to olaatia. Tio loloíya, "Hamaalo wau tamelalo utie. To delomo ombongumu tio mamowali mopaáto, bo todelomo ngangomu tio moolingo debo odelo hula lotiiá."

¹⁰ Watia malohama lilibu kikiió boito lonto uluúlio tulusi tilamela lowatia. To ngango lamitio debo odelo hula lotiiá, bo toú matilooloo lowatia, todelomo ombongo laatia lilibu kikiió boito tio lowali lopaáto.

¹¹ Lapataó watia pilalentalio, "Peéentapo pololadelo habari lo Allahu Taáala pasali lo babaa-ngusawalo, lilii-puwaalo, babaa-hasawalo, wau mongo olongia."

1 1 ¹ Lapataó uito watia yilohialio mai ayu ngoputu u hamahama odelo tunggudu ngoputu poluúdu, tulusi pilalentalio mai, "Ponaólo moluúde Bele lo Allahu Taáala wau mesba. Yíáapa maó ngoolo lota daatalio tahipo ibadatia todelomio.

² Bo diila maó tuúde paangio u toámbahu bulemengo Bele lo Allahu Taáala, sababu tayade boito mailudu ode tau-tauwalo tadiila hitootawa to Eeya. Timongolio mamoduta-dutaáa kota u mantali boito ngotilonggadu wopato pulaa dulo hula mola.

³ Waú mamolao mai duulota sakusii-Ú tapakepake boó limilimi, wau timongolio mamopo malalumu habari lo Allahu Taáala ngotilonggadu ngolihi dulo hetuto wolomo pulu hui mola."

⁴ Sakusi duulota boito yito dulo batango ayu lojaitun wau dulo oáato tohe uwoluo totalu lo Eeya ngoilanggubu aalamu.

⁵ Wonu tau mohimontala mohutu hitua-tuawua udiila mopiohe ode limongolio,

yi monto ngango limongolio lumualai tulu umopo binasa mumuu–suulio. Wolo dudelo odito, ngoáamila taa u ohilaa mopo ngongoto olimongolio maópatea mate–mateelo maó.

⁶Timongolio okawasa u moheúta hulungo alihu diila modehu didi ngotilonggadu timongolio donggo hemo pomalalumu habari lo Allahu Taáala. Timongolio olo okawasa to ngoáamila butu lotaluhu, u momolió taluhu mowali duhu. Wau timongolio okawasa olo u molotaáa dunia wolo totoonulalo baala u hidala–dalaala, omolua wambaño otohilaa pohutuo maó limongolio.

⁷Lapataó timongolio lapato mopohabari maó habari limongolio, binatanggi u lumualai monto pangato lomautu mamoluwali olimongolio. Tio mamopoólaaheó wau momate–mateelo maó olimongolio.

⁸Wau milate limongolio mabolo hibala–balatalo maó todalala daá tokota daá, touútoonu Eeya silalipu limongolio. Tanggulo pohumaya lokota boito yito Sodom meaalo Masiri.

⁹Tau–tauwala monto ngoáamila lipu, suku, bahasa, wau bangusa mamooóonto milate limongolio ngotilonggadu otolu

wau ngoputu lodulahu, wau diila mopoluasi maó mimii-lateyaalo boito lobungolo.

¹⁰Tuango dunia mamoti wengahe to opopate losakusi duulota boito. Timongolio mamopolame wau molalaawola palaseni, sababu nabi duulota boito malo podungga mai dadaata sikisaa ode ngoáamila taa todunia.

¹¹Lapataó otolu lodulahu wau ngoputu, medunggalo mai napasi lo tutumulo monto Allahu Taáala wau muli tumuwoto ode delomo nabi duulota boito. Timongolio olo mamobongu wau timihulo, tilinggula ngoáamila tamoóonto olimongolio mowali moohe daá.

¹²Lapataó nabi duulota boito loódungohe mola suala daá tahemo tianga olimongolio lonto sologa, "Dulo botulai odia mai!" Lapataó totalu lo mumuu-suuwaalo limongolio, timongolio lobotulaa mola ode sologa, yilanggube loheengo.

¹³Yi toú boito motoduwolo mola liluhu udaá tutu. Ngotayade mopulu lokota boito moáantulu, wau pitu lolihu lota mate sababu liluhu boito. Tau-tauwalo wewolio mowali moohe daá, tulusi timongolio

momuji mola odudaá lo Allahu Taáala tosologa.

¹⁴ Baala u oluolio malo paluto. Bo bilohilo maó! Baala u otolulio bolo ngopeé mola mamuli mohunuhei.

¹⁵ Lapataó malaíkati opitulio lohiipo torompetilio, yi tosologa dungo-dungohei susuu-walaalo moóohuú daá u lolóiya, "Okokawasa u momalenta dunia botia woluo todelomo uluú lo Eeyaanto wau Olongia Tamoo-poáhua upilo danti-Lio mai. Tio mamo malenta u ohiheo-hiheolo maó!"

¹⁶ Yi odulo pulaapato lota taúwa tahihuloáa totambati huhuloá li olongia limongolio totalu lo Allahu Taáala leidambaólo mola wau lolubo Allahu Taáala.

¹⁷ Timongolio lolóiya, "Eeya, Allahu Taáala Laba-labaalo kawasa, tawoluo, wau tamailoluo! Mongo watotia mosukuru mola ode Eeya sababu Eeya malomake kawasa lo Eeya u udaá, wau malo lumula lomalenta!

¹⁸ Tau-tauwalo tadiila hitootawa lo Eeya, heloluhu wolo majanunu sababu mawakutuulio Eeya mobanggu-watai muluka lo Eeya, wau masaaátilio olo Eeya

momutoó taheilate. Uti-utieelo wakutuulio u mongohi wuupa tomongo wato lo Eeya, mongo nabi, wau to ngoáamila umati lo Eeya, deúito-yito ngoáamilalo taa u mo@ibaadati to Eeya, taudaá mealo taúkikii@o. Uti-utieelo wakutuulio u mongantulu tau-tauwalo tahipo ngantulua dunia!"

¹⁹Yi lohuóolo mola Bele lo Allahu Taáala tosologa, wau iloontongalo mola Bulua Daantia todelomio. Tulusi lotoduwolo mai ilato lawode-molawode wau suala lo bulonggodu u hula-hulaubio wau bulo-bulonggalio, boli liluhu wau didi esi upolodu.

12¹Lapataó iloontonga mola tohulungo hitua-tuawua u moólinggolabe wau polu-polutuó. Taabua ngota tapake-pake mato lodulahu odelo boólio, donggo tihu-tihula toitaato hulalo. Toitaato lunggongio woluo makuta tuwau utili tangowalio loú mopulaa duluo poliyama.

²Taabua boito donggo ombodaá, wau sababu mawakutuulio u mopotutu mai, yi tio longuwatió loú mongongoto.

³Lapataó oóonto mola poli tohulungo hitua-tuawua u moólinggolabe. Woluo

naha meela tuwau uleidaá tutu u olunggongo pitu wau tungelio mopulu. Timiídu lunggongio hipakea makuta tuwau.

⁴Wolo patahio tio lodedeá ngotayade totolu popoo-liyamaalo tohulungo wau pilomahulio ode dunia. Naha boito tilimihulo totalu lotaabua taóhilaá mopotutu mai boito wolo makusudu mololoolaó walaío, odito potutulio mai.

⁵Tulusi taabua boito lopotutu mai walaó talolaí ngota tamamo malenta ngoáamila bangusa wolo tunggudu wate. Bo walaó boito yilahulio lonto taabua boito, tulusi dilelolio ode Allahu Taáala wau ode talu lotambati huhuloá li olongia-Lio.

⁶Yi taabua boito tilumeteá ode huta datahu u luasi daá wau delita, ode tambati u mapilo dapato Allahu Taáala olio. Totambati boito tio mataalaalo hiheolio ngolihi dulo hetuto wolomo pulu hui mola.

⁷Lapataó tosologa lotoduo popaatea. Tei Mikhael peé-peéenta wolo mamaa-laíkatilio lotuuhua loluwali naha boito. Wau naha boito olo, u bilantua lo mamaa-laíkatilio, loluwali olei Mikhael.

⁸ Bo naha boito ilolaahelio. Tio wau maaa-láikatilio diilalo yiluasía lotibiluloá tosologa.

⁹ Naha uleidaá boito tilapi ode bulemengio! Tiolo tulide panggola boito u ilunte Ibilisi meealo Rohu Moleeto, u lohimbulo ngoilanggubu dunia. Tio tilapi ode dunia wolo ngoáamilalo malaíkatilio.

¹⁰ Lapataó watia loódungohe mola suala u loóohuú tosologa lolóiya mai, "Botiaalo wakutuulio lo Allahu Taáala mopoáahu mai umati-Lio. Botia Allahu Taáala mopo bilohei kawasaa-Lio odelo Olongia! Botia Olongia Tamoo-poáahua tadilanti boito olo mopo bilohei okokawasaa-Lio! Sababu tamo potuludu tomongo wutatonto totalu lo Allahu Taáala hui wau dulahu, maa yiluwalaó lonto sologa.

¹¹ Mongo wutatonto maloó laaheó olio wolo duhu lo Walaó Himba boito, wau wolo habari u otutu lonto Allahu Taáala u pilohabari limongolio. Timongolio iloheela lohilao mopobake nyawa limongolio tunggula mate.

¹² Sababu uito, mamusi sologa wau ngoáamila tahi biluloáawa todelomio, motiwengahe! Bo topotala dunia wau deheto, sababu Ibilisi malolaahi ode

olemu wolo muluka daá, sababu otaawalio deú wakutuulio bolo ngopeé mola."

¹³Toú naha boito longalati maó deú tio matilapi ode dunia, tio lohilapita taabua tamalo potutu mai walaó talolaí boito.

¹⁴Bo taabua boito yilohialio dulo polipió bulungi rajawali uleidaá, alihu tio tumombota mola ode tambatilio tohuta datahu u luasi daá wau delita, toútoonu tio mataalaalio tolo taunu wau ngoputu hiheolio, molopato monto luhu lonaha.

¹⁵Yi naha boito lopohua maó lonto ngangolio taluhu dadaata daá ode taabua boito, u mopo hilihe olio.

¹⁶Bo dunia lomantu taabua boito; dunia lomuó ngangolio wau lololoolaó taluhu u yimualai lonto ngango lonaha boito.

¹⁷Naha boito maloingo daá totaabua boito, tilinggula tio mota loluhu wali uwewo lotaabua boito, deúito–yito ngoáamila talo dungohe totoonulalo palenta lo Allahu Taáala, wau talongohi sakusi pasali li Isa wau kawasaa–Lio.

13¹ (12–18) Lapataó naha boito tilimihulaó topentadu. (13–1) Lapataó watia loóonto binatanggi tuwau yilumenetai lonto delomo dehetu. Binatanggi boito otunge mopulu wau

olunggongo pitu. Totimiïdu tungelio omakuta tuwau, wau totimiïdu lunggongio tulatulade tanggulo tuwau lohina Allahu Taáala.

² Binatangi u iloontonga lowatia boito lakulio debo odelo harimau lambutio hibonto–bontoá moitomo, wau oáatio debo odelo oáato boruwangi, wau tunggilio debo odelo tunggilo singa. Lapataó binatangi boito yilohia lonaha boito olootolio lohihilao, wau tambati huhuloáalio, wau okokawasaalio uleidaá.

³ Tuwau towolota opitu lunggongo lo binatangi boito oontonga debo odelo pali u tiluhua daá, bo pali boito maloluli. Ngoilanggubu dunia loduduá binatangi boito wolo pongolaasa linggolabe.

⁴ Wau timongolio helolubo naha boito sababu tio malongohi okokawasaalio to binatangi boito. Wau timongolio helolubo olo binatangi boito. Timongolio lolóiya, "Diaaluo tatutuu–wauwa wolo binatangi botie! Diaaluo tamowali mopaatea moluwali olio!"

⁵ Binatangi boito yiluasiasia moloíya susuu–aliyaalo u batingga daá wau mohina Allahu Taáala. Tio yiluasiasia momalenta wopato pulaa dulo hula mola hiheolio.

⁶ Lapataó tio lolumula lohina Allahu Taáala, wau tanggulo Allahu Taáala. Odito olo tambati biluloá lo Allahu Taáala wau ngoáamila tahi biluloáwa tosologa olo hilinaalio.

⁷ Tio yiluasia olo moluwali umati lo Allahu Taáala wau mopo olaaheó olimongolio. Wau okokawasa to ngoáamila suku, lipu, bahasa, wau bangusa yilohilio olio.

⁸ Binatangi boito matuboo lo ngoáamila taa utumu-tumulo toitaato dunia, ngopohia tau-tauwalo u tanggulio malei daputali tou dunia diipo pilowali mai, todelomo buku taa tumu-tumulo miliki lo Walaó Himba umaa iloloto.

⁹ Sababu uito, wonu timongoli mambo modungohe, dungohi maó habari botie:

¹⁰ "Taa u musi tawalolo, tantu matawalolo. Wau taa u musi pateelo mate-matelo maó wolo wamilo, tantu mapateelo mate-matelo maó wolo wamilo. Uitolo sababuulio umati lo Allahu Taáala musi taaba wau tatapu molotolo hilao."

¹¹ Tulusi watia loóonto mola binatang tuwau uwewo yilumenetai lonto delomo dunia. Binatangi boito otunge duluo debo odelo tunge lowalaó himba. Sualaalio debo odelo suala lonaha.

¹² Totalu lo binatangí u bohulio boito tio lomake okokawasa uleidaá u lotapulio lonto binatangí boito olo. Ngoilanggubu dunia wau ngoáamila tahi biluloáwa toitaatio, hepila-kusaalio lolubo binatangí u bohulio boito, u paliilio tiluhua mailoluli.

¹³ Binatangí u oluolio boito lopowoluo mai totoonulalo moólinggolabe uleidaá. Totalu lo ngoáamila tau tio lohutu tulu lotuhutai lonto hulungo ode dunia.

¹⁴ Wau ngoáamila tau tahi tumula todunia ilaakaliilio wolo momoóo-linggolabeyalo ulowali pilohutulio totalu lo binatangí u bohulio boito. Wau timongolio ngoáamilalo ilahulalio lopo tihulaó buí tuwau lonto binatangí umaa pilaliilio lowamilo, bo debo tumutumulo.

¹⁵ Binatangí u oluolio boito yiluasia mongohi nyawa tobuí boito, tilinggula buí boito mowali mobisala wau momate mateelo maó ngoáamila taa diila mohuto molubo olio.

¹⁶ Ngoáamila tau, udaá wau kikiió, kaya wau mosikini, wato wau taa beebasi, hepilakusa lo binatangí boito u mololimo tuoto to uluú limongolio olowala meaalo tobaya limongolio.

¹⁷ Diaaluo penu boli ngotaa maó mowali motali meaalo mopotali maó u hitua-tuawua, wonu tio diila otuoto boito, deúito-yito tanggulo binatang boito lohihilao, meaalo nomoro u mopoílaalo maó tanggula boito.

¹⁸ Tewe palalu ohikimati. Taa u molinepo moó yíáapo boli lonomoro binatang boito, sababu nomolo boito yito tanggulo manusia ngota. Nomorolio yito 666.

14 ¹ Lapataó watia lomilohe mola, tulusi iloontonga mai Walaó Himba boito tihutihula toitaato Huludu lo Sion. Peé-peéenta wo-Lio woluo ngohetuto lihu wopato hetuto wopato pulaa patolota tabayalio ngota-ngota hitulade tanggu-Lio wau tangguli Paapa-Lio.

² Tulusi watia loódungohe suala lonto hulungo bulo-bulontungio debo odelo tingohu taluhu podehu uleidaá wau debo odelo hulaubu bulonggodu ulaba-labaalo. Suala boito odungohe debo odelo suala lomuusiki lonto tahi poitohe kocapi tadonggo hemo poitohe kocapilio.

³ Totalu tambati huhuloá li onlongia wau opato mahaluku wau mongo taúwa topalito lotambati huhuloá li onlongia boito, ngohetuto lihu wopato hetuto

wopato pulaa patolota boito hipolahua mola lahu tuwau ubohu. Lahu boito penu boli tatoonu diila mowali mopoólaataó ngopohia lo ngohetuto lihu wopato hetuto wopato pulaa patolota boito tamaa yilopato lonto dunia.

⁴ Timongolio boito tau-tauwalo tadebo hiberesia debo odelo tadiipo motota lo mongobua sababu diila loáawota wolo mongobua. Timongolio loduduá Walaó Himba boito ode utoonulalo maó ponaówalio. Towolota lo ngoilanggubu umati lomanusia, timongoliolo tamaa yilopato odelo dewo u bohulio ode Allahu Taáala wau ode Walaó Himba.

⁵ Diila peéenta maó timongolio lohimbulo; wau diaaluo aibu penu boli ngoídi maó toli mongolio.

⁶ Lapataó watia loóonto mola ngotaalio lo malaíkati wewo tatombo-tomboto molanggato tohulungo. Malaíkati boito lodelo habari pasali lo Habari Mopiohe ubakaa pilo tunggulo ode manusia todunia deúito-yito ode ngoáamila bangusa, suku, bahasa wau lipu.

⁷ Malaíkati boito helo ngiibode wolo suala daá, "Poohelo to Allahu Taáala, wau pujiaalo odudaáa-Lio! Sababu

mawakutuulio Allahu Taáala momutoái manusia. Tubowaalo Tio talopowali hulungo, dunia, deheto wau ngoáamila butu lotaluhu!"

⁸ Malaíkati oluolio lohunuhe malaíkati tabohulio sambela hemo ngiibode, "Malodehu! Kota Babel uleidaá malodehu! Tio malohutu totoonulalo bangusa lowali hiluwoáa wolo angguru -- deúito-yito angguru lonapusu hulotolio!"

⁹ Ngotaalio lo malaíkati otolulio lohunuhe to malaíkati duulota boito, wau helo ngiibode wolo suala daá, "Taa u molubo binatangi boito wolo buílio, wau o tuoto binatangi boito tobaya meaalo to uluúlio,

¹⁰ tau boito mamongilu angguru lo Allahu Taáala, deúito-yito angguru lomulukaa-Lio u matilua-Ngio ode delomo tapahula-Lio, loú diila ililangia penu boli ngoídi maó! Ngoáamila tau boito masikisaa-Lio todelomo tulu wau walirangi totalu lo mamaa-laíkatiyalo mantali wau totalu lo Walaó Himba boito.

¹¹ Poloó monto tulu umopo sikisaa totau-tauwala boito mamohubulo mololaalaaita. Hui dulahu diila ohuhe-huheliilio timongolio sikisikisa, deúito-yito timongolio tahe lolubo binatangi boito

wau buílio, ngoáamila taa otuoto tanggulo binatang boito."

¹²Todelomo suáli botie umati lo Allahu Taáala tamo dungohe papaa-lentawalo Allahu Taáala wau tatapu molotolo hilao toli Isa palalu mowali sabali.

¹³Lapataó watia loódungohe suala lonto sologa lotahuda mai, "Tulade maó utie: tumulalo mai botia, potisanangilo tutu tau-tauwalo taamate toú donggo hemomaya to Eeya!" "Otutu!" tahuda lo Rohullah. "Timongolio mamohuheli mokalaja tióopatea, sababu tilapula lobubaya limongolio laito mawoli mongolio."

¹⁴Lapataó watia loóonto mola, yi loilaalo mai heengo tuwau u moputió. Toitaato heengo boito hulo-huloáa ngotaalio u oontonga debo odelo manusia. Tolunggo-Ngio o makuta hulawa tuwau, wau to uluú-Lio osabi tuwau u molalito.

¹⁵Lapataó ngotaalio lo malaíkati wewo yilumualai lonto Bele lo Allahu Taáala. Wolo suala daá, tio longibode to o-Lio tahulo-huloáa toitaato heengo boito, "Popoáyowa mola sabi-Mu boito wau otoolalo botia, sababu maa wakutuulio u

mohimoá tilapulo; dunia maloontapo u otoololo!"

¹⁶Tulusi Tio tahulo–huloáa toitaato heengo boito lopoáyo sabi–Lio ode dunia, yi dunia olo ilotoolo.

¹⁷Lapataó watia loóonto mola ngotaalio lo malaíkati wewo poli yilumualai lonto Bele lo Allahu Taáala tosologa. Tio olo dihudihu sabi tuwau u molalito.

¹⁸Lapataó uito, ngotaalio lo malaíkati wewo, taókawasa totulu, lonaó mai lonto mesba. Wolo suala daá tio longiibodu to malaíkati tadihudihu sabi u molalita boito, "Popoáyowa mola sabimu boito wau oyodelo huhuu–ngowaalo angguru todunia, sababu huhuu–ngowaalo boito malo loheto!"

¹⁹Yi malaíkati boito malopoáyo sabilio ode dunia wau helosabi huhuu–ngowaalo angguru lonto batangio, tulusi lopo mahula ode delomo pakaakasi hepo mitodelo angguru muluka lo Allahu Taáala uwali–walihuhu.

²⁰Huhuu–ngowaalo angguru boito pilitodio to bulemengo kota, wau lonto pakaakasi pomitodelo angguru boito matilu molohei duhu debo odelo dutula,

ngoilamingo tolo hetuto kilo, wau delomio ngopeé dulo meeteri.

15 ¹ Lapataó watia loóonto mola tohulungo hitua-tuawua u moólinggolabe wau laba-labaalo polutuío. Woluo pitu lota malaíkati wolo pitu baala upulitio. Uti-utieelo pulitio lo Allahu Taáala lopo bangguwatai mulukaa-Lio.

² Lapataó uito watia loóonto mola hitua-tuawua u oontonga maó debo odelo auhu winggilua ula-ulambohe tulu. Watia loóonto olo tau-tauwalo tamaa loóhaama to binatanggi wau buílio, wau loóhaama totaa utanggulio tiluoto wolo nomoro. Tau-tauwalo taloóhaama boito tihutihula tobiihu auhu winggilua. Wau dihudihu kocapi uilohi lo Allahu Taáala olimongolio.

³ Wau timongolio hipolahua lahu lei Musa, wato lo Allahu Taáala wau lahu lo Walaó Himba. Odie mola tingohio, "Eeya, Allahu Taáala Laba-labaalo kawasa, donggo boli udaá wau linggolabio huhuu-hutuwaalo Eeya! Olongia lo totoonulalo bangusa, donggo boli aadili wau otutu huhuu-hutuwaalo Eeya!

⁴ Tatoonu tadiila moohe to Eeya, yaa Eeya? Tatoonu tadiila mohuto mopo habari odudaá Eeya? Eeyaalo wambaío

tamantali. Totoonulalo bangusa mamonaó mai molubo Eeya, sababu totoonulalo huhutu lo Eeya u aadili maa iloontonga lotaa ngoáamila."

⁵ Lapataó uito watia loóonto mola Bele lo Eeya tosologa lohuó, wau Kema lo Eeya woluo todelomio.

⁶ Tulusi opitu malaíkati wolo opitu baala boito yilumualai lonto Bele lo Allahu Taáala. Pakeyangi limongolio lonto kaingi lenani ubelesi wau heínta–íntaawa. Wau timongolio lomake heúto duhelo u pilohutu lonto hulawa.

⁷ Lapataó tala tuwau lo wopato mahaluku boito longohi ode opitu malaíkati boito pitu tapahula hulawa upolu–polu wolo muluka lo Allahu Taáala, -- Allahu Taáala tatumu–tumulo ohiheo–hiheolo maó.

⁸ Yi Bele lo Allahu Taáala boito lopolu wolo poloó lonto odudaá wau kawasa lo Allahu Taáala. Wau ngotilonggadu opitu baala udilelo lo opitu malaíkati boito diipo lopulito, yi diaaluo penu boli ngotaa maó tamoó tuwoto ode delomo Bele lo Allahu Taáala.

16 ¹ Lapataó watia loódungohe suala daá lonto delomo Bele lo Allahu Taáala lotahuda ode opitu malaíkati boito,

"Ponaólo wau tuwatalo mola tuango lo opitu tapahula muluka lo Allahu Taáala boito ode yitaato dunia!"

² Maláikati bohulio malonaó wau loluwato mola tuango tapahulalio ode dunia.

Yi malo butulo mola boboo–heyaalo u polu–polutuó wau malo moótihela hapato to ngoáamila taa o tuoto binatangi boito, wau totau–tauwalo tahi poluboa buílio.

³ Lapataó uito maláikati oluolio loluwato mola tuango tapahulalio ode deheto. Yi taluhu deheto olo lowali debo odelo duhu lotailate, wau mailateelo mola totoonulalo mahaluku todelomo deheto.

⁴ Lapataó uito maláikati otolulio loluwato mola tuango tapahulalio ode duduu–tulaalo wau ode bubuu–tuwaala lotaluhu, yi ngoáamila taluhio lowali duhu.

⁵ Watia loódungohe maláikati taókawasa totudu lotaluhu loloíya, "Hukuumani umaa pilodehu mai lo Eeya yito aadili, ooó Laba–labaalo mantali, Allahu Taáala tawoluo, wau tamawoluo!"

⁶ Timongolio malo potuwato duhu umati lo Allahu Taáala wau duhu lomongo nabi; botia Eeya mohutu olimongolio mongilu duhu. Memangi mapatutilio uito ode limongolio!"

⁷ Lapataó watia loódungohe suala lonto mesba lolóiya mai, "Eeya, Allahu Taáala Laba-labaalo kawasa, otutu wau aadiliilo mola totoonulalo huumani u pilodehu mai lo Eeya!"

⁸ Lapataó uito malaíkati opatio loluwato mola tuango tapahulalio ode mato lodulahu, yi mato lodulahu olo yiluasilio lomobu manusia wolo patulio upolu-polutuó boito.

⁹ Manusia pilobu lopatulio ulaba-labaalo, wau timongolio helo laáanati tanggulo Allahu Taáala, taókawasa to babaa-lawaalo boito. Eleponu odito, timongolio diila lohuto lolilihu lonto duduu-sawaalo limongolio wau diila lohuto lomuji odudaá lo Allahu Taáala.

¹⁰ Lapataó malaíkati olimolio loluwato mola tuango tapahulalio ode tambati huhuloá lo binatang boito. Yi ngoilanggubu tambati huhuloá lo binatang boito lowali lodiólomo, wau manusia lodengeta dila sababu longongoto.

¹¹ Lapataó timongolio helo laáanati Allahu Taáala tosologa sababu timongolio longongoto wau sababu boboo-heyalo limongolio. Bo timongolio diila olo lolilihu

lonto totoonulalo huhutu limongolio u hileeta.

¹² Lapataó uito malaíkati olomio loluwato mola tuango tapahulalio ode Dutula Eperat uleidaá boito. Yi dutula boito mailooti tilinggula mongo onlongia lonto tiimuru lowali lolibaya maó.

¹³ Lapataó watia loóonto totolu rohu hileeta ulakulio debo odelo tumbihe. Motíidu tumbehe boito yilumualai lonto ngango lonaha, lonto ngango lo binatanggi, wau lonto ngango lonabi paluti.

¹⁴ Timongolio yito roroo-huwaalo hileeto tahe lohutu moólinggolabe. Otolu rohu boito lonaó ode ngoáamila onlongia ngoilanggubu dunia wau longambu olimongolio u mopaatea to Dulahu u udaá, deúito-yito Dulahu lo Allahu Taáala Laba-labaalo kawasa.

¹⁵ "Dungohilo! Waú dungga-dungga mai debo odelo tamootaówa! Potisanangilo tutu taa u debo dapadapato wau modaha boólio, tilinggula tio diila monaó loú laalaala wau mowali moolito totalu lotaa dadaata!"

¹⁶ Lapataó roroo-huwaalo boito longambu mongo onlongia boito totambati u tobahasa lo Ibrani ilunte Harmagedon.

¹⁷ Lapataó uito malaíkati opitulio loluwato mola tuango tapahulalio ode dulente. Yi máilo dungohe suala daá lonto tambati huhuloá li olongia to Bele lo Allahu Taáala, u lotahuda, "Mailapato!"

¹⁸ Lapataó malo toduwolo mola ilato lawode-molawode wau suala bulonggodu hula-hulabio wau bulo-bulonggalio, wau liluhu upolu-polutuó. Diila peénta maó helo toduo mai liluhu debo odelo uito anggadu manusia pilowali-Lio. Utie-utieelo liluhu umalo laba-labaalo.

¹⁹ Kota uleidaá boito lopoó lowali tolo tayadu, wau loántulu lomola olo kokoo-tawaalo lo ngoáamila lipu todunia. Lapataó iloéela mola lo Allahu Taáala Babel uleidaá boito. Yi Allahu Taáala lohutu olio ohilaa mongilu angguru monto tapahula lo angguru Allahu Taáala -- deúito-yito angguru lomulukaa-Lio uwali-walihuhu.

²⁰ Ngoáamila pulo yilooli lomola, wau ngoáamila huídee olo yilooli.

²¹ Didi daá lo esi, u tinggai ngobuheeto limo lopuulo kilo garamu, lodehu mai lonto hulungo lolemba totau-tauwalo. Yi timongolio helo laáanati Allahu Taáala sababu baala lodidi esi ulaba-labaalo daá boito.

17¹ Lapataó uito ngotaalio lo opitu malaíkati tadihu–dihu pitu tapahula boito lonaó mai ode laatia wau lolóiya, "Dulo, waú mamopo bilohei olemu woloolo mola tasuuntali daá boito mahukuu–maniyolo, deúito–yito kota leidaá boito u bilongulio totili lo duduu–tulaalo.

² Mongo olongia lodunia helohutu huloto wolio, wau tuango dunia lowali hiluwoáa sababu longilu angguru polo hulotolio."

³ Lapataó Rohullah longawasa mai olaatia, wau malaíkati boito lodelo olaatia ode huta datahu u luasi daá wau delita. Mola teto watia loóonto taabua ngota hulohuloáa toitaato binatangi tuwau u lakulio meela mohulango, wau upolu–polu leituladu wolo tataa–nggulaalo mohina to Allahu Taáala. Binatangi boito olunggongo pitu wau otunge mopulu.

⁴ Taabua boito pakepake boó lakulio lailoumu wau meela mohulango, wau diladailio wolo papaa–keyaalo hulawa, popoo–liyotowalo wau mutiala. To uluúlio tio dihudihu manggo hulawa tuwau upolupolu wolo susuu–aliyaalo uhina wau kootolo, hungo loú polo hulotolio.

⁵ Tobayalio tulatulade tanggulo tuwau u oboliilio hitua–tuawua u milakusudu

hetuúolo. Tanggulo boito yito "Babel U Leidaá, tiilo lotoonula tasuuntali wau taa loruusa todunia."

⁶ Lapataó watia loóonto deú taabua boito hiluwoaá wolo duhu umati lo Allahu Taáala wau duhu lotau–tauwalo tapilate yila–yilateelo maó sababu tatapu wau molotolo hilao toli li Isa. Toú watia loóonto taabua boito, watia lolinggolabu daá.

⁷ Tulusi malaíkati boito loloíya mai olaatia, "Wolo sababuulio yió lolinggolabu daá? Opiohelio waú mopoótaa mai olemu hitua–tuawua milakusudu hetuuó lotaabua boito wau rahasia lo binatangi umaa tilaéyalo, deúito–yito binatangi u olunggongo pitu wau otunge mopulu.

⁸ Binatangi boito muloololio mai tilumumulai, bo botia diilalo tilumumulo. Tio ngopeéepo mola malumualo monto pangato lomautu wau mamonaó moti dulungo ode obobinasa. Tau–tauwalo tahitumula todunia, u tanggulio diila leidaputali todelomo Buku Taa Tumutumulo toú dunia botie diipo pilowali mai mamó linggolabu wonu moóonto binatangi boito. Sababu binatangi boito muloololio mai mapeéenta tilumumulo.

Botia tio diilalo tilumumulo, bo tio mamuli lumenetai.

⁹To delomo suáli botie palalu o hikimati wau huhaama. Pitu lunggongo boito yito pitu huludu, deúito-yito huhuu-luduwaalo tambati pilo tihuloáa lotaabua boito. Wau pitu lunggongo boito olo yito pitu onlongia:

¹⁰Limo lonto olimongolio malodehu, tuwau donggo hemo malenta wau tuwau poli diipo leidungga mai. Wonu tio demei dungga, tio musu momalenta bo ngopeé mola.

¹¹Wau binatangi u muloololio mai mapeéenta tilumumulo, bo botia diilalo tilumumulo, deúito-yito onlongia u owalulio. Tio yito tala tuwau lo opitu onlongia boito olo, u botia donggo dulu-dulunga ode obobinasa.

¹²Tunge mopulu u iloontongamu boito yito mopulu onlongia udiipo lolumulo lomalenta. Bo timongolio mawohialio kawasa u momalenta odelo onlongia peé-peéenta wolo binatangi boito ngojamu mola hiheolio.

¹³Opuu onlongia botie ngoáamilalo opatuju u tutuuwauwa; timongolio ngoáamilalo mohudu maó olootolo wau okokawasa limongolio to binatangi boito.

¹⁴Timongolio mamopaatea moluwali Walaó Himba boito. Bo Walaó Himba boito wolo tahiduduá o-Lio utatapu wau molotolo hilao tamaa tiliya-Ngio wau tilulao-Tio boito mamó poólaaheó mongo onlongia boito, sababu Tiolo Eeya loú totoonulalo tuani, wau Olongia loú totoonulalo onlongia."

¹⁵Malaíkati boito lolóiya olo, "Taluhu u ilootongamu boito, tambati pilo tihuloáa lo tasuuntali boito, deúito-yito babaa-ngusawalo, raraa-aayatiyalo, lilii-puwaalo, babaa-hasawaalo.

¹⁶Tunge mopulu u iloontongamu wau binatangi boito mamolonuó tasuuntali boito. Timongolio mamó lambata totoonulalo hitua-tuawua u mililikiilio, wau mopolaala olio. Timongolio mamonga tapulio wau mopobinasa olio wolo tulu.

¹⁷Sababu Allahu Taáala malo poóliyooó hilaa limongolio u moponaó lanjana lo Allahu Taáala. Allahu Taáala lohutu olimongolio ngopikiilangi u mohudu okokawasa limongolio to binatangi boito, alihu binatangi boito momalenta tunggula motoduo wolo upilo tahuda lo Allahu Taáala.

¹⁸Taabua taa iloontongamu boito yito kota leidaá, u momalenta mongo olongia todunia."

18 ¹Lapataó uito watia loóonto mola malaíkati ngota wewolio lolaahi lonto sologa. Tio okawasa uleidaá, wau baangio lohutu ngoilanggubu dunia lowali lotilango.

²Wolo suala daá tio longiibodu, "Malodehu! Babel leidaá malodehu! Botia tio lowali tambati lo lalaa-tiyaalo wau roro-huwaalo u hileeta. To delomio hitumula totoonulalo bulungi hidala-dalaala unajiisi wau uilonuó tau.

³Sababu totoonulalo bangusa malongilu angguru lonapusu polo hulotolio. Mongo olongia lodunia helohutu huloto wolio, wau tahipo dahangia todunia lowali kaya lo napusuulio udiilalo iloótonga boito."

⁴Lapataó watia loódungohe mola suala wewo lonto sologa lotahuda mai, "Luwaloolo, umati-Ú! Luwaloolo monto delomio! Timongoli diila maó poduduá duduu-saallo, wau moduduá momanta hukuu-manilio!

⁵Sababu dusalio wonto-wontolo demola hulungo, wau Allahu Taáala mamoeéela ololeetio.

⁶ Pohutua maó tio debo odelo tio malo pohutu mai olimongoli; balasiyalo tio poóoluo piúwa duólo ngoáamila umaa pilohutulio. Tuangilo manggolio wolo minumani u poóoluo lebe motoheetaó wolo minumani upilo dapatio maó olimongoli.

⁷ Wohiyalo olio polodutolo wau osuusa lohilao u tutuuwauwa daatalio wolo odudaá wau ododaata ngoáamilalo u yilohilio ode batangalio lohihilao. Sababu tio wambaó laito hemoloíya to batangalio, 'Waú botie onlongia taabua tahemo malenta! Waú diila janda; waú diila tamoó toduo mai osuusa!'

⁸ Sababu suáli boitolo, yi todelomo dulahio tuwau wambaío tio maódungga mai lobaala -- ngongoto, osuusa, wau polobiti. Wau tio mapobuwolio wolo tulu, sababu okawasaalo Eeya Allahu Taáala tamo mutoó olio boito."

⁹ Mongo onlongia lodunia tamoduduá todelomo huhuu–tuwaalo hulotolio wau napusu lotaabua boito mahumoyongo wau mohilimutaó kota boito wonu bolo timongolio moóonto poloó mohubulo mola monto tulu u momobu olio.

¹⁰ Timongolio matimihula monto molamingo sababu timongolio moohe otuhata lopolo dutololio. Timongolio mamoloíya, "Aduu, malo odie topotalalio kota umasa-masahulu botie -- kota Babel u molotolo! To delomo ngojamu wambaó hukuumanimu mapilonaó!"

¹¹ Mongo daahangi todunia olo humoyongo wau motilimi sababu taabua boito, sababu diaaluo penu boli ngotaa maó poli tamotali babaa-langiyalo hepo daahangi limongolio.

¹² Diaaluo tamotali hulawa, talaá, poliyoto wau mutiara limongolio; wau olo kaingi lenani, kaingi lailoumu, sutera, kaaini meela mohulango: totoonulalo ayu hidala-dalaala udiila laito odungga, babaa-langiyalo monto tuálanga wau monto ayu u himahalea monto tombaha, wate, wau puaalamu;

¹³ alipo ayu moolingo, ramba-ramba, alama u boboolo moonu, damahu u moonu boolio, wau alama; angguru wau yinulo, labu wau pale, sapi wau himba, wadala wau kaleta, mongo wato, tumbaó nyawa lomanusia olo.

¹⁴ Mongo dahangi loloíya maó ode taabua boito, "Ngoáamila u otohilaa milikiyomu

madiduluo maó, wau totoonulalo ododaata ngoáamilalo uwolemu wau totoonulalo u mopiohu olemu mailooli. Diilalo odunggamu!"

¹⁵ Mongo daahangi tamalowali kaya sababu helo daahangi tokota boito matimihulo monto molamingo, sababu timongolio moohe otuhata lo polo dutololio. Timongolio mahumoyongo wau motilimi,

¹⁶ Iapataó moloíya, "Aduu, malo odie topotalalio kota umasa-masahulu botie! Biasaalio tio kakaingi lolenani, kaingi lailoumu wau kaingi meela mohulango; biasaalio tio polupolu wolo pake hulawa, poliyoto wau mutiara.

¹⁷ Bo todelomo ngojamu wambaó, tio maíloolia lo totoonulalo okokayalio boito!" Ngoáamila nakoda, panumba, wau tauo kaapali, wau ngoáamila taa u popehulio todeheto, tilimihula lonto molamingo.

¹⁸ Wau hiwatiá tou timongolio loóonto mota poloó lohubulai lonto tulu ulomobu kota boito. Timongolio longiibodu, "Diila peéenta maó woluo kota wewo debo odelo kota leidaá botie!"

¹⁹ Yi timongolio lomuyuhude peahuó to lunggongi mongolio odelo tuoto lotilimi,

tulusi hilumoyongo wau wuwa-wuwaatió, "Aduu, malo odie topotalalio kota leidaá botie! Okokayalio malohutu ngoáamila taa o kaka-paliyaalo todeheto lowali kaya! Bo todelomo ngojamu wambaó, tio maíloolia loú totoonulalo maó!"

²⁰Wuu sologa, poti wengahulo mola to oáantulu lokota boito! Wuu umati lo Allahu Taáala, mongo rasulu, mongo nabi, poti wengahulo mola! Sababu Allahu Taáala malo hukuumaní mai olio odelo toli tou wolo uma pilohutulio limongoli!

²¹Lapataó uito, malaíkati ngota tamolotolo boli buheli daá lomintaá botu tuwau -- debo odelo udaá lobotu hihilinga uléidaá -- tulusi pilomahulio mola ode delomo deheto wau lolóiya, "Odieelo mola pohuliilio kota lo Babel umasa-masahulu boito mapo mahulolio loú moóohuú tilinggula diilalo odungga.

²²Tingohu muusiki monto tamooitohe kocapi, monto bibii-duwaniyalo, monto tamoo-hiipawa tulali monto tamoo-hiipawa torompeti, diilalo odungohe monto olemu! Diilalo odungga olo penu boli ngotaa maó taáhali mokalaja teto, wau tingohu botu pohilinga olo diilalo odungohe.

²³ Tau diilalo moóonto olo tilango tohe monto olemu; wau diilalo odungohe olo olaame potihunggu lonika teto. Mongo daahangimu yito tau–tauwalo talaba–labaalo tahimulowa lo ulipu todunia, wau wolo íi–limiyalo sibirimu yíó helo himbulo ngoáamilalo bangusa todunia!"

²⁴ Babel hilukuumani–Lio sababu todelomo kota boito máilo dungga duhu lomongo nabi, duhu umati lo Allahu Taáala -- limbuío maó duhu lo ngoáamila taa u mapilatelio yila–yilateelo maó totudu lodunia.

19 ¹ Lapataó uito watia loódungohe hitua–tuawua debo odelo suala bubuu–lontunga lotaa dadaata lonto sologa tahemo ngibo–ngiibodu, "Pujiaalo Allahu Taáala! Allahu Taáalanto yito Allahu Taáala tamo poáahu; Tio Allahu Taáala taúdaá wau okawasa!

² Pomuto–lo aadili wau molinepo! Tio malo podehu mai hukuumani to tasuuntali daá, tamoruusa dunia wolo polo hulotolio. Allahu Taáala malo hukuumani mai tasuuntali boito, sababu tio lomate yila–yilateelo maó mongo wato lo Allahu Taáala."

³ Lapataó suala lotaa dadaata boito luli longiibode, "Pujiaalo Allahu Taáala! Poloó lotulu u momobu kota leidaá boito mamohubulo diila ohuhe-huheliilio!"

⁴ Yi odulo pulaa pato taúwa boito wau opaato mahaluku u hipalita totambati huhuloá li olongia boito leidambaólo mola wau lolubo Allahu Taáala tahulo-huloáa toitaato tambati huhuloá li olongia. Timongolio loloíya, "Amin! Pujiaalo Allahu Taáala!"

⁵ Lapataó dungo-dungohei lonto tambati huhuloá li olongia boito suala u loloíya, "Pujiaalo Allahu Taáala, wuu ngoáamila wato lo Allahu Taáala, wau ngoáamila tau -- udaá wau kikiió -- tamolubo Allahu Taáala!"

⁶ Lapataó uito watia loódungohe hituatuawua debo odelo suala ngopoámbua lotaa dadaata daá; tingohio debo odelo buólo u hulo-hulopaño wau debo odelo bulonggodu u bubuu-lontunga. Watia loódungohe olimongolio loloíya, "Pujiaalo Allahu Taáala! Sababu Eeya, Allahu Taáalanto Taa Laba-labaalo kawasa boito masaatia hemo malenta!"

⁷ Duloolo ito motisangi wau motiwengahu; duloolo ito momuji

odudaá-Lio! Sababu malei dungga dulahu ponikaalo umodihu garai Walaó Himba boito, wau bulentiti-Lio malo tidapato tonika-Lio.

⁸ Pakeyangi lenani u heínta-intaawa mailohi olio u pomake." (Pakeyangi lenani boito yito totoonulalo huhutu mopiohe u pilohutu umati lo Allahu Taáala.)

⁹ Lapataó malaíkati boito lolóiya mai olaatia, "Tulade maó utie: 'Potisanangilo tutu taa tiloduo ode potihunggu lonika Walaó Himba boito.'" Lapataó malaíkati boito luli loduhengai, "Uti-utieelo habari u otutu lonto Allahu Taáala."

¹⁰ Watia leidambaólo mola totalu lo malaíkati boito wau ohilaa molubo olio, bo tio lolóiya mai olaatia, "Diila! Diila polubo olaú, tubowalo Allahu Taáala sababu waú olo wato tutuuwauwa debo odelo yió wau debo odelo ngoáamila wutatumu tadihu-dihu tióotutua to ososakusi li Isa!" Sababu ososakusi li Isa boitolo u loílihami mai totau-tauwalo tahipo nubuwatia.

¹¹ Lapataó watia loóonto mola sologa lohuó, tulusi oóonto mai wadala hula tuwau. Joki-Lio táilunte Sangi Tatapu wau Molotolo Hilao wau Sangi Otutu. Tio aadili

todelomo mopodehu hukuumanu wau todelomo popaatea u pilohutu-Lio.

¹² Mato-Lio debo odelo léito tulu wau tolunggo-Ngio Tio pakepake makuta dadaata. To batanga-Lio tulatulade tanggulo tuwau; wau bo Tio lohihilao tamotota tanggulo boito.

¹³ Jumba u pilomake-Lio mailomu todelomo duhu. Wau Tio ilunte "Tahuda lo Allahu Taáala".

¹⁴ Suludadu popaatea losologa hiduduá o-Lio wolo hitaéya towadala hula, wau hipakea lenani, u moputió belesi.

¹⁵ Lonto ngango-Lio yilumualai wamilo tuwau u molalito wau wolo wamilo boito Tio mamó olaaheó babaa-ngusawalo, wau Tio mamó malenta olimongolio wolo tunggudu wate. Tio mamó mitode angguru to pakaakasi hepo mitodelo angguru muluka lo Allahu Taáala Taa Laba-labaalo kawasa.

¹⁶ Tojumba-Lio wau to bungolopa-Lio tulatulade tanggulo utie, "Olongia totoonulalo onlongia, wau Eeya totoonulalo tuani."

¹⁷ Lapataó watia loóonto mola malaíkati ngota tihutihulo toitaato mato lodulahu. Wolo suala daá tio longiibodu ode

ngoáamila bulungi u hitombota todulente. "Duloolo motiámbu u modumango ode potihunggu daá u pilopo lamahu lo Allahu Taáala!

¹⁸Duloolo molamela tapu lomongo olongia, tapu lomongo eyaanggu, wau tapu lo paapahaa–lawaniyalo; duloolo ito molamelo mongo joki lowadala wolo wawaa–dalaalio wau tapu ngoilanggubu umati lomanusia, udaá wau kikiió, wato boli tau lolopato!"

¹⁹Lapataó watia loóonto binatangi boito, wau mongo olongia lodunia wolo diti lo popaatea limongolio, lotiámbu u mopaatea moluwali o–Lio u taétaé towadala hula boito wau diti lo popaatea–Lio.

²⁰Yi binatangi boito ilowaúpa peé–peéenta wolo nabi paluti tamalohutu momoóo–linggolabeyalo totalu lo binatangi boito. (Wolo momo@oo–linggolabeyalo boitolo binatangi boito helo himbulo totau–tauwalo taótuoto binatangi boito, wau tahi polubowa buí lo binatangi boito.) Tulusi binatangi boito wau nabi paluti boito pilomahulo hitumula ode delomo ahu tulu uléi–léita wolo walirangi.

²¹ Wau diti lopopaatea limongolio hepilate yila–yilateelo maó wolo wamilo u yilumualai lonto ngango joki lowadala hula boito. Yi bubuu–lungiyala olo matilu mombotai yilonga wolo mangowalio tapu limongolio tahe pilate yila–yilateelo maó boito.

20 ¹ Lapataó uito watia loóonto mola malaíkati ngota lolaahi lonto sologa. To uluúlio tio dihudihu uúnti pangato lomautu wau pomungu tuwau uleidaá.

² Tulusi tio loheúpa naha boito, tulidee panggola, -- deúito–yito Ibilisi meaalo Rohu Moleeta boito -- wau lomungu maó ngolihi lotaunu mola hiheolio.

³ Lapataó malaíkati boito lopomahula mola naha boito ode delomo pangato lomautu, tulusi longunti pangato boito wau silehelilio, alihu naha boito diilalo mowali mohimbulo to babaa–ngusawalo toú diipo maasa ngolihi lotaunu mola boito mopulito. Lapataó uito tio musi hulialo towakutu ungopeé mola.

⁴ Lapataó watia loóonto mola totoonulalo tambati huhuloá li onlongia, wau tau–tauwalo tahihuloá totambati huhuloá li onlongia boito yilohia kawasa u mopodehu

hukuumani. Watia loóonto mola olo jiwa lotau–tauwalo tamaa hetimade lunggongio sababu timongolio helongohi sakusi pasali li Isa, wau helo pololadu tahuli lonto Allahu Taáala. Tau–tauwala boito diila hipolubowa binatangi meaalo buílio. Timongolio olo diila peéenta maó lololimo tuoto lo binatangi boito tobaya meaalo to uluú limongolio. Yi timongolio muli tumumulai wau momalenta odelo onlongia peé–peéenta woli Isa ngotilonggadu ngolihi lotaunu mola hiheolio.

⁵ Uti–utieelo bohulo tahapu tau–tauwalo mate muli bongulo–Lio mai. (Bo tau–tauwalo mopoowate wewolio diilalo potumulo–Lio mai ngotilonggadu wakutu ngolihi lotaunu mola boito.)

⁶ Potisanangilo tutu tau–tauwalo tamoduduá muli bongulo–Lio mai tobohulo tahapu boito. Timongolio paatuti mowali miliki lo Allahu Taáala. Opopate u oluolio diila okawasa toli mongolio. Timongolio mamowali mongo iimamu lo Allahu Taáala mongo iimamu li Almasi; wau timongolio mamo malenta peé–peéenta wo–Lio ngolihi lotaunu mola hiheolio.

⁷ Lapataó mopulito ngolihi lotaunu mola boito, Ibilisi malopato-Lio monto tutupalio,

⁸ wau tio mamonaó mongaakali babaa-ngusawalo taloó-loópo to ngoilanggubu dunia, deúito-yito Gog wau Magog. Ibilisi mongambu olimongolio u mopaatea, tuwaulio lojumulaa udadaata tutu, debo odelo daata lohungayo todeheto.

⁹ Yi timongolio olo moti pulepelo mola ode ngoilanggubu dunia, tulusi momala pilo tikemawa umati lo Allahu Taáala wau kota upilonu lo Allahu Taáala. Bo tulu motuhutai monto hulungo wau mopobinasa olimongolio.

¹⁰ Lapataó Ibilisi u mohimbulo olimongolio boito, pomahulo-Lio ode delomo auhu tulu wau walirangi. Teteetolo tambatilio lo binatangi wau nabi paluti boito pomahulolo meimulo. Timongolio masikisaa-Lio hui wau dulahu u ohiheo-hiheolo maó.

¹¹ Lapataó uito watia loóonto mola tambati huhuloá li onlongia moputió tuwau uleidaá wau Tio tahulo-huloáa toitaatio. Hulungo wau dunia yilooli lonto talu-Lio, tilinggula diilalo iloontonga.

¹²Wau watia loóonto tau-tauwalo yilate, kikiío, udaá, hitihula totalu lotambati huhuloá li olongia boito. Yi bubuu-kuwaalo olo hiluólio. Tulusi buku tuwau u wewo hiluólio mola, deúito-yito Buku lo Taa Tumutumulo. Lapataó hukuumaní pilopodehu-Lio totaa yilate, lobaalia wolo huhutu limongolio loduduá u tulatulade todelomo bubuu-kuwaalo boito.

¹³Lapataó deheto lohudu maó tau-tauwalo tailate tawoluo to delomio. Mautu wau Aalamu lomautu olo lohudu maó tau-tauwalo tailate tawoluo to olio. Wau tau-tauwalo tailate boito ngoáamilalo dilehua hukuumaní lobaalia wolo huhutu limongolio.

¹⁴Lapataó Mautu wau Aalamu lo Mautu pilomahulo ode delomo auhu lotulu. (Auhu lotulu botie yito opopate tahapu oluolio).

¹⁵Tau-tauwalo tadiila hitulade tanggulio todelomo Buku lo Taa Tumutumulo, pilomahulo ode delomo auhu lotulu.

21 ¹Lapataó watia loóonto mola hulungo u bohu wau dunia u bohu. Hulungo bohulio wau dunia bohulio olo yilooli, wau deheto olo yilooli.

² Yi watia loóonto mola kota mantali boito, deúito-yito Yerusalemu u bohu, lolaabei lonto sologa lonto Allahu Taáala. Kota boito mapilo dapato debo odelo ngotaalio li bulentiti taabua diladai u modungaya wolo bulentiti talolaí.

³ Lapataó watia loódungohe suala lonto tambati huhuloá li onlongia boito longiibode wolo loóohuú, "Botia tambati biluloá lo Allahu Taáala yito peé-peéenta wolo manusia! Tio matumumulo woli mongolio wau timongolio mamowali umati-Lio. Allahu Taáala lohihilao mawoluo mai woli mongolio wau mowali Allahu Taáala limongolio.

⁴ Tio mamomaide ngoáamilalo ponu monto mato limongolio. Opopate madiduú; osuukali, hiyongo, meaalo penu boli mo@olaasa ngongoto olo madiduú. Susuu-aliyaalo udeedelo mailooli."

⁵ Lapataó Tio tahulo-huloáa toitaato tambati huhuloá li onlongia boito lotahuda, "Botia Waú mamohutu ngoáamilalo bohu!" Tio lotahuda olo olaatia, "Tuladelo utie, sababu tataa-heyalo botie otutu wau mowali palacayalo."

⁶ Lapataó Tio lotahuda mai, "Mailapato! Waúlo tabohulio wau tapulitio; Waúlo Eeya

monto Bohulio demola Pulitio. Timiïdu taa u mototoángo, mapelumo-Ú wolo beebasi monto butu lotaluhu u mongohi tutumulo.

⁷ Tau-tauwalo taloóhaama mamololimo susuu-aliyaalo boito monto ola-Ú. Waú mamowali Allahu Taáalaalio, wau tio mowali walaúu-Ú.

⁸ Bo taa mooheya, tamoo-hiyanatia, taa moruusa, tamoomatea mate-mateelo maó, taa huloto, taa u momeke ïii-limiyalo gaibu tamoo-lubowa balaahala, wau ngoáamila tamoo-himbuloa, mapomahulo ode delomo auhu lotulu wau walirangi uhinta-hintalabu, deúito-yito opopate tahapu oluolio."

⁹ Ngota towolota opitu lo malaíkati boito tamaa lodihu motiïdu tataa-pahulaalo u polupolu wolo opitu baala pulitio boito lonaó mai ode laatia wau loloíya, "Dulo! Waú mamopo bilohei olemu Bulentiti, deúito-yito dile taabua lo Walaó Himba."

¹⁰ Yi Rohullah longawasa mai olaatia wau malaíkati boito lodelo mola olaatia ode balitutuó huïdu u molanggato daá. Tio lopobilohe olaatia Yerusalemu, kota mantali boito, kota boito lotuhutai lonto sologa, lonto Allahu Taáala,

¹¹ wolo tinelo wau odudaá lo Allahu Taáala. Kota boito molilingga debo odelo botu poliyoto, debo odelo botu baiduri ponda u moolango debo odelo kristali.

¹² Dingingo meeseli topalitio molanggato wau udaá, wolo mopulaa duluo huhebu hulubangilio, wau dilaaha lo malaíkati mopulaa duluo. To motiídu hulubangi boito hitulade tanggulo loú mopulaa duluo suku bangusa lo Isiraílu.

¹³ Mohelu totolu huhebu hulubangi u talutalu ode timiídu mantahu: totolu to ambahu tiimuru, totolu to ambahu hulialio, totolu to ambahu tilayo, wau totolu to ambahu otolopa.

¹⁴ Dingingo meseli lokota boito bilongulio toitaato mopulaa duluo lobotu pundasi. To boboo–tuwaalo pundasi boito hitulade tanggulo lo opulaa duluo rasulu lo Walaó Himba boito.

¹⁵ Malaíkati talo bisala wolaatia boito o tunggudu poluúdu lonto hulawa, u moloúdu kota boito, motiídu huhebu lo hulubangilio, wau dingingo meeseliilio.

¹⁶ Kota boito modeliilio otutulio wopato -- hayaío tutuuwauwa wolo tanggadio. Yi malaíkati boito loluúdeó kota boito wolo tunggudu poluúdio; lopatataó hayaío dulo

lihu wopato hetuto kilo; tanggalo wau langgatio tutuuwauwa wolo hayaño.

¹⁷Toú malaíkati boito loluúdeó dingingo meeseliilio lopatataó langgato dingingo meeseli boito wolomo pulu lomeeteri. Tuuúdu u pilomake lo malaíkati boito yito tuuúdu uhepomake lomanusia.

¹⁸Dingingo meeseli lokota boito pilohutulio lonto botu baiduri ponda, hiambola kotalio lohihilao lonto hulawa tutu, moolango debo odelo winggilua.

¹⁹Boboo-tuwaalo pundasi lokota boito diladai wolo totoonulalo botu poliyoto hidala-dalaala. Botu lopundasi u bohulio pilohutu lonto botu baiduri ponda, u oluolio lonto botu poliyoto hamahama moidu, otolulio lonto botu poliyoto lakulio moidu, opatio lonto botu poliyoto moídu ohalaga daá,

²⁰olimolio lonto botu baiduri sepa, olomio lonto botu poliyoto meela, opitulio lonto botu poliyoto molalahu hulawa, owalulio lonto botu poliyoto moidu monto wahuéntea, otiolio lonto botu poliyoto molalahu u ohalaga daá, opululio lonto botu poliyoto krisopras, opulaa tuwaulio botu poliyoto lajuard, wau opulaa duluolio lonto botu poliyoto lailowumu.

²¹ Opulaa duluo lohuhebu hulubangilio tilitangoa loú mopulaa duluo mutiara, timiídu huhebu pilohutu lonto mutiara ngobotu. Dalalo tokota boito pilohutu lonto hulawa tutu, moolango debo odelo winggilua u molilingga.

²² Watia diila loóonto Bele lo Allahu Taáala todelomo kota boito, sababu Bele lo Allahu Taáalaalio yito Eeya lohihilao, Allahu Taáala Taa Laba-labaalo kawasa, wau Walaó Himba boito.

²³ Kota boito diila palalu otinela mato lodulahu meaalo hulalo, sababu odudaá lo Allahu Taáala molinela olio, wau Walaó Himba boito yito tohelio.

²⁴ Babaa-ngusawalo todunia mamonaó todelomo tinelio, wau mongo olongia olo mamodelo okokaya limongolio ode delomo kota boito.

²⁵ Huhuu-hebuwaalo lokota boito mamohuó ngotupa lodulahu; diila taheeútalio sababu diaaluo hui teto.

²⁶ Odudaá wau okokaya lo babaa-ngusawalo madeloolio ode delomo kota boito.

²⁷ Bo taa umohutu susuu-aliyaalo umoó lonuó, meaalo taa u mohimbulo -- limbuío maó penu boli wolo unajisi wambaío,

sama-samaata diila tatumuwota ode delomio. Tamaa tumuwotaó bo taa u tanggulio tulatulade todelomo Buku Taa Tumutumulo, buku lo Walaó Himba boito.

22 ¹ Malaíkati boito olo lopo bilohei olaatia dutula u taluhio mongohi tutumulo. Dutula boito he@inta-intaawa debo odelo Kristali, wau tolo-tolohei lonto tambati huhuloá lo Allahu Taáala wau Walaó Himba boito,

² tohuungo dalalo tokota boito. Tobiihu dutula boito, tomohu-mohualialio woluo bungo lo ayu pobutua lo tutumulo, u hemomungo poóopulaa duluo ngotaunu, deúito-yito peéenta ngohula. Duungio hepomake u mopoóluli babaa-ngusawalo.

³ Todelomo kota boito diaaluo penu boli tuwau maó u ilotuhata laánati lo Allahu Taáala. Tambati huhuloá lo Allahu Taáala wau Walaó Himba boito maa odungga todelomo kota boito. Mongo wato-Lio mataáaluku wau mohulumati to o-Lio,

⁴ wau moóonto baya-Lio. Tanggu-Lio matuladulo tobaya limongolio.

⁵ Timongolio diila tamomalalu tohe meaalo tinelo dulahe, sababu hui madiduú, wau Eeya Allahu Taáala lohihilao mamolinela olimongolio. Yi

timongolio mamo malenta odelo olongia u ohiheo-hiheolo maó.

⁶ Lapataó malaíkati boito loloíya mai olaatia, "Loíya botie otutu wau mowali palacayalo. Eeya Allahu Taáala talongohi mai Rohu-Lio tomongo nabi, malo ngutolia malaíkati-Lio u mopo biloheó tomongo wato-Lio wolo umusi huáa motoduo mai."

⁷ "Poótuota maó utie!" tahuda li Isa, "Wau mahuáa meidungga mai. Potisanangilo tutu tamodungohe loloo-iyalo lo nubuwati todelomo buku botie!"

⁸ Watia, Yahya, maloó dungohe wau loóonto ngoáamilalo botie. Lapataó watia yilapato lodungohe wau loóonto olio watia leidambaólo mola totalu lo malaíkati tamalo pobilohei olaatia ngoáamilalo boito, wau watia ohilaa molubo olio,

⁹ bo tio loloíya mai olaatia, "Diila! Diila polubo olaatia. Tubowalo Allahu Taáala! Sababu watia olo wato debo odelo yió, wau debo odelo mongo wutatumu mongo nabi wau ngoáamila taa u modungohe tataa-huliyaalo todelomo buku botie!"

¹⁰ Lapataó tio luli loloíya, "Diila maó depuhe loloo-iyalo lo nubuwati todelomo buku botie, sababu malembidei

wakutuulio, ngoáamilalo botie mamotoduo.

¹¹ Taa u moleeto, hulialo maó tulusi hemohutu u moleeto; taa u najisi, hulialo maó moponajisi batangalio; taa u moduduá otohilaa lo Allahu Taáala hulialo maó moduduá tulusi otohilaa lo Allahu Taáala, wau taa utumu-tumulo tolomodu duólo Allahu Taáala, hulialo maó tulusi tumutumulo tolomodu duólo Allahu Taáala"

¹² "Poótuota maó utie!" tahuda li Isa, "Diilalo mohiheo Waú mamei dungga loú modelo wuupa u motuli motíidu taa moduduá wolo umaa pilohutulio.

¹³ Waúlo tabohulio wau tapulitio; Waúlo Eeya monto Bohulio demola Pulitio."

¹⁴ Potisanangilo tutu taa u momoboá jumbalio tunggula belesi alihu timongolio ohaku molamelo hungo lo ayu potumulo wau tumuwoto ode delomo kota boito moli huhebu hulubangilio.

¹⁵ Bo tau-tauwalo tahi pohutua susuu-aliyaalo u hina, tahi pomakea i@ii-limiyaalo gaibu, wau tau-tauwalo tahi pohutua huhuu-hutuwaalo u huloto, tamoomatea mate-mateelo maó, tahi polubowa balaahala, wau tau-tauwalo

tahi pohimbuloa, mopio wolo loíya
meaalo wolo huhutu, ngoáamila tau boito
tambatilio to bulemengo kota boito.

¹⁶"Waú, Isa, malo ngutolia malaíkati-Ú
ode limongoli alihu tio mopoótaa
susuu-aliyaalo botie u polohuna daá
ode jajaa-maáalo. Waú botie wali mai
lei Dauda; Waúlo poliyama tiimuru u
mobaango boito."

¹⁷Rohullah wau Bulentiti Taabua lotahuda
mai, "Duloolo!" Timíidu taa u modungohe
utie musi olo moloíya, "Duloolo!" Tatoonu
tamo totoángo, mamusi tio monaó mai!
Wau tatoonu táilo hilao, mamusi mohama
taluhu u mongohi tutumulo boito wolo
beebasi.

¹⁸Ode timíidu taa u modungoheó
loloo-iyaala lo nubuwati todelomo buku
botie, watia, Yahya u mopoéelai utie:
wonu tau moduhengaó hitua-tuawua to
loloo-iyaala lo nubuwati botie, yi Allahu
Taáala mamó duhengai hukuumaní ode
tau boito wolo babaa-lawaaalo upilo
bayahei todelomo buku botie.


¹⁹Wau wonu taa mopo kulangi maó
hitua-tuawua monto loloo-iyaala lo
nubuwati botie, yi Allahu Taáala olo
mamopo kulangi tayadio upilo bayahei

todelomo buku botie -- deúito-yito
tayade monto bungo lo ayu tutumulo wau
monto kota mantali boito.

²⁰Tio talopo tunggulo ngoáamila habari
botie lotahuda mai, "Otutu, Waú mahuáa
meidungga mai!" Amin! Podunggalo mai,
oo Eeya Isa!

²¹Pohileaala duá Eeya Isa mongohi
balakati-Lio ode ngoáamila umati lo
Allahu Taáala!

Bahasa Gorontalo



Gorontalo

LAI - 2006 Edition

© 2006 LAI

<http://www.bible.is/copyright?base=GORLAIN>